




3 1761 09702614 0

Toronto University Library
Presented by

*The British and Foreign Bible Society
through the Committee formed in
The Old Country
to aid in replacing the loss caused by
The disastrous Fire of February the 14th 1890*





Bible
Anceityum
1863

*Bible
Malay
New Series*

Bible. Aneityum

INTAS-ETIPUP MAT

U

IESU KRISTO,

NATIMARID UJA,

IM

NATIMI IMYIATAMAIG CAIJA.

ERIS ASUPTECNAIG INTAS CRISI AN TAS ANEITYUM,
NYU HEBRITES.

LUNTUN:

IS ECETAGED NITASVITAI INEIGKI A WILLIAM M. WATTS, VAI
ILPU RAIMU IJI EIG ERA IKA ARA ERI AHTAI INTAS ITAUP IMI
NUPU BERITANI IM NUP URAI IJI TAKA PECE ASEGA.

1863.

W

$$\frac{10410}{3112190}$$

NIJI IDAI ITASVITAI ASEGA ER ESIAIG AN TAS-ETIPUP MAT.

	<i>Nuari-tas Alupas.</i>		<i>Nuari-tas Alupas.</i>
Madius	28	1 Timodeus	6
Markus	16	2 Timodeus	4
Lukas	24	Taitus	3
Joanes	21	Filimon	1
Niji Auritai o ilpu Apostolo	28	Ilpu Hibru	13
Nupu Roma	16	Jakobus	5
1 Nupu Korindus	16	1 Pitrus	5
2 Nupu Korindus	13	2 Pitrus	3
Nupu Calesya	6	1 Joanes	5
Nupu Efesus	6	2 Joanes	1
Nupu Filipai	4	3 Joanes	1
Nupu Kolose	4	Juta	1
1 Nupu Desalonaika	5	Nitai ehvaig	22
2 Nupu Desalonaika	3		



Digitized by the Internet Archive
in 2014

INTAS-UPENE

IS AGED A

M A D I U S.

NUARIN-TAS ALUPAS 1.

NITASVITAI vai ilpu retpoi Iesu Kristo, mapoi Tevit, is mapoi Ebrahim aien.

2 Is apos Aisak a Ebrahim; is apos Jakob a Aisak; is apos Juta im ilpu etoan a Jakob;

3 erus apos Feres im Sera a Juta im Temar; is apos Esrom a Feres; is apos Eram a Esrom;

4 is apos Aminatab a Eram; is apos Neson a Aminatab; is apos Salmon a Neson;

5 erus apos Boos a Salmon im Rehab; erus apos Obet a Boos im Rud; is apos Jese a Obet;

6 is apos Tevit natimarid a Jese; is apos Solomon a Tevit natimarid im lep aien *is ehgai* Uraia aien;

7 is apos Rihoboam a Solomon; is apos Abaija a Rihoboam; is apos Esa a Abaija;

8 is apos Jihosofat a Esa; is apos Jihoram a Jihosofat; is apos Usaia a Jihoram;

9 is apos Jodam a Usaia; is apos Ehas a Jodam; is apos Hesekaia a Ehas;

10 is apos Manasi a Hesekaia; is apos Emon a Manasi; is apos Josaia a Emon;

11 is apos Jekonaia im ilpu etoan a Josaia ubutpotet u naopan iyehki eris imyiapan ra Babelon;

12 eris wat amen Babelon ara, is apos Sialtyel a Jekonaia; is apos Sirubabel a Sialtyel;

13 is apos Abaiut a Sirubabel; is

apos Elaiakim a Abaiut; is apos Esor a Elaiakim;

14 is apos Setok a Esor; is apos Ekim a Setok; is apos Elaiut a Ekim;

15 is apos Eliesar a Elaiut; is apos Matdan a Eliesar; is apos Jakob a Matdan;

16 is apos Josef natamnyu Mere a Jakob, is risi Iesu aien, eris anvi nidan par ika Kristo.

17 Eris fortiin a ilpu retpon asega ahes irai Ebrahim um yetpan irai Tevit; eris lep fortiin a ilpu retpon ahes irai Tevit um yetpan u nimyiapan ra Babelon; eris lep fortiin a ilpu retpon ahes u nimyiapan ra Babelon um yetpan iran Kristo.

18 IS um ucce napos Iesu Kristo: Is aminjinai Josef a Mere risin, ja erus eti fi ehramen arau; is um opouc aien vai Nesgan Upene.

19 Is atoh nedo o Josef natamnyu un, is esjum aien nasuptecnaigvaig, is um ika aien yi atipagki yin, jam eti asaig.

20 Is wat aktaktai nitai iji eigki aien, is ehcohos pan ehelen a nagelo o Ihova an numjeg ahnag o un, um ika, Ak Josef, mapoi Tevit, jim imtitaig aiek inlehvaig Mere ehgam: et opouc aien vai Nesgan Upene:

21 etpu apos inhalav atamaig aien, napu anvi nidan aiek par ika IESU; etpu imyiatamaig ilpu atimi o un aien va nedo has ura.

22 Eris ago nitai iji eigki asega, mika eri ehnejid intas ineigki o Ihova is upyi asaig a naprofeta, um ika,

23 “Etpu opoue intakata eti ato natamaig inyi ethi, um apos inhalav atamaig, erupu anvi nidan ara par ika Emanuel,” nesgan tas ineigki, Atua eheleija.

24 Is wat aiji a Josef, is ago aien nitai ineig is asaig ehelen a nagelo o Ihova, um leh yin ehgan:

25 is eti ato yin aien, um uhun pan naopan iyehki is apos inhalav atamaig o un aien inmetto: is anvi nidan aien par ika Iesu.

NUARIN-TAS ALUPAS 2.

ERIIS apos Iesu Bedleem an *pece* Jutaia an naopan iyehki is atimarid a Herot, eris ahes an ridjai o un a ilpu atimi arapakau, um apan Jerusalem,

2 um ika, Eris apos natimarid u nupu Jutaia eda? ecri ecetai inmoijeuv o un aijama an ridjai o un, eera mun ham aijama mika ecri atpuse an nuhup o un.

3 Is wat atahaijeg a Herot natimarid, is ehioelio inliinmopon aien, im lep *nupu* Jerusalem asega.

4 Is asjapicnaig ilpu atimi ahlap esjilid asega aien im ilpu atimi esege an pece, um ahodai ra, um ika, Eri apos Kристо eda?

5 Eris um ika ehelen ara, Bedleem an *pece* Jutaia: is um ucece intas ineig is upyi aged a naprofeta, *um ika*,

6 “Ak Bedleem, an pece Jutaia, na eti upoupo aiek irai ilpu atimarid Jutaia; etpu aridjai iram a natimarid inyi ethi, etpu atimarid u nupu Isreel unyak aien.”

7 Is asjapicnaig ilpu atimi arapakau a Herot, jam eti asaig, um ahodaig upene ra, um ika, Is ehchohos inmoijeuv an nahlopan?

8 Is abrai ra aien mika eri apan Bedleem ara, um ika, Apan aijaua, um ahilek emda inhalav; aku wit ecet yin aijaua, um lep adumoij pam, um asupteenaig ehelek; ki apan ainyak um atpuse an nuhup o un.

9 Eris wat atahaijeg intas o natimarid ara, eris atga ura ara; is atga um ulup ira ra inmoijeuv ineig eris ecetai ara an ridjai o un, is wat uhun pan inuarin ineig is amen iran inhalav, um anaiji ijinies.

10 Eris wat ecetai inmoijeuv ara, is esjilid acen nimyiacitak ura.

11 ¶ Eris apan ara anliin neom, um ecet inhalav ehele Mere risin, um atpuse *an nuhup o un*, um alaig-aheni vai yin: eris ahiaese padiaig ura ara, um alupai yin niji itai tup ahtai; colt, im nidi libano, im nidi mura.

12 Is acaiji ra a Atua an numjeg ahnag *ura*, mika eri jim adumoij pan ehele Herot ara, eris atga an nefalaig is eche ara, um apan an pece ura.

13 Eris wat atga ura ara, is ehchohos pan ehele Josef a nagelo o Ihova, an numjeg ahnag *o un*, um ika, Atidai aiek, um leh inhalav im risin, um aha pan Ijpt, um amen eahki wat uhun pan naopan iyehki ekpu asupteenaig ehelum ainyak: etpu ahilek inhalav a Herot mika yi atgei yin.

14 Is um atidai aien, um leh inhalav im risin an nepeig, um aha pan Ijpt:

15 is amen aien eahki um uhun pan naopan iyehki is mas a Herot: mika eri ehneijid intas ineigki o Ihova is upyi asaig a naprofeta um ika, “Kis ahlaig vai inhal unyak ainyak mika yi ude Ijpt aien.”

16 ¶ Is wat ato a Herot, nikavaig, eris imyipalea yin a ilpu atimi arapakau, is atavaitap alupas aien, um abrai atimi mika eri atgei ilpu halav asega ara Bedleem, im lep irai uari pece asega ubutpotet, ahes ira ra is ero inmesese ira ra, um yetpan irai ilpu halav pam apos, is idivaig is ahodaig upene ilpu atimi arapakau aien.

17 An naopan iyehki is ehneijid intas ineig is upyi asaig a Jeremaia naprofeta, um ika,

18 “Eris atahaijeg nohran tah

Rema, intaigvaig, im taig afaka-totau, um ehteigtaig alupas, is imyi-taig ilpu hal o un a Rejel, is ika aien inyi ti eropse inliinmopon, eris mun atih ara."

19 ¶ Is wat mas a Herot, is ehcohos pan ehele Josef a nagelo o Ihova an numjeg ahnag o un an pece Ijpt,

20 um ika, Atidai aiek, um leh inhalav im risin, um apan an pece Isreel : era mun emesmas ara eris ahilek inhalav ara mika eri atgei yin.

21 Is atidai aien, um leh inhalaiv im risin, um apan an pece Isreel.

22 Ja is wat ato aien, nikavaig, is atimarid an pece Jutaia a Arkileus par isjipigmoig Herot etnan, is im-titaig aien napanvaig eahki : ja, is wat acaiji yin a Atua an numjeg ahnag o un, is apan aien an pece Calili :

23 is apan aien an nuarin-pece is ethi nidan Nasared, um amen ; is idivaig intas ineig eris upyi asaig a ilpu profeta, um ika, Uhpu anvi nidan par ika nup an Nasared.

NUARIN-TAS ALUPAS 3.

AN naopan iyehki is apan an namasacen an pece Jutaia a Joanes Natimi baptiso, um tas,

2 um ika, Akumu adumoij anliinmopomia aijaua : et mun ubutpotet nelcau an nohatag.

3 Aien aigki is tas vai yin a Aiseya naprofeta, um ika, "Nohran tah et ethi etpu ahlaig aien an namasacen, um ika, Akumu ahped nefalaig vai Ihova aijaua, um ago yi atoh efalaig vai yin."

4 Is aso yin a Joanes an nape-lumai alau irai kamela, um ahid narasi kurimatau, um caig inheled im hune.

5 ¶ Eris ahtag pan ehelen a nupu Jerusalem, im nupu Jutaia asega, im nup urai uari pece asega u no-fowai Jortan,

6 is baptiso ira ra aien an wai

Jortan, eris asuptecnaig nedo has ura ara.

7 ¶ Is alum ilpu Farisi is ahinag aien im ilpu Satusi napanvaig u nabaptiso o un, is um ika ehele ra aien, Ak ilpu imyiv, et mun ated caua a di, mika aki aha aijaua vai intavaitap etpu yetpam ?

8 akumu olohai itai aijaua yi idi-vaig nadumoij u inliinmopomia :

9 akumu jim aktaktai anliinmopomia aijaua, um ika, Et etpoiia a Ebrahim ; ek asaig ehelemia ainyak mika, Et emda a Atua par imyiatidai ilpu halav imi Ebrahim irai hat iji eigki :

10 eh mun ati inpas u nohu auicai an naopan ineig : uhpu acaldei nauicai asega et eti upene nasau iran, um erekhaigjai an cop :

11 ek idim baptiso iramia ainyak an wai mika aki adumoij anliinmopomia aijaua : ja aien inyi ham aien um apitac nyak inyi idim esjilid irak aien, ek eti upene ainyak par apos incedpun eduon : etpu baptiso iramia aien an Nesgan Upene im lep incop :

12 et apos nitai uejuejai itai o un aien, etpu idim ago adicinadin nuarin ikni sito o un aien, etpu ikni hwiit o un aien anliin neom ikni hwiit iran, ja etpu atnamud narasin aien an cop inyi ti lep opos.

13 ¶ Is ahes Calili a Iesu um apan Jortan ehele Joanes, mika yi baptiso iran aien.

14 Ja is acaiji yin a Joanes, um ika, Eris idim ika apu baptiso irak aiek, na auri aiek par apam ehelek ?

15 Is tas a Iesu, um ika ehelen, Jim imyiisjis aiek an naopan ineig : eris idim ika ti imyiaiji intas alep asega akaija. Is eti lep imyiisjis aien.

16 Is wat leh nabaptiso iran a Iesu, is ahes u inwai aien, um atga o un : is asalgei nohatag vai yin, is ecet Nesgai Atua aien nasuolvaig is idivaig nalaupa, um ateuc iran :

17 is ahes an nohatag nohran tah,

um ika, Inhalav cop unyak ineigki, ek imyiacitak yin ainyak.

NUARIN-TAS ALUPAS 4.

IS imyiapan Iesu a Nesgan *Upene* an namasacen mika yi oop yin a Tiapolo.

2 Is eti caig tah nitai aien an nadiat is forte im nepeig is forte, is um ehtelee yin.

3 Is apan ehelen natimi oop yin, um ika, El et Hal o Atua aiek, namu ika aiek yi areto inliat iji eigki.

4 Is tas aien, um ika, Eris aged, *um ika*, “Eri eti umuqoh natimi vai areto ache, ja vai intas asega et ahes an nipjineucse Atua.”

5 Is imyiapan yin a Tiapolo an nuarin-pece itaup, um atijai yin an nijintin neom ahlap,

6 um ika ehelen, El et Hal o Atua aiek, namu aliaujaise aiek: eris aged, um ika, “Etpu tas alep ehele ilpu agelo o un aien vai euc:” “erupu aposjai euc irai ikmara ara, va an jim atgeig yi oplec neduom aiek an hat.”

7 Is um ika ehelen a Iesu, Eris lep aged, *um ika*, “Namu jim ago nedo oop vai Ihova Atua unyum aiek.”

8 Is lep imyiaridjai yin a Tiapolo an nedoon ijinies acen is ethi, um ehvaig ehelen niji elcau asega an nobohtan im niji itai upene iran;

9 um ika ehelen, El et atpuse aiek um alaigaheni vai nyak, elek par alupai euc nitai iji eigki asega ainyak.

10 Is ika ehelen a Iesu, Atga unyum aiek, ak Satana, eris aged, *um ika*, “Namu alaigaheni vai Ihova Atua unyum aiek, um aheca o un” ache.

11 Is um ude yin a Tiapolo: eris idim apan ehelen a ilpu agelo, um aheca o un.

12 IS wat atahaijeg a Iesu, nika-

vaig, eris ati Joanes anliin neom ipjin, is apan Calili aien:

13 is ude Nasared aien, um apan um amen Kaperneum, ubutpotet u injop an niblan pece Sebulon im Naftalai:

14 mika eri ehneiijd intas ineig is upyi aged a Aiseya naprofeta, um ika,

15 “Inpece Sebulon im inpece Naftalai, ubutpotet u injop, an nahaijin Jortan itac, Calili *inpece* o ilpu atimi aupat;

16 era mun ecetai inlah alupas ara sji eigki eris amen an naupat ara; et mun aridjai inlah imi ra eris amen an nuarin o naupat ara im inmas.”

17 ¶ Is atupun a Iesu an naopan iyehki um tas, um ika, Akumu adumoij anliinmopomia aijaua: et mun ubutpotet nelcau an nobatag.

18 ¶ Is atga a Iesu u injop Calili um ecet inraimu is ero, Saimora tak idan Pitrus, im Antrius etoan, erus anah an nopoig arau: erus atimi ahilek mu arau.

19 Is um ika ehele rau aien, Apitac nyak aijaurau, ekpu ati caurau ainyak mika aru ahilek atimi aijaurau.

20 Erus auroauro arau um ude nopoig, um apitac yin.

21 Is ahes eahki aien um atga, um lep ecet inraimu is ero is eche, Jakobus inhal o Sebetaius im Joanes etoan, erus amen arau ehele Sebetaius etmarau an nelcau um uh-puri opoig ura; is ahlaig vai rau aien.

22 Erus auroauro arau um ude nelcau im etmarau, um apitac yin.

23 ¶ Is arahed an *pece* Calili asega a Iesu, um esege irai eom alaigaheni ura, um asuptecnaig intas-upene va nelcau o Atua, um ikni-pagki emehe asega ira atimi im nauatialidi ira ra.

24 Is apaalni intas vai yin an *pece* Sirya asega: eris imyiapan ehelen ilpu atimi emehe asega ara

is acheiachei nemehe ira ra im nohored, im ra eris amen ira ra a ilpu agelo has, im ra is ti lehra ara, im ra eris apalseara; is ago celcehe ra aien.

25 Eris ahes Calili, im Tikapolis, im Jerusalem, im Jutaia, im nahaijin Jortan itac natimi is ahinag, um ahced yin.

NUARIN-TAS ALUPAS 5.

IS alumi atimi is ahinag aien, um aridjai an nedoon: is wat ateucse aien, eris apan ehelen a ilpu atimi atahaijeg yin.

2 Is tas aien, um esege imi ra, um ika,

3 Era mun ahesmoij ara et ipjid-
ipjid inliinmopura ara: et ura nelcau an nohatag.

4 Era mun ahesmoij ara era ohored ara: erupu cediaig ara.

5 Era mun ahesmoij ara et eropse inliinmopura ara: erupu amen an pece ara.

6 Era mun ahesmoij ara et ehtelega ara um ahvig emda nedo upene: erupu gaije ara.

7 Era mun ahesmoij ara era ago nedo aiheuc *vai atimi* ara: erupu leh naiheuc *vai ra* ara.

8 Era mun ahesmoij ara et adicin-
adicin inliinmopura ara: erupu ecet Atua ara.

9 Era mun ahesmoij ara era asaignipa ara: ulpu anvi nidara par ika ilpu hal o Atua.

10 Era mun ahesmoij ara er edemda vai ra va nedo atoh *ura*: et ura nelcau an nohatag.

11 Eka mun ahesmoij aijaua, eru wit asan tas has vai caua *natimi*, um atmas *vai caua*, um athai intas has asega um ahcil vai caua, vai nyak.

12 Akumu cediaig aijaua, um imyiacitak alupas: etpu esjilid nintan imi caua an nohatag: is um ucco nedemda ura vai ilpu profeta eris uhup iramia ara.

13 ¶ Eka mohojan an nobolhan

aijaua: ja el et aiyu inmohojan, et ehka inlep ago upene vaig, et mun eti upene inlep ago itai vaig iran, ja eli mun erekhaig pan itac, era atga iran atimi.

14 Eka itai lah an nobolhan aijaua. Et ehka nadenaigvaig neom iji eigki et amen ijinies an nedoon.

15 Era eti atni incop alahala atimi um adahpoi an nipjinitai, ja er atijai an nitai ati incop alahala iran; et par lah ehele atimi asega anliin neom.

16 Etmu naunau inlah unyimia aijaua an nuhup o atimi, mika eri al-
um auritai upene unyimia ara, um imyiahpas Etnamia an nohatag.

17 ¶ Akumu jim aktaktai aijaua, um ika, kis lam ainyak par auahas intas alep, im *intas o* ilpu profeta: kis eti ham ainyak par auahas itai, jai *kis ham ainyak* par ago elni.

18 Et inivaijec ineig ek asaig ehelemia ainyak mika, Inyi yetpan an tid iran nohatag im nobolhan, ja inyi ti yetpan an tid iran tah nidan tintin, im lep tah nesganintan nidan tintin an tas alep o *Atua*, um uhum pan naopan iyehki eri ago ehni asega.

19 Aien inyi imyipalea tah intas alep haklin iji eigki aien, um esege imi atimi nedo ineigki, etpu upo-
upo aien an nelcau an nohatag: ja aien inyi imyiaiji aien, um esege *imi atimi nedo ineigki*, etpu esjilid aien an nelcau an nohatag.

20 Ek asaig ehelemia ainyak mika, El et eti esjilid nedo atoh uny-
mia irai *edo atoh o* ilpu atimi esege im ilpu Farisi, aki idim eti apan aijaua an nelcau an nohatag.

21 ¶ Akis atahaijeg aijaua intas ineig eris upyi lup masaig ehele ilpu tu mika, Jim atgei atmas; aien et atgei atmas aien, etpu leh neru-
vaig aien:

22 ja ek asaig ehelemia ainyak mika, Aien et tup edemda vai etoan aien, etpu leh neruvaig aien: aien et ika aien ehele etoan, Et takitai,

uhpu tas alep vai yin: aien et ika aien ehele etoan, Ak natimi ahnag, uhpu ati yin an cop an pece has.

23 Na wat imyiapan nitai ahlap unyum aiek u natau, jam imyieliva tali nedo ineig unyum et auahas inliinmopoi etoan,

24 ude nitai ahlap unyum an nuhup u natau, um atga unyum; namu uhup aiek um tas updak ehele etoan, ja par apan um ahlap an nitai ahlap unyum.

25 Namu auroauro aiek um tas updak ehele natimi ineig et tak atimi iram aien, na wit amen ehelen aiek an nefalaig; va yi jim ati euc a natimi ineig et tak atimi iram aien ehele natimi alupas, etpu lep ati euc a natimi alupas ehele naheca o un, etpu lep ati euc aien anliin neom ipjin.

26 Et inivaijec ineig ek asaig ehelelum ainyak *mika*, Napu ti lep alau ijo aiek um ulum pan naopan iyehki napu lehi ehni nintam aiek.

27 ¶ Akis atahaijeg aijaua intas ineig eris upyi hup masaig ehele ilpu tu mika, Namu jim ago ingaijid aiek:

28 ja ek asaig ehelemla ainyak mika, Aien et alum intakata aien um merit vai yin, et mun idim ago ingaijid inliinmopon aien vai yin.

29 El et itai epiltau ini euc nesganintam inmatam, anum atipagki aiek, um ethaig: et upene vai euc, mika uhpu auahas nuarin-nohum et ethi, jam has, nikavaig, uhpu ethaig nohum asega an pece has.

30 El et itai epiltau ini euc nikmam inmatam, anum acaldei aiek, um ethaig: et upene vai euc, mika uhpu auahas nuarin-nohum et ethi, jam has, nikavaig, uhpu ethaig nohum asega an pece has.

31 Eris lep ika, Aien et abrai ehgan aien, etnu alupai yin nitasvitai aien va nabrai yin o uni:

32 ja ek asaig ehelemla ainyak mika, Aien et abrai ehgan aien, et

vai ago ingaijid, et ika aien yi ago ingaijid *ehgan* va nedo o un: im lep aien et lehi yin aien eris abrai yin, mika yi ehgan, et ago ingaijid aien.

33 ¶ Im lep ineig, akis atahaijeg aijaua intas ineig eris upyi hup masaig ehele ilpu tu, um ika, Jim upyi asan tas ahcil aiek, ja etmu inivaijec intas upyi asaig unyum aiek ehele Ihova:

34 ek asaig ehelemla ainyak mika, Akumu jim tas atcinuhri aijaua: jim *tas atcinuhri* va nohatag; et dorona o Atua ineigki:

35 im lep va nobohtan; et itai atijai neduon iran ineigki: im lep vaig Jerusalem; et uarin-pece ineigki o Natimarid esjilid.

36 Namu jim tas atcinuhri va nidjinum aiek, et ehka vai euc nagovaig yi ahi um apeig tah numri nidjinum.

37 Akumu ika aijaua, Maiya, maiya; O'o, o'o: et ahes irai Tiapolo intas asega et esjilid an tas eraigki.

38 ¶ Akis atahaijeg aijaua intas ineig eris asaig mika, Aru nesganintan an nesganintan, im lep neijin an neijin:

39 ja ek asaig ehelemla ainyak mika, Ulu wit ago nedo has vai caua, akumu jim aru aijaua: et wit alpoi nahpam inmatam tah, anum ahidaig pau nahaijin nahpam aiek ehelen.

40 El et imyiisjis iram tah natimi, mika yi lehi napelumai ulup unyum, anum lep alupai yin napelumai itac aiek.

41 El et ika ehelum tali, an ahced yin aiek um apan a mail et ethi, anum ahced yin aiek um apan a mail et ero.

42 Alupai natimi ineig itai aiek et ugni euc vaig aien, um jim atidjunum aiek irai natimi ineig et ika aien, Imyihio tali nitai aiek, ja par lep lehi.

43 ¶ Akis atahaijeg aijaua intas ineig eris asaig mika, Etmu aiyu inliinmopom aiek va atimi eblaam-nem unyum, jam has inliinmopom va atimi tak atini iram:

44 ja ek asaig ehelemia ainyak mika, Akumu aiheuc vai ra aijaua era tak atimi iramia ara, um asan tas upene vai ra era asan tas has vai caua ara, um ago nedo upene vai ra era ancel vai caua ara, um alaigaheni vai ra era ago nedo has vai caua ara, um abli caua;

45 va akupu ilpu hal o Etmamia an nohatag aijaua: et ika aien yi aridjai nagesega o un vai ilpu atimi auatatimi im ilpu atimi upene, et lep ika aien yi ehe vai ilpu atimi et atoh nedo ura im ilpu atimi et eti atoh nedo ura.

46 El eka aiheuc vai ra ache aijaua, era aiheuc vai caua ara, akupu leh inhe aijaua? era ago nedo ineigki a ilpu atimi akwanaham.

47 El eka aiheuc vai ilpu etoamia ache aijaua, et eti esjilid nedo unyimia irai *edo oi tak atimi*; era ago nedo ineigki a ilpu atimi akwanaham.

48 Akumu ago nedo atoh asega aijaua, et idivaig Etmamia an nohatag, et idim atoh nedo asega o un.

NUARIN-TAS ALUPAS 6.

1 Akumu jim ago nedo upene unyimia aijaua an nuhup o atimi, mika eri alum caua ara: el eka ago nedo ineigki aijaua, inyi ti alupai caua nimitan a Etmamia an nohatag.

2 Na wit ahtai niji itai tup ahtai aiek, jim ahilai intoho um uhup iram, et idivaig ilpu atimi efaifa, era ago nedo ineigki ara irai eom alaigaheni, im lep irai efalaig, mika eri imyiahpas ra natimi. Et ini-vaijec ineig ek asaig ehelemia ainyak mika, Era mun leh nimitan ini ra ara.

3 Na wit ahtai niji itai tup ahtai aiek, etmu jim ato niknam in-moum nitai ineig et ago inmatam:

4 va uhpu adenaig niji itai tup ahtai unyum vai atimi: etpu idim

alupai euc nimitan a Etmam et alum itai aien an nuarin adenaig o *un*, um eti adenaig.

5 ¶ Na wit alaigaheni aiek, jim idi-vaig ilpu atimi efaifa: era merit ara natidaivaig um alaigaheni irai eom alaigaheni, im lep irai ihtag u efalaig, mika eri alum ra natimi. Et inivaijec ineig ek asaig ehelemia ainyak mika, Era mun leh nimitan ini ra ara.

6 Na wit alaigaheni aiek, apan anliin neom unyum um atapanes iram, um alaigaheni vai Etmam et adenai yin aien; etpu alupai euc nimitan a Etmam et alum itai aien an nuarin adenaig o *un*, um eti adenaig.

7 Aku wit alaigaheni aijaua, jim ecilpat asan tas et idivaig ilpu atimi aupat: era aktaktai ara mika uhpu atahaijeg ra vai intas ahinag ura.

8 Akumu jim idivai ra aijaua: et mun upyi ato a Etmamia nitai iji eigki et upene vai caua, ja eka par ugni yin vaig aijaua.

9 Etmu uce nalaigaheni unyimia aijaua:

Ak Etmama an nohatag, Etmu itaup nidam.

10 Etmu yetpam nelcau unyum. Uhmu imyiaiji intas unyum an no-bohtan, et idivaig an nohatag.

11 Alaama aiek nitai caig incama an nadiat ineig.

12 Um jim aru tahi nedo has unyima aiek, et idivaig ecra eti aru tahi nedo has o atimi vai cama aijama.

13 Um jim atau irama an nedo oop aiek, jam imyatamaig cama va niji itai has. Et idim unyum aiek nelcau, im nemda, im nimyiahpas, irai iji mesese. Emen.

14 El eka eti aru tahi nedo has o atimi *vai caua* aijaua, inyi ti aru tahi nedo has unyimia a Etmamia an nohatag:

15 ja el eka aru tahi nedo has o atimi *vai caua* aijaua, etpu lep aru nedo has unyimia a Etmamia.

16 ¶ Im lep ineig, aku wit atwakam

aijaua, jim intimlai va nesganimitamia aijaua un idivai ilpu atimi efaifa: era auahas nesganimitara ara, mika eri ika atimi era atwakam ara. Et inivaijec ineig ek asaig ehelemia ainyak mika, Era mun leh nintan imi ra ara.

17 Na wit atwakam aiek, aspi nipek unyum *an naraki*, um elperegdei nesganimitam;

18 mika eri jim ato natwakam unyum atimi, ja Etmam ache an nuarin adenaig *o un*: etpu alupai euc nintan a Etmam et alum itai aien an nuarin adenaig *o un*, um eti adenaig.

19 ¶ Jim ikni inpadiaig imi caua aijaua an nobohtan, etpu ages, um epera, um has; erupu lep ahtaijhan *neom* a ilpu atimi ehneg itai um ahneg:

20 jam ikni niji itai upene imi caua aijaua an nohatag, inyi ti ages, um eti epera, um eti has; eri ti lep ahtaijhan *neom* a ilpu atimi ehneg itai um ahneg:

21 etpu amen inliinmopomia aijaua an nuarin ineig, et amen inpadiaig unyimia iran.

22 Et itai lah u nohuja nesganimitaia: el et weilah nesganimitam aiek, etpu lah upene nohum asega.

23 Ja el et aplan nesganimitam aiek, etpu aupat nohum asega. El et aupat inlah unyum, etpu esjilid acen naupat unyum!

24 ¶ Et ehka vaig tah natimi nahcavaig u natimi alupas ero: etpu acen inliinmopon aien vaig et ethi, um aiyu inliinmopon vaig et ethi; etpu apol iran et ethi aien, um amcel vaig et ethi. Et ehka vai caua nahcavaig *o Atua* im Mamona.

25 Va nitai ineigki ek asaig ehelemia ainyak *mika*, Akumu jim aktaktai numumoh unyimia aijaua, im nitai caig unyimia, im nitai umni unyimia; um jim aktaktai nohumia, im nitai aso caua. Et esjilid numumoh unyimia aijaua irai itai hegaig, im nohumia irai itai aso caua.

26 Alum man an nuanohtag aijaua: era eti ahoai itai ara, um eti asjapicnai itai, um eti ikni irai eem ikni itai; ja et alaa ra nitai caig a Etmamia an nohatag. Eka esjilid ira ra aijaua.

27 Et eti emda tah iramia par ika yi lep yetpan an tah nadiat aien va naktaktai o un.

28 Eka auri aijaua par aktaktai alupas nitai aso caua? Alum tisai cai an nobohtan aijaua, im nedel iran; et eti auritai, um eti ahod itai:

29 ja ek asaig ehelemia ainyak mika, Is eti yecrei yin a Solomon an natimi alupas o un um idivaig tah nitai iji eigki.

30 El et ucce nedo *o Atua*, va nefelelicai an nobohtan, et umoh inpeig, ja er erekhaigjai an cop an tak apnyin, *etpu* idim *aso* caua *nien*, et tintin nimyisjis ninivaijec unyimia.

31 Jim aktaktai alupas aijaua, um ika, Ti caig inhe akaija? ti umni inhe akaija? ti aso caija akaija anhe?

32 (era ahilek nitai iji eigki asega a ilpu atimi aupat:) et ato a Etmamia an nohatag nitai iji eigki asega et upene vai caua.

33 Akumu upyi hup aijaua, um ahilek nelcau *o Atua* im nedo atoh o un; uhpu alupai caua nitai iji eigki asega.

34 Jim aktaktai alupas aijaua vaig imraig: uhpu aktaktai imraig va niji itai iran. Et eteuc niji itai has irai iji adiat.

NUARIN-TAS ALUPAS 7.

1 Akumu jim aktaktai has vaig tah aijaua, va uhpu eti aktaktai has vai caua.

2 Erupu aktaktai ineigki vai caua *natimi* aki aktaktai vai ra aijaua: erupu ago nedo ineigki vai caua *natimi* aki ago vai ra aijaua.

3 Na auri aiek par almoi nahrin-

cai an nesganiintai etoam, jam eti aktaktai inmasincal an nesganintam?

4 Et ehka vai euc intasvaig ehele etoam, *um ika*, Ekmu atipagki nahrincal an nesganintam ainyak; et wat amen inmasincal an nesganintam;

5 ak natimi efaifa, namu uhup aiek um atipagki inmasincal an nesganintam; va apu almoi upene aiek par atipagki nahrincal an nesganintai etoam.

6 ¶ Jim alayi kuri nitai caig itaup, um jim ati perl unyimia an nuhup u picad, va eri jim atga iran *picad*, ka ahidai ra *kuri*, um aces caua.

7 ¶ Akumu ugni itai aijaua, uhpu alupai caua; akumu ahilek itai aijaua, akupu ecetai aijaua; akumu etcetcei *intapanes* aijaua, uhpu asalgei vai caua:

8 aien et ugni itai aien, etpu leh aien; aien et ahilek itai aien, etpu ecetai aien; aien et etcetcei *intapanes* aien, uhpu asalgei vai yin.

9 Natimi ineig yek eda iramia, et wat ugni nareto a inhal o un, et alaan inhat aien?

10 ka et wat ugni numu aien, et alaan ninyiv aien?

11 El eka ato aijaua, ak ilpu atimi auatatimi, par alupai ilpu hal unyimia niji itai tup ahtai upene, et esjilid a Etmamia an nohatag par alupai ilpu atimi ugni yin niji itai upene.

12 Va nedo ineigki akumu ago nitai iji eigki asega va atimi aijaua, eka merit aijaua mika eri ago vai caua ara: intas alep neigki im intas o ilpu profeta.

13 ¶ Akumu atga aijaua an neucose nirahed ehroehro: et alupas neucose nirahed, um alupas nefalaig, et yetpan-an mas, era atga iran atimi et ahinag:

14 ja et ehroehro neucose nirahed, um ehroehro nefalaig, et yetpan an nitai umoh iran, era atga iran atimi et eti elpat.

15 ¶ Akumu aminjinai caua aijaua vai ilpu profeta efaifa, era aso ra irai apelumai umri siip ara, um apan ehelemia, ja et idivaig kuri aleg inliinmopura ara.

16 Akupu ato ra aijaua va nohoai itai ura. Era eti ehlek nohoai vaine atimi irai ausekrai, im nohoai ateg irai aha:

17 et pinid nohu itai upene asega nohoai itai upene; ja et pinid nohu itai has nohoai itai has:

18 et ehka neteucvaig nohoai itai has an nohu itai upene, um lep ehka neteucvaig nohoai itai upene an nohu itai has.

19 Er acaldei nauicai asega et eti ohoai itai upene, um erekhaigjai an cop.

20 Akupu ato ra aijaua va nohoai itai ura.

21 ¶ Eri ti apan an nelcau an nohatag natimi asega erupu ika ehelek ara, Ak Natimarid, ak Natimarid; ja aien ache et imyiaiji intas o Etmak an nohatag aien.

22 Erupu ika ehelek natimi inyi ahinag an nadiat iyehki, Ak Natimarid, ak Natimarid, ecris tas aijama an nidam, um ahlo ilpu agelo has va nidam, um ago niji auritai esjilid is ahinag va nidam.

23 Ja ekpu ika ehele ra ainyak, Ek idim eti ato caua ainyak: akumu atga unyimia aijaua, ak ilpu atimi auatatimi.

24 ¶ Aien et atahaijeg intas iji eigki unyak aien, um imyiaiji, ek ika ainyak et idivaig natimi arapakau is ethi aien, is actaigse neom o un aien an mala:

25 ja is asuol incaupda, um ahga inwai, um iji nimtinjop, um isji neom iyehki; ja is eti eropse: is ateucose an mala.

26 Aien et atahaijeg intas iji eigki unyak aien, um imyipalea, et idivaig natimi ahnag is ethi aien, is tup actaigse neom o un aien an nauahvig:

27 ja is asuol incaupda, um ahga

inwai, um iji nintinjop, um isji neom iyehki; is um echedeliekse: is esjilid neropse o um.

28 IS wat tas elni a Iesu irai tas iji eigki asega, eris imyiali natimi va nesege o uu:

29 is esege ini ra aien is idivaig tah is esjilid natimi alupas o un, um eti idivaig ilpu atimi esege.

NUARIN-TAS ALUPAS 8.

IS ahes an nedoon aien um asuol, eris ahced yin natimi is ahinag.

2 Is apan *ehelen* natimi lepros is ethi, um atpuse an nuhup o un, um ika, Ak Natimarid, el et merit aiek, na emda aiek par ago adicinadicin nyak.

3 Is adan nikman a Iesu, um atcei pan yin, um ika, Ek idim merit ainyak; namu adicinadicin aiek. Is um auroauro aien um adicinadicin va naleprose iran.

4 Is ika ehelen a Iesu, Namu jim asuptecnaig ehelen tah aiek; jam atga unyum, um ehvai euc ehele natimi ahlap, um ahlap an nitai tup ahtai ineig is asaig a Moses, nitai asuptecnaig ini ra.

5 ¶ Is yetpan Kaperneum a Iesu, is apan ehelen a natimi alupas o ilpu eucsupo is ethi, um ugni yin,

6 um ika, Ak Natimarid, et emehe naheca unyak va napalse, et asjeuc aien anliin neom, um ohoered alupas.

7 Is ika ehelen a Iesu, Ekpu apan ainyak um ago ceheche yin.

8 Is tas a natimi alupas iyehki, um ika, Ak Natimarid, ek eti upene ainyak par ika an apan aiek anliin neom unyak; namu tup asan tas ache aiek, etum umoh a naheca unyak:

9 ek aheca ainyak, ja era imyi-aiji intas unyak a ilpu eucsupo: ek ika ainyak ehelen et ethi, Apan aiek, et um apan aien; im lep ehelen et eche, Apam aiek, et um

apan aien; im lep ehele naheca unyak, Ago nitai ineigki aiek, et um ago aien.

10 Is wat atahaijeg a Iesu is um imyiali aien, um ika ehele ilpu atimi apitac yin, Et inivaijec ineig ek asaig ehelemia ainyak *mika*, kis eti ecetai tah ninyiisjis ninivaijec esjilid ainyak, et idivaig ineig, an *pece* Isreel asega.

11 Ek asaig ehelemia ainyak mika, Erupu ahes an ridjai o un natimi iny ahinag, im lep an nete o un, um han atauc ehele Ebrahim, im Aisak, im Jakob, an nelcau an nohatag:

12 ja uhpu erekhaig pan an naupat ilpu halav an nelcau: erupu aumyauwaig ara eahki, um ataktit cijera.

13 Is ika a Iesu ehele natimi alupas iyehki, Atga unyum aiek; uhpu ago vai euc et idivaig ninyiisjis ninivaijec unyum. Is um umoh naheca o un an nuarin-nadiat iyehki.

14 ¶ Is apan a Iesu anliin neom o Pitrus, is ecet risi ehgan aien, is asjeuc aien va nemehe ihlup.

15 Is atcei pan nikman aien, is par edoijaig iran nemehe ihlup: is um atidai aien, um aheca ura.

16 ¶ Is wat jupura, eris imyiapan ehelen natimi is ahinag ara, eris amen ira ra a ilpu agelo has: is ahlo ilpu agelo aien an tas is ethi, um ago ceheche ra asega eris emehe ara:

17 mika yi ehneijid intas ineig is asaig a Aiseya naprofeta, um ika, "Is leucose nauatialidi uja aien, um ikni-pagki nemehe iraija."

18 Is wat alum atimi is ahinag a Iesu narahedvaig iran, is ika ehele ra aien, eri apan an taka uarin.

19 Is apan ehelen natimi esege is ethi, um ika ehelen, Ak Natimi alupas, ki ahced euc ainyak um apan irai uarin iji cigki asega an han iran aiek.

20 Is ika ehelen a Iesu, Et eteuc ihelhel o kuri aleg, im lep nasioin oi man; ja et ti nuarin asjeuc ini Inhal o natimi.

21 Is ika ehelen natimi atahajjeg yin is eche, Ak Natimarid, namu ika aiek, ki ulup ainyak um apan um atelmoi etmak.

22 Is um ika ehelen a Iesu, Ahced nyak aiek; erumu atelmoi ilpu atimi emesmas a ilpu atimi emesmas.

23 ¶ Is aridjai an nelcau aien, eris ahced yin a ilpu atimi atahajjeg yin.

24 Is um uejum pam neihio alupas an jop, um auaijai nelcau va epeau: ja is umjeg aien.

25 Eris apan ehelen a ilpu atimi atahajjeg yin, um ahugni yin, um ika, Ak Natimarid, namu imyiata-maig caji aiek: intumu emesmas akaija.

26 Is ika ehele ra aien, Ak ilpu atimi auatialidi inliinmoponia, eka imtitaig aijaua vanhe? Is atidai aien, um acaiji nintinjop im injop; is um esjilid neigpa.

27 Eris imyiali natimi, um ika, Et echamecha natimi ineigki, et imyiaiji intas o un nintinjop im injop!

28 ¶ Is apan aien an taka uarin, um apahai an pece o nupu Cercesa, erus aubillid yin natimi is ero eris amen ira rau a ilpu agelo has, erus ahes arau irai mai ij eris ikui atimi emesmas iran, erus ahnag alupas arau, is ehka va atimi natgavaig an nefalaig iyehki.

29 Eris ahlaig arau, um ika, Nai merit aiek vanhe ehelumrau, ak Iesu, Inhal o Atua? na mun ham aiek mika ecri fi ohocred aijama an naopan ineig, ka o'o?

30 Eris amen picad is ahinag itac acen, um hag.

31 Eris ugni yin a ilpu agelo has, um ika, El et ahlo cama aiek, namu ika aiek ecri apan aijama, um ahei picad.

32 Is ika ehele ra aien, Apan aijaua. Eris atceijai rau ara, um apan um ahei picad: eris athut emda picad asega an nohmun isas, um ehlelelse an jop, um atpoiijej.

33 Eris aha a ilpu atimi asgi ra,

um apan an nuarin-pece ura, um asuptecnaig nitai iji eigki asega, im lep nitai iji eigki eris ago vai ohwat rahki eris amen ira rau a ilpu agelo has.

34 Eris ahes an nuarin-pece iyehki natimi asega, um apan um aubillid Iesu: eris wat ecet yin ara, eris ugni yin ara mika yi atga o un aien, um ude inpece ura.

NUARIN-TAS ALUPAS 9.

IS aridjai aien an nelcau, um apan an taka uarin, um apahai an nuarin-pece o un.

2 Eris imyiapan ehelen natimi is ethi is emehe aien va napalse, eris atijai yin an nitai ahled: is wat ecetai ninyiisjis ninivaijec ura a Iesu, is ika aien ehele natimi emehe va napalse, Ak inhal *unyak*, namu imyiacitak aiek; eh mun iknipagki nedo has unyum.

3 Ja is ika inliinmopoi ilpu ahaiji atimi esege, Et asan tas has esjilid a nat eigki.

4 Is ato naktaktai ura a Iesu, um ika, Eka auri aijaua par aktaktai has anliinmoponia?

5 et tup upene nikavaig, Eh mun iknipagki nedo has unyum; ka nikavaig, Atidai aiek, um atga?

6 ja, mika aki ato aijaua, nika-vaig, et emda a Inhal o natimi an nobohtan par iknipagki nedo has, (is ika aien ehele natimi emehe va napalse,) Atidai aiek, um leh nitai ahled unyum, um atga unyum, um apan an neom unyum.

7 Is um atidai aien, um atga o un, um apan an neom o un.

8 Eris wat almoi natimi is ahinag, eris imyiali ara, um imyiahpas Atua va nedo o un, nikavaig, is ati nemda ineigki aien ehele atimi.

9 ¶ Is ahes eahki a Iesu um atga o un, um ecet natimi is ethi nidan Madius, is ateuc aien an neom as-japicnaig mune iran: is ika ehelen

aien, Ahced nyak aiek. Is um atidai aien, um ahced yin.

10 Is wat ateuc a Iesu anliin neom um hag, eris apan ehelen a ilpu atimi akwanaham is alinag im ilpu atimi auatatimi, um ateuc ehelen im lep ilpu atimi atahaijeg yin.

11 ¶ Eris wat almoi a ilpu Farisi, eris ika ara ehele ilpu atimi atahaijeg yin, Et auri a Natimi esege unyinia par ehrilbag aien im ilpu atimi akwanaham im ilpu atimi auatatimi?

12 Is wat atahaijeg a Iesu, is um ika ehele ra aien, Er eti ika ehelenatimi atipagki nemeche yi aminjinai ra era cehcehe ara, ja ara achie era emeche ara.

13 Akumu apan aijaua, um ato nesgan tas ineigki, nikavaig, "Ek merit ainyak va nedo aiheuc va atimi, jam eti *merit* va niji itai ahlap:" kis eti ham ainyak par ahlaig vai ilpu atimi upene, ja vai ilpu atimi auatatimi ache, mika eri adumoij anliinmopura ara.

14 ¶ Eris apan ehelen a ilpu atimi atahaijeg Joanes, um ika, Ecra auri aijama im ilpu Farisi par ehcahinag atwakam, ja era eti atwakam a ilpu atimi atahaijeg euc?

15 Is um ika ehele ra a Iesu, Et ehka vai ilpu laig o natimi leh ehgan nohocredvaig, an namen u natimi leh ehgan ehele ra; ja etpu yetpam nadiat iji *ehki*, ulu wit atipagki natimi leh ehgan ehele ra, erupu atwakam ara an naopan iyehki.

16 Et eti ijei pan inuarin napelumai mat tah natimi an mohtan napelumai; va yi jim ruhra mohtan napelumai va nuarin napelumai mat, um ahpati alupas.

17 Era eti atladoi waina mat natimi irai hubej itu acen; va yi jim atpoijej inhubej, um el el waina, um has inhubej: ja era atladoi waina mat ara irai hubej mat, et par upene ehro.

18 ¶ Is wat tas aien irai tas iji eigki ehele ra, is apan *ehelen* natimi alupas is ethi, um atpuse an nuluhup o un, um ika, Et mun mas inhalav

atahaig unyak: namu apan aiek, um atijai nikmam iran, etpu umoh aien.

19 Is atidai a Iesu um ahced yin, im lep ilpu atimi atahaijeg yin.

20 ¶ Im lep ineig, intakata is ethi, is emeche aien va nahlamerau u inja an mesese is twelv, is apan aien an cehen, um atcei pan intid an napelumai iran:

21 is ika inliinmopon aien, El ek atcei pan napelumai iran ainyak, ekpu cehcehe ainyak.

22 Is um ahidai yin a Iesu, um ecet yin, um ika, Ak intakata ineigki, namu imyiacitak aiek; na mun cehcehe aiek va nimyisjis ninivaijeg unyum. Is um cehcehe a intakata an nuarin-nadiat iyehki.

23 ¶ Is wat yetpan a Iesu anliin neom o natimi alupas iyehki, um alum ilpu atimi ahlai nau, im lep ra eris elhteigtaig ara,

24 is um ika ehele ra aien, Alau ijo aijaua: et eti mas natahaig ineigki, et unjeg aien. Eris um imyilav yin ara.

25 Eris wat alau ijo natimi iji ehki, is apan aien, um arapse va nikman, is um atidai natahaig iyehki.

26 Is apaahni intas va nedo ineigki an pece iyehki asega.

27 ¶ Is ahes eahki a Iesu um atga o un, erus apitac yin natimi is ero is aupat nesganimtarau, erus ahlaig arau, um ika, Ak Mapoi Tevit, aiheuc vai cumrau aiek.

28 Is wat apan aien anliin neom, erus apan ehelen natimi erahki is aupat nesganimtarau: is um ika ehele rau a Iesu, Aru imyisjis ninivaijeg nemda unyak aijaurau nago-vaig nitai ineigki, ka o'o? Erus ika ehelen arau, Maiya, ak Nati-marid.

29 Is atcei pan nesganimtarau aien, um ika, Uhpua ago imi caurau et idivaig nimyisjis ninivaijeg unyimirau.

30 Is um asalgei nesganimtarau arau; is idim acaiji rau a Iesu, um ika, Jim asuptecnaig ehelen tah.

31 Ja erus wat atga urau arau,

erus asuptecnaig nedo o un arau an pece iyehki asega.

32 ¶ Eris wat alau ijo ara, eris imyiapan ehelen natimi pop is ethi ara, is amen iran nagelo has.

33 Is ahlo nagelo has ehelen aien, is um tas natimi pop: eris imyiali natimi is ahinag, um ika, Eris idim eti almoi tah nedo et idivaig ineigki an pece Isreel itu acen.

34 Ja eris ika a ilpu Farisi, Et ahlo ilpu agelo has aien vai natimarid o ilpu agelo has.

35 IS apan a Iesu irai iji uari-pece esjilid asega, im inuari-pece haklin, um esege irai eom alaigaheni ura, um asuptecnaig intas-upene va nelcau o *Atua*, um atipagki nemehe asega ira atimi im nauatialidi ira ra.

36 ¶ Ja is wat alum atimi is ahinag aien, is aiheuc vai ra aien, eris auatialidi ara um tup terimterim, et idi-vaig siip et ti asgi.

37 Is um ika ehele ilpu atimi atahajeg yin aien, Et idim ahinag nohoai itai, ja et eti elpat natimi asjapicnaig ;

38 akumu ugni natimi alupas ohuun nohoai itai aijaua, mika yi abraig pan ilpu atimi asjapicnai nohoan aien.

NUARIN-TAS ALUPAS 10.

IS asjapicnaig ilpu atimi atahajeg yin is twelv ehelen aien, um alupai ra nemda, mika eri ahlo ilpu agelo has ara, um iknipagki nemehe asega ira atimi im nauatialidi ira ra.

2 ¶ Nidai ilpu apostolo is twelv iji eigki; Is uhup a Saimona, tak idan Pitrus, im Antrius etoan; *im* Jakobus inhal o Sebetaius, im Joanes etoan;

3 *im* Filipus, im Bardolomius; *im* Tomas, im Madius natimi akwana-ham; *im* Jakobus inhal o Alfius, im Lebius, tak idan Datius;

4 *im* Saimona natimi leh imi ilpu Silotai, im Jutas nupu Karyot, aien aigki is aniv yin aien.

5 ¶ Is abrai atimi is twelv iji ehki

a Iesu, um tas ehele ra, um ika, Jim apan aijaua irai efalaig o nup urai iji taka pece, um jim apan an tah anu-arin-pece o nupu Samerya:

6 jam apan ehele siip ahnag irai nupu Isreel.

7 Aku wit apan aijaua, um efehtas, um ika, Et ubutpotet nelcau an no-hatag.

8 Ago cehcehe ilpu atimi emehe aijaua, um ago adicinadin ilpu atimi lepros, um imyianusjai ilpu atimi ememas, um ahlo ilpu agelo has: akis tup leh aijaua, um tup ahtai:

9 jim apos colt, im silver, im bras, irai cat unyimia aijaua;

10 im nefehcat an nefalaig, im napelumai yi ero, im incedpai eduomia, im niseuc: er alaa natimi auritai nitai caig incan.

11 Aku wit apan aijaua an tah anu-arin-pece alupas, ka inuarin-pece haklin, um ahodaig, um ika, et upene nedo u di iran? um amen eahki wat uhum pan naopan iyehki aki atga unyimia aijaua.

12 Aku wit apan aijaua an tah nim-nim, um aiheuc va *atimi amen* iran.

13 El et upene nedo o atameten iran, akumu asan tas upene vai ra aijaua: ja el et eti upene nedo ura, etmu adumoij ehelemia intas upene unyimia.

14 Ara eri eti leh caua ara, um eti atahajeg intas unyimia, aku wit ahes an nimnim iyehki aijaua, im inuarin-pece iyehki, wat atga unyimia, um ucjucjai obohtan irai eduomia.

15 Et inivaijec ineig ek asaig ehele-mia ainyak *mika*, Inyi tintin nohocred o *nupu* Sotom im *nupu* Comora an nadiat almoijidjid, ja etpu esjilid nohocred o *nup an* nuarin-pece iyehki.

16 ¶ Ek abraig pan caua ainyak et idivaig siip irai iblai kuri aleg: akumu arapakau aijaua et idivaig imyv, um erop nedo unyimia et idi-vaig alaupa.

17 Aminjinai caua aijaua va atimi: erupu ikni caua ara u asjapicnaig u

ilpu atimi alupas, erupu aredei caua ara irai eom alaigaheni ura;

18 Uhpū imyiapan caua an nuluh o ilpu atimi alupas im ilpu atimarid vai nyak, nitai asuptecnaig imi ra im lep imi nup urai iji pece.

19 Eru wit ikni caua ara, akumu jim aktaktai intas ineig aijaua aki asaig: ulpu alupai caua an nuarin-nadiat iyehki intas ineig akupu asaig aijaua.

20 Eka eti tup tas aijaua, ja et aluin tas irania a Nesgai Etmannia.

21 Etpu alwai etoan tahi mika eri atgei yin, im lep inhal o un a etman: erupu atidai a ilpu hal ura um atcei-jai ilpu atmil ura, mika eri atgei ra:

22 erupu amcel vai caua natimi asega vai nyak: aien inyi eti adu-moij aien ulpu imyiatamaig yin.

23 Eru wit abli caua ara an nuarin-pece inyi ethi, akumu aha pan aijaua an taka uarin: et inivaijec ineig ek asaig ehelemia ainyak mika, Akupu eti arahed ehni irai uari-pece Isreel aijaua, um imyihum pan naopan iyehki etpu ham a Inhal o natimi.

24 Et etiesjilid natimi atahaijeg irai natimi esege imi yin, um eti esjilid naheca irai natimi alupas o un.

25 Et upene vai natimi atahaijeg nidivai natimi esege imi yin vaig, um lep upene vai naheca nidivai natimi alupas o un vaig. Ele anvi nidai natimi alupas an neom par ika Bel-sebub, etpu esjilid intas has vai ilpu atimi o un.

26 Jim imtitai ra aijaua: ulpu asuptecnaig niji itai asega er adah-poi; um lep ato niji itai asega er adenaig:

27 nitai iji eigki ek asaig ehelemia ainyak an naupat, akumu asuptecnaig an lah aijaua: nitai iji eigki eka atahaijeg an tiggamia aijaua, akumu asuptecnaig ijinies irai eom unyimia aijaua.

28 Jim imtitai ra aijaua era atgei olu atimi ara, jam auatialidi par auahas neskara: akumu imtitai yin aijaua et emda aien par auahas nohumia im lep neskamia an pece has.

29 Er ahtai inhaklin man et ero vai fardig et ethi; ja inyi ti etjose an nobohtan inyi ethi um eti ato a Etmannia.

30 Er idim esvi numri idjinimia asega.

31 Akumu jim intitaig aijaua, eka esjilid aijaua irai hakli man et ahinag.

32 Aien inyi asuptecnaig nyak an nuhup o atimi aien, ekpu asuptecnaig yin ainyak an nuhup o Etmak an nohatag.

33 Aien inyi ateri nyak aien an nuhup o atimi, ekpu ateri yin ainyak an nuhup o Etmak an nohatag.

34 Jim aktaktai aijaua mika kis ham ainyak par ati neigpa an nobohtan: kis eti ham ainyak par ati neigpa, ja kis ham ainyak par ati nedoa.

35 Kis ham ainyak par etinohun nehti jipe atimi, etpu edemda a inhal o un tahi vai etman, im inhalav atahaijig o un tahi vai risin, im intakata vai risi natamnyu un.

36 Erupu edemda vaig tahi a nup uran nimmim o un.

37 Aien et aiyu alupas inliinmopon aien vai etman im risin, jam aiyu tintin inliinmopon vai nyak, et eti upene vai nyak aien: aien et aiyu alupas inliinmopon aien vai inhalav atamaig o un im inhalav atahaijig o un, jam aiyu tintin inliinmopon vai nyak, et eti upene vai nyak aien.

38 Aien et eti apos nauineai atgeig o un aien, um apitac nyak, et eti upene vai nyak aien.

39 Aien et imyicoho yin aien, inyi mas aien: aien inyi mas aien vai nyak, etpu leh nitai umoh iran aien.

40 Aien et leh caua aien, et leh nyak aien; aien et leh nyak aien, et leh yin aien is abrai nyak aien;

41 aien et leh tahi naprofeta aien an nidai naprofeta, etpu leh nintan va naprofeta aien; aien et leh tahi natimi upene aien an nidai natimi

upene, etpu leh nintan vai natimi upene aien;

42 aien inyi aluman tahi irai ilpu atimi upoupo iji eigki *inwai* aheyuyu ache an nipjinitai aien an nidai natimi atahajeg *nyak*, et inivajec ineig ek asaig ehelemia ainyak *mika*, etpu leh nintan imi yin aien.

NUARIN-TAS ALUPAS 11.

IS tas ehni a Iesu ehele ilpu atimi atahajeg yin is twelv, ja par ahes eahki, um atga o un, um apan par esege imi atimi, um asuptecnaig intas irai iji uari-pece ura.

2 IS wat atahajeg a Joanes auliin neom ipjin va nauritai o Kristo, is abrahi ohwat atimi atahajeg yin is ero aien,

3 um ika ehelen, Na atimi iyehki aiek, eris ika, Etpu ham aien, ka intupu aitagai yin akaija?

4 Is tas a Iesu, um ika ehele rau, Apan aijaurau um asuptecnaig ehele Joanes nitai iji eigki erau atahajeg aijaurau um almoi:

5 Et lah nesganimtai ilpu atimi aupat nesganintara, um atga a ilpu atimi asvalteuc neduora, *um* adicin-adicin a ilpu atimi aleprose, um ahgei itai a ilpu atimi ucjapines intikgara, *um* anusjai a ilpu atimi emesmas, eh lep asuptecnaig intas-upene ehele ilpu ilhki atimi.

6 Et mun ahesmoij natimi ineig, et eti imyiehcama nyak aien.

7 ¶ Erus wat atga urau arau is tas a Iesu ehele atimi is ahinag vai Joanes, um ika, Akis apan aijaua an namasacen par almoi inhe? nieg is amaamai iran nintinjop, ka o'o?

8 akis idim apan aijaua par almoi inhe? natimi is aso yin an napelumai yilyil, ka o'o? ara era aso ra irai *apelumai* yilyil ara era amen ara irai eom o ilpu atinarid:

9 akis idim apan aijaua par almoi inhe? naprofeta is ethi, ka o'o?

Maiya, ek asaig ehelemia ainyak *mika*, et esjilid aien irai ilpu profeta:

10 aien aigki, eris aged intas vai yin, *um ika*, "Ek idim abrahi naheca unyak ainyak mika yi uhup iram, etpu ahped nefalaig imi euc aien, um uhup iram."

11 Et inivajec ineig ek asaig ehelemia ainyak *mika*, Is eti eteuc tahi ira atimi iji eigki eris apos ra a risira nesjilidvaig irai Joanes Natimi baptiso: ja et esjilid iran aien et upoupo aien an nelcau an nohatag.

12 Eris miakaikai emda nelcau an nohatag an naopan iyehki is ehcohos pam a Joanes Natimi baptiso, um imyihum pam naopan ineig, era miakaikai a ilpu atimi emda.

13 Is *amen* intas alep *is aged a Moses* im ilpu profeta asega, um esege un yetpan irai Joanes.

14 El eka merit aijaua natovaig, Elaija mun eigki, eris ika, Etpu ham aien.

15 Aien et eteuc intikgan aien par ahgei itai, etmu atahajeg aien.

16 ¶ Inki ika ainyak, era idivanhe natimi an naopan ineig? era idivaig ilpu halav ara, era ateuc ara irai tiptag, um ahlaig vai ilpu etoara,

17 um ika, Ecra mun ahilai nau vai caua aijama, ja eka eti adikjai aijaua; ecra mun ehteigtaig imi caua aijama, ja eka eti taig aijaua.

18 Is wat ham a Joanes, is eti hag aien um eti umwig, ja eris ika ara, Et amen iran a nagelo has.

19 Is wat ham a Inhal o natimi, is hag aien um umwig, ja eris ika ara, Almoi natimi ineigki et hag alupas aien, um umni waina, et etoai ilpu atimi akwanaham aien im ilpu atimi auatatimi. Ja era ika a ilpu atimi arapakau, Et idim upene narapakau.

20 ¶ Is ated *nup* urai uari-pece iji ehki aien is ago niji auritai esjilid o un is ahinag iran aien, va nedo ura, nikavaig, eris eti adumoij anliinmopura ara:

21 A'a, auwe vai caua, ak *nupu* Koresin! a'a, auwe vai caua, ak *nupu*

NUARIN-TAS ALUPAS 12.

Bedseta! el eris ago nauritai esjilid iji eigki an nuhup u *nupu* Tairus im *nupu* Saiton eris mun ago an nuhup unyimia, el eris adumoij auiliinmop-ura ara itu acen, um aso ra irai apelumai ucai, um ereuc an nohpa.

22 Ek asaig ehelemia ainyak *mika*, Inyi idim tintin nohocred o *nupu* Tairus im *nupu* Saiton an nadiat almoijidjid, ja etpu idim esjilid nohocred unyimia.

23 Ak *nupu* Kaperneum, eris atijai caua an nohatag, ja uhpu ethainse caua sepagko an naupat: el eris ago nauritai esjilid iji eigki an *pece* Sotom eris mun ago iramia, el et eteuc an naopan ineig.

24 Ek asaig ehelemia ainyak *mika*, Inyi idim tintin nohocred o *nupu* Sotom an nadiat almoijidjid, ja etpu idim esjilid nohocred unyimia.

25 ¶ An naopan iyehki is tas a Iesu, um ika, Ek naaurineig ainyak vai euc, ak Etmak, Natimarid an nohatag im nobohtan, va nitai ineigki, nikavaig, na adenaig nitai iji eigki aiek vai ilpu atimi arapakau, im ilpu atimi esjilid an nato itai, jam asuptecnaig ehele ilpu halav:

26 maiya, ak Etmak: is idim ucco inliinmopom aiek.

27 Is ati niji itai asega imi nyak a Etmak: et eti ato Inhal o *Atua* tah, Etmak ache; um eti ato Etmak tah, Inhal o *Atua* ache, im lep ra et merit a Inhal o *Atua* naniv yin vaig ehele ra.

28 ¶ Akumu ahtag pam ehelek aijaua asega, eka auritai aijaua, et lep opouc nitai ahelwei unyimia, ekpu alupai caua nitai atumop iran ainyak.

29 Akumu leh nitai ahelwei unyak aijaua, um idivai nyak; et eropse inliinmopok ainyak um upoupo: akupu leh nitai atumop iran imi nesgamia aijaua.

30 Et tup upene nitai ahelwei unyak, um aiheucaihuec nitai apos unyak.

AN naopan iyehki is atga a Iesu u nahapol hwiit an nadiat atumop; is um ehele ilpu atimi atahaijeg yin, eris um aldei nohoai hwiit ara, um hegaig.

2 Eris wat ecetai a ilpu Farisi, eris um ika ehelen ara, Alum ilpu atimi atahaijeg euc aiek, era ago nedo ineig ara et itaup nagovaig an nadiat atumop.

3 Is ika ehele ra aien, Akis idim esvi intas va nedo o Tevit aijaua, an nehteles yin vaig aien, im lep ra eris ahced yin ara;

4 is apau aien anliin neom o *Atua*, um caig nareto ineig eris ahlap iran, is itaup vai yin incaigvaig, im lep ra eris ahced yin ara, eris caig a ilpu atimi ahlap ache.

5 Akis idim esvi aijaua an tas alep va nedo o ilpu atimi ahlap anliin neom ahlap an nadiat atumop; era ago itai ara an nadiat atumop, ja et eti has nedo ura:

6 ek asaig ehelemia ainyak *mika*, Et amen igcaki *tah et ethi* et esjilid aien an neom ahlap.

7 Al ekis ato nesgan tas *ineigki* aijaua eris ika, "Ek merit ainyak va nedo aiheuc va atimi, jam eti *merit* va niji itai ahlap," el eka eti asan tas has aijaua vai ra sji eigki, era eti ago nedo has ara.

8 Et Atimarid an nadiat atumop a Inhal o natimi.

9 IS ahes cahki aien, um atga o un, um apan anliin neom alaigaheni ura:

10 is amen eahki natimi is ethi is urauo nikman. Eris ahodai yin ara, um ika, Et itaup nago cehcehe *atimi* vaig an nadiat atumop, ka o'o? eris ahodai yin ara *mika* eri asan tas has vai yin.

11 Is um ika ehele ra aien, Natimi ineig yek eda iramia, et o un siip et ethi, el et etjose an nelipanitai

an nadiat atumop, el et eti arapse aien vai yin um aihiaigjai?

12 ja era esjilid atimi irai siip: et eti itaup par ago nedo upene an nadiat atumop.

13 Is um ika aien ehele ratimi iyehki, Atgeig yapidi nikmam iek. Is um atgeig yapidi *nikman* aien; is um upene *nikman*, um idivaig nahaijin *nikman*.

14 ¶ Eris um alau ijo a ilpu Farisi, um tas alep vai yin, mika eri atgei yin.

15 Is wat ato a Iesu, is ahes eahki aien um atga o un: eris apitac yin natimi is ahinag, is ago cehcehe ra asega aien;

16 is lep acaiji ra aien mika eri jim aniv yin ara:

17 mika yi ehneijid intas ineig is asaig a Aiseya naprofeta, um ika,

18 "Alum naheca unyak aijaua, kis ati yin ainyak; et *halav* cop unyak aien, et imyiacitak yin inliinmopok ainyak: ekpu ati Nesgak ehelen ainyak, etpu asuptecnaig intas atoh aien ehele nup urai iji pece:

19 inyi ti imyiisjis itai aien, um eti tas ijinies; inyi ti atahaijeg nohran tah irai efalaig:

20 inyi ti asvaldeipagki nieg asvagrei aien, um eti ahni incop alahala cas uposupos, um imyihum pan naopan iyehki etpu esjilid intas atoh o un:

21 erupu asgeig an nidan nup urai iji pece."

22 ¶ Eris imyiapan ehelen natimi is ethi is amen iran nagelo has, is aupat nesganintan aien, um pop: is ago cehcehe yin aien, is tas um alum itai natimi iyehki is aupat nesganintan aien um pop.

23 Eris imyiali natimi asega, um ika, Mapoi Tevit ineigki, ka o'o?

24 Eris wat atahaijeg a ilpu Farisi, eris ika ara, Et ahlo ilpu agelo has a nat naico vai Belsebub natimarid o ilpu agelo has.

25 Is ato naktaktai ura a Iesu, um ika ehele ra, El et ika nero inliin-

mopoi nup uran tah nelcau, inyi ti amen; ka nero inliinmopoi atimi an tah anuarin-pece, ka an tah nimmim, erupu atih ara:

26 el et ahlo Satana a Satana, um ero inliinmopon, inyi ti amen nelcau o un.

27 El ek ahlo ilpu agelo has ainyak vai Belsebub, era ahlo *ra* vai di a ilpu hal unyimia? va nitai ineigki erupu ated caua ara.

28 El ek ahlo ilpu agelo has ainyak va Nesgai Atua, et mun yetpam ehelemia nelcau o Atua.

29 Et ehka vaig tah napanvaig anliin neom o natimi emda, um ahneg inpadiag o un; ja el et uhup aien um arore natimi emda, etpu tup upene nahnegvaig itai an neom o un.

30 Aien et eti leh imi nyak aien, et tak atimi irak aien; aien et eti atau imi nyak aien par asjapicnaig itai, et eduoraprap aien.

31 ¶ Ek idim asaig ehelemia ainyak *mika*, Uhpu eti aru nedo has asega ira atimi im intas has ura: ja uhpu aru ira atimi intas has ura vai Nesgan *Upene*.

32 Aien et asan tas has aien vai Inhal o natimi, uhpu eti aru: ja aien et asan tas has aien vai Nesgan *Upene*, uhpu aru an nobolitan ineigki, im lep an tak aopan.

33 Aku wit ago upene nauincai aijaua, etpu upene nohoan; ja aku wit ago has nauincai aijaua, etpu has nohoan: er ato nauciai va nohoan.

34 Ak ilpu imyiv, et ehka vai caua intas upene vaig, eka ilpu atimi auatatimi aijaua: et tas nipjineucse atimi va nitai iji eigki et ehlohos anliinmopura.

35 Era leh niji itai upene a ilpu atimi upene ira aga upene anliinmopura: ja era leh niji itai has a ilpu atimi auatatimi ira aga has *anliinmopura*.

36 Ek asaig ehelemia ainyak *mika*, Uhpu aru intas ahnag asega o atimi an nadiat almaijidjid.

37 Uhpu ato nedo atoh unyum

vai intas unyum, ja uhpu ato nauatitimi unyum vai intas unyum.

38 ¶ Eris tas nahaiji ilpu atimi esege im ilpu Farisi, um ika, Ak Natimi esege, ecra merit aijama mika an ago nitai asjaaicnaig aiek.

39 Is tas aien, um ika ehele ra, Era merit nalmoivaig nitai asjaaicnaig a ilpu atimi auatatimi, im ilpu atimi imyiisjis nahcil; ja uhpu eti ago nitai asjaaicnaig vai ra, nitai asjaaicnaig ache o Jona naprofeta:

40 is idim amen a Jona an nadiat is esej im nepeig is esej an nipjinetgan numu alupas; et um ucco etpu amen a Inhal o natimi an nadiat inyi esej im nepeig inyi esej anliin tan.

41 Erupu atidai a nup an Ninivi an *nadiat* almaijidjid, um ated atimi an naopan ineig: eris adumoij anliinmopura ara vai intas asuptecnaig o Jona; ja et amen tah igcaki et esjilid aien irai Jona.

42 Etpu atidai a natimarid takata Siba an *nadiat* almaijidjid, um ated atimi an naopan ineig: is alies aien an nehni va nobohtan um apam, mika yi atahaijeg narapakau o Solomon; ja et amen tah igcaki et esjilid aien irai Solomon.

43 Et wat atceijaig tah natimi a nagelo has, et um atga aien irai uari amasacen, um ika yi atumop, ja et ehka:

44 et lep ika aien, Ki adumoij pan ainyak an neom unyak ineig kis upyi amen iran ainyak; et wit yetpan aien um ecetai neom iyehki, et mun tup lah, eh mun ahre um yecrei,

45 et apan aien, um leucose ilpu agelo has et eche et seven, et esjilid nauatatimi ura an nauatatimi o un, era apan ara anliin neom iyehki, um amen iran: is upyi hup natimi incigki um has, ja par apitac um has esjilid. Etpu idim ucco ira atimi auatatimi an naopan ineig.

46* ¶ Is wat tas aien ehele atimi is ahinag, is aiji ijo a risin im ilpu

etoan, eris merit ara intasvaig ehelen.

47 Is imyiabrai yin tah, um ika, Era aiji ijo a risum im ilpu etoam, era merit ara intasvaig ehelum.

48 Is tas aien, um ika ehele natimi ineig is imyiabrai yin, Risik im ilpu etoak di?

49 Is atgeig yapidi nikman aien ehele ilpu atimi atahaijeg yin, um ika, Alum risik im ilpu etoak!

50 aien et imyiaiji intas o Etmak an nohatag aien, et etoak aien, um atahaiig irak, um risik.

NUARIN-TAS ALUPAS 13.

AN nadiat iyehki is ahes a Iesu anliin neom, um alau ijo, um apan ubutpotet u injop, um ateuc.

2 Eris asjapicnaig pan ehelen natimi is ahinag, is aridjai aien an nelcau, um ateuc; eris aiji an nomunjop natimi asega.

3 Is asuptecnaig niji itai is ahinag ehele ra aien um ecsipeceiran, um ika,

Is apan natimi ahapol is ethi um ahoaig upsi itai:

4 is wat ahoaig aien, is um elel nahaiji *upsi itai* an nahaijin nefalaig, eris ahtag pan inman um hegaig.

5 Is um lep elel nahaijin an nuarin eteuc nilpauhat iran, is eklim haklin nobohtan iran; is eti laulau um edel, is eklim haklin nobohtan iran:

6 is wat aridjai nagesega um ces, is um imlai, um mese; is eti eteuc nievan.

7 Is um lep elel nahaijin irai efellicai has; is um ededel nefellicai has, um atgei.

8 Is um lep elel nahaijin an nobohtan upene, is um oho, is eteuc nohoan is wun huntret iran is ethi, im nohoan is sikste iran is ethi, im nohoan is dirte iran is ethi.

9 Aien et eteuc intikgan aien par ahgei itai, etimu atahaijeg aien.

10 Eris apan a ilpu atimi atahaijeg yin, um ika ehelen, Na auri

aiek par tas ehele ra um ecsipece iran?

11 Is tas aien, um ika ehele ra, Eh mun alupai caua mika aki ato aijaua niji itai adenaig an nelcau an nohatag; ja eh mun eti alupai ra.

12 Aien et o un itai, uhpu lep alupai yin, inyi ahinag niji itai o un: aien et eti o un itai, uhpu atipagki ehelen niji itai o un.

13 Ek tas ehele ra ainyak um ecsipece iran va nedo ura, nikavaig, era alum itai ara, jam eti ecetai; um lep atahaijeg itai, jam eti ahgei, um eti ato.

14 Et idivaig intas is upyi asaig a Aiseya vai ra, um ika, "Akupu idim atahaijeg itai aijaua jam eti ato; akupu idim alum itai aijaua jam eti almuktit:

15 et ipjiu inliinmopoi nup igcaki, um tehen intikgara, era atapanes nesganimtara ara; va eri jim alum itai an nesganimtara ara, um atahaijeg itai an tikgara, um ato itai anliinmopura, um adumojj," mika ki ago cehehe ra ainyak.

16 Eka mun ahesmoij aijaua va nesganintamia, et alum itai: im intikgamia, et atahaijeg itai.

17 Et inivaijec ineig ek asaig ehelemia ainyak mika, Eris merit a ilpu profeta is ahinag im ilpu atimi upene nalmoivaig nitai iji eigki eka almoi aijaua, ja eris eti almoi ara; um atahaijegvaig nitai iji eigki eka atahaijeg aijaua, ja eris eti atahaijeg ara.

18 ¶ Akumu atahaijeg aijaua intas ecsipece va natimi ahapol.

19 Et wat atahaijeg intas va nelcau o *Atua* tah, um eti ato, et um han natimi auatatimi, um atoraliak neig eris ahoaig anliinmopon. Aien aigki et idivaig nahaijin nefalaig aien, eris ahoaig nupsi itai iran.

20 Aien et idivaig nuarin eteuc nilpauhat iran aien, eris ahoaig nupsi itai iran, aien aigki et atahaijeg intas aien, um auroauro um leh, um imyiacitak;

21 ja et eti eteuc nicvan *tas* iran, et eti elvamen aien yi itu iran: et wat aridjai nohocred im nedemda vai intas, et um auroauro aien um adumojj.

22 Aien et idivaig nuarin eteuc nefelelicai has iran aien, eris ahoaig nupsi itai iran, aien aigki et atahaijeg intas aien; ja et atgei intas naktaktai niji itai an nobohtan ineigki, im inpadiaig efaifa, et um eti oho aien.

23 Aien et idivaig nobohtan upene aien, eris ahoaig nupsi itai iran, aien aigki et atahaijeg intas aien um ato; et oho aien, et eteuc nohoan et wun huntret iran tah ra, im sikste iran tah ra, im dirte iran tah ra.

24 ¶ Is lep aketo aien um tas ecsipece ehele ra, um ika,

Nelcau an nohatag et idivaig natimi is ethi, is ahoaig upsi itai upene uman aien:

25 eris wat umjeg atimi, is apan natimi edemda vai yin, um ahoaig pan nefelelicai has u hwiit, um atga o un.

26 Is wat ehlau ohua um oho, is um lep ededel nefelelicai has.

27 Eris apan ehele natimi alupas iyehki a ilpu aheca o un, um ika ehelen, Ak natimi alupas, as wat ahoaig upsi itai upene umam aiek, jam uauo nefelelicai has ineigki?

28 Is ika ehele ra aien, Is ago nedo ineigki a natimi edemda. Eris um ika ehelen a ilpu aheca o un, Nai merit aiek mika ecri apan aijama um aurohos iran, ka o'o?

29 Is ika ehele ra aien, O'o; aku wit aurohos an nefelelicai has aijaua, um lep atecrei hwiit:

30 tup ude aijaua um imyihum pan naopan iyehki eri asjapicnaig nohoai itai: an naopan asjapicnaig nohoai itai ekpu ika ainyak ehele ilpu atimi asjapicnaig nohoan, Akumu upyi hup aijaua um ahre nefelelicai has, um aijis, um atnamud: jam asjapicnai hwiit anliin neom ikni itai unyak.

31 ¶ Is lep aketo aien um tas ec-sipece ehele ra, um ika,

Nelcau an nohatag et idivaig nupsi mustart, is leh natimi is ethi, um ahoaig uman :

32 et esjilid inhaklin o un irai upsi itai asega : ja et wat edel, um esjilid irai efelelicai asega, um ohu u nitai, era ahtag pan inman um amen irai ran.

33 ¶ Is lep aketo aien um tas ec-sipece ehele ra, *um ika*,

Nelcau an nohatag et idivaig leven is leh intakata is ethi, um ati a flaur ehceseij asjaaicnaig iran, is um leven asega.

34 Is ecsipece irai itai iji eigki asega a Iesu ehele atimi is ahinag ; is tas ehele ra aien irai tas ecsipece ache :

35 mika yi ehneijid intas ineig is upyi asaig a naprofeta, um ika, "Ekpu ecsipece ainyak ; ekpu asuptecnaig ainyak niji itai eris eti ato an naopan iyehki is pam eteuc nobohtan um uhum pam naopan ineig."

36 Is abrai atimi is ahinag a Iesu mika eri atga ura ara, ja par apan aien anliin neom : eris apan ehelen a ilpu atimi atahaijeg yin, um ika, Asuptecnaig ehelema aiek nesgan tas ecsipece ineigki va nefelelicai has an nobohtan.

37 Is tas aien, um ika ehele ra,

Aien et alhoaig upsi itai upene aien, Inhal o natimi ineigki ;

38 et uman nobohtan asega ; era upsi itai upene a ilpu atimi an nelcau o *Atua* ; era efelelicai has a ilpu atimi o un et has aien ;

39 et Tiapolo natimi ineig et edemda aien, um ahoaig itai ; et adiat apitac naopan iyehki eri asjapicnaig nohoai itai iran ; era ilpu agelo a ilpu atimi asjapicnaig nohoai itai.

40 Et idivaig ineig er asjapicnaig nefelelicai has um atnamud an cop ; etpu idim ucco an nadiat apitac :

41 etpu abrai ilpu agelo o un a

Inhal o natimi, mika eri asjapicnaig niji itai has asega ara an nelcau o un, im lep ra era ago nedo has ara ;

42 um erekhaig pan ra anliin cop alupas : erupu aunyauwaigara eahki, um ataktit eijera.

43 Erupu ememina a ilpu atimi upene et idivaig nagesega, an nelcau o *Etmara*. Aien et eteuc intikgan aien par algei itai, etmu atahaijeg aien.

44 ¶ Im lep ineig, nelcau an nohatag et idivaig inpadiaig er aden-naig an nobohtan ; et wat ecetai tah, et lep adenaig aien, um imyiacitak, um apan, um ahtai niji itai asega o un, um auanimitan nobohtan iyehki.

45 ¶ Im lep ineig, nelcau an nohatag et idivaig natimi ahtai itai is ethi, is ahilek perl upene aien :

46 is wat ecetai perl esjilid is ethi aien, is apan aien, um ahtai niji itai asega o un, um auanimitan.

47 ¶ Im lep ineig, nelcau an nohatag et idivaig nopoig eris anah iran an jop, um anai iji obotpot *mu* iran :

48 is wat ohua, eris aihiaig pahai an nomunjop ara, um ateucse, um asjapicnaig *numu* upene, um atohoaig irai cat, jam erekhaig *numu* has.

49 Etpu ucco an nadiat apitac : erupu apan a ilpu agelo, um ikni-pagki ilpu atimi auatatimi ehele ilpu atimi upene,

50 um erekhaig pan ra anliin cop alupas : erupu aunyauwaigara eahki, um ataktit eijera.

51 Is ika ehele ra a Iesu, Eka ato nitai iji eigki asega aijaua, ka o'o ? Eris um ika ehelen ara, Maiya, ak Natimarid.

52 Is ika ehele ra aien, Natimi esege ineig et ato nelcau an nohatag aien, et idivaig natimi alupas et ethi aien, et leh niji itai mat aien, im niji itai itu acen, ira aga o un.

53 ¶ Is wat tas ecsipece ehni a

Iesu irai itai iji eigki, is ahes eahki aien um atga o un.

54 Is wat yetpan an pece o un aien, is esege imi ra aien anliin neom alaigaheni ura, eris imyiali ara, um ika, Et leh narapakau ineigki eda a natimi ineigki, im nauritai esjilid *iji eigki?*

55 Inhal o natimi ared cai ineigki; et idai risin Mere; era ilpu etoan a Jakobus, im Joses, im Samona, im Juta;

56 era amen eheleija a ilpu atahag iran asega: is leh nitai iji eigki asega eda a natimi ineigki?

57 Eris esjum vai yin ara. Ja is um ika ehele ra a Iesu, Era eti ecen vaig tah naprofeta a nup uran pece o un ache, im ilpu atimi ehpan iran.

58 Is ago nauritai esjilid is eti elpat ache eahki aien, va nimyiisjis nahcil ura.

NUARIN-TAS ALUPAS 14.

AN naopan iyehki is atahaijeg intas vai Iesu a Herot natimarid,

2 is um ika ehele ilpu dualep o un aien, Joanes ineigki Natimi baptiso; et mun lep nusjai aien; va nitai ineig et ago niji auritai ehka aien.

3 IS upyi arop irai Joanes a Herot, um arore yin, um ati yin anliin neom ipjin vai Herotyas, ehgai Filipus etoan.

4 Is ika ehelen a Joanes, Et itaup vai euc inlehmaig *ehgai etoan*.

5 Is merit aien mika yi atgei *Joanes*, jam imtita atimi is ahinag; eris ika ara, Et aprofeta aien.

6 Eris wat aminjinaig nadiat ineig eris apos Herot iran, is adekdikjai inhalav atahag o Herotyas an nuhup *ura*, is imyiacitak a Herot.

7 Va nedo ineigki is upyi asig yi aktit intas aien, mika yi alupai

yin nitai ineig inyi ugni *yin* vaig aien.

8 Is upyi hup a risin um asuptecnaig ehelen; is um ika aien, Efi alupai nyak aiek nidjini Joanes Natimi baptiso an haklin nelcau.

9 Is ohocred a natimarid: ja is ika aien, eri alupai *yin*, vai intas nupyi asig yi aktit o un, im lep vai ra eris ateuc ehelen ara um hag.

10 Is abraig tah aien, mika yi auud yamud nidjini Joanes Natimi baptiso, anliin neom ipjin.

11 Eris apos nidjinin an haklin nelcau, um alupai natahaig iyehki: is imyiapan ehele risin aien.

12 Eris apan a ilpu atimi atahaijeg *Joanes*, um leh nohun um atelmoi, um apan um asuptecnaig ehele Iesu.

13 IS wat atahaijeg a Iesu, is ahes eahki aien, um aridjai an nelcau, um echim apan an nuarin namasacen: eris wat atahaijeg atimi, eris ahes irai iji uari-pece ura ara, um atga ubos, um apitac yin.

14 Is wat apan a Iesu, um alum atimi is ahinag, is aiheuc vai ra aien, um ago celhehe ilpu atimi emehe ira ra.

15 ¶ Is wat jupura, eris apan ehelen a ilpa atimi atahaijeg yin, um ika, Et amasacen igcaki, um lep epeig; abrai atimi iji eigki aiek mika eri atga ura ara, um apan irai iji uari-pece, um auanimtan nitai caig incara.

16 Is um ika ehele ra a Iesu, Eri jim atga ura ara; akumu alaa ra nitai caig aijaua.

17 Eris um ika ehelen ara, Et faiv ache nareto igcaki, um ero ache numu.

18 Is um ika aien, Leh pam aijaua ehelek.

19 Is ika aien ehele atimi asjapicnaig, eri ateucse ara irai efelelicai, is leh nareto is faiv aien, im numu is ero, um easji pan an nohatag, um naaurineig, um iswoplecoplec, um

alupai ilpu atimi atahajjeg yin nareto iji ehki, *eris edaig* ira atimi iji ehki a ilpu atimi atahajjeg yin.

20 Eris hag ara asega, um gaije: eris asjapicnaig nuari itai hegaig eris eti ahtahni ara, um atohoaig irai nefehecat is twelv, is um ohua.

21 Ara eris hag ara eris faiv dau-sant a ilpu atamaig, um aled ilpu takata im ilpu halav.

22 ¶ Is ika a Iesu ehele ilpu atimi atahajjeg yin, eri aridjai an nelcau ara, um apan an taka uarin um uhup iran, ja is abraai atimi aien mika eri atga ura ara.

23 Is wat abraai atimi aien mika eri atga ura ara, is echim aridjai aien an nedoon is ethi, mika yi alaigaheni: is wat jupura, is echim amen aien ache eahki.

24 Is asjeuc nelcau an namilvai, um auajai va epeau: is has nintinjop.

25 Is apan ehele ra a Iesu an nat-hut o nadiat, um atga an jop.

26 Eris wat ecet yin a ilpu atimi atahajjeg yin natgavaig an jop, eris um imtitaig ara, um ika, Natmas ineigki; um aunyauwaig va nintitaig ura.

27 Is idim tas ehele ra a Iesu, um ika, Etmu eropse inliinmopomia aijaua; ainyak aigki; jim imtitaig aijaua.

28 Is tas a Pitrus, um ika ehelen, Ak Natimarid, el et aiek aigko, namu ika aiek ehelek ki apan ehe-lum ainyak an jop.

29 Is um ika aien, Apam aiek. Is ahes an nelcau a Pitrus um asuol, um atga an jop, um apan ehele Iesu.

30 Is wat ecetai nintinjop aien nalupasvaig, is um imtitaig aien; is atupun aien um ete, is ahlaig aien, um ika, Ak Natimarid, imyi-atamaig nyak aiek.

31 Is auroauro a Iesu um arahpan va nikman, um asjirai yin, um ika ehelen, Ak *natimi* auatialidi, na auri aiek par imyiisjis nahcil?

32 Erus wat aridjai arau an nelcau, is um esjaig nintinjop.

33 Ara eris amen an nelcau ara, eris apan ara um atpuse an nuhup o un, um ika, Et idim inivaijec ineig, nikavaig, nai Hal o Atua aiek.

34 ¶ Eris apan ara, um apahai an pece Jenesaret.

35 Eris wat ato a nup an nuarin pece iyehki, eris abraig pan atimi ara irai iji uari pece asega, um imyiapan ehelen ilpu atimi emehel asega;

36 um ugni yin, mika eri atcei pan intid an napelumai iran ara: eris um umumoh upene ara sji eigki asega, eris atcei pan *yin* ara.

NUARIN-TAS ALUPAS 15.

ERIS ahes Jerusalem a ilpu atimi esege im ilpu Farisi, um apan ehele Iesu, um ika,

2 Era auri a ilpu atimi atahajjeg euc par inyipalea intas alep o ilpu atimi tas alep? era eti upyi ahisjim ara, ja par hag.

3 Is tas aien, um ika ehele ra, Eka auri aijaua par inyipalea intas alep o Atua an tas alep unyimia?

4 Is tas alep a Atua, um ika, "Namu eccen vai etmam im risun aiek:" im lep ineig, "Aien et asan tas has aien vai etman im risin, etpu idim mas aien."

5 Ja eka ika aijaua, Aien et ika ehele etman aien ka risin, Et itaup vai euc niji itai unyak;

6 um eti eccen vai etman ka risin, *inyi ti mas aien*. Eka inyipalea intas alep o Atua aijaua an tas alep unyimia.

7 Ak ilpu atimi efaifa, et inivaijec intas is upyi asaig vai caua a Aiseya, um ika,

8 "Era eteuc ubutpotet ehelek a nup igcaki an nipjineucsera; ja et itac acen inliinmopura ara vai nyak.

9 Et takitai nimyiahpas nyak ura, era esege tas alep o atimi ache ara."

10 ¶ Is ahlaig va atimi is ahinag aien, um ika ehele ra, Akumu atahajeg aijaua, um ato:

11 et eti auahas atimi niji itai et apan an nipjineucsera; ja et auahas atimi niji itai et ateucrad an nipjineucsera.

12 Eris apan ehelen a ilpu atimi atahajeg yin, um ika, Na mun ato aiek, ka o'o, nikavaig, eris wat atahajeg intas iyehki a ilpu Farisi, eris edemda ara?

13 Is tas aien, um ika, Uhpu auorohos nefeledica asega is eti ahoaig a Etmak an nohatag:

14 akumu ude ra aijaua: era aupat ara, um atau ira ra era aupat ara: el era atau irai ilpu atimi aupat nesganimtara a ilpu atimi aupat nesganimtara, erupu eropropse ara asega an nehpanitai.

15 Is tas a Pitrus, um ika ehelen, Asuptecnaig ehelema aiek nesgan tas ecsipecne ineigki.

16 Is ika a Iesu, Et echamecha inliinmopomia aijaua?

17 eka ato aijaua, nikavaig, nitai iji eigki era ikni an nipjineucsera atimi et asuol an nipjinetgara, er erekhaig an nuarin ikni niji itai has iran.

18 Ja et ehlohos anliinmopoi atimi nitai iji eigki et ateucrad an nipjineucsera, um auahas ra.

19 Et ehlohos anliinmopoi atimi naktaktai has, natgei atmas, ingaijid, nedo has, nehneg itai, intas aheil, intas has:

20 et idim auahas atimi nitai iji eigki: jam eti auahas atimi neti ahisjim ja par hag.

21 ¶ Is ahes eahki a Iesu um atga o un, um apan irai iji uari pece Tairus im Saiton.

22 Is ahes an pece iyehki intakata Kenan is ethi, um ahlaig vai yin, um ika, Ak Natimarid, Mapoi Tevit, aiheuc vai nyak aiek; et ohocred alupas inhalav atahaig unyak va nagelo has.

23 Ja is eti tas aien. Eris apan

ehelen a ilpu atimi atahajeg yin um ugni yin, um ika, Abrai yin mika yi atga o un; et ahlaig vai caija aien.

24 Ja is tas aien, um ika, Eris eti abrai nyak vai tak atimi, ja vai siip ahnag irai nupu Isreel ahele.

25 Is apan aien, um atpuse an nuhup o un, um ika, Ak Natimarid, aiheuc vai nyak aiek.

26 Is tas aien, um ika, Et eti upene inlehvaig nitai caig o ilpu halav, um alayi kuri.

27 Is ika aien, Et idim inivaijec, ak Natimarid; ja era hegaig nahri itai kuri, et etjose an nitai hag o natimi ohuun ra.

28 Is tas a Iesu, um ika ehelen, Ak intakata ineigki, et esjilid nimyiisjis ninivaijec unyum: namu leh nitai ineig aiek nai merit vaig aiek. Is um cehcehe a inhal o un an nuarin-nadiat iyehki.

29 ¶ Is ahes eahki a Iesu, um apan ubutpotet u injop Calili; is aridjai aien an nedoon is ethi, um ateucse.

30 Eris ahtag pan ehelen natimi is ahinag, um apos ilpu atimi asvah-teuc neduora, im ilpu atimi aupat nesgaimtara, im ilpu atimi pop, im ilpu atimi ighin, im hal ra is ahinag, um ikni ra u eduei Iesu; is ago cehcehe ra aien.

31 Eris imyiali natimi is ahinag, eris wat alum ilpu atimi pop ara intasvaig, im ilpu atimi ighin nupe-nevaig nohura, im ilpu atimi asvah-teuc neduora natgavaig, im ilpu atimi aupat nesgaimtara nalum itai vaig: eris um iniyahpas Atua o nupu Isreel ara.

32 ¶ Is asjapicnaig ilpu atimi atahajeg yin a Iesu, um ika, Ek aiheuc va atimi et ahinag ainyak, eris amen ehelek ara an nadiat is esej, et ti nitai caig ura incara: inki ti abrai ra ainyak mika eri atga ura ara nehteles ra vaig, va yi jim isji ra nunlaig an nefalaig.

33 Eris ika ehelen a ilpu atimi atahajeg yin, Inti leh nitai caig

eda akaija an namasacen ineigki yi ahinag par alaa atimi iji eigki, era ahinag acen ara?

34 Is um ika ehele ra a Iesu, Et ehed nareto unyimia? Eris ika ara, Et seven, im inhakli numu et eti elpat.

35 Is um ika ehele atimi aien, eri ateucse ara an nobolitan.

36 Is leh nareto is seven aien im numu, um naaurineig, um iswoplec-oplec, um alupai ilpu atimi atahaijeg yin, *eris* um *alaa* atimi is ahinag a ilpu atimi atahaijeg yin.

37 Eris hag ara asega, um gaije: eris asjapicnaig nuari itai hegaig ara eris eti ahtahni, um atohoaig irai cat is seven, is um ohua.

38 Ara eris hag ara um gaije, eris for dausant ara, um aled ilpu takata im ilpu halav.

39 Is abrai atimi iji ehki aien mika eri atga ura ara, ja is apan aien an nelcau, um apahai an pece Mactala.

NUARIN-TAS ALUPAS 16.

EERIS ahtag pan ehelen a ilpu Farisi im lep ilpu Satusi, um oop yin, um ugni yin mika yi ehvaig ehele ra nitai asjaaicnaig an nohatag aien.

2 Is tas aien, um ika ehele ra, Et wat jupura, wat cop nohatag, eka ika aijaua, Etpu upene nipnyin.

3 Im lep an nuhiale, et wat cop nohatag um aimoc, *eka ika aijaua*, Etpu has nipnyin inpeig. Ak ilpu atimi efaifa, eka ato aijaua nesganimtan nohatag; ja eka *auri* aijaua par eti *ato* niiji itai asjaaicnaig an naopan ineig?

4 Era merit nalmoivaig nitai asjaaicnaig a ilpu atimi auatatimi im ilpu atimi imyisjis nahcil; ja eri eti almoi nitai asjaaicnaig ara, nitai asjaaicnaig ineig ache o Jona naprofeta. Is ude ra aien um atga o un.

5 Eris apan a ilpu atimi atahaijeg

yin an taka uarin, ja eris eti imyiehva nareto ara par apos.

6 Is ika ehele ra a Iesu, Aminjinai caua aijaua, um jim leh leven o ilpu Farisi im ilpu Satusi.

7 Eris tas jipe ehele ra ara, um ika, *Et asan tas ineigki aien* va nedo uja, nikavaig, inta mun eti apos nareto akaija.

8 Is wat ato a Iesu, is ika ehele ra aien, Ak ilpu atimi auatialidi par imyisjis ninvaijec, eka auri aijaua par tas jipe ehele caua, um ika, Inta mun eti apos nareto akaija?

9 Eka auri aijaua par eti ato, um eti imyiehva nareto is ikman, *akis alaa* atimi is faiv dausant *aijaua*, um lep asjapicnaig ineig is aled, um atohoaig irai efehcat is ehed?

10 Im lep nareto is seven, akis alaa atimi is for dausant aijaua, um lep asjapicnaig ineig is aled, um atohoaig irai efehcat is ehed?

11 eka auri aijaua par eti ato, nikavaig, kis eti tas ehelemia ainyak va areto, kis wat ika ehelemia ainyak aki aminjinai caua aijaua vai leven o ilpu Farisi im ilpu Satusi?

12 Eris ato ara, nikavaig, et mun eti ika ehele ra aien, eri aminjinai ra ara vai leven uri areto, ja va nesege o ilpu Farisi im ilpu Satusi.

13 ¶ Is wat yetpan a Iesu an pece Sisaria Filipai, is ahodaig ilpu atimi atahaijeg yin aien, um ika, Era ika natimi, ainyak di aigki, Inhal o natimi?

14 Eris ika ara, *Era ika* nabaiji ra, *Nai* Joanes *aiek* Natimi baptiso: um *ika* nabaiji ra, Elaija; um *ika* nabaiji ra, Jeremaia, ka tah et ethi irai ilpu profeta.

15 Is um ika ehele ra aien, Eka ika aijaua, ainyak di aigki?

16 Is tas a Saimona Pitrus, um ika, *Nai* Kristo *aiek*, Inhal o Atua umoh.

17 Is tas a Iesu, um ika ehelen, Na mun alhesmoij *aiek*, ak Saimona, inhal o Jona: eris eti asuptecnaig

ehelum natimi, jai Etmak an nohatag:

18 ek lep ika ehelum ainyak, Nai Pitrus aiek, ekpu atijai nakalasia unyak ainyak an heteuc ineigki; inyi ti esjilid iran nemda an pece has:

19 ekpu alupai euc ainyak kii an nelcau an nohatag: nitai ineigki napu arore aiek an nobohtan, uhpu lep arore an nohatag; im lep nitai ineigki napu aihiyi aiek an nobohtan, uhpu lep aihiyi an nohatag.

20 Is acaiji ilpu atimi atahaijeg yin aien mika eri jim asuptecnaig ehelen tah, um ika, Et Iesu Kristo aien.

21 ¶ Is atupun a Iesu an naopan iyehki um asuptecnaig ehele ilpu atimi atahaijeg yin, um ika, Ek et hidim ika ainyak ki apan Jerusalem, etpu ahinag nohocred unyak vai ilpu atimi tas alep, im ilpu atimi ahlap esjilid, im ilpu atimi esege, erupu atgei nyak ara; ja et wit ti pan itac nadiat inyi eseij ekpu lep nusjai ainyak.

22 Is asjiraig yin a Pitrus, um ated imi yin, um ika, Kaiheuc vai euc, ak Natimarid: inyi ti yetpam iram nitai iji eigki.

23 Ja is ahidai yin aien, um ika ehele Pitrus, Apan aiek an nidjik, ak Satana: nai itai epihtau imi nyak aiek: na eti aktaktai aiek niji itai o Atua, jam *aktaktai ache* niji itai o atimi.

24 ¶ Is ika ehele ilpu atimi atahaijeg yin a Iesu, El et ahced nyak tah natimi, etmu ude nedo ineig aien et merit vaig aien, etmu alcacse nauincai atgeig o un aien, um ahced nyak.

25 Aien et imyicoho yin aien, inyi mas aien: aien inyi mas aien vai nyak, etpu leh nitai umoh iran aien.

26 Et eti upene vaig tah natimi inlehvaig nobohtan asega, um auahas nesgan: inyi auanimtan nesgan tah natimi anhe?

27 Etpu yetpam a Inhal o natimi an natimi alupas o Etman im lep ilpu agelo o un; etpu ago neruvaig imi atimi asega aien yi idivaig nauritai ura.

28 Et inivaijeg ineig ek asaig ehelemia ainyak *mika*, Era aiji igcaki nahaiji atimi eri upyi hup ara um ecet Inhal o natimi napamvaig an nelcau o un, ja par ememas.

NUARIN-TAS ALUPAS 17.

IS wat ti pan itac nadiat is siks is leh Pitrus, im Jakobus, im Joanes etoan, a Iesu, um echim imyi-apan ehtaij ache an nedoon ijinies is ethi;

2 is um eche nohun aien an nuhup o ehtaij: is ememina nesganimitan is idivaig nagesega, um ahi napelumi iran is idivaig inlah.

3 Erus ehcohos pan ehele ra a Moses im Elaija, um tas ehelen.

4 Is tas a Pitrus, um ika ehele Iesu, Ak Natimarid, et upene vai caija namenvaig igcaki: el et merit aiek, ektijmu ago neom inyi eseij igcaki aijumtaij; yi ethi imi euc, um ethi imi Moses, um ethi imi Elaija.

5 Is wat tas aien, is taluopni pam ehtaij nepeig ememina: is ahes an nepeig nohran tah, um ika, Inhalav cop unyak ineigki, ek imyiacitak yin ainyak; ahtijmu atahaijeg yin aijautaij.

6 Ehtijis wat atahaijeg ahtaij atimi atahaijeg yin erabki, ehtijis imtitaig alupas ahtaij um eropse.

7 Is um apan a Iesu um atcei pan ehtaij, um ika, Atidai aijautaij, um jim imtitaig.

8 Ehtijis wat atidaijai ahtaij, ehtijis eti ecet tah natimi ahtaij, Iesu ache.

9 Eris ahes an nedoon iyehki ara um asuol, is acaiji ehtaij a Iesu um ika, Jim asuptecnaig ehelen tah nitai ineig ehtaij mun almoi aijautaij an naopan ineig, um uhun pan

naopan iyehki inyi nusjai a Inhal o natimi vai inmas o un, *ja par asuptecnaig.*

10 Ehtijis ahodai yin ahtaij atimi atahaijeg yin erahki, um ika, Era auri a ilpu atimi esege par ika, inyi ulup a Elaija um ham?

11 Is tas a Iesu, um ika ehele ehtaij, Inyi idim uhup a Elaija um ham, um lep ehteduo niji itai asega:

12 ja ek asaig ehelemitaij ainyak mika, is idim ham a Elaija, eris eti ato yin ara, eris ago iran ara niji itai asega eris merit ara: etpu idim ucco etpu ohocred a Inhal o natimi vai ra.

13 Ehtijis ato ahtaij atimi atahaijeg yin erahki, nikavaig, is tas ehele ehtaij aien vai Joanes Natimi baptiso.

14 ¶ Eris wat apan ara ehele atimi is ahinag, is apan ehelen natimi is ethi, um atpuse an nuhup o un, um ika,

15 Ak Natimarid, aiheuc vai inhalav atamaig unyak aiek; et ahnag aien, um ohocred alupas: et ehcahinag etjoi aien an cop, um ehcahinag etjose an wai:

16 ek mun imyiapan yin ainyak ehele ilpu atimi atahaijeg euc, ja era auatialidi ara nago celcehe yin vaig.

17 Is tas a Iesu, um ika, Ak ilpu atimi imyiisjis nahcil im ilpu atimi auatatimi, kis ameu ehelemia ainyak is itu irak, um eropse inliinmopok ainyak vai caua um itu irak: imyiapam yin igcaki ehelek aijaua.

18 Is acaiji nagelo has a Iesu, is um atceijai yin aien: is um celcehe inhalav an nuarin-nadiat iyehki.

19 Eris apan ehele Iesu a ilpu atimi atahaijeg yin an echim amen o un, um ika, Ecra auatialidi aijama nahlo yin vaig vanhe?

20 Is um ika ehele ra a Iesu, Va nimyisjis nahcil unyimia: et inivaijec ineig ek asaig ehelemia ainyak mika, El et eteuc nimyisjis ninivaijec unyimia et idivaig nupsi mustart, aku wit tas ehele nedoon ineig aijaua, mika yi atga um apan an tah

anuarin; el et par apan; el et ti ehka vai caua tahi nitai:

21 ja er ahlo *ilpu agelo* has idivaig ineig va nalaigaheni ache im natwakam.

22 ERIS wat amen Calili ara, is um ika ehele ra a Iesu, Uhpui ati Inhal o natimi irai ikma atimi:

23 erupu atgei yin ara, ja et wit ti pan itac nadiat inyi eseij etpu lep nusjai aien. Is ohocred alupas inliinmopura ara.

24 ERIS wat apan Kaperneum ara, eris apan ehele Pitrus a ilpu atimi asjapienaig mune, um ika, Et ahtai mune a natimi esege unyimia, ka o'o?

25 Is ika aien, Maiya. Is wat apan aien anliin neom, is upyi tas a Iesu, um ika, Nai ikha aiek, ak Saimona? era leucose mune ka akwanaham ehele di a ilpu atimarid an nobohtan? ehele ilpu dualep ura, ka ehele nup urai taka pece?

26 Is um ika ehelen a Pitrus, Ehele nup urai taka pece. Is ika ehelen a Iesu, Era eti ahtah a ilpu dualep ura:

27 jai vai tu jim auahas inliinmopura akaijau, apok aiek an jop, um atise incaueij, um leh numu ineig inyi upyi hup um apam; na wit asalgei nipjineucsen aiek, napu ece-tai aiek nuari-mune yi ethi: anum leh aiek, um alupai ra vai caijau.

NUARIN-TAS ALUPAS 18.

AN naopan iyehki eris apan ehele Iesu a ilpu atimi atahaijeg yin, um ika, Inyi esjilid a di an nelcau an nohatag?

2 Is ahlaig vai inhalav is ethi a Iesu, um ati yin an nuhup ura,

3 um ika, Et inivaijec ineig ek asaig ehelemia ainyak mika, El eka eti ahidai caua aijaua, um idivaig ilpu halav, aki ti apan aijaua an nelcau an nohatag:

4 aien et upoupo inliinmopon aien um idivaig inhalav ineigki, inyi esjilid aien an nelcau an nohatag:

5 aien et leh tah inhalav aien, et idivaig inhalav ineigki, va nidak, et leh nyak aien:

6 el et ago nedo oop vai ilpu halav iji eigki tah era asgeig irak ara, el et upene vai yin el er athai inbat irara flaur an nauinwan, um atise yin an namilvai ubou acen.

7 ¶ A'a, auwe va nobohtan ineigki va nedo oop iran! et ehka intivaig nedo oop atimi; ja a'a, auwe va natimi ineigki et ago nedo oop aien!

8 El et itai epiltai imi euc nikmam ka neduom, anum acaldei aiek, um ethaig: etpu upene vai euc napanvaig an nuarin umoh, um alkalka um ighin; jam has nethaig pan euc vaig an cop inyi tilep opos, el et eteuc ero nikmam im neduom.

9 El et itai epiltai imi euc nesganintam, anum atipagki aiek, um ethaig: etpu upene vai euc napanvaig an nuarin umoh, um ethi ache nesganintam; jam has nethaig pan euc vaig an cop an pece has, el et eteuc ero nesganintam.

10 Akumu jim amcel vaig tali natimi upoupo iji eigki aijaua; ek asaig ehelemia ainyak mika, Era almoi nesganintai Etmak an nohatag a ilpu agelo ura irai iji adiat an nohatag.

11 Is ham a Inhal o natimi mika yi imyiatamaig ra er auahas ra.

12 Eka ikha aijaua? el et eteuc siip et wun huntret o un tah, jam melga et ethi ira ra, et ude nainte im nain aien, um apan irai lola edo-on, um ahilek ineig et melga.

13 Et inivaijec ineig ek asaig ehelemia ainyak mika, El et ecetai aien, et esjilid nimityacitak o un va siip iyehki, ja et tup eklim upene inliinmopon aien va siip is nainte im nain eris eti melga.

14 Et idim ucco et eti merit a Etmamia an nohatag, mika uhpu auahas tah ira atimi upoupo iji eigki.

15 ¶ Im lep ineig, el et ago nedo has vai euc a etoam, apan aiek, um tas ehelen va nedo has o un echim aijaurau ache: el et atahaijeg intas unyum aien, na mun leh etoam aiek.

16 Ja el et eti atahaijeg *intas unyum* aien, namu leh natimi inyi ethi aiek ka inyi ero, eru ahced euc arau, mika yi ipjin intas asega an nuhup o atimi et ero ka et esei.

17 El et eti atahaijeg aien, anum asupteanaig ehele nakalasia aiek: el et imyipalea nakalasia aien, inyi idivaig natimi aupat vai euc aien, im natimi auatatimi.

18 Et inivaijec ineig ek asaig ehelemia ainyak *mika*, Nitai ineig akupu arore an nobohtan aijaua, uhpu lep arore an nohatag: nitai ineig akupu aihyi an nobohtan aijaua, uhpu lep aihyi an nohatag.

19 Im lep ineig, ek asaig ehelemia ainyak mika, El et tup ethi ache inliinmopoi natimi inyi ero iramia an nobohtan vaig tah nitai erupu ugni arau, etpu alupai rau a Etmak an nohatag.

20 El et asjapicnaig natimi et ero ka et esei an tah anuarin va nidak, ekpu idim amen ehele ehtaij ainyak.

21 ¶ Is apan ehelen a Pitrus, um ika, Ak Natimarid, inyi ago nedo has vai nyak a etoak um ehched, ja ekpu eti aru ainyak? inyi yetpan irai seven, ka o'o?

22 Is ika ehelen a Iesu, Ek eti ika ehelum ainyak, Inyi yetpan irai seven ache: ja, Inyi yetpan irai ehcesevante a seven.

23 ¶ Nelcau an nohatag et idivaig natimarid is ethi, is ika aien yi ahilek nedo o ilpu aheca o un.

24 Is wat atupun aien um ahilek nedo ura, eris imyiapan ehelen tah is ethi is eti aru tollar is ten milyun o un aien:

25 is ti tah nitai ineig o un yi aru iran, is tas a natimi alupas o un, um ika yi ahtai yin, im ehgan, im ilpu

hal o un, im niji itai asega o un, va uhpu leh neruvaig imi yin :

26 is atpuse a naheca iyehki um ugni yin, um ika, Ak natimi alupas, etmu eropse inliinmopom aiek vai nyak, ekpu aru ehni ainyak.

27 Is aiheuc vai naheca iyehki a natimi alupas o un, um atcejai yin, um eti aktaktai neruvaig imi yin.

28 Ja is apan a naheca iyehki um ecet etoan naheca is ethi, is eti aru tollar is fiftiin o un aien ; is arop iran aien um asjirai nauinwan, um ika, Namu aru neruvaig unyum imi nyak aiek.

29 Is atpuse u neduon a etoan naheca, um ugni yin, um ika, Etmu eropse inliinmopom aiek vai nyak, ekpu aru ehni ainyak.

30 Ja is ipjin aien : is apan aien um ati yin anliin neom ipjin, um uhun pan naopan iyehki inyi leh neruvaig aien.

31 Eris wat almoi nedo ineigki a ilpu etoan aheca, eris imyitaig yin ara, um apan, um asuptecnaig ehele natimi alupas ura nedo asega ineigki.

32 Is ahlaig vai yin a natimi alupas o un, um ika ehelen, Ak naheca auatatimi, kis eti aktaktai ainyak neruvaig imi nyak, vai intas ugni unyum :

33 na auri aiek par eti aiheuc vai etoan naheca um idivai nyak, ek mun aiheuc vai euc ainyak ?

34 Is edemda vai yin a natimi alupas o un, um ati yin ehele ilpu atimi aredei yin, um uhun pan naopan iyehki etpu aru ehni aien.

35 Etpu ucco nedo o Etnak an nohatag vai caua, el et eti eropse inliinmopomia aijaua va nedo has o ilpu etoamia vai caua.

algaunnyi nofowai Jortan um yetpan irai iji uari pece Jutaia ;

2 eris apitac yin natimi is alinag ; is ago cehcehe ra aien eahki.

3 ¶ Eris lep ahtag pan ehelen a ilpu Farisi, um oop yin, um ika ehelen, Et itaup vaig tah natimi nabrai ehgan vaig va nedo asega, ka o'o ?

4 Is tas aien, um ika ehele ra, Akis esvi aijaua, ka o'o, nikavaig, aien is upyi ago *natimi* aien, is ago rau aien natamaig im intakata,

5 um ika, "Etmu ude etman im risin natamaig, um amen aien im ehgan : etpu tup ethi ache nohurau arau" ?

6 Erau eti lep ero arau, ja et tup ethi ache nohurau arau. Et itaup inlep atiakoai vaig nitai ineigki is adgai iran a Atua.

7 Eris um ika ehelen ara, Is auri a Moses par tas alep um ika yi alupai *ehgan* nitasvitai a *natamnyu un* va nabrai yin, um abrai yin ?

8 Is um ika ehele ra aien, Is eti acaiji caua a Moses mika aki jim abrai ehgamia aijaua, va nipjin u inliinmopomia : ja eris eti upyi hup um ago nedo ineigki.

9 Ek asaig ehelemia ainyak mika, Aien et abrai ehgan aien el et eti ago ingaijid aien, um leh intaka takata, et ago ingaijid aien : aien et leh yin aien eris abrai yin, et ago ingaijid aien.

10 ¶ Eris um ika ehelen a ilpu atimi atahaijeg yin, El et ucco nedo va natamaig im ehgan, et eti upene natmehgan.

11 Ja is ika ehele ra aien, Et ehka va atini asega ninyiaijivaig intas ineigki, ara ache eh mun alupai ra :

12 eris eteuc a ilpu yunuka eris apos ra is ucce : era lep eteuc a ilpu yunuka era ilpu yunuka ara va nedo o atimi ira ra : era lep eteuc a ilpu yunuka eris ika eri ilpu yunuka ara va nelcau an nohatag. Aien et emda aien par imyiaiji *intas ineigki*, etmu imyiaiji aien.

NUARIN-TAS ALUPAS 19.

IS tas ehni irai tas iji eigki a Iesu, ja par ahes Calili um atga o un, um

13 ERIS imyiapan ehelen ilpu halav, mika yi atijai nikman aien ira ra, um alaigaheni: eris acaiji ra a ilpu atimi atahaijeg yin.

14 Is um ika a Iesu, Ude ilpu halav aijaua, eri apam ehelek ara, um jim acaiji ra; era idivai ra ara era amen an nelcau an nohatag ara.

15 Is atijai nikman aien ira ra, ja par ahes eahki um atga o un.

16 IS apan ehelen natimi is ethi, um ika, Ak Natimi esege upene, inki ago nev edo upene ainyak, va ekpu leh nitai umoh iran ineig inyi ti lep ti?

17 Is ika ehelen aien, Na auri aiek par aniv upene nyak? et eti upene tah, Atua ache: ja el et merit aiek napanvaig an nuarin umumoh iran, um imyiaiji niji tas alep o Atua.

18 Is ika ehelen aien, Neveh *tas alep*? Is ika a Iesu, Jim atgei natmas, Jim ago ingaijid, Jim ehneg itai, Jim asan tas ahcil,

19 Namu eccen vai etmam im risum aiek: um, Aiyu inliinmopom aiek va natimi eblaammem unyum, et idivaig *naiyu o inliinmopom* vai euc.

20 Is ika ehelen a intakuras iyehki, Kis imyiaiji nitai iji eigki asega ainyak an halav unyak um uhup pam naopan ineig: ek eti ago nev-itai ainyak?

21 Is ika ehelen a Iesu, El et merit aiek nesjilidvaig an nedo upene, apan aiek um ahtai niji itai unyum, um alupai ilpu ihki atimi; napu idim leh niji itai upene an nohatag aiek: um apam um apitac nyak.

22 Is wat atahaijeg intas ineigki a intakuras iyehki, is taigtaig aien um atga o un: is ahinag inpadiaig o un aien.

23 Is um ika ehele ilpu atimi atahaijeg yin a Iesu, Et inivaijeg ineig ek asaig ehelemia ainyak mika, Et ehka vai natimi ikni itai napanvaig an nelcau an nohatag.

24 Ek lep asaig ehelemia ainyak

mika, Et tup upene vai kamela namilikvaig an hed an nitel, jam ehka vai natimi ikni itai napanvaig an nelcau o Atua.

25 Eris wat atahaijeg a ilpu atimi atahaijeg yin, eris um imyiali alupas ara, um ika, Uhpu imyiatamaig di?

26 Is alum ra a Iesu, um ika ehele ra, Et ehka nitai ineigki va atimi; ja et tup upene niji itai asega vai Atua.

27 ¶ Is tas a Pitrus, um ika ehelen, Ecris idim ude niji itai asega *unyima* aijama, um ahced euc; ecrupu leh inhe aijama?

28 Is um ika ehele ra a Iesu, Et inivaijeg ineig ek asaig ehelemia ainyak mika, An naopan iyehki uhu wit lep ehteduo niji itai asega, et wit ateuc a Inhal o natimi a dorona esjilid o un, akupu lep ateuc aijaua akis ahced nyak irai dorona inyi twelv, um asuptecnaig nintan imi ilpu mapoi ilpu hal o Isreel et twelv:

29 ara asega eris ude eom *ura*, im ilpu etoara, im ilpu atahaig ira ra, im etmara, im risira, im ehgara, im ilpu hal *ura*, im umara, vai nyak, erupu leh neruvaig ara inyi wun huntret, im lep nitai umoh iran inyi ti lep ti:

30 erupu esjilid natimi inyi ahinag, era apitac ara; ja erupu apitac natimi inyi ahinag, era uhup ara.

NUARIN-TAS ALUPAS, 20.

1 Nelcau an nohatag et idivaig natimi alupas is ethi, is alau ijo aien an nuhuhiale, um ahilek atimi mika eri auritai ara anliin nekarovaine o un:

2 is ika aien yi alupai ilpu atimi auritai nuari-mune yi ethi an nadiat inyi ethi, ja par abrai ra mika eri apan ara anliin nekarovaine o un.

3 Is lep alau ijo aien an nadiat metto, um alum tak atimi eris tup aiji an tiptag ara;

4 is um ika ehele ra aien, Akumu apan aijaua anliin nekarovaine

unyak, ekpu alupai caua nintan upene ainyak. Eris apan ara.

5 Is lep alau ijo aien an nadiat adiat, im lep an jupki, um lep ago nedo ineigki.

6 Is lep alau ijo aien an jupura, um alum hal eris tup aiji ara, um ika ehele ra, Eka auri aijaua pah tup amen um yetpan an jupura?

7 Eris ika ehelen ara, Et mun eti asuptecnaig nauritai imi cama tah. Is ika ehele ra aien, Akumu apan aijaua anliin nekaro vaine *unyak*; akupu leh nintan upene *imi caua* aijaua.

8 Is wat jupura, is ika a natimi ohuun nekaro vaine ehele naheca o un, Ahlaig vai ilpu atimi auritai aiek, um alupai ra nintan, um atupun ira atimi apitac um yetpan ira atimi uhup.

9 Ja eris wat han ara sji ehki eris *atupun nauritai* an jupura, eris leucose nuari-mune is athi ira ra ara asega.

10 Eris wat han a ilpu atimi uhup, eris ika ara inyi esjilid nintan imi ra; ja eris leucose nuari-mune is athi ira ra ara asega.

11 Eris wat leucose ara, eris tas upoupo ara vai natimi alupas,

12 um ika, Era ago nauritai an aur et ethi ache ara sji eigki era apitac, ja et tup apapa nintan imi ra im lep imi cama, ecra mun ohocred aijama va nauritai im nihlup an nadiat.

13 Is tas ehelen is ethi ira ra aien, um ika, Ak etoak, ek eti ago nedo has vai euc ainyak: ek mun ika ehelum ainyak yi alupai euc nuari-mune yi ethi:

14 leh nintan imi euc aiek, um atga unyum: ekpu alupai atimi apitac ineigki ainyak, et idivaig unyum:

15 tup ainyak marom vai niji itai unyak: na auri aiek par auatitai, va nedo upene unyak?

16 Et idim ucco, erupu uhup a ilpu atimi apitac, jam apitac ilpu atimi uhup: er ahlaig va atimi et ahinag, jam eltai atimi et eti elpat.

17 IS apan a Iesu alaig Jerusalem; is echim imyiapan ilpu atimi atahaijeg yin is twelv aien an taka uarin, um ika ehele ra,

18 Intu wit apan Jerusalem akaija; uhpu atcejai Inhal o natimi ehele ilpu atimi ahlap esjilid, im ilpu atimi esege, erupu tas alep vai yin ara mika eri atgei yin,

19 erupu ati yin ara ehele nup urai taka pece, mika eri imyiafak-ahcil yin ara, um aredei yin, um atgei yin an nauincal atgeig: ja et wit ti pan itac nadiat inyi esej etpu lep nusjai aien.

20 IS apan ehelen a risi ohwat hal o Sebetaius, im ohwat halav atamaig o un, um atpuse an nuhup o un, um ugni nitai is ethi ehelen.

21 Is ika ehelen aien, Nai merit vanhe aiek? Is ika ehelen aien, Namu ika aiek eru ateuc ahwat hal unyak, yi ethi an matam, im lep yi ethi an moum, an nelcau unyum.

22 Is tas a Iesu, um ika, Erau eti ato aijaurau nitai ineig erau ugni *nyak* vaig aijaurau: aru emda aijaurau par umwig an nipjinitai ineig ekpu umwig iran ainyak, um leh nabaptiso iranirau yi idivaig nabaptiso ineig ekpu leh irak ainyak, ka o'o? Erus ika ehelen arau, Ecru emda aijumrau.

23 Is um ika ehele rau aien, Arupu idim umwig an nipjinitai unyak aijaurau, um leh nabaptiso iranirau yi idivaig nabaptiso ineig ekpu leh irak ainyak: ja et ehka vai nyak nikavaig ehelen tah yi ateuc an matak, im lep an mouk, ja ehele ra ache is ati imi ra a Etnak.

24 Eris wat atahaijeg natimi is ten, eris edemda ara vai inraimu erahki.

25 Ja is asjapicnai ra ehelen a Iesu, um ika, Eka ato aijaua, nikavaig, era esjilid irai pece ura a ilpu atimarid irai iji pece, era lep esjilid irai uari pece ura a ilpu atimi alupas:

26 jam jim ago nedo ineigki ai-

jaua : aien et merit aien mika yi esjilid irania, etmu upoupo irania aien :

27 aien et merit aien mika yi atimi alupas irania, etmu aheca unyimia aien :

28 et idivaig Inhal o natimi ; is eti ham aien mika eri aheca o un natimi, ja par aheca *ura* aien, um ahtai nitai umoh iran o un nimtan va atimi et ahinag.

29 ERIS ahes Jeriko ara um atga ura, eris ahced yin natimi is ahinag.

30 Erus ateucse an nahaijin nefalaig natimi is ero is aupat nesganimtarau, erus wat ato arau, nika-vaig, is apam a Iesu an nefalaig, erus ahlaig ijinies arau, um ika, Aiheuc vai cumrau, ak Natimarid, Mapoi Tevit.

31 Eris acaiji rau natimi is ahinag mika eru jim tas arau : ja is esjilid nahlaig urau, um ika, Aiheuc vai cumrau, ak Natimarid, Mapoi Tevit.

32 Is aiji a Iesu, um ahlaig vai rau, um ika, Erau merit aijaurau vanhe, mika ki ago vai caurau ainyak ?

33 Erus ika ehelen arau, Ak Natimarid, *ecrau merit aijumrau* mika yi lah nesganimtarau.

34 Is aiheuc *vai rau* a Iesu, um atcei pan nesganimtarau : erus auroauro arau, um aiji lahlah, um ahced yin.

NUARIN-TAS ALUPAS 21.

ERIS wat ubutpotet pan Jerusalem ara an *nuarin-pece* Bedfeje, u nedoon Olivet, is abrai ohwat atimi atahaijeg yin is ero a Iesu,

2 um ika ehele rau, Apan aijaurau an nuarin-pece an nuhup unyimirau, arupu idim ecetai nifo aijaurau er athai, im lep inhal o un : aihiyi aijaurau, um imyiapam ehelak :

3 el et tas ehelemirau tah natimi,

arumu ika aijaurau, Et merit vaig a Natimarid ; etpu auroauro aien um atceijag.

4 Eris ago nitai iji eigki asega mika eri ehneijid intas ineig is upyi asaig a naprofeta, um ika,

5 “Akumu ika aijaua ehele inhal-av atahaig o Saion, Et apan ehelum a Natimarid unyum, et erop nedo o un, et ateuc an nifo aien, im lep inhakli nifo inhal o un.”

6 Erus apan ahwat atimi atahaijeg yin erahki, um ago is idivaig is asaig ehele rau a Iesu,

7 um imyiapan *ehelen* nifo im inhal o un, um atijai napelumai urau ira rau, um atijai *yin* iran.

8 Eris ahled apelumai ura an nefalaig natimi is ahinag ; eris lep esvi tiklai cai nahaiji ra, um esjaig an nefalaig :

9 ara eris uhup ara, im lep ra eris apitac ara, eris ahlaig ara, um ika, Hosana vai Mapoi Tevit : Naurineig vai yin et ham aien an nidai Natimarid ; Hosana an *nohatag* ijinies acen.

10 Is wat apan Jerusalem aien, is ehioehio inliinmopoi nup an nuarin-pece iyehki asega, um ika, Di neigki ?

11 Eris um ika natimi is ahinag, Iesu neigki, naprofeta an Nasared an *pece* Calili.

12 Is apan a Iesu anliin neom ahlap o Atua, um ahlo pok ijo ra asega, eris ahtai itai ara um aaurimtai itai an neom ahlap, um ahidaig afata o ilpu atimi ahtai mune, im lep itai ateuc o ilpu atimi ahtai alaupa,

13 um ika ehele ra, Eris aged, *mika*, “Uhpu anvi nidan neom unyak par ika neom alaigaheni ;” ja akis ika aijaua yi “uarin imi ilpu atimi ehneg itai” *neom unyak*.

14 Eris apan ehelen anliin neom ahlap a ilpu atimi aupat nesganimtarau, im ilpu atimi asvahteuc neduora ; is ago celcehe ra aien.

15 Eris wat almoi a ilpu atimi

ahlap esjilid im ilpu atimi esege, niji itai imyiali is ago aien, im ilpu halav eris ahlaig anliin neom ahlap ara, um ika, Hosana vai Mapoi Tevit; eris edemda ara,

16 um ika ehelen, Na atahaijeg aiek intas era asaig ara sji eigki, ka o'o? Is um ika ehele ra a Iesu, Maiya; akis idim esvi *intas ineig* aijaua, ka o'o, *eris ika*, "As ati nimyahpas aiek an nijjineucse ilpu halav im ilpu hadi?"

17 Is ude ra aien, um ahes an nuarin-pece *itau*p um apan Bedane; un anen eahki.

18 Is wat lahlah an nuhialeg is lep adumoj pan aien an nuarin-pece *itau*p, is um ehele yin.

19 Is ecetai nateg is ethi an nefalaig aien, um apan o un, um eti ecetai tahi nohoan, nerin ache; is um ika aien, Etnu jim lep eteuc nohoam um yetpan irai iji adiat. Is um auroauro um mese nateg.

20 Eris wat ecetai a ilpu atimi atahaijeg yin, eris imyiali ara, um ika, *Ecetai* nateg ineigki, et auroauro um mese!

21 Is tas a Iesu, um ika ehele ra, Et inivaijeg ineig ek asaig ehelemia ainyak *mika*, El eka imyiisjis ninivaijeg aijaua, um eti imyiisjis nahcil, akupu ago nedo ineig aijaua *ek mun ago ainyak* an nateg ineigki; akupu lep ika aijaua va nedoon ineig yi apan an taka uarin, va uhpu ethaigse an jop; etpu ucco.

22 El eka imyiisjis ninivaijeg aijaua, akupu leh niji itai asega aijaua, eka ugni aijaua an nalaigaheni unyiminia.

23 ¶ Is apan aien anliin neom ahlap, um esege; eris asjapicnaig pan ehelen a ilpu atimi ahlap esjilid, im ilpu atimi tas alep an pece, um ika, Na ago nitai iji eigki aiek va intas alep u di? is alupai euc nemda ineigki a di?

24 Is tas a Iesu, um ika ehele ra, Ekpu lep ahodai caua ainyak va nitai inyi ethi ache; el eka asup-

tecnaig chelek aijaua, ekpu lep asuptecnaig ehelemia ainyak nemda unyak par ago nitai iji eigki:

25 is ahes nabaptiso o Joanes eda? an nohatag, ka ehele atimi? Eris tas jipe ehele ra ara, um ika, El ta ika akaija, Is ahes an nohatag; etpu ika eheleija aien, Akis auri aijaua par eti imyiaiji intas o un?

26 Ja el ta ika akaija, Is ahes ehele atimi; inta imtita atimi akaija; era ika atimi asega is idim aprofeta a Joanes.

27 Eris tas ara, um ika ehele Iesu, Ecra eti ato aijama. Is um ika ehele ra aien, Inki ti asuptecnaig ehelemia ainyak nohu nemda ineig ek ago nitai iji eigki vaig ainyak.

28 ¶ Eka ikha aijaua?

Natimi is ethi, is ero inhalav atamaig o un; is apan aien ehele inmetto, um ika, Ak inhal *unyak*, apan aiek, um auritai inpeig anliin nekaro vaine unyak.

29 Is tas aien, um ika, Ek esjum ainyak; ja is lep aktaktai aien, um apan.

30 Is apan aien ehele inhare, um asaig intas iyehki. Is tas aien, um ika, Ekpu *apan* ainyak, ak etmak; ja is eti apan aien.

31 Is imyiaiji intas o etman a di ira rau? Eris ika ehelen ara, Inmetto. Is ika ehele ra a Iesu, Et inivaijeg ineig ek asaig ehelemia ainyak *mika*, Era uhup a ilpu atimi akwanaham im ilpu takata ago ingaijid: akis almoi *nedo ura* aijaua, jam eti aktaktai, um imyiaiji intas o un.

32 Is apan ehelemia a Joanes par esege *imi caua* nedo atoh, ja akis eti imyiaiji intas o un aijaua; ja eris imyiaiji intas o un a ilpu atimi akwanaham im ilpu takata ago ingaijid: akis almoi *nedo ura* aijaua, jam eti aktaktai, um imyiaiji intas o un.

33 ¶ Akumu atahaijeg intas ecsi-pece et ehele aijaua:

Natimi alupas is ethi, is ahoag vaine anliin nekaro o un aien, um ago nirahed o un, um ucji *nehpan-*

itai par ahtaijiraig nohoai vaine iran, um acta neom par asjeucjinaig, is um atceijaig aien ini ilpu atimi ahapol, um atga o un, um apan an pece itac acen :

34 is wat metto nohoan, is abrai ilpu aheca o un aien mika eri apan ehele ilpu atimi ahapol ara, um leucose nohoai vaine iran.

35 Eris arop irai ilpu aheca o un a ilpu atimi ahapol, um aredei is ethi, um atgei is ethi, um asji is ethi irai hat.

36 Is lep abraig pan *ehele* ra aien ilpu aheca is eche, is ahinag iran ji ehki : eris lep ago nedo iyehki ira ra ara.

37 Is epitpitac aien irai inhalav atamaig o un, um abraig pan yin ehele ra, um ika, Erupu ago nedo eccen ara vai inhal unyak.

38 Eris wat ecet inhal *o un* a ilpu atimi ahapol, eris tas jipe ehele ra ara, um ika, Natimi ineigki etpu isjipigmoig etman aien ; ti atgei yin akaija, um atorialiak uman.

39 Eris arop iran ara an nekaru, um ethaig pan itac *yin*, um atgei *yin*.

40 Et wit ham a natimi alupas ohuun nekaru vaine, etpu ago inhe aien irai ilpu atimi ahapol ?

41 Eris um ika ehelen ara, Etpu idim auahas ilpu atimi auatatimi iji ehki aien, um atceijaig nekaru vaine o un imi ilpu atimi ahapol inyi ahei, va erupu alupai yin nohoai itai an naopan noho o un ara.

42 Is um ika ehele ra a Iesu, Akis esvi intas ineigki aijaua an nitasvitai, ka o'o, nikavaig, "Inhat ineig eris esjum vaig a ilpu atimi acta neom, et hat esjilid ineigki an nesvi va neom : is ago nitai ineigki a Ihova, et itai imyiali ineig an nuhup-*uja*?"

43 Va nedo ineigki ek asaig ehelemia ainyak mika, Uhpua atipagki nelcau o Atua ehelemia, um alupai nup urai taka pece ineig erupu ohuai itai iran ara.

44 Aien inyi eropjai an hat iyehki aien, etpu auhoig yi oplecoplec yin aien : aien inyi etjojai *inhat ineigki* iran, etpu ehtoplecoplec yin *inhat*.

45 Eris wat atahaijeg intas ecsi-pece iji eigki o un a ilpu atimi ahlap esjilid im ilpu Farisi, eris ato ara mika is tas vai ra aien.

46 Eris merit ara narop iran vaig, jam imtita atimi is ahinag, eris ika ara, Et aprofeta aien.

NUARIN-TAS ALUPAS 22.

1 IS lep tas ecsipece ehele ra a Iesu, um ika,

2 Nelcau an nohatag et idivaig natimarid is ethi, is auanetha alupas aien an natmehgan o inhalav atamaig o un,

3 um abrai ilpu aheca o un mika eri ahlaig ara vai ra eris imyiacaij ra, mika eri apan u inhag an natmehgan ara : ja eris esjum ara napanvaig.

4 Is lep abrai ilpu aheca *o un* is ahei aien, um ika, Asaig ehele ra aijaua eris imyiacaij ra mika, Ek mun ago ehni nitai caig unyak ainyak : eh mun atgei kurimatau im *siip* upene, um lep imyiecrei ehni niji itai asega : akumu apam aijaua u inhag an natmehgan.

5 Ja eris esjum ara, um atga ura, is apan is ethi uman, im lep is ethi par ahtai itai :

6 eris arop irai ilpu aheca o un nahaiji ra, um abli *ra*, um atgei *ra*.

7 Is wat ato a natimarid, is atavaitap aien : um abrai ilpu eucsupo o un, mika eri apan ara um auahas ilpu atimi atgei atnas, um atnamud nuarin-pece ura.

8 Is ika ehele ilpu aheca o un aien, Ek mun ago ehni nitai caig *unyak* ainyak, ja et has nedo ura eris imyiacaij ra :

9 akumu apan aijaua irai efalaig, um imyiacaij ra asega aki alum ra

aijaua, mika eri apam ara u inhag an natmehgan.

10 Eris apan a ilpu aheca iji ehki irai efalaig, um asjapicnaig atimi asega eris alun ra ara, ilpu atimi auatatimi im ilpu atimi upene: eris asjapicnaig u inhag an natmehgan ilpu alaig o un is ahinag.

11 ¶ Is wat apan a natimarid anliin neom par alun ilpu alaig o un, is ecet natimi is ethi aien is ti napelumai uri natmehgan iran aien:

12 is um ika ehelen aien, Ak nat eigki, na auri aiek par apam igcaki, et ti napelumai uri natmehgan iram aiek? Ja is eti tas aien.

13 Is um ika a natimarid ehele ilpu aheca o un, Arore neduon im nikman aijaua, um atipagki yin, um ethaig yin an naupat itac; erupu aunyauwaig ara eahki, um ataktit ejjera.

14 Er ahlaig va atimi et ahinag, ja er ehtai atimi et eti elpat.

15 ERIS apan a ilpu Farisi, um tas jipe, mika eri tasehlele tas o un ara.

16 Eris abraig pan ehelen ilpu atimi atahaijeg ra ara im ilpu atimi leh imi Herot. Eris ika *ehelen* ara, Ak natimi esege, ecra ato aijama mika, na inivaijec aiek, na esege inivaijec nedo o Atua aiek, um eti imtita *atimi*, um eti aktaktai natimi alupas o un tahi:

17 asuptecnaig aiek ehelema, Nai ikha aiek? et itaup nahtaivaig mune imi Sisar, ka o'o?

18 Ja is ato nauatatimi ura a Iesu, um ika, Eka auri aijaua, ak ilpu atimi efafifa, par oop nyak?

19 leh pam aijaua ehelele mune er ahtai, ki almoi ainyak. Eris leh pan ehelen nuari-mune is ethi ara.

20 Is ika ehele ra aien, Nalmui di ineigki, im nidai di eris aged?

21 Eris um ika ehelen ara, Sisar. Is um ika ehele ra aien, Alupai Sisar niji itai o Sisar; jam *ahtai imi* Atua niji itai o Atua.

22 Eris wat atahaijeg *intas o un* ara, eris inyiali ara, um ude yin, un atga ura.

23 ¶ An nadiat iyehki eris apan ehelen a ilpu Satusi, atimi iji eigki era ika ara eri eti lep anusjai atimi ememas, eris ahodai yin ara,

24 um ika, Ak Natimi esege, is ika a Moses, El et mas tah natimi eti asvalav, etpu leh ehgan a etoan, um asvalav vai etoan.

25 Eris amen ehelema ilpu raimu is seven: is leh ehgan a inmetto, um mas, is eti eteuc inhal urau, is ude ehgan aien mika yi *ehgai* etoan:

26 is lep *leh yin* a etoan is ethi, im lep is ethi, um yetpan irai seven:

27 is par apitac intakata, um mas:

28 inyi ehgan tah ra sji eigki a di aien is seven an nadiat anusjai? eris leh yin ara asega.

29 Ja is tas a Iesu, um ika ehele ra, Eka ahnag aijaua, um eti ato intas eris aged, im nemda o Atua.

30 Eru wit anusjai atimi eri eti lep atmehgan ara, um eti asanlai, ja era idivaig ilpu agelo o Atua an nohatag ara.

31 Akis esvi aijaua intas o Atua ehelema va nanusjai o atimi ememas, ka o'o, is ika aien,

32 "Ek Atua o Ebrahim ainyak, um lep Atua o Aisak, um lep Atua o Jakob"? Et eti Atua o ilpu atimi ememas a Atua, ja *et Atua* o ilpu atimi umumoh ache aien.

33 Eris wat atahaijeg *intas ineigki* natimi is ahinag, eris um inyiali nesege o un ara.

34 ¶ Eris wat atahaijeg a ilpu Farisi, nikavaig, is auud yi aijiraig intas o ilpu Satusi a Iesu, eris asjapicnaig ara.

35 Is oop yin natimi asuptecnaig intas is ethi ira ra, um ahodai yin, um ika,

36 Ak Natimi esege, et esjilid nev-eh tas alep?

37 Is um ika ehelen a Iesu, "Etmu

aiyu inliinmopom aiek vai Ihova Atua unyum anliinmopom asega, im lep an nesgam asega, im lep an naktaktai asega unyum.”

38 Intas alep uhup ineig um esjilid.

39 Im lep napahvaig ineig et ethi, nikavaig, “Etnu aiyu inliinmopom aiek va atimi eblaammem unyum, et idivaig *naiyu u inliinmopom* vai euc.”

40 Nohuun tas alep asega im *intas* o ilpu profeta intas alep eraigki.

41 ¶ Eris wat asjapicnaig a ilpu Farisi, is ahodai ra a Iesu,

42 um ika, Eka ikha aijaua vai Kristo? et mapoi di aien? Eris um ika ehelen ara, *Et mapoi* Tevit aien.

43 Is ika ehele ra aien, Is auri a Tevit par anvi nidan irai Nesgan *Upene* par ika Natimarid, um ika,

44 “Is ika a Ihova ehele Natimarid unyak, Namu ateuc aiek an matak, um uhun pan naopan iyehki ekpu ikni ilpu atimi tak atimi iram ai-nyak mika eri itai atijai neduom iran?”

45 Va nitai ineigki el et anvi nidan a Tevit par ika Natimarid, et echam-echa et pah mapon aien?

46 Is ehka vaig tah intasvaig ehelen, eris imtitaig natimi inlep ahodai yin vaig.

NUARIN-TAS ALUPAS 23.

IS tas ehele atimi is ahinag a Iesu, im lep ehele ilpu atimi atahajeg yin,

2 um ika, Era ateuc an nitai ateuc o Moses a ilpu atimi esege im ilpu Farisi:

3 akumu imyiaiji niji itai asega aijaua era asaig ehelemia ara, um ago; jam jim ago nedo ura: era tas ara, jam eti ago.

4 Era ahpoi nitai ahelwei opouc ara, um ikni irai uhli atimi, et ehka

naposvaig; jam esjum ara nublivaig irai upsikmara.

5 Era ago nedo asega ura ara mika eri alum ra natimi: era ago lecan nuari apelumai ura ara eris aged alaigaheni iran, um lep alupas intid irai apelumai ura;

6 era merit ara vai uarin esjilid u inhag o atimi, im lep itai ateuc esjilid irai eom alaigaheni,

7 im lep naiheuc vai ra vaig atimi irai tiptag, im lep narohoai ra vaig par ika, Ak Rabai, ak Rabai.

8 Uhmum jim anvi nidamia par ika Rabai [natimi esege]: et ethi ache Natimi esege unyimia, et Kristo aien; eka ilpu raimu aijaua asega.

9 Jim anvi nidan tah aijaua par ika et etnamia an nobohtan aien: et Etnamia ache aien et amen an nohatag aien.

10 Uhmum jim anvi nidamia par ika ilpu atimi alupas: et ethi ache Natimi alupas unyimia, et Kristo aien.

11 Aien et esjilid iramia aien, etmu aheca unyimia aien.

12 Aien et ago nedo ijinies aien, etpu upoupo aien; aien et ago nedo upoupo aien, etpu esjilid aien.

13 ¶ Ja a’a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka atapanes nelcau an nohatag va atimi aijaua: eka eti apan iran aijaua, eka lep acaiji ra aijaua era apan iran ara.

14 A’a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka atoraliak inpadiaig o ilpu takata eris ememas ilpu atamnyura aijaua, um alaigaheni opara par adahpoi nedo unyimia: va nedo ineigki etpu idim esjilid nohocred unyimia.

15 A’a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka ehced jop aijaua um ahilek pece, mika aki leh tah yi ethi yi alaigaheni unyimia; ja aku wit leh yin aijaua, eka ago yin aijaua mika yi halav an pece has, um esjilid iramia.

16 A'a, auwe vai caua, ak ilpu atimi atau ira atimi jam aupat inliinmopomia, eka ika aijaua, Aien et asig yi aktit intas aien va neom ahlap, et takitai *intas o un*; ja aien et asig yi aktit intas aien vai colt anliin neom ahlap, inyi ipjin intas o un:

17 eka ahnag aijaua, um aupat inliinmopomia: et eti esjilid colt irai neom ahlap; et imyiitaup colt *neom ahlap*:

18 im lep ineig, Aien et asig yi aktit intas aien va nefata, et takitai *intas o un*; ja aien et asig yi aktit intas aien va nitai ahlap iran, inyi ipjin *intas o un*:

19 eka alnag aijaua, um aupat inliinmopomia: et eti esjilid nitai ahlap irai nefata; et imyiitaup nitai ahlap *nefata*:

20 va nitai ineig aien et asig yi aktit intas aien va nefata, et asig yi aktit intas aien va *nefata*, im lep va niji itai asega iran:

21 aien et asig yi aktit intas aien va neom ahlap, et asig yi aktit intas aien va *neom ahlap*, im lep yin et amen iran aien:

22 aien et asig yi aktit intas aien va nohatag, et asig yi aktit intas aien vai dorona o Atua, im lep yin et ateuc iran aien.

23 A'a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka ahtai nefelegecai auanipin upene aijaua im nefelegecai acas, jam ude niji itai esjilid an tas alep, nedo atoh, im naiheuc *va atimi*, im nedo inivaijec: et upene vai caua nagovaig nitai iji eigki, jam eti ude nedo iyehki.

24 Ak ilpu atimi atau ira atimi jam aupat inliinmopomia, eka elcei nilupau aijaua, jam atleg kamela.

25 A'a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka ago adicinadin inyipin nipjinitai itac aijaua, im lep naplet, ja et amen anliin *nipjinitai* niji itai eris atoraliak im niji itai has, um ohua.

26 Ak Farisi, et aupat inliinmopom aiek, nanu uhup aiek um ago adicinadin inliin nipjinitai im naplet, va etpu lep adicinadin itac.

27 A'a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka idivaig nehpa itai atelmoi atimi emesmas iran aijaua, et abi ijinies um eklim upene; ja et ohua eduei atimi emesmas iran im niji itai has asega.

28 Et idim ucco et upene nedo unyimia aijaua an nuhup o atimi; ja et ohua nefaifa im niji itai has anliinmopomia aijaua.

29 A'a, auwe vai caua, ak ilpu atimi esege im ilpu Farisi, eka ilpu atimi efaifa aijaua! eka elteduo hat irai ehpa itai o ilpu profeta aijaua, um ago upene ehpa itai o ilpu atimi upene,

30 um ika, El ecris amen aijama an naopan unumoh o ilpu retpoma, el ecris eti ago nedo ura aijama, um atgei ilpu profeta.

31 Va nedo ineigki eka asuptecnaig vai caua aijaua, nikavaig, eka ilpu mopura aijaua eris atgei ilpu profeta ara.

32 Akumu ago ehni nedo o ilpu retpomia aijaua.

33 Ak ilpu imyiv, im ilpu vaiper, et ehka vai caua nahavaig va nohocred an pece has.

34 ¶ Ek abraig pan ilpu profeta ehelemia ainyak, im ilpu atimi arapakau, im ilpu atimi esege; ja akupu atgei nahaiji ra aijaua an nauicai atgeig, um aredei nahaiji ra irai eom alaigaheni unyimia, um atinas *rai ra* irai iji uari-pece;

35 etpu idim yetpan iramiainja irai ilpu atimi upene asega eris atgei ra an nobohtan, alies an ja irai Ebel, natimi upene, um yetpan an ja irai Sakaraia inhal o Barakaia, akis atgei yin aijaua juju an niblan neom ahlap im nefata.

36 Et inivaijec ineig ek asaig ehelemia ainyak *mika*, Etpu yetpam nitai iji eigki asega ira atimi an naopan ineig.

37 Ak Jerusalem, ak Jerusalem, na atgei ilpu profeta aiek, um asji ra irai hat eris abraig pan ra ehelum, kis ehcahinag merit ainyak mika ki asjapicnaig ilpu hal unyum et idivaig injaa et aibuthan hal o un aien, ja akis esjum aijaua.

38 Et idim eteuc neom unyimia aijaua, ja et ahyuahyu.

39 Ek asaig ehelemia ainyak *mika*. Akupu eti ecet nyak aijaua um uhum pan naopan iyehki, akupu ika aijaua, Et mun ahesmoij aien et ham aien an nidai Natimarid.

NUARIN-TAS ALUPAS 24.

IS ahes anliin neom ahlap a Iesu um alau ijo: eris apan ehelen a ilpu atimi atahaijeg yin, um ika ehelen yi adpau aien irai uari-eom an neom ahlap.

2 Is um ika ehele ra a Iesu, Eka almoi nitai iji eigki asega aijaua; et inivaijeg ineig ek asaig ehelemia ainyak mika, Inyi ti amen inhat inyi ethi irai taka hat, ja uhpu alcapidicraig asega.

3 ¶ Is wat ateuc aien an nedoon Olivet, eris asjapicnaig pan ehelen a ilpu atimi atahaijeg yin, um echim ahodai *yin*, um ika, Asuptecnaig ehelema aiek, etpu yetpam nitai iji eigki an nahopan? um asjaaicnaig an napam unyum nevitai, im nehni u nitai iji eigki?

4 Is tas a Iesu, um ika ehele ra, Akumu aminjinai caua aijaua va yi jim imyiahnag caua tah natimi.

5 Erupu ham natimi inyi ahinag an nidak, um ika, Ek Kristo ainyak; erupu imyiahnag atimi inyi ahinag ara.

6 Akupu atahaijeg edoa aijaua im lep intas vai edoa: jam jim imtitaig: etpu idim yetpam nitai iji eigki asega, ja inyi ti fi auroauro um ahni itai.

7 Erupu ati nedoa nup uran pece inyi ethi vai nup uran taka pece, im lep nup uran nelcau inyi ethi

vai nup uran tak elcau: etpu lep eteuc numlaig has, im innas, im nomoi irai iji pece inyi ahinag.

8 Et idim ahka um eris nitai iji eigki asega.

9 Erupu alwei caua ara mika eri abli caua, um atgei caua: erupu lep amcel vai caua a nup urai iji pece asega va nidak.

10 Erupu adumoij natimi inyi ahinag an naopan iyehki, erupu efaifa jipe vai ra ara, um amcel jipe vai ra.

11 Erupu atidai a ilpu profeta efaifa inyi ahinag, um imyiahnag atimi inyi ahinag.

12 Etpu auatialidi inliinmopoi atimi inyi ahinag va nedo has esjilid.

13 Aien inyi ti adumoij aien, uhpu imyiatamaig yin.

14 Eri upyi hup um asuptecnaig intas-upene ineigki va nelcau o *Atua* an noboltan asega, nitai asuptecnaig imi nup urai iji pece asega; ja etpu yetpam nehni o itai.

15 Aku wit ecetai “nitai has esjilid ineig” aijaua, “et auahas itai,” is tas vaig a Tanyel naprofeta, naiji-vaig an nuarin itaup, (etmu aktaktai aien, et esvi itai aien,)

16 ara eri amen Jutaa ara an naopan iyehki, erumu aha pan irai lola edoon ara:

17 aien inyi amen aien ijinies an neom o un, etmu jim asuol aien um han leucose itai anliin neom:

18 aien inyi amen aien uman, etmu jim adumoij pan aien mika yi leucose apelumai o un.

19 Kaiheuc vai ra eri opouc ara, im lep ra eri alidai ilpu hal ura ara, ira adiat iji ehki!

20 Akumu ugni *Atua* aijaua mika aki jim aha aijaua an mesese, im lep an nadiat atumop:

21 inyi eteuc nohocred esjilid an naopan iyehki, is eti eteuc nohocred et idivaig itu acen um imyihum pam naopan ineig, inyi ti lep eteuc nohocred inyi idivaig iyehki an tak aopan.

22 El et ahinag nadiat iji ehki, el et par emesmas natimi asega: ja inyi ti elpat nadiat iji ehki vai ilpu atimi eris ehtai ra.

23 El et ika ehelemia tali natimi, Almoi, Iesu mun eigki, ka, Iesu mun naico; jim imyiaiji *intas o un*.

24 Erupu ehcolhos pam a ilpu Kristo efaifa im ilpu profeta efaifa, erupu ehvaig niji itai ehka ara, im niji itai imyiali; erupu ika ara eri imyialnag ilpu atimi ehtai ra; ja inyi ehka.

25 Ek mun upyi uhup ainyak um asuptecnaig ehelemia.

26 Eru wit ika ehelemia ara, Et idim amen aien an namasacen; jim apan aijaua: ka, *Et idim amen aien* anliin neom; jim imyiaiji *intas ura*.

27 Et idivaig nauwainapit et ahes an ridjai o un, um ememina an nete o un; etpu idim ucco napam o Inhal o natimi.

28 Erupu asjapicnaig inmeijcop an nuarin ineig inyi amen iran natimi mas.

29 ¶ Et wit ti pan itac nohocred ira adiat iji ehki etpu aupat nagesega, um eti alahala vai inmohoc, um etjo inmoijeuv an nohatag, etpu ahecatina nemda an nohatag:

30 ja uhpu ecetai nitai asjaaicnaig vai Inhal o natimi an nohatag: erupu aunyauwaig nup urai iji pece asega, erupu ecet Inhal o natimi ara inhamvaig an nepeig an nohatag an nemda *o un* im natimi alupas *o un*.

31 Etpu abrai ilpu agelo o un aien, mika eri ahlai intoho esjilid ara, um asjapicnaig ilpu atimi ehtai ra o un irai iji uarin asega, ahes an nahaijin nohatag um yetpan an nahaijin.

32 Akumu atahaijeg intas ecsipece aijaua va nateg; Et wat ehcodeaig, um elegelege nerin, eka ika aijaua, Et mun ubutpotet u inlidija:

33 et idim ucco, aku wit almoi nitai iji eigki asega aijaua, akumu ato aijaua, nikavaig, et mun ubutpotet *nelcau o Atua*, an neucse neom.

34 Et inivaijec ineig ek asaig ehelemia ainyak *mika*, Inyi upyi hup um ahni nitai iji eigki, ja erupu emesmas natimi an naopan ineig.

35 Etpu yetpan an tid iran nohatag im nobohtan, ja inyi ti yetpan an tid iran intas unyak.

36 ¶ Ja et eti ato nadiat iyehki im inuarin-nadiat iyehki tah natimi, ka tah ilpu agelo an nohatag, jai Etnak ache.

37 Is idivaig nedo an numoh o Noa, etpu idim ucco *an naopan iyehki* inyi ham a Inhal o natimi.

38 An naopan iyehki is wat pam eti ahgarero nobohtan eris hag ara um umwig, um atnehgan an asanlai, um uhum pan naopan iyehki is apan a Noa an nelcau,

39 eris eti ato ara um uhum pan naopan iyehki is ahgarero nobohtan um leucse ra; etpu idim ucco napam o Inhal o natimi.

40 Erupu amen natimi inyi ero umarau; uhpu atipagki inyi ethi, jam ude inyi ethi.

41 *Erupu amen* intakata inyi ero um irara flaur an neom irara; uhpu atipagki inyi ethi, um ude inyi ethi.

42 ¶ Akumu aminjinai caua aijaua; eka eti ato aijaua nuarin-nadiat ineig etpu yetpam a Natimarid unymia.

43 Ja eka ato aijaua, nikavaig, el is ato a natimi alupas an tah neom nuarin-nepeig ineig etpu han natimi ehneg itai, el is aiji aien, va yi jim ataijhan neom o un aien.

44 Va nedo ineigki akumu yecrei caua aijaua: etpu yetpam a Inhal o natimi an nuarin-nadiat ineig aki eti aktaktai aijaua.

45 Naheca upene um arapakau ineig yek eda, is ati yin a natimi alupas o un mika yi esjilid aien an nimniin o un, par ahtai nitai caig irai iji adiat?

46 et mun ahesmoij naheca ineig, et wit ham a natimi alupas o un um ecet yin nagovaig nedo ineigki.

47 Et inivaijec ineig ek asaig ehelemia ainyak mika, Etpu ati yin aien mika yi esjilid aien irai iji itai asega o un.

48 Ja el et ika a naheca has anliinmopon, Et eti fi auroauro um ham natimi alupas unyak;

49 um aredei ilpu etoan aheca, um hag um umwig ehele ilpu atimi umni kava;

50 etpu ham natimi alupas o naheca ineig an nadiat ineig inyi ti aktaktai aien, im lep an nuarin-nadiat ineig inyi ti ato aien,

51 um ucsamud yin, um ati yin an nimtan imi ilpu atimi efaifa: erupu aunyauwaig ara eahki, um ataktit eijera.

NUARIN-TAS ALUPAS 25.

1 AN naopan iyehki etpu idivaig ilpu atahaig is ten nelcau an nohatag, eris leucse lamp ura ara, um alau ijo um apan mika eri aubillid natimi leh ehgan.

2 Eris arapakau is faiv, jam ahnag is faiv.

3 Eris leucse lamp ura a ilpu atahaig ahnag, jam eti apos naraki uarin:

4 ja eris apos lamp ura a ilpu atahaig arapakau im lep naraki irai hubej ura.

5 Is eti fi auroauro a natimi leh ehgan um han, eris imtate ara asega um umjeg.

6 Is wat ijihgan nepeig eris ahlaig atimi, um ika, Et mun yetpam natimi leh ehgan; akumu alau ijo aijaua um aubillid yin.

7 Eris aiji a ilpu atahaig asega, um ago lamp ura.

8 Eris ika a ilpu atahaig ahnag ehele ilpu atahaig arapakau, Alupai cama tah naraki unyimia aijaua; et mun ohpospos lamp unyima.

9 Eris tas a ilpu atahaig arapakau, um ika, O'o; va yi jim tintin imi cama im lep caua: akumu apan ai-

jaua ehele ilpu atimi ahtai itai, um auanimtan *naraki* imi caua.

10 Eris wat apan ara par auanimtan *naraki*, is um yetpan natimi leh ehgan: eris ahced yin ara sji ehki, eris aitgai yin ara, um apan anliin neom o atmehgan: eris um atapanes an tapanes.

11 Eris apitac a ilpu atahaig iji ehki um apan, um ika, Ak natimi alupas, ak natimi alupas, asalgei intapanes yai cama aiek.

12 Ja is tas aien, um ika, Et inivaijec ineig ek asaig ehelemia ainyak *mika*, ek eti ato caua ainyak.

13 Va nedo ineigki akumu aminjinai caua aijaua; eka eti ato nadiat ineig aijaua im inuarin-nadiat ineig etpu yetpam iran a Inhal o natimi.

14 ¶ *Nelcau an nohatag* et idivaig natimi is ethi, is apan aien an pece itac acen, ja is asjapicnaig ilpu aheca o un aien um ikni padiaig o un ehele ra.

15 Is alupai yin is ethi talent is faiv aien, im lep is ethi talent is tu, im lep is ethi talent is wun; is *alupai* ra asega nitai ineig aien is upene vai ra; um auroauro um atga o un.

16 Aien is leucse talent is faiv aien, is apan aien um ahtai, um lep leh talent is faiv is eche.

17 Im lep aien *is leh* talent is tu aien, is lep leh talent is tu is eche aien.

18 Ja aien is leh talent is wun aien, is apan aien um ucji nobohtan, um adenaig mune o natimi alupas o un.

19 Is wat ti pan itac nadiat is ahinag is lep han a natimi alupas o ilpu aheca iji eigki, um ahilek nedo ura.

20 Aien is leucse talent is faiv aien, is lep leucse pan talent is faiv is eche aien, um ika, Ak natimi alupas, as alupai nyak talent is faiv aiek: ja ek mun lep leucse talent et faiv et eche ainyak.

21 Is um ika ehelen a natimi alupas o un, Et upene, ak naheca upene um

inivaijēc; et mun upene nedo unyum va niji itai et eti elpat, ekpu ati euc ainyak mika an esjilid aiek irai iji itai et ahinag: nanu imyiacitak aiek um idivaig natimi alupas unyum.

22 Im lep aien is leh talent is tu aien, is han aien um ika, Ak natimi alupas, as alupai nyak talent is tu aiek: ek mun lep leh talent et tu et eche ainyak.

23 Is um ika ehelen a natimi alupas o un, Et upene, ak naheca upene um inivaijēc; et mun upene nedo unyum va niji itai et eti elpat, ekpu ati euc ainyak mika an esjilid aiek irai iji itai et ahinag: namu imyiacitak aiek um idivaig natimi alupas unyum.

24 Ja aien is leh talent is wun aien, is han aien um ika, Ak natimi alupas, kis ato euc ainyak, nikavaig, na atimi ipjin aiek, na leucose pan itai aiek an nuarin ineig as eti aho-aig itai iran aiek, um lep asjapicnaig itai an nuarin ineig as eti terinterim irai itai iran aiek:

25 kis um imtitaig ainyak, um apan, um adenaig talent unyum an nobohtan: eap eigki, leh aiek.

26 Is tas ehelen a natimi alupas o un, um ika, Ak naheca esjum um auatatimi, as ato aiek, nikavaig, ek leucose pan itai ainyak an nuarin ineig kis eti aho-aig itai iran ainyak, um lep asjapicnaig itai an nuarin ineig kis eti terinterim irai itai iran ainyak:

27 as auri aiek par eti ati mune unyak ehele ilpu atimi ahtai mune, mika ki leh mune unyak ainyak an napam unyak im lep ineig yi eled?

28 leh talent iran aijaua, um alupai natimi ineig et ten talent o un.

29 Ara asega et ura niji itai, uhpu alupai ra, etpu ahinag niji itai ura: ja aien et eti o un niji itai, uhpu atipagki niji itai iran et ika aien et o un.

30 Akumu ethaig pok ijo an nau-pat naheca esjum ineig aijaua: eru-

pu aunyauwaig ara eahki, um ataktit eijera.

31 ¶ Et wit yetpam a Inhal o natimi an natimi alupas o un, im lep ilpu agelo upene asega ehelen, etpu ateuc aien a dorona esjilid o un an naopan iyehki:

32 uhpu asjapicnaig an nuhup o un nup urai iji pece asega: etpu ahai ra aien, et idivaig natimi amin-jinaig siip, et atiakoai siip im nanin aien:

33 etpu ikni siip an matan aien, jam *ikni* anin an moun.

34 Etpu ika a Natimarid ehele ra an matan, Apam aijaua, ak ilpu atimi is aiheuc vai caua a Etnak, um amen an nelcau ineig eris ago imi caua an naopan iyehki is pam eti eteuc nobohtan:

35 is ehele nyak ainyak, ja akis alaak nitai caig aijaua: um ahvig wai, ja akis alumak inwai aijaua: um tak atimi, ja akis aiheuc vai nyak aijaua:

36 um tup atga, ja akis aso nyak an napelumai aijaua: um emehe, ja akis ateghe nyak aijaua: um amen anliin neom ipjin, ja akis apan ehelek aijaua.

37 Erupu tas ehelen a ilpu atimi upene, um ika, Ak Natimarid, ecris ecet euc aijama an nahopan is ehele euc aiek, um alaam nitai caig? as lep ahvig wai aiek an nahopan, ecris aluumum inwai aijama?

38 um lep ecet euc an nahopan as tak atimi aiek, um aiheuc vai euc? im intup atgavaig, um aso euc an napelumai?

39 um lep ecet euc an nahopan nemehevaig, um *namenvaig* anliin neom ipjin, um apan ehelum?

40 Etpu tas a Natimarid, um ika ehele ra, Et inivaijēc ineig ek asaig chelemia ainyak mika, akis wat ago *nedo ineigki* aijaua vaig tah natimi upoupo irai ilpu etoak iji eigki, akis idim ago vai nyak aijaua.

41 Etpu ika ehele ra aien an moun, Atga unyimia aijaua, ak ilpu atimi

ohocred, um apan an cop inyi ti lep opos, eris ago imi Tiapolo im ilpu agelo o un:

42 is ehteke nyak ainyak, ja akis eti alaak nitai caig aijaua: um ahvig wai, ja akis eti alumak tah inwai aijaua:

43 um tak atimi, ja akis eti aiheuc vai nyak aijaua: um tup atga, ja akis eti aso nyak an napelumai aijaua: um emehe, um amen anliin neom ipjin, ja akis eti ateghe nyak aijaua.

44 Erupu tas ehelen ara, um ika, Ak Natimarid, ecris ecet euc aijama an nahopan nehteke euc vaig, um ahvig wai, um tak atimi, um tup atga, um emehe, um *amen* anliin neom ipjin, jam eti aheca unyum?

45 Etpu tas ehele ra aien, um ika, Et inivaijec ineig ek asaig ehelemia ainyak mika, akis wat eti ago *nedo ineigki* aijaua vaig tah natimi upo-upo iji eigki, akis idim eti ago vai nyak aijaua.

46 Erupu apan ara sji eigki an nuarin ohocred, um amen irai iji mesese: ja *erupu apan* a ilpu atimi upene an nuarin umumoh, um amen iran irai iji mesese.

NUARIN-TAS ALUPAS 26.

IS asuptecnaig ehni nitai iji eigki asega a Iesu, ja par ika ehele ilpu atimi atahaijeg yin,

2 Eka ato aijaua, nikavaig, et wit ti pan itac nadiat inyi ero, uhu wit *asjapicnaig* u napaska; uhpu aniv Inhal o natimi mika eri atgei yin an nauinceai atgeig.

3 Eris asjapicnaig a ilpu atimi ahlap esjilid im ilpu atimi esege, im ilpu atimi tas alep an pece, an nimnim o natimi esjilid an nahlap, nidan Keafas,

4 um tas jipe mika eri efaifa vai Iesu, par atgei yin.

5 Ja eris ika ara, *Eri jim ago* ira adiat asjapicnaig, va eri jim ehtauo natimi.

6 ¶ Is wat amen Bedane a Iesu anliin neom o Saimona natimi lepros,

7 is han ehelen intakata is ethi, um apos nipjinitai alabaster, is amen iran nitai aspi esjilid um upene nipin, um atladwijai an nidjinin an nateuc o un um hag.

8 Eris wat ecetai a ilpu atimi atahaijeg yin, eris edemda ara, um ika, Er auahas vanhe?

9 et upene nahtaivaig nitai aspi ineigki um leh nimtan alupas, par alupai ilpu ihki atimi.

10 Is wat ato a Iesu is ika ehele ra aien, Eka auri aijaua par imyidohalav intakata ineigki? et mun ago nauritai upene irak aien.

11 era amen ehelemia a ilpu ihki atimi irai iji adiat; ja inki ti amen ehelemia ainyak irai iji adiat:

12 et mun atladwijai nitai aspi ineigki aien an nohuk va natelmoi nyak:

13 et inivaijec ineig ek asaig ehelemia ainyak *mika*, Uhpu asuptecnaig nedo ineigki et mun ago a intakata ineigki, nitai imyiehva yin irai iji pece asega an nobohtan, uhpu asuptecnaig intas-upene ineigki iran.

14 ¶ Is apan a Jutas nupu Karyot ehele ilpu atimi ahlap esjilid, is atimi is ethi aien ira atimi is twelv iji ehki,

15 um ika *ehele ra*, Aki alupai nyak inhe aijaua va ekpu aniv yin ehelemia ainyak? Eris ika ara eri alupai yin inuari silver yi dirte.

16 Is atupun aien an naopan iyehki, um imyieris yin par aniv yin.

17 AN nadiat uhup *eris asjapicnaig* va nareto is ti leven iran, eris apan ehele Iesu a ilpu atimi atahaijeg yin, um ika ehelen, Nai merit aiek vaig eda igca ecri imyecrei napaska aijama mika apu ecaig aiek?

18 Is ika aien, Apan aijaua an nuarin-pece *itaup* ehele natimi et ethi eahki, um ika ehelen, Et ika a Natimi esege, Et mun ubutpotet nadiat unyak; ekpu ecaig napaska

ainyak anliin neom unyum im lep ilpu atimi atahaijeg nyak.

19 Eris ago nedo ineigki is asaig a Iesu a ilpu atimi atahaijeg yin, um imyecrei napaska.

20 Is wat jupura, is ateucse aien im lep natimi is twelv.

21 Eris wat hag ara, is ika aien, Et inivaijec ineig ek asaig ehelemia ainyak mika, etpu aniv nyak tah inyi ethi iramia.

22 Eris ohocred alupas ara asega, um ika athiathi ehelen, Ainyak, ka o'o, ak Natimarid?

23 Is tas aien, um ika, Aien aigki ecrau esipiaig nipjinitai aijumrau, etpu aniv nyak aien:

24 et apan a Inhal o natimi et idivaig eris aged vai yin: ja a'a, auwe vai nat naico etpu aniv Inhal o natimi aien! el is upene vai nat naico, el eris eti apos yin.

25 Is tas a Jutas natimi aniv yin, um ika, Ak Natimi esege, ainyak, ka o'o? Is um ika ehelen aien, Na mun asaig aiek.

26 ¶ Eris wat hag ara, is leh nareto a Iesu, um naaurineig *iran*, um aswalec, um alayi ilpu atimi atahaijeg yin, um ika, Leh aijaua *um* ecaig: nohuk ineigki.

27 Is lep leh nipjinitai aien, um naaurineig *iran*, um alupai ra, um ika, Akumu umnyi aijaua asega;

28 inja irak ineigki vai intas-etipup mat, eh mun atladwi va atimi et ahinag, va uhpu eti aru nedo has *ura*:

29 ja ek asaig ehelemia ainyak mika, Inki ti lep umnyi nidi vaine ainyak, um uhum pan naopan iyehki, ekpu umnyi *waina* mat ainyak ehelemia an nelcau o Etmak.

30 Eris acesaces nohranantai ara, ja par alau ijo um apan an nedoon Olivet.

31 Is um ika ehele ra a Iesu, Aku-pu imyiehcamaï nyak aijaua asega an nepeig ineigki: eris aged, *um ika*, "Ekpu auud natimi asgi siip ainyak, erupn terinterim jipe siip."

32 Ja ek wit lep nusjai ainyak,

ekpu apan ainyak Calili um uhup iramia.

33 Is tas a Pitrus, um ika ehelen, Neri imyiehcamaï euc natimi asega, ja inki ti imyiehcamaï *euc* ainyak.

34 Is um ika ehelen a Iesu, Et inivaijec ineig ek asaig ehelum ainyak mika, Napu ehceseij ateri nyak aiek, ja etpu ahlaig injaa, an nepeig ineigki.

35 Is um ika ehelen a Pitrus, El ek mas ehelum ainyak, el ek eti ateri euc ainyak. Is idim ucce intas ura asega.

36 ERIS ahced Iesu ara um apan an nuarin is ethi nidan Kedsemani, is um ika ehele ilpu atimi atahaijeg yin aien, Atencse aijaua igcaki, ki apan ainyak eagko, um alaigaheni.

37 Is leh Pitrus aien im ohwat hal o Sebetaius, is esjilid intaigtaig o un im nohocred.

38 Is um ika ehele ehtaij aien, Et ohocred alupas inliinmopok ainyak um idivaig inmas: amen aijautaij igcaki, um aiji ehelek.

39 Is eti elvatga aien, um atpuse, um alaigaheni, um ika, Ak Etmak, el et wat eti ehka, el eh mun atipagki nipjinitai ineigki ehelek: jai jim *imyiaiiji* intas unyak, jam *imyiaiiji* intas unyum.

40 Is apan aien ehele ehtaij atimi atahaijeg yin, um ecet ehtaij numjegvaig, is ika ehele Pitrus aien, Ehtaij auri aijautaij par eti aiji an aur et ethi ache?

41 Aiji aijautaij um alaigaheni, va ahtiji jim apan an nedo oop *cautaij*; et emda inliinmopomitaij aijautaij, ja et auatialidi nohumitaij.

42 Is lep apan aien um alaigaheni, um ika, Ak Etmak, el et ehka nati-pagkivaig nipjinitai ineigki ehelek, tup aiek marom, nikavaig, ki umnyi ainyak.

43 Is um han aien um ecet ehtaij, ehtijis lep umjeg ahtaij: is aroparop nesganintai ehtaij.

44 Is ude ehtaij aien, um lep atga

o un, um ehcesejj alaigaheni, um asaig intas iji ehki.

45 Is apan aien ehele ehtaij atimi atahaijeg yin, um ika ehele ehtaij, Umjeg aijautaij, um atumop: et mun ubutpotet naopan ineig, eh mun aniv Inhal o natimi ehele ilpu atimi auatatimi:

46 atidai aijautaij, ti atga uja akaija: et mun ubutpotet aien et aniv nyak aien.

47 ¶ Is wat tas aien, is um han a Jutas, natimi is ethi ira atimi is twely, eris ahced yin natimi is ahinag, eris ahes ehele ilpu atimi ahlap esjilid ara, im ilpu atimi tas alep an pece, um apos autoga im nelop.

48 Is asuptecnaig ehele ra a natimi aniv yin, um ika, Aien ekpu aijumnyi yin ainyak, aien aigko; asjiraig upene yin aijaua.

49 Is eti laulau is um yetpan aien ehele Iesu, um ika, Kaiheuc vai euc, ak Natimi esege; um aijumnyi yin.

50 Is um ika ehelen a Iesu, Ak etoak, na mun ham aiek vanhe? Eris apan ara um asjirai Iesu, um leh yin.

51 Is arise an nahaijin tah is ethi ehele Iesu, um aihiacse nauitoga o un, um auud naheca o natimi esjilid an nahlap, um auudyialis intikgan.

52 Is um ika ehelen a Iesu, Lep atohoaigse nauitoga unyum aiek an cedpan: erupu emesmas va nauitoga ara asega era apos autoga ara.

53 Nai ikha aiek? el ek ugni Et-mak ainyak an naopan ineig, etpu auroauro aien um alupai nyak ilpu agelo lijon et twelv um eled:

54 ja uhpu ehnejid intas eris aged um uauo, mika yi idim uece?

55 Is ika a Iesu ehele atimi is ahinag an nuarin-nadiat iyehki, Eka mun idim ham aijaua um auanedo an natimi ehneg itai *irak*, um apos autoga im nelop mika ki leh nyak: kis ateuc ehelema ainyak anliin neom ahlap irai iji adiat um esege *imi caua*, ja akis eti arop irak aijaua.

56 Ja eh mun ago nitai iji eigki

asega, par ehnejid intas eris aged a ilpu profeta.

Eris ude yin a ilpu atimi atahaijeg yin asega, um aha.

57 ARA eris arop irai Iesu ara eris inyiapan *yin* ara ehele Keafas natimi esjilid an nahlap, an nuarin iyehki eris asjapicnaig iran a ilpu atimi esege im ilpu atimi tas alep.

58 Is apitac yin a Pitrus, jam itac acen vai yin, um apan an nimnim o natimi esjilid an nahlap, is apan aien um ateuc ehele ilpu aheca, mika yi almoi ehnejai *nedo ura vai yin*.

59 Eris ahilek atimi par asan tas ahcil vai Iesu a ilpu atimi ahlap esjilid, im ilpu atimi tas alep, im ilpu atimi alupas asega, mika eri atgei yin;

60 jam eti ecet tah: eris apan a ilpu atimi ahcil is ahinag, ja eris eti ecet tah ara. Erus epitpitac natimi ahcil is ero,

61 um ika, Is ika a nat naico, Ek emda ainyak par auahas neom ahlap o Atua, um lep ago an nadiat inyi esejj.

62 Is um atidai a natimi esjilid an nahlap, um ika ehelen, Na asaig tah nitai aiek, ka o'o? inhe ineigki era asuptecnaig vai euc ara sji eigki?

63 Ja is eti tas a Iesu.

Is tas a natimi esjilid an nahlap, um ika ehelen, Ek asaig ehelum ainyak vai Atua umoh, mika an asuptecnaig aiek ehelema, mika nai Kristo aiek, Inhal o Atua, ka o'o.

64 Is um ika ehelen a Iesu, Na mun asaig aiek: ja ek asaig ehelema ainyak mika, Akupu ecet Inhal o natimi aijaua an tak aopan naateucvaig an matan Et emda aien, im lep napam o un an nepeig an nohatag.

65 Is ahpati napelumai iran a natimi esjilid an nahlap, um ika, Et mun asan tas has esjilid aien; inta auri akaija par lep ahilek atimi par asuptecnaig *vai yin*? eka mun atahaijeg intas has esjilid o un aijaua:

66 eka ikha aijaua? Eris tas ara, um ika, Et upene natgei yin vaig.

67 Eris agdei nesganintan ara, um abli yin; eris lep ahpoi *yin* a ilpu ahaiji ra irai ikmara,

68 um ika, Asuptecnaig aiek ehelema, ak Kristo, Et mun ahpoi euc a di?

69 ¶ Is ateuc a Pitrus ijo an nimnim: is apan ehelen natahaig is ethi, um ika, As idim amen aiek ehele Iesu nupu Calili.

70 Ja is um ateri aien an nuhupura asega, um ika, Ek eti ato intas unyum ainyak.

71 Is alau ijo aien um apan an naiyu, is lep ecet yin *natahaig* is eche, um ika ehele atimi eahki, Is amen a nat eigki ehele Iesu nup an Nasared.

72 Is ehcero ateri aien, um asan tas has esjilid, um ika, Ek eti ato natimi ineigki ainyak.

73 Eris lep epitpitac ara eris aiji *ubutpotet*, um apan, um ika ehele Pitrus, Nai idim atimi et ethi ira ra aiek; na auoh intas ura aiek.

74 Is asan tas has aien im intas itaup, um ika, Ek eti ato natimi ineigki ainyak. Is um auroauro um ahlaig injaa.

75 Is um imyiehva a Pitrus intas is asaig ehelen a Iesu, um ika, Napu ehcesej ateri nyak aiek, ja etpu ahlaig injaa. Is apan itac aien, um taig alupas.

NUARIN-TAS ALUPAS 27.

IS wat lahlah an nuhialeq, eris tas jipe vai Iesu a ilpu atimi ahlap esjilid asega, im ilpu atimi tas alep an pece, mika eri atgei yin:

2 eris arore yin ara, um imyiapan *yin*, um ati yin ehele Ponjus Paillet natimarid.

3 ¶ Is wat ato a Jutas natimi aniv yin mika eris ika ara eri atgei yin, is ohocred inliinmopon aien, is lep imyiapan ehele ilpu atimi ahlap esjilid im ilpu atimi tas alep inuari silver is dirte iji ehki aien,

4 um ika, Kis mun ago nedo has

ainyak, um aniv natimi upene ineigki. Eris um ika ara, Eruauro vai cama? tup aiek marom.

5 Is ethaigse inuari silver iji ehki aien anliin neom ahlap, um atga o un, um apan, um ispun alcinwan.

6 Eris leh inuari silver iji ehki a ilpu atimi ahlap esjilid, um ika, Et itaup nativaig an nuarin ikni mune iran, nintan ja ineigki.

7 Eris tas jipe ara, um ika, eri auanintan nuarin-nobohtan o natimi ago ipjiitai an *nuari silver* iji ehki, par atelmoi nup urai taka uarin iran.

8 Eris anvi nidan nuarin-nobohtan iyehki par ika, Nobohtan ja, um imyihum pam naopan ineig.

9 Is um ehneijid intas is asaig a naprofeta Jeremaia, um ika, "Eris leucse inuari silver is dirte ara, nintan eris asaig vai yin, eris asaig nintan ineigki vai yin a nupu Isreel;

10 um auanintan nuarin-nobohtan o natimi ago ipjiitai, is idivaig is asaig ehelek a Ihova."

11 ¶ Is um atidai a Iesu an nuhup o natimarid: is ahodai yin a natimarid, um ika, Na Atimarid u nupu Jutaia aiek, ka o'o? Is ika ehelen a Iesu, Na mun asaig aiek.

12 Eris atijai itai iran a ilpu atimi ahlap esjilid im ilpu atimi tas alep, ja is eti tas aien.

13 Is um ika ehelen a Paillet, Na atahaijeg niji itai et ahinag aiek era asuptecnaig vai euc ara, ka o'o?

14 Is idim eti tas ehelen aien; va nedo ineigki is um imyiali alupas a natimarid.

15 Is um ucece nedo o natimarid an nasjapicnaig iyehki, is ahiyi natimi is ethi aien anliin neom ipjin imi atimi, aien aigki eris merit vai yin ara.

16 Is amen anliin neom ipjin ura an naopan iyehki natimi auatatimi esjilid is ethi, nidan Barabas.

17 Eris wat asjapicnaig ara, is ika

ehele ra a Paillet, Ekpu atceijaig di imi caua ainyak? Barabas, ka Iesu er anvi nidan par ika Kristo?

18 Is ato aien, nikavaig, eris ati yin a ilpu atimi tas alep va nau-atitai ura vai yin.

19 ¶ Is wat ateuc aien an nitai ateuc tas alep iran, is abraig pan tah ehelen a ehgan, um ika, Jim ago tah nitai aiek irai natimi upene ineigki: et mun alupas nohocred unyak vai yin an numjeg ahnag unyak inpeig.

20 Ja eris auahas inliinmopoi atimi is ahinag a ilpu atimi ahlap esjilid im ilpu atimi tas alep, mika eri imyialep Barabas, jam auahas Iesu.

21 Is um tas a natimarid, um ika ehele ra, Ekpu ahiyi tah rau a di ainyak imi caua? Eris, um ika ara, Barabas.

22 Is um ika ehele ra a Paillet, Ekpu ago inhe ainyak irai Iesu er anvi nidan par ika Kristo? Eris ika ara asega, Eri atgei yin an nauincai atgeig.

23 Is ika a natimarid, Auri? is ago nev edo has aien? Ja eris um lep ahlaig emda ara, um ika, Eri atgei yin an nauincai atgeig.

24 ¶ Is wat ato a Paillet, nikavaig, is auatialidi nimyiisjis o un, um esjilid nehtauo o atimi, is leh inwai aien, um ahisjim an nuhup ura, um ika, Ek adicinadin ainyak vaiinja irai natimi upene ineigki: tup aijaua marom.

25 Eris tas natimi asega, um ika, Etmu eteuc irama, im lep irai ilpu hal unyima,inja iran.

26 ¶ Is um ahiyi Barabas imi ra aien: jam aredei Iesu, um ati yin ehele ra mika eri atgei yin ara an nauincai atgeig.

27 ERIS imyiapan Iesu an nim-nim o natimarid a ilpu eucsupo o un, eris asjapicnaig pan ehelen a ilpu eucsupo asega.

28 Eris atipagki napelumai iran ara, um aso yin an napelumai cop.

29 Eris ahod incat ara irai itai upunupun, um adgaig imi yin, um ati nauanieg an matan: eris atpuse an nuhup o un ara, um imyiafakahcil yin, um ika, Kai-heuc vai euc, ak Natimarid u nupu Jutaia!

30 Eris agdei yin ara, um leh nauanieg, um aredei nidjinin iran.

31 Eris imyiafakahcil yin ara, ja par atipagki napelumai iran, um aso yin an napelumai o un, um imyiapan yin par atgei yin an nauincai atgeig.

32 Eris wat apan itac ara, eris ecet nupu Sairini is ethi ara, nidan Saimona: eris ika ehelen ara yi ahelwei nauincai atgeig aien.

33 ERIS wat apan ara an nuarin is ethi nidan Colcoda, nesgan tas ineigki, nuarin o nipjinipek o atimi,

34 eris aluman vinecar ara eris ago pelaig an wai acen: is atim-tim iran aien, jam eti umnyi.

35 Eris um atgei yin ara an nauincai atgeig, um alai apelumai o un um edaig jipe itai asjaaicnaig: et idivaig intas is upyi asaig a naprofeta, um ika, "Eris ahai apelumai itac unyak ira ra ara, um edaig jipe itai asjaaicnaig va napelumai uhup unyak."

36 Eris ateucse ara, um aminjinaig yin eahki;

37 eris atijai u nidjinin ijinies ara intas ineig eris aged vai yin, um ika, IESU INEIGKI NATIMARID U NUPU JUTAIA.

38 Eris lep atgei natimi ehneg itai is ero ehelen an nauincai atgeig; is ethi an matan, im lep is ethi an moun.

39 ¶ Ara eris atga an nefalaig ara eris atuh yin ara, um auhohaig nidjinira,

40 um ika, Aiek na auahas neom ahlap aiek, um lep actaig an nadiat et esej, namu imyiatamaig euc aiek: el et Hal o Atua aiek, namu asuol an nauincai atgeig aiek.

41 Eris lep imyiafakahcil *yin* a ilpu atimi ahlap esjilid, im ilpu atimi esege, im ilpu atimi tas alep, um ika,

42 Is imyiatamaig tak atimi aien; *ja* et auatialidi aien par imyiatamaig *yin*: el et Atimarid u nupu Isreel aien, etmu asuol aien an nauincal atgeig an naopan ineig, va ecrupu asgeig iran aijama:

43 is asgeig irai Atua aien; etmu imyiatamaig *yin* aien, el et aiyu inliinmopon aien vai *yin*: is ika aien, Ek Hal o Atua ainyak.

44 Eris lep atuh *yin* a natimi ehneg itai erahki, eris atgei rau ehelen an nauincal atgeig.

45 ¶ Is wat adiatadiat is atupun inmehcim an pece asega um yetpan an jupki.

46 Is wat jupki is ahlaig ijinies a Iesu, um ika, "Elai, Elai, lema sabakdenai?" nesgan tas ineigki, "Ak Atua unyak, ak Atua unyak, na auri aiek par ude nyak?"

47 Eris wat atahajeg ara eris aiji ubutpotet ara, eris ika a ilpu ahaiji ra, Et ahlaig vai Elaija aien.

48 Is auroaro natimi is ethi ira ra um athut, im leh nisa, um ahtai-juli a vinecar, um ati an naua-nieg, um aluman.

49 Eris um ika nahaiji ra, Eklim erop, intupu almoi akaija, kit etpu han a Elaija par imyiatamaig *yin*.

50 Is lep ahlaig ijinies a Iesu, um edekjai nesgan.

51 Is um ahpati natcai apelumai anliin neom ahlap, is ahes ijinies um asuol; is amaamai nobohtan, um ameled nij;

52 um asalgei ehpaिताi; eris lep anusjai ohoi ilpu atimi upene eris emesmas is ahinag:

53 is wat nusjai aien eris ahes u ehpaिताi ara, um apan an nuarin-pece itaup, um ehcohos pan ehele atimi is ahinag.

54 ¶ Is wat ahgei nomoi a natimi alupas u ilpu eucsupo, im lep ra

eris amen ehelen ara par aminjinaig Iesu, um almoi nitai iji eigki, eris imtitaig alupas ara, um ika, Et inivaijec ineig, nikavaig, et Hal o Atua aien.

55 Eris amen eahki a ilpu takata is ahinag, um aiji itac acen par almoi, eris ahes Calili ara, um ahced Iesu, um aheca o un:

56 is amen ehele ra a Mere nupu Mactala, im Mere risi Jakobus im Joses, im lep risi ohwat hal o Sebetaius.

57 IS wat jupura is apan natimi ikni itai Arimadia is ethi, nidan Josef; is atimi atahajeg Iesu aien:

58 is apan aien ehele Paillet, um ugni nohui Iesu. Is ika a Paillet eri alupai *yin* nohun.

59 Is leh nohun a Josef, um aso an napelumai yilyil um upene,

60 um ati an mun nij mat o un, is ahti aien: um atelcaig inhat alupas um atapanes an neucsen mun nij, um atga o un.

61 Is ateuc a Mere nupu Mactala, im lep Mere is eche, ubutpotet o unmun nij.

62 IS wat lep lahlah an tak apnyin, an nadiat epitpitac nadiat imyecrei itai iran, eris asjapicnaig pan ehele Paillet a ilpu atimi ahlap esjilid im ilpu Farisi,

63 um ika, Ak natimarid, ecri imyiehva aijama intas is asaig a natimi efaifa ineigki, an naopan numoh o un, um ika, Et wit ti pan itac nadiat inyi esej, ekpu lep nusjai ainyak:

64 va nedo ineigki namu ika aiek eri altapanes upene inmun nij an nadiat inyi esej, va eri jim apan a ilpu atimi atahajeg *yin* an nepeig, um ahneg *yin*, um ika ehele atimi, Et mun nusjai aien vai inmas *o un*: etpu esjilid nedo ahnag ineigki iran yehki uhup.

65 Is um ika ehele ra a Paillet, Era amen ehelemia a ilpu eucsupo:

apan aijaua, um ahtapanes ipjin et idivaig nato itai unyimia.

66 Eris apan ara, um ahtapanes ipjin immun nij, um ati nitai asjaaic-naig an hat, um ikni ilpu eucsupo.

NUARIN-TAS ALUPAS 28.

IS wat ti pan itac nadiat atumop, I wat lep lahlah an nadiat uhup irai wiik, is yetpan a Mere nupu Mactala im lep Mere is eche par almoi immun nij.

2 Is um omoi alupas; is ahes an nohatag a nagelo o Natimarid, um asuol, um apan um atipagki inhat an neucsen mun nij, um ateuc iran.

3 Is idivaig nauwainapit nesganimtan, um ahi napelumai iran, is idivaig sno:

4 eris imtitai yin a ilpu atimi aminjinaig *immun nij*, um ucjucujaij, eris idivaig ilpu atimi emesmas ara.

5 Is tas a nagelo, um ika ehele intakata erahki, Jim imtitaig aijaurau: ek ato ainyak, nikavaig, erau ahilek Iesu aijaurau eris atgei yin an nauincal atgeig:

6 et ti aien igcaki: et mun nusjai aien, et idivaig is asaig aien: apam aijaurau, um almoi inuarin ineig is asjeuc iran a Natimarid:

7 auroauro aijaurau um apan, um asuptecnaig ehele ilpu atimi atahaijegg yin, mika et mun nusjai aien vai inmas *o un*; et apan aien Calili um uhup iramia; akupu ecet yin aijaua eahki: ek mun idim asaig ehelemirau ainyak.

8 Eris ahes o unmun nij arau, um auroauro um atga urau, erus imtitaig arau um imyiacitak alupas; erus athut arau um apan par asuptecnaig ehele ilpu atimi atahaijegg yin.

9 ¶ Eris wat apan arau par asuptecnaig ehele ilpu atimi atahaijegg

yin, is ehtet ira rau a Iesu, um ika, Kaiheuc vai caurau. Eris apan arau um asjira neduon, um atpuse vai yin.

10 Is ika ehele rau a Iesu, Jim imtitaig aijaurau: *jam* apan um asaig ehele ilpu etoak mika eri apan ara Calili: erupu ecet nyak eahki ara.

11 ¶ Eris wat atga urau arau, eris apan an nuarin-pece nahaiji ilpu eucsupo, um asuptecnaig ehele ilpu atimi ahlap esjilid nitai iji eigki asega.

12 Eris wat asjapicnaig ara im lep ilpu atimi tas alep, eris um tas jipe ara, um alupai ilpu eucsupo mune is ahinag,

13 um ika, Akumu ika aijaua, Eris apan a ilpu atimi atahaijegg yin an nepeig, um ahneg yin an numjegg unyina.

14 El et atahaijegg a natimarid, ecrupu tas ehelen aijama, um imyi-ahras caua.

15 Eris leucse mune ara, um ago nedo ineigki eris asaig ehele ra: eris asan tas ineigki a nupu Juttaia um imyihum pam an naopan ineig.

16 ¶ Eris apan Calili a ilpu atimi atahaijegg yin is eleven, an nedoon ineig is asuptecnaig ehele ra a Iesu.

17 Eris wat ecet yin ara, eris atpuse vai yin ara: ja eris imyisjis nahcil nahaiji ra.

18 ¶ Is apan a Iesu um tas ehele ra, um ika, Eris ati nemda asega imi nyak an nohatag im nobohtan.

19 Va nitai ineigki akumu apan aijaua, um ika eri alaigaheni nup urai iji pece asega, um baptiso ira ra an nidai Etmak, im Inhal o un, im Nesgumrau Upene:

20 um esege imi ra mika eri imyiaiji niji itai asega ara kis tas alep vaig ehelemia ainjak: ekpu idim amen ehelemia ainjak irai iji adiat, um yetpan an nehni u naopan. Emen.

INTAS-UPENE

IS AGED A

M A R K U S.

NUARIN-TAS ALUPAS 1.

NATUPUN intas-upene vai Iesu Kristo, Inhal o Atua;

2 et idivaig eris upyi aged a ilpu profeta, um ika, "Ek idim abrai nabeca unyak ainyak mika yi uhup iram, etpu ahped nefalaig vai euc aien."

3 "Nohran tah et ethi etpu ahlaig aien an namasacen, um ika, Akumu ahped nefalaig vai Ihova aijaua, um ago yi atoh efalaig vai yin."

4 Is um baptiso *ira atimi* a Joanes an namasacen, um asuptecnaig nabaptiso, mika eri adumoiy anliinmopura, va uhpu eti aru nedo has *ura*.

5 Eris ahtag pan ehelen a nupu Jutaia asega, im nupu Jerusalem, is baptiso ira ra asega aien an nofo-wai Jortan, eris um asuptecnaig nedo has ura ara.

6 Is aso yin a Joanes an *napelumi* alau irai kamela, um alid narasi kurimatau; um caig inheled im huene.

7 Is efehtas aien, um ika, Etpu yetpam tah inyi ethi, inyi esjilid irak aien, par apitac nyak, ek eti upene ainyak par atpuse, um ahiyi nehtit an cedpun eduon:

8 ek idim baptiso iramia ainyak an wai: ja etpu baptiso iramia aien an Nesgan Upene.

9 An naopan iyehki is ahes a Iesu an Nasared an *pece* Calili, um apan ehele Joanes, is um baptiso iran aien an *nofowai* Jortan.

10 Is wat áhes u inwai aien um atga o un, is um ecetai nohatag aien nasalgeivaig, is asuolse iran a Nesgan *Upene* is idivaig nalaupa:

11 eris ahgei nohran tah an nohatag, *is ika*, Nai Halav cop unyak aiek, ek imyacitak euc ainyak.

12 Is auroauro um imyiapau yin a Nesgan *Upene* an namasacen.

13 Is amen aien eahki an namasacen ira adiat is forte, is um oop yin a Satana; is echim amen aien im niji itai aleg; eris aheca o un a ilpu agelo.

14 ERIS wat ati Joanes anliin neom ipjin, is apan Calili a Iesu, um asuptecnaig intas-upene va nelcau o Atua,

15 um ika, Eh mun ti pan itac elni naopan iyehki, et mun ubutpotet nelcau o Atua: akumu adumoiy anliinmopomia aijaua, um eteuc an tas-upene.

16 Is wat atga aien ubutpotet u injop Calili, um ecet Saimona im Antrius etoan, erus ana nopoig an jop arau: erus atimi ahilek mu arau.

17 Is um ika ehele rau a Iesu, Arumu ahced nyak aijaurau, ekpu ati caurau ainyak mika aru ahilek atimi aijaurau.

18 Erus auroauro arau um ude oipoig urau, um ahced yin.

19 Is ahes eahki aien um eti elvatga, um lep ecet Jakobus inhal o Sebetaius im Joanes etoan, erus amen arau an nelcau, um uhpuri oipoig urau.

20 Is auroauro aien um ahlaig

vai rau: erus um ude etmarau arau Sebetaius an nelcau im ilpu aheca, um ahced yin.

21 Eris apan ara Kaperneum; is apan aien anliin neom alaigaheni irai iji adiat atumop, um esege.

22 Eris um imyiali nesege o un ara: is esege imi ra aien is idivaig tah eris alupai yin nemda, um eti idivaig ilpu atimi esege.

23 Is amen anliin neom alaigaheni ura natimi is ethi, is amen iran nagelo has; is um ahlaig ijinies aien,

24 um ika, Ude *cama*; nai merit aiek vanhe ehelema, ak Iesu nup an Nasared? na mun ham aiek mika an auahas cama, ka o'o? ek ato euc ainyak, na Atimi Upene o Atua aiek.

25 Is acaiji yin a Iesu, um ika, Jim tas aiek, um atceijai yin.

26 Is auohuoh yin a nagelo has, um ahlaig ijinies, um atceijai yin.

27 Eris um imyiali ara asega, um tas jipe ehele ra, um ika, Inhe ineigki? nev esege mat ineigki? et esjilid aien irai ilpu agelo has, et acaiji ra aien, era um imyiaiji intas o un ara.

28 Is um auroauro um apaahni intas vai yin an pece ri Calili asega.

29 Eris auroauro ara, um ahes anliin neom alaigaheni, um alau ijo, um ahced Jakobus im Joanes, um apan anliin neom o Saimona im Antriins.

30 Is asjeuc a risi ehgai Saimona va nemehe ihlup; eris auroauro ara um asuptecnaig yin ehelen.

31 Is um han aien um arahpan va nikman, um imyiatidai yin; is auroauro um edoaijaig iran nemehe ihlup, is um aheca ura aien.

32 Is wat jupura, wat ete nagesega, eris imyiapan ra asega ehelen ara eris emehe ara, im lep ra eris amen ira ra a ilpu agelo has.

33 Eris um asjapicnaig an neucse neom a nup an nuarin-pece iyehki asega.

34 Is ago cehcehe atimi is ahinag aien, is acheiachei jipe nemehe ira ra, um ahlo ilpu agelo has is ahinag; um acaiji ilpu agelo has mika eri jim aniv yin.

35 Is wat athlut nadiat an tak apnyin, is aiji aien, um alau ijo, um apan an nuarin namasacen, um alaigaheni eahki.

36 Is apitac yin a Saimona im lep ra eris amen ehelen ara.

37 Eris wat ecet yin ara, eris ika ehelen ara, Era ahilek euc natimi asega.

38 Is um ika ehele ra aien, Ti apan akaija irai iji uari-pece ubutpotet, ki asuptecnaig intas ehele ra ainyak: kis ham ainyak va nauritai ineigki.

39 Is esege aien irai eom alaigaheni ura an *pece* Calili asega, um ahlo ilpu agelo has.

40 Is han ehelen natimi lepros is ethi, um ugni yin, um atpuse an nuhup o un, um ika ehelen, El et merit aiek, na emda aiek par ago adicinadicin nyak.

41 Is aiheuc *vai yin* a Iesu, um adan nikman, um atcei pan yin, um ika ehelen, Ek merit ainyak; namu adicinadicin aiek.

42 Is wat tas aien, is um auroauro naleprose um edoaijaig iran, is um adicinadicin aien.

43 Is acaiji emda yin aien, um abrai yin mika yi atga o un;

44 um ika ehelen, Jim asuptecnaig ehele atimi aiek: jam atga unyum aiek, um apan, um ehvai euc ehele natimi ahlap, um ahlap irai itai iji eigki is asaig a Moses, vai incehcehe unyum, nitai asuptecnaig imi ra.

45 Ja is wat alau ijo aien, is tas alupas aien um asuptecnaig nitai ineigki, va nedo ineigki is ehka vai *Iesu* napanvaig an nuarin-pece iyehki an nuhup u atimi, ja is amen aien irai uari amasacen; eris ahes irai iji uari pece asega natimi, um ahtag pan ehelen.

NUARIN-TAS ALUPAS 2.

IS wat ti pan itac nadiat *is eti elpat*, is lep apan aien Kaperneum; eris atahaijeg, nikavaig, is amen aien anliin neom.

2 Eris auroauro atimi is ahinag um asjapicnaig, is um ti nuarin ateuc *imi ra anliin neom*, im lep an neucse neom: is asuptecnaig intas imi ra aien.

3 ¶ Eris lep apan ehelen ara, um apos natimi is ethi, is emehe aien va napalse, eris ahlesahles yin natimi is emanohwan.

4 Is ehka vai ra inyetpanvaig ehelen va atimi is ahinag, ja eris um alcapdicraig nuarin neom ijinies ara, is amen iran aien, um atise nitai ahled ineig, is asjeuc iran natimi emehe va napalse, an mun neom ineig, eris ago ara.

5 Is wat ecetai nimyüsjis ninivaijeg ura a Iesu, is um ika aien ehele natimi emehe va napalse, Ak inhal *unyak*, eh mun iknipagki nedo has unyum.

6 Eris amen eahki nahaiji ilpu atimi esege, is ika inliinmopura ara,

7 Et auri natimi ineigki par asan tas has esjilid? et emda ache a Atua par iknipagki nedo has.

8 Is um tup ispan ato a Iesu mika eris aktaktai is nece inliinmopura, is ika ehele ra aien, Eka auri aijaua par aktaktai nitai iji eigki anliinmopomia?

9 et tup upene nikavaig ehele natimi emehe va napalse, Eh mun iknipagki nedo has unyum; ka nikavaig, Atidai aiek, um leh nitai ahled unyum, um atga?

10 im lep ineig, mika aki ato aijaua, nikavaig, et emda a Inhal o natimi an nobolitan par iknipagki nedo has, (is ika aien ehele natimi emehe va napalse.)

11 Ek ika ehelum ainyak, Atidai aiek, um leh nitai ahled unyum,

um atga unyum, um apan an neom unyum.

12 Is um auroauro aien um atidai, um leh nitai ahled o un, um atga o un an nuhup ura asega; eris um imyiali ara asega, um imyahpas Atua, um ika, Intis idim eti almoi nedo ineigki akaija itu acen.

13 Is um lep ehichos pok aien an nohmunjop; eris asjapicnaig pan ehelen natimi asega eris ahinag ara, is esege imi ra aien.

14 Is wat atga aien, um ecet Livai inhal o Alfius nateucvaig an neom asjapicnaig mune iran, um ika ehelen, Ahced nyak aiek. Is um atidai aien, um ahced yin.

15 Is wat ateuc a *Iesu* anliin neom o *Livai*, um hag, eris lep ateuc ehele Iesu im lep ilpu atimi atahaijeg yin, a ilpu atimi akwanaham im ilpu atimi auatatimi is ahinag; eris ahinag ara um ahced yin.

16 Eris wat alum yin a ilpu atimi esege im ilpu Farisi nehrihagvaig im ilpu atimi akwanaham im ilpu atimi auatatimi, eris ika ara ehele ilpu atimi atahaijeg yin, Et auri aien par ehrihag um umwig aien im ilpu atimi akwanaham im ilpu atimi auatatimi?

17 Is wat atahaijeg *intas ura* a Iesu, is ika ehele ra aien, Er eti ika ehele natimi atipagki nemehe yi aminjinai ra era celcehe ara, ja ara ache era emehe ara: kis eti ham ainyak par ahlaig vai ilpu atimi upene, ja vai ilpu atimi auatatimi ache, mika eri adumoj anliinmopura ara.

18 Eris atwakam a ilpu atimi atahaijeg Joanes im ilpu Farisi: eris asjapicnaig pan ehelen ara, um ika, Era auri a ilpu atimi atahaijeg Joanes im ilpu Farisi par atwakam, ja era eti atwakam a ilpu atimi atahaijeg euc?

19 Is ika ehele ra a Iesu, Era atwakam a ilpu alaig o natimi leh ehgan, an namen u natimi leh ehgan ehele ra, ka o'o? et ehka vai ra

natwakamvaig an namen u natimi leh ehgan ehele ra :

20 ja etpu yetpani nadiat iji *ehki* uhu wit atipagki natimi leh ehgan ira ra, erupu atwakam ara ira adiat iji *ehki*.

21 Et eti ijei pan inuarin napelumai mat tah natimi an mohtan napelumai : va yi jim ruhra inmohtan *napelumai* va nuarin *napelumai* mat, um ahpati alupas.

22 Et eti atladwi waina mat tah natimi irai hubej itu acen ; va yi jim atpoijej inhubej vai waina mat, um elel waina, um takitai inhubej : ja er idim atladwi waina mat irai hubej mat.

23 AN nadiat atumop is ethi is atga aien irai lelahapol hwiit ; eris wat atga ara, eris aldei nohoai hwiit a ilpu atimi atahaijeg yin.

24 Eris um ika ehelen a ilpu Farisi, Era auri ara par ago nedo ineigki an nadiat atumop et itaup ?

25 Is um ika ehele ra aien, Akis idim esvi intas va nedo o Tevit aijaua, an tivaig *nitai caig* incan um ehtelee yin, aien im lep ra eris ahced yin ara :

26 is apan aien anliin neom o Atua, an naopan iyehki is atimi esjilid an nahlap a Abaiadar, um caig nareto ineig eris ahlap iran, eris caig a ilpu atimi ahlap ache, is itaup vai tup atimi, um lep alaa ra eris ahced yin ara.

27 Is ika ehele ra aien, Eris ati nadiat atumop va atimi, jam eti *ago* atimi va nadiat atumop :

28 et idim Atimarid an nadiat atumop a Inhal o natimi.

NUARIN-TAS ALUPAS 3.

IS lep apan aien anliin neom alaighaheni ; is amen eahki natimi is ethi is urauo nikman.

2 Eris imyiiris yin ara, kit inyi ago cehcehe yin aien an nadiat atumop,

mika erupu atijai itai iran ara.

3 Is ika aien ehele natimi urauo nikman, Aihio aiek igcaki.

4 Is ika ehele ra aien, Et upene nagovaig nedo upene an nadiat atumop, ka nagovaig nedo has ? nimyiatamaig atimi vaig, ka nauahias ra vaig ? Ja eris eti tas ara.

5 Is edemda vai ra aien, um aijidjid ra um arahed, is taigtaig aien va nipjin u inliinnopura, um ika ehele natimi iyehki, Namu atgeig yapidi nikmam aiek. Is um atgeig yapidi *nikman* aien : is um upene nikman um idivaig nahaijin *nikman*.

6 Eris um alau ijo a ilpu Farisi, um auroauro um tas ehele ilpu atimi leh imi Herot vai yin, mika eri atgei yin.

7 JA is um atga o un a Iesu im lep ilpu atimi atahaijeg yin, um apan u injop : eris ahes Calili atimi is ahinag, um apitac yin, im lep *nupu* Jutaia,

8 im *nupu* Jerusalem, im *nup* Itumia, im *nup* an nahaijin Jortan itac ; im lep *nupu* Tairus im *nupu* Saiton is ahinag, eris wat atahaijeg ara va nitai iji eigki is ago aien, eris asjapicnaig pan ehelen ara.

9 Is um ika aien ehele ilpu atimi atahaijeg yin, eri imyiaitgai yin nalvelcau yi ethi va eri jim atamerit ehelen natimi is ahinag.

10 Is um ago cehcehe atimi is ahinag aien ; va nedo ineigki eris asjapicnaig pan ehelen ara asega eris emehe ara, mika eri atcei pan yin ara.

11 Eris wat ecet yin a ilpu agelo has, eris eropropse an nuhup o un ara, um ahlaig ijinies, um ika, Nai Hal o Atua aiek.

12 Is um acaiji emda ra aien mika eri jim aniv yin ara.

13 Is aridjai aien an nedoon, um ahlaig va *atimi iji eig*, is merit vai ra aien ; eris apan ehelen ara.

14 Is ehta atimi is twelv *ira ra*

aien, mika eri amen ehelen ara, va etpu abraí ra aien mika eri apan ara, um asuptecnaig intas ;

15 *is alupai ra* nemda *aien* mika eri iknipagki nemehe *ira atimi* ara, um ahlo ilpu agelo has :

16 *is anvi* nidai Saimona aien par ika Pitrus ;

17 im Jakobus inhal o Sebetaius, im Joanes etoi Jakobus ; *is anvi* nidarau aien par ika Boanerjes, nesgan tas ineigki, Ohwat hal o in-munuka :

18 im Antrius, im Filipus, im Bardolomius, im Madius, im Tomas, im Jakobus inhal o Alfius, im Dattius, im Saimona natimi leh imi ilpu Selotai,

19 im Jutas nupu Karyot, aien aigki *is aniv yin aien*.

Eris apan ara anliin neom.

20 Eris lep asjapicnaig atimi *is ahinag*, *is ehka inhagvaig vai ra*.

21 Eris wat atahajjeg *intas vai yin* a ilpu atimi ehpan iran, eris apan ara mika eri leh yin ; eris ika ara, Et mun ahnag aien.

22 Eris um ahes Jerusalem a ilpu atimi esege, um apan, um ika, Et amen iran a Belsebub, et ahlo ilpu agelo has aien vai natimarid o ilpu agelo has.

23 *Is asjapicnai ra aien*, um ecsi-pece ehele ra, um ika, Et emda a Satana par ahlo Satana um uauo ?

24 El et ero inliinmopoi nup uran tah nelcau, inyi ti amen nelcau iyelki.

25 El et ero inliinmopoi nup uran tah nimmim, inyi ti amen nimmim iyelki.

26 El et auahas *nelcau* o un a Satana, um ero inliinmopon, inyi ti amen aien, ja etpu ti aien.

27 Et ehka vaig tah natimi napanvaig anliin neom o natimi emda, um tup leh inpadiag o un *ehelen* ; ja el et upyi hup aien um arore natimi emda, etpu tup upene inleucosevaig *itai* anliin neom o un.

28 Et inivaijec ineig ek asaig ehe-

lemia ainyak mika, Uhpu eti aru nedo has asega ira atimi, im lep intas has ura :

29 ja aien et asan tas has aien va Nesgan Upene, uhpu idim aru nedo has o un, etpu erekinman iran aien irai iji mesese.

30 *Is um ucce intas o un* va nedo ura, nikavaig, eris ika ara, Et amen iran a nagelo has.

31 Eris han a ilpu etoan im risin, um aiji ijo, um abraig tah, mika yi ahlaig vai yin.

32 Eris ateuc arahed iran atimi *is ahinag*, um ika ehelen, Era idim amen ijo a risum im ilpu etoam, um ahilek euc.

33 *Is tas ehele ra aien*, um ika, Risik im ilpu etoak di ?

34 *Is aijidjid ra sji ehki aien eris* ateuc arahed iran ara, um ika, Alum risik aijaua im ilpu etoak !

35 aien et imyiaiji intas o Atua aien, et etoak aien, um atahaig irak, um risik.

NUARIN-TAS ALUPAS 4.

IS um lep atupun aien um esege an nohmunjop : eris asjapicnaig pan ehelen natimi *is ahinag*, *is um aijjai pok an jop aien*, um ateuc an nelcau ; eris amen an nimtidin natimi asega, eris ahinag ara.

2 *Is esege imi ra aien um ecsi-pece* irai iji itai *is ahinag*, um ika ehele ra an nesege o un,

3 Akunuu atahajjeg aijaua ; *Is apan natimi ahapol is ethi par* ahoaig upsi itai :

4 *is wat ahoaig aien*, *is um elel nahaiji nupsi itai* an nahaijin nefa-laig, eris ahitag pan inman um hegaig.

5 *Is um lep elel nahaijin irai uarin* eteuc nilpauhat iran, ja *is haklin nobohtan iran* ; *is eti laulau um edel*, *is haklin nobohtan iran* :

6 ja *is wat aridjai nagesega*, *is um imlai*, um mese, *is eti eteuc* necvan.

7 Is um lep eled nahaijin irai efelelicai has, is um ededel nefelelicai has, um atgei, is um eti oho.

8 Is um lep eled nahaijin an nobohtan upene, is um oho um ahinag nohoan, is eteuc *nohoan* is dirte iran is ethi, im sikste iran is ethi, im wun huntret iran is ethi.

9 Is um ika ehele ra aien, Aien et eteuc intikgan aien par ahgei itai, etmu atahaijeg aien.

10 Is wat echimi amen aien, eris ahodai yin a ilpu atimi ahced yin im lep natimi is twelv va nesgan tas ecsipece ineigki.

11 Is um ika ehele ra aien, Eh mun alupai caua mika aki ato aijaua niji itai adenaig an nelcau o Atua: ja eh mun asaig nitai iji egki asega irai tas ecsipece ehele tak atimi:

12 mika eri almoi ara, jam eti ato; um atahaijeg, jam eti alaijeg *iran*; va eri jim adumoj pam ara, um eti leh neruvan nedo has ura.

13 Is um ika ehele ra aien, El eka eti ato intas ecsipece ineigki aijaua, akupu ehvato intas ecsipece asega aijaua?

14 *Et idivaig* natimi alapol a natimi ineig et ahoaig intas aien.

15 Ara era idivaig nahaijin nefalaig ara, eris ahoaig intas iran; ara aigki era atahaijeg ara, ja et auroauro a Satana um atipagki intas eris ahoaig anliinmopura.

16 Ara era idivaig nuarin eteuc nilpauhat iran ara, eris ahoaig upsi itai iran; ara aigki era atahaijeg intas ara, um auroauro um leh, um imyiacitak;

17 ja et eti eteuc necvan *tas* ira ra, era et elvamen ara yi itu ira ra: et wat aridjai nohocred im nedemda *vai ra vai* intas, era auroauro ara um adumoj.

18 Ara era idivaig nuarin et eteuc nefelelicai has iran ara, eris ahoaig upsi itai iran; ara aigki era atahaijeg intas ara,

19 ja et asuol inliinmopura nak-

taktai niji itai an nobohtan ineigki, im inpadiaig efaifa, im nedo ahvig intak itai, um atgei intas, et um eti oho.

20 Ara era idivaig nobohtan upene ara, eris ahoaig upsi itai iran; ara aigki era atahaijeg intas ara, um leh, um oho, et eteuc nohoan is dirte iran tali ra, im sikste iran tali ra, im wun huntret iran tali ra.

21 Is ika ehele ra aien, Er eti leh incop alahala, um atise ithan nipjin-itai, ka ithan tinan, ja er atijai an nitai at incop alahala iran.

22 Uhpu ecetai niji itai asega eris adenaig, um ato niji itai asega eris adalpoi.

23 Aien et eteuc intikgan aien par ahgei itai, etmu atahaijeg aien.

24 Is um ika ehele ra aien, Akumu aktaktai intas ineig aijaua eka atahaijeg: uhpu alupai caua inyi idivaig eka alupaig *tah* aijaua; etpu esjilid nuarin imi caua eka atahaijeg aijaua.

25 Aien et ikni itai aien, etpu lep leh itai aien; ja aien et eti ikni itai aien, uhpu iknipagki niji itai iran.

26 Is ika aien,

Nelcau o Atua et idivaig natimi is ethi is ahoaig upsi itai aien uman;

27 is umjeg aien an nepeig, um aiji an nadiat, is um ededel upsi itai, um ujipsotan, ja is eti almoi aien nedelvaig:

28 et tup edel nohoai itai an nobohtan; et uhup nerin, im lep intisian, ja par apitac um metto nohoan:

29 et wat metto nohoan, era auroauro natimi um aldei an naopan ineig, er asjapicnaig nohoai itai iran.

30 Is lep ika aien, Et idivanhe nelcau o Atua? inti asaig neveh tas ecsipece akaija par asuptecnaig?

31 Et idivaig nupsi mustart, eh wat ahoaig an nobohtan, et esjilid neklin haklin o un irai upsi itai asega an nobohtan;

32 ja eh wat ahoaig, et um ahlan ohua, um esjilid irai efelelicai asega,

um atgeig jipe inran alupas; era amen inman an naiyu iran.

33 Eris wat atahajjeg emda ara, is asuptecnaig intas ehele ra aien an tas ecsipece is ahinag is lep idivaig *ji eigki*;

34 is tas ehele ra aien irai tas ecsipece ache: ja eris wat echim amen ara, is asuptecnaig niji itai asega ehele ilpu atimi atahajjeg yin aien.

35 AN nadiat iyehki, is wat jupura, is ika ehele ra aien, Ti apan akaija an nahaijin eahki.

36 Eris wat imyiterimterim atimi is ahinag ara, eris auroauro ara um leh yin an nelcau. Is ahced yin intak alvelcau.

37 Is um ucjum pam nehio alupas, um auaijai nelcau va epeau, um ahga nelcau.

38 Is umjeg aien an nilpun nelcau itac, *um ilaig* an nitai ilaig; eris ahugni yiu ara, um ika ehelen, Ak Natimi esege, na eti aktaktai cama aiek: intumu emesmas akaija.

39 Is um atidai aien, um acaiji nintinjop, um ika ehele injop, Eigpa aiek, um esjaig. Is um esjaig nintinjop, um esjilid neigpa.

40 Is ika ehele ra aien, Eka imtitaig aijaua vanhe? eka auri aijaua par eti imyisjis ninivaijec?

41 Eris imtitaig alupas ara, um ika sjipec ehele ra, Et echamecha natimi ineigki, et imyiaiji intas o un nintinjop um injop?

NAURIN-TAS ALUPAS 5.

EERIS apan ara an jop, um apahai an nahaijin eahki an pece Catara.

2 Is wat ahes an nelcau aien um asuol, is aubillid yin natimi is ethi, is ahes aien irai mai ij eris ikni atimi emesmas iran, is amen iran a nagelo has;

3 is amen aien irai mai ij iji ehki; is ehka vaig tah narore yin vaig irai atau hat:

4 eris ehcahinag arore yin irai jaula im lep natau hat, is um atgeig yamud atau hat aien, um asjamud jaula: is ehka vaig tah nacaiji yin vaig mika yi eropse:

5 is amen aien irai iji epeig, im lep niji adiat, irai lola edoon, im lep irai mai iji, um aunyauwaig, um atcapisji yin irai hat.

6 Ja is wat ecet Iesu aien itac acen, is athut aien, um atpuse an nuhup o un,

7 um ahlaig ijinies, um ika, Nai merit aiek vanhe chelek, ak Iesu, Inhal o Atua esjilid? ek ugni euc ainyak vai Atua, mika an jim abli nyak aiek.

8 Is um ika ehelen aien, Namu atcejai natimi ineigki aiek, ak nagelo has.

9 Is ahodai yin aien, *um ika*, Nidam di? Is asuptecnaig aien, um ika, Nidak Lijon: eca ahinag aijama.

10 Is ugni emda yin aien mika yi jim abrai ra, eri ude inpece iyehki ara.

11 Eris amen picad is ahinag ubutpotet u lola edoon, um hag.

12 Eris ugni yin a ilpu agelo has asega, um ika, Abrai cama aiek mika ecri ahei picad aijama.

13 Is auroauro a Iesu um abrai ra. Eris atcejai yin a ilpu agelo has um ahei picad; eris um athut picad an nohmun isas, um elilelase an jop, (eris tu dausant ara,) eris um atpoijej ara an jop.

14 Eris um aha a ilpu atimi aminjinaig picad, um asuptecnaig an nuarin-pece, im lep an pece iyehki asega. Eris apan ara mika eri almoi nedo ineigki.

15 Eris apan ehele Iesu ara, um almoi natimi iyehki is ahei yin a nagelo has um amen iran Lijon, is ateuc aien, um aso yin an napeluma, is mun eteuc lelen aien; eris um imtitaig ara.

16 Ara eris almoi ara, eris asuptecnaig nitai ineigki ehele ra sji ehki ara, eris ago irai natimi ineig,

is amen iran a nagelo has, im lep vai picad.

17 Eris ugni yin ara mika yi atga o un aien, um ude inpece ura.

18 Is wat aridjai aien an nelcau, is um ugni yin a natimi iyehki is amen iran a nagelo has, mika yi ahced yin.

19 Ja is acaiji yin a Iesu, um ika ehelen, Apan aiek an nimmim unyum chele ilpu atimi ehpan iram, um asuptecnaig elele ra nedo emda iram et mun ago a Natimarid, im naiheuc vai euc o un.

20 Is um atga o un aien, um apan Tikapolis, um asuptecnaig nedo emda o Iesu iran: eris imyiali natimi asega.

21 IS lep atga a Iesu an nelcau, um lep apahai an nahaijin eabki, eris asjapicnaig pan ehelen natimi is ahinag; is amen aien u injop.

22 Is um han *ehelen* natimi alupas an neom alaigaheni is ethi, nidan Jerus; is wat ecet yin aien, is atpuse u neduon aien,

23 um ugni emda yin, um ika, Et mun ubutpotet o unmas o unhalav atahaig unyak: *ek ugni euc ainyak* mika an apam aiek, um atijai nikmam iran, mika yi cehcehe aien; etpu umoh aien.

24 Is um ahced yin a *Iesu*; eris apitac yin natimi is ahinag, um atamerit ehelen.

25 Im lep ineig, intakata is ethi, is emehe aien va nahlamerau uinja an mesese is twelv,

26 is alupas nohocred o un vai ilpu atimi atipagki nemehe is ahinag, is um ahtai ehni inpadiaig o un aien, jam eti umoh, ja is esjilid nemehe iran.

27 Is wat atahaijeg vai Iesu aien, is apan aien irai ibla atimi is ahinag an cehen, um atcei pan napelumai iran.

28 Is ika aien, El ek atcei pan napelumai iran ainyak, el ek par umoh ainyak.

29 Is eti laulau um ame nahlamerau uinja iran; is ato nohun aien, nikavaig, is mun ti nemehe has iran.

30 Is auroauro a Iesu um tup ispan ato, nikavaig, is ahes iran nemda, is ahidai yin aien irai ibla atimi is ahinag, um ika, Et atcei pan napelumai irak a di?

31 Eris ika ehelen a ilpu atimi atahaijeg yin, Na alum atimi et ahinag aiek era atamerit ehelum ara, na auri aiek par ika, Et atcei pan napelumai irak a di?

32 Is um ahidai yin aien mika yi alum yin, is ago nedo ineigki.

33 Ja is ato nitai iyehki eris ago iran a intakata, is imtitaig aien, um ucjucjucaij, um apan, um atpuse an nuhup o un, um asuptecnaig inivaijec nedo o un.

34 Is um ika ehelen aien, Ak intakata ineigki, na mun lep cehcehe aiek va ninyiisjis ninivaijec unyum; eklim atga unyum aiek, et mun edoaijaig iram aiek va nemehe has iram.

35 Is wat tas aien, eris ahes *hal an nimmim* o natimi alupas an neom alaigaheni um apan, um ika, Et mun mas inhal unyum; jim imyidohalav Natimi esege aiek.

36 Is wat atahaijeg intas ineigki a Iesu eris asaig ara, is ika ehelen natimi alupas an neom alaigaheni aien, Jim imtitaig aiek, jam imyisjis ninivaijec ache.

37 Is acaiji atimi aien mika eri jim apitac yin, echim ahtaij ache, Pitrus, im Jakobus, im Joanes etoai Jakobus.

38 Is yetpan aien an neom o natimi alupas an neom alaigaheni, um alum ra nehteigtaigvaig, eris imyitaig yin ara, um taig tas ijinies.

39 Is wat apan aien anliin neom, is ika ehelen ra aien, Eka auri aijaua par cheigtaig, um imyitaig yin? et eti mas natahaig ineigki, et umjeg aien.

40 Eris imyilav yin ara. Ja is

abrai ra asega aien mika eri alau ijo, is leh etman aien im risi natahaig, im lep ra eris ahced yin ara, um apan au nuarin ineig is asjeuc iran natahaig iyehki.

41 Is arapse va nikmai natahaig aien, um ika ehelen, Talida Kuma; nesgan tas ineigki, Ak natahaig ineigki, ek asaig ehelum ainyak mika an atidai aiek.

42 Is auroauro natahaig iyehki um atidai, um atga; is twelv mese iran. Eris imyiali alupas ara.

43 Is acaiji emda ra aien mika eri jim asuptecnaig nedo ineigki ehele atimi; is ika aien, eri alaan tah nitai caig.

NUARIN-TAS ALUPAS 6.

IS ahes eahki aien, um atga o un, um apan an pece o un; eris ahced yin a ilpu atimi atahajeg yin.

2 Is wat yetpam nadiat atumop, is esege *imi ra* aien anliin neom alaigaheni: eris atahajeg *yin* natimi is ahinag, um imyiali, um ika, Et leh nitai iji eigki eda a natimi ineigki? nev arapakau ineigki eris alupai yin, mika yi ago nauritai esjilid iji eigki an nikman aien?

3 Et idim atimi aredcai aien, um hal o Mere, um etoi Jakobus, im Joses, im Juta, im Saimona; era amen eheleija a ilpu atahaig iran. Eris esjum vai yin ara.

4 Ja is ika ehele ra a Iesu, Era eti eccen vaig tah naprofeta nup uran pece o un ache, im ilpu atimi ehpan iran, im lep ra an nimmim o un.

5 Is ehka vai yin nagovaig tah nauritai esjilid eahki, ja is atijai nikman aien ira atimi emehe is eti elpat, um ago cehcehe *ra*.

6 Is um imyiali aien va nimyiisjis nahcil ura. Is apan aien irai iji uari-pece marahed mihtag, um esege.

7 IS asjapicnaig atimi is twelv *ehelen* aien, um atupun um abrai ra,

mika eri apan ara um aro maro ehni; is alupai ra nemda aien, mika eri esjilid irai ilpu agelo has ara;

8 is acaiji ra aien mika eri jim apos itai ara an nefalaig, nitai iseuc ache; jim *apos* nefehcat, im nitai caig, im mune an nitai ahid *ura*:

9 jam atohoaig eduora irai cedpai eduora; um jim aso ra irai apelu-mai yi ero.

10 Is ika ehele ra aien, Aku wit apan aijaua anliin neom an tah anuarin, um amen' eahki wat uhum pan naopan ineig aki atga unyimia aijaua.

11 Ara era eti leh caua ara, um eti atahajeg intas unyimia, aku wit ahes eahki aijaua, wat ika aki atga unyimia, um ucjucjai oboltan irai eduomia, nitai asuptecnaig imi ra. Et inivajec ineig ek asaig ehelemia ainyak mika, Inyi tintin nohocred o *nupu* Sotom im *nupu* Comora an nadiat ahmaijidjid, ja etpu esjilid nohocred o *nup* uran nuarin-pece iyehki.

12 Eris apan ara um tas *ehele atimi*, mika eri adumoij anliinmopura ara.

13 Eris ahlo ilpu agelo has is ahinag ara, um aspi naraki ira atimi emehe is ahinag, um ago cehcehe *ra*.

14 Is atahajeg *intas vai yin* a Herot natimarid: (is apaahni nidan:) is ika aien, Et mun lep nusjai Joanes Natimi baptiso, et ago niji auritai esjilid aien.

15 Eris ika nahaiji ra, Elaija neigki. Eris ika nahaiji ra, Naprofeta neigki, et idivaig tah irai ilpu profeta aien.

16 Ja is wat atahajeg *intas ura* a Herot, is um ika aien, Joanes neigki, kis auud yamud nidjinin ainyak; et mun lep nusjai aien.

17 IS upyi abrai atimi a Herot mika eri arop irai Joanes, um arore yin, um ati yin anliin neom ipjin, va Herotyas ehgai Filipus etoan; is leh yin aien ehgan.

18 Is ika ehele Herot a Joanes,

Et itaup vai euc inlehvaig ehgai etoam.

19 Is um edemda vai yin a Herotyas, um ika yi atgei yin; ja is ehka vai yin:

20 is imtitai Joanes a Herot, is ato aien, nikavaig, is atimi upene aien, um atoh nedo o un, is aminjinaig yin aien, um atahaijeg yin, um ago nedo *upene* is ahinag, um imyiacitak vai intas o un.

21 An nadiat upene vaig is ethi, nadiat eris apos Herot iran, is auanetha alupas aien incai ilpu atimi alupas o un, im ilpu atimarid, im ilpu atimi ikni itai an *pece* Calili;

22 is apan anliin *neom* a inhalav atahaig o Herotyas, um adekdikjai, is um imyiacitak inliinmopoi Herot im lep ra eris atauc ehelen ara, is ika a natimarid ehele natahaig iyehki, Ugni nyak aiek va nitai ineig nai merit vaig aiek, ekpu alupai euc ainyak.

23 Is asig yi aktit ehelen aien, um ika, Ekpu alupai euc nitai ineig ainyak napu ugni nyak vaig aiek, inyi apapa pan an nahaiji nelcau unyak.

24 Is alau ijo aien, um apan ehele risin, um ika, Inki ugni inhe ainyak? Is ika aien, Nidjini Joanes Natimi baptiso.

25 Is auroauro aien um apan ehele natimarid, um ugni *yin*, um ika, Ek merit ainyak mika an auroauro aiek, um alupai nyak nidjini Joanes Natimi baptiso an haklin nelcau.

26 Is taigtaig alupas a natimarid; ja is eti acaiji yin aien vai intas upyi asig yi aktit o un, im lep vai ra eris atauc ehelen ara.

27 Is auroauro a natimarid um abrai naheca is ethi, um ika ehelen yi leh nidjinin: is apan aien anliin *neom* ipjin, um auud yamud nidjinin,

28 um apos nidjinin an haklin nelcau, um alupai natahaig iyehki: is um alupai risin a natahaig.

29 Eris wat atahaijeg a ilpu atimi atahaijeg yin, eris apan ara um

leh nohun, um atise yin an mun nij.

30 ERIS asjapicnaig pan ehele Iesu a ilpu apostolo, um asuptecnaig niji itai asega eris ago ara, im lep nesege ura.

31 Is ika ehele ra aien, Ti echim apan akaija ache an nuarin namasacen, um atumop tintin: is ehka vai ra inliagvaig va atimi is ahinag, eris idumdumoj pan ara *ehele* ra.

32 Eris ateri natga ura ara an nelcau um apahai an nuarin namasacen.

33 Eris wat almoi napan ura natimi, eris ato yin atimi is ahinag, um ahes irai iji uari-pece asega, um athut ubos, um uhup ira ra, um asjapicnaig pan ehelen.

34 Is ahes an *nelcau* a Iesu um asuol, um alum atimi is ahinag, is aiheuc vai ra aien, eris idivaig siip et ti asgi ra ara: is esege imi ra aien niji itai is ahinag.

35 Is wat jupura, eris apan ehelen a ilpu atimi atahaijeg yin, um ika, Et amasacen igcaki, um lep ubutpotet u nepeig:

36 abrai ra aiek mika eri terimterim jipe ara, um apan irai iji uari-pece, im lep tup an *pece* iyehki asega, um auanimtan nitai caig incara: eh ti nitai caig incara ara.

37 Is tas aien, um ika ehele ra, Akumu alaa ra nitai caig aijaua. Eris um ika ehelen ara, Et ehka vai cama napanvaig um ahtai tollar inyi dirte, um auanimtan nitai caig incara.

38 Is ika ehele ra aien, Et ehed nareto unyimia? apan aijaua um almoi. Eris wat almoi ara, um ika, Et faiv *ache*, um ero *ache* numu.

39 Is um ika ehele ra aien, eri ahai atimi asega, um asaig ehele ra, eri ataucse irai efelelicai um esyei ra.

40 Eris um ataucse ara um esyei ra, eris huntret nahaiji ra, im fite nahaiji ra.

41 Is leh nareto is faiv aien, im

numu is ero, um easji pan an nohatag, um naaurineig, um iswoplec-oplec nareto iji ehki, um alupai ilpu atimi atahaijeg yin, mika eri edaig ira ra ara; is lep edaig aien numu erahki ira ra asega.

42 Eris hag ara asega, um gaije.

43 Eris asjapicnaig nuari areto ara im nuari umu eris eti atalmi ara, um atohoaig irai efehcac is twelv, is um ohua.

44 Ara eris hag nareto iji ehki ara eris faiv dausant ara.

45 Is auroauro aien, um ehlig ilpu atimi atahaijeg yin, mika eri aridjai an nelcau ara, um apan an nahaijin jop Bedseta um uhup iran, ja is amen aien, um abrai atimi mika eri atga ura ara.

46 Is abrai ra aien, um aridjai an nedoon, um alaigaheni.

47 Is wat jupura, is amen nelcau an jop, ja is echim amen aien ache ubos.

48 Is alum ra aien eris ahelid emda ara; is has nimtinjop vai ra: is wat athut nadiat, is um apan ehele ra aien, um atga an jop, um ika yi ahtaregdei ra.

49 Ja eris wat ecet yin ara natgavaig an jop, eris aktaktai ara, um ika natmas ineigki, eris aunyauwaig ara:

50 eris ecet yin ara asega, um ehioehio inliinnopura. Is auroauro aien um tas ehele ra, um ika ehele ra, Etmu eropse inliinnoponia aijaua: ainyak aigki; jim imtitaig aijaua.

51 Is um aridjai ehele ra aien an nelcau; is um esjaig: eris imtitaig alupas ara, um imyiali yin.

52 Eris eti aktaktai ara *nedo emda o um irai areto*: is ipjin inliinnopura ara.

53 ERIS apan ara, um apahai an pece Jenesaret.

54 Eris wat ahes an nelcau ara um asuol, eris idim ato yin *atimi*,

55 um athut an pece iyehki asega

um arahed mihtag, um apos pan ra sji eigki irai itai ahled eris emehe ara, an nuarin iyehki eris atahaijeg vai yin iran.

56 Is wat apan aien irai iji uari-pece haklin, im inuari-pece alupas, im lep tup an pece iyehki, eris um ikni atimi emehe ara irai efalaig, um ugni yin mika eri atcei pan intid an napelumai o um ara: ara eris atcei pan yin ara, eris umumoh ara.

NUARIN-TAS ALUPAS 7.

ERIS asjapicnaig pan ehelen a ilpu Farisi, im nahaiji ilpu atimi esege, eris ahes Jerusalem ara.

2 Eris wat alum nahaiji ilpu atimi atahaijeg yin ara inhagvaig jam eti upyi ahisjim, is mun itaup nikmara, eris acaiji *ra* ara.

3 Era imyiaiji intas alep o ilpu atimi tas alep a ilpu Farisi, im nupu Jutaia asega, um upyi hup um ehcahinag ahisjim, ja par hag.

4 Era wit ahes an tiptag ara, era upyi hup ara um ahisjim, ja par hag. Era apol an tas alep ura ara va niji itai et ahinag, nikavaig, eri yiri nipjiitai umwig, im nipjiitai uri wai, im nipjibras, im lep intinan.

5 Eris ahodai yin a ilpu Farisi im ilpu atimi esege, *um ika*, Era auri a ilpu atimi atahaijeg euc par eti imyiaiji intas alep o ilpu atimi tas alep, um eti upyi ahisjim, ja par hag?

6 Is tas aien, um ika ehele ra, Et idim inivaijee intas ineig is upyi aged a Aiseya vai caua, ak ilpu atimi efaifa, um ika, "Era imyiahpas nyak nup igcaki an uipji-neucsera ache, ja et eteuc itac acen inliinnopura vai nyak:

7 um maumau nimyiahpas nyak ura, era esege intas alep o atimi ache ara."

8 Eka imyipalea intas alep o Atua aijaua, um apol an tas alep o atimi,

nikavaig, eri yiri nipjiitai uri wai, im nipjiitai umwig: et idim ucco niji itai et alinag eka ago aijaua.

9 Is um ika ehele ra aien, Eka idim imyipalea intas alep o Atua aijaua, mika aki imyiaiji intas alep unyimia.

10 Is um ika a Moses, "Namu eccen vai etmam im risum aiek": "aien et asan tas has aien ehele etman im risin, inyi idim mas aien."

11 Ja eka ika aijaua, El et ika tah ehele etman im risin, *Et* Korban, nesgan tas ineigki, et itaup *vai Atua*, niji itai unyak, et upene vai caurau; *inyi ti mas aien*.

12 Eka acaiji yin aijaua mika yi jium ago tah nitai aien vai etman im risin;

13 eka auahas intas o Atua aijaua an tas alep iji eigki unyimia, eka asaig aijaua: et idim ucco niji itai et ahinag eka ago aijaua.

14 ¶ Is ahlaig va atimi asega aien, um ika ehele ra, Akumu atahaijeg intas unyak aijaua asega, um ato:

15 et eti auahas atimi nitai iji eigki era hegaig ara: ja et auahas ra nitai iji eigki et ehlohos anliinmopura.

16 Aien et etenc intikgan aien par ahgei itai, etnu atahaijeg aien.

17 Is wat ude atimi asjapicnaig aien um apan anliin neom, eris ahodai yin a ilpu atimi atahaijeg yin vai intas ecsipece ineigki.

18 Is um ika ehele ra aien, Et echamecha inliinmopomia aijaua? eka idim ato aijaua, *nikavaig*, et eti auahas inliinmopoi atimi nitai iji eigki era hegaig ara;

19 et eti asuol *nitai caig* anliinmopura, ja an nipjinetgara ache, er erekhaig an nuarin ikni itai has iran, et par upene nitai caig asega.

20 Is um ika aien, Et auahas atimi nitai iji eigki et ehlohos anliinmopura.

21 Et ehlohos anliinmopoi atimi naktaktai has, ingaijid, nedo has, natgei atmas,

22 nehneg itai, inmerit vai inpadiaig, nauatatimi, nefaifa, nahvig niji itai has, nauatitai, intas has, nedo ijinies, nedo ahnag:

23 et ehlohos nitai iji eigki asega anliinmopoi atimi, um auahas ra.

24 IS ahes eahki aien, um apan irai uari pece Tairus im Saiton, is apan aien anliin neom is ethi, um merit mika yi jim ato tah: ja is ehka vai yin nechim amenvaig.

25 Is atahaijeg intas vai yin intakata is ethi, is amen nagelo has irai inhalav atahaiig o un, is han aien um atpuse u neduon:

26 is takata Crisi aien, ja eris apos yin Sairofinaisi; is ugni yin aien mika yi ahlo nagelo has irai inhal o un.

27 Is um ika ehelen a Iesu, Erumu uhup a ilpu halav um gaije: et eti upene inlehvaig nitai caig o ilpu halav, um alayi kuri.

28 Is um tas aien, um ika ehelen, Et idim inivaijec, ak Natimarid: ja era hegaig nahri itai hegaig o ilpu halav kuri ithan nitai hag.

29 Is ika ehelen aien, Atga unyum aiek, vai intas ineigki; et mun atcejai inhal unyum a nagelo has.

30 Is wat apan aien anliin neom o un, is ecet inhal o un aien, is asjeuc aien an tinan, is mun atcejai yin a nagelo has.

31 IS lep ahes aien irai uari pece Tairus im Saiton, um atga irai iji uari pece an *pece* Tikapolis, um apan u injop Calili.

32 Eris imyiapan ehelen natimi is ethi ara, is ucjipines intikgan aien um pop; eris ugni yin ara mika yi atijai nikman iran.

33 Is leh yin aien ehele atimi is ahinag um imyiapan yin an taka uarin, um ati nupsikman ero an tikgan ero, um agdei *yin*, um atcei pan nipjineucsen;

34 um easji pan an nohatag, um adeijai yin, um ika ehelen,

Eftada, nesgan tas ineigki, Etmu ejose *intikgam* aiek.

35 Is eti laulau um ejose intikgan aien, um upene nipjiuecsen, is um tas upene aien.

36 Is acaiji ra aien mika eri jim asaig ehele atimi ara: ja is wat acaiji emda ra aien, is esjilid ninyiisjis ura ara um asuptecnaig;

37 is esjilid acen ninyiali ura ara, um ika, Et idim ago upene niji itai asega aien: et ika aien eri abgei itai a ilpu atimi ucjapines intikgara, um tas a ilpu atimi pop.

NUARIN-TAS ALUPAS 8.

AN naopan iyelki eris asjapicnaig natimi is alinag, jam eti apos nitai caig incara, is ahlaig vai ilpu atimi atahaijeg yin a Iesu, um ika ehele ra,

2 Ek aiheuc va atimi iji eigki ainyak, era amen ehelek an nadiat et esejj, ja et ti nitai caig incara:

3 el ek abrai ra ainyak mika eri apan ara irai innim ura jam eti hag, inyi isji ra ara numlaig an nef-laig: eris alhes irai iji uari pece itac acen a ilpu ahaiji ra.

4 Eris um ika ehelen a ilpu atimi atahaijeg yin, Inyi leh nitai caig eda tah par alaa atimi iji eigki an namas-acen ineigki?

5 Is ika ehele ra aien, Et ehed nareto unyimia aijaua? Eris um ika ara, Et seven *ache*.

6 Is abrai atimi iji eigki aien mika eri ateucse ara an nobohtan: is leh nareto is seven aien, um naaurineig, um iswoplecoplec, um alupai ilpu atimi atahaijeg yin, mika eri alaa *ra*; eris um alaa atimi asjapicnaig ara.

7 Is lep amen ehele ra inhakli numu jam eti elpat: is naaurineig aien, um ika, eri lep alaa ra.

8 Eris um hag ara, um gaije: eris asjapicnaig ara nuari itai hegaig eris eti atalini, irai efcheat is seven.

9 Ara eris hag ara eris idivaig eris for dausant ara: ja is par ad-caijai ra aien.

10 ¶ Is auroauro aien um aridjai an nelcau, im lep ilpu atimi atahaijeg yin, um apan irai iji uari pece Talmánuda.

11 Eris alau ijo a ilpu Farisi, um atupun um imyiisjis itai iran, um ugni yin mika yi ehvaig nauritai ehka an nohatag aien, eris oop yin ara.

12 Is efadeijai yin aien an nesgan, um ika, Era auri natimi an naopan ineig par ugni nauritai ehka? et inivaijeg ineig ek asaig ehelemia ainyak mika, Eri eti ecetai nauritai ehka natimi an naopan ineig.

13 Is ude ra aien, um lep aridjai an nelcau, um atga o un, um apan alaig an nahaijin eahki.

14 Eris eti imyielhva nareto *a ilpu atimi atahaijeg yin* par apos, is amen ehele ra an nelcau nareto is ethi ache.

15 Is ated ra aien, um ika, Akumu aminjinai caua aijaua, um jim leh leven o ilpu Farisi, im lep leven o Herot.

16 Eris um tas jipe ehele ra ara, um ika, *Et asan tas ineigki aien* va nedo uja, nikavaig, inta mun eti apos nareto akaija.

17 Is wat ato a Iesu, is ika ehele ra aien, Eka auri aijaua par tas jipe ehelemia, um ika, Inta mun eti apos nareto akaija? eka ato itai aijaua, um aktaktai, ka o'o? et echamecha inliinmopomia aijaua um ulum pam?

18 Et eteuc nesganimtamia, ja eka eti alum itai aijaua; um eteuc intikgamia, ja eka eti abgei itai aijaua, um eti imyielhva itai.

19 Kis wat iswoplecoplec nareto is ikman ainyak um alaa atimi is faiv dausant, akis asjapicnaig nuari itai hegaig is aled aijaua, um atohoaig irai efcheat is ehed? Eris um ika ehelen ara, Is twelv.

20 Im lep ineig, is wat seven *nareto* par alaa atimi is for dausant, akis asjapicnaig nuari itai hegaig

is aled aijaua, um atohoaig irai efehcat is ehed? Eris um ika ara, Is seven.

21 Is um ika ehele ra aien, Eka auri aijaua par eti aktaktai?

22 IS apan aien Bedseta; eris imyiapan ehelen natimi is ethi ara is aupat nesganimtan, eris ugni yin ara mika yi atcei pan yin.

23 Is asjiraig nikmai natimi iyehki aien is aupat nesganimtan, um imyiapan yin an taka uarin; is agdei nesganimtan aien, um atijai nikman iran, um ika ehelen, Na mun ecetai tah nitai aiek, ka o'o?

24 Is um asalgei nesganimtan aien, um ika, Ek alum atimi atga ainyak, ja era idivaig nauicai ara.

25 Is um lep atijai nikman an nesganimtan aien, um ika ehelen yi lep asalgei; is um lah upene nesganimtan aien, is um almuktit atimi asega aien.

26 Is abrai yin aien mika yi apan an nimmim o un, um ika, Jim apan an nuarin-pece ineigki, um jim asup-tecnaig ehelen tah an nuarin-pece.

27 IS apan a Iesu irai iji uari-pece Sisaria Filipai, im lep ilpu atimi atahaijeg yin: eris wat atga ara an nefalaig, is ahodai ilpu atimi atahaijeg yin aien, um ika ehele ra, Era ika atimi ainyak di aigki?

28 Eris ika ara, Nai Joanes aiek Natimi baptiso: ja era ika nahaiji ra, Elaija; um lep ika nahaiji ra, Tah irai ilpu profeta.

29 Is um ika ehele ra aien, Eka ika aijaua ainyak di aigki? Is tas a Pitrus, um ika ehelen, Nai Kristo aiek.

30 Is acaiji ra aien mika eri jim aniv yin ehelen tah natimi.

31 Is atupun aien um esege imi ra, um ika, Etpu idim ahinag nohoered u Inhal o natimi; erupu amcel vai yin a ilpu atimi tas alep, im ilpu atimi ahlap esjilid, im ilpu atimi esege; uhpu atgei yin, ja et wit

ti pan itac nadiat inyi eseij, etpu lep nusjai aien.

32 Is asan tas ineigki aien, jam eti anvadenaig. Is leh yin a Pitrus, um acaiji yin.

33 Ja is ahidai yin aien, um almaijidjid ilpu atimi atahaijeg yin, um acaiji Pitrus, um ika, Apan aiek an nidjik, ak Satana; na eti aktaktai aiek niji itai o Atua, jam aktaktai ache niji itai o atimi.

34 ¶ Is ahlaig va atimi is ahinag aien, im lep ilpu atimi atahaijeg yin, um ika ehele ra, Aien et ika aien yi ahced nyak, etmu ude nedo ineig aien et merit vaig aien, um apos nauincei atgeig o un, um ahced nyak.

35 Aien et imyicoho yin aien, etpu mas aien; ja aien inyi mas aien vai nyak im lep vai intas-upene, inyi umoh aien.

36 Et eti upene vaig tah natimi inlehvaig nobohtan asega, um aua-has nesgan.

37 Inyi auanimtan nesgan tah natimi anhe?

38 Aien et imyiehcamaï nyak aien im lep intas unyak an nuhup o ilpu atimi anatatimi, im ilpu atimi ago nedo has an naopan ineig; etpu lep imyiehcamaï yin a Inhal o natimi, et wit yetpam aien an natimi alupas o Etman, im ilpu agelo upene ehelen.

NUARIN-TAS ALUPAS 9.

1 IS um ika ehele ra aien, Et ini-vaijec ineig ek asaig ehelemia ainyak mika, Era aiji igcaki nahaiji atimi, eri upyi hup ara um ecetai nehcohos pam emda u nelcau o Atua, ja par ememas.

2 IS wat ti pan itac nadiat is siks, is leh Pitrus a Iesu, im Jakobus, im Joanes, um imyiaridjai ehtaij an nedoon ijinies is ethi, eris echim amen ara ache: is um lep eche nohun aien an nuhup o ehtaij.

3 Is ememina napelumai iran, is idim ahi, um idivaig sno; et ehka vaig tah natimi yiri apelumai an nobohtan nagovaig yi ahi, um idi-vaig.

4 Erus ehcolios pan ehele ra a Elaija im Moses: erus tas ehele Iesu arau.

5 Is tas a Pitrus, um ika ehele Iesu, Ak Natimi esege, et upene vai caija namenvaig igcaki: ektijmu ago neom yi esei ajumtaij; yi ethi imi euc, um ethi imi Moses, um ethi imi Elaija.

6 Is eti ato intas o un aien par asaig; ehtijis um imtitaig ahtaij.

7 Is um etaluopni pam ehtaij nepeig: is ahes an nepeig nohran tah, um ika, Inhalav cop unyak ineigki: ahtijmu atahaijeg yin ajautaij.

8 Ehtijis um auroauro ahtaij um hedidai ehtaij, um yasyas, jam eti lep ecet tah natimi, is amen ache ehele ehtaij a Iesu.

9 Eris ahes an nedoon ara um asuol; is um acaiji ehtaij aien mika ehtiji jim asuptecnaig ahtaij nitai iji eigki ehtijis ecetai ahtaij, um uhun pan naopan ineig inyi nusjai a Inhal o natimi vai inmas o un.

10 Ehtijis eti asuptecnaig intas iyehki ahtaij, um tas jipe, um ika, Inhe ineigki, nusjai vai inmas?

11 ¶ Ehtijis ahodai yin ahtaij, um ika, Era auri a ilpu atimi esege par ika, inyi uhup a Elaija um ham?

12 Is um tas ehele ehtaij aien, um ika, Et idim uhup a Elaija um ham, um ehteduo niji itai asega; im lep ineig, eris aged vai Inhal o natimi, mika etpu ahinag nohocred o un, uhpu amcel vai yin.

13 Ek idim asaig ehelemitaij ainyak mika, Is mun ham a Elaija itu acen, eris ago vai yin niji itai asega eris merit ara, is idivaig eris upyi hup um aged vai yin.

14 ¶ Is apan aien ehele ilpu atimi atahaijeg yin, um alum atimi is

ahinag ehele ra, im lep ilpu atimi esege ninyiisjis itai vaig ira ra.

15 Eris wat ecet yin atimi asjap-icnaig asega, eris inyiali ara, um auroauro um athut pan *ehelen*, um aiheuc vai yin.

16 Is ahodai ilpu atimi esege aien, *um ika*, Inhe ineigki eka imyiisjis ira ra aijaua?

17 Is um tas natimi is ethi ira ra, um ika, Ak natimi esege, ek mun imyiapam inhalav atamaig unyak ainyak ehelum, et amen iran nagelo has pop;

18 et wat ham iran aien, um aulhainse yin; et ahuya nipjineucsen aien, um ataktit neijin, et um auatalidi aien: ek mun asaig ainyak ehele ilpu atimi atahaijeg euc mika eri ahlo yin; ja era auatalidi ara.

19 Is um tas ehelen aien, um ika, Ak ilpu atimi imyiisjis nahcil, kis amen ehelemia ainyak is itu irak, um eropse inliinmopok ainyak vai caua um itu irak; imyiapam yin ehelek aijaua.

20 Eris imyiapan yin ehelen ara: is wat alum yin aien, is auroauro a nagelo has um auohuoh yin; is eropse an nobohtan aien, um atcelcal, um ahuya nipjineucsen.

21 Is ahodai etman aien, *um ika*, Is leh nitai ineigki aien an nahopan? Is ika aien, An halav o un:

22 is ehcahinag ethaigjai yin aien an cop, um *ethaigse yin* an wai, mika yi anahas yin: el et emda aiek nagovaig tah nitai, aiheuc vai cumran, um atau iramrau.

23 Is ika ehelen a Iesu, El et emda aiek ninyiisjis ninivaijeg vaig, *el ek aiheuc vai caurau ainyak*: et tup upene niji itai asega vai yin et imyiisjis ninivaijeg aien.

24 Is auroauro a etmai inhalav iyehki um ahlaig ijinies, um taig, um ika, Ak Natimarid, ek imyiisjis ninivaijeg ainyak; ago emda inliinmopok auatalidi aiek.

25 Is alum atimi is ahinag a Iesu eris athut pan ara, is acaiji nagelo

has iyehki aien, um ika ehelen, Ak nagelo has pop um ti intikgam, ek ika ehelum ainyak, namu atcejai *yin* aiek, um jim lep ham iran.

26 Is um ahlaig a *nagelo has*, um auohuoh emda yin, um atcejai *yin*, um atga o un: is idivaig natimi mas aien; eris ika atimi is ahinag, Et mun mas aien.

27 Ja is arapse va nikman a Iesu, um alcacse yin; is um atidai aien.

28 Is wat apan aien anliin neom, eris echim ahodai yin a ilpu atimi atahajeg yin, um ika, Ecra auat-alidi aijama nahlo yin vaig vanhe?

29 Is ika ehele ra aien, Er ahlo *ilpu agelo has* idivaig neigki, va nalaigaheni im natwakam ache.

30 ERIS ahes eahki ara, um atga an *pece* Calili; is merit aien mika yi jin ato *yin* tah natimi.

31 Is asuptecnaig ehele ilpu atimi atahajeg yin aien, um ika ehele ra, Eh mun ati Inhal o natimi irai ikma atimi, erupu atgei yin ara; ja uhu wit atgei yin, et wit ti pan itac nadiat inyi eseij, etpu lep nusjai aien.

32 Eris eti ato intas ineigki ara, jam intitaig nahodai yin vaig.

33 ¶ Is yetpan Kaperneum aien: is wat amen aien anliin neom, is ahodai ra aien, um ika, Inhe ineigki eka atga imyiisjis itai vaig aijaua an nefalaig?

34 Eris eti tas ara: va nitai ineig, nikavaig, eris atga imyiisjis itai ara an nefalaig, *um ika*, inyi esjilid tah *ra* a di?

35 Is um ateucse aien, um ahlaig va atimi is twelv, um ika ehele ra, El et merit tah natimi mika yi esjilid ira ra, etpu apitac ira ra asega aien, um aheca ura asega.

36 Is leh inhalav is ethi aien, um ati yin an nuhup ura: is ablim pam yin aien, um ika ehele ra,

37 Aien et leh inhalav et idivaig ineig aien an nidak, et leh nyak

aien; aien et leh nyak aien, et eti leh nyak ache aien, ja *et leh* yin *aien* is abrai nyak aien.

38 ¶ Is tas ehelen a Joanes, um ika, Ak Natimi esege, ecris ecet tah aijama is ahlo ilpu agelo has aien an nidam, jam eti ahced caija; ecris acaiji yin aijama va nedo o un, nikavaig, is eti ahced caija aien.

39 Is um ika a Iesu, Jim açaiji yin aijaua: et ehka vaig tah, et ago nauritai esjilid aien an nidak, par tup asan tas has vai nyak.

40 Aien et eti tak atimi iraija aien, et apa uja aien.

41 Aien et alumamia tah inwai an nipjinitai aien an nidak, mika aki umnyi aijaua, va nitai ineig, nikavaig, eka u Kristo aijaua, et inivaijec ineig ek asaig ehelemia ainyak *mika*, etpu leh nintan imi yin aien.

42 Aien et ago nedo oop vaig tah ilpu halav iji eigki aien era asgeig irak ara, et upene vai yin el eh athai inhat irara flaur an nauinwan, um ethaigse yin an jop.

43 El et itai epihtau imi euc nikmam, anum acaldei aiek: etpu upene vai euc napanvaig an nuarin umoh, um ighin; jam has napanvaig an pece has, el et eteuc ero nikmam, an cop ineig inyi ti opos:

44 inyi ti mas iran nimyiv ura, um eti lep opos incop.

45 El et itai epihtau imi euc neduom, anum acaldei aiek: etpu upene vai euc napanvaig an nuarin umoh, um alkalka; jam has nethaig pan euc vaig an pece has, el et eteuc ero neduom, an cop ineig inyi ti lep opos:

46 inyi ti mas iran nimyiv ura, um eti lep opos incop.

47 El et itai epihtau imi euc nesganintam, anum atipagki aiek: etpu upene vai euc napanvaig an nelcau o Atua, um ethi ache nesganintam; jam has nethaig pan euc vaig an pece has an cop, um ero nesganintam:

48 inyi ti mas iran ninyiv ura, um eti lep opos incop.

49 Uhpū ati incop ira atimi asega; uhpū ati inmohoanjop irai iji itai ahlap asega.

50 Et upene inmohoanjop: ja el et aiyu inmohoanjop, uhpū lep leh nesgan um uauo? Etmu unyimia inmohoanjop; akumu eklim amen eigpa aijaua.

NUARIN-TAS ALUPAS 10.

IS atidai aien um ahes eahki, um apan irai uari pece Jutaiā an nahaijin Jortan itac: eris lep aketo um asjapicnaig pan ehelen natimi is ahinag; is lep esege imi ra aien, is idivaig nupyi *esege* o un.

2 ¶ Eris ahtag pan ehelen a ilpu Farisi, um ahodai yin, *um ika*, Et itaup vaig tah natimi nabrai ehgan vaig, ka o'o? eris oop yin ara.

3 Is tas aien, um ika ehele ra, Is asanhe ehelemia a Moses?

4 Eris ika ara, Is asaig a Moses mika ecri aged nitasvitai, intas va natipagki *yin*, um abrai *yin*.

5 Is tas a Iesu, um ika ehele ra, Is aged intas ineigki imi caua aien va nipjin u inlinmopomia.

6 Ja is ago natamaig is ethi a Atua im intakata is ethi, an naopan iyehki is wat ago niji itai asega aien.

7 “Va nitai ineigki etpu ude etman im risin natamaig, um amen aien im ehgan;

8 etpu ethi ache nohurau arau:” erau eti lep ero arau, ja et tup ethi ache nohurau arau.

9 Et itaup inlep atiakoivaig nitai ineigki is adgai iran a Atua.

10 Eris lep ahodai yin a ilpu atimi atahajeg yin anliin neom va nitai ineigki.

11 Is um ika ehele ra aien, Aien et abrai ehgan, um leh intaka takata, et ago ingaijid vai yin aien:

12 im lep ineig, el et ude na-

tamnyu un tah intakata, um ehgai intak atamaig, et ago ingaijid aien.

13 ERIS imyiapan ehelen ilpu halav, mika yi ateci pan ra aien; eris acaiji ra sji eigki eris imyiapan ra a ilpu atimi atahajeg yin.

14 Is wat almoi a Iesu, is taigtaig aien, um ika ehele ra, Ude ilpu halav aijaua, eri apam ehielek ara, um jim acaija ra; era idivai ra ara era amen an nelcau o Atua ara.

15 Et inivaijec ineig ek asaig ehelomia ainyak *mika*, Aien et eti leh nelcau o Atua aien et idivaig in-halav, inyi ti apan iran aien.

16 Is ablim pam ra aien, um atijai nikman ira ra, um asan tas upene vai ra.

17 IS wat atga aien an nefalaig, is athut pan ehelen natimi is ethi, um atpuse an nuhup o un, um ahodai yin, *um ika*, Ak natimi esege upene, inki ago inhe ainyak va ekpu leh nitai umoh iran ineig inyi ti lep ti?

18 Is um ika ehelen a Iesu, Na auri aiek par aniv upene nyak? et eti upene tah, Atua ache:

19 na ato niji tas alep aiek, *eris ika*, Jim ago ingaijid, Jim atgei natmas, Jim ehneg itai, Jim asan tas ahcil, Jim ago nedo asalacal, Namu eccen vai etman im risum aiek.

20 Is tas aien um ika ehelen, Ak Natimi esege, kis imyiaiji nitai iji eigki asega ainyak an halav unyak um uhum pam naopan ineig.

21 Is wat alum yin a Iesu, is aiyu inlinmopon aien vai yin, um ika ehelen, Nai eti ago nitai et ethi aiek: apan aiek, um ahtai niji itai asega unyun, um alupai ilpu ihki atimi, napu idim leh niji itai upene an nohatag aiek: um lep apam, um apos nauincal atgeig *unyun*, um apitac nyak.

22 Is inlai nesganimtan aien vai intas iyehki, um taigtaig, um atga o un: is ahinag inpadiaig o un aien.

23 ¶ Is aijidjid ilpu atimi atahajeg yin a Iesu, um arahed, um ika

ehele *ra*, Et ehka va atimi iji eig era ikni itai ara napanvaig an nelcau o Atua.

24 Eris imyiali intas o un a ilpu atimi atahajjeg yin. Ja is lep tas a Iesu, um ika ehele *ra*, Ak ilpu hal *unyak*, et ehka va atimi iji eig era asgeig irai padiaig *ura* ara napanvaig an nelcau o Atua:

25 et tup upene vai kamela namiliakvaig an hed an nitel, jam ehka va natimi ikni itai napanvaig an nelcau o Atua.

26 Eris imyiali alupas ara, um ika jipe ehele *ra*, Uhpū imyiatamaig di?

27 Is aijidjid *ra* a Iesu, um ika, Et ehka *nitai ineigki* va atimi, jam eti *ehka* vai Atua: et tup upene niji itai asega vai Atua.

28 ¶ Is um ika ehelen a Pitrus, Ecris ude niji itai asega aijama, um ahced euc.

29 Is tas a Iesu, um ika, Et ini-vajjec ineig ek asaig ehelemia ainyak *mika*, Natimi ineig is ude neom o un aien, ka ilpu etoan, ka ilpu atahaig iran, ka etman, ka risin, ka ehgan, ka ilpu hal o un, ka uman, vai nyak, im lep vai intas-upene,

30 etpu idim leh neruvaig aien inyi wun huntret an naopan ineig, niji eom, im ilpu etoan, im ilpu atahaig iran, im ilpu risin, im ilpu hal o un, im uman, im lep edemda *vai yin*; im lep *nitai* umoh iran ineig inyi ti lep ti, an naopan iyek.

31 Erupu apitac natimi inyi ahinag, eris uhup ara; ja erupu uhup ara, eris apitac ara.

32 ERIS wat apan ara alaig Jerusalem, is uhup ira ra a Iesu: eris imyiali ara; eris imtitaig ara um apitac *yin*. Is lep leh natimi is twelv aien, um asuptecnaig ehele *ra* nitai iji eigki etpu yetpan iran,

33 um *ika*, Intupu idim apan Jerusalem akaija; uhpu ati Inhal o natimi ehele ilpu atimi ahlap esjilid,

im ilpu atimi esege; erupu asaig inmas o un ara, um ati yin ehele nup urai taka pece:

34 erupu imyiafakahcil yin ara, um aredei yin, um agdei yin, um atgei yin; ja et wit ti pan itac nadiat inyi esej, etpu lep nusjai aien.

35 ERUS apan ehelen a Jakobus im Joanes, ohwat hal o Sebetaius, um ika, Ak Natimi esege, ecrau merit aijumrau, mika an ago aiek imi cumrau nitai ineig, ecrau merit vaig aijumrau.

36 Is ika ehele rau aien, Erau merit aijaurau vanhe mika ki ago ainyak imi caurau?

37 Erus ika ehelen arau, Asaig ehelemrau aiek mika ecrū ateuc aijumrau, tali *cumrau* an matam, im tah an inoum, an natimi alupas unyum.

38 Is ika ehele rau a Iesu, Erau eti ato aijaurau nitai ineig erau ugni *nyak* vaig aijaurau: aru emda aijaurau par umwig an nipjinitai ineig ekpu umwig iran ainyak; um leh nabaptiso iramirau yi idivaig nabaptiso ineig ekpu leh irak ainyak, ka o'o?

39 Erus ika ehelen arau, Ecrū emda aijumrau. Is ika ehele rau a Iesu, Arupu umwig aijaurau an nipjinitai ineig ekpu umwig iran ainyak; um leh nabaptiso iramirau yi idivaig nabaptiso ineig ekpu leh irak ainyak:

40 ja et ehka vai nyak nikavaig ehelen tah yi ateuc an matak, im lep an mouk, ja ehele *ra* ache eris ati imi *ra*.

41 Eris wat ato natimi is ten, eris edemda alupas ara vai Jakobus im Joanes.

42 Ja is asjapicnai *ra* ehelen a Iesu, um ika ehele *ra*, Eka ato aijaua, nikavaig, ara er ika era ilpu atimarid irai iji pece, era esjilid irai *iji pece ura* ara; era lep esjilid irai *uari pece ura* a ilpu atimi alupas *ura*:

43 jam jim ago nedo ineigki aijaua:

aien et merit aien mika yi esjilid iramia, etmu upoupo iramia aien :

44 aien et merit aien mika yi atimi alupas iramia, etmu aheca unyimia asega aien.

45 Is eti ham a Inhal o natimi mika eri aheca o un natimi, ja par aheca *ura*, um altai nitai umoh iran o un nintan va atimi et ahinag.

46 ERIS yetpan Jeriko ara: is wat ahes Jeriko aien, eris ahced yin a ilpu atimi atahaijeg yin, im lep atimi is ahinag; is ateuc an nahaijin nefalaig a Bartimius inhal o Timius, is aupat nesganimtan aien, um ugni itai.

47 Is wat atahaijeg aien, nikavaig, Iesu nup an Nasared mun iyehki, is atupun aien um ahlaig ijinies, um ika, Aiheuc vai nyak, ak Iesu, Mapoi Tevit.

48 Eris acaiji yin natimi is ahinag mika yi jim tas : ja is aketo aien um ahlaig ijinies, *um ika*, Aiheuc vai nyak, ak Mapoi Tevit.

49 Is aiji a Iesu, um ika eri ahlaig vai yin. Eris ahlaig va natimi aupat nesganimtan ara, um ika ehelen, Namu imyiacitak aiek, um atidai; et ahlaig vai euc aien.

50 Is apijadi napelumai iran aien, um atidai, um apan ehele Iesu.

51 Is tas a Iesu, um ika ehelen, Nai merit vanhe aiek mika ki ago imi euc ainyak? Is ika ehelen a natimi aupat nesganimtan, Ak Natimi esege, *ek merit ainyak* mika yi lah nesganimtak.

52 Is ika ehelen a Iesu, Atga unyum aiek; na mun cehcehe aiek va ninyiisjis ninivaijec unyum. Is um auroauro um lah nesganimtan aien, is apitac Iesu aien an nefalaig.

NUARIN-TAS ALUPAS 11.

ERIS wat ubutpotet pan Jerusalem ara, irai *uari-pece* Bedfeje im Bedane, u nedoon Olivet, is abrai

ohwat atimi atahaijeg yin is ero aien,

2 um ika ehele rau, Apan aijaurau an nuarin-pece ineig *et eteuc* an nuhup unyimirau: aru wit yetpan iran aijaurau, arupu ecetai inhakli nifo aijaurau er athai, is eti fi ateuc iran tah; arumu ahiyi yin aijaurau, um imyiapam *igcaki*.

3 El et ika ehelemirau tah natimi, Aru auri aijaurau par ago nedo naico? arumu ika aijaurau, Et merit vaig a Natimarid; etpu auroauro aien um atceijaig.

4 Erus apan arau, um ecetai inhakli nifo eris athai an neucse neom ijo an nihtag u nefalaig is ero; erus ahiyi yin arau.

5 Eris ika nahaiji ra eris aiji eahki, Erau anri aijaurau par ahiyi inhakli nifo?

6 Erus asan tas iyehki ehele ra arau is asaig ehele rau a Iesu: eris atceijai rau ara.

7 Erus imyiapan inhakli nifo iyehki ehele Iesu arau, um atijai napelumai urau iran; is ateuc iran aien.

8 Eris ahled apelunai ura an nefalaig atimi is ahinag; eris wudyaled tiklai cai nahaiji ra, um esjaig an nefalaig.

9 Ara eris atga ara um uhup *iran*, im lep ra eris apitac *yin* ara, eris ahlaig ijinies ara, um ika, Hosana; Naaurineig vai yin et ham aien an nidai Natimarid:

10 Naaurineig va nelcau o etpoiija Tevit, et yetpan an nidai Natimarid: Hosana an *nohatag* ijinies acen.

11 Is apan Jerusalem a Iesu, um han anliin neom ahlap: is um aijidjid niji itai asega aien, um imyiarahed; is wat jupura is ahes *eahki* aien im lep natimi is twelv, um apan Bedane.

12 ¶ Is wat lahlah an tak apnyin, eris ahes Bedane ara um atga ura, is um eltele yin aien:

13 is ecetai nateg aien itac acen is eteuc nerin iran, is apan aien, kit

etpu ecetai tah nitai iran aien : ja is wat yetpan o un aien, um eti ecetai tah nohoan, nerin ache; is eti yetpan naopan noho o un.

14 Is tas a Iesu, um ika, Etnu jim lep caig nohoam tah natimi irai iji mesese. Eris atahaijeg *intas o un* a ilpu atimi atahaijeg yin.

15 ¶ Eris yetpan Jerusalem ara : is apan a Iesu anliin neom ahlap, um ahlo pok ijo ra eris ahtai itai um auarimtai itai an neom ahlap, um ahidaig afata o ilpu atimi ahtai mune, im lep itai ateuc o ilpu atimi ahtai alaua;

16 is acaiji atimi asega aien mika eri jim apos tah nipjinitai anliin neom ahlap.

17 Is esege imi ra aien, um ika, Eris aged, um ika, "Uhpu anvi nidan neom unyak par ika neom alaigaheni vai nup urai iji pece asega;" ja akis ika aijaua yi "uarin imi ilpu atimi ehneg itai" *neom unyak*.

18 Eris atahaijeg *intas o un* a ilpu atimi esege, im ilpu atimi ahlap esjilid, um tas jipe ehele ra mika eri auahas yin : ja eris imtitaig yin ara, va nitai ineigki, nikavaig, eris imyiali nesege o un natimi asega.

19 Is wat jupura, is ahes an nuarin-pece *itaup* aien, um atga o un.

20 ¶ An nuhialeg eris wat atga ara, eris ecetai nateg ara, is mun mese, um ehlausa an necvan.

21 Is um imyiehva a Pitrus, um ika ehelen, Ak Natimi esege, ecetai nateg ineig na mun acaiji aiek, et mun mese.

22 Is tas a Iesu, um ika ehele ra, Akumu asgeig irai Atua aijaua.

23 Et ninivaijeg ineig ek asaig ehelemia ainyak mika, Aien inyi tas ehele nedoon ineigki aien, um ika, Eri atipagki, um ethaig pok an jop; um eti imyiisjis nahcil inliinmopon aien, jam imyiisjis ninivaijeg mika yi ehneijid *intas o un*; etpu idim leh nitai ineig aien et asaig aien.

24 Va nitai ineigki, ek asaig ehe-

lemia ainyak *mika*, Nitai iji eigki asega eka merit vaig aijaua an nalaigaheni unyimia, akumu imyiisjis ninivaijeg aijaua mika aki leucose, akupu leucose aijaua.

25 Aku wit aiji aijaua, um alaigaheni, el eka edemda aijaua va nedo o un tah, akumu jim aru aijaua; va etpu eti aru nedo has unyimia a Etmamia an nohatag.

26 Ja el eka aru *nedo has vai caua* aijaua, etpu aru nedo has unyimia a Etmamia an nohatag.

27 Eris lep apam Jerusalem ara : is wat atga aien anliin neom ahlap, eris apan ehelen a ilpu atimi ahlap esjilid, im ilpu atimi esege, im ilpu atimi tas alep,

28 um ika ehelen, Na ago nitai iji eigki aiek vai *intas alep u di?* is alupai euc nemda ineigki a di mika an ago nitai iji eigki aiek?

29 Is tas a Iesu, um ika ehele ra, Ekpu lep ahodai caua ainyak va nitai inyi ethi *ache*, asuptecnaig ehelek aijaua, ekpu lep asuptecnaig ehelemia ainyak nohu nemda unyak par ago nitai iji eigki :

30 Is ahes nabaptiso o Joanes an nohatag, ka ehele atimi? asuptecnaig ehelek aijaua.

31 Eris tas jipe ehele ra ara, um ika, El ta ika akaija, Is ahes an nohatag; etpu ika aien, Akis auri aijaua par eti imyiaiji *intas o un?*

32 Ja el ta ika akaija, Is ahes ehele atimi; eris imtita atimi ara : va nitai ineigki eris ika atimi asega, is idim aprofeta a Joanes.

33 Eris tas ara, um ika ehele Iesu, Ecra eti ato aijama. Is tas a Iesu, um ika ehele ra, Inki ti asuptecnaig ehelemia ainyak nohu nemda ineig ek ago nitai iji eigki vaig ainyak.

NUARIN-TAS ALUPAS 12.

IS ecsipece ehele ra aien, um ika,

Is ahoag vaine anliin nekaro o

un a natimi is ethi, um ago nirahed o un, um ucji *nehpanitai* par ahtaij-iraiḡ nohoai vaine iran, um acta neom par asjeucjinaig, is um atceijaig aien imi ilpu atimi ahapol, um atga o un, um apan an pece itac acen :

2 is wat metto nohoan, is abrai naheca o un is ethi aien mika yi apan aien ehele ilpu atimi ahapol, um leucose ohoai vaine anliin ne-karo.

3 Eris arop iran ara, um aredei *yin*, um lep abraig pan *yin*, jam eti alupai *yin* tahi nitai.

4 Is lep aketo aien um abraig pan naheca o un is ethi is eche ehele ra; eris um asji *yin* ara irai hat, um ati inmacop iran an nidjinin; is esjilid nedo has ura vai *yin*, eris lep abraig pan *yin* ara.

5 Is um lep aketo aien, um abraig pan is ethi is eche; eris um atgei *yin* ara, im lep hal ra is ahinag; eris abli nahaiji ra ara, um lep atgei nahaiji ra.

6 Is eteuc inhal o un is ethi ache, is *halav* cop iran aien, is apitac aien um abraig pan *yin* ehele ra, um ika, Erupu ago nedo eccen ara vai inhal unyak.

7 Ja eris tas jipe ehele ra a ilpu atimi ahapol, um ika, Natimi ineigki etpu isjipigmoig etman aien; ti idim atgei *yin* akaija, etpu uja uman.

8 Eris arop iran ara, um atgei *yin* anliin nekaro, um ethaig pan itac *yin*.

9 Etpu ago inhe a natimi alupas ohuun nekaro? etpu han aien, um atgei ilpu atimi ahapol iji eigki, um atceijaig nekaro imi tak atimi.

10 Akis esvi aijaua intas ineig eris aged, ka o'o, nikavaig, "Inhat ineig eris esjum vaig a ilpu atimi acta neom, et hat esjilid ineigki an nesvi va neom :

11 is ago nitai ineigki a Ihova, et itai imyiali ineig an nuhup uja"?

12 Eris ika ara eri arop iran vaig, jam imtita atimi: eris ato ara,

nikavaig, is asan tas ecsipece iyehki aien vai ra: eris ude *yin* ara, um atga ura.

13 ERIS abraig pan ehelen nahaiji ilpu Farisi ara, im nahaiji ilpu atimi leh imi Herot, mika eri imyiris intas o un.

14 Eris apan ehelen ara, um ika, Ak Natimi esege, ecra ato aijama, nikavaig, na inivaijec aiek, um eti imtita atimi, um eti aktaktai natimi alupas o un tah, jam esege inivaijec nedo o Atua: Et itaup nahtaivaig mune imi Sisar, ka o'o?

15 ecri ahtai *imi yin* aijama, ka o'o? Ja is ato nefaifa ura aien, um ika ehele ra, Eka auri aijaua par oop nyak? imyiapam ehelek mune yi ethi aijaua, mika ki almoi ainyak.

16 Eris imyiapan ara. Is ika ehele ra aien, Nalmui di ineigki, im nidai di eris aged? Eris um ika ehelen ara, Sisar.

17 Is tas a Iesu, um ika ehele ra, Alupai Sisar niji itai o Sisar; jam ahtai *imi* Atua niji itai o Atua. Eris imyiali *yin* ara.

18 ¶ Eris han ehelen a ilpu Satusi, atimi iji eigki era ika ara eri eti lep anusjai atimi emesmas; eris ahodai *yin* ara, um ika,

19 Ak Natimi esege, is aged a Moses, um ika eheleija, El et mas tah natimi eteuc etoan um ude ehgan, um eti eteuc inhal urau, el etnu leh ehgan a etoan, um asvalav vai etoan.

20 Eris amen a ilpu raimu is seven: um leh ehgan inmetto, um mas, is eti eteuc inhal urau:

21 is um leh *yin* a etoan is ethi, um mas, is eti eteuc inhal urau: is um lep leh *yin* a etoan is ethi:

22 eris um leh *yin* a ilpu raimu is seven, is eti eteuc inhal ura: is par apitac intakata, um mas:

23 an nadiat anusjai eru wit anusjai ara, etpu ehgan tahi ra sji eigki a di aien? eris um leh *yin* ehgara a *ilpu raimu* is seven.

24 Is tas a Iesu, um ika ehele ra, Eka idim ahnag aijaua, um eti ato intas eris aged, im lep nemda o Atua :

25 eru wit anusjai atimi vai inmas ura, eri eti lep atmelhgan ara, um eti lep asanlai; ja era idivaig ilpu agelo an nohatag ara.

26 Im lep ineig, erupu anusjai a ilpu atimi emesmas; akis esvi aijaua an nitasvitai o Moses, ka o'o, mika is tas ehelen a Atua an cai, um ika, "Ek Atua o Ebrahim ainyak, um Atua o Aisak, um Atua o Jekob"?

27 Et eti Atua o ilpu atimi emesmas aien, ja et Atua o ilpu atimi umunoh *ache* aien: et esjilid nah-nag unyimia aijaua.

28 ¶ Is han *ehelen* natimi esege is ethi, um atahaijeg nimyiisjis itai ura, um ahgei nasuptecnaig upene o un; is ika ehelen aien, Et esjilid neveh tas alep?

29 Is um ika ehelen a Iesu, Et esjilid neigki irai tas alep asega, "Ak nupu Israel, akumu atahaijeg aijana; Et Atimarid ethi *ache* a Ihova Atua uja:

30 etnu aiyu inliinmopom aiek vai Ihova Atua unyum anliinmopom asega, im lep an nesgam asega, im lep an naktaktai asega unyum, im lep an nemda asega unyum:" et esjilid intas alep ineigki.

31 Im lep napahvaig ineig, nika-vaig, "Etnu aiyu inliinmopom aiek va atimi eblaamnem unyum et idivaig *naiyu u inliinmopom* vai euc." Et eti eteuc tah intas alep et esjilid iran raigki.

32 Is ika ehelen a natimi esege iyehki, Et idim ucco, ak Natimi esege, et inivaijec intas unyum: et ethi *ache* a Atua; um eti lep eteuc tah:

33 et wat aiyu inliinmopon tah vai yin anliinmopon asega, im lep an naktaktai asega o un, im lep an nesgan asega, im lep an nemda asega o un, um aiyu inliinmopon aien

va atimi eblaamnem o un, et idivaig *naiyu u inliinmopon* vai yin, et esjilid nedo ineigki irai iji itai ahlap er atnamud im niji itai ahlap asega.

34 Is wat alun yin a Iesu nasuptecnaig upene vaig, is ika ehelen aien, Na eti itac acen aiek va nelcau o Atua. Eris imtitaig natimi inlep ahodai yin vaig *vaig tah nitai*.

35 ¶ Is wat esege an neom ahlap a Iesu, um tas aien, um ika, Era auri a ilpu atimi esege par ika, Et mapoi Tevit a Kristo?

36 Is idim tas a Tevit irai Nesgan Upene, *um ika*, "Is ika a Ihova ehele Natimarid unyak, Namu ateuc aiek an matak, um uhum pan naopan iyehki, ekpu ikni ilpu atimi tak atimi iram ainyak, mika eri itai atijai neduom iran."

37 Is anvi nidan a Tevit par ika Natimarid; et echamecha et pah mapon aien? Eris atahaijeg intas o un natimi is ahinag acen, um imyiacitak.

38 ¶ Is ika ehele ra aien an nesege o un, Akumu aminjinai caua aijaua vai ilpu atimi esege, era merit ara naso ra vaig irai apelumai opra um imyiedo, *era lep merit ara* mika eri aiheuc vai ra atimi irai uarin asjapicnaig atimi iran;

39 *era lep merit ara* va niji itai ateuc esjilid irai eom alaigaheni, im niji uarin esjilid u inbag o atimi:

40 era atoraliak inpadiaig o ilpu takata eris emesmas a ilpu atamnyura ara, um alaigaheni opra par adahpoi nedo ura: etpu esjilid nohocred ura.

41 ¶ Is ateuc a Iesu ubutpotet u nuarin ikni mune iran, um almoi nedo o ilpu atimi eris ikni mune an nuarin ikni mune iran: eris ikni *mune* is ahinag a ilpu atimi ikni itai is ahinag.

42 Is lep han a intakata ihki natimi is ethi, is mas natamnyu un, is ati nuari-mune haklin acen is ero aien, is apapa pan irai fardig is ethi.

43 Is asjapicnaig *ehelen* ilpu atimi

atahaijeg yin aien, um ika chele ra, Et inivajec ineig ek asaig ehelema ainyak mika, Et esjilid nati mune o untakata ibki natimi ineigki is mas natamnyu un, ira ra asega era han ikni *mune* ara an nuarin ikni mune irah :

44 era ikni nahaiji padiaig minni ura ara asega ; ja et ibki natimi aien, jam ikni itai asega o un, nitai imyiatamaig nohun asega.

NUARIN-TAS ALUPAS 13.

IS wat ahes anliin neom ahlap aien um alau ijo, is ika ehelen a natimi atahaijeg yin is ethi, Ak Natimi esege, almoi inhat alupas iji eigki im lep neom esjilid iji eigki !

2 Is tas a Iesu, um ika ehelen, Nai idim almoi neom alupas iji eigki aiek ; inyi ti amen inhat inyi ethi an taka hat, uhpu alcapdicraig asega.

3 Is wat ateucse aien an nedoon Olivet an nuhup o neom ahlap, eris echim ahodai yin a Pitrus, im Jakobus, im Joanes, im Antrius, *um ika*,

4 Asuptecnaig ehelema aiek, inyi yetpam nitai iji eigki an nahopan ? im lep nev itai asjaaicnaig u nubutpotetvaig o itai iji eigki ?

5 Is tas ehele ra a Iesu, um atupun, um ika, Aminjinai caua aijaua va yi jim imyiahnag caua tah natimi :

6 erupu ehcohos pam atimi inyi ahinag an nidak, um ika, Ek *Kristo* ainyak ; erupu imyiahnag atimi inyi ahinag ara.

7 Aku wit atahaijeg edoa aijaua, im lep intas vai edoa, jam jim intitaig : inyi upyi eteuc *nitai iji ehki* ; ja inyi ti fi auroauro um alni itai.

8 Erupu ati nedoa nup uran pece inyi ethi vai nup uran pece inyi eche, im lep nup uran nelcau inyi ethi vai nup uran nelcau inyi eche : etpu eteuc nomoi irai iji uari pece

inyi ahinag, im lep numlaig has, im lep nehioehio u inliinmopoi atimi : et idim ahka um eres nitai iji eigki.

9 ¶ Akumu aminjinai caua aijaua : erupu ikni caua ara ehele ilpu atimi tas alep, im lep ehele ilpu atimi asjapicnaig ; erupu aredei caua ara : uhpu imyiapan caua an nuhup u ilpu atimi alupas im ilpu atimarid vai nyak, nitai asuptecnaig imi ra.

10 Uhpu idim uhup um asuptecnaig intas-upene ehele nup urai iji pece asega.

11 Eru wit imyiapan *caua* ara, um ikni caua *ehele ilpu atimi tas alep*, akumu jim upyi hup aijaua, um ika, Inti asanhe akaija ? um jim aktaktai *intas* : jam asaig ineigki ache uhpu alupai caua an naopan iyehki : eka eti tup ispamia tas aijaua, ja Nesgan Upene ache.

12 Etpu alwai etoan tah mika eri atgei yin, im lep tah irai inhal *o un* ; erupu edemda a ilpu hal *ura* vai ilpu atnil *ura*, um ika, eri atgei ra.

13 Erupu amcel vai caua atimi asega va nidak : ja aien inyi ti adumoij aien, uhpu imyiatamaig yin.

14 ¶ Aku wit ecetai " nitai has esjilid ineig " aijaua, " et aualas itai," is tas vaig a Tanyel naprofeta, naijivaig an nuarin ineig et itaup, (etmu aktaktai aien et esvi itai aien,) ara eri amen Jutaia ara an naopan iyehki, erumu aha pan irai lola edoon ara :

15 aien inyi amen aien ijinies an neom *o un*, etmu jim asuol aien, um apan anliin *neom o un* mika yi leucse itai anliin neom o un :

16 aien inyi amen aien uman, etmu jim adumoij pan aien mika yi leucse napelumai o un.

17 Kaiheuc vai ra eri opouc ara, im lep ra eri alidai ilpu hal ura ara, ira adiat iji ehki !

18 Akumu ugni *Atua* aijaua mika aki jim aha aijaua an mesese.

19 Ira adiat iji ehki etpu eteuc nohocred, inyi esjilid irai *ohocred* asega an naopan iyehki is wat ago

niji itai asega a Atua um uhum pam an naopan ineig, inyi ti lep eteuc *nohocred inyi idivaig.*

20 El et eti ika a Atua yi eti elpat nadiat iji ehki, el erupu emesmas atimi asega: ja et ika aien yi eti elpat nadiat iji ehki, va atimi iji eig is ehtai ra aien.

21 An naopan iyehki el et ika ehelemia tah natimi, Almoi aijaua, Iesu mun eigki; ka, *Iesu* mun naico; jim eteuc an tas o un aijaua:

22 erupu ehcohos pam a ilpu Kristo efaifa im ilpu profeta efaifa, um ago niji auritai ehka im niji itai imyiali, mika eri imyiahnag ilpu atimi ehtai ra, ja inyi ehka.

23 Jam aminjinai caua aijaua: ek mun idim upyi hup ainyak um asuptecnaig niji itai asega ehelemia.

24 ¶ Ira adiat iji ehki et wit ti pan itac nitai ohocred vaig ineig, etpu aupat nagesega, um eti alahala vai inmohoc;

25 etpu etjo inmoijeuv an nohatag, um lep ahcatina niji emda an nohatag.

26 Erupu ecet Inhal o natimi ara an naopan iyehki, inyi yetpam aien an nepeig *an nohatag*, etpu esjilid nemda o un im natimi alupas o un.

27 Etpu abrai ilpu agelo o un aien, mika eri asjapicnaig ilpu atimi ehtai ra o un ara irai iji uari pece asega, abes an nahaijin nobohtan, um yetpan an nahaijin nohatag.

28 Akumu atahaijeg aijaua intas ecsipeace va nateg: Et wat ehcodeaig um elegelege nerin, eka ato aijaua, nikavaig, et mun ubutpotet u inli-dija:

29 et idim ucco, aku wit almoi nitai iji eigki aijaua, akumu ato aijaua, nikavaig, et mun ubutpotet *nelcau o Atua*, an neucse neom *marom.*

30 Et inivaijec ineig ek asaig ehelemia ainyak mika, Inyi upyi hup um ahni nitai iji eigki asega, ja erupu emesmas natimi an naopan ineig.

31 Etpu yetpan an tid iran nohatag im nobohtan: ja inyi ti yetpan an tid iran intas unyak.

32 ¶ Ja et eti ato nadiat iyehki im nuarin-nadiat *iyehki* tah natimi: um eti *ato* tah ilpu agelo an nohatag, um *eti ato* Inhal o Atua, *et ato* ache a Etmak.

33 Akumu aminjinai caua aijaua, um aiji, um alaigaheni: eka eti ato aijaua naopan yetpam *u nitai iji ehki.*

34 Et idivaig natimi et ethi a *Inhal o natimi*, et apan aien itac acen, um ude neom o un, um ika ehele ilpu aheca o un eri ohuun, um *asuptecnaig* ehele atimi asega nauritai imi ra, um tas ehele natimi aminjinaig neom mika yi aminjinaig upene aien.

35 Akumu aminjinai caua aijaua: eka eti ato aijaua naopan ineig inyi adumoij pam a natimi alupas an neom, an jupura, ka an nijihgan nepeig, ka an nahlaig u injaa, ka an nuhialej:

36 va yi jim auroauro aien um ham, um ecet caua numjegvaig.

37 Intas ineig ek asaig ehelemia ainyak, ek lep asaig ainyak ehele atimi asega, Akumu aminjinai caua aijaua.

NUARIN-TAS ALUPAS 14.

IS wat ti pan itac nadiat is ero *eris asjapicnaig* va napaska im nareto ti leven iran: eris tas jipe a ilpu atimi ahlap esjilid im ilpu atimi esege, mika eri efaifa vai yin par atgei *yin.*

2 Ja eris ika ara, eri jim ago *nedo ineigki* ira adiat asjapicnaig, va eri jim ehtauo natimi.

3 ¶ Is amen aien Bedane anliin neom o Saimona natimi lepros, is wat ateuc aien *um hag*, is han intakata is ethi, um apos nipjinitai alabaster is amen iran nitai aspi nidincai upene nipin is alupas nintan; is um ahtagarei nipjinitai aien, um atladwijai an nidjinin.

4 Is edemda inliinmopoi nahaiji ra, um ika, Er auahas nitai aspi ineigki vanhe?

5 el eh ahtai, pah leh tollar inyi forte im faiv um eled, par alupai ilpu ihki atimi. Is acen inliinmopura ara vai yin.

6 Is ika a Iesu, Ude yin aijaua; eka auri aijaua par imyidohalav yin? et mun ago nauritai upene irak aien.

7 Era amen a ilpu ihki atimi ehelemia irai iji adiat, el eka merit aijaua, et tup upene vai caua nagovaig nedo upene vai ra: ja inki ti amen ehelemia ainyak irai iji adiat.

8 Et mun ago nedo ineigki aien et emda aien par ago: et mun ham aien, um uhup um aspi nohuk va natelmoi *nyak*.

9 Et inivaijec ineig ek asaig ehelemia ainyak mika, Uhpū asuptecnaig nedo ineigki et mun ago aien, nitai imyiehva yin irai iji pece asega an nobohtan, uhpu asuptecnaig intas-upene ineigki iran.

10 ¶ Is apan a Jutas nupu Karyot ehele ilpu atimi ahlap esjilid, mika yi aniv yin ehele ra, is atimi is ethi aien ira atimi is twelv.

11 Eris wat atahaijeg ara, um imyiacitak ara, um upyi ika eri alupai yin mune, Is um imyiiris naopan upene aien par aniv yin ehele ra.

12 AN nadiat uhup *eris ecaig* nareto ti leven iran, um atgei napaska, eris ika ehelen a ilpu atimi atahaijeg yin, Nai merit aiek vaig eda ecri apan aijama, um imyecrei napaska, mika apu ecaig aiek?

13 Is abrai ohwat atimi atahaijeg yin is ero aien, um ika ehele rau, Apan aijaurau an nuarin-pece *itaup* ineig, etpu ehtet iramirau natimi inyi ethi, um apos nipjinitai inyi amen inwai iran: arumu apitac yin aijaurau:

14 arumu asaig aijaurau ehele natimi alupas an neom ineig inyi apan

iran aien, *um ika*, Et ika a Natimi esege, Nuarin-neom imi ilpu alaig yek eda, mika ki caig napaska iran ainyak im ilpu atimi atahaijeg nyak?

15 Etpu asuptecnaig ehelemirau aien nuarin-neom ijinies um alupas, et amen niji itai iran er idim ikni: arumu imyecrei vai caija eahki aijaurau.

16 Erus ahes eahki ahwat atimi atahaijeg yin erahki, um apan an nuarin-pece *itaup* iyehki, um ece-tai et idivaig is asaig ehele rau aien: erus imyecrei napaska arau.

17 Is wat jupura is han aien im lep atimi is twelv.

18 Eris wat ateuc ara um hag, is ika a Iesu, Et idim inivaijec ineig ek asaig ehelemia ainyak *mika*, Etpu aniv nyak a natimi et ethi iramia et hag aien ehelek.

19 Eris taigtaig ara, um ika athi-athi ehelen, Ainyak, ka o'o? ainyak, ka o'o?

20 Is tas aien, um ika ehele ra, Et ethi aien ira atimi et twelv, ecray esipiaig nipjinitai aijumrau:

21 et apan a Inhal o natimi et idivaig eris aged vai yin: ja a'a, auwe vai nat naico et aniv Inhal o natimi aien! el is upene vai nat naico el eris eti apos yin.

22 ¶ Eris wat hag ara, is um leh nareto a Iesu, um naaurineig *iran*, um aswaplec, um alupai ra, um ika, Leh aijaua, um caig: nohuk ineigki.

23 Is lep leh nipjinitai aien, um naaurineig *iran*, um alupai ra: eris umnyi ara asega.

24 Is ika ehele ra aien, Inja irak ineigki vai intas-etipup mat, eh mun atladwi va atimi et ahinag:

25 et inivaijec ineig ek asaig ehelemia ainyak mika, Inki ti lep umnyi nidi vaine ainyak, wat uhum pan nadiat iyehki ekpu umnyi *waina* mat ainyak an nelcau o Atua.

26 ¶ Eris acesaces nohranitai ara, ja par apan an nedoon Olivet.

27 Is ika ehele ra a Iesu, Akupu imyiehcamai nyak aijaua asega an nepeig ineigki: eris idim aged, *um ika*, "Ekpu auud natimi asgi siip ainyak, erupu terimterim jipe siip."

28 Ja ek wit nusjai ainyak, ekpu apan ainyak Calili, um uhup iramia.

29 Ja is um ika ehelen a Pitrus, Neri imyiehcamai *euc* atimi asega, ja inki ti *imyiehcamai euc* ainyak.

30 Is ika ehelen a Iesu, Et ini-vaijce ek asaig ehelum ainyak mika, Napu ehceseij ateri nyak aiek, inpeg an nepeig, ja etpu ehcero ahlaij injaa.

31 Ja is tas emda aien, *um ika*, El ek mas ainyak ehelum, el ek eti ateri euc ainyak. Is idim ucce intas ura asega.

32 ERIS apan ara an nuarin is ethi, nidan Kedsemani: is ika aien ehele ilpu atimi atahaijeg yin, Ek wit alaigaheni ainyak, aki ateuc aijaua igcaki.

33 Is leh Pitrus im Jakobus im Joanes aien, is chioehio inliinmopon aien, um ohocred;

34 um ika ehele eltaij, Et ohocred alupas inliinmopok ainyak, um idi-vaig inmas: amen aijautaij igcaki, um aiji.

35 Is eti elvatga aien, um eropse an nobohtan, um alaigaheni, um ika, El et wat eti ehka, etmu jim yetpan ehelek nuarin-nadiat iyehki.

36 Is ika aien, Abba, ak Etmak, et tup upene vai euc niji itai asega; atipagki nipjinitai ineigki ehelek aiek: jai jim *imyiaiiji* intas unyak, jam *imyiaiiji* intas unyum.

37 Is han aien, um ecet eltaij numjegvaig, um ika ehele Pitrus, Ak Saimona, tak umjeg aiek; na auatialidi aiek naijivaig an aur et ethi ache, ka o'o?

38 aiji aijautaij um alaigaheni, va ahtiji jim apan an nedo oop *cau-*

taij; et emda inliinmopomitaij aijautaij, jam auatialidi nohumitaij.

39 Is aketo aien um han alaigaheni, um lep asan tas iji ehki.

40 Is adumoiy pan aien, um ecet eltaij numjegvaig, (is aroparop nesganimtai eltaij,) is ehka vai eltaij nasaigvaig tah nitai ehelen.

41 Is ehceseij han aien, um ika ehele eltaij, Umjeg aijautaij, um atumop: et idim upene, et mun yetpam nuarin-nadiat ineig; eh mun aniv Inhal o natimi ehele ilpu atimi auatatimi:

42 atidai aijautaij, ti atga uja akaija; et mun ubutpotet aien et aniv nyak aien.

43 ¶ Is wat tas aien, is auroauro um han a Jutas, natimi is ethi aien ira atimi is twelv, eris ahced yin atimi is ahinag, um apos autoga im nelop, eris ahes ehele ilpu atimi ahlap esjilid ara, im ilpu atimi esege, im ilpu atimi tas alep.

44 Is upyi hup a natimi ineig is aniv yin um asaig ehele ra, um ika, Aien ekpu aijumnyi yin ainyak, aien aigko; asjiraig yin aijaua, um imyiapan upene *yin*.

45 Is wat yetpan *eahki* aien, is apan aien ehelen, um ika, Ak Natimi esege, ak Natimi esege; um aijumnyi yin.

46 ¶ Eris arop iran ara, um asjiraig yin.

47 Is aihiacse nauitoga a natimi is ethi ira ra eris aiji ubutpotet, um auud naheca o natimi esjilid an nahlap, um auudyialis intikgan.

48 Is tas a Iesu, um ika ehele ra, Eka mun idim ham aijaua, um apos autoga im nelop, um auanedo an natimi ehneg itai *irak*, mika aki leh nyak:

49 kis amen ehelemia ainyak irai iji adiat anliin neom ahlap, um esege, ja akis eti arop irak aijaua: jai va uhpu chneijid intas eris aged.

50 Eris ude yin ara asega, um aha.

51 Ja is apitac yin intakuras is

ethi, is ahelig pam yin aien an napelumai yilyil; eris arop iran a ilpu takuras:

52 is apijadi napelumai iyehki iran aien, um aha vai ra, is tup atga aien.

53 ERIS imyiapan Iesu ara ehele natimi esjilid an nahlap: eris asjap-icnaig ehelen a ilpu atimi ahlap esjilid asega, im ilpu atimi tas alep, im ilpu atimi esege.

54 Is apitac yin a Pitrus, jam itac acen *vai yin*, um apan an nimmim o natimi esjilid an nahlap: is ateucaien ehele ilpu aheca, um atijcop.

55 Eris ahilek atimi par asan tas *ahcil* vai Iesu a ilpu atimi ahlap esjilid, im ilpu atimi tas alep asega, mika eri atgei yin; jam eti ecet tah.

56 Eris asan tas *ahcil* vai yin natimi is ahinag, ja is acheiachei intas ura.

57 Eris atidai nahaiji ra, um asan tas *ahcil* vai yin, um ika,

58 Ecris atahaijeg intas o un aijama, is ika aien, Ekpu auahas neom ahlap ineigki ainyak, eris ago atimi irai ikmara, um lep ago inyi eche an nadiat inyi esejj, um eti ago irai ikmai atimi.

59 Ja is lep acheiachei intas ura.

60 Is atidai a natimi esjilid an nahlap an nuhup ura, um ahodai Iesu, um ika, Na asaig tah nitai aiek, ka o'o? inhe ineigki era asuptecnaig vai euc ara sji eigki?

61 Ja is eti tas aien, um eti asaig tah nitai.

Is lep ahodai yin a natimi esjilid an nahlap, um ika ehelen, Nai Kristo aiek, Inhal o un Et upene aien, ka o'o?

62 Is ika a Iesu, Maiya: akupu ecet Inhal o natimi aijaua nateucvaig an matan Et emda aien, im lep napam o un an nepeig an nohatag.

63 Is um ahpati napelumai iran a natimi esjilid an nahlap, um ika, Inta auri akaija par lep ahilek atimi par asuptecnaig *vai yin*?

64 eka mun atahaijeg intas has esjilid o un aijaua: eka ikha aijaua? Eris ika ara asega, Et upene natgei yin vaig.

65 Eris um agdei yin nahaiji ra, um adahpoi nesganintan, um abli yin, um ika ehelen, Asuptecnaig aiek. Eris lep ahpoi yin irai ikmara a ilpu aheca.

66 IS wat amen a Pitrus sepamki an nimmim, is um han naheca atahaij is ethi o natimi esjilid an nahlap:

67 is wat ecet Pitrus aien natijcopvaig, is almaijidjid yin aien, um ika, As amen ehele Iesu nup an Nasared aiek.

68 Is ateri aien, um ika, Ek eti ato ainyak, um eti ahaijeg intas ineig na asaig aiek. Is alau ijo aien, um apan an naiyu an neom; is um ahlaig injaa.

69 Is um lep ecet yin naheca atahaij, um ika ehele atimi aiji ubutpotet, Et atimi et ethi ira ra aien.

70 Is lep aketo aien um ateri. Eris epitpitac ara eris aiji ubutpotet, um ika ehele Pitrus, Nai idim atimi et ethi ira ra aiek: na upu Calili aiek, na auoh intas ura aiek.

71 Is asan tas has aien, um asan tas itaup, um ika, Ek eti ato natimi ineigki ainyak, eka tas vai yin aijaua.

72 Is um ehcero ahlaig injaa. Is imyiehva a Pitrus intas iyehki is asaig ehelen a Iesu, um ika, Napu ehceseij ateri nyak aiek, ja etpu ehcero ahlaig injaa. Is wat aktaktai aien, um imyitaig.

NUARIN-TAS ALUPAS 15.

IS wat lahlah an tak apnyin, eris tas jipe a ilpu atimi ahlap esjilid, im ilpu atimi tas alep, im ilpu atimi esege, im lep ilpu atimi asega u nasjapicnaig, um arore Iesu, um imyiapan *yin*, um ati *yin* ehele Paillet.

2 Is ahodai yin a Paillet, *um ika*, Na Atimarid u nupu Jutaia aiek, ka o'o? Is tas aien, um ika ehelen, Na mun asaig aiek.

3 Eris atijai niji itai is ahinag iran a ilpu atimi ahlap esjilid; ja is eti tas aien.

4 Is lep ahodai yin a Paillet, um ika, Na *auri* aiek par eti tas? et ahinag intas iji eigki era asuptecnaig vai euc ara.

5 Ja is eti tas a Iesu; is um imyiali a Paillet.

6 *Nedo o un ineigki* irai iji asjapicnaig va napaska, is ahiyi natimi is ethi aien eris arore yin, aien aigki eris merit vai yin ara.

7 Is eteuc *natimi is ethi*, nidan Barabas, eris arore yin, im lep atimi eris ahced yin ara an nehtauo, eris atgei natmas ara an nehtauo iyehki.

8 Eris ahlaig ijinies natimi is ahinag, um ugni *yin mika yi ago* vai ra et idivaig nupyi edo o un.

9 Ja is tas ehele ra a Paillet, um ika, Eka merit aijaua mika ki ahiyi Natimarid u nupu Jutaia imi caua ainyak, ka o'o?

10 Is ato aien, nikavaig, eris ati yin *an nuhup o un* a ilpu atimi ahlap esjilid va nauatitai *ura vai yin*.

11 Eris ehte tas imi atimi is ahinag a ilpu atimi ahlap esjilid, mika eri ugni yin yi ahiyi Barabas imi ra.

12 Is lep tas a Paillet, um ika ehele ra, Eka merit aijaua mika ki ago inhe ainyak *vai yin* eka anvi nidan aijaua par ika Natimarid u nupu Jutaia?

13 Eris lep ahlaig ijinies ara, um ika, Atgei yin aiek an nauincai atgeig.

14 Is um ika ehele ra a Paillet, *Auri?* is ago nev edo has aien? Eris um lep ahlaig ijinies acen ara, *um ika*, Atgei yin aiek an nauincai atgeig.

15 ¶ Is merit a Paillet neropsevaig inliinmopoi atimi, um ahiyi Barabas imi ra, um aredei Iesu, um atcejai

yin ehele ra, mika eri atgei yin an nauincai atgeig.

16 ERIS imyiapan yin a ilpu eucsupo an nimnim o Natimarid, nidan Pritoryum; eris lep asjapicnaig pan ilpu eucsupo asega ara;

17 um aso yin ara an napelumai cop, um ahod incat irai itai upun-upun, um adgaig imi yin;

18 eris aiheuc vai yin ara, *um ika*, Kaiheuc vai euc, ak Natimarid u nupu Jutaia!

19 Eris auud nidjinin ara an nauanieg, um agdei yin, um atpuse, um alaigaheni vai yin.

20 Eris wat imyiafakahcil yin ara, eris atipagki napelumai cop iran ara, um lep aso yin an napelumai o un, um imyialau ijo yin mika eri atgei yin an nauincai atgeig.

21 Eris acaiji natimi is ethi ara, Saimona, nupu Sairini, is ahes an tah anuarin aien, um atga an nefalaig, is etmai Aleksanter im Rufus aien, mika yi ahelwei nauincai atgeig o un aien.

22 ERIS imyiapan yin ara an nuarin is ethi *nidan* Colcoda, nesgan tas ineigki, Nuarin o nipjinipek o atimi.

23 Eris ati nitai auanipin a waina, um aluman: ja is eti umnyi aien.

24 Eris wat atgei yin ara an nauincai atgeig, ja par ahai apelumai o un, um edaig jipe itai asjaaicnaig va *apelumai*, mika eri ato nitai iji eig eri leucose atimi asega.

25 Is wat adiat metto, eris atgei yin ara an nauincai atgeig.

26 Eris aged nitasvitai par asuptecnaig nitai ineig eris atgei yin vaig, um atijai ijinies, *um ika*, NATIMARID U NUPU JUTAIA.

27 Eris lep atgei natimi ehneg itai is ero ehelen; is ethi an matan, im lep is ethi an moun.

28 Is um ehnejid intas ineig eris upyi aged, um ika, "Eris esvi pan yin irai ilpu atimi auatatimi."

29 Ara eris atga an nefalaig ara, eris atuli yin ara, um auhohaig nid-jinira, um ika, Auwi! aiek, na auahas neom ahlap aiek, um lep actaig an nadiat et eseij,

30 namu inyiatamaig euc aiek, um asuol an nauincai atgeig.

31 Eris lep imyiafakahcil *yin* a ilpu atimi ahlap esjilid, im ilpu atimi esege, um ika sjipe ehele ra, Is inyiatamaig tak atimi aien; jam auatialidi par inyiatamaig yin;

32 etmu asuol an nauincai atgeig a Kristo Natimarid u nupu Isreel, mika ti ecet yin akaija, um asgeig *iran*. Erus lep asan tas has vai yin arau eris atgei rau an nauincai atgeig ehelen.

33 Is wat adiatadiat, is um asuol inmehcim an pece asega um yetpan an jupki.

34 Is wat jupki, is ahlaig ijinies a Iesu, um ika, "Eloi, Eloi, lema sabakdenai?" nesgan tas ineigki, "Ak Atua unyak, ak Atua unyak, na auri aiek par ude nyak?"

35 Eris atahaijegg *intas o un* nahaiji ra eris aiji ubutpotet, um ika, Et ahlaig vai Elaija aien.

36 Is um athut natimi is ethi, um leh nisa, um ahtaijuli a vinecar, um ahcai an nauanieg, um aluman, um ika, Eklim erop; intupu almoi akaija, kit etpu yetpan a Elaija par atise yin.

37 Is um ahlaig ijinies a Iesu, um edekjai nesgan.

38 Is ahpati natcai apelumai anliin neom ahlap, is ahes ijinies um asuol.

39 ¶ Is wat ecetai nahlaig o un a natimi alupas u ilpu eucsupo, is aiji an nuhup o un aien, im nedekjai o nesgan, is ika aien, Et inivaijegg ineig, nikavaig, et Hal o Atua a natimi ineigki.

40 Eris lep aiji a ilpu takata itac acen, um almoi: ehtijis amen ehele ra a Mere nupu Mactala, im Mere risi Jakobus atiminivaijegg im Joses, im Salomi;

41 is wat amen aien Calili, ehtijis lep apitac yin ahtaij, um aheca o un; im lep ilpu takata is ahinag is eche, eris ahced yin ara um yetpan Jerusalem.

42 IS wat jupura, va nitai ineig is adiat auaretha, nikavaig, nadiat asgeig pan nadiat atumop,

43 is emda a Joseph nupu Ari-madia, um apan ehele Paillet, um ugni nohui Iesu, is atimi tas alep upene aien, um aitgaig nelcau o Atua.

44 Is imyiali a Paillet va nauro-auro o unmas o un: is ahlaig va natimi alupas o ilpu eucsupo aien, um ahodai yin, *um ika*, Et mun mas aien itu, ka o'o?

45 Is wat asuptecnaig ehelen a natimi alupas o ilpu eucsupo, is alapai Josef nohun aien.

46 Is auanimtan napelumai yilyil aien, um atise yin, um aso yin an napelumai iyehki, um ati yin an mun nij eris ahti, um atcelcaig inhat um atapanes an neucsen mun nij.

47 Erus ecetai a Mere nupu Mactala, im Mere *risi* Joses, nuarin ineig eris ati yin iran.

NUARIN-TAS ALUPAS 16.

IS wat ti pan itac nadiat atumop, ehtijis auarimtan niji itai auanipin upene a Mere nupu Mactala, im Mere *risi* Jakobus, im Salomi, mika ehtiji apan um aspi yin.

2 An nuhihialeq, an nadiat uhup irai wiik, ehtijis apan ahtaij u unmun nij, an nehcohos u nagesega:

3 ehtijis tas jipe ahtaij, *um ika*, Inyi atcelcaig inhat an neucsen mun nij vai cataij a di?

4 Ehtijis wat almoi ahtaij, ehtijis ecetai ahtaij inhat eris mun atcelcaig pan an taka uarin: is alupas acen.

5 Ehtijis apan ahtaij anliin mun nij, um ecet intakuras is ethi, is

ateuc aien an nahaijin matan, is ali napelumai iran um opra; ehtijis imtitaig ahtaij.

6 Is ika ehele ehtaij aien, Jim imtitaig aijautaij: ehtaij ahilek Iesu nup an Nasared aijautaij, eris atgei yin an nauincal atgeig: et mun nusjai aien; et ti aien igcaki: almoi nuarin ineig aijautaij eris ati yin iran:

7 ahtijmu atga unyimitaij aijautaij, um asuptecnaig ehele ilpu atimi atahaijeg yin im lep Pitrus, mika et mun uhup pan aien Calili: akupu ecet yin aijaua eahki, et idivaig is upyi asaig aien ehelemia.

8 Ehtijis auroauro ahtaij um alau ijo, um ahes u unmun nij, um aha; ehtijis ucjucjucaij ahtaij, um imyiali, um eti tas ehelen tah: ehtijis imtitaig ahtaij.

9 ¶ Is wat nusjai a Iesu an nuhialeh an nadiat uhup irai wiik, is upyi hup aien um ehcohos pan ehele Mere nupu Mactala, aien aigki is ahlo ilpu agelo has is seven ehelen aien.

10 Is apan aien, um asuptecnaig ehele atimi iji ehki eris amen ehelen ara, eris wat ehtigtaig ara, um imyitaig yin.

11 Eris wat atahaijeg ara, nika-vaig, is mun nusjai aien, um ehcohos pan ehelen, eris eti imyiisjis ninivaijec *intas o un* ara.

12 IS wat ti pan itac nitai iji eigki, is ehcohos pan aien ehele natimi is ero ira ra, an natga urau alaig apan an tah anuarin, ja is eche nohun.

13 Erus apan arau um asuptecnaig ehele ilpu etoarau: ja eris eti imyiisjis ninivaijec *intas* urau ara.

14 IS um lep ehcohos pan aien ehele natimi is eleven an nateuc ura um hag, um ated ra va nimyiisjis nahcil ura im nipjin u inliinmopura, nikavaig, eris eti eteuc ara irai tas o atimi iji eigki, eris wat ecet yin ara an nusjai o un.

15 Is um ika ehele ra aien, Akumu apan aijaua irai iji pece asega, um asuptecnaig *intas-upene* ehele atimi asega.

16 Aien inyi imyiisjis ninivaijec aien, um leh nabaptiso iran, uhpu imyiatamaig yin; ja aien inyi ti imyiisjis ninivaijec aien, etpu erik-inman iran aien.

17 Etpu apitac nauritai ehka iji eigki ira ra era imyiisjis ninivaijec ara; Erupu ahlo ilpu agelo has ara an nidak; erupu tas ara irai tas mat;

18 erupu asjiraig inyiv ara; el era umnyi tah nitai mas vaig ara, inyi ti ueni ra; erupu atijai nikmara ara ira atimi emehe, erupu umumoh ara.

19 IS wat tas ehele ra a Natimarid, um aridjai an nohatag, um ateuc an matai Atua.

20 Eris apan ara, um asuptecnaig *intas* irai iji uari pece asega; is auritai ehele *ra* a Natimarid, um ago ipjin *intas ura* irai iji auritai ehka is apitac *ira ra*. Emen.

INTAS-UPENE

IS AGED A

L U K A S.

NUARIN-TAS ALUPAS 1.

EERIS idim ika natimi is ahinag eri asuptecnaig upene nauritai iji eigki inta idim imyiisjis nini-vaijtec vaig akaija,

2 et idivaig eris asaig ehelema a ilpu atimi iji ehki, eris upyi hup ara um ecetai, ja par asuptecnaig intas,

3 va nitai ineigki, kis lep ika ainyak, ak natimi alupas, Diofilus, ki lep asuptecnaig upene ehelum an nitasvitai, kis idim ato upene nitai iji eigki asega ainyak itu acen um imyihum pam an naopan ineig,

4 mika an ato aiek, nikavaig, et idim inivaijtec nitai iji eigki, eris esege imi euc.

5 **AN NAOPAN** iyehki is wat atimarid an *pece* Jutai a Herot, is eteuc natimi ahlap is ethi, nidan Sakaraia, is mapoi Abaija aien : is lep mapoi Eron a ehgan, nidan Elisabed.

6 Is atoh nedo urau arau an nuhup o Atua, erus apos upene intas alep asega o Ihova arau, im niji itai is ikni aien, eris eti lep ated rau.

7 Ja is ti inhal urau, is eti asvalav a Elisabed ; erus mun efatimi arau.

8 Is amen aien, um ago nauritai o ilpu atimi ahlap aien an nuhup o Atua, is idivaig ilpu etoan,

9 is idivaig nedo o ilpu atimi ahlap, is leh nitai asjaaicnaig vaig o um aien par apan anliin neom

ahlap o Ihova, um atnamud nitai auanipin upene.

10 Eris amen ijo natimi asega is ahinag, um alaigaheni an nuarin-nadiat iyehki eris atnamud nitai auanipin upene iran.

11 Is ehcohos ehelen a nagelo is ethi o Ihova, um aiji an nahaijin nefata uari nitai auanipin upene an matan.

12 Is wat ecet *yin* a Sakaraia, is ehioehio inliinmopon aien, um imtitaig.

13 Is um ika ehelen a nagelo, Jim imtitaig aiek, ak Sakaraia : eh mun atahaijeg nalaigaheni unyum ; etpu apos inhalav atamaig a ehgan Elisabed, napu anvi nidan aiek par ika Joanes :

14 etpu imyiacitak inliinmopom aiek um cediaig ; uhu wit apos *yin*, erupu imyiacitak *yin* natimi inyi ahinag :

15 etpu esjilid aien an nuhup o Ihova, inyi ti umnyi waina aien im kava ; uhu wit apos *yin*, etpu idim amen alupas ehelen a Nesgan Upene :

16 etpu imyiadumoij pan aien nupu Isreel inyi ahinag ehele Ihova Atua ura :

17 etpu uhup iran aien, etpu emda inliinmopon aien inyi idivaig Elaija, etpu hedaig inliinmopoi ilpu atmil *ura* vai ilpu hal *ura*, im lep inliinmopoi ilpu atimi esjum va narapakau o ilpu atimi upene ; etpu ago upene atimi aien par aitagai Natimarid.

18 Is ika ehele nagelo a Sakaraia,

Ekpu ehvato nitai ineigki ainyak? ek mun efatimi ainyak, um lep ahinag inmesese irai ehgak.

19 Is tas a nagelo, um ika ehelen, Ek Cebriel ainyak, um aiji an nuhup o Atua; eris abrai nyak mika ki tas ehelum ainyak, um asuptecnaig ehelum intas upene iji eigki:

20 napu idim pop aiek; etpu ehka intasvaig, um uhun pan an naopan iyehki etpu yetpam nitai iji eigki, va ninyiisjis nahcil unyum vai intas unyak, uhpu ehnejid an naopan o un.

21 Eris aitgai Sakaraias natimi, um inyiali va namen o un anliin neom ahlap is itu iran.

22 Is wat alau ijo aien, is um ehka intasvaig ehele ra: eris ato ara mika et mun ehcolhos tah nitai ehelen anliin neom ahlap: is ahpoi-jaiji ra aien, is pop aien.

23 Is wat atid nauritai o un aien, is atga o un aien, um apan an neom o un.

24 Is wat ti pan itac nadiat iji ehki, is um opouc a ehgan Elisabed, is amen anliin neom o un aien an mohoc is ikman, um ika,

25 Is ago nedo ineigki vai nyak a Ihova an naopan iyehki is wat alun *nyak* aien, um atipagki nitai ineig ek ehcamai vaig ainyak an nuhup o atimi.

26 IS wat ti pan itac inmohoc is siks, is abrai Cebriel nagelo o un a Atua, mika yi apan aien an nuarin-pece is ethi, nidam Nasared, an *pece* Calili,

27 ehele natahaig is ethi, is amin-jinanlai aien ehele natimi is ethi, nidam Josef, is mapoi Tevit aien; nidam natahaig iyehki Mere.

28 Is han ehelen a nagelo, um ika, Kaiheuc vai euc, na mun ahesmoij aiek, *etmu amen* ehelum a Ihova: na esjilid aiek irai ilpu takata.

29 Is wat ecet *gin* aien, is ehioehio inliinmopon aien vai intas o un; is

aktaktai aien, um ika, Neveli tas ineigki?

30 Is ika ehelen a nagelo, Jim imtitaig aiek, ak Mere: et mun aiheuc vai euc a Atua:

31 napu opouc aiek, um apos inhalav atamaig, um anvi nidam par ika IESU:

32 etpu esjilid aien, uhpu anvi nidam par ika Inhal o un Et esjilid aien: etpu ati imi yin a Ihova Atua dorona o etpon Tevit:

33 etpu atimarid o ilpu mapoi Jakob aien irai iji mesese; inyi ti lep ti nelcau o un.

34 Is ika ehele nagelo a Mere, Inyi echamecha nitai ineigki, kis eti ato natamaig ainyak?

35 Is tas a nagelo, um ika ehelen, Etpu yetpan iram a Nesgan Upene, etpu ahelmon euc nemda o un Et esjilid aien: uhpu anvi nidam nitai upene iyehki napu apos aiek, par ika Inhal o Atua;

36 et idim opouc a etoam Elisabed irai inhalav atamaig an nefatimi o un: is ti pan itac inmohoc is siks is *opouc* aien, eris ika is eti asvalav aien:

37 et tup upene vai Atua niji itai asega.

38 Is ika a Mere, *Ek* idim aheca atahaig o Ihova *ainyak*; etmu eteuc *nitai ineigki* ehelek, yi idivaig intas unyum.

Is ude yin a nagelo, um atga o un.

39 An naopan iyehki is atidai a Mere, um auroauro, um apan alaig an nuarin-pece is ethi irai lola edoon, an *pece* Jutai:

40 um apan anliin neom o Sakaraias, um aiheuc vai Elisabed.

41 Is wat atahaijeg intas aiheuc o Mere a Elisabed, is eliaujai a inhal o un an nipjinetgan; is amen alupas ehele Elisabed a Nesgan Upene:

42 is ahlaig ijinies aien, um ika, Na esjilid aiek irai ilpu takata, um lep esjilid inhal unyum:

43 nev edo ineig vai nyak, et

mun ham ehelek a risi Natimarid unyak?

44 ek wat atahaijeg intas aiheuc unyum ainyak, et mun eliaujui inhal *unyak* an nippinetgak va ninyiacitak *o un*.

45 Et mun ahesmoij aien is imyiisjis ninivaijec aien : uhpu ehnejid nitai iji ehki is asaig ehelen a Ihova.

46 Is um ika a Mere,

EK imyiahpas Ihova an nesgak ainyak,

47 et imyiacitak inlinmopok ainyak, vai Atua Natimi imyiatamaig nyak :

48 kis wat tup atahaig ainyak, is aiheuc vai naheca o un aien : erupu asan tas upene vai nyak atimi asega, um yetpan irai iji mesese.

49 Is ago nedo emda vai nyak Aien et esjilid aien ; et idim upene nidan.

50 Et aiheuc vai ra aien era imtitaig yin ara, um yetpan irai iji mesese.

51 Is ago nedo emda an nikman aien ; um terinterim irai ilpu atimi iji eigki is ijinies inlinmopura ara irai aktaktai ura.

52 Is iknipagki ilpu atimi alupas aien irai dorona *ura*, jam atijai ra sji eigki eris opoupou ara.

53 Is alayi ilpu atimi ehteke ra niji itai upene aien ; jam abraig pan ra eris ikni itai ara, um eti alupai ra itai.

54 Is atau imi Isreel naheca o un aien, um imyiehva naiheuc *o un*,

55 vai Ebrahim, im lep ilpu mapon asega irai iji mesese, is idivaig is upyi asaig aien ehele ilpu retpoija.

56 IS amen a Mere ehelen an mohoc is esej, ja par apan an neom o un.

57 IS yetpam naopan ineig iny apos inhal o un a Elisabed ; is apos inhalav atamaig *o un* aien.

58 Eris ato a ilpu atimi eblaam-

nem o un im ilpu atimi ehpan iran, nikavaig, is esjilid naiheuc o Ihova vai yin ; eris chrimyiacitak ehelen ara.

59 Is wat ti pan itac nadiat is eet, eris asjapicnaig atimi mika eri aperitome irai inhalav ; eris anvi nidan ara par ika Sakaraia, nilpun nidai etnan.

60 Is tas a risin, um ika, O'o ; uhpu anvi nidan par ika Joanes.

61 Eris ika ehelen ara, Er eti anvi nidan ineigki iran tah natimi ehpan iram.

62 Eris alpoiiaji etman ara, mika yi anvi nidan.

63 Is ugni nitai aged iran aien, um aged, um ika, Et idan Joanes. Eris inyiali ara asega.

64 Is um auroauro um asalgei nippineucsen, is um eti pop aien, um tas, um imyiahpas Atua.

65 Eris imtitaig atimi asega eris amen ubutpotet ehele ra ara : is apaahni intas va nitai iji eigki irai lola edoon asega an *pece* Jutaia.

66 Eris ikni irai linmopura natimi asega eris atahaijeg ara, um ika, Inyi echamechia inhalav ineigki ! Is amen ehelen nikmai Ihova.

67 Is amen alupas a Nesgan Upene ehele etman Sakaraia ; is upyi tas vaig aien, um ika,

68 NAAURINEIG vai Ihova Atua o nupu Isreel ; et mun ateghe ilpu atimi o un aien, um imyiatamai ra,

69 et mun atijai nepat imyiatamaig caija aien, et mapoi Tevit aien naheca o un ;

70 et idivaig is upyi asaig aien irai ilpu profeta upene o un, itu acen :

71 mika yi imyiatamaig *caija* vai ilpu atimi tak atimi iraija, im lep vai ra asega era amcel vai caija ara ;

72 um ago nedo aiheuc ineig *is upyi asaig aien* ehele ilpu retpoija, um lep imyiehva intas-etipup upene o un aien ;

73 intas upyi asaig iyehki is asig yi aktit aien ehele etpoi'a Ebrahim,

74 mika yi aiheuc vai caija aien, um imyiatanaig caija va atimi tak atimi iraija, mika ti aheca o un akaija, um jim imtitai *ra*,

75 um ago nedo upene, im nedo atoh an nuhup o un, irai iji adiat an numumoh uja.

76 Ak inhal *unyak*, uhpu anvi nidam par ika na profeta o un aiek Et esjilid aien : napu uhup aiek irai Natimarid, par ahped nefalaig vai yin ;

77 um asupteanaig intas imyiatanaig *caija* ehele ilpu atimi o un, va uhpu iknipagki nedo has ura,

78 va nedo aiheuc esjilid o Atua uja ; va vitai ineigki et mun ateghe caija inhal an nohatag,

79 par lah ehele ra era amen an naupat ara, et ahelmon ra inmas, um lep atau iraija an nefalaig eigpa.

80 IS alupas inhalav iyehki, um emda inliimopon ; is anen aien irai uari amasacen, um uhun pan naopan iyehki is ehcohos aien ehele nuhu Isreel.

NUARIN-TAS ALUPAS 2.

AN naopan iyehki is tas alep a Sisar Acustus, um ika, eri aged nidai atimi asega an pece.

2 (Eris atupun um aged ehni nidai atimi an naopan iyehki is atimi alupas Sirya a Sairinyus.)

3 Eris apan natimi asega irai uari-pece ura, mika eri aged idara.

4 Is lep ahes an nuarin-pece Nasared a Josef an *pece* Calili, um apan alaig Jutaia, an nuarin-pece o Tevit, nidan Bedleem, is mapoi Tevit aien um up uran pece o un,

5 mika eri aged nidan im lep Mere ehgan, eris upyi asanlai imi yin ehelen, is um opouc aien.

6 Eris amen eahki arau, um

uhun pan naopan iyehki is apos inhal o un aien.

7 Is apos inhalav atamaig o un aien inmetto, um aso pam yin an napelumai, um ati yin an nelcau hag o kurimatau ; is ti inuarin ineig eru amen iran arau anliin neom ehele atimi asega.

8 Eris amen an pece iyehki a ilpu atimi asgi siip, eris amen ara an lelitai, um aminjinaig siip ura an nepeig.

9 Is ehcohos pan ehele ra a nagelo is ethi o Ihova, is ehlo ra naijora Ihova ; eris um imtitai'g alupas ara.

10 Is ika ehele ra a nagelo, Jim imtitai'g aijaua : ekpu idim asupteanaig ehelemia ainyak intas upene : erupu imyiacitak alupas natimi asega :

11 eh mun apos Natimi imyiatanaig caua, an nadiat ineigki an nuarin-pece o Tevit, et Kristo aien Natimarid :

12 nitai asjaaicnaig imi caua ineigki ; Akupu ecet inhalav aijaua er aso pam yin an napelumai, et asjeuc aien an nelcau hag o kurimatau.

13 Eris lep auroauro a ilpu agelo is ahinag an nohatag, um ehcohos pan ehele nagelo iyehki, um imyiahpas Atua, um ika,

14 *Etmu eleuc* nimyiahpas vai Atua an *nohatag* ijinies acen ; um *eleuc* neigpa an nobohtan, im naiheuc va atimi.

15 ¶ Eris wat ude ra a ilpu agelo um aridjai an nohatag, eris tas jipe a ilpu atimi asgi siip, um *ika*, Ti apan Bedleem akaija, um almoi nitai ineig et mun ham, et mun asupteanaig eheleija a Ihova.

16 Eris auroauro ara um apan, um ecet Mere, im Josef, im lep inhalav nasjeucvaig an nelcau hag o kurimatau.

17 Eris wat ecetai ara, eris asupteanaig intas eris asaig ehele ra vai inhalav ineigki.

18 Natimi asega iji ehki eris atahajeg *intas ineigki* ara, eris imyiali nitai iji eigki ara eris asaig ehele ra a ilpu atimi asgi siip.

19 Is imyiehva nitai iji eigki asega a Mere, um aktaktai inliinmopon.

20 Eris atga ura a ilpu atimi asgi siip, um naaurineig vai Atua, um imyiahpas *yin*, va nitai iji eigki asega eris atahajeg ara um almoi, et idivaig eris asaig ehele ra.

21 IS wat ti pan itac nadiat is eet eris aperitome irai inhalav, eris anvi nidan par ika IESU, is anvi nidan a nagelo an naopan iyehki is pam eti opouc iran a risin.

22 IS wat ti pan itac nadiat ago adicinadin *risin* iran is idivaig intas alep o Moses, erus imyiapan yin Jerusalem arau mika eru ati yin an nuhup o Ihova;

23 (et idivaig eris aged an tas alep o Ihova, um ika, "Erumu itaup vai Ihova a ilpu halav atamaig asega inmetto;")

24 um ahlap an nitai ahlap, et idivaig eris aged an tas alep o Ihova, *um ika*, "Nalaupa inyi ero, ka nucip haklin inyi ero."

25 Is amen Jerusalem natimi is ethi, nidan Simeon; is atimi upene aien um alaigaheni vai Atua, is aitgaig nitai imyiacitak imi nupu Isreel aien: is amen ehelen a Nesgan Upene.

26 Is asuptechnaig ehelen a Nesgan Upene, mika yi upyi alum Kristo o Ihova aien, ja pah mas.

27 Is apan aien anliin neom ahlap va Nesgan *Upene*: erus wat imyiapan Iesu inihalav ahwat atnil o un, mika eru ago nedo iyehki vai yin et idivaig intas alep,

28 is leh yin aien, um ablim pam yin, um naaurineig vai Atua, um ika,

29 Ak Natimarid, ek aheca unyum ainyak, an adceijag eigpa nyak aiek an naopan ineig, et idivaig intas unyum:

30 ek mun ecet natimi imyiata-naig *cama* unyum ainyak,

31 aien as ati yin aiek an nuhup u atimi asega;

32 mika yi itai lah aien imi nup urai iji pece, im lep nitai imyiahpas imi nupu Isreel unyum.

33 Is imyiali a Josef im risin va nitai iji eigki eris asaig vai yin.

34 Is asan tas upene vai rau a Simeon, um ika ehele Mere risin, Eris ati *inhalav* ineigki mika eri eropse *nahaiji* atimi inyi ahinag, um atidai *inyi ahinag* irai nupu Isreel, et lep itai asjaicnaig uhpu asan tas has vai yin:

35 (etpu idim ahcai inliinmopom nautoga,) mika uhpu asuptechnaig naktaktai o inliinmopoi atimi inyi ahinag.

36 Is amen naprofeta takata is ethi, *nidan* Ana, inhal o Fanuel, is mapoi Eser aien: is idim efatimi aien; is leh natamnyu un aien an natahaig o un, um amen ehelen an mesese is seven;

37 is um mas a natamnyu un; is eete for inmesese iran; is amen aien an neom ahlap, um aheca o Atua an natwakam im nalaigaheni irai iji epeig im niji adiat.

38 Is apan aien anliin *neom* an nuarin-nadiat iyehki, um lep naaurineig vai Ihova, um tas vai yin ehele ra asega Jerusalem, eris aitgaig natimi imyiatamaig *ra* ara.

39 Erus wat atid niji itai asega arau, is idivaig intas alep o Ihova, erus adumoij pan arau Calili, an nuarin-pece urau Nasared.

40 Is alupas a inhalav iyehki um emda inliinmopon, um esjilid nara-pakau o un: is aheuc vai yin a Atua.

41 ERUS apan Jerusalem ahwat atnil o un irai iji mesese u nasjapicnaig va napaska.

42 Is wat twelv inmesese iran, erus apan Jerusalem arau, is idivaig nedo o *atimi* u nasjapicnaig iyehki.

43 Is wat ti pan itac nadiat iji ehki, erus adumoij pan arau, is amen a Iesu Jerusalem *is* adualep *aien*; ja is eti ato a Josef im risin:

44 erus aktaktai arau mika is ahced atimi aien; erus atga an nadiat is ethi arau, um ahilek yin ehele ilpu atimi ehpan *ira rau* im ilpu atimi eblaamnem *urau*:

45 erus wat ti ecet yin arau, erus adumoij pan Jerusalem arau, um ahilek yin.

46 Is wat ti pan itac nadiat is esej, erus ecet yin arau anliin neom ahlap nateucvaig an niblai ilpu atimi esege; is atahajjeg ra aien, um lep ahodai ra vai itai.

47 Eris imyiali *yin* ara asega eris atahajjeg yin, va nato upene o un im nasuptecnaig *upene* itai o un.

48 Erus wat ecet yin arau, erus imyiali arau: is ika ehelen a risin, Ak inhal *unyak*, na auri aiek par ago nedo ineigki vai cumrau? ek mun ahilek euc ainyak im etnam, um imyitaig *euc*.

49 Is ika ehele rau aien, Erau ahilek nyak aijaurau vanhe? erau idim ato aijaurau, nikavaig, eris idim ika ki ago niji auritai o Etnak ainyak.

50 Ja erus eti ato arau intas ineig is asaig ehele rau aien.

51 Is ahced rau aien, um apan Nasared, um imyiaiji intas urau: ja is apos intas asega iji ehki anliinmopon a risin.

52 Is alupas a Iesu, is esjilid nato itai o un; is upene inliinmopoi Atua vai yin, im lep *inliinmopoi* atimi.

NUARIN-TAS ALUPAS 3.

AN naopan iyehki is wat atimarid a Taibiryus Sisar an mesese is fiftiin; is lep atimi alupas an *pece* Jutaia a Ponjus Paillet, um atimi alupas an *pece* Calili a Herot, um atimi alupas an *pece* Ituria im in-

pece Trakonaitis a Filip etoai *Herot*, um atimi alupas an *pece* Abilini a Laisenyas,

2 um atimi esjilid an nahlap a Anas im Keafas, is yetpan intas o Atua ehele Joanes inhal o Sakaraias an namasacen.

3 Is apan aien irai iji uari pece asega u Jortan, um asuptecnaig nabaptiso mika eri adumoij anliinmopura *atimi* va uhpu iknipagki nedo has *ura*;

4 et idivaig eris upyi aged an nitasvitai o Aiseya naprofeta, um ika, "Nohran tah et ethi etpu ahlaig aien an namasacen, *um ika*, Akumu ahped nefalaig vai Ihova aijaua, um ago yi atoh efalaig vai yin:

5 etpu esjeuc asega niji iskanse asega, uhpu ahtahumiaig nau asega im nedoon *asega*; etpu atoh niji efalaig acalacal, *etpu* marara niji efalaig riduotriduot;

6 erupu ecetai nitai imyiatamaig *ra* o Atua natimi asega."

7 Is ika aien ehele natimi is ahinag eris ahtag pan ehelen ara, mika eri leh nabaptiso ira ra, Ak ilpu imyiv, et mun ated caua a di, mika aki alha aijaua vai intavaitap etpu yetpam?

8 akumu ohoai itai aijaua yi idivaig nadumoij u inliinmopomia: akumu jim aktaktai anliinmopomia aijaua, um ika, Et etpoija a Ebrahim; ek asaig ehelemia ainyak mika, Et emda a Atua par imyiatidai ilpu halav imi Ebrahim irai hat iji eigki:

9 eh mun ati inpas u nohu auicai an naopan ineig: uhpu acaldei nauicai asega et eti upene nasau iran, um erekhaigjai an cop.

10 Eris ahodaig yin natimi, um ika, Ecri ago inhe aijama?

11 Is tas aien, um ika ehele ra, Aien et o un napelunai et ero, etmu alupai *natimi ineig* aien et ti *napelunai* o un; etum lep ucce aien et eteuc nitai caig o un.

12 Eris ahtag pan ehelen a ilpu atimi akwanaham, mika eri leh

nabaptiso ira ra, um ika ehelen, Ak natimi esege, ecri ago inhe aijama?

13 Is ika ehele ra aien, Akumu leh nitai ineig ache aijaua eris asaig ehelemia.

14 Eris lep ahodaig yin a ilpu eucsupo, um ika, Ecri lep ago inhe aijama? Is ika ehele ra aien, Akumu jin ago nedo ipjin va atimi aijaua, um jin athai intas ahcil vaig *tah*; um jin auatiemda va nimitan imi caua.

15 An naopan iyehki, eris wat aitgaig *Kristo* natimi, eris wat aktaktai Joanes ara asega anliinmopura, um ika, Kit *Kristo* mun eigki, ka o'o?

16 is tas a Joanes, um ika ehele ra asega, Ek idim baptiso iramia ainyak an wai; ja etpu yetpam tah inyi ethi, inyi esjilid irak aien, ek eti upene ainyak par ahiyi nehtit an cedpun eduon: etpu baptiso iramia aien an Nesgan Upene im lep incop:

17 et apos nitai ucjucjai itai o un aien, etpu ago adicinadicin inuarin *auud* hwiit iran o un aien, etpu ikni hwiit o un aien anliin neom ikui hwiit iran; ja etpu atnamud narasin aien an cop inyi ti lep opos.

18 Is lep asuptecnaig niji itai is ahinag is eche ehele atimi aien, um ated ra.

19 IS wat acaiji Herot aien natimi alupas, vai Herotyas ehgai Filip etoan, im lep vai nedo has asega is ago a Herot,

20 is lep ehcilpon nedo iji ehki asega aien, um ati Joanes anliin neom ipjin.

21 ERIS wat leh nabaptiso ira ra atimi asega, is lep leh nabaptiso iran a Iesu; is wat alaigaheni aien, is asalgei nohatag;

22 is asuol iran a Nesgan Upene, is idivaig nalaupa nalmun nohun;

is ahes an nohatag noliran tah, um ika, Nai Halav cop unyak aiek; ek imyiacitak euc ainyak.

23 ¶ Is idivaig dirte mesese irai Iesu an naopan iyehki, eris ika ache is hal o Josef aien, is hal o Hilai a *Josef*,

24 is hal o Matdat a *Hilai*, is hal o Livai a *Matdat*, is hal o Melkai a *Livai*, is hal o Janna a *Melkai*, is hal o Josef a *Janna*,

25 is hal o Matadaias a *Josef*, is hal o Emos a *Matadaias*, is hal o Neum a *Emos*, is hal o Eslai a *Neum*, is hal o Naci a *Eslai*,

26 is hal o Mead a *Naci*, is hal o Matadaias a *Mead*, is hal o Semeai a *Matadaias*, is hal o Josef a *Semeai*, is hal o Juta a *Josef*,

27 is hal o Joana a *Juta*, is hal o Risa a *Joana*, is hal o Serubabel a *Risa*, is hal o Sialtiel a *Serubabel*, is hal o Nirai a *Sialtiel*,

28 is hal o Melkai a *Nirai*, is hal o Attai a *Melkai*, is hal o Kosam a *Attai*, is hal o Elmotam a *Kosam*, is hal o Er a *Elmotam*,

29 is hal o Josi a *Er*, is hal o Eleiser a *Josi*, is hal o Jorim a *Eleiser*, is hal o Matdat a *Jorim*, is hal o Livai a *Matdat*,

30 is hal o Simeon a *Livai*, is hal o Juta a *Simeon*, is hal o Josef a *Juta*, is hal o Jonan a *Josef*, is hal o Elaiakim a *Jonan*,

31 is hal o Melia a *Elaiakim*, is hal o Minan a *Melia*, is hal o Mattada a *Minan*, is hal o Nedan a *Mattada*, is hal o Tevit a *Nedan*,

32 is hal o Jesse a *Tevit*, is hal o Obet a *Jesse*, is hal o Boos a *Obet*, is hal o Salmon a *Boos*, is hal o Neson a *Salmon*,

33 is hal o Aminatab a *Neson*, is hal o Eram a *Aminatab*, is hal o Esrom a *Eram*, is hal o Feres a *Esrom*, is hal o Juta a *Feres*,

34 is hal o Jakob a *Juta*, is hal o Aisak a *Jakob*, is hal o Ebrahim a *Aisak*, is hal o Tira a *Ebrahim*, is hal o Nehor a *Tira*,

35 is hal o Siruc a *Nehor*, is hal o Riu a *Siruc*, is hal o Pilec a *Riu*, is hal o Iber a *Pilec*, is hal o Sela a *Iber*,

36 is hal o Kenan a *Sela*, is hal o Arfaksat a *Kenan*, is hal o Sem a *Arfaksat*, is hal o Noa a *Sem*, is hal o Lemek a *Noa*,

37 is hal o Medusela a *Lemek*, is hal o Inok a *Medusela*, is hal o Jeret a *Inok*, is hal o Mahalaliil a *Jeret*, is hal o Kenan a *Mahalaliil*,

38 is hal o Inos a *Kenan*, is hal o Sed a *Inos*, is hal o Atam a *Sed*, is hal o Atua a *Atam*.

NUARIN-TAS ALUPAS 4.

IS amen alupas ehele Iesu a Nesgan Upene, is ahes Jortan aien um atga o un, is imyiapan yin a Nesgan *Upene* an namasacen ;

2 is ago nedo oop vai yin a Tiapolo ira adiat is forte. Is eti caig tah nitai aien ira adiat iji ehki : is wat ti pan itac *nadiat* iji ehki, is ehele yin aien.

3 Is um ika ehelen a Tiapolo, El et Hal o Atua aiek, namu ika aiek yi areto inhat ineigki.

4 Is tas ehelen a Iesu, um ika, Eris aged, um ika, “Eri eti umumoh natimi vai areto ache, ja vai intas asega o Atua.”

5 Is imyiaridjai yin a Tiapolo an nedoon ijinies is ethi, um auro um ehvaig ehelen niji elcau asega an nobohtan :

6 is um ika ehelen a Tiapolo, Ekpu alupai euc nemda asega ineigki ainyak, im. niji itai upene iran : eris idim atceijaig imi nyak ; ekpu atceijaig ainyak imi natimi ineig ek merit ainyak *nalupai yin vaig* :

7 el et alaigaheni vai nyak aiek, el et par imi euc nitai *iji eigki* asega.

8 Is tas a Iesu, um ika ehelen, Apan aiek an nidjik, ak Satana : eris aged, *um ika*, “Namu alaig-

aheni vai Ihova Atua unyum aiek, um aheca o un” ache.

9 Is imyiapan yin Jerusalem aien, um atijai yin an nijintin neom ahlap, um ika ehelen, El et Hal o Atua aiek, namu ahes igcaki aiek *um aliaujaise* :

10 eris aged, um ika, “Etpu tas ehele ilpu agelo o un aien vai euc, mika eri aminjinai euc ara :”

11 “erupu aposjai euc irai ikmara ara, va an jim atgeig yi oplec neduom aiek an hat.”

12 Is tas a Iesu, um ika ehelen, Eris asaig, um ika, “Namu jim ago nedo oop vai Ihova Atua unyum aiek.”

13 Is wat oop *yin* ehni a Tiapolo, is ude yin aien ira adiat is eti elpat.

14 IS lep apan Calili a Iesu va nemda o Nesgan *Upene* : is apaahni intas vai yin an pece asega marahed mihtag.

15 Is esege *imi ra* aien irai eom alaigaheni ura, eris imyiahpas yin natimi asega.

16 ¶ Is apan Nasared aien eahki is upyi amen aien : is apan aien anliin neom alaigaheni an nadiat atumop, is idivaig nupyi edo o un, um atidai mika yi esvi itai.

17 Eris alupai yin nitasvitai o Aiseya naprofeta. Is algei nitasvitai aien, um ecetai nuarin ineig eris aged *intas ineigki* iran, *um ika*,

18 “*Et amen* ehelek a Nesgai Ihova ; is ati nyak aien mika ki asuptecnaig intas-upene ainyak ehele ilpu ihki atimi ; is abrai nyak aien mika ki ago cehcehe ainyak ilpu atimi emehe inliinmopura, um lep asuptecnaig natceijaivaig ilpu atimi eris tup leucse ra, um ago lah nesganimtai ilpu atimi aupat nesganimtara, um ahiyi ilpu atimi ohocred,

19 um asuptecnaig naopan upene o Ihova.”

20 Is atapanes an nitasvitai aien, um lep alupai naheca, um ateucse.

Eris amaharan ara asega anliin neom alaigaheni.

21 Is atupun aien, um ika ehele ra, Eh mun ehmejid an nadiat ineig an nuhup unyima intas ineigki eris aged.

22 Eris imyiahpas yin ara asega, um imyiali intas upene iji ehki is abes an nipjineusen. Eris ika ara, Inhal o Josef ineigki, ka o'o?

23 Is um ika ehele ra aien, Akupu idim ika ehelek aijaua an tas ecsi-pece ineigki, Ak natimi atipagki nemehe, namu ago cehcehe euc aiek; namu ago nedo iyehki aiek igcaki an pece unyum ecris atahajjeg aijama, nikavaig, *as* ago Kaperneum *aiek*.

24 Is um ika aien, Et inivajjec ineig ek asaig ehelemia ainyak mika, Et eti upene inliinmopoi atimi vaig tah naprofeta an pece o un.

25 Ek idim asan tas inivajjec ehelemia ainyak mika, eris amen an *pece* Isreel a ilpu takata is ahinag eris emesmas a ilpu atamnyura an naopan iyehki, an numoh o Elaija, eris atapanes an nohatag an mesese is esej im lep inmhoc is siks, is um alupas numlaig has an pece asega;

26 jai eris eti abraig pan Elaija ehelen tah ra, intakata is ethi ache is mas natamnyu un *is amen* Sarefad aien *nuarin-pece is ethi* Saiton.

27 Eris amen an *pece* Isreel a ilpu atimi lepros is ahinag an naopan iyehki, an numoh o Elaisa naprofeta; jai eris eti ago adicinadicin tah ra, Neaman ache nupu Sirya.

28 Eris wat atahajjeg nitai iji eigki ara asega anliin neom alaigaheni, eris edemda alupas ara,

29 um atidai, um aha pan itac yin an nuarin-pece *ura*, pan imyapan yin an nijin nedoon iyehki eris alcei niji eom ura iran, mika eri ethaigse yin.

30 Jai is apan aien an nibla ra, um atga o un,

31 um apan Kaperneum, nuarin-

-pece is ethi Calili, um esege imi ra irai iji adiat atumop.

32 Eris um imyiali nesege o un ara: is emda intas o un.

33 ¶ Is amen anliin neom alaigaheni natimi is ethi, is amen iran nagelo has, is ahlaig ijinies aien,

34 um ika, Ude *cama*; nai merit aiek vanhe ehelema, ak Iesu nup an Nasared? na mun ham aiek mika an auahas cama, ka o'o? ek ato euc ainyak; na Atimi Itaup o Atua aiek.

35 Is um acaiji yin a Iesu, um ika, Jim tas aiek, um atcejai yin. Is wat ethaigse yin an nibla ra a nagelo has, is atcejai yin aien, um eti auahas yin.

36 Eris um imyiali ara asega, um tas jipe ehele ra, um ika, Et echamecha intas ineigki! et esjilid natimi alupas o un im nemda o un, et acaiji ilpu agelo has aien, era atcejai *atimi* ara.

37 Is apaahni intas vai yin irai iji uari pece asega marahed mihtag.

38 ¶ Is abes anliin neom alaigaheni aien, um alau ijo, um apan anliin neom o Saimona. Is leh alupas nemehe ihlup a risi ehgai Saimona; eris ugni yin vai yin ara.

39 Is han aiji aien ithan, um acaiji nemehe ihlup; is um edoaijaig iran: is um auroauro aien um atidai, um aheca ura.

40 ¶ Is wat ete nagesega, eris imyapan ehelen ilpu atimi emehe is ahinag ara, is ahinag nemehe ira ra; is atijai nikman aien ira ra asega, um ago cehcehe ra.

41 Eris atcejai atimi is ahinag a ilpu agelo has, um ahlaig ijinies, um ika, Nai Kristo aiek Inhal o Atua. Is acaiji ra aien, mika eri jim tas ara: eris ato ara, nikavaig, is Kristo aien.

42 Is wat lahlah an tak apnyin, is atga o un aien, um apan an nuarin namasacen: eris ahilek yin natimi, um apan ehelen, um acaiji yin, mika yi jim ude ra aien.

43 Is um ika ehele ra aien, Eris idim ika ki asuptecnaig nelcau o Atua ainyak irai uari-pece et eche: eris abraig nyak mika *ki ago* nedo ineigki *ainyak*.

44 Is um esege *imi ra* aien irai eom alaigaheni Calili.

NUARIN-TAS ALUPAS 5.

IS aiji aien u unjop Jenesaret, eris atamerit ehelen natimi is ahinag, par atahaijeg intas o Atua;

2 is ecetai nelcau is ero an jop aien: eris asuol iran a ilpu atimi ahilek mu, um yiri opoig *ura*.

3 Is aridjai aien an nelcau is ethi irahki is obuun a Saimona, um ika ehelen yi apok tintin. Is ateucse aien an nelcau, um esege imi atimi.

4 Is wat tas ehni aien, is ika ehele Saimona aien, Akumu apok an jop aijaua, um ana irai opoig unyimia vai mu.

5 Is tas a Saimona, um ika ehelen, Ak natimi alupas, egra mun asjeuc an jop aijama an nepeig asega, jam eti leh tah nitai; jai ekpu lep ana an nopoig ainyak vai intas unyum.

6 Eris wat ago ara, eris ahtegana dau irai mu is ahinag acen ara: is um ahtamud nopoig *ura*:

7 eris auhan nikmara vai ilpu etoara ara, an tak elcau, mika eri apan um atau imi ra. Eris apan ara, is ohua nelcau is ero, um ubutpotet u netevaig.

8 Is wat almoi a Saimona Pitrus, is atpuse aien u niji neduei Iesu, um ika, Ude nyak aiek; ek atimi auatatimi ainyak, ak Natimarid.

9 Is imyiali aien, im lep ra asega ehelen, vai mu is ahinag eris leucse ara:

10 im lep Jakobus im Joanes ohwat hal o Sebetaius, erus atau imi Saimona arau. Is ika ehele Saimona a Iesu, Jim imtitaig aiek; napu leucse atimi aiek um imyihum pan.

11 Eris wat apahai ara, eris ude niji itai asega *ura* ara, um ahced yin.

12 IS amen a Iesu an nuarin-pece is ethi: is wat ecet yin natimi lepros is ethi, is atpuse an nesganintan aien, um ugni yin, um ika, Ak Natimarid, el et merit aiek, na emda aiek par ago adicinadicin nyak.

13 Is adan nikman aien, um atcei pan yin, um ika, Ek merit ainyak: namu adicinadicin aiek. Is auroauro um edoaijaig iran naleprose.

14 Is acaiji yin aien, mika yi jim asuptecnaig ehelen tah: *um ika*, Namu apan aiek, um ehvai euc ehele natimi ahlap, um ahlap va nadicinadicin iram, an nitai ineig is asaig a Moses, nitai asuptecnaig imi ra.

15 Ja is um idim apaahni intas vai yin: eris ahtag pan ehelen natimi is ahinag mika eri atahaijeg *intas o un*, um lep ika eri cehcehe va niji emehe *ura*.

16 Is ude *ra* aien, um apan an namasacen, um alaigaheni.

17 IS wat esege aien an nadiat is ethi, eris ateuc *eahki* a ilpu Farisi im ilpu atimi esege intas alep, eris ahes irai iji uari-pece asega Calili, im Jutaia, im Jerusalem: is ago cehcehe *atimi emehe* a Natimarid an nemda o un.

18 Eris imyiapan *ehelen* natimi is ethi atimi an nitai ahled, is emehe aien va napalse: eris merit ara nimyiapan yin vaig anliin neom, par ati *yin* an nuhup o un.

19 Jai is ehka vai ra napanvaig anliin neom va atimi is ahinag, ja eris ahei neom ara, um asvaijeije neom, um atise yin im lep nitai ahled *o un* an nibla atimi an nuhup o Iesu.

20 Is wat ecetai nimyiisjis nini-vaijec *ura* aien, is ika ehelen aien, Ak natimi ineigki, eh mun ikni-pagki nedo has unyum.

21 Eris aktaktai a ilpu atimi esege, im ilpu Farisi, um ika, Di neigki et asan tas has esjilid aien? et emda ache a Atua par iknipagki nedo has.

22 Is wat ato naktaktai ura a Iesu, is tas aien, um ika ehele ra, Inhe ineigki eka aktaktai anliinmopomia aijaua?

23 et tup upene nikavaig, Eh mun iknipagki nedo has unyum; ka nikavaig, Atidai aiek, um atga?

24 im lep ineig, mika aki ato aijaua, nikavaig, et emda a Inhal o natimi an nobohtan par iknipagki nedo has, (is ika aien ehele natimi emeche va napalse,) Ek ika ehelum ainyak, Atidai aiek, um leh nitai ahled unyum, um apan an neom unyum.

25 Is auroauro aien um atidai an nuhup ura, um leh nitai ineig is asjeuc iran aien, um atga o un, um apan an neom o un, um inyiahpas Atua.

26 Eris imyiali ara asega, um imyiahpas Atua; eris imtitaig alupas ara, um ika, Inta mun almoi niji itai imyiali akaija an nadiat ineigki.

27 ¶ Is wat ago nitai iji eigki aien, is alau ijo aien, um ecet natimi akwanaham is ethi, nidan Livai. is ateuc aien an neom asjapicnaig mune iran: is ika ehelen aien, Ahced nyak aiek.

28 Is ude niji itai asega o un aien, um atidai, um ahced yin.

29 Is auanetha alupas vai yin a Livai anliin neom o un: eris ateuc ehele ra a ilpu atimi akwanaham im lep tak atimi, is ahinag ara.

30 Eris tas upoupo a ilpu atimi esege im ilpu Farisi vai ilpu atimi atahaijeg yin, um ika, Eka auri aijaua par ehrihag um umwig aijaua im ilpu atimi akwanaham im ilpu atimi auatatimi?

31 Is tas a Iesu, um ika ehele ra, Er eti ika ehele ratimi atipagki ne-

mehe yi aminjinai ra era cehcehe ara; ja ara ache era emeche ara:

32 kis eti ham ainyak par ahlaig vai ilpu atimi upene, ja vai ilpu atimi auatatimi ache, mika eri adumoij anliinmopura ara.

33 ¶ Eris ika ehelen ara, Era auri a ilpu atimi atahaijeg Joanes im lep o ilpu Farisi par ehcalinag atwakam, um alaigaheni; ja era hag a ilpu *atimi atahaijeg* euc, um umwig?

34 Is ika ehele ra aien, Et ehka vai ilpu alaig o natimi leh ehgan natwakamvaig, an nanien u natimi leh ehgan ehele ra:

35 ja etpu yetpam nadiat *iji ehki*, uhu wit atipagki natimi leh ehgan ehele ra, erupu atwakam ara ira adiat iji ehki

36 ¶ Is lep asan tas ecsipece is ethi ehele ra aien, *um ika*, Et eti ijei pan inuarin napelumai mat tah natimi an mohtan napelumai; va yi jim ahpati *inmohtan napelumai* va napelumai mat, um eche nuarin *napelumai* mat, um lep eche inmohtan *napelumai*.

37 Et eti atladwi waina mat tah natimi irai hubej itu acen; va yi jim atpoijej inhubej vai waina mat, um elel *waina* um takitai inhubej:

38 ja er idim atladwi waina mat irai hubej mat; et par upene ehro.

39 Et wat umnyi *waina* itu tah natimi, et idim eti lep ahvig *waina* mat aien: et ika aien, Et esjilid *waina* itu.

NUARIN-TAS ALUPAS 6.

IS atga aien an nadiat atumop is ethi irai lelahapol hwiit; eris aldei nohoai hwiit a ilpu atimi atahaijeg yin, um uhpunuhoig, um hegaig.

2 Eris um ika ehele ra nahaiji ilpu Farisi, Eka auri aijaua par ago nedo ineig et itaup nagovaig ira adiat atumop?

3 Is tas ehele ra a Iesu, um ika, Akis idim esvi intas va nedo o Tevit aijaua, an nehtelee yin vaig, aien, im lep ra eris ahced yin ara;

4 is apan aien anliin neom o Atua, um leh nareto eris ahlap iran, um caig, um lep alaa ra eris ahced yin ara; era caig a ilpu atimi ahlap achie, et itaup vai tup atimi.

5 Is ika ehele ra aien, Et idim Atimarid an nadiat atumop a Inhal o natimi.

6 Is lep apan aien anliin neom alaigaheni an nadiat atumop is eche, um esege: is amen eahki natimi is ethi is urauo nikman inmatan.

7 Eris imyirris yin a ilpu atimi esege im ilpu Farisi, kit inyi ago cehcehe yin aien an nadiat atumop, mika erupu atijai itai iran ara.

8 Is ato naktaktai ura aien, um ika ehele natimi ineig is urauo nikman, Atidai aiek, um aiji an nibla ra. Is atidai aien, um aiji.

9 Is ika ehele ra a Iesu, Ekpu ahodaig caua ainyak va nitai inyi ethi; Et upene nagovaig nedo upene an nadiat atumop, ka nago-vaig nedo has? nimyatamaig atimi vaig, ka nauahas ra vaig?

10 Is aijidjid ra asega aien, um imyiarahed, um ika ehele natimi iyehki, Namu atgeig yapidi nikmam aiek. Is um ago aien: is um umoh upene nikman, um idivaig nahaijin nikman.

11 Is esjilid nedemda ura ara; eris tas jipe ara, um ika, Inti ago inhe akaija vai Iesu?

12 IS ahes eahki aien an naopan iyehki, um apan an nedoon, mika yi alaigaheni, is amen aien an nepeig asega, um alaigaheni vai Atua.

13 Is wat lahlah an tak apnyin, is ahlai vaig vai ilpu atimi atahaijeg yin aien, um ehta atimi is twelv

ira ra, um anvi nidara par ika ilpu apostolo;

14 Saimona, (is lep anvi nidan aien par ika Pitrus,) im Antrius etoan, im Jakobus im Joanes, im Filipus im Bardolomius,

15 im Madius im Tomas, im Jakobus inhal o Alfius, im Saimona eris anvi nidan par ika natimi leh imi ilpu Silotai,

16 im Jutas etoai Jakobus, im Jutas nupu Karyot, aien aigki is atimi aniv yin aien.

17 Is asuol aien im lep ra, um aiji igca is marara, im ilpu atimi atahaijeg yin is ahinag, im lep natimi is ahinag acen irai iji uari pece asega Jutaia im Jerusalem, im lep irai iji uari pece u unjop Tairus im Saiton, eris ahtag pan ehelen ara mika eri atahaijeg yin, um lep ika yi ago cehcehe ra aien va nemehe ira ra;

18 im lep ra eris amen ira ra a ilpu agelo has: is ago cehcehe ra aien.

19 Eris merit natimi asega mika eri atcei pan yin: is yetpan nemda o un ira ra, um ago cehcehe ra asega.

20 ¶ Is aijidjid ilpu atimi atahaijeg yin aien, um ika,

Eka mun ahesmoij aijaua et ipjidipjid inliinmopomia: et unyimia nelcau o Atua.

21 Eka mun ahesmoij aijaua et ehtelee caua aijaua an naopan ineig: akupu gaije aijaua. Eka mun ahesmoij aijaua eka ehteigtaig aijaua an naopan ineig: akupu imyiacitak aijaua.

22 Eka mun ahesmoij aijaua eru wit edemda vai caua atimi, um ahlo caua, um atuh caua, um ethaig pan nidamia et idivaig nitai has, vai Inhal o natimi.

23 Akumu imyiacitak aijaua an naopan iyehki, um adikdikjai va ancediaig unyimia: etpu idim esjilid nimitan imi caua an nohatag: is um ucece nedo o ilpu retpora vai ilpu profeta.

24 A'a, auwe vai caua, ak ilpu atimi ikni itai! akis mun leucose niji itai upene unyimia aijaua.

25 A'a, auwe vai caua, ak ilpu atimi gaije! etpu ehtelee caua aijaua. A'a, auwe vai caua, ak ilpu atimi imyiacitak an naopan ineig! akupu aunyauiwaig aijaua, um eli-teigtaig.

26 A'a, auwe vai caua, eru wit asan tas upene vai caua atimi asega! is um ucce nedo o ilpu retpora vai ilpu profeta efaifa.

27 ¶ Ak ilpu atimi atahaijeg *intas unyak*, ek asaig ehelemia ainyak *mika*, Akumu aiheuc vai ra aijaua era tak atimi iramia ara, um ago nedo upene vai ra era edemda vai caua ara,

28 um asan tas upene vai ra era asan tas has vai caua ara, um alaig-aheni vai ra era ago nedo has vai caua ara.

29 Et wit atcei nahaijin nahpam tah, anum lep ehvaig ehelen nahaijin *nahpam* aiek; et wit atipagki napelumai itac unyum tah, anum lep jim acaiji yin aiek *mika yi jim lep atipagki* napelumai uhup aien.

30 Et wit ugni euc vai itai tah natimi, anum alupai yin aiek; et wit atipagki niji itai unyum tah, anum jim lep ugni yin vaig aiek.

31 Akumu ago nedo ineigki va atimi aijaua, eka merit aijaua mika eri lep ago vai caua ara.

32 El eka aiheuc vai ra *ache* aijaua era aiheuc vai caua ara, etpu naaurineig vai caua a di? era aiheuc vaig jipe ra a ilpu atimi auatatimi.

33 El eka ago nedo upene vai ra *ache* aijaua era ago nedo upene vai caua ara, etpu naaurineig vai caua a di? era ago nedo ineigki a ilpu atimi auatatimi.

34 El eka alupai atimi itai aijaua, jam ika eri lep aru ara, etpu naaurineig vai caua a di? era alupaig jipe ra itai a ilpu atimi auatatimi, jam ika eri leh neruwaig ara yi tup apapa.

35 Akumu aiheuc vai ra aijaua era tak atimi iramia ara, um ago nedo upene *vai ra*, um alupai *ra* itai, um jim aktaktai neruwaig; etpu esjilid nimtan imi caua, akupu ilpu hal o un aijaua Et esjilid aien: et ago nedo upene aien vai ra sji ehki era eti aktaktai nedo upene o un ara, im lep vai ilpu atimi auatatimi.

36 Akumu aiheuc va atimi aijaua, um idivaig Etmamia, et tup aiheuc va atimi aien.

37 Akumu jim aktaktai has vaig tah aijaua, va uhpu eti aktaktai has vai caua: akumu jim asan tas has vaig tah aijaua, va uhpu eti asan tas has vai caua: akumu jim aru nedo has o un tah aijaua, va uhpu eti aru nedo has unyimia:

38 akumu alupai *atimi* itai aijaua, va uhpu alupai caua itai; erupu atohwaig itai an cat unyimia *natimi*; inyi ohua nitai asjaaignaig iran, um avise, um eucjeucjaigse, yi ohua, um elel. Erupu ago nedo ineigki vai caua *natimi*, aki ago vai ra aijaua.

39 ¶ Is asan tas ecsipeace ehele ra aien, *um ika*, Et ehka va natimi ineig et aupat nesganintan natauwaig irai natimi ineig et aupat nesganintan; erupu eropse an nehpan-itai arau.

40 Et eti esjilid a natimi atahaijeg irai natimi esege imi yin; ja erupu idivaig natimi esege ura ara asega, era ato upene itai ara.

41 Na auri aiek par almoi nahrincai an nesganintai etoam, jam eti aktaktai inmasincal an nesganintam?

42 Et ehka vai euc intasvaig ehele etoam, *um ika*, Ak etoak, ekmu atipagki nahrincal an nesganintam ainyak, jam eti aktaktai inmasincal an nesganintam: ak natimi efaifa, namu uhup aiek um atipagki inmasincal an nesganintam, va apu almoi upene aiek par atipagki nahrincal an nesganintai etoam.

43 Et eti oho nohu itai upene um

ohoi itai has, um eti oho nohu itai has um ohoi itai upene.

44 Er ato nauciai asega va nohoan. Era eti ehlek nohoai ateg atimi irai ausekrai, um lep eti ehlek nohoai vaine irai cai upunupun.

45 Et leh nitai upene a natimi upene ira aga upene anliinmopon; ja et leh nitai has a natimi auatatimi ira aga has anliinmopon: et asuptecnaig an nipjineucsen *natimi* nitai iji eigki et amen alupas anliinmopon.

46 ¶ Eka auri aijaua par ika vai nyak, Natimarid, Natimarid, jam eti imyiaiji intas unyak?

47 Ekpu asuptecnaig ehelemia ainyak et idivai di natimi ineig et ham ehelek aien, um atahajjeg intas unyak, um imyiaiji:

48 Et idivaig natimi is ethi aien is ucji obou inpan neom *o un* aien, um actaigse an mala: is ahga inwai, um lehpohi neom *o un*, ja is ehka inmi-hidaivaig; is ateuse an mala.

49 Aien et atahajjeg aien, jam eti imyiaiji, et idivaig natimi is ethi aien, is eti ucji inpan neom *o un* aien, jam tup actaigse an nobohtan: is wat ahpoi *neom o un* inwai, is um auroauro um echedeliekse; is esjilid inhas an neom iyehki.

NUARIN-TAS ALUPAS 7.

IS tas ehni aien irai tas asega o un ehele atimi, ja par apan Kaperneum.

2 Is emehe naheca o natimi alupas o ilpu eucsupo is ethi, um ubutpotet o unmas o un, is aiyu inliinmopon aien vai yin.

3 Is wat atahajjeg vai Iesu aien, is abrai ilpu atimi tas alep u nupu Jutaia aien, mika eri apan ara um ugni yin, mika yi han aien um ago ceheche naheca o un.

4 Eris apan ehele Iesu ara, um ugni emda yin ara, um ika, Et atimi upene aien mika an ago nitai ineigki aiek vai yin:

5 et aiheuc vai nup uran pece uja aien, um ago neom alaigaheni vai cama.

6 Is ahced ra a Iesu.

Is wat ubutpotet pan u neom aien, is abraig pan ilpu etoan a natimi alupas o ilpu eucsupo ehelen, mika eri ika ehelen ara, Ak Natimarid, jim imyidohalav euc aiek; ek eti upene ainyak, mika an apam aiek anliin neom unyak:

7 ek idim ika ainyak, ek eti upene ainyak napamvaig ehelum: namu tup asan tas ache aiek, etum umoh a naheca unyak:

8 ek aheca ainyak, eris ati nyak, ja era imyiaiji intas unyak a ilpu eucsupo: ek ika ainyak ehelen et ethi, Apan aiek, et um apan aien; im lep ehelen et eche, Apam aiek, et um apam aien; im lep ehele naheca unyak, Ago nitai ineigki aiek, et um ago aien.

9 Is wat atahajjeg intas ineigki a Iesu, is imyiali yin aien, um ahidai yin, um ika ehele ilpu atimi ahced yin, Ek asaig ehelemia ainyak mika, kis eti ecetai tah nimyiisjis ninivaijec esjilid ainyak, et idivaig ineig, an *pece* Isreel asega.

10 Eris wat lep apan an neom ara sji ehki eris abrai ra, eris ecet naheca iyehki ara is emehe aien numohvaig.

11 IS wat lahlah an tak apnyin, is apan aien an nuarin-pece is ethi, nidan Nein; eris ahced yin a ilpu atimi atahajjeg yin is ahinag, im lep atimi asega.

12 Is wat apan aien ubutpotet u neucse nathatahau an nuarin-pece iyehki, eris ahlisahlis natimi mas is ethi, is halav atamaig is ethi ache o risin aien, is mas natamnyu un: eris ahced yin natimi is ahinag an nuarin-pece iyehki.

13 Is wat alum yin a Natimarid, is aiheuc vai yin aien, um ika ehelen, Namu tinau aiek.

14 Is apan aien um atcei pan nahat; eris aiji a ilpu atimi ahlisahlis

yin. Is ika aien, Ak intakuras ineigki, ek ika ehelum ainyak, Namu atidai aiek.

15 Is um atidai natimi mas iyehki, um tas. Is ati yin aien ehele risin.

16 Eris imtitaig ara asega: eris imyiahpas Atua ara, um ika, Et mun atidai eheleija naprofeta esjilid et ethi; um lep ika, Et mun ateghe ilpu atimi o un a Atua.

17 Is apaahni intas ineigki vai yin an *pece* Jutaa asega, im lep irai iji uari pece asega marahed mihtag.

18 ERIS asuptecnaig ehele Joanes nitai iji eigki asega a ilpu atimi atahajeg yin.

19 Is ahlaig a Joanes vai ohwat atimi atahajeg yin is ero, um abrai rau mika eru apan ehele Iesu, *um ahodai yin*, um ika, Na atimi iyehki aiek eris ika, Etpu ham aien, ka intupu aitagai yin akaija?

20 Erus apan ehelen natimi erahki, um ika, Et abrai cumrau a Joanes Natimi baptiso, *mika ecru ahodai euc*, um ika, Na atimi iyehki aiek eris ika, Etpu ham aien, ka intupu aitagai yin akaija?

21 Is um ago cehehe atimi is ahinag aien an nuarin-nadiat iyehki va nauatialidi *ira ra*, im nemehe has, im ilpu agelo has; um ago lah nesganimta atimi is ahinag is aupat nesganimtara.

22 Is tas a Iesu, um ika ehele rau, Apan aijaurau um asuptecnaig ehele Joanes nitai iji eigki erau mun almoi aijaurau um atahajeg vaig; *nikavaig*, et lep lah nesganimtai ilpu atimi aupat nesganimtara, *um atga* a ilpu atimi asvahteuc neduora, *um adicinadicin* a ilpu atimi lepros, *um ahgei itai* a ilpu atimi ucjapines intikgara, *um anusjai* a ilpu atimi emesmas, eh *lep* asuptecnaig intas-upene ehele ilpu ihki atimi.

23 Et mun ahesmoij natimi ineig, et eti imyiehcama nyak aien.

24 ¶ Erus wat atga urau a natimi erahki is abrai rau a Joanes, is tas

ehele atimi a Iesu vai Joanes, *um ika*, Akis apan aijaua an namasacen par almoi inhe? nieg is anaamai iran nimtinjop, ka o'o?

25 akis idim apan aijaua par almoi inhe? natimi is aso yin aien an napelumai yilyil, ka o'o? ara era aso ra ara irai apelumai esjilid, um leh nitai caig upene, era amen ara irai *eom* o ilpu atimarid:

26 akis idim apan aijaua par almoi inhe? naprofeta is ethi, ka o'o? Maiya, ek asaig ehelemia ainyak *mika*, et esjilid aien irai ilpu profeta:

27 aien aigki eris aged intas vai yin, *um ika*, "Ek idim abrai naheca unyak ainyak mika yi uhup iram, etpu alped nefalaig imi euc aien, um uhup iram."

28 Ek asaig ehelemia ainyak *mika*, Is eti eteuc tahi naprofeta ira atimi iji eigki eris apos ra a risira, nesjilidvaig irai Joanes Natimi baptiso: ja et esjilid iran aien et upoupo aien an nelcau o Atua.

29 Eris aktaktai upene Atua atimi asega eris atahajeg *yin* ara, im ilpu atimi akwanaham, eris upyi leh nabaptiso o Joanes ira ra ara.

30 Ja eris ahecaijaig intas o Atua vai ra a ilpu Farisi im ilpu atimi esege, eris eti fi leh nabaptiso o um ira ra ara.

31 ¶ Is um ika a Natimarid, Inki ehve tas ecsipece ainyak va atimi an naopan ineig? era idivanhe ara?

32 era idivaig ilpu halav ara, era ateuc ara irai tiptag, um ahlaig jipe vai ra, um ika, Ecra mun alilai nau vai caua aijama, ja eka eti adikjai aijaua; ecra mun elhteigtaig imi caua aijama, ja eka eti taig aijana.

33 Is ham a Joanes Natimi baptiso um eti caig nitai caig aien, um eti umnyi waina; ja eka ika aijaua, Et amen iran a nagelo has.

34 Et mun ham a Inhal o natimi, um hag um umwig; ja eka ika aijaua, Alnoi natimi ineigki, et hag alupas aien, um umnyi waina, et etoai ilpu

atimi akwanaham aien, im ilpu atimi auatatimi!

35 Ja era ika a ilpu atimi arapau asega, Et idim upene narapakau.

36 ¶ Is imyiacaij yin a Farisi is ethi mika yi apan aien um hag ehelen. Is apan aien anliin neom o Farisi iyehki, um ateuc um hag.

37 Is *amen* an nuarin-pece iyehki intakata auatatimi is ethi, is wat ato aien, nikavaig, is ateuc a *Iesu* um hag anliin neom o Farisi, is leh nipjinitai alabaster aien is amen iran nitai aspi,

38 is aiji u neduon aien an nidjin, um taig, um yiri neduon irai idi imtan, um yiri mese irai umri idjinin, um ajumnyi neduon, um aspi an nitai aspi iyehki.

39 Is wat ecetai a Farisi iyehki is imyiacaij yin aien, is aktaktai inliinmopon aien, um ika, El et aprofeta natimi ineigki, el et mun ato intakata ineigki aien et atcei pan yin aien, im nedo o un; et *takata* auatatimi aien.

40 Is tas a *Iesu*, um ika ehelen, Ak Saimona, ek merit ainyak intasvaig ehelum. Is ika aien, Ak natimi esege, namu tas aiek.

41 Is *ika aien*, Is eteuc natimi ahtai itai is ethi, erus eti aru mune o un natimi is ero: is eti aru nuari-mune is faiv huntret natimi is ethi, um *eti aru nuari-mune* is fiste natimi is ethi.

42 Is wat eti eteuc tah nitai urau nintan, is um eti aktaktai nintan urau aien. Asuptecnaig *ehелек* aiek, *um ika*, inyi esjilid naiyu u inliinmopon tah rau a di vai yin.

43 Is tas a Saimona, um ika, Ek ika ainyak natimi ineig is eti aktaktai nintan alupas o un aien. Is ika ehelen aien, Et inivaijec intas unyum.

44 Is ahidaig pan yin ehеле intakata iyehki aien, um ika ehеле Saimona, Almoi intakata ineigki aiek; ek mun ham anliin neom unyum ainyak, *ja* nai eti alupai *nyak* inwai yiri neduok aiek: ja et mun yiri

neduok irai idi imtan aien, um lep yiri mese irai umri idjinin.

45 Na mun eti ajumnyi nyak aiek: ja ek wat ham inliin *neom* ainyak, et mun ajumnyi neduok intakata ineigki um eti atumop.

46 Na mun eti aspi nipek unyak aiek: ja et mun aspi neduok a intakata ineigki an nitai aspi.

47 Va nitai ineigki, ek asaig ehelum ainyak *mika*, Eh mun iknipagki nedo has is ahinag o un; va nedo ineigki et aiyu alupas inliinmopon aien *vai nyak*; aien er iknipagki nedo has eti elpat o un, et aiyu tintin inliinmopon aien *vai nyak*.

48 Is ika ehelen aien, Eh mun iknipagki nedo has unyum.

49 Ara eris ateuc um hag ehelen ara, is ika inliinmopura ara, Di neigki, et lep iknipagki nedo has aien?

50 Is ika ehеле intakata aien, Eh mun imyiatamaig euc va ninyiisjis ninivaijec unyum; atga unyum aiek an neigpa.

NAURIN-TAS ALUPAS 8.

IS wat ti pan itac nitai iji eigki, is apan aien irai iji uari-pece alupas asega, im niji uari-pece haklin, um efehtas, um asuptecnaig intas-upene va nelcau o Atua: eris ahced yin natimi is twelv,

2 im lep nahaiji ilpu takata iji ehki, is ahlo ilpu agelo has ehеле ra aien, um atipagki nemehe ira ra, Mere nupu Mactala, eris ahlo ilpu agelo has is seven ehelen,

3 im Joana ehgai Kusa naheca aminjinai itai o Herot, im Susana, im hal ra is ahinag, eris alupai yin niji itai ura ara.

4 Eris asjapicnaig pan ehelen natimi is ahinag eris ahes irai iji uari-pece asega ara, is ecsipece aien, *um ika*;

5 Is apan natimi ahapol is ethi par ahoaig upsi itai: is wat ahoaig aien,

is um elel nahaiji *upsi itai* an nahaijin nefalaig; eris atga iran *atimi*, eris um begaig imnan.

6 Is um lep elel nahaijin an nij; is um edel, um imlai; is eti opoh nobohtan.

7 Is um lep elel nahaijin irai efelelicai has; is um ededel nefelelicai has, um atgei.

8 Is um lep elel nahaijin an nobohtan upene; is um edel, um ohlo, um eteuc nohoan is wun huntret iran. Is asaig nitai iji eigki aien, ja par ahaig, *um ika*, Aien et eteuc intikgan aien par ahgei itai, etmu atahaijeg aien.

9 Eris ahodai yin a ilpu atimi atahaijeg yin, um ika, lutas ecsipece vanhe ineigki?

10 Is ika aien, Eh mun alupai caua mika aki ato aijaua niji itai adenaig an nelcau o Atua: ja *eh tas* ehele tak atimi irai tas ecsipece; mika eri alum itai, jam eti almoi; um atahaijeg itai, jam eti ahaijeg.

11 Nesgan tas ecsipece ineigki neigki:

Et upsi itai intas o Atua.

12 Ara, era *idivaig nupsi itai* an nahaijin nefalaig ara, ara aigki era atahaijeg *intas* ara, et um apan a Tiapolo, um atipagki intas anliinmopura, eri jim imyiisjis ninivaijec ara, um unumoh.

13 Ara era *idivaig nupsi itai* an nij ara, ara aigki era atahaijeg *intas* ara, um leh, um imyiacitak; et eti eteuc necvan tas ira ra, era eti elv-imyisjis ninivaijec ara, eh wat ago nedo oop vai ra era adumoi ara.

14 *Nupsi itai* ineig is elel irai efelelicai has et *idivai* ra, era atahaijeg intas ara, um atga ura, ja et atgei ra naktaktai inpadiaig *ura* in nedo imyiacitak an naopan *ineig*, era eti ohoai itai upene ara.

15 *Nupsi itai* an nobohtan upene et *idivai* ra era atahaijeg intas ara, um apos anliinmopura inivaijec um upene, era ohoai itai ara, um eti auatialidi.

16 ¶ Et wat atni incop alahala tah natini, et eti adahpoi aien an nijinitai, um eti atise ithan tinan; et atijai aien an nitai ati incop alahala iran, mika yi lah vai ra era apan anliin neom ara.

17 Uhpu ecetai niji itai asega eris adenaig; um lep ato um almoi niji itai asega eris adahpoi.

18 Va nedo ineigki, akumu atahaijeg aijaua um aktaktai upene: aien et o un itai, uhpu alupai yin; aien et eti o un itai, uhpu atipagki ehelen niji itai o un et ika aien o un.

19 ¶ Eris han ehelen a risin im ilpu etoan, is ehka vai ra napanvaig ehelen va atimi is ahinag.

20 Eris asuptecnaig ehelen *atimi*, um ika, Era aiji ijo a risum im ilpu etoan, um merit nalun euc vaig.

21 Is tas aien, um ika ehele ra, Risik im ilpu etoak iji eigki era atahaijeg intas o Atua ara um imyiaiji.

22 AN nadiat is ethi is aridjai an nelcau aien im ilpu atimi atahaijeg yin: is ika ehele ra aien, Ti apan akaija an jop, um apahai an nahaijin eahki. Eris ateejaig pok *nelcau* ara.

23 Eris wat apan ara, is umjeg aien: is um uejum pam neihio an jop; is um ahwaijai *nelcau*; eris ika ara, Etmu etc.

24 Eris apan ehelen ara, um ahugui yin, um ika, Ak Natimi alupas, ak Natimi alupas, intumu emesmas akaija. Is atidai aien, um acaiji nintinjop im nalupas u injop: is um esjaig, um eigpa.

25 Is ika ehele ra aien, Nimiisjis ninivaijec unymia yek ed? Eris intitaig ara, um imyiali, um tas jipe ehele ra, *um ika*, Et echam-echa natimi ineigki! et tas aien, et um imyiaiji intas o un nintinjop im injop.

26 ERIS apahai ara an pece Cat-ara et iblan *pece* Calili.

27 Is wat apahai aien, is aubillid yin natimi is ethi is up an nuarin-pece iyehki aien, eris amen iran a ilpu agelo has itu acen, is eti aso yin aien, um eti amen auliin neom, jam *amen* irai mai ij eris ikni atimi emesmas iran.

28 Is wat ecet Iesu aien, is aunyaawaig aien, um atpuse an nuhup o un, um ahlaig ijinies, um ika, Nai merit aiek vanhe ehelek, ak Iesu, Inhal o Atua esjilid? Ek ugni euc ainyak, mika an jim abli nyak aiek.

29 (Is tas ehele nagelo has aien mika yi atcejai natimi iyehki aien. Is ehcahinag asjirai yin aien: eris arore yin irai jaula, im lep atau hat; is um atgeig yamud jaula aien, is lep imyiapan yin an namasacen a nagelo has.)

30 Is ahodai yin a Iesu, um ika, Nidam di? Is um ika aien, Lijon: eris amen iran nagelo has is ahinag.

31 Eris ugni yin ara, mika yi jim abrai ra aien mika eri apan umatmas ara.

32 Is amen eahki picad is ahinag, um hag an lolan nedoon: eris ugni yin ara mika yi abrai ra eri ahei *picad* ara. Is um abrai ra aien.

33 Eris atcejai natimi iyehki a ilpu agelo has, um ahei picad: eris athut emda picad an nohmun isas, um ehlelelse an jop, um atpoijej.

34 Eris wat almoi nedo ineigki a ilpu atimi aminjinaig *picad*, eris aha ara, um apan, um asuptecnaig an nuarin-pece im lep an pece iyehki asega.

35 Eris apan *natimi* mika eri almoi nedo ineigki; eris apan ehele Iesu ara, um ecet natimi iyehki eris atcejai yin a ilpu agelo has, is ateuc aien u neduei Iesu, is amen iran napelumai, is mun eteuc lelen aien: eris um imtitaig ara.

36 Ara eris almoi ara, eris asuptecnaig ehele ra ara nedo ineigki is

umoh vaig aien is amen iran a ilpu agelo has.

37 Eris ugni yin a nupu Catara asega mika yi atga o un aien, um ude ra; eris imtitaig alupas ara: is aridjai an nelcau aien, um adumoij pan.

38 Is ugni yin a natimi iyehki, eris atcejai yin a ilpu agelo has, mika yi ahced yin aien: ja is adcejai yin a Iesu, um ika,

39 Namu lep apan aiek an neom unyum, um asuptecnaig nedo emda ineig et mun ago iram a Atua. Is atga o un aien um apan, um asuptecnaig an nuarin-pece asega o un nedo emda is ago a Iesu iran.

40 Is wat lep adumoij a Iesu, eris leh yin natimi *um imyiacitak*, eris idim aitagai yin ara asega.

41 IS apan natimi is ethi nidam Jerus, natimi alupas an neom alaigheni; um atpuse u neduei Iesu aien, um ugni yin mika yi apan aien an neom o un:

42 is eteuc inhalav atahaig o un is ethi ache, is twelv mesese iran, is ubutpotet o unmas o un aien.

Is wat apan aien, eris atamerit ehelen atimi.

43 Im lep ineig, intakata is ethi, is emehe aien va nahlamerai u inja an mesese is twelv, is ahtai elhni inpadiaig o un aien imi atimi atipagki nemehe, ja is ehka vai ra nago cehcehe yin vaig;

44 is apan aien an cehen, um atcei pan intid an napelumai iran; is auroauro um umot nahlamerai u inja iran.

45 Is ika a Iesu, Et atcei pam nyak a di? Eris ateri ara asega, ja is ika a Pitrus im lep ra ehelen, Ak Natimi alupas, era atamerit ehelum atimi asega, um euchaij-ehgaig, na auri aiek par ika, Et atcei pam nyak a di?

46 Is ika a Iesu, Et idim atcei pam nyak tali; ek mun ato ainyak, nikavaig, et mun ahes irak nemda.

47 Is wat ato intakata iyehki mika eris ato yin, is ucjucjucij aien, um apan ehelen, um atpuse an nuhup o un, um asuptecnaig ehelen an nuhup o atimi asega nitai ineigki is atcei pan yin vaig aien, im lep neti laulau o un um cehcehe.

48 Is um ika ehelen aien, Ak intakata ineigki, namu imyiacitak aiek : na mun cehcehe aiek va nimyisjis ninivaijec unyum ; atga unyum aiek an neigpa.

49 ¶ Is wat tas aien, is ahes tah an *nimmim* o natimi alupas an neom alaigaheni, um apan, um ika ehelen, Et mun mas inhal unyum, jim imyidohalav Natimi esege aiek.

50 Is wat atahaijeg a Iesu, is tas ehelen aien, um ika, Jim imtitaig aiek : namu imyisjis ninivaijec aiek, etpu lep umohi aien.

51 Is wat apan aien an neom, is acaiji atimi asega aien mika eri jim apan anliin *neom*, Pitrus ache, im Jakobus, im Joanes, im lep etnai natahaig im risin.

52 Eris imyitaig yin ara asega, um taig tas : is ika aien, Akumu atinau aijaua ; et eti mas aien, et umjeg aien.

53 Eris imyilav yin ara, eris ato ara, nikavaig, is mas aien.

54 Is abraig pok ijo ra asega aien, um arapse va nikman, um ahlaig, um ika, Ak natahaig ineigki, namu atidai aiek.

55 Is um nusjai aien, um auro-auro um atidai : is um ika aien eri alaan tah nitai caig.

56 Erus imyiali ahwat atmil o un : is acaiji rau aien mika eru jim asuptecnaig nedo ineigki arau ehelen tah.

NUARIN-TAS ALUPAS 9.

IS asjapicnaig ilpu atimi atahaijeg yin is twelv aien, um alupai ra nemda mika eri esjilid irai ilpu

agelo has asega ara, um lep ikni-pagki nemehe ira atimi :

2 is abrai ra aien mika eri apan ara, um asuptecnaig intas va nelcau o Atua, um ago cehcehe ilpu atimi emeche.

3 Is um ika ehele ra aien, Jim apos itai an nefalaig aijaua, niseuc, ka nefehcat, im nitai caig, im mune ; um jim apos napelumai inyi ero tah caua.

4 Aku wit yetpan aijaua an tah nimmim, um amen eahki, wat uhum pan naopan iyehki aki atga unyimia aijaua.

5 Eru wit eti leh caua natimi, aku wit ahes an nuarin-pece iyehki aijaua, wat atga unyimia um ucjucjai obohtan irai eduomia aijaua, nitai asuptecnaig imi ra.

6 Eris apan ara irai iji uari-pece asega, um asuptecnaig intas-upene, um ago cehcehe *atimi* irai iji uarin asega.

7 ¶ Is atahaijeg a Herot natimarid va nitai iji eigki asega is ago aien : is ehioehio inliinmopon aien, eris ika nahaiji ra, Et mun lep nusjai a Joanes ;

8 *eris* lep *ika* nahaiji ra, Et mun lep ehchos pam a Elaija ; *eris* lep *ika* nahaiji ra, Et mun lep nusjai tah et ethi irai ilpu profeta itu acen.

9 Ja is ika a Herot, Kis mun auud yamud nidjini Joanes ainyak ; jai di neigki, ek atahaijeg nitai iji eigki ainyak vai yin ? Is merit aien nalum yin vaig.

10 ¶ Eris wat adumoij pan *ehelen* a ilpu apostolo, eris asuptecnaig ehelen ara niji itai asega iji eigki eris ago ara. Is imyiacaij ra aien, eris apan ara an namasacen is ethi an nuarin-pece is ethi, nidan Bedseta, jam ateri.

11 Eris wat ato atimi, eris apitac yin ara : is leh ra aien, um asuptecnaig nelcau o Atua ehele ra, um ago cehcehe ra eris emeche ara.

12 Is wat jupura, eris apan ehelen natimi is twelv, um ika ehelen, Abrai atimi asega aiek, mika eri

apan ara irai iji uari-pece im lep inpece asega marahed mihtag, um amen iran, um ahilek nitai caig incara; et amasacen igcaki inta amen iran akaija.

13 Is ika ehele ra aien, Akumu alaa ra nitai caig aijaua. Eris ika ara, Et faiv ache nareto uja, um ero ache numu; el ecra eti apan aijama um auarimtan nitai caig inca atimi iji eigki asega.

14 Is idivaig eris faiv dausant a ilpu atamaig. Is ika ehele ilpu atimi atahaijeg yin aien, Asaig ehele ra aijaua mika eri ateucse ara yi fifte natah ira ra asega.

15 Is um ucco nago ura ara, um ika eri ateucse ara asega.

16 Is leh nareto is faiv aien im numu is ero, um easji pan an nohatag, um naaurineig, um iswoplecoplec, um alupai ilpu atimi atahaijeg yin, mika eri edaig ira ra asega ara.

17 Eris hag ara asega, um gaije : eris um asjapicnaig nuari itai hegaig eris eti atahni ara, is ohua nefecat is twelv.

18 IS echim amen aien um alaighaheni, eris amen ehelen a ilpu atimi atahaijeg yin; is ahodai ra aien, um ika, Era ika natimi, ainyak di aigki?

19 Eris tas ara, um ika, *Nai* Joanes aiek Natimi baptiso; um lep ika nahaiji ra, Elaija; um lep ika nahaiji ra, Et mun lep nusjai tah et ethi irai ilpu profeta itu acen.

20 Is ika ehele ra aien, Eka ika aijaua, ainyak di aigki? Is tas a Pitrus, um ika, *Nai* Kristo o Atua aiek.

21 Is acaiji emda ra aien, mika eri jim asuptecnaig nitai ineigki ehelen tah;

22 um ika, Eris idim ika etpu ahinag nohocred u Inhal o natimi, erupu amcel vai yin a ilpu atimi tas alep, im ilpu atimi ahlap esjilid, im ilpu atimi esege; erupu atgei yin ara, ja et wit ti pan itac nadiat inyi esej, etpu lep nusjai aien.

23 Is ika ehele ra asega aien, El et ika tah natimi yi ahced nyak aien, etmu ude nedo ineig aien et merit vaig aien, um apos nauincal atgeig o un irai iji adiat, um ahced nyak.

24 Aien et ika aien yi imyicoho yin, inyi mas aien: ja aien inyi mas vai nyak aien, etpu leh nitai umoh iran aien.

25 Et eti upene vaig tah natimi inlehvaig nobohtan asega, jam auahas yin, um erekinman *iran*.

26 Aien et imyiehcama nyak aien im lep intas unyak, etpu imyiehcama yin a Inhal o natimi an naopan iyehki inyi yetpam aien an natimi alupas o un, im *natimi alupas* o Etman, im lep *an natimi alupas* o ilpu agelo upene o un.

27 Et inivaijec ineig ek asaig ehemia ainyak *mika*, Era aiji igcaki nahaiji atimi eri upyi hup ara um ecetai nelcau o Atua, ja par ememas.

28 ¶ Is asan tas iji ehki aien, ja par ti pan itac nadiat is idivaig is eet, is leh Pitrus aien, im Joanes, im Jakobus, eris um aridjai ara an nedoon, mika eri alaighaheni.

29 Is wat alaighaheni aien, is um eche nesganimtan aien, um lep ahi napelumai iran *um* ememina.

30 Erus tas ehelen natimi is ero, Moses im Elaija:

31 erus ehcohos pan arau an natimi alupas *urau*, um asuptecnaig inmas o un etpu yetpam iran Jerusalem.

32 Is imtatte a Pitrus im lep rau erus amen ehelen arau: ja ehtijis wat aiji lahlah ahtaij, um ecetai natimi alupas o un, im lep natimi erahki erus aiji ehelen arau.

33 Erus wat ude yin arau, is ika ehele Iesu a Pitrus, Ak Natimarid, et upene vai caija namenvaig igcaki: ektijmu ago neom inyi esej aijumtaij; yi ethi imi euc, um ethi imi Moses, um ethi imi Elaija: is eti ato intas ineig aien is asaig.

34 Is wat tas aien, is ehcehos nepeig, um ataluopni pam ehtaij: is wat ataluopni pam ehtaij nepeig iyehki, eltijis um imtitaig alhtaij erahki.

35 Is ahes an nepeig nohran tah, um ika, Inhalav cop unyak ineigki: alhtijmu atahaijeg yin aijautaij.

36 Is wat ti nohran iyehki, is echim amen ache a Iesu. Ehtijis ateri alhtaij an naopan iyehki, um eti asuptecnaig ehelen tah nitai iji ehki eltijis ecetai ahtaij.

37 ¶ Is wat lahlah an tak apnyin, eris ahes an nedoon ara um asuol, eris aubillid yin atimi is ahinag.

38 Is idim ahlaig ijinies natimi is ethi ira ra, um ika, Ak Natimi esege, ek ugni euc ainyak, mika an almoi inhalav atamaig unyak aiek; et ethi ache inhal unyak:

39 et idim ahei yin a nagelo has, et um auroauro aien um aunyaw-waig; et lep auhainse yin aien, et um ahuya nipjineucsen aien, um avise yin, um esjum nude yin vaig:

40 ek mun ugni ilpu atimi atahaijeg euc ainyak mika eri ahlo yin ehelen; ja et ehka vai ra.

41 Is tas a Iesu, um ika, Ak ilpu atimi imyiisjis nahcil im ipjin *inliin-mopomia*, etpu ehed naopan namen unyak ainyak ehelemia, um eropse inliinmopok vai caua? imyiapam inhal unyum aiek igcaki.

42 Is wat apan aien, is auohuoh yin a nagelo has, um auhainse yin. Is acaiji nagelo has a Iesu, um ago celcelhe inhalav iyehki, um lep alupai etman yin.

43 Eris imyiali ara asega va nenda esjilid o Atua.

Eris wat imyiali nitai iji eigki asega ara is ago a Iesu, is ika chele ilpu atimi atahaijeg yin aien,

44 Akumu aktaktai upene intas iji eigki aijaua: ulpu ati Inhal o natimi irai ikma atimi.

45 Eris eti ato intas ineigki ara, eris adenaig vai ra, va nitai ineig,

eris eti ecetai ara: eris imtitaig ara inlep ahodai yin vaig vai intas ineigki.

46 ¶ Eris imyiisjis jipe ara mika, inyi esjilid ira ra tah *ra* a di.

47 Is ato naktaktai o inliinmopura a Iesu, is leh inhalav aien, um ati yin an nahaijin,

48 um ika chele ra, Aien etpu leh inhalav ineigki an nidak aien, et leh nyak aien; aien etpu leh nyak aien, et leh yin aien is abrai nyak aien: aien et upoupo aien iramia asega, etpu esjilid aien.

49 ¶ Is tas a Joanes, um ika, Ak Natimarid, eris ecet tah aijama, is ahlo ilpu agelo has aien an nidam; ecris acaiji yin aijama va nedo o un, nikavaig, is eti ahced caija aien.

50 Is ika a Iesu ehelen, Jim acaiji yin aijaua: aien et eti tak atimi iraija, et uja aien.

51 AN naopan iyehki is wat ubut-potet u naridjai o un aien, is ika aien yi idim apan Jerusalem,

52 is abrai atimi aien mika eri apan ara um uhup iran: eris atga ara, um yetpan an nuarin-pece is ethi u nupu Samerya, par imyecrei itai vai yin.

53 Ja eris eti leh yin ara, vaig neigki, nikavaig, is ika aien yi idim apan Jerusalem.

54 Erus wat ecetai *nedo ineigki* ahwat atimi atahaijeg yin is ero, Jakobus im Joanes, erus ika arau, Ak Natimarid, nai merit aiek, ka o'o, mika ecru ika aijumrau yi ahes incop an nohatag, um asuol, um auahas ra, et idivaig nedo ineig is ago a Elaija?

55 Ja is ahidai yin aien, um acaiji rau, um ika, Erau eti ato nedo o inliinmopomirau aijaurau:

56 et eti ham a Inhal o natimi mika yi auahas atimi, ja *et ham aien* mika yi imyiatamaig *ra*. Eris apan ara an nuarin-pece is eche.

57 ¶ Eris wat atga ara ara, is ika ehelen natimi is ethi an nefalaig,

Ak Natimarid, ki ahced euc ainyak um apan irai uarin iji eigki asega an hau iran aiek.

58 Is ika ehelen a Iesu, Et eteuc inhelhel o kuri aleg, im lep nasiom oi man; ja et ti nuarin asjeuc imi Inlal o natimi.

59 Is lep ika aien ehele natimi is eche, Ahced nyak aiek. Ja is ika aien, Ak Natimarid, namu ika aiek, ki upyi hup ainyak um apan, um atelmoi etmak.

60 Is um ika ehelen a Iesu, Erumu atelmoi ilpu atimi emesmas a ilpu atimi emesmas: jam apan aiek, um asuptecnaig intas va nelcau o Atua.

61 Is ika natimi is eche, Ak Natimarid, ekpu ahced euc ainyak; ja namu ika aiek, ki upyi hup ainyak um apan, um aiheuc vai ra an nimmim unyak.

62 Is um ika ehelen a Iesu, Natimi ineig et asjiraig nirak ucujitai aien, um lep atcejaig, et eti upene vai yin napanvaig an nelcau o Atua.

NUARIN-TAS ALUPAS 10.

IS wat ti pan itac nitai iji eigki, is lep ikni natimi is sevente is eche a Natimarid, um abrai ra mika eri apan ara um aro um aro ehni, um uhupiran irai iji uari-pece asega im lep irai iji uarin iji eig, is ika aien yi apan iran.

2 Is um ika ehele ra aien, Et idim alinag nohoai itai, ja era eti elpat a ilpu atimi asjapicnaig: akumu ugni Natimi alupas ohuun nohoai itai ajaua, mika yi abraig pan ilpu atimi asjapicnaig nohoan aien.

3 Akumu apan ajaua: ek idim abraig pan caua ainyak et idivai hakli siip irai iblai kuri aleg.

4 Jim apos mune ajaua, ka incat, ka incedpai eduomia; um jim atga aiheuc va atimi an nefalaig.

5 Aku wit apan an tahi nimmim ajaua, um uhup um ika, *Etmu*

eteuc neigpa ehele *nup uran* nimmim ineigki.

6 El et amen eahki inhalav an neigpa, etpu amen eahki neigpa unyimia: ja el et eti *amen aien*, etmu adumoij ehelemia *neigpa unyimia*.

7 Akumu amen ajaua an nimmim ineig, um bag um umnyi nitai iji eigki eri alaamia ara: er alupai natimi auritai nmtan. Jim amen ehcid ajaua.

8 Aku wit apan ajaua an tahi anuarin-pece, el era leh caua ara, akumu hegai itai iji eigki ajaua eri alaamia ara:

9 um ago cehcehe atimi emehe eahki, um ika ehele ra, Et mun yetpam ehelemia nelcau o Atua.

10 Aku wit apan ajaua an tahi anuarin-pece, el era eti leh caua ara, apan ajaua irai efalaig iran, um ika,

11 Ecra auha obohtan ineigki iramia ajama an nuarin-pece unyimia, et apol irama: ja akumu atun nitai ineigki ajaua, nikavaig, et mun yetpam ehelemia nelcau o Atua.

12 Ek idim asaig ehelemia ainyak mika, Inyi tintin nohocred o *nupu* Sotom an naopan iyehki, ja etpu alupas nohocred o *nupu an* nuarin-pece iyehki.

13 A'a, auwe vai caua, ak *nupu* Koresin! a'a, auwe vai caua, ak *nupu* Bedseta! el eris ago nauritai esjilid iji eigki an nuhup u *nupu* Tairus im *nupu* Saiton, eris mun ago an nuhup unyimia, el eris adumoij anliimmopura ara itu acen, *um aso ra* irai apelumai ucai, um ereuc an nolpa.

14 Inyi idim tintin nohocred o *nupu* Tairus im *nupu* Saiton, an *nadiat* almaijidjid, ja etpu idim esjilid nohocred unyimia.

15 Ak *nupu* Kaperneum, eris atijai caua an nohatag, ja uhpu ethainse caua sepagko an naupat.

16 Aien et atahajeg caua aien, et idim atahajeg nyak aien; aien et amcel vai caua aien, et idim amcel vai nyak aien; aien et amcel vai

nyak aien, et idim amcel vai yin aien is abraï nyak aien.

17 ¶ Eris adumoij pan *ehelen* natimi is sevente, um imyiacitak, um ika, Ak Natimarid, eera esjilid irai ilpu agelo has aijama va nidam.

18 Is um ika ehele ra aien, Kis alum Satana ainyak is ahes an nau-anohatag aien, um asuol, et idivaig nawainapit :

19 ek idim alupai caua nemda ainyak mika aki auhi imyiv aijaua im nispouv, um lep esjilid irai emda asega o natimi tak atimi; inyi idim eti aua has caua tah nitai :

20 akumu jim imyiacitak aijaua va nitai ineigki, nikavaig, eka esjilid irai ilpu agelo has aijaua; jam imyiacitak va nitai ineig, nikavaig, er aged nidamia an nohatag.

21 ¶ An nuarin-nadiat iyehki is imyiacitak inliinmopoi Iesu, um ika, Ek naaurineig vai euc ainyak, ak Etmak, Natimarid an nohatag im nobohtan, va nitai ineigki, nikavaig, as adenaig nitai iji eigki aiek vai ilpu atimi arapakau im ilpu atimi esjilid an nato itai, jam asuptecnaig ehele ilpu halav : maiya, ak Etmak; is idim ucco inliinmopom aiek.

22 Is ikni niji itai asega imi nyak a Etmak : et eti ato Inhal o *Atua* tah, Etmak ache; um *eti ato* Etmak tah, Inhal o *Atua* ache, im lep ra et merit a Inhal o *Atua* naniv yin vaig ehele ra.

23 ¶ Is ahidaig pan yin aien ehele ilpu atimi atahajjeg yin, um eklim tup tas, um *ika*, Era mun ahesmoij ara era almoi nitai iji eigki eka almoi aijaua :

24 ek asaig ehelemia ainyak mika, Eris merit a ilpu profeta is ahinag im ilpu atimarid nalmoivaig nitai iji eigki eka almoi aijaua, ja eris eti almoi ara; um atahajjeg nitai iji eigki eka atahajjeg vaig aijaua, ja eris eti atahajjeg ara.

25 ¶ Is atidai a natimi asuptecnaig intas alep is ethi, um oop yin, um ika, Ak Natimi esege, inki ago inhe

ainyak va ekpu leh nitai umoh iran ineig inyi ti lep ti?

26 Is ika ehelen aien, Eris aged inhe an tas alep? na esvi aiek um ikha *iran*?

27 Is tas aien, um ika, “Etmu aiyu inliinmopom aiek vai Ihova Atua unyum anliinmopom asega, im lep an nesgam asega, im lep an nemda asega unyum, im lep an naktaktai asega unyum; um lep *aiyu inliinmopom aiek va* natimi eblaamnem unyum, et idivaig *naiyu u inliinmopom* vai euc.”

28 Is ika ehelen aien, Na mun asuptecnaig upene aiek; ago nedo ineigki aiek, par umoh.

29 Ja is merit aien mika eri aktaktai upene vai yin, um ika ehele Iesu, Natimi eblaamnem unyak di?

30 Is tas a Iesu, um ika,

Is ahes Jerusalem natimi is ethi, um apan alaig Jeriko, um ohpoosei ilpu atimi elneg itai; eris um atipagki napelumai iran ara, um ati inmacop *iran*, um atga ura, um ude yin; is ubutpotet o unmas o un *aien*.

31 Ja is tup atga an nefalaig iyehki a natimi ahlap is ethi; is wat alum yin aien, is atga ethanethan *vai yin* aien an nahaijin nefalaig.

32 Im lep mapoi Livai is ethi, is han aien an nuarin iyehki, is wat apan aien um alum *yin*, is atga ethanethan *vai yin* aien an nahaijin nefalaig.

33 Ja is atga an nefalaig iyehki a nupu Samerya is ethi, um apan an nuarin iyehki; is wat alum yin aien, is aiheuc *vai yin* aien,

34 um apan ehelen, um atladwi naraki im waina an macop iran, um arore, um atijai yin an nifo o un, um imyiapan yin an neom ehele atimi asega is ethi, um aminjinai yin.

35 Is wat lahlah an tak apnyin, is wat atga o un aien, is alupai natimi is o un neom nuari-mune is ero aien, um ika ehelen, Aminjinai yin aiek : el et lep auanimtan tah nitai *vai yin* aiek, eku wit lep apam ainyak, ekpu lep leh nimtan imi euc ainyak.

36 Nai ika aiek, is atimi eblaamnem u natimi iyehki a di irai ehtaij raigki, is ohpoosei ilpu atimi ehneg itai aien?

37 Is ika aien, Aien is aiheuc vai yin aien. Is ika ehelen a Iesu, Apan aiek, um ago nedo yi idivaig ineigki.

38 ERIS wat atga ura ara, is apan aien an nuarin-pece is ethi: is leh pan yin anliin neom o un a intakata is ethi, nidan Marda.

39 Is eteuc etoan, nidan Mere, is ateucse aien u neduei Iesu, um atahajeg intas o un.

40 Is aktaktai a Marda va nauritai alupas o un, um apan ehelen, um ika, Ak Natimarid, na aktaktai aiek va nedo o etoak, ka o'o, ek echim auanaheca ainyak? asaig aiek ehelen mika yi atau imi nyak aien.

41 Is tas a Iesu, um ika ehelen, Ak Marda, ak Marda, na aktaktai niji itai et ahinag aiek, um ohocred:

42 ja et upene nitai et ethi *ache*; et mun leh nitai upene ineig a Mere, eri eti lep atipagki ehelen.

NUARIN-TAS ALUPAS 11.

IS alaigaheni aien an nuarin is ethi, wat atiid, is ika ehelen natimi atahajeg yin is ethi, Ak Natimarid, esege nalaigaheni imi cama aiek, et idivaig is esege imi ilpu atimi atahajeg yin a Joanes.

2 Is ika ehele ra aien, Aku wit alaigaheni aijaua, um ika,

Ak Etmama an nohatag, Etmu itaup nidam. Etmu yetpam nelcau unyum. Uhmum imyiaiji intas unyum an nobohtan, et idivaig an nohatag.

3 Alaama aiek nitai caig incama irai iji adiat.

4 Um jim aru tah nedo has unyima aiek; eera idim eti aru tah nedo has o atimi vai cama aijama. Um jim atau irama an nedo oop aiek; jam imyiatamaig cama va niji itai has.

5 ¶ Is ika aien ehele ra, Di neigki iramia et eteuc napah o un, el et apan ehelen aien an nijihgan nepeig,

um ika ehelen, Ak etoak, alupai nyak nareto yi eseij aiek, ekpu aru ainyak;

6 et mun ham nalaig unyak et ethi, ja et ti *nitai caig* unyak ineig ekpu alaan ainyak:

7 etpu tas aien anliin *neom o un*, um ika, Jim imyidohalav nyak aiek: eh mun atapanes an neucse neom, era asjeuc ehelek a ilpu hal unyak; et ehka vai nyak natidai-vaig, um alupai euc?

8 ek asaig ehelemia ainyak *mika*, Inyi eti atidai aien um alupai yin va nitai ineig, nikavaig, et apah o un aien, ja etpu atidai aien um alupai yin nareto iji eig is ugni yin vaig aien, va nimyisjis emda o un.

9 Ek asaig ehelemia ainyak *mika*, Akumu ugni itai aijaua, uhpu alupai caua; akumu ahilek itai aijaua, akupu ecetai aijaua; akumu etcetcei *intapanes* aijaua, uhpu asalgei vai caua:

10 aien et ugni itai aien, etpu leh aien; aien et ahilek itai aien, etpu ecetai aien; aien et etcetcei *intapanes* aien, uhpu asalgei vai yin.

11 El et ugni etman va nareto a inhal o un tah iramia, inyi ti alaan inhat aien; el *et ugni* numu aien, inyi ti alaan nimyiv aien mika numu;

12 el et ugni inhaklin jaa aien, inyi ti alaan nisperuv aien.

13 El eka ato aijaua, ak ilpu atimi auatatimi, par alupai ilpu hal unyima niji itai tup ahtai upene, et esjilid a Etmamia an nohatag par alupai ilpu atimi ugni yin Nesgan Upene.

14 IS ahlo nagelo has aien ehele *natimi is ethi* is pop aien. Is wat atceijaig *yin* a nagelo has, is tas natimi pop; eris um imyiali natimi asega.

15 Eris ika nahaiji ra, Et ahlo ilpu agelo has aien vai Belsebub natimarid o ilpu agelo has.

16 Eris lep oop *yin* nahaiji ra, um ugni yin va nitai asjaaicnaig an nohatag.

17 Ja is ato naktaktai ura aien, um ika ehelen ra, El et ika nero inliinmopoi nup uran tah nelcau, inyi ti amen; ka nero inliinmopoi atimi an tah nimnim, erupu atih ara:

18 el et ero inliinmopoi Satana, inyi ti amen nelcau o un: va nika unyimia, ek ahlo ilpu agelo has ainyak vai Belsebub.

19 El ek ahlo ilpu agelo has ainyak vai Belsebub, era ahlo ra vai di a ilpu hal unyimia? va nitai ineigki erupu ated caua ara.

20 El ek ahlo ilpu agelo has ainyak vai nupsikmai Atua, et mun yetpan chelemia nelcau o Atua.

21 El et ikni nij va atimi tah natimi emda um aminjinaig neom o un, et amen upene naga o un:

22 ja et wat apan ehelen natimi ineig et esjilid nemda o un iran, etpu leucose naga asega o un aien, is asgeig iran aien, um ahaig jipe niji itai o un.

23 Aien et eti leh imi nyak aien, et tak atimi irak aien; aien et eti atau imi nyak aien par asjapicnaig itai, et eduoraprap aien.

24 Et wat atcejiaig tah natimi a nagelo has, et um atga ahnag jipe aien irai uari amasacen, um ahilek igca yi atumop iran; ja et wat eti ecetai aien, et ika aien, Ki adumoij pan ainyak an neom unyak ineig kis upyi amen iran ainyak.

25 Et wat yetpan aien, um ecetai neom eh mun ahre um yecrei:

26 et apan aien, um leucose ilpu agelo has et eche et seven, et esjilid nauatatimi ura an nauatatimi o un; era apan anliin neom ara, um amen iran: is upyi hup natimi iyehki um has, ja par apitac um has esjilid.

27 Is wat asan tas iji ehki aien, is ahlaig ijinies a intakata is ethi ira atimi, um ika ehelen, Et mun ahesmoij a risum is apos euc aien, um alidam.

28 Is ika aien, Maiya, ja era mun idim ahesmoij ara era atahajeg intas o Atua ara, um imyiaiji.

29 ¶ Eris asjapicnaig pan ehelen atimi is ahinag, is atupun aien, um ika, Era atimi auatatimi natimi an naopan ineig: era merit ara nalmoi-vaig nitai asjaaicnaig; ja ulpu eti ago tah nitai asjaaicnaig vai ra, nitai asjaaicnaig ache o Jona naprofeta:

30 is itai asjaaicnaig a Jona imi nup an Ninivi, et um ucco etpu itai asjaaicnaig a Inhal o natimi imi atimi an naopan ineig.

31 Etpu atidai a intakata iyehki is atimarid aien an nuarin ineig et ahes nauritoga atahaig iran an nadiat almaijidjid an nuhup u atimi an naopan ineig, um ated ra: is ahes aien an nehni va nobohtan um apam, mika yi atahajeg narapakau o Solomon; ja et idim amen igcaki tah et esjilid aien irai Solomon.

32 Erupu atidai a nup an Ninivi an nadiat almaijidjid an nuhup u atimi an naopan ineig, um ated ra: eris adumoij anliinmopura ara vai intas asuptecnaig o Jona; ja et idim amen igcaki tah et esjilid aien irai Jona.

33 Et wat atni incop alahala tah natimi, et eti adenaig aien, um eti adahpoi an nipjinitai, ja et atijai aien an nitai ati incop alahala iran, mika eri almoi inlah ara era apan anliin neom ara.

34 Et itai lah u nohuja nesganimitaija: et wat weilah nesganimitam aiek, et lah upene nohum asega; ja et wat aplan nesganimitam aiek, et aupat nohum:

35 namu aminjinaig aiek va yi jim cas oposopos incop alahala unyum.

36 Va nedo ineigki el et lah upene nohum asega, um eti aupat tah inu-arin, etpu lep lah upene nohum asega, inyi idivaig incop alahala lah upene vai euc.

37 ¶ Is wat tas aien, is imyiacaij yin a Farisi is ethi, mika yi apan um hag ehelen; is apan aien anliin neom o un, um ateucose, um hag.

38 Is wat almoi nedo o un a Farisi iyehki, is imyiali aien mika is eti ahisjim aien ja par hag.

39 Is ika ehelen a Natimarid, Ak ilpu Farisi, eka ago adicinadin inyipin nipjinitai itac aijaua im lep naplet; ja et ohua inliinmopomia aijaua va niji itai eris atoraliak, im nedo has.

40 Ak ilpu atimi ahnag, aien is ago inyipin nipjinitai itac aien, is lep ago inliin aien.

41 Akumu aiheuc vai ilpu ihki atimi aijaua, um alupai ra itai unyimia; va etpu adicinadin niji itai asega imi caua.

42 A'a auwe vai caua, ak ilpu Farisi! eka ahtai nefelelicai auanipin upene aijaua, im nefelelicai acas, im nahtaicai asega, jam ude nedo atoh, um eti aiyu inliinmopomia vai Atua: et upene vai caua nagovaig nitai iji eigki, jam eti ude nedo iyehki.

43 A'a, auwe vai caua, ak ilpu Farisi! eka merit aijaua vai itai ateuc esjilid irai eom alaigheni, im naiheuc vai caua vaig atimi irai tiptag.

44 A'a, auwe vai caua, ak ilpu atimi esege im ilpu Farisi! eka ilpu atimi efaifa aijaua, eka idivaig nehpa itai atelmoi atimi emesmas iran aijaua er eti ecetai, era wat atga iran atimi, jam eti ato.

45 ¶ Is tas a natimi asupteanaig intas alep is ethi, um ika ehelen, Ak natimi esege, na lep ated cama aiek irai tas iji eigki.

46 Is um ika aien, Lep a'a, auwe vai caua, ak ilpu atimi asupteanaig intas alep! eka iknijai ira atimi itai ahelwei et ehka naposvaig aijaua, jam eti atcei pan itai ahelwei iji eigki an tah nupsikmamia.

47 A'a, auwe vai caua! eris atgei ilpu profeta a ilpu retpomia, ja eka ehteduo hat irai ehpa itai ira ra aijaua.

48 Eka idim asupteanaig aijaua mika et upene iramia nedo iyehki u ilpu retpomia: eris idim atgei ra ara, eka ehteduo hat irai ehpa itai ira ra aijaua.

49 Is lep ika a Atua arapakau,

Ekpu abraig pan ilpu profeta ehele ra ainyak im ilpu apostolo, erupu atgei ilpu ahaiji ra ara, um atmas *vai ilpu ahaiji ra*:

50 va uhpu aru ira atimi an naopan ineiginja irai ilpu profeta asega eris atladwi an naopan iyehki eris wat ago nobohtan, um imyihum pam naopan ineig;

51 ahes an ja irai Ebel um yetpam an ja irai Sakaraia, eris atgei yin an niblan nefata im neom ahlap: et inivaijec ineig ek asaig ehelemia ainyak *mika*, Uhpu aru ira atimi an naopan ineig.

52 A'a, auwe vai caua, ak ilpu atimi asupteanaig intas alep! akis atipagki kii *an tapanes* an namarero aijaua: eka eti apan iran aijaua, eka lep acaiji ra aijaua era apan iran ara.

53 Is wat asan tas iji ehki ehele ra aien, eris imyiisjis emda a ilpu atimi esege im ilpu Farisi, um oop yin, mika yi tas aien va niji itai is ahinag:

54 eris lep imyiiris yin ara, um atahaijeg yin par asjiraig tah intas o un, mika eri atijai itai iran vaig.

NUARIN-TAS ALUPAS 12.

AN naopan iyehki eris asjapicnaig natimi is ahinag acen, um atamerit, is atupun aien um tas ehele ilpu atimi atahaijeg yin, *um ika*, Akumu upyi hup aijaua um aminjinaig caua vai leven o ilpu Farisi, et itai efaifa ineigki.

2 Uhpu asupteanaig niji itai asega er adahpoi, um lep ato niji itai asega er adenaig.

3 Va nedo ineigki, uhpu atahaijeg intas asega an lah, akis asaig aijaua an naupat; um asupteanaig nijintin neom intas asega, akis tas ehlohol iran aijaua irai uarin adenaig.

4 Ek asaig ehelemia ainyak, ak ilpu etoak, *mika*, Akununu jim imtitai ra aijaua era atgei ohu atimi

ara, jam auatialidi par lep ago tah nitai.

5 Ekpu uhup ainyak um asuptecnaig ehelemia natimi ineig aki imtitai yin aijaua: Akumu imtitai yin aijaua, et wit atgei *nohumia* aien, et emda aien par erekhaig pan *nesgamia* an pece has; ek mun idim asaig ehelemia ainyak *mika*, Akumu imtitai yin aijaua.

6 Er ahtai hakli man et faiv vai fardig et ero, jam eti ahnag iran tah inyi ethi an nuhup o Atua.

7 Er idim esvi numri idjinimia asega. Va nitai ineigki, akumu jim imtitaig aijaua: eka esjilid aijaua irai hakli man et alinag.

8 Ek lep asaig ehelemia ainyak *mika*, Aien inyi asuptecnaig nyak aien an nuhup o atimi, etpu lep asuptecnai yin a Inhal o natimi an nuhup o ilpu agelo o Atua:

9 ja aien inyi ateri nyak aien an nuhup o atimi, uhpu ateri yin an nuhup o ilpu agelo o Atua.

10 El et asan tas has tah vai Inhal o natimi, eri eti aru iran: ja el et asan tas has tah vai Nesgan Upene, uhpu idim aru iran.

11 Eru wit imyiapan caua ara an nuhup o ilpu atimi asjapicnaig, im ilpu atimi alupas, im ilpu atimarid, akumu jim aktaktai aijaua *mika*, Inti auoh neveh tas akaija, um asanhe?

12 Etpu esege imi caua a Nesgan Upene an nuarin-nadiat iyehki intas ineig akupu asaig aijaua.

13 ¶ Is um ika ehelen a natimi is ethi ira ra, Ak natimi esege, tas aiek ehele etoak *mika* yi atiakoai niji itai u etmamrau aien.

14 Is ika aien ehelen, Ak nat eigki, is ati nyak a di *mika* ki acaiji itai imi caua ainyak um ahai itai?

15 Is ika aien ehele ra, Akumu almoi aijaua, um aminjinaig *caua*, um jim has iramia itai: inyi ti umoh tah natimi vai padiaig alupas et ohuun aien.

16 ¶ Is ecsipece ehele ra aien, um ika,

Is ahinag nohoai itai irai ahapol o natimi ikni itai is ethi:

17 is aktaktai inlinmopon aien, um ika, Inki ago iuhe ainyak? et ti inuarin igca inki ikni nohoai itai unyak iran ainyak.

18 Is ika aien, Ekpu ago nitai ineigki ainyak: ekpu alcapdicraig eom ikni itai unyak ainyak, um lep ago eom alupas, par ikni nohoai itai asega unyak iran im inpadiaig unyak:

19 ekpu ika ainyak ehele nesgak, Ak nesgak, eris mun ikni niji itai et ahinag vai euc uri mesese inyi ahinag; eklam amen aiek, *um* hag, *um* umwig, *um* imyiacitak.

20 Ja is ika ehelen a Atua, Ak natimi ahnag, uhpu atipagki nesgam iram an nepeig ineigki; etpu ohuun nitai iji eigki a di as asjapicnaig aiek?

21 Et idim ucco natimi ineig et ikni padiaig vai yin aien, jam ihki natimi an nuhup o Atua.

22 ¶ Is ika aien ehele ilpu atimi atahaijeg yin, Va nedo ineigki, ek asaig ehelemia ainyak *mika*, Akumu jim aktaktai numumoh unyimia aijaua, im nitai hegaig unyimia; um jim *aktaktai* nohumia, im nitai aso caua.

23 Et esjilid numumoh unyimia aijaua irai itai hegaig, im nohumia irai itai aso caua.

24 Aktaktai man aijaua: era eti aloai itai ara, um eti asjapicnai itai; et ti nimai padiaig ura, ka neom ikni itai; ja et alaa ra nitai caig a Atua: ja eka idim esjilid irai man aijaua.

25 Et eti emda tah iramia par ika yi lep yetpan an tah nadiat aien va naktaktai o un.

26 El eka auatialidi aijaua nago-vaig nitai ineig et tintin, eka auri aijaua par aktaktai niji itai et eche?

27 Aktaktai tisiai cai aijaua im nedel iran: et eti auritai, um eti ahod itai; ja ek asaig ehelemia ainyak *mika*, Is eti yecrei yin a Solomon an natimi alupas o un um idivaig tah nitai iji eigki.

28 El et ucce nedo o Atua va nefelelicai, et umoh an nobohtan inpeig, ja er erekhaigjai an cop an tak apnyin; *etpu* idim *aso* caua *aien*, et tintin nimyisjis ninivaijec unyimia.,

29 Akumu jim ahilek aijaua nitai caig incamia, im inwai lumamia; etmu jim ehioehio inliinmopomia aijaua.

30 Era ahilek nitai iji eigki asega a nup urai iji pece: ja et ato a Etmania mika et upene vai caua nitai iji eigki.

31 Akumu upyi hup aijaua um ahilek nelcau o Atua; uhpu lep alupai caua nitai iji eigki asega.

32 Eka idim eti elpat aijaua, jam jim imtitaig; et idim merit a Etmania mika yi alupai caua nelcau o un.

33 Akumu ahtai niji itai unyimia aijaua, um alupai ilpu ihki atimi itai tup ahtai; akumu ago cat imi caua aijaua yi ti mutit, um ikni padiaig unyimia esjilid an nohatag yi pu amen, inyi eti apan cahki tah natimi ehneg itai, um eti ehcai itai nages.

34 Etpu amen inliinmopomia aijaua an nuarin ineig, et amen inpadiaig unyimia iran.

35 Akumu arore nijihgama aijaua an nitai ahid, um lep ere incop alahala *unyimia*;

36 akumu idivai atimi iji eigki aijaua era aitgai natimi alupas ura ara, et wit ahes u natmehgan aien, um adumoijs pan *ehele ra* um etcetcei *intapanes*, mika eri auroauro um asalgei vai yin:

37 era mun ahesmoij a ilpu aheca iji eigki, et wat han *ehele ra* natimi alupas ura, um ecet ra naitgai *yin* vaig: et inivaijec ineig ek asaig ehelemia ainyak mika, etpu arore nijihgan aien an nitai ahid, um ika ehele ra eri ateucose ara um hag, etpu han aien um aheca ura:

38 el et han *ehele ra* aien an mutmutja nepeig, ka an nijihgan nepeig, um ecet *ra* inhiskivaig,

erupu ahesmoij a ilpu aheca iji eigki.

39 Eka ato aijaua, nikavaig, el is ato a natimi alupas an neom nuarin-nepeig ineig etpu han a natimi ehneg itai, el is aiji aien, va yi jim ataijhan neom o un aien.

40 Va nedo ineigki akumu yecrei caua aijaua: etpu yetpam a Inhal o natimi an nuarin-nadiat ineig aki eti aktaktai aijaua.

41 ¶ Is ika ehelen a Pitrus, Ak Natimarid, na asan tas ecsipece ineigki aiek ehelema ache, ka ehele atimi asega?

42 Is ika a Natimarid, Naheca inivaijec ineig um arapakau yek eda, etpu ati yin a natimi alupas o un mika yi esjilid aien irai ilpu aheca o un, par alaa *ra* nitai caig incara an nadiat ineig *yi alaa ra*?

43 et mun ahesmoij naheca iyehki, et wit ham a natimi alupas o un um ecet yin nagovaig nedo ineigki:

44 et inivaijec ineig ek asaig ehelemia ainyak mika, Etpu ati yin aien mika yi esjilid aien irai iji itai asega o un.

45 Ja el et ika inliinmopon naheca iyehki, Et eti fi auroauro um ham a natimi alupas unyak; um aredei ilpu aheca atamaig im ilpu aheca atahaig, um hag, um umwig, um ahnag iran;

46 etpu ham natimi alupas o naheca iyehki an nadiat iyehki inyi ti aktaktai aien, im lep an nuarin-nadiat iyehki inyi ti ato aien, etpu ucsamud yin aien, um ati yin an nimitan imi ilpu atimi imyisjis nahcil.

47 Naheca iyehki is ato intas o natimi alupas o un aien, jam eti yecrei yin, um eti imyiaiji intas o un, uhpu ehcahinag aredei yin:

48 ja aien is eti ato aien, jam ago nedo ineig er aredei yin vaig maru, eri eti ehcelpat aredei yin. Aien er alupai yin niji itai et ahinag, uhpu asaig ehelen mika yi lep aru alupas; aien era mun ikni ehelen

niji itai et alinag atimi, erupu lep ika ehelen ara yi ehcai ehni niji itai et alinag aien.

49 ¶ Ek mun ham ainyak mika ki atni incop an nobohtan; ek merit vanhe ainyak, el eh mun atni an naopan ineig?

50 Uhpū baptiso irak an tah nabaptiso; ek ohocred alupas ainyak um yetpan u nagovaig *irak*.

51 Jim ika aijaua, kis ham ainyak par ati neigpa an nobohtan: ek ika ehelemia ainyak, O'o; *kis ham ainyak* par etinohun nehti jipe *atimi*:

52 an naopan ineig um yetpan itu erupu amen natimi inyi faiv anliin neom inyi ethi, etpu acheache jipe inliinnopura ara; *erupu edemda* natimi inyi eseij va natimi inyi ero, um lep *edemda* natimi inyi ero va natimi inyi eseij:

53 etpu edemda a inhalav atamaig *o un* tah vai etman, im etman vai inhalav atamaig *o un*; *im lep* risin vai inhalav atahaig *o un*, im inhalav atahaig *o un* vai risin; *im lep* risin vai ehgai inhal *o un*, im ehgan vai risi natamnyu un.

54 ¶ Is lep ika ehele atimi aien, Eka wat ecetai naupat aijaua nehcohosvaig an nete *o un*, eka idim ika aijaua, Etpu ehe; et um ucco:

55 et wat uritoga atamaig, eka ika aijaua, Etpu ihlup; et um ucco:

56 ak ilpu atimi efaifa, eka ato nesganintan nohatag im nobohtan aijaua; eka auri aijaua par eti ato itai an naopan ineig?

57 maiya, eka auri aijaua par eti tup aktaktai nedo ineig et upene?

58 Na wit ahced natimi tak atimi iram aiek, um apan ehele natimi alupas, *aru wit atga* an nefalaig *aijaurau*, namu tas ehelen aiek va etpu atcejai euc aien; va yi jim imyiapan euc aien ehele natimi asuptecnaig nintan nedo has, etpu alupai naheca *o un* euc a natimi

asuptecnaig nintan nedo has, etpu ati euc anliin neom ipjin a naheca *o un*.

59 Ek asaig ehelum ainyak *mika*, Napu eti lep alau ijo aiek, um uhūm pan naopan iyehki napu leh ehni nintam aiek.

NUARIN-TAS ALUPAS 13.

A N naopan iyehki eris amen eahki A nahaiji ra um asuptecnaig nupu Calili iji ehki ehelen, is pelaigpelaig inja ira ra a Pailet pan irai itai ahlap ura.

2 Is tas a Iesu, um ika ehele ra, Akumu jim ika aijaua is esjilid nedo has *o nupu* Calili iji ehki irai *edo has* *o nupu* Calili asega, va niji ohocred iji ehki is yetpan ira ra:

3 ek idim ika ehelemia ainyak, O'o: ja el eka eti adumoij anliinnopomia aijaua, uhpu idim lep auahas caua asega.

4 Im lep atimi is eetiin iji ehki is jase neom ijinies ira ra Siloam, um atgei ra, akumu jim ika aijaua, is esjilid nedo has ura irai *edo has* *o atimi* asega eris amen Jerusalem ara:

5 ek idim ika ehelemia ainyak, O'o: ja el eka eti adumoij anliinnopomia aijaua, uhpu idim lep auahas caua asega.

6 ¶ Is lep ecsipece aien, *um ika*, Is ahoag nateg an nekaro vaine *o un* natimi is ethi; is apan aien um ahilek nohoan, jam eti ecetai.

7 Is ika aien ehele natimi aminjinai nekaro vaine *o un*, Kis idim ham ainyak an mesese is eseij, um ahilek nohoan nateg ineigki, jam eti ecetai: namu acaldei aiek; et tup arih nekaro.

8 Is tas aien, um ika ehelen, Ak natimi alupas, ude aiek *inyi* lep *amen* an mesese ineigki, ekpu ucji arahed *o un* ainyak, um aheli *o un*:

9 el et oho, *el et upene* : ja el eti oho, napu acaldei aiek.

10 ¶ Is esege *imi ra* aien anliin neom alaigaheni is ethi an nadiat atumop.

11 Is eteuc eahki intakata is ethi is areci aien irai mesese is eetiin va nagelo has is amen iran; is acvacva aien, is ehka vai yin natidajjai-vaig.

12 Is wat ecet yin a Iesu, is ahlaig vai *yin* aien, um ika ehelen, Ak intakata ineigki, eh mun atipagki nareci iram.

13 Is atijai nikman iran aien : is auroauro aien um atidajjai, um imyialpas Atua.

14 Is tas edemda a natimi alupas an neom alaigaheni va nedo o Iesu, nikavaig, is ago cehcehe *yin* aien an nadiat atumop, um ika ehele atimi, Et eteuc nadiat et siks eris idim ika eri auritai iran natimi : apam aijaua ira *adiat* iji eigki, va uhpu ago cehcehe caua, jam jim *ham* an nadiat atumop.

15 Is tas ehelen a Natimarid, um ika, Ak natimi efaifa, natimi ineig yek eda iramia, et eti ikni pan itac kurimatau o un aien ka nifo o un an nadiat atumop, um imyiapan ui wai?

16 ja et hal o Ebrahim intakata ineigki, is arore yin a Satana irai mesese is eetiin, et upene nedo ineigki par ahiyi nitai arore yin an nadiat atumop.

17 Is wat asan tas iji eigki aien, eris ehcamai a ilpu atimi tak atimi iran asega : eris imyiacitak natimi asega va niji itai esjilid asega is ago aien.

18 ¶ Is ika aien, Et idivanhe nelcau o Atua? ekpu evecsipece ainyak par asuptecnaig?

19 et idivaig nupsi mustart, is leh natimi is ethi, um ahoaig uman : is um edel, um ohu u nitai alupas; eris amen inman irai ran.

20 Is lep ika aien, Ekpu evecsipece ainyak va nelcau o Atua?

21 et idivaig leven, is leh intakata is ethi, um ati a flaur ehceseij asjaaicnaig iran, is um leven asega.

22 IS apan aien irai iji uari-pece esjilid, im irai uari-pece haklin, um esege *imi ra*, um atga an nefalaig pan Jerusalem.

23 Is um ika ehelen natimi is ethi, Ak Natimarid, uhpu imyiatamaig natimi inyi ti elpat, ka o'o? Is ika ehele ra aien,

24 Akumu eriss emda aijaua an neucse nirahed ehroehro : ek asaig ehelemia ainyak mika, erupu merit atimi inyi ahinag mika eri atga iran, ja inyi ehka vai ra;

25 et wit atidai natimi alupas an neom, um atapanes an tapanes, aku wit atupun aijaua um aiji ijo, um etcetcei intapanes, um ika, Ak Natimarid, ak Natimarid, asalgei vai cama aiek : etpu tas aien, um ika ehelemia, Ek eti ato caua ainyak, im inuarin ineig eka ahes iran aijaua :

26 akupu atupun aijaua, um ika, Ecris mun hag aijama um umwig an nuhup unyum, as esege aiek irai efalaig *an nuarin-pece* unyima.

27 Ja etpu ika aien, Ek asaig ehelemia ainyak *mika*, Ek eti ato caua ainyak, im inuarin ineig eka ahes iran aijaua; akumu atga unyinia aijaua asega, ak ilpu atimi ago nedo has.

28 Aku wit almoi Ebrahim aijaua, im Aisak, im Jakob, im ilpu profeta asega, an nelcau o Atua, ja uhpu ahlo pan itac caua, akupu aunyauwaig aijaua um ataktit eijimia.

29 Erupu ahes an ridjai o un ara, im nete o un, im narutu, im nuri-toga, um ateucse an nelcau o Atua.

30 Ara era apitac ara erupu uhup ara, jai ara era uhup ara erupu apitac ara.

31 ¶ An naopan iyehki eris apan nahaiji ilpu Farisi, um ika ehelen, Namu atga unyum aiek, um apan an taka uarin; et ika a Herot yi atgei euc.

32 Is ika ehele ra aien, Akumu apan aijaua, um asaig ehele kuri aleg naico, mika ek idim ahlo ilpu agelo has ainyak, um ago cehcehe *atimi* inpeig im lep imraig, ja an vid uhpu ago ehni *nauritai* unyak.

33 Ja ek et hidim ika ainyak ki atga inpeig, im imraig, im lep vid: er eti auahas tah naprofeta irai taka uarin, Jerusalem ache.

34 Ak Jerusalem, ak Jerusalem, na atgei ilpu profeta aiek, um asji ra sji eigki irai hat eris abraig pan ra ehelum; kis ehcahinag merit ainyak mika ki asjapicnaig pam ilpu hal unyum et idivaig injaa et aibuthan hal o un aien, ja akis esjum aijaua!

35 Et idim eteuc neom unyimia, ja et ahyuahyu: et inivaijec ineig ek asaig ehelemla ainyak mika, Akupu eti ecet nyak aijaua um uhum pan naopan iyehki, akupu ika aijaua, Et mun ahesmoij aien et ham aien an nidai Natimarid.

NUARIN-TAS ALUPAS 14.

AN nadiat atumop is ethi is apan aien anliia neom o natimi alupas is ethi is Farisi aien mika yi hag, eris imyiiris *nedo* o un ara.

2 Is ateuc an nuhup o un a natimi is ethi is emehe alagaigwai aien.

3 Is tas a Iesu ehele ilpu atimi asuptecnaig intas alep im ilpu Farisi, um ika, Et itaup nago cehcehe *atimi* vaig an nadiat atumop, ka o'o?

4 Eris eti tas ara. Is leh *yin* aien, um ago celcehe *yin*, um adcejai *yin*;

5 um tas ehele ra, um ika, Natimi ineig yek eda iramia, et wat etjose an nehpanitai nifo o un ka kurimatau o un, et eti aihiaigjai aien an nadiat atumop?

6 Is ehka vai ra nauudvaig intas iji eigki.

7 ¶ Is eesipcece aien ehele ilpu

atimi eris imyiacaig ra, is wat almoi *nedo* ura aien nahilekvaig itai ateuc esjilid imi ra; um ika ehele ra,

8 Et wit imyiacaig pan euc tah u inhag an natmehgan, namu jim ateucse aiek an nuarin esjilid; kit etpu lep imyiacaig natimi esjilid iram aien;

9 etpu apan natimi ineig et imyiacaig caurau, um ika ehelum, Asuol aiek va natimi ineigki; napu ateucse aiek sepamki, um ehcamai.

10 Ja et wit imyiacaig euc *tah natimi*, apan aiek um ateucse sepamki; et wit apan aien et imyiacaig euc, um ika, Ak etoak, namu aridjai aiek: erupu eccen vai euc ara era ateuc ehelum ara um hag.

11 Aien et ago nedo ijinies aien, etpu upoupo aien; aien et ago nedo upoupo aien, etpu esjilid aien.

12 ¶ Is lep tas aien ehele natimi ineig is imyiacaig *yin*, um *ika*, Na wit auanetha alupas aiek ka inhag alupas, jim imyiacaig ilpu apa unyum aiek, ka ilpu etoam, im ilpu atimi ehpan iram, im ilpu atimi ikni itai eblaamnem unyum; kit erupu lep imyiacaig euc ara, um aru nedo unyum:

13 na wit auanetha alupas aiek, imyiacaig ilpu ihki atimi, *im* ilpu atimi amot neduora, *im* ilpu atimi asvahtec neduora, *im* ilpu atimi aupat nesgaimtara:

14 namu ahesmoij aiek; et ehka vai ra naruvaig nedo unyum: ja napu leh neruvaig imi euc aiek an naopan iyehki eru wit anusjai a ilpu atimi upene.

15 ¶ Is wat atahajjeg intas iji eigki natimi is ethi is ateuc aien um hag ehelen, is ika ehelen aien, Et mun ahesmoij aien etpu hag aien an nelcau o Atua.

16 Is ika ehelen aien,

Is auanetha alupas natimi is ethi, um imyiacaig atimi is ahinag:

17 is wat jupura is abrai naheca o un aien mika yi asaig ehele ra eris

myiacaij ra, um ika, Apam aijaua; eh mun imyecrei niji itai asega.

18 Eris ehrimyisjis athiathi ara asega. Is uhup natimi is ethi, um ka, Ek mun auanimtan nuarin nobohtan ainyak, ek mun et hidim ka ainyak ki apan um almoi: ek ugni euc ainyak mika an jim imyisjis irak aiek.

19 Is lep ika is ethi, Ek mun auanintai kurimatau et ten ainyak, ekpu apan ainyak um almoi nedo ura: ek ugni euc ainyak mika an im imyisjis irak aiek.

20 Is lep ika is ethi, Ek mun leh ehgak ainyak; et ehka vai nyak napanvaig.

21 Is apan a naheca iyehki um asuptecnaig nitai iji eigki ehele natimi alupas o un. Is edemda a natimi alupas iyehki, um ika ehele naheca o un, Auroauro aiek um apan irai efalaig esjilid im lep imteri efalaig an nuarin-pece, um imyi-apam igcaki ilpu ihki atimi, im ilpu atimi amot neduora, im ilpu atimi asvahtec neduora, im ilpu atimi aupat nesgaimtara.

22 Is ika a naheca iyehki, Ak natimi alupas, ek mun ago nitai iyehki ainyak as asaig aiek, ja et eti ohua neom.

23 Is ika a natimi alupas ehele naheca o un, Apan aiek irai efalaig itac, im lep lelitai, um leucse atimi, um imyiapam ra, mika yi ohua neom unyak:

24 ek asaig ehelemlia ainyak mika, Inyi ti ecispan nitai caig unyak tah irai ra sji ehki eris imyiacaij ra.

25 ¶ Eris ahced yin natimi is ahinag: is ahidai yin aien, um ika ehele ra,

26 El et ham ehelek tah natimi, jam eti amcel vai etman, im risin, im ehgan, im ilpu hal o un, im ilpu etoan, im ilpu atahaig iran, im lep numoh o un, et ehka vai yin nikavaig yi atimi atahajjeg nyak.

27 Aien et eti apos nauincai at-

geig o un aien, um apitac nyak, et ehka vai yin nikavaig yi atimi atahajjeg nyak.

28 Et wat ika tah iramia yi acta neom ijinies, et upyi hup aien um ateucse, um esvi nimtan neom, kit et ahinag niji itai o un, uhpu actaig ehni;

29 va yi jim atupun neom aien, jam auatjalidi par actaig ehni, eru wit ecetai atimi, erupu imyiafakahcil yin ara asega,

30 um ika, Is atupun neom o un natimi ineigki, ja et ehka vai yin nactaig ehni vaig.

31 Et wat ika tah natimarid yi ati nedoa vai natimarid et eche, et upyi hup aien um ateucse, um aktaktai, kit et emda aien im natimi et ten dausant o un par aat irai natimarid ineig et imyiham nedoarin aien im natimi et twente dausant o un;

32 el et eti emda aien, et wat amen itac acen natimarid iyehki, et abrai ilpu aheca o un aien mika eri apan ara, um ugni yin mika etmu lep eigpa.

33 Et idim ucco, aien iramia el et eti ude niji itai asega o un aien, et ehka vai yin nikavaig yi atimi atahajjeg nyak.

34 ¶ Et upene inmohoanjop: ja el et aiyu inmohoanjop, uhpu lep leh nesgan um uauo?

35 et eti upene vai nobohtan, um eti uri nahelh; ja era erekhaig pan itac atimi. Aien et eteuc intikgan aien par ahgei itai, etmu atahajjeg aien.

NUARIN-TAS ALUPAS 15.

E R I S ahtag pan ehelen a ilpu atimi akwanaham asega im ilpu atimi auatatimi, mika eri atahajjeg intas o un.

2 Eris tas upoupo a ilpu Farisi im ilpu atimi esege, um ika, Et ai-

heuc vai ilpu atimi auatatimi natimi ineigki, um hag ehele ra.

3 Is ecsipecce ehele ra aien, um ika,

4 El et eteuc siip et wun huntret o un tah natimi iramia, el et eti ecetai et ethi ira ra aien, el et ude nainte nain an lelitai aien, um ahilek ineig is melga, um uhum pan naopan ineig et ecetai aien:

5 et wat ecetai aien, et ahelwei aien, um imyiacitak:

6 et wat apan an nimnim o un aien, et asjapicnaig ilpu etoan aien im ilpu atimi eblaammem *o un*, um ika ehele ra, Ti ehrimyiacitak siip unyak akaija is melga; ek mun ecetai ainyak.

7 Ek asaig ehelemia ainyak mika, Et idim ucco, etpu alupas ninyiacitak an nohatag vaig tah natimi auatatimi et adumoij anliinmopon aien, jam tintin ninyiacitak va natimi upene et nainte nain, eris eti ika vai ra eri adumoij anliinmopura ara.

8 ¶ El et eteuc nuari silver et ten o un tah intakata, el et etjo nuarin el et ethi, et atni incop alahala aien, um ahre neom, um ahilek emda um uhum pan naopan ineig et ecetai aien:

9 et wat ecetai aien, et asjapicnaig ilpu etoan aien im ilpu atimi eblaammem *o un*, um ika, Ti ehrimyiacitak nuari silver unyak akaija is etjo; ek mun ecetai ainyak.

10 Et idim ucco, ek asaig ehelemia ainyak mika, Et eteuc ninyiacitak an nuhup o ilpu agelo o Atua vaig tah natimi auatatimi et adumoij anliinmopon aien.

11 ¶ Is lep ika aien,

Is eteuc natimi is ethi, is ero inhlav atamaig o un.

12 Is ika a inharei ehele etman, Ak etmak, alupai nyak nahaiji padiaig *unyum* aiek yi imtak. Is atiakoi ira rau inpadiaig *o un* aien.

13 Is wat ti pan itac nadiat is eti elpat, is asjapicnaig niji itai asega

o un a inharei, um atga o un, um apan an pece itac acen, um eduaraprap irai padiaig o un an nedo auatiahnag.

14 Is wat eduaraprap ehni iran aien, is um eteuc numlaig has esjilid an pece iyehki; is um ihki natimi aien.

15 Is apan aien um amen ehele natimi is ethi an pece iyehki; is abrai yin aien mika yi apan uman um alayi picad.

16 Is merit aien inhegaigvaig narasitai iji eig eris hegaig picad: eris eti alaan *itai* tah natimi.

17 Is wat eteuc lelen aien, is ika aien, Era amen ehele etmak a ilpu aheca o un va nintan et alinag, um hag, jam eti etahni; ja ek mas ainyak va numlaig:

18 ekpu atidai ainyak um han ehele etmak, um ika ehelen, Ak etnak, kis mun ago nedo has ainyak va nohatag, im lep an nuhup unyum,

19 et eti upene nanvi nidak vaig mika inhal unyum: namu ika aiek ki idivaig tah naheca unyum va nintan ainyak.

20 Is atidai aien um han ehele etman. Is wat ehgin yetpan vaig aien, is ecet yin a etman, um aiheuc *vai yin*, um athut, um ablaijiraig pam yin, um aijumnyi yin.

21 Is ika ehelen a inhal *o un*, Ak etmak, kis mun ago nedo has ainyak va nohatag, im lep an nuhup unyum, et eti upene nanvi nidak vaig mika inhal unyum.

22 Is ika ehele ilpu aheca o un a etman, Akumu leh pame napelumai esjilid aijaua, um atohwai yin *iran*; um atise rig an nikman, um atohwai eduon a su:

23 im lep leh pame inhakli kuri-matau upene, um atgei; ti hegaig akaija, um imyiacitak:

24 et *idivaig* is mas a inhal unyak ineigki, jam lep umoh; is tup ti aien, ja eris lep ecet yin. Eris imyiacitak ara.

25 Is amen an lelitai a inhal o un inmetto: is wat apan ubutpotet u neom aien, is ahgei nohranitai *ura* aien im nadikjai *ura*.

26 Is ahlaig va naheca is ethi aien, um ika, Inhe sji eigki?

27 Is ika ehelen aien, Et mun ham a etoam; et mun atgei inhakli kurimatau upene a etmam, va nitai ineig et mun ecet yin aien incheche upene vaig.

28 Is edemda aien, um esjum napanvaig anliin *neom*: is alau ijo a etman, um acaiji yin.

29 Is tas aien, um ika ehele etman, Kis aheca unyum ainyak irai mesese is ahinag, um eti imyipalea tahi intas unyum irai iji adiat; ja as eti alupai nyak tahi inhaklin nanin aiek, mika ki imyiacitak ehele ilpu apa unyak ainyak:

30 ja is wat ham a inhal unyum ineigki, is eduaraprap irai padiaig unyum aien irai ilpu takata has, na mun atgei inhakli kurimatau upene vai yin aiek.

31 Is ika ehelen aien, Ak inhal *unyak*, na amen ehelek aiek irai iji mesese, et unyum niji itai asega unyak:

32 et upene *vai caija* nimyiacitakvaig, um cediaig: *et idivaig* is mas a etoam ineigki, jam lep umoh; is tup ti aien, ja eris lep ecet yin.

NUARIN-TAS ALUPAS 16.

IS ika aien ehele ilpu atimi atahaijeg yin,

Is eteuc naheca esjilid o natimi ikni itai is ethi; eris ika vai yin is eduaraprap irai padiaig o un aien.

2 Is ahlaig vai yin aien, um ika ehelen, Nev edo ineigki unyum ek mun atahaijeg vaig ainyak? asupteanaig nedo unyum aiek; et ehka vai euc inlep aheca *unyak* vaig.

3 Is ika inliinmopoi naheca iyehki, Inki auri ainyak? etpu atipagki nyak a natimi alupas unyak u nahecavaig *unyak*: et ehka vai nyak nacujitaivaig: um lep ehcamai ainyak nugni itai vaig:

4 ek mun ato ainyak nitai ineig ekpu ago ainyak, mika, uhu wit atipagki nyak an nahecavaig, eri leh pan nyak *atimi* irai eom ura.

5 Is asjapicnaig atimi iji eigki asega aien eris eti aru itai ara imi natimi alupas o un, is ika aien ehelen is ethi, As eti aru inhe aiek imi natimi alupas unyak?

6 Is ika aien, Narakai an nipjinitai asjaaicnaig iran et wun huntret. Is ika ehelen aien, Leh nitasvitai unyum aiek, um auroauro um ateuces, am aged fite.

7 Is lep ika ehelen is ethi aien, As eti aru inhe aiek? Is ika aien, Hwiit an nipjinitai asjaaicnaig iran et wun huntret. Is ika ehelen aien, Leh nitasvitai unyum aiek, um aged eete.

8 Is imyiahpas naheca auatatimi iyehki a natimi alupas o un, va nedo arapakau o un: et esjilid narapakau o atimi an nobohtan, va niji itai ura, irai arapakau o atimi lah.

9 Ek asaig ehelemia ainyak *mika*, Akumu aiheuc va atimi aijaua mika eri apa unyimia ara irai padiaig efaifa; va aku wit ememas aijaua, erupu leh pan caua ara irai innim inyi amen irai iji mesese.

10 Aien et ago nedo inivaijec aien irai itai tintin, etpu ago nedo inivaijec aien irai itai esjilid: aien et ago nedo efaifa aien irai itai tintin, etpu lep ago nedo efaifa aien irai itai esjilid.

11 El eka eti ago nedo inivaijec aijaua irai padiaig efaifa, etpu ikni *padiaig* inivaijec imi caua a di mika aki aminjinaig aijaua?

12 El eka eti ago nedo inivaijec aijaua irai iji itai oi tak atimi, etpu ikni niji itai unyimia imi caua a di?

13 Et ehka vaig tah natimi nah-
ecavaig u natimi alupas ero : etpu
acen inliinmopon aien vaig et ethi,
um aiyu inliinmopon vaig et
ethi ; etpu apol iran et ethi aien,
um amcel vaig et ethi. Et ehka
vai caua nahecavaig o Atua im Ma-
mona.

14 ¶ Eris lep atahaijeg nitai iji
eigki asega a ilpu Farisi, eris merit
vai padiaig ara : eris imyiafakahcil
yin ara.

15 Is ika ehele ra aien, Eka idi-
vaig ilpu atimi upene aijaua an
nuhup o atimi ; ja et ato inliinmop-
omia a Atua : et has acen nitai
ineig an nuhup o Atua, era tas
upene vaig atimi.

16 *Is amen intas alep is aged a*
Moses im *intas eris aged a* ilpu pro-
feta um yetpan irai Joanes : eris
atupun an naopan iyehki um asup-
tecaig nelcau o Atua, era miakaikai
emda iran natimi asega.

17 Inyi yetpan an tid iran no-
hatag im nobohtan, ja inyi ti yet-
pan an tid iran tah nuarin haklin
an tas alep.

18 Aien et abrai ehgan aien, um leh
intaka takata, et ago ingaijid aien :
aien et leh yin aien eris abrai yin,
et ago ingaijid aien.

19 ¶ Is eteuc natimi ikni itai is
ethi, is aso yin aien an napelumai
cop im napelumai yilyil, *um hag* alu-
pas um imyiacitak irai iji adiat :

20 is lep eteuc nihki natimi is
ethi, nidan Lasarus, eris ati yin an
neucse neom o un, is ateluopni yin
innacop iran,

21 is ahvig aien nuari itai hegaig
is etjo ithan nitai hag o natimi ikni
itai iyehki : eris apan kuri um eluon
innacop iran.

22 Is um mas nihki natimi
iyehki, eris apos pan yin a ilpu
agelo, um ati yin an riti Ebrahim :
is um lep mas natimi ikni itai
iyehki, eris um atelmoi yin ;

23 is erekinman irau aien an pece
has, is easji pan aien, um ecet

Ebrahim itac acen, im lep Lasarus
an ritin.

24 Is ahlaig aien, um ika, Ak et-
mak Ebrahim, aiheuc vai nyak aiek,
um abrai Lasarus, mika yi atise
nilpun nupsikman aien an wai, yi
aheyuyu namak ; et mun erekin-
man irak ainyak van cop alauma
ineigki.

25 Is ika a Ebrahim, Ak inhal
unyak, namu imyiehva aiek as leh
niji itai upene unyum aiek an nu-
moh unyum, um lep *leh* niji itai
has a Lasarus ; ja et imyiacitak
aien an naopan ineig, et erekinman
iram aiek :

26 im lep ineig, et eteuc niskanse
alupas juju an niblaija : et ehka
nahesvaig igcaki um apan eagko
ehelema ; um lep *ehka* nahesvaig
eagko um apam igcaki ehelema.

27 Is ika aien, Ak etmak, ek ugni
euc ainyak, mika an abrai yin
aiek yi apan aien an nimmim o
etmak :

28 (era faiv a ilpu etoak ;) um
asuptecnaig ehele ra, va eri jim lep
apam ara an nuarin nohocred in-
eigki.

29 Is ika ehelen a Ebrahim, Et
amen ehele ra a Moses im ilpu
profeta ; erumu atahaijeg ra ara.

30 Is ika aien, O'o, ak etmak
Ebrahim : el et ehcohos ehele ra
tah natimi mas, erupu adumoij an-
liinmopura ara.

31 Is ika ehelen aien, El era eti
atahaijeg Moses im ilpu profeta ara,
el et nusjai tah natimi mas, eri eti
imyisjsis ninivaijec ara.

NUARIN-TAS ALUPAS 17.

IS ika aien ehele ilpu atimi ata-
haijeg yin, Et ehka intivaig nedo
oop atimi ; ja a'a, auwe va natimi
ineig et ago *nedo oop* aien !

2 Et upene nathaivaig inhat alu-
pas irara *flaur* an nauinwan, um

ethaigse yin an jop; et has nago-vaig nedo oop vaig tah ilpu hal *unyak* iji eigki.

3 Akumu aminjinai caua aijaua: el et ago nedo has vai euc a etoam, namu acaiji yin aiek; el et taigtaig inliinmopon aien, namu jim aru nedo o un aiek:

4 el et ehceseven ago nedo has vai euc aien an nadiat et ethi, um lep ehceseven adumoiy pan ehelum aien, um ika, Et taigtaig inliinmop-ok ainyak; namu jim lep aru nedo o un aiek.

5 ¶ Eris ika ehele Natimarid a ilpu apostolo, Namu ika aiek yi esjilid nimyisjis ninivaijec unyima.

6 Is ika a Natimarid, El et idivaig nupsi mustart nimyisjis ninivaijec unyimia, el eka ika aijaua va nateg ineigki, Uhmum atecrei, um ahoag an jop; etpu ahgei intas unyimia.

7 El et ago nacujitai a naheca o un tah caua ka asgi kurimatau, et watahes uman a *naheca iyehki*, inyi ti ika ehelen aien, Apan aiek, um ateucse, um hag.

8 Etpu idim ika ehelen aien, Ago nitai caig incak aiek, um aso euc an napelumai unyum, um aheca unyak, ki uhup ainyak um hag um umwig; ja napu apitac aiek um hag um umwig.

9 Et naaurineig vai naheca o un aien et wat ago nitai iji eigki aien is asaig ehelen aien, ka o'o? Ek ika ainyak, O'o.

10 Et idim ucco, aku wit ago niji itai asega aijaua eris asaig ehelema, akumu ika aijaua, Ecra eti ilpu aheca esjilid aijama: ecra mun ago nitai iji eigki ache aijama eris asaig ehelema.

11 IS wat apan aien nalaig Jerusalem, is atga aien an niblan *pece* Samerya im Calili.

12 Is wat atga aien an haklin nuarin-pece is ethi, eris aubillid yin a ilpu atimi lepros is ten, eris aiji ara itac acen:

13 um ahlaig ijinies, um ika, Ak Iesu, Natimarid, aiheuc vai cama aiek.

14 Is wat ecet *ra* aien, is ika ehele *ra* aien, Akumu apan aijaua um ehvai caua ehele ilpu atimi ahlap. Eris wat apan ara, eris adicinadin ara.

15 Is wat ato natimi is ethi ira *ra*, nikavaig, is cehcehe aien, is lep adumoiy aien, um ahlaig ijinies um imyiahpas Atua:

16 is atpuse aien u neduon, um naaurineig vai yin: is upu Samerya aien.

17 Is tas a Iesu, um ika, Era mun adicinadin natimi iji eigki et ten; ja atimi et nain ji ek eda?

18 er eti ecet tah *ra* nadumoiy pam vaig par imyiahpas Atua, natimi an taka pece ineigki ache.

19 Is ika ehelen aien, Atidai aiek, um atga unyum: na mun cehcehe aiek va nimyisjis ninivaijec unyum.

20 ¶ Eris ahodai yin a ilpu Farisi, *um ika*, Etpu yetpam nelcau o Atua an nahopan? Is tas ehele *ra* aien, um ika, Et ham nelcau o Atua, jam eti alum atimi:

21 eri eti ika ara, Almoi igcaki! ka, Almoi eanko! et idim eteuc nelcau o Atua anliinmopomia.

22 Is ika ehele ilpu atimi atahaijeg yin aien, Etpu yetpam nadiat iji ehki, aku wit merit aijaua nalmoivaig nadiat inyi ethi o Inhal o natimi, jam eti ecetai.

23 Erupu ika ehelema ara, Almoi igcaki; ka, Almoi eanko: akumu jim apan ehele *ra* aijaua, um jim apitac *ra*.

24 Et idivaig nehcohos u nauwai- napit, an nahaijin nohatag um ehlo nahaijin nohatag nememina iran, etpu idim ucco a Inhal o natimi an nadiat *iyehki* o un.

25 Ja eris idim ika inyi upyi hup aien um leucse nohocred inyi ahinag; erupu lep amcel vai yin atimi an naopan ineig.

26 Is idivaig nedo an naopan

yehki an numoh o Noa, etpu ucco nedo an naopan iyek *inyi hamki* a Inhal o natimi :

27 eris hag ara, um umwig, um atmehgan, um asanlai, um uhup pan nadiat iyekhi is apan anliin nelcau a Noa, is ahgarero nobohtan vai it wai, um auahas atimi asega.

28 Is lep idivaig nedo an naopan iyekhi an numoh o Lot; eris hag ara, um umwig, um auarimtai itai, um ahtai itai, um ahapol, um actai eom ;

29 ja an nadiat iyekhi is ude Sotom a Lot, um atga o un, is ahes incop in narekwas an nobatag um asuol, um auahas atimi asega ;

30 etpu idim ucco nedo an nadiat iyek *inyi* ehcohos pamki a Inhal o natimi.

31 An naopan iyekhi aien *inyi* amen *ijinies* neom o *un* aien, um amen inpadiaig o un anliin neom, etmu jim asuol aien um leucose ; im lep aien *inyi amen* uman aien, etmu jim adumoij pan aien an *nimnim o un*.

32 Akumu imyiehva ehgai Lot aijaua.

33 Aien et ika aien yi imyicoho yin, etpu mas aien ; aien *inyi* mas aien, etpu leh nitia umoh iran aien.

34 Ek asaig ehelemia ainyak *mika*, an nepeig iyekhi erupu asjeuc an tinan *inyi* ethi natimi *inyi* ero ; uhpu atipagki *inyi* ethi, um ude *inyi* ethi.

35 Erupu ehrirara *flaur* intakata *inyi* ero ; uhpu atipagki *inyi* ethi, um ude *inyi* ethi.

36 Erupu amen umarau natimi *inyi* ero ; uhpu atipagki *inyi* ethi, um ude *inyi* ethi.

37 Eris tas ara, um ika ehelen, Eda, ak Natimarid ? Is ika ehele ra aien, Erupu asjapicnaig inmeijcop an nuarin ineig *inyi amen* iran nohu natimi mas.

NUARIN-TAS ALUPAS 18.

IS ecsipecce ehele ra aien, va nitai ineigki, nikavaig, eris idim ika eri alaigaheni *atimi* irai iji adiat, um jim auatialidi ;

2 is ika aien,

Is eteuc natimi alupas is ethi an nuarin-pece is ethi, is eti imtitai Atua aien, um eti eccen va atimi :

3 is lep eteuc intakata is ethi an nuarin-pece iyekhi is mas natamnyu un ; is apan ehele natimi iyekhi aien, um ika, Namu aru nedo has ineigki aiek et ago vai nyak natimi tak atimi irak.

4 Is eti fi auroauro aien um *aru* : ja par apitac, um ika inliinmopon, Ek idim eti imtitai Atua ainyak, um eti eccen va atimi ;

5 ja et imyidohalav nyak a intakata ineigki, va nedo ineigki ekpu aru nedo has vai yin ainyak, vai ki jim auatialidi ainyak va nedimdumoij o un irai iji adiat.

6 Is ika a Natimarid, Akumu atahajjeg aijaua intas o natimi alupas auatatimi iyekhi.

7 Etpu aru a Atua, ka o'o, va atimi is ehtai ra aien, era idim ugni yin ara irai iji adiat im niji epeig, et wat eti tas ehele ra aien ?

8 Ek asaig ehelemia ainyak *mika*, etpu auroauro aien um aru vai ra. Ja et wit ehcohos a Inhal o natimi, *inyi* idim eti ecetai nimyiisjis nini-vaijec an nobohtan aien.

9 ¶ Is ecsipecce aien ehele atimi iji eigki eris ispara imyianiv ra nedo atoh ura ara, um amcel vai tak atimi :

10 Erus apan anliin neom ahlap natini is ero um alaigaheni ; is Farisi is ethi, im lep natimi akwanaham is ethi.

11 Is aiji a Farisi, um echim alaigaheni, um ika, Ak Atua, ek naaurineig vai euc ainyak, ek eti idivaig tak atimi ainyak, ilpu atimi atoraliak itai, im ilpu atimi auata-

timi, im ilpu atimi ago ingaijid, im lep natimi akwanaham ineigki:

12 ek ehcero atwakam ainyak irai iji wiik, um ahtai nuarin itai et ethi ira ahaiji iji itai asega et ten unyak.

13 Is aiji itac acen a natimi akwanaham, is pam eti easji pan an nohatag aien; is ahpoi inritin aien, um ika, Ak Atua, aiheuc vai nyak aiek, ek atimi auatatimi ainyak.

14 Ek asaig ehelemia ainyak *mika*, is apan an neom o un natimi ineigki, eris ika uhmu eti aru nedo has o un, ja *eris ika uhpu aru nedo has o* natimi iyehki: aien et ika aien et esjilid, etpu upoupo aien; ja aien et ika aien et upoupo, etpu esjilid aien.

15 ERIS imyiapan ehelen ilpu halav ara, *mika* yi atcei pan ra aien: ja eris wat almoi nedo ineigki a ilpu atimi atahaijeg *yin*, eris acaiji ra ara.

16 Ja is ahlaig vai ra a Iesu, um ika, Akumu ika aijaua eri ham ehelek a ilpu halav haklin, um jim acaiji ra: era idivai ra ara era amen an nelcau o Atua ara:

17 et inivaijec ineig ek asaig ehelemia ainyak *mika*, Aien et eti leh nelcau o Atua aien et idivaig inhalav, inyi ti apan iran aien.

18 ¶ Is ahodai yin natimi alupas is ethi, um ika, Ak Natimi esege upene, inki ago inhe ainyak va ekpu leh nitai umoh iran ineig inyi ti lep ti?

19 Is um ika ehelen a Iesu, Na auri aiek par aniv upene nyak? et eti upene tah, Atua ache:

20 na ato niji tas alep aiek, *eris ika*, "Jim ago ingaijid, Jim atgei natmas, Jim ehneg itai, Jim asan tas ahcil, Namu eccen vai etmam im risum aiek."

21 Is ika aien, Kis apos ji eigki asega ainyak an halav unyak um uhum pam naopan ineig.

22 Is wat atahaijeg nitai iji eigki a Iesu, is ika ehelen aien, Nai eti ago nitai et ethi aiek: namu ahtai niji

itai asega unyum aiek, um alupai ilpu ihki atimi, napu idim leh niji itai upene an nohatag aiek: um lep apam aiek, um apitac nyak.

23 Is wat atahaijeg nitai iji eigki aien, is taigtaig alupas aien: is idim atimi ikni itai aien.

24 Is wat almoi a Iesu, nikavaig, is taigtaig alupas aien, is ika aien, Et ehka va atimi iji eig era ikni itai ara napanvaig an nelcau o Atua!

25 et tup upene vai kamela nami-liakvaig an hed an nitel, jam ehka va natimi ikni itai napanvaig an nelcau o Atua.

26 Ara eris atahaijeg ara, eris ika ara, Uhpu imyiatamaig di?

27 Is ika aien, Et ehka nitai iji eigki va atimi, ja et tup upene vai Atua.

28 Is ika a Pitrus, Ecris idim ude niji itai asega aijama, um ahced euc.

29 Is um ika ehele ra aien, Et inivaijec ineig ek asaig ehelemia ainyak *mika*, Ara asega eris ude eom *ura*, im ilpu atmil *ura*, im ilpu etoara, im ilpu ehgara, in ilpu hal *ura*, va nelcau o Atua,

30 erupu leh neruvaig esjilid ara an naopan ineig, im lep nitai umoh iran ineig inyi ti lep ti, an naopan iyek.

31 IS leucse atimi is twelv aien, um ika ehele ra, Intupu idim apan Jerusalem akaija, uhpu ehneijid niji itai asega eris aged a ilpu profeta vai Inhal o natimi.

32 Uhpu ati yin ehele nup urai taka pece, erupu inyiafakahcil yin ara, um abli yin, um agdei yin,

33 um aredei *yin*, um atgei yin; ja et wit ti pan itac nadiat inyi esej, etpu lep nusjai aien.

34 Eris eti ato nitai iji eigki ara: eris adenaig intas ineigki vai ra, eris eti ato nitai iji eigki ara eris asup-tecnaig.

35 ¶ Is wat ubutpotet pan Jeriko

aïen, is ateuc an nahaijin nefalaig natimi is ethi is aupat nesganimtan, um ugni itai :

36 Is atahaijeg aïen atimi is ahinag natgavaig an nefalaig, is ahodaig aïen, *um ika*, Di sji eigki?

37 Eris ika ehelen ara, Iesu ineigki nup an Nasared, et apam an nefalaig.

38 Is ahlaig aïen, um ika, Ak Iesu, Mapoi Tevit, aiheuc vai nyak.

39 Ara eris uhup ara eris acaiji yin ara mika yi jim tas aïen: ja is esjilid nahlaig o un, *um ika*, Ak Mapoi Tevit, aiheuc vai nyak.

40 Is aiji a Iesu, um ika eri imyiapan yin ehelen: is wat apan ubutpotet *ehelen* aïen, is ahodai yin aïen,

41 um ika, Nai merit aiek vanhe mika ki ago imi euc ainyak? Is ika aïen, Ak Natimarid, *ek merit ainyak* mika yi lah nesganintak.

42 Is ika ehelen a Iesu, Etpu lah nesganimtam aiek: na mun celcehe aiek va nimyisjis ninivaijec unyum.

43 Is um auroauro um lah nesganimtan aïen, is ahced yin aïen, um inyiahpas Atua: eris wat ecetai atimi asega, eris inyiahpas Atua ara.

NAURIN-TAS ALUPAS 19.

IS yetpan Jeriko a Iesu, um atga ehni iran.

2 Is *amen eahki* natimi is ethi, nidan Sakius, natimi alupas o ilpu atimi akwanaham; is atimi ikni itai aïen.

3 Is eriss ehele Iesu aïen mika yi alum *yin* um ato yin; ja is ehka vai yin va atimi is ahinag, is upoupo aïen.

4 Is athut aïen um uhup *ira ra*, um ahei nauyerop alupas is ethi, mika yi alum yin: eris ika iny apan aïen an *nefalaig* iychki.

5 Is wat yetpan an nuarin iychki

a Iesu, is easji pan aïen, um ecet yin, um ika ehelen, Ak Sakius, auroauro aiek, um asuol; ekpu idim amen ainyak an neom unyum an nadiat ineigki.

6 Is auroauro aïen, um asuol, um leh yin, um imyiacitak.

7 Eris wat almoi ara, eris tas upoupo ara asega, um ika, Et apan aïen alaig ehele natimi auatatimi.

8 Is aiji a Sakius, um ika ehele Natimarid, Ak Natimarid, ekpu alupai ilpu ihki atimi nahaiji padiaig unyak ainyak; el kis atoraliaik tah nitai ainyak ehele tah natimi va nedo efaiifa, ekpu ehemanohwan aru ainyak.

9 Is ika ehelen a Iesu, Et mun yetpam nitai imyiatamaig *caua* an nimnim ineigki an nadiat ineig, et idim mapoi Ebrahim aïen:

10 et ham a Inhal o natimi mika yi ahilek ilpu atimi ahnag, um imyiatamaig ra.

11 ERIS wat atahaijeg intas iji eigki ara, is lep ecsipece aïen, va nitai ineig is ubutpotet Jerusalem aïen, eris lep aktaktai ara mika yi auroauro um ehcohos pan nelcau o Atua.

12 Is ika aïen,

Is apan an pece itac acen natimi alupas is ethi mika eri ati yin yi atimarid an pece *o un*, ja par lep adumoij.

13 Is asjapicnaig ilpu aheca o un is ten aïen, um alupai ra nuari-mune is ten, um ika ehele ra, Aminjinaig *sji eigki* aijaua um yetpan u nadumoij pam unyak.

14 Eris edemda vai yin a nup urai pece o un, um abraï atimi mika eri apitac yin, um ika, Ecra esjum aijama, nikavaig, yi atimarid an pece unyima natimi ineigki.

15 Is wat adumoij aïen, um atimarid an pece *o un*, is ika aïen eri asjapicnaig pan ehelen ilpu aheca iji ehki, is alupai ra mune iji ehki aïen, mika yi ato is ehed *mune* iji

eig eris leucose ara va nauarimtai itai ura.

16 Is apan *ehelen* natimi is ethi, um ika, Ak natimi alupas, ek mun leh nuari-mune et ten ainyak an nuari-mune et ethi unyum.

17 Is ika ehelen aien, Et upene, ak naheca upene, na mun aminjinaig upene nitai eti elpat aiek, napu atimi alupas aiek irai iji uari-pece iny ten.

18 Is lep apan is ethi, um ika, Ak natimi alupas, ek mun leh nuari-mune et faiv ainyak an nuari-mune et ethi unyum.

19 Is lep ika ehelen aien, Napu lep atimi alupas aiek irai iji uari-pece inyi faiv.

20 Is lep apan is ethi, um ika, Ak natimi alupas, nuari-mune unyum ap eigki, kis mun adei ainyak an napelumai um aminjinaig :

21 kis intitai euc ainyak, na atimi ipjin aiek ; na asjapicnaig itai aiek an nuarin ineig as eti terinterim irai itai iran aiek, um leucose itai an nuarin ineig as eti ahoaig itai iran aiek.

22 Is ika ehelen aien, Ak naheca auatatimi, ekpu aru nedo has unyum ainyak et idivaig intas unyum : as ato aiek mika kis atimi ipjin ainyak, um asjapicnaig itai an nuarin ineig kis eti terinterim irai itai iran ainyak, um leucose itai an nuarin ineig kis eti ahoaig itai iran ainyak :

23 as auri aiek par eti alupai ilpu atimi ahtai mune nuari-mune unyak, mika ki leh *mune unyak* ainyak an napam unyak, im lep ineig yi eled ?

24 Is ika aien ehele atimi eris aiji ubutpotet ara, Atipagki nuari-mune et ethi o un ajaua, um alupai natimi ineig et ten nuari-mune o un.

25 (Ja eris ika ehelen ara, Ak natimi alupas, et mun ten nuari-mune o un aien.)

26 Ek asaig ehelema ainyak mika, Ara asega et ura niji itai, uhpu

alupai ra ; ja aien et eti o un niji itai, uhpu atipagki niji itai iran.

27 Im lep ineig, akumu imyiapam igcaki ilpu atimi tak atimi irak iji eigki ajaua, eris esjum ara, um ika, ki jim atimarid an pece ura ainyak, um atgei *ra* an nuhup unyak.

28 Is wat asan tas iji eigki aien, is atga o un aien, um apan alaig Jerusalem.

29 IS wat apan aien ubutpotet Bedfaje im Bedane, u nedoon nidan Olivet, is abrai ohwat atimi atahaijeg yin is ero aien,

30 um ika, Apan aijaurau an nuarin-pece ineig *et eteuc* an nuhup *unyimirau* ; arau wit yetpan aijaurau, arupu ecetai inhakli nifo aijaurau er athai, is eti fi ateuc iran tah : ahiyi aijaurau um imyiapam *igcaki* :

31 el et ika eheleimirau tah natimi, Erau auri aijaurau par ahiyi *inhakli nifo* ? arumu ika ehelen aijaurau, Et merit vaig a Natimarid.

32 Erus apan ahwat rahki is abrai rau aien, um ecetai et idivaig nasuptecnaig o un ehele rau.

33 Erus wat ahiyi inhakli nifo arau, eris ika ehele rau atimi ohuun, Erau auri aijaurau par ahiyi inhakli nifo ?

34 Erus ika arau, Et merit vaig a Natimarid.

35 Erus imyiapan ehele Iesu arau : eris algeijai napelumai ura ara an hakli nifo, um atijai Iesu iran.

36 Is wat apan aien, eris ahled napelumai ura ara an nefalaig.

37 Is wat apan aien ubutpotet an nefalaig asuol an nedoon Olivet, eris imyiacitak a ilpu atimi atahaijeg yin asega, eris ahinag ara, um ahaig ijinies, um imyiahpas Atua, va nauritai emda asega eris ecetai ara ;

38 um ika, Naaurineig vai Natimarid ineig et ham aien an nidai Ihova : *et eteuc* neigpa an nohatag, im nimyiahpas an nuarin ijinies acen.

39 Eris ika ehelen nahaiji ilpu Farisi ira atimi is ahinag, Ak natimi esege, acaiji ilpu atimi atahaijeg euc aiek.

40 Is tas aien, um ika ehele ra, Ek asaig ehelemia ainyak mika, el era eti tas ara sji eigki, etpu auroauro um ahlaig ijinies niji hat.

41 ¶ Is wat apan ubutpotet aien, is almoi nuarin-pece *itaup* aien, um imyitaig,

42 um ika, El is efi ato aiek, itu acen ka an naopan ineig, niji itai imyiatamaig euc! ja eh mun idim adenaig vai euc.

43 Etpu yetpam iram nadiat iji ehki, eru wit ucji nehpanitai ehtag a ilpu atimi tak atimi iram, um arahed iram, um atapanes iram marahed mihtag,

44 erupu alcapdicraig euc ara, im lep natimi iram; inyi eti amen inhat inyi ethi irai taka hat; va nitai ineig, nikavaig, as eti ato naopan ateghe euc *unyak* aiek.

45 Is apan aien anliin neom ahlap, um ahlo pok ijo ra eris ahtai itai ara eahki, um auarimtai itai;

46 um ika ehele ra, Eris aged, *um ika*, "Et eom alaigaheni neom unyak;" ja akis ika aijaua yi "uarin imi ilpu atimi ehneg itai" *neom unyak*.

47 Is esege *imi ra* aien irai iji adiat an neom ahlap. Eris ahilek yin a ilpu atimi ahlap esjilid, im ilpu atimi esege, im ilpu atimi alupas an pece, mika eri atgei yin;

48 ja is ehka vai ra nagovaig tah nitai *vai yin*: eris idim merit alupas atimi asega natahaijeg yin vaig.

NUARIN-TAS ALUPAS, 20.

IS esege imi atimi aien anliin neom ahlap, an naopan iyehki an nadiat is ethi, um asuptecnaig intas-upene, eris apan ehelen a ilpu

atimi ahlap esjilid, im ilpu atimi esege, im ilpu atimi tas alep,

2 um tas ehelen, um ika, Na ago nitai iji eigki aiek vai intas alep u di? asuptecnaig ehelema aiek; is alupai euc nemda ineigki a di?

3 Is tas ehele ra aien, um ika, Ekpu lep ahodai caua ainyak va nitai inyi ethi *ache*; asuptecnaig ehelek aijaua:

4 Is ahes nabaptiso o Joanes an nohatag, ka ehele atimi?

5 Eris tas jipe ehele ra ara, um ika, El ta ika akaija, Is ahes an nohatag; etpu ika aien, Akis auri aijaua par eti imyiaiji intas o un?

6 Ja el ta ika akaija, Is ahes ehele atimi; erupu asji caija irai hat atimi asega: era ika ara is idim aprofeta a Joanes.

7 Eris tas ara, um ika, Ecra eti ato aijama nuarin ineig is ahes iran.

8 Is ika ehele ra a Iesu, Inki ti asuptecnaig ehelemia ainyak nohu nemda ineig ek ago nitai iji eigki vaig ainyak.

9 ¶ Is atupun aien um asan tas ecsipeace ineigki ehele atimi, *um ika*,

Is ahoaig vaine natimi is ethi anliin nekaru *o un*, um atceijaig imi ilpu atimi ahapol, um atga o un, um apan an pece itac acen, um amen is itu iran.

10 Is wat metto nohoan, is abraig pan naheca is ethi *o un* aien ehele ilpu atimi ahapol, mika eri alupai yin nahaiji ohloi itai an nekaru vaine *o un*: ja eris aredei yin a ilpu atimi ahapol, um abraig pan *yin*, um eti alupai *yin* tah nitai.

11 Is lep aketo aien um abraig pan naheca *o un* is ethi is eche: eris lep aredei yin ara, um ago nedo has esjilid *vai yin*, um abraig pan *yin*, um eti alupai *yin* tah nitai.

12 Is um lep aketo aien um abraig pan is ethi is eche: eris ati innacop iran ara, um ethaig pan itac *yin*.

13 Is ika a natimi alupas ohuun

nekaro vaine iyehki, Inki ago inhe ainyak? ekpu abraig pan inhalav cop unyak ainyak: eru wit ecet yin ara, kit erupu ago nedo eccen vai *yin* ara.

14 Ja eris wat ecet yin a ilpu atimi ahapol, eris tas jipe ehele ra ara, um ika, Natimi ineigki etpu isjipigmoig etman aien: ti apan akaija um atgei yin, va yi upu uja uman.

15 Eris ethaig pan itac yin ara an nekaro vaine, um atgei *yin*. Etpu ago inhe ira ra a natimi alupas ohuun nekaro vaine?

16 Etpu idim han aien, um atgei ilpu atimi ahapol iji ehki, um atceijaig nekaro vaine o un imi tak atimi.

Eris wat atahajeg intas ineigki ara, eris ahras ara um ika, O'o.

17 Is alum ra aien, um ika, Inhe neigki eris aged, nikavaig, "Inhat ineig eris esjum vaig a ilpu atimi acta neom, et hat esjilid ineigki an nesvi va neom"?

18 Aien inyi eropjai an hat iyehki aien, etpu auhoig yi oplecoplec yin aien; aien inyi etjojai iran *inhat ineigki*, etpu ehoplecoplec yin *inhat*.

19 ¶ An nuarin-nadiat iyehki eris merit a ilpu atimi ahlap esjilid, im ilpu atimi esege, narop iran vaig; eris imtita atimi ara: eris ato ara, nikavaig, is asan tas ecsipece ineigki aien vai ra.

20 Eris imyiiris *yin* ara, um abraig pan atimi efaifa, mika eri aminjinai yin, jam idivaig atimi inivaijec, um tasehlele tas o un; eris ika ara eri atcejai yin ehele natimarid *an pece*, mika yi tas alep vai yin aien.

21 Eris ahodai yin ara, um ika, Ak natimi esege, ecra ato aijama mika et inivaijec intas unyum im nesege unyum, na eti imtita atimi aiek, jam esege inivaijec nedo o Atua:

22 Et itaup vai cama nahtaivaig mune imi Sisar, ka o'o?

23 Ja is ato nefaifa ura aien, um ika ehele ra, Eka auri aijaua par oop nyak?

24 leh pam aijaua ehelek mune yi ethi, ki almoe ainyak. Nalmui di ineigki, im nidai di eris aged iran? Eris tas ara, um ika, Sisar.

25 Is ika ehele ra aien, Alupai Sisar niji itai o Sisar, jam *ahtai* imi Atua niji itai o Atua.

26 Is ehka vai ra inlehvaig intas o un an nuhup o atimi: eris imyiali intas asuptecnaig o un ara, um eti tas.

27 ¶ Eris apan ehelen nahaiji ilpu Satusi, atimi iji eigki eris ika ara eri eti lep anusjai atimi ememas; eris ahodai yin ara,

28 um ika, Ak natimi esege, is aged eheleija a Moses, um *ika*, El et mas etoan tah natimi, um ude ehgan, jam eti eteuc inhal urau, el etnu leh ehgan a etoan, um asvalav vai etoan.

29 Eris amen ilpu raimu is seven: is leh ehgan a inmetto, um mas, is um eti eteuc inhal urau:

30 is lep leh yin *a etoan* is ethi ehgan, um mas, is um eti eteuc inhal urau:

31 is um lep leh yin *a etoan* is ethi is eche; *eris* um *leh yin* a ilpu raimu is seven, um ememas: is um eti eteuc inhal o un tah ra:

32 is par apitac a intakata, um mas:

33 ja an nadiat anusjai inyi ehgan tah ra sji eigki a di aien? eris leh yin ehgara *a ilpu raimu* is seven.

34 Is tas a Iesu, um ika ehele ra, Era atmehgan a nup uran nobohtan ineigki, um asanlai:

35 ara uhpu ika eri upene ara um apan an pece iyehki um anusjai, eri eti atmehgan ara, um eti asanlai:

36 eri eti lep ememas ara: erupu tup idivaig ilpu agelo ara; erupu hal o Atua ara, im ilpu halav anusjai.

37 Im lep ineig, is asuptecnaig a Moses an cai, mika erupu anusjai a ilpu atimi ememas, is wat anvi nidan aien Ihova par ika "Atua o Ebrahim, im lep Atua o Aisak, im lep Atua o Jekob."

38 Et eti Atua o ilpu atimi ememas aien, ja *et Atua* o ilpu atini umumohi *ache aien*: era umumohi atimi asega vai yin.

39 Eris tas nahaiji ilpu atimi esege, um ika, Ak natimi esege, na mun asuptecnaig upene aiek.

40 Is wat ti pan itac *intas* iyehki, eris lep imtitaig ara inlep ahodai yin vaig vaig tah nitai.

41 ¶ Is ika ehele ra aien, Era auri ara par ika, Et mapoi Tevit a Kristo?

42 Is um ika a Tevit an nitasvitai Ohranitari, “Is ika a Ihova ehele Natimarid unyak, Namu ateuc aiek an matak,

43 um uhum pan naopan iyehki ekpu ikni ilpu atimi tak atimi iram ainyak mika eri itai atijai neduom iran.”

44 Va nitai ineigki et anvi nidan a Tevit par ika Natimarid; et echamecha et pah mapon aien?

45 ¶ Is tas aien ehele ilpu atimi atahaijeg yin an nuhup o atimi asega, *um ika*,

46 Akumu aminjinai caua aijaua vai ilpu atimi esege, era merit ara naso ra vaig irai apelumai opra, um era lep merit ara mika eri aiheuc vai ra atimi irai uarin asjapicnaig atimi iran, era lep merit ara va niji itai ateuc esjilid irai eom alaigaheni, im ep niji uarin esjilid u inhag o atimi;

47 era atoraliak inpadiaig o ilpu takata eris ememas a ilpu atamnyura ara, um alaigaheni opra par adahpoi nedo ura: etpu esjilid nohocred ura.

NUARIN-TAS ALUPAS 21.

IS eas pan aien, um alum ilpu atimi ikni itai niknivaig niji itai tup ahtai ura an nuarin ikni mune iran.

2 Is lep ecet intakata ihki natimi is ethi aien is mas natamnyu un, is han atise nuari-mune haklin is ero aien eahki.

3 Is ika aien, Et inivaijeg ineig ek asaig ehelemia ainyak mika, Et esjilid nedo o intakata ihki natimi ineigki is mas natamnyu un ira ra asega:

4 et minni inpadiaig ura ara asega, ja era ikni nahaijin ache nitai tup ahtai imi Atua; et ihki natimi aien, jam ikni asega inpadiaig o un.

5 Eris tas va neom ahlap nahaiji atimi, um ika, Et eklim upene neom vai hat esjilid iran im niji itai tup ahtai. Ja is ika aien,

6 Eka almohi nitai iji eigki aijaua, ja etpu yetpam naopan iyehki, inyi ti amen inhat inyi ethi irai taka hat, ja uhpu alcapdicraig asega.

7 Eris ahodai yin ara, um ika, Ak natimi esege, etpu yetpam nitai iji eigki an nahopan? *inyi* asjaaicnaig an napam u nitai iji eigki nevitai?

8 Is ika aien, Aminjinai caua aijaua va yi jim imyiahnag caua tah natimi: erupu ham atimi inyi ahinag an nidak, um ika, Ek *Kristo* ainyak; et ubutpotet u naopan iyehki: va nitai ineig akumu jim apitac ra aijaua.

9 Aku wit atahaijeg edoa aijaua im ehtauo, jam jim imtitaig: inyi upyi eteuc nitai iji ehki; ja inyi ti fi auroauro um ahni nitai.

10 Is ika ehele ra aien, Erupu ati nedoa jipe vai ra nup urai iji pece, im lep nup urai iji elcau:

11 etpu omoi alupas irai iji uari pece inyi ahinag, im lep umlaig has, im inmas; uhpu lep ecetai an nohatag niji itai iji eig er imtitaig, im niji itai asjaaicnaig esjilid.

12 ¶ Erupu upyi hup ara, um atmas vai *caua*, um arop iramia, um ikni *caua* ehele ilpu atimi asjapicnaig, um lep *ikni caua* irai eom ipjin, erupu imyiapan caua ara an nuhup o ilpu atimarid im ilpu atimi alupas va nidak, ja etpu yetpam nitai iji ehki.

13 Etpu asuptecnaig caua *nitai iji eigki*.

14 Akumu apos anliinmopomia aijaua, mika aki jim upyi hup um aktaktai intas ineig aki asaig:

15 Ekipu alupai caua intas ainyak im narapakau, erupu auatialidi a ilpu atimi tak atimi iramia asega inwudyedivaig intas unyimia um imyiisjis.

16 Erupu aniv caua a ilpu atmil unyimia, im ilpu etoamia, im ilpu atimi ehpan iramia, im ilpu apa unyimia; erupu ika ara eri atgei nahaijimia.

17 Erupu amcel vai caua atimi asega va nidak.

18 Ja eri idim eti auahas tah numri nidjinimia inyi ethi.

19 Akumu aneiirai caua aijaua, um imyiatamaig nesgamia.

20 ¶ Aku wit alum ilpu atimi ati nedoa aijaua um imyiarahed Jerusalem, akupu ato aijaua, nikavaig, et mun ubutpotet u nauahasvaig.

21 Ara eri *amen* Jutaiia ara, erumu aha pan ara irai lola edoon; erumu ude *nuarin-pece ineig* ara eri *amen* iran ara; erumu jim ham iran ara sji ehki era *amen* irai taka uarin ara.

22 Uhpu aru nedo has an naopan iyehki, par ehnejid niji itai asega eris aged.

23 Kaiheuc vai ra eri opouc ara, im lep ra eri alidai ilpu hal ura ara, ira adiat iji ehki! etpu esjilid nohocred an pece, im lep nedemda vai nup igcaki.

24 Uhpu atgei ra irai auitoga, uhpu lep imyiapan ra irai iji pece asega mika eri aheca o atimi: erupu wehiepelaig Jerusalem a nup urai iji pece, um yetpan naopan iyehki etpu ahni naopan o nup urai iji pece.

25 ¶ Etpu eteuc niji itai asjaaicnaig an nagesega, im lep an mohoc, im lep irai moijeuv; erupu ohocred a nup urai iji pece an nobohtan va netehto *ura*; etpu auoc alupas in-jop;

26 etpu auatialidi inliinmopoi atimi

va nimtitaig *ura*, eru wit almoi nitai iji eigki ara etpu yetpan an nobohtan: etpu ahecatina niji emda an nohatag.

27 An naopan iyehki erupu ecet Inhal o natimi ara inhamvaig an nepeig an nemda o *un*, im lep an natimi alupas o *un*.

28 Et wit yetpan nitai iji eigki, akumu ahlahusjai aijaua, um easji pan; etpu ubutpotet u nimyiata-maigvaig caua.

29 ¶ Is ecsipece ehele ra aien, *um ika*, Almoi nateg aijaua im lep nauicai asega;

30 et wat ehcodeaig, eka almoi aijaua um ispamia ato, nikavaig, et mun ubutpotet u inlidija:

31 Et idim ucco, aku wit almoi nitai iji eigki aijaua, akumu ato aijaua, nikavaig, et mun ubutpotet u nelcau o Atua.

32 Et inivaijec ineig ek asaig eh-lemia ainyak mika, Inyi upyi hup um ahni nitai iji eigki asega, ja erupu emesmas natimi an naopan ineig.

33 Etpu yetpan an tid iran nohatag im nobohtan; ja inyi ti yetpan an tid iran intas unyak.

34 Aminjinai caua aijaua, um jim auahas inliinmopomia va nitai caig alupas, im nahnag vai kava, im naktaktai niji itai an nobohtan ineigki, va yi jim yetpan iramia nadiat iyehki, an neti aktaktaivaig unyimia.

35 Etpu yetpan ira atimi asega amen an nobohtan asega, um idivaig nitai aprou itai.

36 Akumu aiji aijaua, um alaigheni, um jim atunop, va uhpu ika vai caua aki upene aijaua mika yi ti yetpan iramia tah nitai irai itai iji eigki eri yetpan; akupu lep atidai aijaua an nuhup u Inhal o natimi.

37 ¶ Is esege aien anliin neom ahlap an nadiat; ja is wat epeig, is alau ijo aien, um amen an nedoon nidan Olivet.

38 Is wat lahlah an nuhialeg, eris ahtag pan ehelen atimi asega anliin neom ahlap, mika eri atahaijeg yin.

NUARIN-TAS ALUPAS 22.

IS ubutpotet u nasjapicnaig va nareto ti leven iran, nidan napaska:

2 eris ahti jipe *yin* a ilpu atimi ahlap esjilid im ilpu atimi esege mika eri atgei yin, jam imtita atimi.

3 ¶ Is ahei Jutas nupu Karyot a Satana, is atimi is ethi aien ira atimi is twelv iji ehki:

4 is apan aien, um tas ehele ilpu atimi ahlap esjilid im ilpu atimi alupas, *um asuptecnaig* nedo ineig inyi aniv yin ehele ra vaig:

5 eris imyiacitak ara, um ika eri alupai yin mune:

6 is adai intas ura aien, um imyiris naopan upene mika yi aniv yin ehele ra, an neti amenvaig *ehelen* atimi.

7 ¶ Is wat lahlah an nadiat iyehki, *eris asjapicnaig* va nareto ti leven iran, eris ika eri atgei napaska iran,

8 is abrai Pitrus aien im Joanes, um ika, Apan aijaurau um imyecrei napaska vai caija, mika ti caig akaija.

9 Erus ika ehelen arau, Nai merit aiek vaig eda igca ecru imyecrei aijumrau?

10 Is ika ehele rau aien, Aru wit apan an nuarin-pece *itaup* aijaurau, etpu idim ehtet iramirau natimi inyi ethi, um apos nipjinitai inyi amen inwai iran; arumu apitac yin aijaurau, um apan anliin neom ineig inyi apan iran aien:

11 arumu asaig aijaurau ehele natimi alupas an neom, Et ika ehelum a Natimi esege, Nuarin-neom imi ilpu alaig yek eda, mika ki caig napaska iran ainyak im lep ilpu atimi atahaijeg nyak?

12 Etpu asuptecnaig ehelemirau aien nuarin-neom ijinies um alupas, et amen niji itai iran: arumu imyecrei eahki aijaurau.

13 Erus apan arau um ecetai et idivaig is asaig ehele rau aien: erus imyecrei napaska arau.

14 Is wat yetpan nuarin-nadiat iyehki, is ehrateucse aien, im lep ilpu apostolo *o un* is twelv.

15 Is ika ehele ra aien, Kis idim merit alupas ainyak incaigvaig napaska ineigki ehelemia, ja par mas:

16 ek asaig ehelemia ainyak mika, Inki ti lep caig ainyak, um uhum pan naopan iyehki uhpu ehneijid an nelcau o Atua.

17 Is leh nipjinitai aien, um naaur-ineig *iran*, um ika, Leh ineigki aijaua um edaig jipe iramia:

18 ek asaig ehelemia ainyak mika, Inki ti umnyi nidi vaine ainyak, um uhum pan naopan iyehki etpu yetpam nelcau o Atua.

19 ¶ Is leh nareto aien, um naaur-ineig *iran*, um aswaplec, um alaa ra, um ika, Nohuk ineigki eris ahtai vai caua: ago nedo ineigki aijaua par imyiehva nyak.

20 Eris wat caig ara, is lep leh nipjinitai aien, um ika, Nipjinitai ineigki, et *idivaig* intas-etipup mat vaiinja irak, eh mun atladwi vai caua.

21 Ja et idim amen ehelek an nitai hag niknai natimi ineig etpu aniv nyak aien.

22 Et inivaijec ineig, et apan a Inhal o natimi, et idivaig eris upyi asaig *vai yin*: ja a'a, auwe vai nat naico etpu aniv yin aien!

23 Eris tas jipe ara, um ika, Tah caija a di neigki etpu ago nedo ineigki?

24 ¶ Eris lep imyiisjis jipe ara, um ika, Inyi esjilid tah caija a di?

25 Is ika ehele ra aien, Era esjilid irai pece ura a ilpu atimarid irai iji pece; era lep anvi nidai ilpu atimi alupas ura ara par ika ilpu atimi ago nedo upene:

26 jam jim *ago* nedo ineigki aijaua: aien et esjilid iramia aien, etmu idivaig inharei aien; aien et atimi alupas *iramia* aien, etmu idivaig naheca *unyimia* aien.

27 Et esjilid a di, aien et ateuc aien um hag, ka aien et aheca *o un* aien? aien marom et ateuc aien um hag: ja ek amen ehelemia ainyak um idivaig naheca *unyimia*.

28 Akis amen ehelek aijaua irai ji ohocred unyak.

29 Ek ati nelcau ini caua ainyak, et idivaig is ati imi nyak a Etmak;

30 mika aki hag aijaua um umnyi an nitai hag unyak an nelcau unyak, um ateuc irai dorona um asuptecnaig nimitan imi ilpu mapoi ilpu hal o Isreel et twelv.

31 ¶ Is ika a Natimarid, Ak Saimona, ak Saimona, et idim merit vai caua a Satana, mika yi irara *iramia* et idivaig hwiit:

32 ja ek mun alaigaheni vai euc ainyak, va yi jim auatialidi nimyisjis ninivajec unyum aiek: na wit adumoij aiek, namu ated emda ilpu etoam aiek.

33 Is ika ehelen aien, Ak Natimarid, ek apena ainyak nahced euc vaig, um apan an neom ipjin, im lep inmasvaig.

34 Is ika aien, Ek asaig ehelum ainyak, ak Pitrus, *mika*, napu ehceseij ateri nyak aiek an nadiat ineigki, ja etpu ahlaig injaa.

35 Is ika ehele ra aien, Kis wat abraig pan caua ainyak is ti mune unyimia aijaua, im incat, im incedpoi eduomia, akis ihki atimi aijaua, ka o'o? Eris ika ara, O'o.

36 Is ika ehele ra aien, Aien et eteuc mune o un an naopan ineig, etmu leucse aien, im lep incat *o un*: aien et eti eteuc *mune* o un, etmu ahtai napelumai o un aien, um aua-nimitan nautoga:

37 ek asaig ehelemia ainyak, mika uhpu ago vai nyak nitai iyehki eris aged, um ika, "Eris esvi pan yin irai

ilpu atimi auatatimi:" er ehneijid *irak* nihi itai eris aged vai nyak.

38 Eris ika ara, Ak Natimarid, et idim amen igcaki nautoga et ero. Is ika ehele ra aien, Et upene.

39 IS alau ijo aien, um apan an nedoon Olivet, is idivaig nupyi edo o un; eris ahced yin a ilpu atimi atahaijeg yin.

40 Is wat yetpan aien eahki, is ika ehele ra aien, Akumu alaigaheni aijaua va aki jim apan an nedo oop *caua*.

41 Is ude ra aien um apan, et idivaig nuarin ethaig pan inhat iran, um atpuse, um alaigaheni,

42 um ika, Ak Etmak, el et wat upene vai euc, el et mun atipagki nipjinitai ineigki ehelek: jai tup aiek marom, jim *imyiaiji* intas unyak.

43 Is ehcohos ehelen a nagelo an nohatag is ethi, um ago emda yin.

44 Is esjilid nohocred o un aien, is alaigaheni emda aien: is idivaiginja nihlup iran aien, um altahtise an nobolhtan.

45 Is alaigaheni ehni aien, ja par atidai, um apan ehele ilpu atimi atahaijeg yin, um ecet ra numjegvaig va nohocred *ura*,

46 um ika ehele ra, Eka auri aijaua par umjeg? atidai aijaua um alaigaheni, va aki jim apan an nedo oop *caua*.

47 ¶ Is wat tas aien, eris yetpan natimi is ahinag, is uhup ira ra tah is ethi ira atimi is twelv, nidan Jutas, is apan ubutpotet ehele Iesu aien mika yi aijumnyi yin.

48 Is ika ehelen a Iesu, Ak Jutas, na mun aniv Inhal o natimi aiek an najumnyi *yin*?

49 Eris wat almoi nedo ura a ilpu atimi amen ehelen, eris ika ehelen ara, Ak Natimarid, eciri auud *ra* irai autoga aijama, ka o'o?

50 Is auud naheca o natimi esjilid an nahlap tah is ethi ira ra, um auudyialis intikgan innatan.

51 Is tas a Iesu, um ika, Akumu eropropse aijaua. Is atcei pan intik-gan aien; is um lep ahtag.

52 Is ika a Iesu ehele ilpu atimi ahlap esjilid, im ilpu atimi alupas an neom ahlap, im ilpu atimi tas alep, eris ahtag pan ehelen ara, Eka mun idim ham aijaua um auanedo an natimi ehneg itai *irak*, um apos nautoga im nelop:

53 kis wat amen ehelemia ainyak anliin neom ahlap irai iji adiat, akis eti arop *irak* aijaua: ja et uarin-nadiat unyimia ineigki, im nemda o naupat.

54 ERIS arop iran ara, um leh *yin*, um imyiapan yin an neom o natimi esjilid an nahlap. Is apitac *yin* a Pitrus, jam itac acen.

55 Eris wat aduan cop ara juju an nimmim, um ateucse, is um ateucse an nibla ra a Pitrus.

56 Is wat atijcop aien, is ecet yin a natahaig is ethi, um almuktit yin, um ika, Is lep ahced yin natimi ineigki.

57 Is ateri yin aien, um ika, Ak intakata ineigki, ek eti ato yin ainyak.

58 Is eti laulau is lep ecet yin intak atimi, um ika, Na atimi ira ra aiek. Is ika a Pitrus, O'o, ak natimi ineigki.

59 Is wat ti pan itac aur is ethi, is imyiisjis emda intak atimi, um ika, Et inivaijec ineig, nikavaig, is lep amen ehelen a nat eigki; et upu Calili aien.

60 Is ika a Pitrus, Ak natimi ineigki, ek eti ato intas ineigki ainyak na asaig aiek. Is wat tas aien, is um ahlaig injaa.

61 Is ahidai yin a Natimarid, um umaharei Pitrus. Is imyiehva a Pitrus intas iyehki is upyi asaig ehelen a Natimarid, um ika, Napu ehceseij ateri nyak aiek, ja etpu ablaig injaa.

62 Is apan itac a Pitrus, um taig alupas.

63 ¶ Eris imyiafakahail Iesu a ilpu atimi asjiraig yin, um aredei *yin*.

64 Eris atapanes nesganimtan ara, um ahpoi nesganimtan, um ahodai yin, um ika, Asuptecnaig aiek, et mun ahpoi euc a di?

65 Eris asan tas has is ahinag vai yin ara is eche.

66 ¶ Is wat lahlah, eris asjapic-naig a ilpu atimi tas alep an pece, im ilpu atimi ahlap esjilid, im ilpu atimi esege, eris imyiapan yin ara an nuarin asjapicnaig ura, um ika,

67 Nai Kristo aiek, ka o'o? asuptecnaig aiek ehelema. Is ika ehele ra aien, El ek asuptecnaig ehelemia ainyak, el eka eti imyiisjis nini-vaijec aijaua:

68 el ek ahodai *caua* ainyak vai itai, el eka eti asuptecnaig ehelek aijaua, um eti atceijaig *nyak*.

69 Etpu ateuc a Inhal o natimi an matai nemda o Atua an tak aopan.

70 Eris ika ara asega, Nai Hal o Atua aiek, ka o'o? Is ika ehele ra aien, Eka mun asaig aijaua ek idim ucco ainyak.

71 Eris ika ara, Inta auri akaija par lep ahilek ilpu atimi asuptecnaig *vai yin*? inta mun atahaijeg intas o un akaija.

NUARIN-TAS ALUPAS 23.

ERIS atidai ara asega, eris ahinag ara, um imyiapan yin ehele Paillet.

2 Eris atupun ara um atijai itai iran, um ika, Ecris ecet nat eigki aijama nauahasvaiginliinmopoi atimi an pece, is acaiji ra aien mika eri jim ahtai mune imi Sisar, um ika, Ek Kristo ainyak Natimarid.

3 Is ahodai yin a Paillet, um ika, Na atimarid u nupu Jutaia aiek, ka o'o? Is tas ehelen aien, um ika, Na mun asaig aiek.

4 Is ika a Paillet ehele ilpu atimi ahlap esjilid im lep atimi asega, Ek

mun eti ecetai tah nedo has o natimi ineigki ainyak.

5 Is esjilid acen nedemda ura ara, um ika, Et auahas inliinmopoi atimi aien, um esege an *pece* Jutaia asega, is atupun aien Calili um yetpam igcaki.

6 Is wat atahaijeg vaig Calili a Paillet, is ahodai ra aien, um ika, Et upu Calili a natimi ineigki, ka o'o?

7 Is wat ato aien, nikavaig, is up uran nelcau o Herot aien, is imyiapan yin ehele Herot aien, is anen Jerusalem aien an naopan iyehki.

8 ¶ Is wat ecet Iesu a Herot, is imyiacitak alupas aien: is merit aien itu acen necet yin vaig, is atahaijeg niji itai is ahinag vai yin aien; is lep ika aien yi almoi tah nauritai ehka yi ago aien.

9 Is ehcahinag ahodai yin aien vai itai; ja is eti asuptecnaig tah nitai a *Iesu*.

10 Eris aiji a ilpu atimi ahlap esjilid im ilpu atimi esege, um atijai emda itai iran.

11 Is ika a Herot im ilpu eucsupo o un et takitai aien, um imyiafak-ahcil yin, um aso yin an napelumai esjilid, um lep imyiapan yin ehele Paillet.

12 An nadiat iyehki erus pah tas arau Paillet im Herot: erus upyi hup arau um edemda jipe vai rau.

13 ¶ Is asjapicnaig ilpu atimi ahlap esjilid a Paillet, im ilpu atimi alupas, im atimi asega,

14 um ika ehele ra, Eka mun imyiapam natimi ineigki ehelek aijaua, um ika, Et auahas inliinmopoi atimi aien; ja ek mun idim ahilek *nedo o un* ainyak an nuhup unyimia, jam eti ecetai tah nedo has o natimi ineigki et idivaig nitai iji eigki eka mun atijai iran aijaua:

15 um lep ucce a Herot: ek mun abraig pan caua ehelen ainyak; ja is eti ago tah nedo ineig aien uhpu atgei yin vaig:

16 ekpu aredei yin ainyak, um ahiyi *yin*.

17 (Eris idim ika yi ahiyi natimi is ethi imi ra aien irai iji asjapicnaig.)

18 Eris ehliis nahlaig ijinies ara asega, um ika, Imyiapan nat eigki aiek, um ahiyi Barabas imi cama:

19 (natimi iyehki eris upyi ati yin an neom ipjin, va nehtauo o un an nuarin-pece *itaup*, im natgei atmas.)

20 Is merit a Paillet nahiyi Iesu vaig; va nitai ineigki is lep tas ehele *ra* aien.

21 Ja eris lep ahlaig ara, um ika, Atgei *yin* aiek an nauincai atgeig, atgei yin aiek an nauincai atgeig.

22 Is ehceseij tas ehele ra aien, *um ika*, Auri? is ago nev edo has aien? ek mun eti ecetai tah nedo has ineig ainyak is ago aien uhpu atgei yin vaig: ekpu aredei yin ainyak, um ahiyi *yin*.

23 Ja eris tas emda ara, um ahlaig ijinies mika eri atgei yin an nauincai atgeig. Is esjilid intas ura, im *intas* o ilpu atimi ahlap esjilid.

24 Is ika a Paillet eri ago yi idivaig intas ura:

25 is ahiyi natimi iyehki imi ra aien, eris ati yin an neom ipjin va nehtauo im natgei atmas *o un*, eris merit vai yin ara; ja is ati Iesu ehele ra aien *mika eri atgei yin* et idivaig inmerit ura.

26 ¶ Eris wat imyiapan yin ara eris asjiraig natimi is ethi ara *nidan* Saimona, nupu Sairini, is ahes an tah anuarin aien, eris atijai iran nauincai atgeig ara, mika yi ahelwei *nilpun* aien, um apitac Iesu.

27 Eris apitac yin atimi is ahinag, im lep ilpu takata, eris ehtigtaig ara, um imyitaig yin.

28 Is alidaig pan yin ehele ra a Iesu, um ika, Ak ilpu takata Jerusalem, akumu jim imyitaig nyak aijaua, akumu imyitaig caua aijaua, im ilpu hal unyimia:

29 etpu yetpam naopan iyehki eru wit ika ara, Era mun ahesmoij

ara eris eti asvalav ara, um eti alidai ilpu halav.

30 Erupu ika ara an naopan iyehki, Etmu eropse niji edoon irama; etmu adalpoi cama niji edoon.

31 El eh ago nitai iji eigki an nauincai mat, uhpu ago inhe an nauincai mese?

32 ¶ Eris ehrimiapan yin im natimi auatatimi is ero, eris ika ara eri atgei ehtaij.

33 Eris wat yetpan ara an nuarin iyehki nidan Kalvare, eris atgei yin ara an nauincai atgeig, im lep natimi auatatimi erahki, is ethi an matan, im lep is ethi an moun.

34 Is ika a Iesu, Ak Etmak, jim aru nedo has ura aiek; era eti ato ara nitai ineig era ago ara.

Eris ahai apelumai o un ara irai itai asjaaicnaig.

35 Eris aiji atimi um almoi. Eris imyiafakahcil yin ara, im lep ilpu atimi alupas, um ika, Is imyiatamaig tak atimi aien; el et Kristo aien natimi is ati yin a Atua, etmu imyiatamaig yin aien.

36 Eris lep imyiafakahcil yin a ilpu eucsupo, um apan ehelen, um aluman vinecar,

37 um ika, El et atimarid u nupu Jutaia aiek, namu imyiatamaig euc aiek.

38 Eris aged nitasvitai an tas Crisi, im Roma, im Jutaia, um ati ijinies ithan, *um ika*, NATIMARID U NUPU JUTAIA INEIGKI.

39 ¶ Is atuh yin natimi auatatimi is ethi ira rau eris atgei rau, um ika, El et Kristo aiek, namu imyiatamaig cataij aiek.

40 Is tas a etoan, um ated yin, um ika, Nai eti imtitai Atua aiek? et tup ethi ache nintan imi cataij:

41 eh mun idim ago nedo atoh vai caijau; intau mun leh nintan nedo ujaun akaijau: ja is eti ago tali nedo has natimi ineigki.

42 Is ika aien ehele Iesu, Ak Natimarid, namu imyiehva nyak

aiek, na wit apan an nelcau unyum aiek.

43 Is ika ehelen a Iesu, Et inivaijec ineig ek asaig ehelum ainyak *mika*, Napu amen ehelek aiek a paratais an nadiat ineigki.

44 ¶ Is wat adiatadiat is asuol inmeheim an pece asega um yetpan an jupki.

45 Is aupat nagesega, um ahpati juju natcai apelumai anliin neom ahlap.

46 Is ahlaig ijinies a Iesu, um ika, Ak Etmak, ek ati nesgak ainyak an nikmam: is wat ucce intas o un, is edekjai nesgan aien.

47 Is wat almoi nitai iji eigki a natimi alupas u ilpu eucsupo, is imyiahpas Atua aien, um ika, Et idim atimi upene natimi ineigki.

48 Eris wat almoi nitai iji eigki a ilpu atimi asjapicnaig par almoi nitai iyehki, eris alpoiirai ritira ara, um atga ura.

49 Eris aiji itac acen a ilpu etoan asega, im ilpu takata eris abes Calili ara um ahced yin, um almoi nitai iji eigki.

50 *IS eteuc* natimi is ethi nidan Josef; is atimi tas alep aien, *um* atimi upene, um atoh nedo o un.

51 (Is eti atau an tas alep ura aien im nedo ura:) is upu Arimadia aien, nuarin-pece is ethi o nupu Jutaia; is aitgaig nelcau o Atua aien.

52 Is apan a natimi ineigki elele Paillet, um ugni nohui Iesu.

53 Is atise *nohun* aien, um aso an napelumai yilyil, um ati an mun nij eris abti, eris pam eti ati tah natimi *mas* iran.

54 Is adiat imyecrei itai iran yehki, un ubutpotet u nadiat atumop.

55 Eris lepapitac a ilpu takata iji ehki eris alies Calili ara um ahced yin, um ecetai immun nij im nati nohun iran.

56 Eris atga ura ara, um ago nitai aspi auanipin upene; eris atumop ara an nadiat atumopet idivaigintas alep.

NUARIN-TAS ALUPAS 24.

IS wat lahlah an nuhiahleg an nadiat uhup irai wiik, eris apan ara u unmun nij, um apos nitai auanipin upene eris ago ara, eris lep ahced ra nahaiji atimi.

2 Eris ecetai inhat ara eris mun atcelcaigpagki u unmun nij.

3 Eris apan iran ara, jam eti ecetai nohui Iesu Natimarid.

4 Is wat ehioehio inliinmopura ara va nitai iji eigki, erus aiji ubutpotet ehele ra natimi is ero is ememina napelumai ira rau:

5 eris imtitaig ara um atpuse an nobohtan; erus ika ehele ra arau, Eka auri aijaua par ahilek yin ehele ilpu atimi ememas et mun nusjai aien?

6 et ti aien igcaki, et mun nusjai aien: akumu imyiehva aijaua intas o un ehelemia an naopan iyehki an namen o un Calili,

7 um ika, Uhpu idim ati Inhal o natimi ehele atimi auatatimi, mika eri atgei yin an nauincai atgeig, ja et wit ti pan itac nadiat inyi esei, etpu lep nusjai aien.

8 Eris imyiehva intas o un ara,

9 um ahes u unmun nij, um atga ura, um asuptecnaig nitai iji eigki asega ehele atimi is eleven, im lep ehele ra asega is eche.

10 Is asuptecnaig nitai iji eigki ehele ilpu apostolo a Mere nupu Mactala, im Joana, im Mere *risi* Jakobus, im lep nahaiji ilpu takata *eris* ahced ra *ara*.

11 Ja is idivaig intas ahcil intas ura ehele ra, eris eti eteuc iran ara.

12 Is atidai a Pitrus um athut pan u unmun nij; is atpuse aien um ecetai napelumai yilyil, eris echim ati, um atga o un, um imyiali nitai ineigki eris ago.

13 ¶ An nadiat iyehki erus apan natimi is ero ira ra an nuarin-pece is ethi, nidan Emeus, is apohod vaig Jerusalem is tup idivaig is eet mail.

14 Erus tas jipe arau va nitai iji eigki asega is yetpan.

15 Erus wat tas jipe arau um aktaktai *nitai iji eigki*, is uhun pan *rau* a Iesu, um ahced rau.

16 Is arupoig nesganimtarau arau, erus eti ato yin arau.

17 Is ika ehele rau aien, Inhe ineigki erau atga asaig aijaurau? et atpuh nesganimtamirau aijaurau vanhe?

18 Is tas natimi is ethi ira rau, nidan Kliopas, um ika ehelen, Na upu taka uarin aiek, jam amen Jerusaleem, um eti ato nitai iji eigki et mun yetpan eahki an naopan ineig, ka o'o?

19 Is ika aien ehele rau, Nevitai? Erus ika ehelen arau, Nitai iji eigki vai Iesu nup an Nasared, is aprofeta aien, is esjilid nedo *o un* im intas *o un* an nuhup o Atua im lep atimi asega:

20 eris ati yin a ilpu atimi ahlap esjilid im ilpu atimi alupas uja mika eri asaig inmas o un, eris um atgei yin ara an nauincai atgeig.

21 Ecris ika aijama is atimi iyehki aien eris ika etpu imyiatamaig nupu Isreel aien: im lep ineig, eris ago nitai iji eigki ja pah ti pan itac nadiat is esei:

22 maiya, im lep ineig, ecris imyiali aijama vai intas o nahaiji ilpu takata irama, eris apan u unmun nij ara an nuhiahleg;

23 eris eti ecetai nohun ara, ja eris apam ara, um ika, Era mun ehcohos pam ehelema a ilpu agelo, um ika, Et mun nusjai aien.

24 Eris apan u unmun nij nahaiji atimi irama, um ecetai et idivaig intas eris asaig a ilpu takata: eris eti ecet yin ara.

25 Is ika ehele rau aien, Ak ohwat atini ahnag, et auatialidi inliinmopomirau aijaurau par imyisjis ninivaijec intas asega eris asaig a ilpu profeta:

26 eris idim ika yi leucose nohocred

iji eigki a Kristo, ja par leh natimi alupas o un.

27 Is atupun aien um asuptecnaig ehele rau intas asega vai yin is aged a Moses im ilpu profeta asega.

28 Ehtijis apan ahtaij ubutpotet u nuarin-pece iyehki erus apan iran arau: is ika aien yi ahtaregdei rau.

29 Ja erus acaiji yin arau, um ika, Amen aiek ehelemrau; et ubutpotet u nepeig; injupura mun eigki. Is apan aien um amen ehele rau.

30 Is wat ateuc ehele rau aien um lag, is leh nareto aien, um naaurineig *iran*, um aswaplec, um alaa rau.

31 Is wat weilah nesganintarau arau, erus ato yin arau; ja is um tup ti ehpan aien ehele rau.

32 Erus tas jipe arau, *um ika*, Is wat tas eheleijau aien an nefalaig, um asuptecnaig intas eris aged, is emda inliinmopjau akaijau.

33 ¶ Erus atidai arau an nuarin-nadiat iyehki, um adumoij pan Jerusalem, um ecet natimi is eleven eris asjapicnaig ara, im lep atimi amen ehele ra,

34 eris ika ara, Et mun idim nusjai a Natimarid, um ehcohos ehele Saimona.

35 Erus asuptecnaig arau nitai iji ehki *an natga urau* an nefalaig, im lep nato yin vaig urau an naswaplec nareto *o un*.

36 ¶ Eris wat tas jipe ara, is aiji a Iesu an nuhup ura, um ika ehele ra, *Etmu eteuc* neigpa ehelemia.

37 Is ehioehio alupas inliinmopura ara, um imtitaig, um aktaktai, mika eris mun ecetai natmas.

38 Is ika ehele ra aien, Eka auri aijau par imtitaig? eka auri aijau et par ehioehio inliinmopomia?

39 almoi nikmak ero aijaua im neduok ero, ainyak aigki: atcei pam nyak aijaua, um almoi; et eti ohu atmas im neduon, et idivaig nalum nyak unyinia.

40 Is wat asan tas ineigki aien, ja

par ehvaig ehele ra nikman im neduon.

41 Eris wat imyiali ara, is ti nimyijis ninivaijec ura va nimyiacitak ura, is ika ehele ra aien, Et eteuc nitai caig unyinia aijaua, ka o'o?

42 Eris alaan nuari numu ara eris ahen, im nuari hunekom.

43 Is leh aien, um caig an nuhup ura.

44 ¶ Is ika ehele ra aien, Kis wat amen ehelemia ainyak kis asan tas iji eigki ehelemia ainyak, mika ulpu idim ehnejid *irak* nitai iji eigki asega eris aged vai nyak an nitasvitai o Moses, im lep *an nitasvitai* o ilpu profeta, *im lep an nitasvitai* Ohranitai.

45 Is asalgei inliinmopura aien, mika eri ato ara intas eris aged,

46 um ika ehele ra, Eris aged is ucce, im lep ineig eris idim ika yi mas a Kristo, ja et wit ti pan itac nadiat inyi esei, etpu lep nusjai aien:

47 mika eri atupun Jerusalem ara um asuptecnaig ehele nup urai iji pece asega, eri adumoij anliinmopura ara um leh nitai iknipagki nedo has ura an nidan.

48 Eka atimi asuptecnaig nitai iji eigki aijaua.

49 Ekpu alupai caua ainyak intas upyi asaig o Etnak: jam amen aijaua an nuarin-pece Jerusalem, um uhun pan naopan iyehki akupu leh nemda aijaua jipagko.

50 IS imyiapan ra Bedane aien, um adaigjai nikman ero, um asan tas upene vai ra.

51 Is wat asan tas upene vai ra aien, eris atipagki yin ehele ra, um imyiaridjai yin an nohatag.

52 Eris alaigaheni vai yin ara, um adumoij pan Jerusalem, um imyiacitak alupas:

53 eris amen ara an neom ahlap irai iji adiat, um acesaces nohranitai, um imyialhas Atua. Emen.

INTAS-UPENE

IS AGED A

J O A N E S,

NUARIN-TAS ALUPAS 1.

IS eteuc a Intas an naopan iyehki is pam eti eteuc nobohtan, is amen a Intas ehele Atua, is lep Atua a Intas.

2 Aien aigki is amen aien ehele Atua an naopan iyehki is pam eti eteuc nobohtan.

3 Eris ago niji itai asega vai yin; et eti eteuc tah nitai ineig is eti ago aien.

4 Is amen ehelen nitai umoh iran; is lep itai lah imi atimi nitai umoh iran.

5 Et eteuc nitai lah an naupat; ja et ahtapanes *inlah* naupat.

6 ¶ Is abraig pan natimi is ethi a Atua, nidan Joanes.

7 Is ham aien par asuptecnaig Nitai lah, mika eri imyisjis ninivaijec natimi asega vai yin.

8 Is eti itai lah iyehki aien, ja *eris abrai yin* mika yi asuptecnaig Nitai lah iyehki aien.

9 Is itai lah inivaijec iyehki, is ham aien an nobohtan mika eri lah natimi asega vai yin.

10 ¶ Is amen aien an nobohtan, eris lep ago nobohtan vai yin, ja eris eti ato yin an nobohtan.

11 Is apan aien an *pece* o un, ja eris eti leh yin a nup *uran pece* o un.

12 Ara asega eris leh yin ara, um asgeig an nidan, is alupai ra nemda aien mika eri ilpu hal o Atua ara:

13 ara, is apos ra a Atua, jam eti apos ra vai ilpu retpora, ka innerit o inliinmopura, ka innerit o atimi.

14 Is leh nohun a Intas, um amen eheleija, (ektijis almoi natimi alupas o un aijumtaij, natimi alupas o Inhal o Etman et ethi ache,) is esjilid acen naiheuc o un, is lep idim inivaijec aien.

15 ¶ Is asuptecnai yin a Joanes, um ahlaig, um ika, Aien aigki kis tas vai yin ainyak, *um ika*, Aien etpu apitac nyak aien, inyi esjilid irak aien; is idim uhup irak aien.

16 Intis leucose itai akaija asega irai iji itai is ahinag o un, im lep naiheuc et idivaig naiheuc o un.

17 Is alupai caija intas alep a Moses, *ja* is ahes ehele Iesu Kristo *intas* aiheuc *va atimi* um inivaijec.

18 Is idim eti ecet Atua tah natimi; *ja* is asuptecnai *yin* a Inhal o un et ethi ache, et amen aien an riti Etman.

19 INTAS o Joanes ineigki an naopan iyehki eris abrai ilpu atimi ahlap im ilpu mapoi Livai a nupu Jutaia mika eri ahes Jerusalem ara, um apan, um ahodai yin, *um ika*, Aiek di aigki?

20 Is asuptecnaig aien, um eti ateri; is idim asuptecnaig aien, um ika, Ek eti Kristo ainyak.

21 Eris lep ahodai yin ara, *um ika*, Aiek di aigki? Na Elaija aiek, ka o'o? Is um ika aien, O'o. *Eris um ika ara*, Na aprofeta iyehki aiek, ka o'o? Is um ika aien, O'o.

22 Eris lep ika ehelen ara, Aiek di aigki? *aniv euc aiek ehelema*, mika eeri apan aijama um asuptec-naig ehele ra eris abrai cama ara. Nai ikha aiek vai euc?

23 Is ika aien, *Ek* "ohran tah ainyak et ahlaig aien an namasacen, *um ika*, Akumu ago atoh nefalaig vai Ihova aijaua," et idivaig is asaig a Aiseya naprofeta.

24 Eris ilpu Farisi ara eris abrai ra.

25 Eris ahodai yin ara, um ika ehelen, El et eti Kristo aiek, ka Elaija, ka naprofeta iyehki, na auri aiek par baptiso *ira atimi*?

26 Is tas ehele ra a Joanes, um ika, Ek baptiso *ira atimi* ainyak an wai: ja et amen chelemia tahi et ethi, eka eti ato yin aijaua;

27 aien aigki et apitac nyak aien, et idim esjilid irak aien, ek eti upene ainyak par alhiyi nehtit an cedpun neduon.

28 Eris ago nitai iji cigki Bedabara an nahaijin Jortan itac, an nuarin ineig is baptiso iran a Joanes.

29 ¶ Is wat lahlali an tak apnyin, is ecet Iesu a Joanes napanvaig ehelen, um ika, Almoi Lam o Atua aijaua, aien aigki et iknipagki nedo has aien an nobohtan:

30 aien aigki kis tas vai yin ainyak, *um ika*, Etpu ham natimi inyi ethi um apitac nyak, inyi esjilid irak aien; is idim uhup irak aien.

31 Kis eti ato yin ainyak: ja kis ham ainyak um baptiso *ira atimi* an wai, mika eri ato yin a nupu Isreel.

32 Is asuptecnaig a Joanes, um ika, Kis ecet Nesgan *Upene* ainyak is ahes an nohatag um asuol is idivaig nalaupa, um amen iran:

33 kis eti ato yin ainyak: ja aien is abrai nyak aien mika ki baptiso *ira atimi* ainyak an wai, is ika ehelek aien, Aien aigki napu ecet shlegan *Upene* aiek nasuolvaig Neeen um amen iran, etpu baptiso *ira atimi* aien an Nesgan *Upene*.

34 Kis ecetai ainyak um asuptec-naig, um ika, Inhal o Atua ineigki.

35 ¶ Is wat lahlali an tak apnyin, is aiji a Joanes in lep natimi atahaijeg yin is ero;

36 is alum Iesu aien natgavaig, um ika, Almoi Lam o Atua aijaurau!

37 Erus atahaijeg intas o un natimi atahaijeg yin eraliki, um apitac Iesu.

38 Is ahidai yin a Iesu um ecet rau napitac *yin* vaig, um ika ehele rau, Erau merit vanhe aijaurau? Erus ika ehelen arau, Ak Rabai, (nesgan tas ineigki, Ak Natimi esege,) na amen aiek eda?

39 Is ika ehele rau aien, Apan aijaurau um almoi. Erus apan arau um almoi nuarin ineig is amen iran aien, um amen ehelen an nadiat iyehki: is um jupura.

40 ANTRIUS, etoi Saimona Pitrus, is atimi is ethi ira rau aien, erus atahaijeg *intas* o Joanes arau, um apitac *Iesu*.

41 Is upyi uhup aien um ecet Saimona etoan, um ika ehelen, Eera mun ecet Mesia aijama, (nesgan tas ineigki, Kristo, *Natimi ineig is ati yin a Atua*.)

42 Is inyiapan yin ehele Iesu aien. Is wat ecet yin a Iesu, is ika aien, Na Saimona aiek inhal o Jona: uhpu anvi nidam par ika Sifas, (nesgan tas ineigki, Pitrus, *Inhat*.)

43 ¶ Is wat lahlali an tak apnyin, is ika a Iesu yi apan Calili, is ecet Filipus aien, um ika ehelen, Apitac nyak aiek.

44 Is upu Bedseta a Filipus, nuarin-pece o Antrius im Pitrus.

45 Is ecet Nadanyel a Filipus, um ika ehelen, Eera mun ecet Iesu *nup* an Nasared aijama inhal o Josef. aien aigki is aged intas vai yin a Moses an tas alep, in lep ilpu profeta.

46 Is ika ehelen a Nadanyel, Et idim ahes an Nasared tah nitai upene,

ka o'o? Is um ika ehelen a Filipus, Apam aiek um almoi.

47 Is ecet Nadanyel a Iesu napan-vaig ehelen, um ika vai yin, Almoi nupu Isreel ineig aijaua, et eti efaifa aien!

48 Is um ika ehelen a Nadanyel, Na ato nyak aiek vai di? Is tas a Iesu, um ika ehelen, Kis idim ecet euc ainyak an naopan iyehki as amen aiek ithan nateg, ja is par ahlaig vai euc a Filipus.

49 Is tas ehelen a Nadanyel, um ika, Ak Natimi esege, nai Hal o Atua aiek; na Atimarid u nupu Isreel aiek.

50 Is tas a Iesu, um ika ehelen, Nai imyiisjis ninivaijec aiek vai intas ineig ek mun asaig ehelum ainyak *mika*, Kis ecet euc ainyak ithan nateg? napu ecetai aiek niji itai inyi esjilid irai itai iji eigki.

51 Is um ika ehelen aien, Et idim inivaijec ineig ek asaig ehelemia ainyak *mika*, Akupu ecetai nohatag aijaua an tak aopan etpu asalgei, im lep naridjai o ilpu agelo o Atua, im nasuol ura, irai Inhal o natimi.

NUARIN-TAS ALUPAS 2.

IS wat ti pan itac nadiat is esej, Eris auanetha an natmehgan Kena an *pece* Calili; is amen eahki a risi Iesu:

2 eris imyiacaij Iesu im lep ilpu atimi atahajjeg yin mika eri apan ara u netha an natmehgan.

3 Is wat ti waina, is um ika ehele Eris a risin, Et ti waina ura.

4 Is um ika ehelen a Iesu, Ak intakata ineigki, nai merit aiek vanhe ehelek? et eti fi yetpam naopan unyak.

5 Is um ika a risin ehele ilpu aheca, Akumu ago nitai ineigki aijaua etpu asaig ehelemia aien.

6 Is amen eahki nipjihat uri wai is siks par yiri itai iran, et idivaig nedo o nupu Jutai, is apapa pan

a callun is eetiin ka is twente seven iran asegasaga.

7 Is um ika ehele ra a Iesu, Atladwise wai aijaua irai ipjihat yi ohua. Eris um atladwise iran ara, is um ohua.

8 Is um ika ehele ra aien, Leli aijaua um imyiapan ehele natimi esjilid an nahai itai. Eris imyiapan ara.

9 Is atemtem an wai iyehki a natimi esjilid an nahai itai is um waina, ja is eti ato aien igca eris leh; (ja eris ato a ilpu aheca athun wai,) is ahlaig vai natimi leh ehgan a natimi esjilid an nahai itai,

10 um ika ehelen, Era upyi hup natimi asega um ati waina upene; eru wit umnyi natimi, ja par apitac *um ati waina* has: *jai* na mun aminjinaig waina upene aiek um uhup pam an naopan ineig.

11 Is atupun a Iesu um ago nauritai ehka ineigki Kena an *pece* Calili, um ehvaig natimi alupas o un; eris imyiisjis ninivaijec yin a ilpu atimi atahajjeg yin.

12 ¶ Is ago nedo ineigki aien, ja par apan Kaperneum, aien, im risin, im ilpu etoan, im ilpu atimi atahajjeg yin; eris amen eahki ara ira adiat is eti elpat.

13 IS um ubutpotet u napaska o nupu Jutai, is apan Jerusalem a Iesu;

14 is ecet ilpu atimi ahtai kuri-matau im siip im nalaupa aien anliin neom ahlap, im ilpu atimi ahtai mune, eris ateuc ara:

15 is ago nitai auud aien irai hakli ya, um ahlo pok ijo ra asega anliin neom ahlap, im lep siip *ura*, im kurinatau; um atladwi mune o ilpu atimi ahtai mune, um amejat-puh efata *ura*;

16 is um ika aien ehele ilpu atimi ahtai alaupa, Imyiahah nitai iji eigki aijaua; um jim ika et eom ahtai itai iran neom o Etmak.

17 Eris um imyiehva a ilpu atimi

atahaijeg yin intas ineig eris upyi aged, um ika, "Ek auatialidi ainyak va nohocred *unyak* va neom unyum."

18 ¶ Eris tas a nupu Jutaia, um ika ehelen, Na auri aiek par ago nitai iji eigki? nev itai asjaaic-naig unyum ineig napu ehvaig imi cama aiek?

19 Is tas a Iesu, um ika ehele ra, Akuunu auahas neom ahlap ineigki aijaua, ja ekpu lep ago ainyak an nadiat inyi eseij.

20 Eris um ika a nupu Jutaia, Eris acta neom ahlap ineigki irai mesese is forte im siks, inyi ehka vai euc nagovaig an nadiat inyi eseij *ache*.

21 Nohun ineigki is tas vaig aien mika is eom ahlap.

22 Is wat nusjai aien vai inmas o un, eris imyiehva a ilpu atimi atahaijeg yin intas ineigki is asaig ehele ra aien; eris imyiisjis nini-vaijec intas ineig ara eris upyi aged, im intas ineig is asaig a Iesu.

23 ¶ Is wat amen Jerusalem aien u napaska, an nadiat asjapicnaig, eris wat almoi niji auritai ehka o un natimi is ahinag, eris imyiisjis nini-vaijec yin ara.

24 Ja is eti asgeig an nedo ura a Iesu, is idim ato atimi asega aien:

25 is eti ika aien yi pu asuptecna atimi tah ehelen; is tup ispun ato inliimopoi atimi aien.

NUARIN-TAS ALUPAS 3.

IS etene natimi is ethi irai ilpu Farisi, nidan Nikotimus, is atimi alupas u nupu Jutaia aien:

2 is apan aien ehele Iesu an nepeig, um ika ehelen, Ak Rabai, eera ato aijama, nikavaig, na atimi esege ahes ehele Atua aiek: et ehka vaig tah natimi nagovaig niji auritai ehka iji eigki na ago aiek, el et eti amen ehelen a Atua.

3 Is tas ehelen a Iesu, um ika, Et idim inivaijec ineig ek asaig ehelum ainyak *mika*, El eh eti lep apos tali natimi, inyi ehka vai yin necetaivaig nelcau o Atua.

4 Is um ika ehelen a Nikotimus, Uhpu lep ehvapos natimi ineig et mun efatimi aien? et ehka vai yin napanvaig an nipjinetgai risin, mika uhpu lep apos yin.

5 Is um ika a Iesu, Et idim inivaijec ineig ek asaig ehelum ainyak *mika*, El eh eti lep apos tah natimi an wai im lep an Nesgan *Upene*, inyi ehka vai yin napanvaig an nelcau o Atua:

6 et ohun nitai ineig er apos an nohun; ja et esgan nitai ineig et apos a Nesgan *Upene*:

7 jim imyiali vai intas ineigki aiek ek mun asaig ehelum ainyak *mika*, Eris idim ika uhpu lep apos caua:

8 et ispun iji nimtinjop, na ahgei nohran aiek, jam eti ato inuarin ineig et ahes iran, im inuarin ineig et apan iran: et um ucco natimi asega et apos ra a Nesgan *Upene*.

9 Is tas a Nikotimus, um ika ehelen, Etpu ehveteuc nitai iji eigki?

10 Is tas a Iesu, um ika ehelen, Na atimi esege aiek imi nupu Isreel, jam eti ato nitai iji eigki?

11 Et idim inivaijec ineig ek asaig ehelum ainyak *mika*, Ecra tas aijama va nitai iji eigki ecra ato aijama, um asuptecnaig nitai iji eigki, ecriis almoi aijama; ja eka eti etene an tas unyima aijaua.

12 El eka eti imyiisjis nini-vaijec aijaua ek wat tas ehelemia ainyak va niji itai an nobohtan, akupu imyiisjis nini-vaijec aijaua um uauo, el ek tas ehelemia ainyak va niji itai an nohatag?

13 Is eti aridjai an nohatag tah natimi, aien ache is ahes an nohatag aien um asuol, Inhal o natimi, et amen aien an nohatag.

14 ¶ Is atijai nimyiv an namas-acen a Moses, etpu idim ucco eris idim ika uhpu atijai Inhal o natimi:

15 va eri eti emesmas a ilpu atimi asgeig iran asega, jam leh nitai umoh iran ineig inyi ti lep ti.

16 Is um uce naiheuc vai iji pece asega o Atua is abrai Inhal o un is eti ache aien, va eri eti emesmas a ilpu atimi asgeig iran asega, jam leh nitai umoh iran ineig inyi ti lep ti.

17 Is eti abrai Inhal o un a Atua mika yi asuol pam an nobohtan par ika eri emesmas atimi an nobohtan; ja *is abrai yin aien* mika yi imyiata-maig atimi an nobohtan aien.

18 Eris eti ika etpu mas a natimi ineig et asgeig iran aien: ja eris idim ika etpu mas a natimi ineig et eti asgeig iran aien, va nedo o un, nikavaig, et eti asgeig aien an nidai Inhal o Atua et ethi ache.

19 Eris ika erupu emesmas atimi va nedo ura, nikavaig, is ham inlah an nobohtan, ja is aiyu inliinmopoi atimi va naupat, jam has inliinmopura ara vai inlah, va nedo has ura.

20 Era amcel vai inlah ara asega era ago nedo has ara, um eti apan u inlah, va eri jim ecetai nedo ura:

21 ja et apan u inlah natimi ineig et ago nedo inivaijec aien, mika eri ecetai nedo o un, nedo ineig et ago aien vai Atua.

22 ¶ Is wat ti pan itac nitai iji eigki, is apan an pece Jutaia a Iesu im ilpu atimi atahaijeg yin; is amen eahki ehele ra aien, um baptiso *ira atimi*.

23 Is lep baptiso *ira atimi* a Joanes Inon ubutpotet u Selim, is ahinag inwai eahki: eris ahtag pan ehelen *natimi*, um leh nabaptiso ira ra.

24 Eris pam eti ati Joanes anliin neom ipjin an naopan iyehki.

25 ¶ Im lep ineig, eris imyiisjis jipe inyiri *ra* a ilpu ahaiji atimi atahaijeg Joanes im nupu Jutaia.

26 Eris apan ehele Joanes ara, um ika ehelen, Ak Natimi esege, aien is amen ehelum aien an nahaijin Jortan itac, aien as asuptecnai yin

aiek, et idim baptiso *ira atimi* aien; era ahtag pan ehelen natimi asega.

27 Is tas a Joanes, um ika, Et ehka vaig tah natimi intup ispun lehvaig tah nitai, el eh eti alupai yin an nohatag.

28 Eka idim ato aijaua mika kis ika ainyak, Ek eti Kristo ainyak, ja eris abrai nyak mika ki uhup iran ainyak.

29 Aien er aniv yin im natahaig ineig inyi atidai aien, etpu atidai aien: ja et aiji a etoai natimi ineig etpu atidai aien, um atahaijeg yin, um imyiacitak alupas va nohra natimi ineig etpu atidai aien: et idim ucco et esjilid nimyiacitak unyak.

30 Eris idim ika etpu esjilid aien, ja ekpu asuol ainyak.

31 Aien et ahes an nohatag aien, et esjilid aien irai iji itai asega: aien et ahes an nobohtan aien, et obohtan aien, um tas va nobohtan: aien et ahes an nohatag aien, et esjilid aien irai iji itai asega.

32 Et asuptecnaig nitai ineigki aien is ecetai aien um atahaijeg; ja et idim eti leh intas asuptecnaig o un tah natimi.

33 Aien is leh intas asuptecnaig o un aien, is ati nitai asjaaicnaig o un aien mika et inivaijec a Atua.

34 Aien is abrai yin a Atua et asuptecnaig intas o Atua aien: et idim alupai *yin* Nesgan *Upene* a Atua mika yi amen alupas *ehelen*.

35 Et aiyu inliinmopoi Etmak vai Inhal o *un*, is ati nihi itai asega ehelen aien.

36 Aien et asgeig irai Inhal o *Atua* aien, et o un nitai umoh iran ineig inyi ti lep ti: aien et eti asgeig irai Inhal o *Atua* aien, inyi ti ecetai nitai umoh iran aien; ja et amen iran intavaitap o Atua.

NUARIN-TAS ALUPAS 4.

IS wat ato a Natimarid, nikavaig, Eris atahaijeg a ilpu Farisi mika is leucse ilpu atimi atahaijeg yin is

ahinag a Iesu um baptiso *ira ra*, jam leuse ete elpat a Joanes,

2 (ja is ete baptiso *ira atimi* a Iesu, ilpu atimi atahajjeg yin ache,)

3 is ahes Jutaia aien, um atga o un, um lep apan Calili.

4 Is ika aien yi ahced an *pece* Samerya.

5 Is apan aien an nuarin-pece is ethi Samerya nidau Saikar, ubut-potet u nuarin nobohtan iyehki is alupai Josef inhal o un a Jakob.

6 Is eteuc ealiki nehpan wai u Jakob. Is esvi Iesu natgavaig, is um ateuc aien u inwai iyeliki : is adiat-diat.

7 ¶ Is apan a intakata Samerya is ethi alaig athun wai : is um ika ehelen a Iesu, Alumak tah inwai aiek.

8 (Eris mun apan a ilpu atimi atahajjeg yin an nuarin-pece mika eri auanintan nitai caig.)

9 Is um ika ehelen a intakata Samerya, Na auri aiek par ugni nyak vai inwai, na upu Jutaia aiek, ja ek takata Samerya ainyak?—era ete ahum jipe a nupu Jutaia in nupu Samerya.

10 Is tas a Iesu, um ika ehelen, El et ato nitai tup ahtai o Atua aiek, im lep yin et ika ehelum aien, Alumak tah inwai aiek ; el et ugni yin aiek, el et par alumam inwai umoh aien.

11 Is um ika ehelen a intakata iyehki, Ak natimi alupas, eh ti nitai athun wai unyum, et lep ubou nehpan wai : napu leh inwai umoh ineigki aiek eda?

12 na esjilid aiek irai Jakob et-maija, ka o'o? is alupai cama nehpan wai ineigki aien, is umwig iran aien, im ilpu hal o un, im kurimatau o un.

13 Is tas ehelen a Iesu, um ika, Aien inyi umnyi inwai ineigki aien, etpu lep ahvig wai aien :

14 ja aien inyi umnyi inwai ineig aien ekpu aluman ainyak, inyi ti lep ahvig wai aien irai iji mesese ; inwai ineigki ekpu aluman ainyak

inyi intanwai anlinmopon, um ahlau ohua sjai nitai umoh iran inyi ti lep ti.

15 Is um ika ehelen a intakata iyehki, Ak natimi alupas, alumak inwai ineigki aiek, mika ki ti lep ahvig wai ainyak, um ete lep ham igcaki par athun wai.

16 Is um ika ehelen a Iesu, Apan aiek, um ahlaiig vai natamnyu unyum, um lep apam igcaki.

17 Is tas a intakata iyehki, um ika, Et ti natamnyu unyak. Is ika ehelen a Iesu, Et inivajjec intas unyum, nikavaig, Et ti natamnyu unyak :

18 is ikman ilpu atamnyu unyum aiek ; aien et amen ehelum aien an naopan ineig, et ete atamnyu unyum aien : na mun asan tas inivajjec aiek.

19 Is um ika ehelen a intakata iyehki, Ak natimi alupas, ek ato ainyak, nikavaig, na aprofeta aiek :

20 eris alaigaheni an nedoon ineigki a ilpu retpoma ; ja eka ika aijaua, eri han alaigaheni Jerusalem ache atimi.

21 Is um ika ehelen a Iesu, Ak intakata ineigki, uamu eteuc an tas unyak aiek, nikavaig, etpu yetpam naopan iyehki, aku wit ete alaigaheni vai Etmak aijaua an nedoon ineigki, um uce Jerusalem.

22 Eka ete ato nitai ineig aijaua eka alaigaheni vaig aijaua : eera ato nitai ineig aijama eera alaigaheni vaig aijama ; et ahes ehele nupu Jutaia nitai imyiatamaig *atimi*.

23 Ja etpu yetpam naopan iyehki, et mun idim ham, eru wit alaigaheni anlinmopura um inivajjec vai Etmak a ilpu atimi alaigaheni inivajjec ; et merit a Etmak mika yi uce nedo o ilpu atimi alaigaheni vai yin.

24 Et Esgan a Atua : eris idim ika eri alaigaheni vai *yin* an nescara um inivajjec a ilpu atimi alaigaheni vai yin.

25 Is um ika ehelen a intakata

iyehki, Ek ato ainyak, nikavaig, etpu yetpan a Mesia, er anvi nidan par ika Kristo: et wit ham aien, etpu asuptecnaig ehelema aien niji itai asega.

26 Is um ika ehelen a Iesu, Ainyak um aigki ek tas ehelum ainyak.

27 ¶ Is wat tas aien, eris um han *ehelen* a ilpu atimi atahaijeg yin, um imyiali *nedo o un*, nikavaig, is tas ehele intakata aien: ja is eti ika tah natimi, Nai merit vanhe aiek? ka, Na auri aiek pah tas ehelen?

28 Is ude nipjinitai o un a intakata iyehki um atga o un, um apan an nuarin-pece *o un*, um ika ehele atimi,

29 Apan aijaua, um alum natimi et ethi, et mun asuptecnaig ehelek aien niji itai asega kis mun ago ainyak: kit Kristo neigki?

30 Eris ahes an nuarin-pece *ura* ara, um apan ehelen.

31 ¶ Eris ugni yin a ilpu atimi atahaijeg yin, um ika, Ak Natimi esege, namu hag aiek.

32 Ja is um ika ehele ra aien, Et eteuc nitai caig unyak ainyak, ja eka eti ato aijaua.

33 Eris um tas jipe a ilpu atimi atahaijeg yin, *um ika*, Et mun alaan nitai caig tah natimi, ka o'o?

34 Is um ika ehele ra a Iesu, Et itai caig unyak ineigki, ninyiaijivaig intas o un is abrai nyak aien, um lep ago ehni nauritai o un.

35 Eka idim ika aijaua, Et wit ti pan itac inmhoc inyi for, etpu yetpan naopan asjapicnaig nohoai itai; ja ek asaig ehelemia ainyak mika, Akumu eas pan irai esgai-intamia aijaua, um alum esean; et metto nohoai itai iran an naopan ineig.

36 Aien et asjapicnaig nohoai itai aien, et leh nimitan aien, um asjapicnaig nohoai itai va nitai umoh iran ineig inyi ti lep ti: mika eri ehrim-yiacitak a ilpu atimi ahapol im ilpu atimi asjapicnaig nohoai itai.

37 Et idim inivaijeg intas ineigki, nikavaig, Et ahapol natimi et ethi, ja etpu asjapicnaig intak atimi.

38 Kis abrai caua ainyak mika aki asjapicnaig nohoai itai aijaua an nuarin ineig akis eti auritai iran aijaua: eris auritai iran intak atimi, ja eka mun yetpan irai auritai ura aijaua.

39 ¶ Eris asgeig iran a nupu Samerya is ahinag an nuarin-pece iyehki vai intas o intakata iyehki, is ika aien, Et mun asuptecnaig ehelek aien niji itai asega kis ago ainyak.

40 Eris yetpan ehelen a nupu Samerya, um ugni yin mika yi amen ehele ra aien: is amen aien eahki an nadiat is ero.

41 Eris lep imyisjis ninivaijeg natimi is ahinag vai intas o un *ehele* ra;

42 um ika ehele intakata iyehki, Ecra idim imyisjis ninivaijeg aijama, ja eti vai intas unyum: ecra mun idim atahaijeg *intas o un* aijama, um ato, nikavaig, et idim Kristo aien, Natimi imyiatamaig nup urai iji pece asega.

43 ¶ Is wat ti pan itac nadiat is ero, is ahes eahki aien um atga o un, um apan Calili.

44 Is idim ika a Iesu, Era eti imyiahpas tah naprofeta a nup uran pece o un.

45 Is wat yetpan Calili aien, eris leh yin a nupu Calili, eris ecetai niji itai asega is ago aien Jerusalem u nasjapicnaig: eris lep apan u nasjapicnaig ara.

46 Is lep apan Kena a Iesu an *pece* Calili, eahki is ago waina an wai aien.

Is eteuc natimi alupas is ethi, is emehe inhalav atamaig o un Kaperneum.

47 Is wat atahaijeg aien, nikavaig, is ahes Jutaia a Iesu um apan Calili, is apan ehelen aien, um ugni yin mika yi apan aien, um ago cehcehe

inhal o un: is ubutpotet o unmas o un aien.

48 Is um ika ehelen a Iesu, El eka eti almoei niji auritai ehka aijaua im niji itai imyiali, aki eti imyiisjis ninivaijec aijaua.

49 Is um ika ehelen a natimi alupas iyehki, Ak Natimarid, efi apan aiek va yi jim upyi mas a inhal unyak.

50 Is um ika ehelen a Iesu, Atga unyum aiek; et mun umoh a inhal unyum. Is um imyiisjis ninivaijec intas o Iesu aien, um atga o un.

51 Is wat apan aien, eris aubillid yin a ilpu aheca o un, um asuptecnaig *ehelen*, um ika, Et mun umoh a inhal unyum.

52 Is ahodai ra aien va nuarin-nadiat ineig is umoh iran aien. Eris um ika ehelen ara, Ianiv an nadiat-adiat et mun edoaijaig iran nemehe ihlup.

53 Is ato a etman mika idim nuarin-nadiat yehkiyehki is asaig ehelen a Iesu, um ika, Et mun umoh a inhal unyum: is imyiisjis ninivaijec aien im lep ra asega an nimmim o un.

54 Nehcero ago nauritai ehka o Iesu neigki an nahes o un Jutaiia um apan Calili.

NUARIN-TAS ALUPAS 5.

IS wat ti pan itac nitai iji eigki, eris asjapicnaig a nupu Jutaiia; is apan Jerusalem a Iesu.

2 Is eteuc netpen Jerusalem ubutpotet u *neucse nirahed* u siip, nidau Hibru Bedesta, is faiv naiyu o un.

3 Eris asjeuc ithan *naiyu* a ilpu atimi emehie is ahinag, ilpu atimi aupat nesganimtura, *im* ilpu atimi atga adjo, *im* ilpu atimi urauo, eris atgaig nahcatina u inwai ara an tah naopan.

4 Is asuol an netpen a nagelo an tah naopan um eluca i an wai: aien is upyi hup aien um asuol, is wat

ahcatina inwai, is edoaijaig iran nemehe o un.

5 ¶ Is amen eahki natini is ethi, is emehie aien irai mesese is dirte eet.

6 Is wat alum yin a Iesu nasjeucvaig, um ato, nikavaig, is *emehe* aien itu acen, is um ika ehelen aien, Nai merit aiek incehcehevaig, ka o'o?

7 Is um ika ehelen a natimi emehie, Ak natimi alupas, et eti amen ehelek tah natimi par atise nyak an netpen, an nahcatina u inwai: ek wat apan ainyak, et uhup irak tah um asuol.

8 Is um ika ehelen a Iesu, Atidai aiek, um leh nitai ahled unyum, um atga unyum.

9 Is um auroauro um cehcehe natimi iyehki, um leh nitai ahled o un, um atga o un: is idim adiat atumop iyehki.

10 ¶ Eris um ika a nupu Jutaiia ehele natimi iyehki eris ago cehcehe yin, Nadiat atumop ineigki: et itaup naposvaig nitai ahled unyum.

11 Is um ika ehele ra aien, Aien is ago cehcehe nyak aien, is ika ehelek aien, Leh nitai ahled unyum aiek, um atga unyum.

12 Eris ahodai yin ara, *um ika*, Natimi iyehki di, is ika ehelum aien, Leh nitai ahled unyum aiek, um atga unyum?

13 Ja is eti ato yin a natimi iyehki is ago cehcehe yin: is um eklim tup tiblaitibla atimi eahki a Iesu um atga o un.

14 Is wat ti pan itac nitai iji eigki, is ecet yin a Iesu anliin neom ahlap, um ika, Na mun idim cehcehe aiek: jam jim lep ago nedo has aiek, va yi jim lep yetpan iram tah nitai has inyi esjilid iran yehki.

15 Is atga o un a natimi iyehki, um asuptecnaig ehele nupu Jutaiia, um ika, Iesu iyehki is ago cehcehe nyak aien.

16 Eris atinas vai Iesu a nupu Jutaiia, um tas jipe mika eri atgei

yin, va nedo o un, nikavaig, is ago nitai iji eigki aien an nadiat atumop.

17 ¶ Is um ika ehele ra a Iesu, Is auritai a Etmak um imyihum pam naopan ineig, ek lep auritai ainyak.

18 Eris tas emda jipe a nupu Jutaia mika eri atgei yin, va nedo o un, nikavaig, is auahas nadiat atumop aien, is lep ika aien, Et Etmak a Atua, um ika is apa vai Atua aien.

19 Is tas a Iesu, um ika ehele ra, Et idim inivaijec ineig ek asaig ehelemia ainyak *mika*, Et ehka vai Inhal o Atua intup ispun ago tah nitai vaig, nitai iji eigki ache, et alum Etman aien nagovaig: nitai iji eigki asega et ago aien, et lep ago a Inhal o un.

20 Et aiyu inliinmopoi Etmak vai Inhal o un, et ehvaig ehelen aien niji itai asega et ago aien: etpu lep ehvaig ehelen aien niji auritai inyi esjilid iran ji eigki, mika aki imyiali aijaua.

21 Et idim imyiatidai ilpu atimi emesmas a Etmak, um imyiata-mumoh *ra*; et um ucco et imyiata-mumoh *ra* sji eigki a Inhal o un et merit vai ra aien.

22 Et eti asuptecnaig nintan im intah natimi a Etmak, ja is ati Inhal o un aien mika yi asuptecnaig nintan imi ra asega aien,

23 mika eri eccen vai Inhal o un natimi asega, et idivaig era eccen vai Etmak ara. Aien et eti eccen vai Inhal o un aien, et eti eccen aien vai Etman is abrai yin aien.

24 Et idim inivaijec ineig ek asaig ehelemia ainyak *mika*, Aien et atahaijeg intas unyak aien, um asgeig iran is abrai nyak aien, et leh nitai umoh iran ineig aien inyi ti lep ti, inyi ti lep leh neru va *nedo has o un* aien; is aha vai inmas aien um leh nitai umoh iran.

25 Et idim inivaijec ineig ek asaig ehelemia ainyak *mika*, Etpu yetpam naopan iyehki, et mun idim ham, eru wit atahaijeg nohrai Inhal

o Atua a ilpu atimi emesmas: erupu umumoh ara era atahaijeg ara.

26 Et idim amen nitai umoh iran ehele Etmak; et um ucco et alupai Inhal o un nitai umoh iran aien, mika yi amen ehelen;

27 is lep ati yin aien mika yi asuptecnaig nintan *imi atimi* aien, va nitai ineigki, nikavaig, et Hal o natimi aien.

28 Jim imyiali nitai ineigki aijaua: va nitai ineigki, nikavaig, etpu yetpam naopan iyehki, eru wit atahaijeg nohrai ara asega era *amen* irai ehpa-itai ara,

29 um atidai; erupu anusjai a ilpu atimi upene, um leh nitai umoh iran; ja erupu anusjai a ilpu atimi auatatimi, um leh nintan *nedo has ura*.

30 Et ehka vai nyak intup ispuk agovaig tah nitai: ek idim atahaijeg ainyak, et um ucco ek lep asuptecnaig nintan ainyak: et atoh intas asuptecnaig unyak; ek eti imyiaiji intas unyak ainyak, jai intas o Etmak is abrai nyak aien.

31 El ek *echim* asuptecnaig nyak ainyak, el et eti inivaijec nasuptecnaig unyak.

32 ¶ Et asuptecnaig nyak intak atimi; ek ato ainyak *mika* et inivaijec intas o un vai nyak.

33 Akis abraig pan *atimi* ehele Joanes aijaua, is asuptecnaig intas inivaijec aien.

34 Ja ek eti ika ainyak eri asuptecnaig nyak atimi: ja ek asaig nitai iji eigki ainyak, va uhpu imyiatamaig caua vaig.

35 Is cop alahala aien, is lah um ememina: akis imyiacitak ipjid-ipjid aijaua vai inlah o un.

36 ¶ Ja et eteuc nasuptecnaig nyak et esjilid irai Joanes: nauritai iji eigki is asaig ehelek a Etmak mika ki ago ehni ainyak, ek ago nauritai iji eigki ainyak par asuptecnaig nyak, mika is abrai nyak a Etmak.

37 Is abrai nyak a Etmak, um lep asuptecnaig nyak. Akis eti atahai-

jeg nohran aijaua an tah naopan, um eti almoi nehcolios o un.

38 Et eti amen anliinmopomia intas o un: eka eti eteuc an tas o un aijaua is abrai yin aien.

39 ¶ Eka ahilek an tas eris aged aijaua; eka aktaktai aijaua mika aki leh iran nitai umoh iran ineig inyi ti lep ti: et idim asuptecnaig nyak *intas* ineigki.

40 Ja eka esjum aijaua nahtag pan vaig ehelek, par leh nitai umoh iran.

41 Ek eti leh nimyiahpas *nyak* o atimi ainyak.

42 Ek idim ato caua ainyak, mika et eti aiyu inliinmopomia aijaua vai Atua.

43 Ek ham ainyak an nidai Etnak, ja eka eti leh nyak aijaua: el et ham intak atimi an nidani ache, akupu leh yin aijaua.

44 Et ehka vai caua nimyiisjis ninivaijec vaig, eka imyiahpas jipe caua aijaua, jam eti ahilek nimyiahpas ineig et *ahes* ehele Atua ineig et ethi ache aien.

45 Jim ika aijaua ekpu alihi caua ehele Etnak ainyak: et idim alihi caua a Moses, aien aigki eka asgeig iran aijaua.

46 Al ekis eteuc an tas o Moses aijaua, el eka lep eteuc an tas unyak aijaua: is aged intas vai nyak aien.

47 El eka eti eteuc aijaua an tas ineig is aged aien, akupu eteuc an tas unyak aijaua um uauo?

NUARIN-TAS ALUPAS 6.

IS wat ti pan itac nitai iji eigki, is algauwaig an jop Calili, *tak idan* Taibiryas.

2 Eris wat almoi niji auritai ehka o un iji eigki is ago aien irai ilpu atimi emehel natimi is ahinag acen, eris apitac yin ara.

3 Is aridjai a Iesu an nedoon, um

ateuc, im lep ilpu atimi atahaijeg yin.

4 Is um ubutpotet u napaska, nas-japicnaig o nupu Jutaiia yehki.

5 ¶ Is eas pan a Iesu, um alum atimi is ahinag nahtag pan vaig ehele, is ika ehele Filipus aien, Inti auarimta areto eka akaija par alayi ra sji eigki?

6 Is asan tas ineigki aien par ato inliinmopon; is idim ato aien nitai ineig etpu ago aien.

7 Is um ika a Filipus, El eh auarimta areto irai munc tu huntret um alaa ra, inyi ti apaahni ira ra asega nuarin tintin ache.

8 Is ika ehelen a natimi atahaijeg yin is ethi, Antrius, etoi Saimona Pitrus,

9 Et amen nareto barle et faiv, im lep inhaklin numu et ero, ehele intakuras et ethi igcaki: ja et idim eti elpat iji eigki nalaa atimi et ahinag vaig.

10 Is um ika a Iesu, Akumu abra atimi aijaua mika eri ateucse ara. Is ahinag nefelelicai an nuarin iyehki. Eris ateucse a ilpu atamaig, eris idivaig faiv dausant ara.

11 Is leh nareto a Iesu, um naaurineig *iran*, ja par alupai ilpu atimi atahaijeg yin, *eris alaa* atimi ateucse ilpu atimi atahaijeg yin; is lep ucce a numu; *eris hegaig ara*, um eti ahtahni.

12 Eris wat gaije ara, is ika ehele ilpu atimi atahaijeg yin aien, Asjapicnaig nuari itai hegaig aijaua, va yi jim has tah.

13 Eris wat hag ehni natimi, eris asjapicnaig ara nuari *areto* is aled ira areto barle is faiv iji ehki, um atohoaig irai cat is twelv, is um ohua.

14 Eris wat almoi nauritai ehka ineig is ago a Iesu natimi iji ehki, eris ika ara, Et inivaijec ineig, nikavaig, et aprofeta iyehki aien eris ika vai yin etpu ham aien an nobohtan.

15 ¶ Is wat ato a Iesu, nikavaig,

eris ika ara eri apan um asjirai yin um ati yin natimarid *ura*, is atga o um aien, um echim apan an nedoon.

16 Is wat jupura, eris ehcohos pok a ilpu atimi atahaijeg yin,

17 um aridjai an nelcau, nalaig apan Kaperneum. Is wat epeig, is um eti apan ehele ra a Iesu.

18 Is um iji nintinjop alupas um elgei namilvai.

19 Eris wat aheled pan ara is dri ka for mail, ja par ecet Iesu natgavaig an jop, um ubutpotet pan u nelcau: eris um imtitaig ara.

20 Is um ika ehele ra aien, Ainyak aigki; jim imtitaig aijaua.

21 Eris atijai yin an nelcau ara um imyiacitak: is um auroauro nelcau um apahai an pece iyehki eris apan iran ara.

22 ¶ Is wat lahlah an tak apnyin, eris aiji an nahaijin jop natimi is ahinag, jam eti ecetai tah nalvelcau eahki, *nalvelcau* ineig ache eris aheled iran a ilpu atimi atahaijeg yin, *eris* lep *ato ara*, nikavaig, is eti ahced ilpu atimi atahaijeg yin a Iesu an nalvelcau *ura*, eris echim apan a ilpu atimi atahaijeg yin ache;

23 (ja eris ahes Taibiryas niji alvelcau is eche ubutpotet u nuarin iyehki is naaurineig iran Natimarid, ja eris par hag ara:)

24 eris wat eti ecet Iesu eahki ara, im lep ilpu atimi atahaijeg yin, eris lep ahlauijai irai elcau ara, um apahai Kaperneum, um ahilek Iesu.

25 Eris wat ecet yin ara an nahaijin jop, eris um ika ehelen ara, Ak Natimi esege, nai ham aiek igcaki an nahopan?

26 Is tas a Iesu, um ika ehele ra, Et idim inivaijec ineig ek asaig ehelemia ainyak *mika*, Eka eti ahilek nyak aijaua va niji auritai ehka iji eigki akis ecetai aijaua, jai va areto iji eigki akis hegaig aijaua, um gaije iran:

27 akumu jim auritai aijaua va nitai caig ineig et eti laulan um has, ja va nitai caig ineig inyi amen an nitai umoh iran inyi ti lep ti, etpu alaamia a Inhal o natimi: is idim ati nitai asjaaicnaig vai yin a Atua Etman.

28 Eris um ika ehelen ara, Ecri ago inhe aijama, va ecrupu ago nauritai o Atua vaig?

29 Is tas a Iesu, um ika ehele ra, Nauritai o Atua ineigki, mika aki asgeig iran aijaua is abrai yin aien.

30 Eris lep ika ehelen ara, Nev auritai ehka ineig na ago aiek, mika ecri almoi aijama, um imyiisjis nini-vaijec euc? na ago inhe aiek?

31 eris hegaig manna an namas-acen a ilpu retpoiija; et idivaig eris aged, *um ika*, Is alaa ra nitai caig ineig aien is ahes an nohatag in-cara.

32 Is um ika ehele ra a Iesu, Et idim inivaijec ineig ek asaig ehelemia ainyak *mika*, Is eti alaamia nitai caig ineig is ahes an nohatag a Moses; ja et alaamia nitai caig inivaijec ineig et ahes an nohatag a Etmak.

33 Nitai caig ineig *et ahes* ehele Atua, aien aigki is ahes an nohatag aien um asuol, um alupa atimi an nobohtan nitai umoh iran.

34 Eris um ika ehelen ara, Ak Natimarid, alaama nitai caig ineigki aiek irai iji adiat.

35 Is um ika ehele ra a Iesu, Ek itai caig umoh ainyak: aien et ham ehelek aien, inyi ti lep eltele yin aien; aien et asgeig irak aien, inyi ti lep ahvig tah nitai aien:

36 ja ek mun asaig ehelemia ainyak *mika*, Akis ecet nyak aijaua, jam eti asgeig *irak*:

37 erupu ahtag pam ehelek ara asega is alupai nyak ra a Etmak; aien et ham ehelek aien, inki idim eti acaiji yin ainyak:

38 kis eti ahes an nohatag ainyak um asuol, mika ki imyiaiji intas

unyak, jam *imyiai* intas o un is abrai nyak aien :

39 intas alep o Etmak ineigki is abrai nyak aien, mika ki ti eipujaig tah ra ainyak is alupai nyak ra aien, jam imyiatidai ra an nadiat apitac :

40 intas alep o un ineigki is abrai nyak aien, mika eri leh nitai umoh iran ineig inyi ti lep ti ara asega, era alum Inhal o *Atua* ara, um asgeig iran : ekpu imyiatidai ra ainyak an nadiat apitac.

41 ¶ Eris tas upoupo vai yin a nupu Jutai a nitai ineigki, is ika aien, Ek itai caig ineig ainyak is ahes an nohatag um asuol.

42 Eris um ika ara, Iesu ineigki, inhal o Josef, ka o'o? eera ato etman im risin aijama : et echamecha par ika aien, Kis ahes an nohatag ainyak um asuol ?

43 Is lep tas a Iesu, um ika ehele ra, Akumu jim tas upoupo jipe aijaua.

44 Et ehka vaig tah natimi intup hamvaig ehelek, el et eti ahiaig pam yin a Etmak is abrai nyak aien : ja ekpu imyiatidai yin ainyak an nadiat apitac.

45 Eris aged a ilpu profeta, *um ika*, " Etpu esege imi ra asega a *Atua*." Erupu altag pam ehelek ara asega, era atahaijeg ara, um leh nesege o Etmak.

46 Ja is idim eti ecet Etmak tah natimi, aien ache is ahes ehele *Atua* aien, is ecet Etmak aien.

47 Et idim inivaijec ineig ek asaig ehelema ainyak *mika*, Aien et asgeig irak aien, etpu leh nitai umoh iran ineig aien inyi ti lep ti.

48 Ek itai caig umoh ineigki ainyak.

49 Eris hegaig manna an namasacen a ilpu retpomia, ja eris ememas ara.

50 Nitai caig is ahes an nohatag um asuol ineigki, eri eti ememas a ilpu atimi caig.

51 Ek itai caig umoh ainyak, is

ahes an nohatag um asuol : aien et caig nitai caig ineigki aien, inyi umoh aien irai iji mesese : nitai caig ineigki ekpu alaa *atimi* ainyak nohuk, ekpu ahtai *nohuk* ainyak mika eri umumoh natimi an nobohtan.

52 ¶ Eris imyisjis jipe ira ra a nupu Jutai a, um ika, Etpu alaija nohun a natimi ineigki um uauo, mika tupu caig akaija ?

53 Is um ika ehele ra a Iesu, Et idim inivaijec ineig ek asaig ehelema ainyak *mika*, El eka eti caig nohui Inhal o natimi aijaua, um umnyiinja iran, aki eti umumoh aijaua.

54 Aien et caig nohuk aien, um umnyiinja irak, et o un nitai umoh iran ineig inyi ti lep ti; ekpu imyiatidai yin ainyak an nadiat apitac.

55 Et idim itai caig nohuk, um lep itai umnyiinja irak.

56 Aien et caig nohuk aien, um umnyiinja irak, et amen ehelek aien, um lep *amen* ehelen ainyak.

57 Et idivaig is abrai nyak a Etmak umoh, ek lep umoh ainyak vai Etmak : et um ucco aien et caig *nohuk* aien, etpu umoh aien vai nyak.

58 Nitai caig is ahes an nohatag um asuol ineigki : jam eti idivaig manna iyehki eris caig a ilpu retpomia, ja eris ememas ara : aien et caig nitai caig ineigki aien, etpu umoh aien irai iji mesese.

59 Is asan tas iji eigki aien anliin neom alaijaheni, an nesege o un Kaperneum.

60 ¶ Eris wat atahaijeg *intas ineigki* ara, eris ika a ilpu atimi atahaijeg yin is ahinag, Et ehka intas ineigki ; inyi emda a di par leh ?

61 Is wat ispun ato a Iesu, nika-vaig, eris tas upoupo vai *intas* ineigki a ilpu atimi atahaijeg yin, is um ika ehele ra aien, Eka edemda aijaua vai *intas* ineigki, ka o'o ?

62 Akupu ehvecet Inhal o natimi aijaua naridjai vaig an nuarin

iyehki is upyi hup aien um amen iran?

63 Et imyiatamumoh *nohu atimi* nesgan; et auatialidi nohu atimi: et esgan intas ineig ek asaig ehele-mia ainyak, um itai imyiatamumoh *caua*.

64 Ja et eteuc nahaijimia era eti imyiisjis ninivaijec ara.—Is wat pam eti eteuc nobohtan ineigki, is ato ra a Iesu erupu imyiisjis nahcil ara, im lep yin etpu aniv yin aien.

65 Is um ika aien, Ek mun idim asaig ehele-mia ainyak mika, et ehka vaig tah natimi intup hamvaig ehelek, el et eti alupai yin *nemda* a Etmak.

66 ¶ Eris adumoij a ilpu atimi atahajjeg yin is ahinag an *naopan* iyehki, um eti lep ahced yin.

67 Is um ika a Iesu ehele natimi is twelv, Eka lep merit aijaua nadumoijvaig, ka o'o?

68 Is um ika ehelen a Saimona Pitrus, Ak Natimarid, erupu apan ehele di aijama? et amen ehelum intas va nitai umoh iran ineig inyi ti lep ti:

69 eera imyiisjis ninivaijec aijama um ato, nikavaig, nai Kristo aiek, Inhal o Atua umoh.

70 Is um ika ehele ra a Iesu, Kis ehtai caua ainyak, eka twelv aijaua; ja et *idivai* tiapolo tah et ethi iramia.

71 Is tas vai Jutas nupu Karyot aien, *inhal* o Saimona: aien aigki, is ika aien etpu aniv yin, is lep ethi aien ira atimi is twelv.

NUARIN-TAS ALUPAS 7.

IS wat ti pan itac nitai iji eigki, is atga sjipe a Iesu an *pece* Calili: is eti merit aien natga jipe vaig an *pece* Jutaia, va nitai ineig, nikavaig, eris ika a nupu Jutaia eri atgei yin.

2 Is mun ubutpotet u nasjapicnaig

u nupu Jutaia irai im muricai an naopan iyehki.

3 Eris um ika ehelen a ilpu etoan, Atga unyum aiek, um apan Jutaia, mika eri lep almoi niji auritai iji eigki na ago aiek a ilpu atimi atahajjeg euc:

4 et wat merit tah natimi mika eri ato yin atimi asega, et eti ago tah nitai aien um adenaig: el et ago nitai iji eigki aiek, namu ehvai euc aiek ehele atimi.

5 Eris idim eti asgeig iran a ilpu etoan.

6 Is um ika ehele ra a Iesu, Et mun eti fi yetpam naopan unyak: ja et eteuc naopan unyimia irai iji adiat:

7 et ehka va atimi namcel vai caua vaig; ja era amcel vai nyak ara, va nedo unyak, nikavaig, ek acaiji nedo has ura ainyak:

8 apan aijaua u nasjapicnaig ineig: inki ti apan ainyak u nasjapicnaig ineigki an naopan ineig; et pam eti fi yetpam naopan unyak.

9 Is asan tas ineigki ehele ra aien, ja par amen Calili.

10 ¶ Eris wat apan a ilpu etoan alaig u nasjapicnaig, is lep apitac *ra* aien, jam ateri *natga o un*, um eti asaig.

11 Eris ahilek yin u nasjapicnaig a nupu Jutaia, um ika, An yek eda aien?

12 Eris imyiisjis jipe yin natimi: eris ika nahaiji ra, Et atimi upene aien: ja eris ika nahaiji ra, O'o; et ago nedo efaifa aien va atimi.

13 Ja is eti tas emda vai yin tah, eris intitai upu Jutaia ara.

14 ¶ Is apan a Iesu anliin neom ahlap, an nadiat is ethi juju an nasjapicnaig o atimi, um esege.

15 Eris imyiali a nupu Jutaia, um ika, Et ato nitasvitai a natimi ineigki vai di, eris eti esege imi yin?

16 Is tas ehele ra a Iesu, um ika, Et eti ahes ehelek nesege unyak, ja et ahes ehelen is abrai nyak aien.

17 El et merit tali natimi nimyiaiji-vaig intas o un, inyi ato aien, kit is ahes ehele Atua nesege *unyak*, ka ek ispuk tas ainyak.

18 Aien et ispun tas vai yin aien, et ahilek nimyiahpas yin aien: ja aien et ahilek nimyiahpas yin is abrai yin aien, et inivaijiec aien, um atoh nedo o un.

19 Is alupai caua intas alep a Moses, ja eka idim eti imyiaiji intas alep aijaua. Eka auri aijaua par ika aki atgei nyak?

20 Eris tas natimi, um ika, Et anen ehelum a nagelo has: et ika a di yi atgei euc?

21 Is tas a Iesu, um ika ehele ra, Kis ago nauritai is ethi ainyak, ja eka idim imyiali aijaua asega.

22 Is asuptecnaig ehelemia naperitome a Moses; (ja is eti ahes ehele Moses, is ahes ehele ilpu retpoiija;) eka aperitome ira atimi aijaua an nadiat atumop.

23 Er aperitome ira atimi an nadiat atumop, va eri jim aualias intas alep o Moses; eka edemda vai nyak aijaua va nedo unyak, ka o'o, nikavaig, kis ago cehcehe asega natimi is ethi ainyak an nadiat atumop?

24 Jim aktaktai va nesganimta atimi ache aijaua, etmu inivaijiec naktaktai unyimia vai ra.

25 Eris um ika nahaiji nupu Jerusalema, Aien aigki era ika ara eri atgei yin, ka o'o?

26 et idim tas emda aien, ja era eti acaiji yin ara: era ato inivaijiec a ilpu atimi alupas mika kit idim Kristo ineigki, ka o'o?

27 inta ato akaija inuarin ineig is ahes iran a natimi ineigki: ja et wit ham a Kristo, inyi ti ato tali natimi inuarin ineig etpu ahes iran aien.

28 Is efehtas a Iesu anliin neom ahlap an nesege o un, um ika, Eka ato nyak aijaua, im lep inuarin ineig kis ahes iran ainyak: kis eti tup ispuk ham ainyak, et inivaijiec aien

is abrai nyak aien, ja eka eti ato yin aijaua:

29 ek idim ato yin ainyak; kis ahes ehelen ainyak, is abrai nyak aien.

30 Eris merit ara narop iran vaig: ja is eti arahpan vai yin tali natimi, is eti fi yetpam naopan o un.

31 Eris lep asgeig iran natimi is ahinag, eris tas ara, um ika, Et wit ham a Kristo, inyi ti ago niji auritai ehka aien inyi esjilid irai itai iji eigki et ago a natimi ineigki.

32 ¶ Eris atahaijeg a ilpu Farisi, nikavaig, eris imyiisjis nitai iji eigki vai yin natimi; eris abrai ilpu aheca ura a ilpu Farisi im ilpu atimi ahlap esjilid mika eri arop iran ara.

33 Is um ika ehele ra a Iesu, Etpu idim ipjidiipjid namen unyak ehelemia, ekpu apan ehelen ainyak is abrai nyak aien:

34 akupu ahilek nyak aijaua, jam eti ecet *nyak*: inyi ehka vai caua napanvaig an nuarin ineig ek amen iran ainyak.

35 Eris tas jipe a nupu Jutaia, um ika, Etpu apan aien eda, mika inti eti lep ecet yin akaija? etpu apan aien ehele atimi era terimterim ara irai nupu Crisi, um esege ini nupu Crisi, ka o'o?

36 neveli tas ineigki et mun asaig aien mika, Akupu ahilek nyak aijaua, jam eti ecet *nyak*? im lep ineig, Et ehka vai caua napanvaig an nuarin ineig ek amen iran ainyak?

37 ¶ An nadiat apitac, nadiat esjilid an nasjapicnaig ura, is um atidai a Iesu um efehtas, um ika, El et ahvig wai tali natimi, etmu ham ehelek aien um unwig:

38 aien et asgeig irak aien, etpu ahlau olua alupas inwai umoh anliinmopon, et idivaig eris aged.

39 (Is asan tas ineigki aien va Nesgan Upene, aien aigki erupu leh yin a ilpu atimi asgeig iran: eris pam eti *alupa atimi* Nesgan Upene

an naopan iyehki; va nitai ineigki, nikavaig, eris eti fi ehvaig natimi alupas o Iesu.)

40 ¶ Eris wat atahajeg intas ineigki ara, eris ika natimi is alinag, Et inivaijec ineig, nikavaig, et apro-feta iyehki aien.

41 Eris lep ika nahaiji *ra*, Et Kristo aien. Ja eris ika nahaiji *ra*, Et eti ahes Calili a Kristo:

42 eris aged, um ika, Etpu ahes ehele Tevit a Kristo, im lep an nuarin-pece Bedleem is amen iran a Tevit.

43 Eris imyiisjis jipe yin natimi.

44 Eris merit nahaiji *ra* narop iran vaig; ja is eti arahpan vai yin tah natimi.

45 ¶ Eris lep apan ehele ilpu atimi ahlap esjilid im ilpu Farisi a ilpu aheca *ura*; eris um ika ehele *ra* ara, Eka auri aijaua par eti imyia-pam yin?

46 Eris um ika a ilpu aheca, Is idim eti tas tah natimi et idivaig natimi ineigki.

47 Eris um ika ehele *ra* a ilpu Farisi, Eka mun idim lep ahnag aijaua:

48 is idim eti asgeig iran tah ilpu atimi alupas, ka tah ilpu Farisi:

49 ja era ilpu atimi er ika eri auahas *ra* natimi iji eigki, era eti ato intas alep ara.

50 Is um ika ehele *ra* a Nikotimus, (aien aigki is han aien ehele *Iesu* an nepeig, is atimi is ethi ira *ra* aien,)

51 Nedo an tas alep uja ineigki, nikavaig, inta upyi hup akaija um atahajeg intas o atimi un ato nedo ura, ja par asuptecnaig nintan.

52 Eris tas ara, um ika ehelen, Nai lep upu Calili aiek, ka o'o? ahilek, um almoi: et eti ahes Calili tah naprofeta.

53 Eris apan irai innim ura natimi asega.

NUARIN-TAS ALUPAS 8.

IS apan a Iesu an nedoon Olivet.

2 Is wat lahlah an nuhiale, is lep apan aien anliin neom ahlap, eris ahtag pan ehelen natimi asega; is ateucse aien, um esege imi *ra*.

3 Eris imyiapan ehelen intakata is ethi a ilpu atimi esege im ilpu Farisi, eris ecet yin nagovaig ingaijid, um ati yin an nibla *atimi*,

4 um ika ehelen, Ak Natimi esege, et mun ago ingaijid intakata ineigki, eris mun idim ecet yin.

5 Is ika a Moses an tas alep o *un*, ulpu asji *ra* sji eigki irai hat era ago nedo ineigki ara: na ikha aiek?

6 Eris asan tas ineigki ara par oop yin, mika eri asan tas has vai yin. Ja is atpuse a Iesu um ahgesahiges an nobohtan an nupsikman.

7 Eris wat imyiisjis ara um ahodai yin, is atidaijai aien, um ika ehele *ra*, Aien et ti ago nedo has aien iramia, etnu upyi hup aien um asji yin an hat.

8 Is lep atpuse aien um ahgesahiges an nobohtan.

9 Eris wat atahajeg *intas ineigki* ara, is ehcamai inliinmopura ara, eris alau ijo athiathi ara asega, um atupun irai ilpu atimi tas alep um yetpan irai tup atimi: is amen ache a Iesu, im intakata iyehki an lah.

10 Is lep atidaijai a Iesu, jam eti ecet tahi, intakata iyehki ache, is ika ehelen aien, Ak intakata ineigki, era mun han eda a ilpu atimi atijai itai iram? et mun asuptecnaig nintan nedo has unyum tahi, ka o'o?

11 Is um ika aien, O'o, ak Nati-marid. Is um ika ehelen a Iesu, Inki ti asuptecnaig nintan nedo has unyum ainyak: atga unyum aiek, um jim lep ago nedo has.

12 ¶ Is lep tas ehele *ra* a Iesu, um ika, Ek itai lah an nobohtan ainyak: aien etpu apitac nyak aien, inyi ti

atga an naupat aien, etpu leh nitai lah aien, um umoh.

13 Eris um ika ehelen a ilpu Farisi, Na mun asuptecnaig euc aiek; et eti inivaijec intas asuptecnaig *euc* unyum.

14 Is tas a Iesu, um ika ehele ra, Ek asuptecnaig nyak ainyak, et inivaijec intas asuptecnaig *nyak* unyak: ek ato ainyak inuarin ineig kis ahes iran ainyak, im lep napan unyak iran; ja eka eti ato aijaua inuarin ineig kis ahes iran ainyak, im lep napan unyak iran:

15 eka aktaktai va *atimi* aijaua et idivaig nedo an nobohtan; *ja* ek eti auanaktaktai naico vaig tah ainyak:

16 ja el ek aktaktai va *atimi* ainyak, et inivaijec naktaktai unyak: ek eti tup echim amen ainyak, ja ainyak im Etmak is abrai nyak aien:

17 eris lep aged an tas alep unyimia mika, et inivaijec intas asuptecnaig o natimi et ero:

18 ek asuptecnaig nyak ainyak, et lep asuptecnaig nyak a Etmak is abrai nyak aien.

19 Eris um ika ehelen ara, Etmam yek eda? Is um ika a Iesu, Eka eti ato nyak aijaua, im lep Etmak: el eka ato nyak aijaua, el eka lep ato Etmak aijaua.

20 Is asan tas iji eigki a Iesu an nesege o un, an nuarin ikni mune iran anliin neom ahlap: ja is eti arop iran tah natimi; is eti fi yetpam naopan o un.

21 ¶ Is ika ehele ra a Iesu, Ekpu atga unyak ainyak, ja akupu ahilek nyak aijaua, akupu emesmas an nedo has unyimia aijaua: inyi ehka vai caua napanvaig an nuarin ineig ekpu apan iran ainyak.

22 Eris ika a nupu Jutaia, Etpu ispun atgei yin aien, ka o'o? is ika aien, Inyi ehka vai caua napanvaig an nuarin ineig ekpu apan iran ainyak.

23 Is um ika ehele ra aien, Eka

ahes sepamki aijaua; kis ahes jipagko ainyak: eka atimi an nobohtan aijaua; ek eti atimi an nobohtan ainyak:

24 ek mun idim asaig ehelemia ainyak mika, akupu emesmas an nedo has unyimia aijaua: el eka eti inyiisjis ninivaijec aijaua, nikavaig, ek *atimi iyehki* ainyak, akupu emesmas an nedo has unyimia aijaua.

25 Eris um ika ehelen ara, Aiek di aigki? Is um ika ehele ra a Iesu, *Ek* tup ethi ache *ainyak* kis upyi aniv *nyak* ehelemia ainyak:

26 ek ato niji itai et ahinag ainyak par asaig um ated caua iran: ja aien is abrai nyak aien, et inivaijec aien; ek asuptecnaig ehele atimi an nobohtan ainyak nitai iji eigki kis atahaijeg ehelen ainyak.

27 Eris eti ato ara, nikavaig, is tas ehele ra aien vai Etmam.

28 Is um ika ehele ra a Iesu, Aku wit atijai Inhal o natimi aijaua, akupu ato aijaua, nikavaig, et *atimi iyehki* ainyak, im lep ineig, nikavaig, ek eti ispuk ago tah nitai ainyak; ja ek asaig nitai iji eigki ainyak is esege imtak a Etmak:

29 aien is abrai nyak aien et amen ehelek aien: et eti ude nyak a Etmak; ek ago nitai iji eigki ainyak irai iji adiat et merit vaig aien.

30 ¶ Is wat asan tas iji eigki aien, eris asgeig iran natimi is ahinag.

31 Is um ika a Iesu ehele nupu Jutaia iji eigki eris eteuc an tas o un ara, El eka apol ipjin an tas unyak aijaua, el eka idim ilpu atimi atahaijeg nyak aijaua;

32 im lep ineig, akupu ato intas inivaijec aijaua, etpu ahiyi caua intas inivaijec.

33 Eris um ika ehelen ara, Ecra ilpu mapoi Ebrahim aijama, ecris idim eti aheca o un tah natimi aijama: na auri aiek par ika, Uhpui ahiyi caua?

34 ¶ Is um ika ehele ra a Iesu, Et idim inivaijec ineig ek asaig ehelemia ainyak mika, Aien et ago

nedo has aien, et aheca u nedo has aien.

35 Et eti amense an nimnim naheca *o un tah* irai iji adiat: *ja* et amense a inhal *o un* irai iji adiat.

36 El et ahiyi caua a Inhal *o Atua*, nhpu idim eti lep arore caua.

37 Ek ato ainyak, nikavaig, eka ilpu mapoi Ebrahim aijaua; ja eka merit aijaua mika aki atgei nyak, va nitai ineigki, nikavaig, et eti amen anliinmopomia intas unyak.

38 Ek asuptecnaig nitai iji eigki ainyak, kis ecetai ehele Etmak ainyak: ja eka ago nedo ineigki aijaua, akis ecetai ehele etnamia aijaua.

39 Eris tas ara, um ika ehelen, Et idim etmama a Ebrahim. Is um ika ehele ra a Iesu, El eka ilpu hal o Ebrahim aijaua, el eka ago nedo o Ebrahim aijaua:

40 ja eka idim ika aijaua aki atgei nyak, natimi asan tas inivaijec ineig ehelemia, kis atahaijeg ehele Atua ainyak: is eti ago nedo ineigki a Ebrahim:

41 eka ago nauritai o etmamia aijaua.

Eris um ika ehelen ara, Ecra eti ilpu halav an nefalaig aijama; et idim Etmama a Atua.

42 Is um ika ehele ra a Iesu, El et Etmama a Atua, el et aiyu inliinmopomia aijaua vai nyak: kis ahes ehele Atua ainyak par ham; kis eti tup ispuk ham ainyak, ja is abrai nyak aien.

43 Eka auri aijaua par eti ato intas unyak? va nitai ineigki, nikavaig, et ehka vai caua nahaijegvaig intas unyak.

44 Akis ahes ehele etmamia Tia-polo aijaua, eka merit aijaua nago-vaig inmerit o etmamia: is atimi atgei atnas aien itu acen um inyihum pam an naopan ineig, et eti apol an nitai inivaijec aien, et idim efaifa aien. Nedo o un ineig par asan tas aheil: et idim atimi aheil aien, um lep etma *atimi aheil*.

45 Ek tas inivaijec *ehelemia* ainyak, ja eka eti eteuc an tas unyak aijaua.

46 Et ehka vaig tah caua par ika ek ago nedo has ainyak. Ek wat asan tas inivaijec *ehelemia* ainyak, eka auri aijaua par eti eteuc an tas unyak?

47 Aien et *atimi* o Atua aien, et ahaijeg intas o Atua aien: eka eti ahaijeg aijaua, va nitai ineigki, nikavaig, eka eti *ilpu atimi* o Atua aijaua.

48 Eris tas a nupu Jutaia, um ika ehelen, Et inivaijec intas unyima, nikavaig, na upu Samerya aiek, et lep amen ehelum a nagelo has.

49 Is um ika a Iesu, Et eti amen ehelek a nagelo has; ek idim eccen vai Etmak ainyak, ja eka amcel vai nyak aijaua.

50 Ek eti ahilek ninyiahpas nyak ainyak: *ja* et ahilek tah et ethi, um aktaktai *nyak*.

51 Et idim inivaijec ineig ek asaig ehelemia ainyak *mika*, El et apol an tas unyak tah natimi, inyi idim eti mas aien.

52 Eris um ika ehelen a nupu Jutaia, Ecra idim ato aijama mika, et amen ehelum a nagelo has: is mas a Ebrahim, im lep ilpu profeta; ja na ika aiek, El et apol an tas unyak tah natimi, inyi idim eti mas aien:—

53 na esjilid aiek irai etpoiija Ebrahim is mas aien, ka o'o? eris lep emesmas a ilpu profeta: na ika aiek, aiek di aigki?

54 Is um ika a Iesu, El ek imyiahpas nyak ainyak, el et takitai ninyiahpas *nyak* unyak: aien et imyiahpas nyak aien et Etmak aien; aien aigki eka ika aijaua vai yin, et Atua unyimia aien:

55 eka mun eti ato yin aijaua; ja ek ato yin ainyak: el ek ika ainyak, Ek eti ato yin ainyak, el ek atimi aheil ainyak um idivai caua: ja ek ato yin ainyak, um apol an tas o un:

56 is imyiacitak a etpomia Ebrahim nalmoivaig nadiat unyak: is almoi aien, um cediaig.

57 Eris um ika ehelen a nupu Jutaia, Et eti fiste inmesese iram, is ehka vai eue nalmoi Ebrahim vaig.

58 Is um ika ehele ra a Iesu, Et idim inivaijec ineig ek asaig ehele-mia ainyak *mika*, an naopan iyehki is pam eti eteuc a Ebrahim, EK TUP ETEUC AINYAK.

59 Eris arapse vai hat ara mika eri asji yin: ja is atpuh a Iesu, um ahes anliin neom ahlap, um tiblaitbla atimi, um alau ijo, um atga o un.

NUARIN-TAS ALUPAS 9.

IS wat atga a Iesu, is ecet natimi is ethi aien is aupat nesganimtan an napos yin vaig.

2 Eris ahodai yin a ilpu atimi atahajjeg yin, um ika, Ak Natimi esege, is ago nedo has a di, natimi ineigki, ka ohwat atmil o un, mika is par aupat nesganimtan aien an napos yin vaig?

3 Is um ika a Iesu, Is eti ago nedo has a natimi ineigki, ka ohwat atmil o un: ja *et ucco* va uhpu ecetai niji auritai o Atua iran:

4 eris idim ika ki ago niji auritai o un ainyak an nadiat is abrai nyak aien: et wit yetpam nepeig, inyi ehka va atimi nagovaig nauritai iran:

5 ek wat amen ainyak an nobohtan, ek itai lah an nobohtan ainyak.

6 Is asan tas iji eigki aien, ja par agdeise nobohtan, um ago nosal an nagdan, um aspi nesganimtai natimi iyehki an nosal is aupat nesganimtan,

7 um ika ehelen, Apan aiek, um ereuc an netpen Siloam, (nesgan tas iran, Nintan *wai*). Is apan aien um ereuc, um alum itai, ja par lep apan.

8 ¶ Eris tas a ilpu atimi eblaam-nem o un, im lep ra eris upyi ecet yin ara an naupatvaig nesganimtan aien, *um ika*, Aien aigki is ateuc aien um ugni itai, ka o'o?

9 Eris ika nahaiji *ra*, Aien aigki: eris lep *ika* nahaiji *ra*, Et idivai yin aien: *ja* is ika aien, Ainyak um aigki.

10 Eris um ika ehelen ara, Er uauo nesganimtam, par asalgei?

11 Is tas aien, um ika, Is ago nosal natimi is ethi nidan Iesu, um aspi nesganimtak, um ika ehelek, Apan aiek an netpen Siloam um ereuc: kis apan ainyak um ereuc, ja et par lah nesganimtak.

12 Eris um ika ehelen ara, An yek eda aien? Is um ika aien, Ek eti ato ainyak.

13 ¶ Eris imyiapan ehele ilpu Farisi natimi iyehki ara, is upyi aupat nesganimtan aien.

14 Is adiat atumop iyehki is ago nosal iran a Iesu, um asalgei nesganimtan.

15 Eris lep ahodai yin a ilpu Farisi, *um ika*, Na uauo nesganimtam aiek et pah lah? Is um ika ehele ra aien, Is aspi nesganimtak an nosal aien, ja kis par ereuc ainyak, um alum itai.

16 Eris ika nahaiji ilpu Farisi, Is eti ahes ehele Atua natimi ineigki, et eti apos nadiat atumop aien. Eris lep ika nahaiji *ra*, Et ehka vai natimi ineig et auatatimi aien nago-vaig nauritai ehka iji eigki. Eris imyiisjis jipe ara.

17 Eris lep ika ara ehele natimi iyehki is aupat nesganimtan, Na ikha aiek vai yin is asalgei nesganimtam aien? Is um ika aien, Et aprofeta aien.

18 Ja eris eti imyiisjis ninivaijec vai yin a nupu Jutaia mika, is aupat nesganimtan aien, ja par lep lah; ja eris ahlaig vai ohwat atmil o natimi iyehki ara is lep lah nesganimtan,

19 um ahodai rau, um ika, Inhal unyimirau ineigki, erau ika aijaurau

is aupat nesganimtan aien an napos yin vaig, ka o'o? et uauo nesganimtan aien et pah lah an naopan ineig?

20 Eris tas ehele ra ahwat atmil o un, um ika, Ecrau ato aijumrau, nikavaig, inhal unyimrau ineigki is aupat nesganimtan aien an napos yin vaig:

21 ja ecrau eti ato aijumrau nedo ineig et alum itai vaig aien an naopan ineig; ecrau eti lep ato aijumrau natimi ineig is asalgei nesganimtan aien: et eti halav aien; ahodai yin: etpu asuptecnaig aien.

22 Erus asan *tas* iji eigki ahwat atmil o un va nimtitaig nupu Jutaia urau: eris upyi asan tas alep ineigki a nupu Jutaia, *um ika*, el et ika tah natimi, et Kristo aien, uhpu ahlo yin an neom alaigaheni *ura*.

23 Va nedo ineigki, eris ika ahwat atmil o un, Et eti halav aien; ahodai yin.

24 Eris lep ahlaig vai natimi iyehki ara, is aupat nesganimtan, um ika ehelen, Namu imyiahpas Atua aiek: ecra ato aijama mika et atimi auatatimi natimi ineigki.

25 Is tas aien, um ika, Ek eti ato ainyak, kit et atimi auatatimi aien, ka o'o: ja ek idim ato nitai ineigki ainyak, nikavaig, is aupat nesganimtak ainyak, ja ek alum itai ainyak an naopan ineig.

26 Eris lep ika ehelen ara, Is ago inhe iram aien? is uauo nesganimtan aien par asalgei?

27 Is um ika ehele ra aien, Ek mun idim asuptecnaig ehelemia ainyak, ja eka mun eti atahaijeg aijaua: eka lep merit aijaua natahaijegvaig *vanhe*? eka lep merit aijaua mika aki ilpu atimi atahaijeg yin, ka o'o?

28 Eris atuh yin ara, um ika, Na atimi atahaijeg yin *ache* aiek; ja ecra ilpu atimi atahaijeg Moses aijama:

29 ecra ato aijama, nikavaig, is tas ehele Moses a Atua: ja ecra

eti ato aijama is ahes eda a nat naico.

30 Is tas ehele ra a natimi iyehki, um ika, Et itai imyiali ineig mika, eka eti ato aijaua is ahes eda aien, ja is idim asalgei nesganimtak aien:

31 inta idim ato akaija, nikavaig, et eti atahaijeg ilpu atimi auatatimi a Atua: ja el et alaigaheni vai Atua tah natimi, um imyiaiji intas o un, el et atahaijeg yin aien:

32 eris eti atahaijeg an naopan iyehki itu acen mika, is ago lah nesganimtan tah natimi ineig is aupat nesganimtan an napos yin vaig tah natimi:

33 el is eti ahes ehele Atua natimi ineigki, el et ehka vai yin nagovaig tah nitai.

34 Eris tas ara, um ika ehelen, As atimi auatatimi aiek an naopan iyehki eris apos euc, na auri aiek par esege imi cama? Eris atipagki yin ara.

35 Is atahaijeg a Iesu, nikavaig, eris atipagki yin ara; is wat ecet yin aien, is ika ehelen aien, Na asgeig irai Inhal o Atua aiek, ka o'o?

36 Is tas aien, um ika, Ak Natimarid, di neigki mika ki asgeig iran ainyak?

37 Is um ika ehelen a Iesu, Na mun ecet yin aiek, aien aigki et tas ehelum aien.

38 Is ika aien, Ak Natimarid, ek asgeig *iram* ainyak. Is atpuse an nuluh o un aien.

39 Is um ika a Iesu, Kis ham an nobohtan ainyak par aru jipe nedo o *atimi*, mika eri alum itai a ilpu atimi aupat nesganimtara; im lep mika yi aupat nesganimtai ilpu atimi alum itai.

40 Eris atahaijeg nitai iji eigki nahaiji ilpu Farisi eris amen ehelen ara, um ika ehelen, Et lep aupat nesganimtama aijama, ka o'o?

41 Is um ika ehele ra a Iesu, El et aupat nesganimtama aijaua, el

et ti nedo has unyimia: ja eka ika
aiaua, Eera alum itai aijama; va
nedo ineigki, et amen *iramia* nedo
has unyimia.

NUARIN-TAS ALUPAS 10.

1 ET idim inivaijec ineig ek asaig
ehemia ainyak *mika*, Aien et
eti atga an neucse nirahed o siip
aien, jam algauwaig an taka uarin,
et atimi ehneg itai aien, um atimi
ahrincai:

2 ja aien et atga an neucse
nirahed aien, et atimi asgi siip
aien:

3 et asalgei vai yin a natimi
aminjinaig intapanes; era atahaijeg
nohran siip: et ahlaig vai nidai siip
o un aien, um uhup pan itac ira ra:

4 et wat imyiapan itac siip o un
aien, et uhup ira ra aien; era apitac
yin ara: era idim ato nohran ara:

5 era eti apitac natimi et eche
ara, jam aha vai yin: era eti ato
nohrai tak atimi ara.

6 Is asan tas ecsipece ineigki ehele
ra a Iesu: ja eris eti ato nitai iji eigki
ara is asaig ehele ra aien.

7 Ja is lep ika ehele ra a Iesu, Et
idim inivaijec ineig ek asaig ehele-
mia ainyak *mika*, Ek eucse irahed
irai siip ainyak:

8 ara asega eris uhup irak ara,
eris atimi ehneg itai ara, um atimi
ahrincai: ja eris eti atahaijeg ra
siip.

9 Ek eucse *irahed* ainyak: el et
atga anliin *nirahed* tah natimi irak,
uhpu imyiatamaig yin; etpu atga
iran aien, um lep apan itac, um leh
nitai caig *incan*.

10 Et idim apan natimi ehneg itai
mika yi ehneg itai, um atgei atmas,
um auahas itai: kis ham ainyak
mika eri unumoh ara, yi lep esjilid
acen *numumoh* ura.

11 Ek atimi asgi upene siip ai-
nyak: et ahtai nitai umoh iran o un
a natimi asgi upene siip vai siip o un.

12 Ja aien et asgi siip va nimitan
ache aien, jam eti ohuun, et eti
atimi asgi siip aien, et wat almoi
kuri aleg aien napamvaig, et ude
siip aien um aha: et aces *siip* kuri
aleg, era terinterim ara:

13 et aha natimi asgi siip va
nimitan ache, va nitai ineig, nikavaig,
et atimi asgi siip aien va nimitan
ache, et eti aktaktai vai siip aien.

14 Ek atimi asgi upene siip
ainyak; ek ato *siip* unyak ainyak,
era lep ato nyak *siip* unyak,

15 et idivaig nato nyak o Etmak,
im lep nato Etmak unyak: ek ahtai
nitai umoh iran unyak ainyak vai
siip *unyak*.

16 Et unyak siip et eche, era eti
amen ara anliin nirahed ineigki:
eris idim ika ekpu uhup ira ra
ainyak, erupu atahaijeg nohrak ara;
etpu ethi ache nasjapicnaig siip, um
ethi ache natimi asgi siip.

17 Et aiyu inliinmopoi Etmak vai
nyak va nedo unyak, nikavaig, ekpu
ahtai nitai umoh iran unyak ainyak,
ja par lep nusjai.

18 Inyi eti atipagki *nitai umoh*
iran unyak tah natimi, ek tup ispuk
ahtai ainyak: ek emda ainyak in-
tup ispuk ahtai vaig, um lep emda
ainyak par lep nusjai. Kis leh
intas alep ineigki ehele Etmak ai-
nyak.

19 ¶ Eris imyiisjis jipe intas iji
eigki a nupu Jutai.

20 Eris ika nahaiji ra is ahinag,
Et amen iran a nagelo has, et um
ahnag aien; eka auri aiaua par
atahaijeg yin?

21 Eris lep ika nahaiji *ra*, Et ti
intas o natimi et amen iran nagelo
has iji eigki: et ehka vai nagelo
has nago lah vaig nesganimtai ilpu
atimi aupat nesganimlara.

22 ERIS asjapicnaig Jerusalem
an naopan iyehki va nativaig neom
ahlap, is mesese.

23 Is atga a Iesu an naiyu u Solo-
mon an neom ahlap.

24 Eris asjapicnaig pan ehelen a nupu Jutaia, um ika ehelen, Na ika aiek ecri amen aijama um aktaktai um yetpan eig id? el et Kristo aiek, asuptecnaig upene ehelema.

25 Is um ika ehele ra a Iesu, Ek mun asuptecnaig ehelemia ainyak, ja-eka imyiisjis nahcil aijaua: et asuptecnai nyak niji auritai iji eigki ek ago ainyak an nidai Etmak.

26 Ja eka eti imyiisjis ninivaijec aijaua, va nitai ineigki, nikavaig, eka eti siip unyak aijaua: et idivaig kis asaig ehelemia ainyak,

27 era atahaijeg nohrak siip unyak, ek ato ra ainyak, era apitac nyak ara:

28 ek alupai ra nitai umoh iran ineig ainyak inyi ti lep ti; uhpu eti auahas ra, inyi ti atoraliaik ra tah natimi an nikmak.

29 Et esjilid a Etmak is alupai nyak *ra* aien irai iji itai asega; et eti emda tah natorialiak ra vaig an nikmai Etmak.

30 Ek tup ethi ache ainyak im Etmak.

31 Eris lep arapse vai hat a nupu Jutaia mika eri asji yin.

32 Is um ika ehele ra a Iesu, Kis ehvaig ehelemia ainyak niji auritai upene is ahinag is ahes ehele Etmak; nehva auritai ineigki *eka ika aijaua* aki asji nyak vaig?

33 Eris tas ehelen a nupu Jutaia, um ika, Ecra eti asji euc aijama vaig tah nauritai upene; ja vai intas has esjilid; na atimi aiek, jai na ika aiek, na idim Atua.

34 Is um ika ehele ra a Iesu, Eris aged an tas alep unyimia mika, "Kis ika ainyak, Eka ilpu atua aijaua."

35 El is anvi nidai ra sji eigki aien is yetpan intas o Atua ehele ra, par ika ilpu atua, (et ehka nauahasvaig intas eris aged;)

36 el eka auri aijaua par ika vai yin is ati yin a Etman, um abra i yin mika yi ham aien an noboltan, Na

mun asan tas has esjilid aiek; vai intas unyak, nikavaig, ek ika ainyak, Ek hal o Atua ainyak?

37 El ek eti ago niji auritai o Etmak ainyak, el eka jiin eteuc an tas unyak aijaua:

38 ja el ek ago ainyak, el eka eti eteuc an tas unyak aijaua, akumu imyiisjis ninivaijec niji auritai *unyak* aijaua: mika aki ato aijaua, um imyiisjis ninivaijec, nikavaig, *et amen* ehelek a Etmak, um lep *amen* ehelen ainyak.

39 Eris lep merit ara narop iran vaig: ja is tiblaitiblai ra aien um atga o un,

40 um lep apan an nahaijin Jortan itac, an nuarin iyehki is upyi hup a Joanes um baptiso *ira atimi* iran; um amen eahki.

41 Eris asjapicnaig pan ehelen natimi is ahinag, um ika, Is eti ago tah nauritai ehka a Joanes: ja et inivaijec intas asega is asaig a Joanes vai natimi ineigki.

42 Eris imyiisjis ninivaijec vai yin natimi is ahinag eahki.

NUARIN-TAS ALUPAS 11.

IS emehe natimi is ethi, *nidan* Lasarus, Bedane, inuarin-pece o Mere im Marda etoan.

2 (Is atamaig irai Mere iyehki a Lasarus natimi emehe, is aspi neduei Natimarid aien an nitai aspi, um yiri mese irai umri idjinin.)

3 Erus abraig pan *tah* ehelen ahwat atahaig iran, um ika, Ak Natimarid, et emehe aien et aiyu inliinmopom aiek vai yin.

4 Is wat atahaijeg *intas ineig* a Iesu, is ika aien, Inyi ti mas aien va nemehe ineig, ja *et eteuc* mika uhpu ecetai natimi alupas o Atua, im lep natimi alupas o Inhal o Atua vaig.

5 Is aiheuc vai Marda a Iesu, im etoan, im Lasarus.

6 Is wat atahaijeg aien, nikavaig, is emehe aien, is amen aien an nad-

iat is ero an nuarin iyehki is amen iran aien.

7 Ja par apitac um ika ehele ilpu atimi atahaijeg yin, Intumu lep apan Jutaia akaija.

8 Eris um ika ehelen a ilpu atimi atahaijeg yin, Ak Natimi esege, eris tup pam ahilek euc a nupu Jutaia mika eri asji euc irai hat; na auri aiek par apan cahki?

9 Is um ika a Iesu, Et eteuc aur et twelv an nadiat et ethi: el et atga tah natimi an nadiat, et eti epilitau aien, et alum itai aien vai inlah an nobohtan:

10 ja el et atga tali natimi an nepeig, et epilitau aien, va neti lahvaig ehelen.

11 Is asan tas iji eigki aien: ja par ika ehele ra, Et umjeg a Lasarus etoaija; ja ekpu apan ainyak, um ahugni yin va numjeg o un.

12 Eris ika a ilpu atimi atahaijeg yin, Ak Natimarid, el et umjeg aien, etpu umoh aien.

13 Ja is tas a Iesu vai inmas o un: ja eris aktaktai ara mika, is tas aien va natumop o un um umjeg.

14 Ja is asuptecnaig upene ehele ra a Iesu, um ika, Et idim mas a Lasarus:

15 ek imyiacitak ainyak vai caua, va nitai ineigki, nikavaig, kis eti amen ainyak eahki, mika aki imyisjis ninivaijec aijaua; ja intumu apan ehelen akaija.

16 Is um ika a Tomas, tak idan Titimus, ehele ilpu atimi atahaijeg Iesu, ilpu etoan, Intumu apan akaija, mika ti emesmas ehelen.

17 ¶ Is wat han a Iesu is ato aien, nikavaig, is amen aien an nehpanitai an nadiat is for.

18 Is ubutpotet pan Jerusalem nuarin-pece Bedane et idivaig et ero mail:

19 eris apan ehele Marda im Mere a nupu Jutaia is alinag, par ataracs rau vai natamaig ira rau.

20 Is wat ato napam o Iesu a

Marda, is apan aien um aubillid yin: ja is tup amen a Mere anliin neom.

21 Is um ika a Marda ehele Iesu, Ak Natimarid, el is wat amen aiek igcaki, el is eti mas a natamaig irak:

22 ja ek ato ainyak, nikavaig, etpu idim alupai euc nitai ineig a Atua an naopan ineig, napu lep ugni Atua vaig aiek.

23 Is um ika ehelen a Iesu, Etpu lep nusjai a natamaig iram.

24 Is ika ehelen a Marda, Ek ato ainyak, nikavaig, etpu lep nusjai aien an nusjai o atimi an nadiat apitac.

25 Is um ika ehelen a Iesu, Ek itai anusjai vaig ainyak, um itai umoh iran: aien et asgeig irak aien, el is mas aien, etpu umoh aien:

26 aien et umoh aien um asgeig irak, inyi idim eti mas aien irai iji mesese. Na imyiisjis ninivaijec nitai ineigki aiek, ka o'o?

27 Is um ika ehelen aien, Maiya, ak Natimarid: ek imyiisjis ninivaijec ineig ainyak, nikavaig, nai Kristo aiek, Inlah o Atua, eris ika, Etpu ham aien an nobohtan.

28 ¶ Is asan tas ineigki aien, ja par atga o un, um apan, um echim ahlaig ache vai Mere etoan, um ika, Et mun ham a Natimi esege, um ahlaig vai euc.

29 Is wat atahaijeg aien, is auroauro aien, um atidai, um apan ehelen.

30 Is eti fi yetpan an nuarin-pece a Iesu, ja is amen aien an nuarin iyehki is uhum pan yin a Marda.

31 Eris amen ehele Mere anliin neom a nupu Jutaia, um ataracs yin; eris wat alum yin ara natidai-vaig, um auroauro um alau ijo, eris apitac yin ara, um ika, Et apan aien u nehpanitai, mika yi taig eabbi.

32 Is apan a Mere an nuarin iyehki is amen iran a Iesu, um ecet yin, um atpuse u neduon, um ika ehelen, Ak Natimarid, el is wat

amen aiek igcaki, el is eti mas a natamaig irak.

33 Is wat almloi intaig o un a Iesu, im lep nehtigtaig o nupu Jutaia iji ehki eris ahced yin ara, is ohocred inliinmopon aien, um ahoacni yin;

34 is um ika aien, Akis ati yin eda ajjaua? Eris ika ara, Ak Natimarid, apam aiek um almloi.

35 Is taig a Iesu.

36 Eris um ika a nupu Jutaia, Almloi, is idim aiyu inliinmopon aien vai yin!

37 Eris um ika nahaiji ra, Natimi ineigki is asalgei nesganintai ilpu atimi aupat nesganintara, is auri aien par eti emda um ahtapanes inmas vai natimi ineigki?

38 Is wat yetpan u nehpanitai a Iesu, is lep ohocred inliinmopon aien. Immun nij iyehki, is amen inhat atapanes iran.

39 Is um ika a Iesu, Atipagki inhat ajjaua. Is ika ehelen a Marda, natahaig irai natimi mas, Ak Natimarid, et idivaig et mun epiv aien: is mas aien is for nadiat iran.

40 Is um ika ehelen a Iesu, Ek mun idim asaig ehelum ainyak mika, el et imyiisjis ninivaijec aiek, napu almloi nemda o Atua aiek.

41 Eris atipagki inhat ara an nuarin iyehki eris ati natimi mas iran. Is easji pan a Iesu, um ika, Ak Etmak, naaurineig, na mun atahaijeg nyak aiek:

42 kis ato ainyak, nikavaig, na atahaijeg nyak aiek irai iji adiat: ja ek mun asaig ainyak va atimi iji eigki era aiji arahed *irak*, mika eri imyiisjis ninivaijec ara, nikavaig, as abrai nyak aiek.

43 Is wat ucce intas o un, is ahlaig ijinies aien, um ika, Ak Lasarus, alau ijo aiek.

44 Is um alau ijo a natimi iyehki is mas aien, ja is amen irai ikman im neduon napelumai eris aso yin iran: is lep amen napelumai an nesganimtan. Is um ika ehele ra a

Iesu, Ehtihyi itai iran ajjaua, yi pu atga aien.

45 Eris wat almloi nitai iji eigki is ago a Iesu, eris asgeig iran a nupu Jutaia iji ehki is ahinag eris apan ehele Mere ara.

46 Ja eris atga ura nahaiji ra um apan ehele ilpu Farisi, um asup-tecnaig ehele ra nitai iji eigki is ago a Iesu.

46 ¶ Eris asjapicnaig a ilpu atimi ahlap esjilid im ilpu Farisi, um tas jipe, um ika, Inta ago inhe akaija? et idim ago niji auritai ehka et ahinag a natimi ineigki:

48 el ta tup ude yin akaija, erupu asgeig iran natimi asega: erupu ham a nupu Roma, um aualhas inpece uja um atimi asega iran.

49 *Is tas* a natimi is ethi ira ra, *nidan* Keafas, is atimi esjilid an nahlap aien an mesese iyehki, um ika ehele ra, Eka eti ato itai ajjaua,

50 um eti aktaktai mika et upene vai caji mika yi mas natimi et ethi vai nup uran pece, va eri jim ememas nup uran pece asega.

51 Is eti tup ispun asan tas ineigki aien: ja is atimi esjilid an nahlap aien an mesese iyehki, va nitai ineigki, is upyi asaig aien, um ika, etpu mas a Iesu va atimi an pece iyehki;

52 jam eti *mas* va atimi an pece iyehki ache, jam asjapicnaig ilpu hal o Atua eris terimterim ara eri tup ethi ache.

53 Eris atupun ara an naopan iyehki, um tas jipe mika eri atgei yin.

54 Va nedo ineigki, is eti lep atga a Iesu an nuhup u nupu Jutaia; ja is ahes eahki aien um apan an pece iyehki ubutpotet u namasacen, an nuarin-pece is ethi nidan Ifreim, is amen aien eahki im ilpu atimi atahaijeg yin.

55 ¶ Is um ubutpotet u napaska u nupu Jutaia: eris ahes an pece iyehki natimi is ahinag, um apan

Jerusalem, mika eri ago adicinadin ra ara, ja pah *caig* napaska.

56 Eris ahilek Iesu ara, um tas jipe anliin neom ahlap, *um ika*, Eka ikha aijaua? etpu ham aien u nasjapicnaig, ka o'o?

57 Eris tas alep a ilpu atimi ahlap esjilid im ilpu Farisi, um ika, El et ato tah natimi nuarin ineig et amen iran aien, etmu asuptecnaig aien, —mika eri arop iran ara.

NUARIN-TAS ALUPAS 12.

IS apan Bedane a Iesu an naopan iyehki um ti pan itac nadiat is siks, ja pah *caig* napaska, is amen eahki a Lasarus, aien ahki is mas aien, ja is imyinusjai yin aien vai inmas *o un*.

2 Eris ago nitai caig incan ara eahki an jupura; is aheca *ura* a Marda: is atimi is ethi a Lasarus ira ra eris ateuc ehelen ara um hag.

3 Is leh nitai aspi nidincei upene nipin a Mere, is idim esjilid, is apapa pan a paunt is ethi, um aspi neduei Iesu *iran*, um yiri mese neduon irai umri idjinin: is apaahni nipin nitai aspi iyehki anliin neom asega.

4 Is ika a natimi atahajeg yin is ethi, Jutas nupu Karyot, *inhal* o Saimona, *aien aigki* is ika aien etpu aniv yin,

5 Er auri par eti ahtai nitai aspi ineigki, um leh tollar et forte im faiv, um alupai ilpu ihki atimi?

6 Is eti asan tas ineigki aien va naiheuc vai ilpu ihki atimi o un; ja is atimi ehneg itai aien, is amen ehelen incedpai mune, is apos *mune* ineig aien eris atohwaig *iran*.

7 Is ika a Iesu, Ude yin aiek: is aminjinaig nitai ineigki aien va natelmoi nyak:

8 era amen ehelemia a ilpu ihki atimi irai iji adiat; ja inki ti amen ehelemia ainyak irai iji adiat.

9 Eris ato a nupu Jutaia is ahinag, nikavaig, is amen aien eahki: ja

eris eti apan ara vai Iesu ache, ja *eris apan ara* par alum Lasarus, natimi iyehki is imyinusjai yin aien vai inmas *o un*.

10 Eris upyi tas jipe a ilpu atimi ahlap esjilid, um ika eri lep atgei Lasarus;

11 va nitai ineigki, nikavaig, eris apan a nupu Jutaia is ahinag, um asgeig irai Iesu vai yin.

12 ¶ Is wat lahlah an tak apnyin, eris wat atahajeg natimi is ahinag, eris apan u nasjapicnaig, mika is apan Jerusalem a Iesu,

13 eris leucose neri eaig ara, um apan, um aubillid yin, um ahaig ijinies, *um ika*, Hosana! Naaurineig vai Natimarid u nupu Isreel, et ham aien an nidai Ihova!

14 Is ecetai inhakli nifo a Iesu, um ateuc iran; et idivaig eris aged, *um ika*,

15 “Jim imtitaig, ak inhalav atahag o Saion: et mun ham a Natimarid unyum, um ateuc an hakli nifo.”

16 Eris eti fi ato nitai iji eigki a ilpu atimi atahajeg yin an naopan iyehki; ja eris wat ehvaig natimi alupas a Iesu, eris imyiehva ara mika eris upyi aged nitai iji eigki vai yin, um lep ago nitai iji eigki iran.

17 Eris asuptecnaig a ilpu atimi ahced yin mika is ahlaig vai Lasarus aien an nehpanitai, um imyinusjai yin vai inmas *o un*:

18 va nitai ineigki eris lep aubillid yin atimi, eris idim atahajeg ara mika is ago nauritai ehka ineigki aien.

19 Eris tas jipe a ilpu Farisi, *um ika*, Eka aktaktai aijaua, ka o'o? et takitai nauritai unyimia; almoi, era apitac yin natimi asega.

20 ¶ Eris eteuc nahaiji nupu Crisi iji ehki eris apan ara u nasjapicnaig par alaigheni:

21 eris apan ehele Filipus ara, is upu Bedseta aien, an *pece* Calili, um ugni yin, um ika, Ak natimi

alupas, eera merit aijama nalum Iesu vaig.

22 Is apan a Filipus um asuptecnaig ehele Antrius: erus han asuptecnaig ehele Iesu a Antrius im Filipus.

23 Is tas ehele rau a Iesu, um ika, Et mun ubutpotet u naopan ineig uhpu ehvaig natimi alupas o Inhal o natimi.

24 Et idim inivaijec ineig ek asaig ehelemia ainyak *mika*, El et eti etjose nohoai hwiit an nobohtan, um muttit, inyi tup asjeuc: ja el et muttit, etpu ohou um ahinag nohoan.

25 Aien et imyicoho nohun aien, etpu mas aien; ja aien et eti imyicoho nohun aien an nobohtan ineigki, etpu leh nitai umoh iran ineig aien inyi ti lep ti.

26 El et aheca unyak tah natimi, etmu ahced nyak aien; etpu lep amen a naheca unyak an nuarin ineig ek amen iran ainyak: el et aheca unyak tah natimi, etpu imyiahpas yin a Etmak.

27 Et ohocred inliinmopok ainyak an naopan ineig; inki asanhe ainyak? *ekpu ika ainyak*, Ak Etmak, apu imyiatamaig nyak aiek va naopan ineig, *ka o'o?* ja ek mun yetpam ainyak an naopan ineig va nitai ineigki.

28 Ak Etmak, namu ika aiek eri imyiahpas nidam.

Is ahes an nohatag nohran tah, *um ika*, Ek mun imyiahpas ainyak, ekpu lep imyiahpas ainyak.

29 Eris wat atahaijeg a ilpu atimi aiji *ubutpotet*, eris ika ara, Inmunuka ineigki: eris ika nahaiji *ra*, Is tas ehelen a nagelo.

30 Is tas a Iesu, um ika, Et eti ehcohos nohran ineigki vai nyak, ja vai caua:

31 uhpu aru nedo has an nobohtan an naopan ineig: uhpu lep atipagki natimarid an nobohtan ineigki:

32 eh wit atijai nyak ijinies an no-

bohtan, ekpu aihiaig pam atimi asega ehelek ainyak.

33 Is asan tas ineigki aien par asuptecnaig nedo vai inmas o un.

34 Eris um ika ehelen atimi, Ecra ato aijama an tas alep *er ika*, etpu amen a Kristo irai iji mesese: na auri aiek par ika, Eris idim ika uhpu atijai Inhal o natimi? Inhal o natimi neigki di?

35 Is um ika ehele ra a Iesu, Etpu eti elvamen ehelemia inlah: akumu atga aijaua an lah, va yi jim yetpam naupat iramia: aien et atga aien an naupat, et eti ato aien nuarin ineig et apan iran aien:

36 et wat amen inlah ehelemia, akumu asgeig irai inlah aijaua, mika aki ilpu halav an lah aijaua. Is asaig nitai iji eigki a Iesu, um atga o un, um atpuh vai ra.

37 ¶ Is ago nauritai ehka is ahinag aien an nuhup ura, ja eris eti asgeig iran ara:

38 mika yi ehneijid intas ineig is asaig a Aiseya naprofeta, *um ika*, "Ak Natimarid, era eteuc an tas unyima a di? eh mun ehvaig nikmai Ihova ehele di?"

39 Is ehka vai ra nimyisjis nini-vaijec vaig, va nitai ineig, is lep asaig a Aiseya, *um ika*,

40 "Is ago aupat nesganimtara aien, um ago ipjin inliinmopura; mika eri jim alum itai ara an nesganimtara, um ato itai anliinmopura, um adumoij," mika ki ago celcehe ra ainyak.

41 Is asan tas iji eigki a Aiseya, is wat almoi natimi alupas o un aien, um tas vai yin.

42 Ja eris imyisjis ninivaijec vai yin a ilpu atimi alupas *an pece* is ahinag; ja eris eti asuptecnaig *yin* ara vai ilpu Farisi, va eri jim ahlo ra ara irai eom alaigheni *ura*:

43 eris merit alupas ara va nimyiahpas o atimi, jam merit tintin va nimyiahpas o Atua.

44 ¶ Is efehtas a Iesu, um ika, Aien et asgeig irak aien, et eti as-

geig irak *ache* aien, ja *et lep asgeig* iran *aien* is abrai nyak aien.

45 Aien et alum nyak aien, et alum yin aien is abrai nyak aien.

46 Kis ham ainyak par itai lah an nobohtan, mika eri jim amen an naupat a ilpu atimi asgeig irak asega.

47 El et atahajjeg nihi tas unyak tah natimi, jam eti eteuc *iran*, inki ti aru nedo o un ainyak : kis eti ham ainyak mika ki aru nedo o atimi, jam imyiatamaig ra *ache* :

48 et eteuc tah par aru nedo o un et esjum vai nyak aien, um eti leh nihi tas unyak : uhpu asuptecnaig nintan imi yin an nadiat apitac an tas ineigki ek mun asuptecnaig ainyak.

49 Kis eti tup ispuk tas ainyak ; ja is alupai nyak intas alep a Etmak is abrai nyak aien, *nikavaig*, intas ineig ekpu asuptecnaig ainyak, im lep intas ineig ekpu esege ainyak.

50 Ek idim ato ainyak, mika et itai umoh iran ineig inyi ti lep ti intas alep o un : nitai iji eigki *ache* ek esege ainyak is asuptecnaig ehelek a Etmak.

NUARIN-TAS ALUPAS 13.

AN naopan iyehki is mun ubutpotet u nasjapicnaig va napaska, ja is ato a Iesu, *nikavaig*, is yetpam naopan ineig inyi ude nobohtan ineigki aien, um apan ehele Etman, is aiyyu inliinmopon aien vai ilpu atimi o un an nobohtan, is lep aiyyu inliinmopon aien vai ra um yetpan u inmas o un.

2 Eris wat hag ara, (is auahas inliinmopoi Jutas nupu Karyot, *inhal* o Saimona, a Tiapolo, um ika yi aniv yin ;)

3 is ato a Iesu, *nikavaig*, is ati nihi itai asega an nikman a Etman, is idim ahes ehele Atua aien, ja par apan ehele Atua ;

4 is atidai aien u inhag, um ikni-pagki apelumai *iran* ; um leh nuarin napelumai, um ahid :

5 ja is par atladwi inwai aien an nipjinitai, um yiri eduei ilpu atimi atahajjeg yin, um yiri mese an napelumai ineig is ahid aien.

6 Is apan aien ehele Saimona Pitrus : ja is ika ehelen a *Pitrus*, Ak Natimarid, an yiri neduok aiek, ka o'o ?

7 Is tas a Iesu, um ika ehelen, Na eti ato aiek an naopan ineig nitai ineig ek ago ainyak ; ja napu ato aiek an tak aopan.

8 Is um ika ehelen a Pitrus, Napu idim eti yiri neduok aiek. Is um ika ehelen a Iesu, El ek eti yiri euc ainyak, an idim eti atimi unyak aiek.

9 Is um ika ehelen a Saimona Pitrus, Ak Natimarid, *namu* jim yiri neduok *ache aiek*, jam lep nikmak, im nipek unyak.

10 Is um ika ehelen a Iesu, El et ereuc tah, et upene inyirivaig neduon *ache*, et adicinadin asega aien : eka adicinadin aijaua, jam eti *adicinadin* aijaua asega.

11 Is idim ato aien natimi ineig etpu aniv yin ; va nitai ineigki is ika aien, Eka eti adicinadin aijaua asega.

12 Is yiri eduora aien, ja par leucse apelumai o un, um lep ateuc, um ika ehele ra, Eka ato nedo ineig aijaua ek mun ago iramia ainyak, ka o'o ?

13 Eka anvi nidak aijaua par ika, Natimi esege, im lep Natimarid : et upene intas unyimia ; ek idim ucco ainyak :

14 ek Atimarid *unyimia* ainyak, um Atimi esege *imi caua*, ja ek mun yiri eduomia ainyak ; et lep upene vai caua inyiri jipe vaig eduomia :

15 ek mun upyi hup ainyak um ago nedo ineigki, mika aki ago nedo ineigki aijaua, ek mun ago iramia ainyak.

16 Et idim inivaijee ineig ek asaig

ehelemia ainyak *mika*, Et eti esjilid tah naheca irai natimi alupas o un; et eti lep esjilid aien eris abrai yin irai natimi ineig is abrai yin aien.

17 El eka ato nitai iji eigki aijaua, eka mun ahesmoij aijaua el eka ago.

18 Ek eti tas ainyak vai caua asega: ek ato ainyak natimi iji eigki kis ehtai ra ainyak: ja va uhpu ehnejid intas eris aged, *um ika*, “Aien et hag ehelek aien, et mun atijai nijinalak an neduon aien vai nyak.”

19 Ek upyi hup ainyak um asup-tecnaig ehelemia, mika, et wit yet-pam *nitai ineigki*, aki imyiisjis nini-vaijec aijaua mika ek *atimi iyehki* ainyak.

20 Et idim inivaijec ineig ek asaig ehelemia ainyak *mika*, Aien et leh ra aien ek abrai ra ainyak, et leh nyak aien; aien et leh nyak aien, et leh yin aien is abrai nyak aien.

21 ¶ Is asan tas iji ehki a Iesu, ja is ohocred inliinmopon aien, um asuptecnaig, um ika, Et idim inivaijec ineig ek asaig ehelemia ainyak mika, Etpu aniv nyak tah et ethi iramia.

22 Eris almaiijdjid jipe ra a ilpu atimi atahaijeg yin, um aktaktai, jam eti ato natimi ineig is tas vai yin aien.

23 Is asgeig an riti Iesu natimi atahaijeg yin is ethi, is aiyu inliinmopoi Iesu vai yin.

24 Is adi pan yin a Saimona Pitrus, mika yi ahodai *yin* aien va natimi ineig is tas vai yin aien.

25 Aien is asgeig aien an riti Iesu, is ika ehelen aien, Ak Natimarid, di neigki?

26 Is asuptecnaig a Iesu, *um ika*, Aien aigki, ek wit ati inuarin nitai caig ineig an nipjinitai ainyak, ekpu alaacan ainyak. Is atise inuarin nitai caig aien, um alayi Jutas nupu Karyot, *inhal* o Saimona.

27 *Is leh* nuarin nitai caig iyehki aien, ja is ahei yin a Satana. Is

um ika ehelen a Iesu, Auroauro aiek um ago nitai ineig, nai ika aiek napu ago.

28 Is eti ato tah natimi ira ra u inhag, mika is asan tas ineigki aien ehelen vanhe.

29 Is amen ehele Jutas incedpai *mune*, va nitai ineigki, eris aktaktai nahaiji *ra*, mika is ika ehelen a Iesu, Auarimtai itai iji eigki aiek, inta merit vaig akaija va nasjapie-naig; ka yi alupai ilpu ihki atimi itai.

30 ¶ Is wat leh nuarin nitai caig aien, is um auroauro aien um alau ijo; is um epeig.

31 Is wat alau ijo aien, is um ika a Iesu, Eh mun ehvaig natimi alupas o Inhal o natimi an naopan ineig, eh mun lep ehvaig natimi alupas o Atua vai yin:

32 el eh ehvaig natimi alupas o Atua vai yin, etpu lep ehvaig natimi alupas o un a Atua, etpu auroauro aien um ehvaig natimi alupas o un.

33 Ak ilpu hal *unyak*, inki ti elvamen ehelemia ainyak: akupu ahilek nyak aijaua; kis idim upyi asaig ehele nupu Jutai ainyak, um ika, Et ehka vai caua napanvaig an nuarin ineig ekpu apan iran ainyak; et idim ucco intas unyak ehelemia an naopan ineig.

34 Ek alupai caua intas alep mat ineigki ainyak, mika yi aiyu jipe inliinmopomia aijaua vai caua; et idivaig naiyu u inliinmopok vai caua, etmu ucco naiyu jipe u inliinmopomia aijaua vai caua:

35 va erupu ato natimi asega, nikavaig, eka ilpu atimi atahaijeg nyak aijaua, an naiyu jipe vaig inliinmopomia aijaua vai caua.

36 ¶ Is um ika ehelen a Saimona Pitrus, Ak Natimarid, napu apan aiek eda? Is um ika ehelen a Iesu, Et ehka vai euc napitac nyak vaig an naopan ineig, um apan an nuarin ineig ekpu apan iran ainyak;

napu apitac nyak aiek an tak aopan.

37 Is um ika ehelen a Pitrus, Ak Natimarid, et ehka vai nyak napatac euc vaig an naopan ineig vanhe? ekpu mas ainyak vai euc.

38 Is um ika ehelen a Iesu, Nai ika aiek napu mas vai nyak, ka o'o? et idim inivaijec ineig ek asaig ehelum ainyak *mika*, Napu ehceseij ateri nyak aiek, ja etpu ahlaig injaa.

NUARIN-TAS ALUPAS 14.

1 ETMU jim ohocred inliinmopomia aijaua: akumu asgeig irai Atua aijaua, um lep asgeig irak.

2 Et ahinag inuari-eom an neom o Etmak: el *et* eti *eteuc*, el ek mun asaig ehelemia ainyak: inki apan ainyak um yecrei inuarin imi caua:

3 ek wit apan ainyak um yecrei inuarin imi caua, ja par lep ham, um leh caua imi nyak; mika aki amen aijaua an nuarin ineig ekpu amen iran ainyak:

4 eka ato aijaua inuarin ineig ekpu apan iran ainyak, um lep ato nefalaig.

5 Is um ika ehelen a Tomas, Ak Natimarid, ecra eti ato aijana inuarin ineig an apan iran aiek; um lep ehka vai cama natovaig nefalaig.

6 Is um ika ehelen a Iesu, Ek efalaig ainyak, um itai inivaijec, um itai umoh iran: et eti tup han tah ehele Etmak, jai vai nyak ache:

7 el eka mun ato nyak aijaua, el eka mun lep ato Etmak aijaua: akupu idim ato yin aijaua, um alum yin.

8 Is um ika ehelen a Filipus, Ak Natimarid, ehvai Etmam aiek ehelema, et upene vai cama.

9 Is um ika ehelen a Iesu, Ak Filipus, kis amen ehelemia ainyak

itu acen, ja na idim eti ato nyak aiek, ka o'o? aien et mun alum nyak aien, et alum Etmak aien; na auri aiek par ika, Ehvai Etmam aiek ehelema?

10 na imyiisjis ninivaijec aiek, nikavaig, *ek amen* ainyak ehele Etmak, et lep amen a Etmak ehelek, ka o'o? ek eti tup ispuk tas ainyak irai tas iji eigki ek asaig ehelemia ainyak: ja et ago nauritai iji eigki a Etmak et amen ehelek aien.

11 Akumu eteuc an tas ineigki aijaua, nikavaig, *ek amen* ehele Etmak ainyak, um lep amen ehelek a Etmak: ka akumu eteuc an tas unyak aijaua va riji auritai *unyak*.

12 Et idim inivaijec ineig ek asaig ehelemia ainyak *mika*, Aien et asgeig irak aien, etpu ago nauritai iji eigki aien ek ago ainyak; etpu lep ago *niji auritai* aien inyi esjilid irai itai iji eigki; va napan unyak ehele Etmak.

13 Nitai iji eigki eka ugni aijaua an nidak, ekpu ago ainyak, va uhpu imyahpas Etmak vai Inhal o un.

14 Aku wit ugni tah nitai aijaua an nidak, ekpu ago ainyak.

15 ¶ El et aiyu inliinmopomia aijaua vai nyak, akumu imyiaiji niji tas alep unyak aijaua.

16 Ekpu ugni Etmak ainyak, etpu alupai caua aien Natini atau *iramia* inyi eche, va etpu amen ehelemia aien irai iji mesese;

17 *et* Esgan inivaijec *aien*; et ehka va atimi an nobohtan inlel yin vaig, era eti ecet yin ara, um eti ato yin: ja eka ato yin aijaua; et eteuc ehelemia aien, etpu amen anliinmopomia aien.

18 Ek wit ude caua ainyak, aki eti umnyij aijaua: ekpu lep ham ehelemia ainyak.

19 Et wit ti pan itac nadiat inyi ti elpat, eri ti lep alum nyak natini an nobohtan; ja eka alum nyak

aijaua: ek umoh ainyak, va nitai ineigki, akupu lep umumoh aijaua.

20 Akupu ato aijaua an naopan iyehki, nikavaig, *ek amen* ehele Etmak ainyak, um lep *amen* ehelek aijaua, um lep *amen* ehelemlia ainyak.

21 Aien et leh niji tas alep unyak aien, um apos upene, et aiyu inliinmopon aien vai nyak: aien et aiyu inliinmopon aien vai nyak, et lep aiyu inliinmopoi Etmak vai yin, etpu lep aiyu inliinmopok ainyak vai yin, ekpu lep ehvai nyak ainyak ehelen.

22 Is um ika ehelen a Jutas, (is eti upu Karyot iyehki,) Ak Natimarid, napu ehvai euc ehelema aiek um uauo, jam eti *ehvai euc aiek* ehele atimi an nobohtan?

23 Is tas a Iesu, um ika ehelen, El et aiyu inliinmopon tah natimi vai nyak, etpu apos intas unyak aien: etpu aiyu inliinmopoi Etmak vai yin, ecrupu apan ehelen aijumrau, um amen ehelen.

24 Aien et eti aiyu inliinmopon aien vai nyak, et eti apos niji tas unyak aien: is eti ahes ehelek intas ineigki eka atahaijeg aijaua, ja *is ahes* ehele Etmak is abrai nyak aien.

25 Ek mun asaig nitai iji eigki ehelemlia ainyak, an namen unyak ehelemlia.

26 Jai Natimi atau *iramia*, et Esgan Upene *aien*, etpu abrai yin a Etmak an nidak, etpu esege imi caua aien niji itai asega, um ahugni lelmia an niji itai asega iji eigki kis asaig ehelemlia ainyak.

27 Ek ati neigpa *unyak* ainyak ehelemlia, ek alupai caua neigpa unyak ainyak: ekpu ahtai itai imi caua ainyak, ja inyi ti idivaig ineig er ahtai an nobohtan. Etmu jim ohocred inliinmopomia aijaua, um jim imtitaig.

28 Akis atahaijeg aijaua intas unyak ehelemlia, nikavaig, inki apan ainyak, ja par *lep* ham ehelemlia. El et aiyu inliinmopomia aijaua vai nyak, el eka imyiacitak aijaua vai

intas unyak, nikavaig, Ekpu apan ehele Etmak ainyak: et idim esjilid irak a Etmak.

29 Ek mun upyi hup ainyak um asuptecnaig ehelemlia, mika, et wit yetpam *nitai ineigki*, aki imyiisjis ninivaijeg aijaua.

30 Inki ti lep tas alupas ehelemlia ainyak: et ham natimarid an nobohtan ineigki, ja et eti eteuc tah nitai ehelek imi yin.

31 Ja erupu ato atimi an nobohtan mika et aiyu inliinmopok ainyak vai Etmak; is idim asaig ehelek a Etmak, et um ucco ek ago ainyak. Ti atidai akaija um apan eagko.

NUARIN-TAS ALUPAS 15.

1 EK ohui vaine inivaijeg ainyak, et atimi aminjinaig vaine a Etmak.

2 Et atipagki inran asega aien et *amen* ehelek, jam eti ohou: et lep ahped *ran* asega aien et ohou, mika yi ahinag nohoan.

3 Eh mun ahped upene caua an tas ineigki ek mun asuptecnaig ehelemlia ainyak.

4 Akumu amen ehelek aijaua, *ekpu* lep *amen* ehelemlia ainyak. Et ehka vai ran nohouvaig, et wat eti amen irai ohui vaine; et um ucco vai caua, el eka eti amen ehelek aijaua.

5 Ek ohui vaine ainyak, eka ran aijaua: aien et amen ehelek aien, um *amen* ehelen ainyak, et ohou aien um ahinag nohoan; el ek eti amen ehelemlia ainyak, inyi ehka vai caua nagovaig tah nitai.

6 El et eti amen ehelek tah natimi, uhpu ethaig pan itac yin et idivaig inran, etpu mese; era asjapicnaig natimi, um atijai an cop, um atnamud.

7 El eka amen ehelek aijaua, um lep amen ehelemlia niji tas unyak, aku wit ugni nitai iji eigki aijaua, eka merit vaig aijaua, uhpu alupai caua.

8 Aku wit ohou aijaua um ahinag nohoamia, ulpu imyiahpas Etmak; akupu lep ilpu atimi atahaijeg nyak aijaua.

9 Et idim aiyu inliinmopoi Etmak vai nyak, et um ucco et aiyu inliinmopok ainyak vai caua: akumu amen aijaua an naiyu u inliinmopok *vai caua*.

10 El eka imyiaiji niji tas alep unyak aijaua, etpu amen naiyu u inliinmopok ainyak vai caua; et idivaig kis imyiaiji niji tas alep o Etmak ainyak, et lep amen naiyu u inliinmopon aien vai nyak.

11 Ek mun asuptecnaig nitai iji eigki imi caua ainyak, mika yi amen ehelemia nimyiacitak unyak, um lep esjilid nimyiacitak unyimia.

12 Intas alep unyak ineigki, mika yi aiyu jipe inliinmopomia aijaua vai caua, et idivaig naiyu u inliinmopok vai caua.

13 Et eti esjilid naiheuc o un tah natimi iran neigki, mika yi mas tah natimi vai ilpu etoan.

14 Eka ilpu etoak aijaua, el eka ago nitai iji eigki aijaua ek asaig ehelemia ainyak.

15 Inki ti lep ika vai caua ainyak, eka ilpu aheca aijaua; et eti ato tah naheca nitai ineig et ago a natimi alupas o un: ja ek ika vai caua ainyak, eka ilpu etoak aijaua; ek mun asuptecnaig ehelemia ainyak nitai iji eigki asega kis atahaijeg vaig ehele Etmak ainyak.

16 Akis eti ahilek nyak aijaua, ja kis ahilek caua ainyak, um ati caua, mika aki ohou aijaua, yi amen lau nohoamia: va etpu alupai caua nitai iji eigki a Etmak eka ugni yin vaig aijaua an nidak.

17 Ek tas alep ehelemia ainyak irai itai iji eigki, mika yi aiyu jipe inliinmopomia aijaua vai caua.

18 El era amcel vai caua natimi an nobohtan, eka ato aijaua mika eris upyi ulup ara um amcel vai nyak, ja par *amcel* vai caua.

19 El eka atimi an nobohtan aijaua,

el et aiyu inliinmopoi atimi an nobohtan vai *caua* atimi ura: ja eka eti atimi an nobohtan aijaua, kis ehtai caua ira atimi an nobohtan ainyak, va nitai ineigki, era amcel vai caua natimi an nobohtan.

20 Akumu imyiehva aijaua intas ineig kis asaig ehelemia ainyak mika, Et eti esjilid tah naheca irai natimi alupas o un. El era edemda vai nyak ara, erupu lep edemda vai caua ara; el era imyiaiji intas unyak ara, erupu lep imyiaiji *intas* unyimia ara.

21 Erupu ago nitai iji eigki asega vai caua ara va nidak, va nitai ineigki, nikavaig, era eti ato yin ara is abrai nyak aien.

22 El ekis eti ham ainyak um tas ehele ra, el et ti nedo has ura: ja eh ti nitai adahpoi nedo has ura an naopan ineig.

23 Aien et amcel vai nyak aien, et lep amcel vai Etmak aien.

24 El ekis eti ago nauritai iji eigki ainyak an nuhup ura is eti ago tah natimi et eche, el et ti nedo has ura: ja eris almoi *nauritai iji eigki* ara, jam amcel vai Etmak im lep nyak.

25 Ja *et mun yetpam nitai iji eigki* mika yi ehneijid intas ineig eris upyi aged an tas alep ura, um ika, "Eris ispura amcel vai nyak ara."

26 Et wit ham a Natimi atau *iramia* ineig, ekpu abraig pan yin ainyak ehelemia, et ahes ehele Etmak aien, etpu asuptecnai nyak aien, *et* Esgan inivaijec *aien*, et ahes ehele Etmak aien um apam:

27 akupu lep asuptecnai *nyak* aijaua, akis upyi hup aijaua, um amen ehelek um uhum pam an naopan ineig.

NUARIN-TAS ALUPAS 16.

1 EK mun asuptecnaig nitai iji eigki ehelemia ainyak, va aki jim epiltau aijaua.

2 Erupu ahlo caua ara irai eom alagaheni *ura*: etpu lep yetpam naopan iyehki eru wit atgei caua atimi, um aktaktai mika er ago nauritai o Atua.

3 Erupu ago nitai iji eigki iramia ara, va nitai ineigki, nikavaig, era eti ato Etmak ara, im lep nyak.

4 Ja ek mun asupečnaig nitai iji eigki ehelemla ainyak, mika, et wit yetpam naopan iyehki, aki imyiehva aijaua intas unyak ehelemla. Kis eti fi asuptecnaig nitai iji eigki ehelemla ainyak itu acen, va namen unyak ehelemla:

5 ja inki apan ainyak an naopan ineig ehelen is abraï nyak aien; ja et eti ahodai nyak tah caua, *um ika*, An han eda aiek?

6 Ja et ohocred esjilid inliinmopomia aijaua vai *intas* iji eigki kis asaig ehelemla ainyak:

7 ja ek asaig intas inivaijec ehelemla ainyak; Et upene vai caua mika ki apan ainyak: el ek eti apan ainyak, inyi ti yetpam ehelemla a Natimi atau *iramia*; ja el ek apan ainyak, ekpu abraïg pam yin ainyak ehelemla.

8 Et wit ham aien, etpu asuptecnaig nedo has an nobohtan aien, im lep nedo atoh, im lep neru va nedo has:

9 nedo has, va nitai ineig, nika-vaig, era eti asgeig irak ara;

10 im nedo atoh, va nitai ineig, nikavaig, ekpu apan ehele Etmak ainyak, akupu eti lep ecet nyak aijaua;

11 im neru va nedo has, va nitai ineig, nikavaig, eh mun aru irai natimarid an nobohtan ineigki.

12 ¶ Ek lep merit ainyak nasuptecnaigvaig ehelemla niji itai et ahinag, ja eka auatialiidi aijaua inlelhvaig an naopan ineig:

13 ja et wit ham a Nesgan inivaijec, etpu atau iramia aien irai itai inivaijec asega: inyi eti ispun tas aien; ja etpu esege nitai iji eigki aien et atahaijeg aien: etpu

lep asuptecnaig ehelemla aien nitai iji eigki etpu yetpam:

14 etpu ehvai natimi alupas unyak aien: etpu lep leh niji itai unyak aien, um asuptecnaig ehelemla.

15 Et unyak niji itai asega ehele Etmak: va nitai ineigki, ek mun asaig ainyak, mika etpu leh niji itai unyak aien, um asuptecnaig ehelemla.

16 Akupu eti ecet nyak aijaua tupko; ja par lep ecet nyak tupko, va nitai ineigki, nikavaig, ekpu apan ehele Etmak ainyak.

17 Eris tas jipe a ilpu ahaiji atimi atahaijeg yin, *um ika*, Inhe ineigki et asaig eheleija aien mika, Akupu eti ecet nyak aijaua tupko; ja par lep ecet nyak tupko: va nitai ineigki, nikavaig, ekpu apan ehele Etmak ainyak?

18 Eris ika ara, Inhe ineigki et asaig aien mika, Tupko? Inta eti ato akaija intas ineig et asaig aien.

19 Is ato a Iesu mika eris merit ara nahodai yin vaig, is ika ehele ra aien, Eka mun tas jipe ehelemla aijaua, ka o'o, vai intas ineig ek mun asaig ainyak mika, Akupu eti lep ecet nyak aijaua tupko; ja par lep ecet nyak tupko?

20 Et idim inivaijec ineig ek asaig ehelemla ainyak mika, Akupu ehtigtaig aijaua um imyitaig *nyak*, ja erupu idim imyiacitak natimi an nobohtan: akupu ohocred aijaua, ja par lep imyiacitak.

21 Et ohocred intakata an nikavaig yi apos inhal o un: ja et wat apos yin aien, et eti lep imyiehva nohocred o un aien, va nimyiacitak o un va naposvaig natimi an nobohtan:

22 eka ohocred aijaua an naopan ineig: ja ekpu lep ateghe caua ainyak, etpu imyiacitak inliinmopomia aijaua, inyi ti atipagki nimyiacitak unyimia tah natimi.

23 Aki eti ahodai nyak vaig tah nitai aijaua an naopan iyehki. Et idim inivaijec ineig ek asaig ehele-

mia ainyak mika, Etpu alupai caua nitai iji eigki a Etmak, eka ugni yin vaig aijaua an nidak.

24 Akis etai ugni tah nitai an nidak aijaua: akumu ugni aijaua, akupu leh aijaua, va etpu esjilid nimyia-citak unymia.

25 Kis esege nitai iji eigki imi caua ainyak um ecsipece iran: ja etpu yetpam naopan iyehki, inki eti lep ecsipece iran ehelemia ainyak, ja ekpu asuptecnaig upene Etmak ehelemia ainyak.

26 Akupu ugni itai aijaua an nidak an naopan iyehki: ek eti ika ehelemia ainyak, ekpu ugni Etmak ainyak vai caua:

27 et idim aiyu inliinmopoi Etmak vai caua, va nitai ineig, nikavaig, et aiyu inliinmopomia aijaua vai nyak, um lep imyisjis ninivajec mika kis ahes ehele Atua ainyak.

28 Kis ahes ehele Etmak ainyak, um ham an nobohtan: ekpu lep ude nobohtan ainyak, um apan ehele Etmak.

29 ¶ Eris um ika ehelen a ilpu atimi atahajeg yin, Na idim asuptecnaig upene aiek an naopan ineig, um eti ecsipece iran:

30 ecra ato aijama an naopan ineig, mika na *tup ispum* ato niji itai asega aiek, um eti ika yi pu ahodai euc tah natimi: va nitai ineigki, ecra imyisjis ninivajec aijama mika as ahes ehele Atua aiek.

31 Is um ika a Iesu chele ra, Eka imyisjis ninivajec aijaua an naopan ineig, ka o'o?

32 Etpu idim yetpam naopan iyehki, maiya, et mun yetpam an naopan ineig, akupu terinterim aijaua asega, um apan irai innim unymia, um ude nyak: ja ek eti echim amen ainyak, et idim amen ehelek a Etmak.

33 Ek mun asuptecnaig nitai iji eigki ehelemia ainyak, mika yi eigpa inliinmopomia aijaua vai nyak. Akupu ohocred aijaua an

nobohtan: jam jim auatialidi; ek esjilid ainyak ira atimi an nobohtan.

NUARIN-TAS ALUPAS 17.

IS wat tas ehni a Iesu, ja par easji pan an nohatag, um ika,

Ak Etmak, et mun yetpam naopan *unyak*; namu ehvaig natimi alupas o Inhal unyum aiek, va etpu lep ehvaig natimi alupas unyum a Inhal unyum:

2 as ati yin aiek mika yi esjilid aien ira atimi asega, mika yi alupai ra sji eigki asega as alupai yin ra aiek nitai umoh iran ineig inyi ti lep ti.

3 Nitai umoh iran ineig inyi ti lep ti ineigki, mika eri ato euc ara, nikavaig, na Atua inivajec ache aiek, im Iesu Kristo, as abraig yin aiek.

4 Kis ehvaig natimi alupas unyum ainyak an nobohtan: ek mun ago ehni nauritai ineig ainyak as alupai nyak aiek mika ki ago ainyak.

5 Ak Etmak, alupai nyak natimi alupas unyum aiek, natimi alupas iyehki ehelum, is unyak an naopan iyehki is pam eti eteuc nobohtan ineigki.

6 Kis asuptecnaig nidam ainyak chele atimi iji eigki an nobohtan, as alupai nyak ra aiek: eris idim unyum ara, as alupai nyak ra aiek; eris apos intas unyum ara.

7 Era ato ara, nikavaig, is ahes ehelum niji itai asega as alupai nyak aiek.

8 Kis alupai ra ainyak intas iji eigki as alupai nyak aiek; eris leh ara, um ato upene mika kis idim ahes ehelum ainyak; era lep imyisjis ninivajec ara mika as abrai nyak aiek.

9 Ek ugni *euc* ainyak vai ra: ek eti ugni *euc* ainyak va atimi an nobohtan, ja vai ra *ache* as alupai

nyak ra aiek; era idim unyum ara.

10 Et unyum niji itai asega unyak, um lep unyak niji itai asega unyum; et ehvaig natimi alupas unyak vaig.

11 Inki ti lep amen an nobohtan ainyak, ja era amen an nobohtan ara sji eigki, ekpu apam ehelum ainyak. Ak Etmak upene, aminjina atimi iji eigki aiek an nidam as alupai nyak ra aiek, mika eri tup ethi ache ara, um idivai caijau.

12 Kis wat amen ehele ra an nobohtan ainyak, kis aminjinai ra ainyak an nidam: kis aminjina atimi iji eigki ainyak as alupai nyak ra aiek; et eti melga tah ra, nihki natimi ache; va uhpu ehneijid intas ineig eris upyi aged.

13 Ekpu apam ehelum ainyak an naopan ineig; ek asuptecnaig nitai iji eigki an nobohtan ainyak, mika yi imyiacitak alupas inliinmopura ara vai nyak.

14 Kis alupai ra intas unyum ainyak; era amcel vai ra natimi an nobohtan, va nitai ineig, nika-vaig, era eti atimi an nobohtan ara, et idivai nyak, ek eti atimi an nobohtan ainyak.

15 Ek eti ugni *euc* ainyak mika an atipagki ra aiek an nobohtan, jam aminjinai ra va niji itai has.

16 Era eti atimi an nobohtan ara, et idivai nyak, ek eti atimi an nobohtan ainyak.

17 Namu ikni ra aiek an nini-vaigec unyum: et inivaijec intas unyum.

18 As idim abrai nyak aiek mika ki ham an nobohtan ainyak, et um ucco kis abrai ra ainyak, *mika eri terimterim* ara an nobohtan.

19 Ek ati nyak ainyak vai ra mika uhpu lep ikni ra an tas inivaijec.

20 Ek eti ugni *euc* ainyak vai ra sji eigki ache, jai lep vai ra erupu asgeig irak ara vai intas ura;

21 mika eri tup ethi ache ara, um idivai caijau, *na amen* ehelek aiek,

ak Etmak, *ek* lep *amen* ehelum ainyak, mika eri lep amen eheleijau ara *um* tup ethi ache: va erupu imyiisjis nini-vaigec natimi an nobohtan mika as abrai nyak aiek.

22 Ek mun alupai ra natimi alupas iyehki ainyak as alupai nyak aiek; mika eri tup ethi ache ara, um idivai caijau:

23 *ekmu amen* ehele ra ainyak, um lep *amen* ehelek aiek, mika eri tup ethi ache ara um esjilid; va erupu ato natimi an nobohtan mika as abrai nyak aiek, um lep aiyu inliinmopom aiek vai ra, et idivai naiyu u inliinmopom vai nyak.

24 Ak Etmak, ek merit ainyak mika eri amen ehelek ara sji eigki, as alupai nyak ra aiek, an nuarin ineig ek amen iran ainyak, um almoi natimi alupas unyak, as alupai nyak aiek: is idim aiyu inliinmopom aiek vai nyak an naopan iyehki is pam eti eteuc nobohtan.

25 Ak Etmak upene, era eti ato euc natimi an nobohtan: ja ek ato euc ainyak, era lep ato ara sji eigki mika as abrai nyak aiek.

26 Ek mun asuptecnaig nidam ehele ra ainyak, ekpu lep asuptecnaig ainyak; mika yi aiyu inliinmopom aiek vai ra, et idivai naiyu u inliinmopom vai nyak, *ekpu lep amen* ehele ra ainyak.

NUARIN-TAS ALUPAS 18.

IS asan tas iji eigki a Iesu, ja par apan aien im ilpu atimi atahaijeg yin, um algaunyi inwai Kitron, is eteuc nekaro eahki, is apan iran aien, im lep ilpu atimi atahaijeg yin.

2 Is ato inuarin iyehki a Jutas, natimi aniv yin: is ehcahinag apan eahki a Iesu im ilpu atimi atahaijeg yin.

3 Is leh ilpu eucsupo a Jutas, im ilpu aheca ehele ilpu atimi ahlap esjilid im ilpu Farisi, um apan

eahki eris apos nij va atimi ara im lamp, um *atga* an cop.

4 Is ato a Iesu niji itai asega etpu yetpam iran, ja is apan aien, um ika ehele ra, Eka ahilek di aijaua?

5 Eris um ika ehelen ara, Iesu nup an Nasared. Is ika ehele ra a Iesu, Ainyak um aigki. Is lep aiji ehele ra a Jutas, natimi aniv yin.

6 Is wat ika ehele ra aien, Ainyak um aigki, eris atga an nidjira ara, um eropropse an nobohtan.

7 Is lep ahodai ra aien, *um ika*, Eka ahilek di aijaua? Eris ika ara, Iesu nup an Nasared.

8 Is um ika a Iesu, Ek mun ika ehelemia ainyak, Ainyak um aigki: el eka ahilek nyak aijaua, ude ra sji eigki aijaua:—

9 va uhpu ehneijid intas iyehki is upyi asaig aien, um ika, Et eti melga tah et ethi irai ra sji eigki, as alupai nyak ra aiek.

10 Is amen nautoga ehele Saimona Pitrus, is leh aien um auud naheca o natimi esjilid an nahlap, um auudyialis intikgan inmatan. Nidan naheca iyehki Malkus.

11 Is um ika a Iesu ehele Pitrus, Lep atohoaigse nautoga unyum aiek an cedpan: ekpu umwig ainyak an nipjinitai ineig is alupai nyak a Etmak.

12 Eris arop irai Iesu a ilpu eucsupo im natimi alupas ura im ilpu aheca o nupu Jutaia, um arore yin,

13 um upyi hup um imyiapan yin ehele Annas; is etmai ehgai Keafas aien, natimi esjilid an nahlap an mesese iyehki.

14 Is atimi iyehki a Keafas is tas aien ehele nupu Jutaia, um ika, Et upene mika yi mas natimi et ethi vai nup uran pece.

15 ¶ Is apitac Iesu a Saimona Pitrus, im lep natimi atahaijeg yin is ethi is eche: is ato natimi atahaijeg yin iyehki a natimi esjilid an nahlap, is ahced Iesu aien, um

apan anliin nimnim o natimi esjilid an nahlap.

16 Ja is aiji ijo a Pitrus an neucse neom. Is lep alau ijo a natimi atahaijeg yin is eche iyehki, is ato yin a natimi esjilid an nahlap, um tas ehele natahaig iyehki is aminjinaig neucse neom aien, um imyiapan Pitrus an *nininim*.

17 Is um ika ehele Pitrus a natahaig is aminjinaig neucse neom aien, Na atimi atahaijeg nat eigki aiek, ka o'o? Is um ika aien, O'o.

18 Eris aiji eahki a ilpu aheca im ilpu eucsupo, eris adnan cop ara irai humla; is idim eyueyu: eris atijcop ara: is lep amen ehele ra a Pitrus, um atijcop.

19 ¶ Is ahodai Iesu a natimi esjilid an nahlap vai ilpu atimi atahaijeg yin, im lep nesege o un.

20 Is um ika ehelen a Iesu, Kis tas ainyak an nuhup o atimi asega; kis idim esege ainyak irai eom alaigaheni im lep anliin neom ahlap, era apan iran a nupu Jutaia irai iji adiat; kis eti adenan tas unyak ainyak:

21 na auri aiek par ahodai nyak? ahodai ra eris atahaijeg *nyak* ara, vai intas unyak ehele ra: era idim ato intas unyak ara.

22 Is wat asan tas iji eigki a Iesu, is ahpoi yin an nikinan tah irai ilpu aheca iji eig eris aiji ubutpotet, um ika, Na *auri* aiek par asan tas naico ehele natimi esjilid an nahlap?

23 Is um ika ehelen a Iesu, El ek asan tas has ainyak, asuptecnaig intas has *unyak* aiek: ja el *ek asan* tas upene *ainyak*, na auri aiek par ahpoi nyak?

24 Is ika a Annas eri arore yin um imyiapan yin ehele Keafas natimi esjilid an nahlap.

25 Is aiji a Saimona Pitrus um atijcop. Eris ika ehelen ara, Na atimi atahaijeg yin aiek, ka o'o? Is ateri aien, um ika, O'o.

26 Is ika naheca is ethi o natimi esjilid an nahlap, (is atimi ehpan irai

natimi iyehki aien is auudyialis intikgan a Pitrus,) Ek mun ecet euc ainyak ehelen anliin nekaru.

27 Is lep ateri a Pitrus: ja is auroauro um ahlaig injaa.

28 ¶ Eris ahes ehele Keafas ara um imyiapan Iesu anliin nimmim tas alep iran: is ehuhiale; eris eti apan ara anliin nimmim iyehki, va eri jim auahas nitaup ura, um eti ecaig napaska.

29 Is alau ijo a Paillet um apan ehele ra, um ika, Intas asuptecnaig unyimia vai natimi ineigki nevitai?

30 Eris tas ara, um ika ehelen, El is eti ago nedo has aien, el ecra eti ati yin ehelum aijama.

31 Is um ika ehele ra a Paillet, Leh yin aijaua, um aru nedo has o un et idivaig intas alep unyimia. Eris um ika ehelen a nupu Jutaua, Et itaup vai cama natgei atimi vaig:—

32 va uhpu ehnejid intas iyehki, is upyi asaig a Iesu, par asuptecnaig nedo vai inmas o un.

33 Is lep apan a Paillet anliin nimmim tas alep iran, um ahlaig vai Iesu, um ika ehelen, Na atimarid u nupu Jutaua aiek, ka o'o?

34 Is um ika ehelen a Iesu, Na ispum asaig nitai ineig aiek, ka is asaig ehelum tahi natimi vai nyak?

35 Is um ika a Paillet, Ek eti upu Jutaua ainyak: era mun ati euc ehelek a nup uran pece unyum im ilpu atimi ahlap esjilid: as ago inhe aiek?

36 Is um ika a Iesu, Et eti *elcau* an nobohtan nelcau unyak: el et *elcau* an nobohtan nelcau unyak, el era ago nedoa a ilpu aheca unyak, mika eri jim ati nyak ehele nupu Jutaua: ja et eti ahes igcaki nelcau unyak.

37 Is um ika ehelen a Paillet, Na idim atimarid aiek, ka o'o? Is um ika a Iesu, Na mun asaig aiek mika ek atimarid ainyak: eris apos nyak va nitai ineigki, kis lep ham ainyak an nobohtan va nitai ineigki, mika

ki asuptecnaig nitai inivaijec ainyak: ara asega era apol an nitai inivaijec ara, era imyiaiji intas unyak ara.

38 Is um ika ehelen a Paillet, Nitai inivaijec neigki inhe?

Is asan tas ineigki aien ja par alau ijo, um apan ehele nupu Jutaua, um ika ehele ra, Ek eti ecetai tahi nedo has o un ainyak:

39 ja ekpu ahiyi natimi et ethi imi caua ainyak, et idivaig nedo unyimia u napaska: eka merit aijaua mika ki ahiyi imi caua ainyak Natimarid u nupu Jutaua, ka o'o?

40 Eris lep ahlaig ara asega, um ika, Jim *ahiyi* natimi ineigki *aiek*, Barabas ache. Is atimi alrincal a Barabas.

NUARIN-TAS ALUPAS 19.

VA nitai ineigki is leh Iesu a Paillet, um aredei *yin*.

2 Eris ahod incat adgaig a ilpu eucsupo irai itai upunupun, um adgaig imi yin, um lep aso yin ara an napelumai cop,

3 um ika, Kaiheuc vai euc, ak Natimarid u nupu Jutaua! eris ahpoi yin irai ikmara ara.

4 Is lep alau ijo a Paillet, um ika ehele ra, Ek mun imyiapam yin ehelemia ainyak, mika aki ato aijaua, nikavaig, ek eti ecetai tahi nedo has o un ainyak.

5 Is alau ijo a Iesu, is amen iran incat adgaig irai itai upunupun, im napelumai cop. Is um ika ehele ra a Paillet, Almoi natimi ineigki aijaua!

6 Eris wat alum yin a ilpu atimi ahlap esjilid, im ilpu aheca, eris ahlaig ijinies ara, um ika, Atgei *yin* an nauincai atgeig, atgei *yin* an nauincai atgeig. Is um ika ehele ra a Paillet, Leh yin aijaua, um atgei *yin* an nauincai atgeig:

ja ek eti ecetai tali nedo has o un ainyak.

7 Eris um ika ehelen a nupu Juttaia, Et eteuc intas alep unyima, et upene mika yi mas aien vai intas alep unyima va nedo o un, nika-vaig, is ika aien, Ek Hal o Atua ainyak.

8 ¶ Is wat atahaijeg intas ineigki a Paillet, is esjilid nimtitaig o un aien;

9 is lep apan aien anliin nimnim tas alep iran, um ika ehele Iesu, As ahes eda aiek? Ja is eti tas ehelen a Iesu.

10 Is um ika ehelen a Paillet, Na eti tas ehelek aiek? na ato aiek, ka o'o, nikavaig, ek emda ainyak natgei euc vaig an nauincai atgeig, um lep emda nahiyi euc vaig?

11 Is um ika a Iesu, El eh eti alupai euc *nemda* an nohatag, el et eti emda aiek *par ago tah nitai* vai nyak: va nitai ineig, et esjilid nedo has o un, et mun atcejai nyak ehelum aien.

12 Is apitac a Paillet um lep merit nahiyi yin vaig; ja eris ahlaig ijinies a nupu Juttaia, um ika, El et ahiyi natimi ineigki aiek, el et eti atimi atau imi Sisar aiek: natimi ineig et ika aien et atimarid aien, et asan tas has vai Sisar aien.

13 Is wat atahaijeg intas ineigki a Paillet, is imyialau ijo Iesu aien, um ateucse an nitai ateuc eris tas alep iran, an nuarin iyehki nidan Nehledhat, jai *nidan* Hibu, Cabada.

14 Is adiat iyehkiyehki eris imyecrei itai iran va napaska, is adiatadiat: is um ika ehele nupu Juttaia aien, Almoi Natimarid unyimia aijaua!

15 Ja eris ahlaig ijinies ara, *um ika*, Imyiapan *yin*, imyiapan *yin*, um atgei yin an nauincai atgeig. Is um ika ehele ra a Paillet, Ekpu atgei Natimarid unyimia ainyak an nauincai atgeig, ka o'o? Eris ika

a ilpu atimi ahlap esjilid, Et atimarid unyima ache a Sisar.

16 Is atcejai yin ehele ra aien, mika eri atgei yin. Eris leh Iesu ara, um imyiapan *yin*.

17 Is apos nauincai atgeig o un aien, um apan an nuarin is ethi, nidan *nuarin* o nipjinipek o atimi, nidan Hibu, Colcoda:

18 eris atgei yin eahki ara an nauincai atgeig, im lep natimi is ero is eche, is ethi an nahaijin, im lep is ethi an nahaijin, im Iesu juju.

19 Is aged intas *vai yin* a Paillet, um ati an nauincai atgeig. Is aged intas ineigki aien, *um ika*, IESU NUP AN NASARED, NATIMARID U NUPU JUTTAIA.

20 Eris esvi intas ineigki a nupu Juttaia is ahinag: is ubutpotet pan u nuarin-pece *itaup* inuarin iyehki, eris atgei Iesu iran an nauincai atgeig: eris aged intas ineigki irai tas Hibu, *im Crisi*, *im Roma*.

21 Eris um ika ehele Paillet a ilpu atimi ahlap esjilid u nupu Juttaia, Jim aged aiek, *um ika*, Natimarid u nupu Juttaia; jam aged, *um ika*, Is ika aien, Ek atimarid ainyak u nupu Juttaia.

22 Is um ika a Paillet, Intas ineig ek aged ainyak, ek mun idim aged ainyak.

23 ¶ Eris atgei Iesu a ilpu eucsupo an nauincai atgeig, ja par leucse apelumai itac o un, um ahaig is for inuarin; eris akaro sjipe a ilpu eucsupo asega; im lep napelumai uhup o un: is ti nugnyan niiei iran, eris tup ahod asega.

24 Eris tas jipe ara, *um ika*, Intumu jim ahpati akaija, ti edaig jipe nitai asjaaicnaig iraija akaija, par ato natimi ineig inyi ati: va uhpu ehnejid intas eris aged, um ika, "Eris ahai apelumai itac unyak ira ra ara, um edaig jipe itai asjaaicnaig va napelumai uhup unyak." Eris ago nitai iji eigki a ilpu eucsupo.

25 ¶ Is aiji a risi Iesu ubutpotet u nauincai atgeig o un, im lep etoai risin, Mere *ehgai* Kleofas, im Mere nupu Maktala.

26 Is wat alum risin a Iesu im natimi atahaijeg yin iyehki, is aiyu inliinmopon aien vai yin, is um ika ehele risin aien, Ak intakata ineigki, almoi inhal unyum aiek!

27 Is lep ika aien ehele natimi atahaijeg yin iyehki, Almoi risum aiek! Is leh yin a natimi atahaijeg yin iyehki an naopan iyehki, um imyiapan yin an *nimmim* o un.

28 ¶ Is wat ti pan itac nitai iji eigki is ato a Iesu, nikavaig, eris ago ehni niji itai asega; va uhpu ehneijid intas eris upyi aged, is ika aien, Ek ahvig wai ainyak.

29 Eris ati nipjinitai is amen iran vinecar um ohua: eris leh nisa ara, um ahtaijuli a vinecar, um ahcai an nauhiissop, um ati an nipji-neucsen.

30 Is wat leh vinecar iyehki a Iesu, is um ika aien, Eh mun ago ehni: is atpuse aien, um edekjai nesgan.

31 Is adiat imyecrei itai iran iyehki; va nitai ineig eris ugni Paillet a nupu Jutaia mika uhpu asvi neduei ehtaij um iknipagki ehtaij, va yi jim amen nohui ehtaij irai auicai atgeig an nadiat atumop; is adiat atumop esjilid iyehki.

32 Eris apan a ilpu eucsupo, um asvi eduei natimi erahki eris atgei rau an nauincai atgeig ehelen:

33 eris wat apan ara ehele Iesu, um almoi mika is idim mas aien, eris eti asvi neduon ara:

34 ja is ahcai nahaijin a neucsupo is ethi an mopul, is auroauro um aredinja *iran*, im lep inwai.

35 Aien is almoi *nitai iji eigki* aien, is asuptecnaig aien; et idim inivaijec intas asuptecnaig o un: et ato aien mika et inivaijec intas o un, mika aki imyiisjis ninivaijec aijaua.

36 Eris ago nitai iji eigki va uhpu

ehneijid intas eris upyi aged, *um ika*, "Uhpu idim eti asvi tah neduon."

37 Eris lep aged intas is eche, *nikavaig*, "Erupu aespan natimi ineig eris ahcai yin ara."

38 ¶ Is wat ti pan itac nitai iji eigki is ugni Paillet a Josef nupu Aramadia, mika yi leh nohui Iesu; is atimi atahaijeg Iesu aien, jam eti asaig va nimitai nupu Jutaia o un: is ika a Paillet *yi leh yin aien*. Is apan aien, um leh nohui Iesu:

39 is lep apan a Nikotimus, (aien aigki is upyi hup aien um apan ehele Iesu an nepeig,) um apos nahrincai auanipin upene pilaig a *nidi* mura, is idivaig is wun huntret paunt:

40 erus leh nohui Iesu arau, um lep aspi yin an nitai auanipin upene, um aso an napelumai yilyil, is idivaig nedo o nupu Jutaia an natelmoi atimi vaig.

41 Is eteuc nekaro an nuarin iyehki eris atgei yin iran an nauincai atgeig; *is* lep *eteuc* inmun nij mat anliin nekaro, eris pam eti ati tah nohu atimi iran.

42 Erus ati Iesu iran arau, va nitai ineig, nikavaig, is adiat imyecrei itai iran iyehki o nupu Jutaia; is ubutpotet o unmun nij iyehki.

NUARIN-TAS ALUPAS 20.

AN nadiat uhup irai wiik is apan a Mere nupu Maktala u unmun nij an nuhihiale, an naupataupat, um ecetai natipagkivaig inhata an mun nij.

2 Is athut aien, um apan ehele Saimona Pitrus, im lep ehele natimi atahaijeg Iesu is ethi, aien is aiyu inliinmopon aien vai yin, um ika ehele rau, Eris atipagki Nati-marid anliin mun nij ara, ja ecra eti ato aijama inuarin ineig eris ati yin iran.

3 Is apan u unmun nij a Pitrus im lep natimi atahajjeg *Iesu* iyehki.

4 Erus ehras athlut arau: is um ahtaregdei Pitrus a natimi atahajjeg *Iesu* iyehki, is upyi uhup aien um yetpan u unmun nij.

5 Is atpuse aien, um ecetai napelumai yilyil namenvaig; ja is eti apan iran aien.

6 Is apitac yin a Saimona Pitrus, um apan anliin mun nij, um almoi napelumai yilyil namenvaig,

7 im lep napelumai aso nidjinin iran, ja is eti amen u napelumai yilyil iji ehki, eris asvi um ati an taka uarin.

8 Is lep apan iran a natimi atahajjeg *Iesu* iyehki, is upyi hup aien um yetpan u unmun nij, is wat ecetai aien, um imyisjis ninivaijec.

9 Eris eti ato ara an naopan iyehki intas eris upyi aged, *um ika*, Eris idim ika etpu lep nusjai aien vai inmas o un.

10 Erus lep apan irai innim urau ahwat atimi atahajjeg yin erahki.

11 ¶ Ja is aiji a Mere u unmun nij, um taig: is wat taig aien, ja par atpuse, *um easse* anliin mun nij,

12 um ecet nagelo is ero nateucvaig, is ahi napelumai ira rau, *is ateucse* is ethi u nidjinin, um lep is ethi u neduon, an nuarin iyehki eris ati nohui Iesu iran.

13 Erus um ika ehelen arau, Ak intakata ineigki, na imyitaig inhe aiek? Is ika ehele rau aien, Eris atipagki Natimarid unyak, ja ek eti ato ainyak inuarin ineig eris ati yin iran.

14 Is wat asan tas ineigki aien, is ahidai yin aien, um ecet Iesu najivaig, ja is eti ato aien, nikavaig, Iesu iyehki.

15 Is um ika ehelen a Iesu, Ak intakata ineigki, na imyitaig inhe aiek? na ahilek di aiek? Is aktaktai aien mika is atimi aminjunaig nekaro aien, um ika ehelen, Ak natimi alupas, el et imyiapan yin aiek,

asuptecnaig ehelek inuarin ineig na ati yin iran aiek, ekpu atipagki yin ainyak.

16 Is um ika ehelen a Iesu, Ak Mere. Is ahidai yin aien, um ika ehelen, Ak Rabonai; nesgan tas ineigki, Ak Natimi esege.

17 Is um ika ehelen a Iesu, Jim atcei pam nyak aiek; ek pam eti fi aridjai ainyak ehele Etmak: jam apan aiek ehele ilpu etoak, um asaig ehele ra mika, ek aridjai ehele Etmak ainyak, im lep Etmamia; ehele Atua unyak, im lep Atua unyimia.

18 Is apan a Mere nupu Maktala, um asuptecnaig ehele ilpu atimi atahajjeg yin, mika is ecet Natimarid aien, is lep asuptecnaig nitai iji eigki aien ehelen.

19 ¶ An nadiat iyehki is wat jupura, nadiat uhup irai wiik, is ipjin intapanes an nuarin-neom iyehki eris asjapicnaig iran a ilpu atimi atahajjeg yin va nimitai nupu Jutaia *ura*, is ehcohos pan a Iesu, um aiji an nuhup *ura*, um ika ehele ra, *Etmu eteuc* neigpa ehelemia.

20 Is wat ucce intas o un, is ehvaig ehele ra aien nikman im lep nahajjin. Eris wat ecet Natimarid a ilpu atimi atahajjeg yin, eris imyiacitak ara.

21 Is lep ika ehele ra a Iesu, *Etmu eteuc* neigpa ehelemia: is idim abraig pam nyak a Etmak, et um ucco ek abraig pan caua ainyak.

22 Is asan tas ineigki aien, ja par ehledowa *ra*, um ika ehele ra, Akumu leh Nesgan Upene aijaua:

23 uhpu iknipagki nedo has *ura*, eka iknipagki aijaua; *ja* eri eti iknipagki *nedo has* *ura*, eka eti iknipagki aijaua.

24 Ja is wat ehcohos pan *ehele ra* a Iesu, is eti amen ehele ra a Tomas, tak idan Titimus, natimi is ethi ira atimi is twelv.

25 Eris ika ehelen a ilpu atimi atahajjeg *Iesu*, Ecra mun ecet Natimarid aijama. Ja is ika ehele ra aien, El ek eti almoi nuguyan nel

an nikman ainyak, um ati nupsikmak an nugnyan nel, um lep ati nikmak an nahaijin, inki ti imyiisjis ninivaijec ainyak.

26 ¶ Is wat ti pan itac nadiat is eet, eris amen anliin neom a ilpu atimi atahaijeg yin, im lep Tomas: is ehcohos pan a Iesu, um aiji an nuhup *ura*, ja is ipjin intapanes, um ika, *Etmu eteuc* neigpa ehelemia.

27 Is um ika ehele Tomas aien, Imyihio nupsikmam aiek, um almoi nikmak; um lep imyihio nikmam aiek, um ati an nahaijik: um jim imyiisjis nahcil aiek, jam imyiisjis ninivaijec.

28 Is tas a Tomas, um ika ehelen, Ak Natimarid unyak, im lep Atua unyak.

29 Is um ika ehelen a Iesu, Ak Tomas, na mun alum nyak aiek, um imyiisjis ninivaijec: *era mun* ahesmoij ara, era eti alum *nyak* ara, jam imyiisjis ninivaijec.

30 ¶ Is idim ago niji auritai ehka is ahinag is eche a Iesu an nuhup o ilpu atimi atahaijeg yin, ja eris eti aged an nitasvitai ineigki:

31 ja eris aged nitai iji eigki, mika aki imyiisjis ninivaijec aijaua, um ika et Kristo a Iesu, et lep Hal o Atua aien; um lep mika aki leh nitai umoh iran an nidan, an nimyiisjis ninivaijec vaig unyimia.

NUARIN-TAS ALUPAS 21.

IS wat ti pan itac nitai iji eigki, is lep ehcohos pan a Iesu ehele ilpu atimi atahaijeg yin u unjop Taibiryas; is ehcohos pan aien is ucce.

2 Eris amen an nuarin is ethi a Saimona Pitrus, im Tomas, tak idan Titimus, im Nadanyel nupu Kena an *pece* Calili, im ohwat hal o Sebetaius, im lep natimi atahaijeg yin is ero is eche.

3 Is um ika ehele ra a Saimona Pitrus, Ekpu apok ainyak, um

ahilek mu. Eris um ika ehelen ara, Ecrid ahced euc aijama. Eris apok ara, um auroauro um aridjai an nelcau; ja eris eti leh tah nitai ara an nepeig iyehki.

4 Is wat lahlah an nuhiale, is aiji a Iesu an nohmunjop: ja eris eti ato a ilpu atimi atahaijeg yin, nika-vaig, Iesu iyehki.

5 Is um ika ehele ra a Iesu, Ak ilpu takuras, eka mun leh numu aijaua, ka o'o? Eris um ika ehelen ara, O'o.

6 Is um ika ehele ra aien, Atise nopoig aijaua an matan nelcau, akupu leh aijaua. Eris atise ara, is ehka vai ra nase *nopoig* vaig vai mu is ahinag.

7 Is um ika a natimi atahaijeg yin iyehki, is aiyu inliinmopoi Iesu vai yin, ehele Pitrus, Natimarid mun eigki. Is wat atahaijeg a Saimona Pitrus, nikavaig, Natimarid iyehki, is aso yin aien an napelumai imyahilek mu, (is ahid lavalava ache aien,) um asuol an jop.

8 Eris lep apok an nalvelcau nahaiji ilpu atimi atahaijeg yin, um aihiaig pahai nopoig irai mu; eris ubutpotet u nimitidin ara, is idivaig is wun huntret nesja neduon.

9 Eris wat apahai ara, eris ecetai incop ara irai humla eahki, im numu eris ahen iran, im nareto.

10 Is um ika ehele ra a Iesu, Imyiapam tah numu iji eig eka leh aijaua.

11 Is apan a Saimona Pitrus, um aihiaig pahai nopoig, is eucen iran numu alupas, is wun huntret im fifti dri, um ohua: ja is eti ahtamud nopoig numu iji ehki is ahinag.

12 Is um ika ehele ra a Iesu, Apam aijaua *um* hag. Eris im-titaig a ilpu atimi atahaijeg yin asega nahodai yin vaig, *um ika*, Aiek di aigki? Eris ato ara mika is Atimarid aien.

13 Is apan a Iesu, um leh nareto im lep numu, um alaa ra.

14 Nehceseij ehcohos pan o Iesu

ineigki ehele ilpu atimi atahajjeg yin, an nusjai o un vai inmas o un.

15 ¶ Eris wat hag ara, is um ika a Iesu ehele Saimona Pitrus, Ak Saimona, *inhal* o Jonas, et esjilid naiyu u unliinmopom aiek vai nyak irai ra sji eigki, ka o'o? Is um ika ehelen aien, Maiya, ak Natimarid; na ato aiek, nikavaig, et aiyu inliinmopok ainyak vai euc. Is um ika ehelen aien, Alayi hakli siip unyak aiek.

16 Is ehcero ika ehelen aien, Ak Saimona, *inhal* o Jonas, et aiyu inliinmopom aiek vai nyak, ka o'o? Is um ika ehelen aien, Maiya, ak Natimarid; na ato aiek, nikavaig, et aiyu inliinmopok ainyak vai euc. Is um ika ehelen aien, Aminjinaig siip unyak aiek.

17 Is ehceseij ika ehelen aien, Ak Saimona, *inhal* o Jonas, et aiyu inliinmopom aiek vai nyak, ka o'o? Is ohocred a Pitrus vai intas o un, nikavaig, is ehceseij ahodai yin aien, *um ika*, Et aiyu inliinmopom aiek vai nyak, ka o'o? Is um ika ehelen aien, Ak Natimarid, na ato niji itai asega aiek; na ato aiek, nikavaig, et aiyu inliinmopok ainyak vai euc. Is um ika ehelen a Iesu, Alayi siip unyak aiek:

18 et idim inivaijec ineig ek asaig ehelum ainyak *mika*, As wat takuras aiek, as ahid *napelumai* unyum aiek, un apan an nuarin ineig as merit vaig aiek: ja na wit efatimi aiek, napu atgeig yapidi nikmam aiek, etpu ahid *napelumai* unyum

intak atimi, um imyiapan euc an nuarin ineig na eti merit vaig aiek.

19 Is asan tas ineigki aien par asuptecnaig nedo vai inmas o un ineig etpu imyiahpas Atua vaig aien. Is asan tas ineigki aien, ja par ika ehelen, Apitac nyak aiek.

20 Is ahidai yin a Pitrus, um alum natimi atahajjeg Iesu iyehki, is aiyu inliinmopon aien vai yin, napitac *yin* vaig; aien aigki is asgeig an ritin aien u inhag iyehki, um lep ika, Ak Natimarid, etpu aniv euc a di?

21 Is wat alum yin a Pitrus, is ika ehele Iesu aien, Ak Natimarid, inyi auri natimi ineigki?

22 Is um ika ehelen a Iesu, El ek merit ainyak mika yi aitgaig napam unyak aien, tup ainyak marom; namu apitac nyak aiek.

23 Is apaahni intas ineigki ehele ilpu etoan, mika inyi ti mas natimi atahajjeg yin iyehki: ja is eti ika ehelen a Iesu, Inyi ti mas aien; ja, El ek merit ainyak mika yi aitgaig napam unyak aien, tup ainyak marom.

24 Et asuptecnaig nitai iji eigki a natimi atahajjeg *Iesu* iyehki, um lep aged nitai iji eigki: ecra ato aijama nikavaig, et inivaijec nasuptecnaig o un.

25 IS lep ago niji itai is ahinag is eche a Iesu, el eh aged niji itai asega, ek ika ainyak, inyi idim tintin nobohtan inlehaig nitasvitai iji eig er aged. Emen.

NIJI AURITAI

O ILPU APOSTOLO.

NUARIN-TAS ALUPAS 1.

AK Diofilus, kis upyi hup ainyak um aged nitasvitai iyehki va niji itai asega is atupun a Iesu um ago um esege,

2 um yetpan u nadiat iyehki eris imyiaridjai yin, ja is upyi hup aien, um tas alep irai Nesgan Upene ehele ilpu apostolo iji eigki is ehtai ra aien:

3 is wat ti pan itac nohocred o un, is nusjai aien, um ehcohos ehele ra, um lep ehvaig niji itai asjaaic-naig inivaijec is ahinag, eris ecet yin ara ira adiat is forte, is tas *ehele ra aien va niji itai an nelcau* o Atua:

4 is tas ehele ra aien ira asjapic-naig *ura, um ika*, Akumu amen Jerusalem aijaua um jim efi atga unyimia, jam aitgaig intas iyehki is upyi asaig a Etmak, akis ahgei ehelek aijaua:

5 is idim baptiso *ira atimi a* Joanes an wai; ja uhpu baptiso iramia an Nesgan Upene, et wit ti pan itac nadiat inyi ti elpat.

6 Eris wat asjapicnaig ara, eris ahodai yin ara, um ika, Ak Natimarid, napu lep atceijaig inpece o nupu Isreel imi ra aiek an naopan ineig, ka o'o?

7 Is um ika ehele ra aien, Et eti *upene* vai caua natovaig naopan iyehki, im nadiat iyehki, is ati a Etmak an nemda o un:

8 ja akupu leh nemda aijaua, et wit yetpan iramia a Nesgan Upene: akupu atimi asuptecnaig nyak aijaua Jerusalem, im Jutaia asega, im Samerya, im lep irai iji pece asega an nobohtan.

9 Is asan tas iji eigki aien; eris wat aes *yin* ara, eris imyiaridjai yin; is um leh yin nepeig an nuhup u nesganintara.

10 Eris wat anani nesganintara ara an naridjai o un an nohatag, erus um aiji ubutpotet ehele ra natimi is ero, is ahi napelumai ira rau;

11 erus ika arau, Ak nupu Calili, eka auri aijaua par easji pan an nohatag? Iesu ineigki eh mun imyiaridjai yin an nohatag, etpu ham aien et idivaig napan o un ineig an nohatag eka mun almoi aijaua.

12 Eris ahes an nedoon ara, nidan Olivet, um lep apan Jerusalem, et tup idivaig natga o *atimi* an nadiat atumop mahes Jerusalem.

13 Eris wat apan ara anliin *neom is ethi*, eris aridjai an nuarin-neom ijinies ara, is amen eahki a Pitrus, im Jakobus, im Joanes, im Antrius, *im* Filipus, im Tomas, *im* Bardolomius, im Madius, *im* Jakobus *inhal* o Alfius, im Saimona natimi leh imi ilpu Silotai, im Jutas *etoai* Jakobus.

14 Eris emda ara asega, is tup ethi ache inliinmopura ara, um alaigaheni, um ugni itai, im lep

ilpu takata, im Mere risi Iesu, im ilpu etoan.

15 IS atidai a Pitrus an naopan iyehki an nuhup o ilpu atimi alaigaheni, (eris wat esvi ra cahki is idivaig is wun huntret im twente nidara,) um ika,

16 Ak ilpu etoak, Eris idim ika uhpu ehneijid intas ineig o Nesgan Upene eris aged, is upyi asaig a Tevit vai Jutas, natimi iyehki is atau irai ra sji ehki aien eris arop irai Iesu ara:

17 eris esvi pan yin irama, is apol pan an nuarin nauritai ineigki aien:

[18 Is auanimtan nuarin-nobohtan a natimi ineigki an nimtan nedo has o un; ja is par etjo aien, is ahpati nipjinetgan, um elel nauintin asega:

19 eris ato *nitai iji eigki* ara asega eris amen Jerusalem ara; va nitai ineigki, er anvi nidam nuarin-nobohtan iyehki par ika Akeltama, an tas ura, nesgan tas ineigki, nuarin-nobohtan ja.]

20 eris aged an nitasvitai Ohran-itai, um ika, “Etmu ahoai lelcai nimnim o un,” etmu ti amen iran tah: “etmu esjipigmoig yin intak atimi par auritai:”

21 eris idim ika eri ati natimi et ethi ira ra eris ahced caija ara irai iji adiat an namen o Iesu Natimarid eheleija,

22 an nahes u nabaptiso o Joanes, um yetpan an nadiat iyehki eris *leh yin* eheleija um imyiaridjai yin, mika yi atau imi caija aien, um asuptecnaig inusjai o un.

23 Eris aniv natimi is ero ara, Josef, tak idan Barsabas, eris lep anvi nidam par ika Justus, im lep Matdaias.

24 Eris alaigaheni ara, um ika, Ak Natimarid, na ato inliinmopoi atimi asega aiek, namu asuptecnaig aiek natimi ineig ira rau, nai merit vai yin aiek,

25 mika yi imtaam apol an nuarin nauritai ineigki o ilpu apostolo aien,

is ude a Jutas va nedo has o un, mika yi apan an nuarin o un.

26 Eris ikni itai asjaaicnaig ira rau ara; is etjo nitai asjaaicnaig imi Matdaias; eris esvi pan yin irai ilpu apostolo is eleven.

NUARIN-TAS ALUPAS 2.

IS wat yetpam nadiat Pentekost, I eris ehramen ara asega an nuarin is ethi, is tup ethi ache inliinmopura.

2 Is auroauro um ahes an nohatag nohran tah is idivaig inmotjan nintinjop alupas, is apaahni um ohua an neom ineig eris atauc iran ara.

3 Is ehcohos ehele ra namai *atimi* eris ahaig, is idivaig incop, is atauc ijinies ira ra asega.

4 Is amen alupas anliinmopura a Nesgan Upene, eris atupun ara um tas irai taka tas, is idivaig is alupai ra intas a Nesgan Upene.

5 Eris amen Jerusalem a ilpu atimi upene, nupu Jutaia, eris ahes irai iji pece asega ithan nohatag ara.

6 Is wat apaahni nitai ineigki, eris asjapicnaig natimi is ahinag; eris wat atahajjeg ra atimi asega intasvaig irai iji tas ura, is ehioehio inliinmopura ara.

7 Eris imyiali ara asega, um imyilyaujai, eris ika jipe ehele ra ara, Almoi, era upu Calili ara sji eigki asega era tas ara;

8 ja et echamecha? inta atahajjeg intas akaija asega irai pece iji eig eris apos caija iran:—

9 *intas* u nupu Pardya, im nupu Mitya, im nupu Elam, im ra eris amen Mesopotemya ara, im Jutaia, im Kapatosya, im Pontus, im Esya,

10 im Frijya, im Pamfilya, im Ijpt, im *nup* urai uari pece Libya ubutpotet Sairini, im ilpu atimi ahes Roma, eris upu Jutaia, um leh nalaigaheni u nupu Jutaia *nahaiji* ra,

11 *im* nupu Kriti, *im* nupu Arebya,—inta atahaijeg ra akaija nasuptecnaigvaig niji auritai esjilid o Atua irai tas uja.

12 Eris imyiali ara asega, um eti ato, um ika jipe ehele ra, Et echamecha?

13 Eris imyiafakahcil nahaiji ra, um ika, Era ahnag natimi iji eigki va waina mat.

14 ¶ Ja is atidai a Pitrus *im* lep natimi is eleven, um efehtas, um ika ehele ra,

Ak nupu Jutaia, *im* ilpu atimi amen Jerusalem, akumu ato nitai ineigki aijaua asega, um atahaijeg intas unyak:

15 era eti ahnag ara sji eigki, et idivaig eka aktaktai aijaua, et adiat metto ache *ineigki*:

16 jai nitai ineig is asaig a Joel naprofeta,

17 *um ika*, “Et ika a Atua, Ekpu atladwi Nesgak ainyak ira atimi asega ira adiat apitac: erupu ahidan tas a ilpu halav atamaig unyimia *im* ilpu halav atahaig unyimia, erupu ecetai niji itai ehvaig a ilpu takuras unyimia, erupu umjeg ahnag a ilpu fatimi unyimia:

18 ekpu atladwi Nesgak ainyak irai ilpu aheca atamaig unyak *im* ilpu aheca atahaig unyak ira adiat iji ehki; erupu ahidan tas ara:

19 ekpu ehvaig niji itai imyiali ainyak ijinies an nohatag, *im* niji itai asjaaicnaig sepagko an nobohtan, *nikavaig*, inja, *im* incop, *im* naupat va nadran cop:

20 etpu aupat nagesega, um idivaig inja inmhoc, ja etpu yetpam nadiat alupas um esjilid o Natimarid:

21 ja uhpu imyiatamaig ra asega era arohoan nidai Natimarid ara.”

22 Ak nupu Isreel, akumu atahaijeg intas iji eigki aijaua, *nikavaig*, is ehvaig Iesu nup an Nasared ehelemlia a Atua irai iji auritai esjilid, *im* niji auritai imyiali, *im* niji auritai ehka, is ago iran a Atua

an nuhup unyimia, eka idim ato aijaua:

23 ja akis leh yin aijaua, um atgei yin an nauincal atgeig irai ikma atimi auatatimi, et idivaig is atcejai yin a Atua an naktaktai u inliinmopon *im* nupyi ato o un:

24 ja is ahiyi inwau an mas o un a Atua, um imyinusjai yin: va nitai ineigki, is idim ehka nimyiaaij yin vaig.

25 Is tas vai yin a Tevit, *um ika*, “Kis ecet Natimarid ainyak an nuhup unyak irai iji adiat; et amen aien an matak, va ki jim ucjucjucaij ainyak:

26 va nitai ineigki, is imyiacitak inliinmopok ainyak, kis lep cediaig ainyak an nipjineucsek; *im* lep ineig, etpu atumop nohuk ainyak um aitgaig *inusjai unyak*:

27 napu eti ude nesgak aiek an naupat, um eti atcejaij Natimi Upene unyum mika yi muttit:

28 as asuptecnaig ehelek aiek nefalaig *et yetpan* u nitai umoh iran; etpu imyiacitak alupas inliinmopok ainyak va nesganimtam.”

29 Ak ilpu etoak, ekpu asuptecnaig upene ehelemlia ainyak va etpoiia Tevit, is mas aien, eris atelmoi yin, is amen nehpanitai iran eheleija um uhum pam an naopan ineig:

30 is aprofeta aien, is lep ato aien, nikavaig, is idim upyi asig yi aktit ehelen a Atua, mika etpu imyiatidai Kristo aien ehele ilpu mapon, et idivaig nedo o atimi, par ateuc a dorona o un;

31 is upyi ato nitai ineigki aien, um tas vai inusjai o Kristo, um ika, eri eti ude nesgan an naupat, inyi ti muttit nohun.

32 Is imyinusjai Iesu ineigki a Atua, ecra atimi asuptecnaig vaig aijama asega:

33 eris atijai yin an matai Atua, is leh Nesgan Upene aien ehele Etman et idivaig is upyi asaig aien, et mun lep atladwi nitai ineigki aien

eka mun almoi aijaua um atahaijeg vaig.

34 Is eti aridjai an nohatag a Tevit: ja is ika aien, “ Et ika a Ihova ehele Natimarid unyak, Namu ateuc aiek an matak,

35 um uhum pan an naopan iyehki ekpu ikni ilpu atini tak atimi iram ainyak, mika eri itai atijai neduom iran.”

36 Et inivaijec ineig erumu ato a nupu Isreel asega, nikavaig, Iesu neigki akis atgei yin aijaua an nauincal atgeig, is ati yin a Atua mika yi Atimarid aien im Kristo.

37 ¶ Eris wat atahaijeg ara, is ohocred inliinmopura ara, eris ika ehele Pitrus im ilpu apostolo asega ara, Ak ilpu etoama, ecri ago inhe aijama?

38 Is um ika ehele ra a Pitrus, Akumu adumoij anliinmopomia aijaua, um leh nabaptiso iramia asega an nidai Iesu Kristo, va uhpu eti aru nedo has *unyimia*; akupu leh nitai tup ahtai ineig aijaua, Nesgan Upene:

39 et imi caua intas upyi asaig, im lep ilpu hal unyimia, im lep ra asega era itac acen ara, ara asega etpu ahlaig vai ra a Natimarid Atua uja.

40 Is lep asan tas is ahinag is eche aien, um asuptecnaig itai, um ated *ra*, um ika, Akumu imyiata-maig caua aijaua vai ilpu atimi auatatimi an naopan ineig.

41 ¶ Ara eris leh upene intas o un ara, eris leh nabaptiso ira ra ara: eris lep asgeig pan *ira ra* an nadiat iyehki natimi is idivaig dri dausant.

42 Eris imyisjis emda nesege o ilpu apostolo ara, im nauaraimu upene sjipe *ura*, im nisvisvilti nareto *ura*, im nalaigaheni.

43 Eris imtitaig atimi asega: eris ago niji auritai imyiali is ahinag a ilpu apostolo im niji auritai ehka.

44 Is tup ethi ache inliinmopoi atimi iji ehki asega eris imyisjis

inivaijec ara, eris lep asipiaig niji itai asega *ura* ara;

45 eris ahtai umara ara, im inpad-iaig *ura*, um ahaig upene irai ilpu ihki atimi asega.

46 Eris ehraşjapicnaig ara anliin neom ahlap irai iji adiat, is tup ethi ache inliinmopura, um iswiswopec jipe nareto irai eom *ura*, um hag jipe, um cediaig anliinmopura ini-vaijec,

47 um imyiahpas Atua, is upene inliinmopoi atimi asega vai ra. Is ikni natimi iji eigki eris imyiatamaig ra a Natimarid irai iji adiat an nakalasia.

NUARIN-TAS ALUPAS 3.

ERUS ehraridjai a Pitrus im Joanes alaig an neom ahlap an nuarin-nadiat alaigaheni, an jupki.

2 Eris imyiapan natimi is ethi is isvihteuc neduon aien an napos yin vaig, um ati yin an neucose neom ahlap iyehki eris anvi nidan mika Eklim upene, irai iji adiat, mika yi ugni itai aien ehele atimi apan anliin neom ahlap;

3 is ecet Pitrus aien im Joanes napanvaig anliin neom ahlap, um ugni *rau* vai itai.

4 Is amah iran a Pitrus, im lep Joanes, um ika, Alum cumrau aiek.

5 Is wat alum rau aien, um ak-taktai mika erupu alupai yin tah nitai arau,

6 is um ika a Pitrus, Et ti silver im colt unyak; jai nitai unyak ineigki ekpu alupai euc ainyak: namu atidai aiek um atga, an nidai Iesu Kristo nup an Nasared.

7 Is arahpan vai innatan aien, um imyiatidai *yin*: is eti laulau um umoh nugnyan im lep nintanid an neduon;

8 is areuctidai aien, um atga, um ahced rau um apan an neom ahlap, is atga adekdikjai aien um imyiah-pas Atua.

9 Eris alum yin natimi asega natgavaig um imyiahpas Atua:

10 eris ato ara mika an yehki aien is ateuc aien um ugni itai an neuce neom ahlap Eklim upene: eris imyiali alupas ara, is ti intas ura, va nitai iji eigki is yetpam iran.

11 Is apol irai Pitrus im Joanes natimi iyehki is isvilteuc neduon jam lep umoh, eris lep ehrathut pan ehele rau natimi asega an naiyu iyehki eris anvi nidan mika u Solomon, eris imyiali alupas ara.

12 ¶ Is wat almoi *nedo ura* a Pitrus, is tas ehele atimi aien, *um ika*,

Ak nupu Isreel, eka auri aijaua par imyiali nitai ineigki, um amah iramrau, um ika et atga a natimi ineigki va nedo emda im nedo upene unyimrau?

13 Et mun idim ehvaig natimi alupas o Iesu Naheca o un a Atua o Ebrahim, im Aisak, im Jakob, Atua o ilpu retpoiia; aien aigki akis ati yin aijaua an nuhup o Paillet, is wat ika aien yi atcejai yin, akis esjum vai yin aijaua.

14 Akis idim esjum aijaua vai natimi ineig et upene aien um atoh nedo o un, jam ika yi atcejaiig imi caua natimi atgei atmas;

15 um atgei Natimi ineig et ahes nitai umoh iran ehelen, ja is imyinusjai yin a Atua vai inmas *o un*; eera atimi asuptecnaig yin aijama.

16 Et mun lep emda a natimi ineig eka alum yin aijaua um ato, va nidan, im lep nimyisjis ninivajec va nidan: maiya, et cehcehe upene aien an nuhup unyimia asega va nimyisjis ninivajec ineig et ahes ehelen.

17 Ak ilpu etoak, ek ato ainyak, nikavaig, akis ago *nedo ineigki* aijaua va naupat u inliinmopomia, eris idim ucco a ilpu atimi alupas unyimia.

18 Ja et mun ehnejid nitai iji eigki a Atua is upyi ehvaig aien an

nippineucse ilpu profeta asega o un, nikavaig, etpu ohocred a Kristo.

19 Akumu adumojj anliinmopomia aijaua, um ahidai caua, va uhpu ohpodohpod nedo has unyimia, va inyetpam naopan upene iyehki etpu ahes ehele Natimarid;

20 *va* etpu lep abrai Iesu Kristo aien, eris upyi hup um asuptecnaig yin ehelemia:

21 eris idim ika uhpu imyiaaij yin an nohatag um yetpan an naopan iyehki uhpu lep ehteduo niji itai asega, is tas vaig a Atua an nippineucse ilpu profeta upene asega o un itu acen.

22 Is idim asaig a Moses ehele ilpu retpoiia, um ika, “Etpu imyiatidai Naprofeta inyi ethi imi caua a Ihova Atua unyimia irai ilpu etoamia, inyi idivai nyak; akumu atahajeg yin aijaua va nitai iji eigki asega etpu asaig ehelemia aien:

23 im lep ineig, natimi asega, eri eti atahajeg Naprofeta iyehki ara, uhpu auahas ra *um iknipagki* ra ehele atimi.”

24 Is lep upyi hup um tas va nadiat iji eigki a Samuel im lep ilpu profeta asega eris epitpitac iran ara, ara asega eris tas ara.

25 Eka ilpu hal o ilpu profeta aijaua, um *ilpu atimi leh* intas-etipup iyehki is ati a Atua ehele ilpu retpoiia, *nikavaig*, is ika aien ehele Ebrahim, “Erupu imyiacitak nup urai iji pece asega vai mapom.”

26 Is wat imyinusjai Iesu Naheca o un a Atua, is upyi hup aien um abraig pan yin ehelemia, mika yi aiheuc vai caua aien, um imyiadumojj *caua* asega an nedo has unyimia.

NUARIN-TAS ALUPAS 4.

ERUS wat tas arau ehele atimi, eris apan ehele rau a ilpu atimi ahlap, im natimi alupas an neom ahlap, im ilpu Satusi,

2 eris taigtaig ara va nedo urau, nikavaig, erus esege imi atimi arau, um asupteanaig inusjai o atimi vai inmas *ura* vai Iesu.

3 Eris arop ira rau ara, um ati *rau* anliin neom ipjin um yetpan an tak apnyin: va nitai ineig is mun jupura.

4 Ja eris imyiisjis ninivaijtec natimi is ahinag ira ra eris atahaijeg intas ara; eris wat esvi atimi iji eigki eris idivaig eris faiv dausant ara.

5 ¶ Is wat lahlah an tak apnyin eris asjapicnaig Jerusalem a ilpu atimi alupas ura, im ilpu atimi tas alep, im ilpu atimi esege,

6 im Annas natimi esjilid an nahlap, im Keafas, im Joanes, im Aleksanter, im lep ra asega ilpu atimi ehpan irai natimi esjilid an nahlap.

7 Eris ati rau an nuhup ura ara, um ahodai *rau*, um *ika*, Erau mun ago nitai ineigki aijaurau va nemda u di, im nidai di?

8 Is amen alupas ehele Pitrus a Nesgan Upene, is um ika ehele ra aien, Ak ilpu atimi alupas an pece, im ilpu atimi tas alep u nupu Isreel,

9 el eka ahodai cumrau aijaua va nedo upene ineig eh mun ago irai natimi areci ineigki, um ika, er ago cehcehe yin, um uauo;

10 akumu ato aijaua asega, im lep nupu Isreel asega, nikavaig, et atidai a natimi ineigki um umoh an nuhup unyimia va nidai Iesu Kristo nup an Nasared, aien aigki akis atgei yin aijaua an nauincal atgeig, ja is imyinusjai yin a Atua vai inmas *o un*:

11 et hat ineigki aien akis esjum vaig aijaua, ak ilpu atimi acta neom; et idim hat esjilid ineigki an nesvi va neom:

12 et eti ahes nimyiatamaig *caija* ehele tak atimi: eris eti lep aniv tah ira atimi an nobohtan ineigki, eris idim ika uhpu imyiatamaig *caija* vai yin.

13 ¶ Eris wat almoi nemda o Pitrus im Joanes ara intasvaig, um

ato, nikavaig, erus tup atimi arau, um eti atimi esege, eris imyiali ara; eris lep imyiehva ara, nikavaig, erus amen ehele Iesu arau.

14 Eris wat almoi natimi iyehki ara, eris ago cehcehe yin, najjivaig ehele rau, is ehka vai ra inlep asaigvaig tah nitai.

15 Eris ika ehele rau ara, eru ude sjak nasjapicnaig arau, um alau ijo; ja eris tas jipe ara,

16 um ika, Inti ago inhe akaija irai natimi iraigki? era idim ato natimi asega amen Jerusalem, nika-vaig, erau mun ago nauritai ehka esjilid ineig arau; et ehka vai caija naterivaig:

17 jai intumu acaiji emda rau akaija, mika eru jim lep tas ehelen tah natimi arau an nidan ineigki, va yi jim apaahni nitai ineigki ehele atimi.

18 Eris lep ahlaig vai rau ara, um acaiji rau, mika eru jim lep tas an tah intas arau ka esege an nidai Iesu.

19 Ja erus tas a Pitrus im Joanes, um ika ehele ra, Eka ikha aijaua, et upene an nuhup o Atua nimyiaijivaig intas unyimia, ka *nimyiaijivaig intas o Atua*?

20 et ehka vai cumrau naterivaig nitai iji eigki ecrus almoi aijumrau um atahaijeg.

21 Eris lep acaiji rau ara, um atcejai rau, va nedo o atimi, eris eti ecetai tah nitai ineig ara ehele rau uhpu aru vaig: eris imyiahpas Atua natimi asega va nitai ineigki erus mun ago arau.

22 Is forte um eled inmesese irai natimi iyehki eris ago nauritai ehka iran, um ago cehcehe yin.

23 ¶ Eris wat atcejai rau ara, erus apan arau ehele ilpu etoara, um asupteanaig intas asega eris asaig ehele rau a ilpu atimi ahlap esjilid, im ilpu atimi tas alep.

24 Eris wat atahaijeg ara, eris ehras ahlaig vai Atua ara, um ika, Ak Natimarid, na Atua aiek, as ago

nohatag aiek, im nobohtan, im injop, im niji itai asega amen iran :

25 as tas aiek an nipjineucose Tevit naheca unyum, *um ika*, “Era auri a ilpu atimi aupat par atavaitap? *era auri* natimi par aktaktai intaktait?”

26 eris atidai a ilpu atimarid an nobohtan, eris lep ehra asjapicnaig a ilpu atimi alupas vai Ihova, im lep vai Kristo o un.”

27 Et inivaijec ineig, nikavaig, eris ehra asjapicnaig a Herot, im Ponjus Pailet, im ilpu atimi aupat, im nupu Isreel, vai Naheca upene unyum, Iesu, as ati yin aiek,

28 mika eri ago nitai iji eigki asega as upyi hup aiek um anac-anac iran an nikmam, um ika uhpu ago.

29 Im lep ineig, ak Natimarid, almoi intas atavaitap ura: um alupai ilpu aheca unyum nemda asega mika eri asuptecnaig intas unyum :

30 namu ada nikmam aiek um ago cehcehe atimi; uhmu lep ago niji auritai ehka im niji auritai imyiali, an nidai Iesu Naheca upene unyum.

31 Eris wat alaigaheni ara, is um ahecatina nuarin iyehki eris amen iran ara; is amen alupas a Nesgan Upene ehele ra asega, eris asuptecnaig emda intas o Atua ara.

32 IS tup ethi ache inliinmopoi ra sji eigki is ahinag eris imyisjis ninivaijec ara, im naktaktai ura: is lep eti ika tah, et o un ache niji itai o un; ja eris asipiaig jipe niji itai asega *ura* ara.

33 Eris asuptecnaig emda inusjai o Iesu Natimarid a ilpu apostolo: is amen alupas ira ra asega naiheuc o Atua.

34 Is eti ihki natimi tah ira ra: ara, eris ohuun nobohtan ara, im niji eom, eris ahtai ara, um leucose pan nimtan nitai iji eigki eris ahtai ara,

35 um ikni u eduei ilpu apostolo: eris ahaig upene irai ilpu ihki atimi asega ara.

36 Im lep Joses, eris lep anvi nidan a ilpu apostolo par ika Barnabas, (nesgan tas ineigki, Natimi tas upene,) is mapoi Livai aien, eris apos yin Saiprus,

37 is ohuun nobohtan aien, ja is ahtai aien, um leucose pan nimtan, um ikni u eduei ilpu apostolo.

NAURIN-TAS ALUPAS 5.

1 JA is ahtai uman natimi is ethi, nidan Ananaias, im lep Sapfaira ehgan,

2 jam imyiaaig nahaijin nimtan, is lep ato a ehgan; is leucose pan nahaijin ache aien, um ikni u eduei ilpu apostolo.

3 Ja is ika a Pitrus, Ak Ananaias, et amen alupas inliinmopom a Satana vanhe, mika an ahcil aiek ehele Nesgan Upene, um imyiaaig nahaijin nimtan umam?

4 as wat eti ahtai aiek, is unyum; ja na wat ahtai aiek, is lep unyum *nimtan*: na auri aiek par aktaktai nitai ineigki anliinmopom? na eti ahcil aiek ehele atimi, jai ehele Atua.

5 Is wat atahaijeg intas iji eigki a Ananaias, is eropse aien, um mas: eris imitaig alupas ara asega eris atahaijeg ara va nitai iji eigki.

6 Eris atidai a ilpu takuras, um aso yin, um imyiapan *yin*, um atelmoi *yin*.

7 Is wat ti pan itac aur is idivaig is eseij, is apan a ehgan anliin *neom*, ja is eti ato nitai iyehki aien.

8 Is um ika ehelen a Pitrus, Asuptecnaig ehelek aiek mika arus ahtai umamirau aijaurau va nimtan iyehki ache, ka o'o? Is ika aien, Maiya, idim iyehki marom.

9 Is um ika ehelen a Pitrus, Arus auri aijaurau par ehra aktaktai, um ika, aru efaifa ehele Nesgai Natimarid aijaurau? almoi, *era*

amen an neucse neom ara sji eigki era mun atelnoi natamnyu unyumu ara, erupu lep imyiapan euc ara.

10 Is auroauro aien um eropse u neduon, um mas : eris apan anliin *neom* a ilpu takuras, um ecet yin inmasvaig; eris um imyiapan *yin* ara, um atelmoi *yin* an nahaiji natamnyu un.

11 Eris imtitaig alupas nup an nakalasia asega, im lep ra asega eris atahaijeg va nitai iji eigki ara.

12 ¶ Eris ago niji auritai ehka is ahinag a ilpu apostolo, im niji auritai imyiali, an nuhup o atimi; eris ehra asjapicnaig ara asega an naiyu iyehki u Solomon.

13 Eris imtitaig nahaiji atimi napol pan vaig ira ra: ja eris imyiahpas ra natimi.

14 Eris lep aketo um ikni ehele ra ilpu atimi asgeig irai Natimarid, eris ahinag a ilpu atamaig im ilpu takata;

15 va nitai ineig, eris imyiapan ilpu atimi emehe ara irai iji efalaig, um ikni *ra* irai ahat im lep irai itai ahled, mika yi tup ahelmun ra nal-mui Pitrus an natga o un.

16 Eris lep ahes natimi is ahinag irai iji uari-pece marahed, um asjapicnaig pan Jerusalem, um imyiapan ilpu atimi emehe, im lep ra eris ohocred ara vai ilpu agelo has: eris ago cehcehe ra asega.

17 ¶ Is um atidai a natimi esjilid an nahlap im lep ra asega ehelen, (eris ilpu Satusi atimi iji ehki,) is esjilid acen intavaitap ura,

18 eris arop irai ilpu apostolo ara, um ikni ra anliin neom ipjin an pece.

19 Ja is asalgei intapanes an neom ipjin a nagelo o Natimarid an nepeig, um imyialau ijo ra, um ika,

20 Apan aijaua, um aiji anliin neom ahlap, um asuptecnaig ehele atimi niji tas asega va nitai umoh iran ineigki.

21 Eris wat atahaijeg ara, eris apan ara anliin neom ahlap an nuhiahleg, um esege. Is lep apan a natimi esjilid an nahlap, im lep ra ehelen, um asjapicnaig ilpu atimi alupas, im ilpu atimarid asega o nupu Isreel, eris abra *atimi* ara mika eri apan anliin neom ipjin, um imyiapan ra.

22 Ja eris wat apan a ilpu aheca, jam eti ecet ra anliin neom ipjin, eris lep adumoij pan ara, um asuptecnaig,

23 um ika, Ecra mun ecetai neom ipjin aijama, et ma ipjin, era mun tup aiji a ilpu atimi aminujinaig *neom* an neucse neom ijo: ecra mun asalgei intapanes aijama, jam eti ecet tah natimi anliin *neom*.

24 Is wat atahaijeg nitai iji eigki a natimi esjilid an nahlap, im natimi alupas an neom ahlap, im ilpu atimi ahlap esjilid, is ehioehio inliinmopura ara vaig, um ika, Inyi echamecha nitai ineigki?

25 Ja is apan natimi is ethi um asuptecnaig ehele ra, um ika, Era mun han aiji anliin neom ahlap natimi iji eigki eka mun ikni ra anliin neom ipjin aijaua, um esege imi atimi.

26 Is apan a natimi alupas *an neom ahlap* im ilpu aheca o un, um eklim imyiapan ra: eris imtita atimi ara va eri jim asji ra ara irai hat.

27 Eris wat imyiapan ra ara, um ikni ra u nasjapicnaig o ilpu atimi alupas, is tas ehele ra a natimi esjilid an nahlap,

28 um ika, Ecra mun acaiji emda caua aijama, mika aki jim esege aijaua an nidan ineigki; ja et idim olua Jerusalem va nesege unyinia, eka lep aktaktai aijaua mika aki atijaiinja irai natimi ineigki irama.

29 Ja is tas a Pitrus im ilpu apostolo, um ika, Et ehka vai cama nudevaig intas o Atua, um imyiaiji intas o atimi:

30 is imyinusjai Iesu a Atua o

ilpu retpoiija, akis aijcaijai yin an nauincai atgeig aijaua um atgei yin:

31 ja is imyiatidai yin a Atua an matan mika yi Atimarid aien, um Atimi imyiatamaig *caija*, va etpu alupai nupu Isreel aien inliinmopura adumoiij, uhpu eti lep aru nedo has *ura*:

32 eera atimi asuptecnai yin aijama va nitai iji eigki, im lep Nesgan Upene, is ahtai yin a Atua imi ra era imyiaiji intas o un ara.

33 ¶ Eris wat atahaijeg ara, is esjilid nedemda ura, eris tas jipe ara mika eri atgei ra.

34 Ja is um atidai natimi is ethi irai ilpu atimi alupas eris asjapicnaig, nidan Camelyel, is Farisi aien, um atimi esege intas alep, eris tas upene vai yin natimi asega, is ika aien, eri imyialau ijo tintin jak ilpu apostolo;

35 is um ika ehele ra aien, Ak nupu Isreel, akumu aktaktai aijaua nitai ineig eka ika aijaua, aki ago ira atimi iji eigki:

36 is atidai a Dyutas itu acen, um ika yi atimi esjilid; eris asgeig iran natimi is idivaig for huntret: ja eris atgei yin; eris um tup terimterim a ilpu atimi asgeig pan iran asega, um atih ehni:

37 is um apitac um lep atidai a Jutas nupu Calili, an naopan iyehki eris aged nida atimi an pece, is imyiahnag atimi is ahinag aien: ja is lep mas aien; eris terimterim natimi asega eris asgeig pan iran ara:

38 ek idim ika ehelemia ainyak, Ude atimi iji eigki aijaua, um jim acaiji ra: el et ahes ehele atimi nesege ineigki im nauritai ineigki, etpu ti:

39 ja el et ahes ehele Atua, et ehka vai caua nauahasvaig; kit akupu ati nedoa vai Atua aijaua.

40 Eris imyiaiji intas o un ara: eris wat ablaig vai ilpu apostolo ara, um aredei *ra*, um asaig *ehele*

ra mika eri jim tas ara an nidai Iesu, um atcejiai ra.

41 Eris ahes u nasjapicnaig o ilpu atimi alupas ara, um atga ura, um imyiacitak va nitai ineigki, eris ika eri atimi upene par leucose nohocred va nidan.

42 Eris eti atumop ara anliin neom ahlap, im lep irai iji eom asega, irai iji adiat, par esege um asuptecnai Iesu *mika et Kristo aien*.

NUARIN-TAS ALUPAS 6.

AN naopan iyehki eris wat ahinag a ilpu atimi alaigaheni, eris tas upoupo atimi tas an tas Crisi va atimi tas an tas Hibru, vai ilpu takata ura eris emesmas a ilpu atamnyura, eris eti aktaktai ra ara an nahaigvaig niji itai ura irai iji adiat.

2 Eris asjapicnaig ilpu atimi alaigaheni asega a ilpu *apostolo* is twelv, um ika, Et eti upene vai cama nudevaig intas o Atua um ahai itai:

3 va nitai ineigki, ak ilpu etoama, akumu ahilek natimi inyi seven iramia aijaua eh tas upene vai ra, um lep amen alupas ehele ra a Nesgan Upene, um *esjilid* nara-pakau *ura*, ecrupu ikni ra aijama va nauritai ineigki:

4 ja ecrupu aminjinaig nalaigaheni aijama irai iji adiat, um asuptecnaig intas.

5 ¶ Is upene intas ineigki an nuhup o atimi asega: eris aniv Stifanus ara, is atimi imyiisjis emda ninivaijec aien, is lep amen alupas ehelen a Nesgan Upene, im lep Filipus, im Prokorus, im Naikenor, im Taimon, im Parmenas, im Nikolas nupu Anteok, is leh nalaigaheni u nupu Jutaia aien;

6 eris ikni ra an nuhup o ilpu apostolo ara: eris alaigaheni ara, um atijai nikmara ira ra.

7 Is edel intas o Atua; eris ahinag acen a ilpu atimi alaigaheni Jerusaleim; im lep ineig, eris leh intas ini-vaijec a ilpu atimi ahlap is ahinag.

8 IS esjilid nimyiisjis ninivaijec o Stifanus im nemda o un, is ago niji auritai inyiali aien, im niji auritai ehka esjilid an nuhup o atimi.

9 Eris atidai nahaiji atimi u neom alaigaheni iyehki eris anvi nidan mika u ilpu atimi eris ahiyi ilpu atmil ura, im lep ura eris apos ra Sairini, im lep ura eris apos ra Aleksantrea, im lep ura eris ahes Silisea ara im Esya, um imyiisjis itai irai Stifanus.

10 Ja eris auatialidi ara nauud yi ajiraig vaig narapakau o un, im intas emda o un.

11 Ja eris abra atimi ara, mika eri ika ara, Ecris atahaijeg intas has esjilid o un aijama, vai Moses im lep vai Atua.

12 Eris auahas inliinmopoi atimi ara, im ilpu atimi tas alep, im ilpu atimi esege; eris athut pan ehelen ara, um arop iran, um imyiapan yin an nasjapicnaig u ilpu atimi alupas;

13 eris ikni ilpu atimi athai nahcil ara, eris ika ara, Et eti atumop a natimi ineigki nasaigvaig intas has esjilid va neom itaup ineigki, im lep vai intas alep:

14 ecris atahaijeg intas o un aijama, is ika aien, Etpu auahas neom ineigki a Iesu nup an Nasared, um hedaig nedo ineig is asuptecnaig eheleja a Moses.

15 Ara asega eris atenc ara u nasjapicnaig u ilpu atimi alupas, eris anani nesganimtara iran ara, um eceftai nesganimtan, is idivaig nesganimtai nagelo.

NUARIN-TAS ALUPAS 7.

1 IS um ika a natimi esjilid an nahlap, Et idim ucco nitai iji eigki, ka o'o?

2 Is um ika aien, Ak ilpu atimi alupas, ilpu etoak, akumu atahaijeg nyak aijaua: Is ehcohos pan a Atua esjilid ehele etpoiija Ebrahim, an namen o un Mesopotemya, ja is par lep han amen Heran aien;

3 is um ika ehelen aien, "Ude inpece unyum aiek, im ilpu atimi ehpan iram, um apam an pece ineigki ekpu asuptecnaig ehelumi ainyak."

4 Is ude inpece o nupu Kalti aien, um han amen Heran: is wat mas a etman, is atipagki yin eahki a Atua um imyiapan yin an pece ineigki, eka amen iran aijaua.

5 Is eti fi atceijaig tah inuarin nobohtan imi yin aien, is idim ti inuarin ineig natijaivaig neduon iran: ja is upyi asaig aien mika yi alupai yin inpece ineig yipu ohuun aien, im ilpu mapon; ja is eti fi eteuc inhal o un an naopan iyehki.

6 Is um ucco intas o Atua, is ika aien, "erupu amen a ilpu mapon an taka pece, erupu ikni ra ara mika eri aheca ura ara, um agahas ira ra, irai mesese inyi for huntret.

7 Ja is ika a Atua, "Ekpu aru ainyak irai nup uran pece iyehki eri aheca o atimi iran ara; erupu lep ahes eahki ara, um atga ura, um ham, um alaigaheni vai nyak igcaki."

8 Is alupai yin intas-etipup aien va naperitome: is apos Aisak a Ebrahim, um aperitome iran an nadiat eet; is apos Jakob a Aisak; is apos ilpu retpoiija is twelv a Jakob.

9 Ja eris auatitai a ilpu retpoiija vai Josef, um ahtai yin imi atimi alaig Ijpt: ja is amen ehelen a Atua,

10 um imyiatamaig yin va nohocred asega o un, um alupai yin narapakau an nuhup o Fero nati-marid an pece Ijpt, um ago upene inliinmopoi Fero vai yin; is ati yin aien mika yi atimi alupas an pece Ijpt aien, im lep an nimmim o un asega.

11 Ja is eteuc numlaig has an pece Ijpt asega im lep Kenan, is esjilid nohocred o *atimi*, is ti nitai caig o ilpu retpoiija.

12 Is wat atahaijeg a Jakob, nika-vaig, is eteuchwiit Ijpt, is uhup aien um abraig pan ilpu retpoiija *eahki*.

13 Eris ehcero apan ara, ja is par ehvai yin a Josef ehele ilpu etoan; eris lep ehvaig ehele Fero ilpu atimi ehpan irai Josef.

14 Is abrai *ra* a Josef, um ika, yi apan ehelen a etman Jakob, im ilpu atimi ehpan iran asega, eris atimi is sevente faiv ara.

15 Is apan Ijpt a Jakob, um mas *eahki*, im lep ilpu retpoiija,

16 eris imyiapan ra Sikem, um ikni ra an mun nij iyehki is aua-nintan irai mune a Ebrahim imi ilpu mapoi Hemor *etmai* Sikem.

17 Is wat ubutpotet pan u naopan iyehki *etpu ehneijid* intas upyi asaig iyehki, is asig yi aktit a Atua ehele Ebrahim, eris asvalav atimi um atamerit an *pece* Ijpt,

18 um yetpan an naopan iyehki is atidai a natimarid is eche, is eti ato Josef aien.

19 Is ago nedo efaifa aien vai ilpu atimi ehpan iraija, um agahas irai ilpu retpoiija; eris erekhaig ilpu hal ura ara inhadi, mika eri jim umumoh ara.

20 Eris apos Moses an naopan iyehki, is eklim upene aien, eris aminjinai yin anliin neom o etman an mohoc is esejj:

21 eris ethai yin ara, ja is pah leh yin a inhalav atahaig o Fero, um aminjinai yin mika yi hal o un.

22 Eris esege imi Moses nara-pakau asega o nupu Ijpt; is esjilid intas o un im nedo o un.

23 Is wat forte inmesese iran, is ika anliinmopon aien yi ateghe ilpu etoan nupu Isreel.

24 Is ecet natimi is ethi aien *ira ra* eris agahas iran, is imyialhras *yin* aien, um ejejei yin eris ago nedo

has vai yin, um atgei nupu Ijpt iyehki:

25 is aktaktai aien, mika eris ato a ilpu etoan mika etpu imyiata-mumoh ra a Atua an nikman; ja eris eti ato ara.

26 Is wat lahlah an tak apnyin, is ehcohos pan aien ehele natimi is ero erus ehtauo arau, um ika yi asan neigpa an nehtauo urau, um ika, Ak ohwat raigki, arau raimu aijaurau; erau auri aijaurau par ago nedo has jipe vai caurau?

27 Ja is ahtahlo yin a natimi ineig is agahas irai etoan aien, um ika, Is ati euc a di mika an atimi alupas aiek, um atimi aru nedo unyima?

28 na ika aiek an lep atgei nyak, et idivaig natgei nupu Ijpt iyehki unyum ianiv, ka o'o?

29 Is aha a Moses vai intas ineigki; is amen ehcid aien an pece Mityan, um apos inhalav atamaig o *un* is ero *eahki*.

30 Is wat ti pan itac inmesese is forte, is ehcohos pan ehelen an namasacen ubutpotet u nedoon Saine a nagelo o Natimarid an nalauma u incop an cai.

31 Is wat ecetai a Moses, is imyiali aien va nitai ineig is ecetai aien: is apan ubutpotet aien par almoi, is atahaijeg nohrai Atua aien,

32 *is ika*, "Ek Atua o ilpu ret-pom ainyak, Atua o Ebrahim, im Atua o Aisak, im Atua o Jakob." Is ucjucjucaij a Moses, um imtitaig nalmoivaig.

33 Is ika ehelen a Natimarid, Atipagki incedpun eduom aiek: nuarin itaup neigki na aiji iran aiek:

34 kis idim ecetai ainyak nohocred o ilpu atimi unyak an *pece* Ijpt, kis lep atahaijeg nahlaig esjum ura ainyak, ek mun asuol ainyak mika ki imyiatamaig ra: apam aiek, ekpu abraig pan euc Ijpt ainyak.

35 Moses iyehki eris esjum vai yin ara, um ika, “Is ati euc a di mika an atimi alupas aiek, um atimi aru nedo has?” aien aigki, is abrai yin a Atua mika yi atimi alupas aien, um atimi inyiatamaig *ra* an nikmai nagelo iyehki is ehcohos pan ehelen an cai.

36 Is iknipagki *ra* aien, ja is upyi hup aien um ago niji auritai imyiali im niji auritai ehka, an pece Ijpt, im lep an jop Cop, im lep an namasacen irai mesese is forte.

37 Aien ahki Moses, is ika aien ehele nupu Isreel, “Etpu imyiatidai imi caua Naprofeta inyi ethi a Ihova Atua unyimia irai ilpu etoamia, inyi idivai nyak; akumu atahaijeg yin aijaua.”

38 Aien ahki, is amen aien ehele atimi an nasjapicnaig an namasacen ehele ilpu retpoiija, im lep ehele nagelo iyehki is tas ehelen aien an nedoon Saine: is leh niji tas umumoh vaig aien par alupai caija:

39 ja eris ika a ilpu retpoiija eri eti imyiaiji intas o un, eris ahpaadeig pagki *yin* ara, is ahidaig pan Ijpt inlinmopura ara,

40 eris ika ehele Eron ara, “Ago ilpu atua imi cama aiek eri uhup iraija ara: eera eti ato aijama, nika-vaig, et echamecha vai Moses ineigki, is iknipagki caija aien an pece Ijpt.”

41 Eris ago inhakli kurimatau ara an naopan iyehki, um ahlap vai natmassimai iyehki, um imyiacitak va nauritai irai ikmara.

42 Is atidjin *ira ra* a Atua, um ude *ra*, mika eri alaigaheni ara va niji itai an nohatag; is idivaig eris aged an nitasvitai u ilpu profeta, *um ika*, “Ak nupu Isreel, akis ahlap vai nyak aijaua irai iji kurimatau eris atgei, im niji itai ahlap, irai mesese is forte an namasacen, ka o’o?”

43 akis idim apos neom atga o Molok aijaua, im lep inmoijeuv o Remfan atua unyimia, nalnuitai

iji eigki akis ago aijaua mika aki alaigaheni vaig: ekpu idim imyia-pan caua ainyak an nahaijin Babelon itac.”

44 Is amen ehele ilpu retpoiija an namasacen neom atga, nitai asuptecnaig *imi ra*, is idivaig is asaig aien, is ika ehele Moses aien, yi ago et idivaig nitai asjaaicnaig is ceetai aien.

45 Eris lep imyiapam *neom* iyehki a ilpu retpoiija eris epitpitac ara im Josua, an pece ineig eris ohuun a nup urai taka pece iji ehki, is ahlo *ra* a Atua an nuhup o ilpu retpoiija, um yetpan an naopan iyehki *an numoh* o Tevit;

46 is upene inlinmopoi Atua vai yin, is merit aien necetaivaig neom ahlap vai Atua o Jekob.

47 Ja is acta neom imi yin a Solomon.

48 Ja et eti amen aien et Esjilid aien irai eom ahlap er ago irai ikma atimi; et idivaig is asaig a naprofeta, *um ika*,

49 “Et ika a Ihova, Et dorona unyak nohatag, um itai atijai neduok iran nobohtan: inyi echamecha neom ineig akupu ago imi nyak aijaua? inyi lep echamecha inuarin ineig ekpu amen iran ainyak?”

50 kis idim ago niji itai asega iji eigki an nikmak ainyak.”

51 ¶ Ak ilpu atimi ipjin inlinmopomia, im ilpu atimi eti aperitome anlinmopomia im intikgamia, eka acaijaig Nesgan Upene aijaua irai iji adiat: eka *ago* nedo o ilpu retpomia aijaua:

52 tah ilpu profeta a di neigki eris eti atmas vai yin a ilpu retpomia? eris lep atgei *ra* sji ehki ara eris upyi asuptecnaig napam o Natimi Upene ara; aien aigki akis aniv yin aijaua um atgei yin:

53 akis leh intas alep aijaua, eris ati a ilpu agelo, jam eti imyiaiji.

54 ¶ Eris wat atahaijeg intas iji eigki ara, is edemda alupas inlin-

mopura ara, eris aces eijera ara vai yin.

55 Ja is amen alupas ehelen a Nesgan Upene, is easji pan aien an nohatag, um ecetai natimi alupas o Atua, im Iesu najivaig an matai Atua,

56 um ika, Ek idim almoi nohatag ainyak eh mun asalgei, im Inhal o natimi najivaig an matai Atua.

57 Eris ahlaig ijinies ara, um ucjipanes intikgara, um ehra teloh-telo pan iran,

58 um ahlo pan itac *yin* an nuarin-pece, um asji *yin* irai hat: eris atise napelumai ura a ilpu atimi asuptecnaig *vai yin* u neduei intakuras is ethi, nidan Saulo.

59 Eris asji Stifanus ara irai hat, is wat alaigaheni aien, um ika, Ak Iesu Natimarid, leh nesgak aiek.

60 Is atpuse aien, um ahlaig ijinies, *um ika*, Ak Natimarid, jim aru nedo has ineigki ura aiek. Is wat ucece intas o un, is umjegse aien.

NUARIN-TAS ALUPAS 8.

IS ika a Saulo et upene yi mas aien. An naopan iyehki is esjilid natmas vai nup an nakalasia Jerusalem; eris terinterim ara asega, um apan irai iji uari pece Jutaiim Samerya; eris amen ache a ilpu apostolo.

2 Eris imyiapan Stifanus a ilpu atimi upene, *um atelmoi yin*, um imyitaig alupas yin.

3 Ja is esjilid natmas o Saulo vai nup an nakalasia; is apan aien irai eom asega, um leucose ilpu atamaig im ilpu takata, um ikni ra anliin neom ipjin.

4 Va nedo ineigki eris apan irai *iji uari-pece* ara sji eigki eris terinterim ara, um asuptecnaig intas-upene.

5 IS apan a Filipus an nuarin-

-pece is ethi Samerya, um asuptecna Kristo ehele ra.

6 Eris wat atahaijeg natimi is ahinag um ecetai niji auritai ehka is ago a Filipus, eris ehra imyiaiji ara nitai iji eigki is asaig aien.

7 Eris ahlaig ijinies a ilpu agelo has, um atceijaig natimi is ahinag eris amen ira ra ara: eris lep cehcehe natimi is ahinag eris emehe ara va napalse, im ilpu atimi asvahu-teuc neduora.

8 Is esjilid nimyiacitak an nuarin-pece iyehki.

9 Ja is eteuc natimi is ethi, nidan Saimona, is ahraces aien itu acen an nuarin-pece iyehki, eris imyiali yin a nupu Samerya, is ika aien is atimi esjilid:

10 eris imyiimtacimtac yin ara asega, ilpu atimi alupas im tup atimi, um ika, Et emda esjilid a natimi ineigki vai Atua.

11 Eris imyiimtacimtac yin ara va nedo ahraces o un ineig, eris imyiali yin vaig ara itu acen.

12 Ja eris wat imyiisjis ninivaijeg intas asuptecnaig o Filipus ara, va niji itai upene an nelcau o Atua, im nidai Iesu Kristo, eris leh nabaptiso ira ra a ilpu atamaig im ilpu takata.

13 Is lep imyiisjis ninivaijeg a Saimona, um leh nabaptiso iran, um amen ehele Filipus, um imyiali, is wat almoi aien niji auritai ehka im niji auritai esjilid acen eris ago.

14 Eris wat atahaijeg a ilpu apostolo Jerusalem, nikavaig, eris leh intas o Atua a *nupu* Samerya, eris abraig pan ehele ra Pitrus im Joanes ara:

15 erus wat yetpan arau, erus alaigaheni arau vai ra, mika eri leh Nesgan Upene ara:

16 is eti fi asuol pam ehelen tah ira ra aien an naopan iyehki: eris leh nabaptiso ache ira ra ara an nidai Iesu Natimarid.

17 Erus atijai nikmarau ira ra arau, ja eris par leh Nesgan Upene ara.

18 Is wat almoi a Saimona, nika-vaig, erus wat atijai nikmarau ira atimi alwat apostolo erahki, eris leh Nesgan Upene ara, is im-yiapan nintan ehele rau aien,

19 um ika, Alupai nyak nemda ineigki aijaurau, mika, ek wit atijai nikmak ainyak iran tah, yi leh Nesgan Upene aien.

20 Ja is um ika ehelen a Pitrus, Uhpu auahas euc pan irai mune unyum, va nedo unyum, nikavaig, na mun aktaktai aiek mika an aua-nimtan nitai tup ahtai o Atua irai mune :

21 et ti nahaijin unyum im in-uarin unyum an nitai ineigki : et eti inivaijec inliinmopom aiek an nuhup o Atua :

22 etmu adumoiy inliinmopom aiek va nedo has unyum, um ugni Atua, kit uhpu eti aru iram va naktaktai u inliinmopom :

23 ek ato ainyak, nikavaig, et eteuc nitai acen anliinmopom aiek, et lep arore euc nedo has.

24 Is tas a Saimona, um ika, Arumu ugni Natimarid vai nyak aijaurau, va yi jim yetpam irak nitai iji eigki erau mun asaig vai nyak aijaurau.

25 Erus esege arau, um asuptec-naig intas o Natimarid, ja par lep adumoiy pan alaig Jerusalem, um asuptecnaig intas-upene irai iji uari-pece is ahinag o nupu Samerya.

26 IS tas a nagelo o Natimarid ehele Filipus, um ika, Atidai aiek, um apan an nuarin ineig et ahes nuritoga iran, an nefalaig et ahes Jerusalem um yetpan Cesa, et amas-acen.

27 Is um atidai aien, um apan : is ecet natimi alupas is ethi aien, nupu Idiopya, is aheca esjilid o Kantasi aien natimarid takata Idiopya, is aminjinaig inpadiaig asega o un aien ; is apan Jerusalem aien mika yi alaigaheni ;

28 is wat adumoiy pan aien, is

ateuc aien an nitai atga o un, um esvi *intas o* Aiseya naprofeta.

29 Is ika a Nesgan Upene ehele Filipus, Aiheucaihuc aiek, um uhum nitai atga naico.

30 Is athut pan ehelen a Filipus, um atahajeg yin nesvivaig *intas o* Aiseya naprofeta, um ika, Na ato aiek nitai ineig na esvi aiek, ka o'o?

31 Is um ika aien, Et ehka, et ti natimi par esege imtak. Is ika aien ehele Filipus yi aridjai aien um ateuc ehelen.

32 Is esvi intas ineigki aien, eris aged, *um ika*. "Eris imyiapan yin is idivaig sup par atgei yin ; is eti tas aien, is idivaig inhakli siip an nuhup u natimi eucsei nalau iran :

33 an naopan iyehki is wat upoupo nedo o un, eris atipagki yin vai intas alep *ura* : etpu asuptecnaig naopan o un a di? va nitai ineig, nikavaig, eris atgei yin an nobohtan."

34 Is tas a natimi alupas ehele Filipus, um ika, Asaig ehelek, is asan tas ineigki a naprofeta vai di? vai yin, ka vai intak atimi?

35 Is asalgei nipjineucsen a Filipus, um atupun an tas iyehki eris aged, um asuptecnai Iesu ehelen.

36 Erus atga arau an nefalaig um yetpan an wai is ethi : is um ika a natimi alupas, Almoi inwai ineigki aiek ; ek auri ainyak par eti leh nabaptiso irak?

37 Is um ika *ehelen* a Filipus, El et imyiisjis ninivaijec anliinmopom asega aiek, el et upene. Is tas aien, um ika, Ek imyiisjis ninivaijec *nitai ineig* ainyak, *nikavaig*, et Hal o Atua a Iesu Kristo.

38 Is ika aien yi aiji nitai atga *o un* : erus asuol an wai arau, Filipus im lep natimi alupas ; is baptiso iran aien.

39 Erus ahes an wai arau, ja is par leh Filipus a Nesgai Natimarid, is um tup eti ecet yin a natimi alupas : ja is atga o un aien an nefalaig, um imyiacitak.

40 Ja eris um lep ecet Filipus an nuarin-pece Asotus: is atga asuptecnaig intas-upene aien irai iji uari-pece asega, um yetpan Sisaria.

NUARIN-TAS ALUPAS 9.

IS esjilid natmas o Saulo vai ilpu atimi alaigaheni o Natimarid, is ika aien yi atgei ra; is apan aien ehele natimi esjilid an nahlap,

2 um ugni yin vai itasvitai imi ilpu atimi alupas *Jutaia, eris amen* Tamaskus ara, um ika, el et ecet tah aien *nagovaig* nedo ineigki, ilpu atamaig, ka ilpu takata, etpu arore ra aien, um imyiapan ra Jerusalem.

3 Is wat atga an *nefalaig* aien, wat ubutpotet pan Tamaskus, is idim ememina inlah an nohatag um arahed iran:

4 is eropse an nobohtan aien, um atahaijeg nohran tah, is ika ehelen, Ak Saulo, ak Saulo, na auri aiek par atmas vai nyak?

5 Is um ika aien, Aiek tah Natimarid a di aigko? Is ika a Natimarid, Ek Iesu ainyak, na atmas vai nyak aiek: *et* ehka vai euc natgaig pan itac vaig neduom irai idjai mopul.

6 Is um ucjucjucaij aien, um imti-taig, um ika, Ak Natimarid, nai merit aiek mika ki ago inhe ainyak? *Is um ika* ehelen a Natimarid, Atidai aiek, um apan an nuarin-pece ineig, ulpu asuptecnaig ehelum nitai ineig eris idim ika napu ago aiek.

7 Eris aiji a ilpu atimi ahced yin um eti liglig, eris atahaijeg nohran iyehki ara, jam eti ecet tah natimi.

8 Is um atidai a Saulo, um asalgei nesganimtan, jam eti alum atimi: eris atau an nikman ara, um imyiapan yin Tamaskus:

9 is eti fi alum itai aien an nadiat is eseij; is eti hag aien um eti umwig.

10 Is amen Tamaskus natimi alaigaheni is ethi, nidan Ananaias; is um ika ehelen a Natimarid an numjeg

ahnag o un, Ak Ananaias. Is ika aien, Ainyak ap aigki, ak Natimarid.

11 *Is um ika* ehelen a Natimarid, Atidai aiek um apan an nefalaig ineig er anvi nidan par ika, *Nefalaig* atoh, um ahilek *natimi et ethi* nidan Saulo, nupu Tarsus, an neom o Jutas: et idim alaigaheni aien.

12 (Is um umjeg ahnag aien, um ecet natimi et ethi, nidan Ananaias, napanvaig ehelen, um atijai nikman iran, mika yi lah nesganimtan aien.)

13 Is um ika a Ananaias, Ak Natimarid, kis atahaijeg ainyak intas o atimi is ahinag va natimi ineigki, im nedo has esjilid o un vai ilpu atimi upene unyum Jerusalem:

14 et mun lep apos pam intas alep o ilpu atimi ahlap esjilid aien, mika yi arore ra sji eigki asega aien igcaki era arohoan nidam ara.

15 Is um ika ehelen a Natimarid, Namu apan aiek: et ipjinitai ehtaig unyak aien, mika yi asuptecnaig nidak aien an nuhup o ilpu atimi aupat, im ilpu atimarid, im nupu Isreel:

16 ekpu asuptecnaig ehelen ainyak nohocred esjilid iji eig eris idim ika etpu leucse aien va nidak.

17 Is um apan a Ananaias, um han anliin neom, um atijai nikman iran, um ika, Ak etoak Saulo, et abrai nyak a Iesu Natimarid iyehki is ehchos pan ehelum aien an nefalaig an napam unyum, mika yi lah nesganimtan aiek, um leh alupas Nesgan Upene.

18 Is um auroauro um meijisse itai an nesganimtan is idivai isjua: is idim lah nesganimtan aien; is um atidai aien, um leh nabaptiso iran.

19 Is hag aien, um emda. Is amen a Saulo ira adiat is eti elpat ehele ilpu atimi alaigaheni Tamaskus.

20 Is auroauro aien um asuptecnai Kristo irai eom alaigaheni, um ika, et Hal o Atua aien.

21 Ja eris imyiali ara asega eris

atahaijeg *yin* ara, um ika, Idim aien aigki is auahas ilpu atimi arohoan nidan ineigki Jerusalem aien, is lep ham aien igcaki va nitai ineig mika yi arore ra, um imyiapan ra ehele ilpu atimi ahlap esjilid.

22 Ja is esjilid nemda o Saulo, is auud yapidai nupu Jutaia aien eris amen Tamaskus ara, is tas aien um ayapdicraig upene itai, um ika, et idim Kristo a natimi ineigki.

¶ 23 Is wat ti pan itac nadiat is ahinag, eris tas jipe a nupu Jutaia mika eri atgei *yin*:

24 ja is ato nedo ura a Saulo. Eris imyiiris *yin* ara an neucse nathatahau irai iji adiat im niji epeig, mika eri atgei *yin*.

25 Eris imyiapan *yin* an nepeig a ilpu atimi alaigaheni, um aiyi-hise *yin* an yipin nathatahau an nefehcat.

26 Is wat yetpan Jerusalem a Saulo, is ika aien yi apol pan irai ilpu atimi alaigaheni: ja eris im-titai *yin* ara asega, um eti asgeig iran, um ika, Et eti atimi alaigaheni aien.

27 Ja is leh *yin* a Barnabas, um imyiapan *yin* ehele ilpu apostolo, um asuptecnaig ehele ra, mika is idim ehcohos ehelen a Natimarid an nefalaig, um tas ehelen: is lep tas emda aien Tamaskus an nidai Iesu:

28 is amen aien ehele ra Jerusalem, um uhum jipe:

29 is tas emda an nidai Iesu Natimarid aien, um asuptecnaig um imyiisjis ehele nupu Jutaia iji eig eris tas an tas Crisi ara: ja eris ahilek *yin* ara mika eri atgei *yin*.

30 Eris wat ato a ilpu etoan, eris imyiapan *yin* Sisaria ara, um abraig pan *yin* Tarsus.

31 Eris adejai ra a nup an nakalasia an *pece* Jutaia asega, im Calili, im Samerya, eris lep aridjai ara; eris eklim tup amen ara um eccen vai Natimarid, um imyiacitak vai Nesgan Upene; eris eldati pan ara um ahinag.

32 IS apan a Pitrus irai iji *uari-pece* asega, ja par lep han ehele ilpu atimi upene eris amen Litta ara.

33 Is ecet natimi is ethi aien eahki, nidan Inyas, is asjeuc aien an tinan irai mesese is eet, is emehe aien va napalse.

34 Is um ika ehelen a Pitrus, Ak Inyas, et ago celicehe euc a Iesu Kristo; atidai aiek, um ati nitai ahled unyum. Is auroauro aien um atidai.

35 Eris ecet *yin* ara asega eris amen Litta ara im Seron, um ahidaig pan *ra* ehele Natimarid.

36 Is amen Joppa intakata alaig-aheni is ethi, nidan Tabida, nesgan tas ineigki Torkas: is ago niji auritai upene is ahinag aien im nedo aiheuc *va atimi*.

37 Is emehe aien an naopan iyehki, um mas: eris yiri *yin* ara, um ati *yin* an nuarin-neom ijinies.

38 Is ubutpotet pan Litta Joppa, eris wat atahaijeg a ilpu atimi alaig-aheni, nikavaig, is amen eahki a Pitrus, eris abraig pan ehelen natimi is ero ara um ugni *yin*, mika yi auroauro aien um apan ehele ra.

39 Is um atidai a Pitrus, um ahced rau. Is wat yetpan aien, eris imyiapan *yin* ara an nuarin-neom ijinies: eris aiji a ilpu takata asega eris emesmas a ilpu atamnyura, um imyitaig *yin*, eris ehvaig ehelen ara inlepei iji eig im lep napelumai is ago a Torkas an namen o un ehele ra.

40 Is abraig pok ijo ra asega a Pitrus, um atpuse, um alaigaheni; is ahidaig pan *yin* u nohun aien, um ika, Ak Tabida, atidai aiek. Is asalgei nesganimitan aien: is wat ecet Pitrus aien, um atidai.

41 Is arapse va nikman aien, um imyiatidai *yin*; is ahlaig aien vai ilpu atimi upene im ilpu takata eris emesmas a ilpu atamnyura, um ati *yin ehele ra*, is ma umoh aien.

42 Eris ato a *nupu* Joppa asega;

eris asgeig irai Natimarid natimi is ahinag.

43 Is amen Joppa aien ira adiat is ahinag ehele Saimona natimi ago arasi kurimatau.

NUARIN-TAS ALUPAS 10.

IS amen natimi is ethi Sisaria, nidan Kornilyus, is atimi alupas o ilpu eucsupo iji eig aien eris ika vai ra Ilpu eucsupo Itale;

2 is atimi upene aien, um eccen vai Atua, im lep ra asega an nimm o un, is ahinag nedo aiheuc o un aien vai ilpu ihki atimi, um ugni Atua irai iji adiat.

3 Is wat jupki an nadiat is ethi, is idim ecet nagelo o Atua aien nehcohos pan vaig ehelen, um ika ehelen, Ak Kornilyus.

4 Is wat easji pan ehelen aien, um imtitai yin, um ika, Inhe, ak Natimi alupas? Is um ika ehelen aien, Et mun aridjai nalaigaheni unyun, im nedo aiheuc unyun vai ilpu ihki atimi, an nuhup u Atua, nitai imyiehva euc:

5 namu abra atimi aiek mika eri apan Joppa ara, um imyiacaij natimi et ethi eahki, nidan Saimona, tak idan Pitrus:

6 et amen aien ehelen et ethi Saimona, natimi ago arasi kurimatau, et eteuc neom o un ubutpotet u injop: etpu asuptecnaig ehelum aien nitai ineig eris idim ika napu ago aiek.

7 Is wat atga o un a nagelo iyehki is tas aien ehele Kornilyus, is ahlaig aien vai naheca is ero o un, im lep neucsupo upene is ethi ira ra eris aheca o un ara irai iji adiat;

8 is asuptecnaig ehele ehtaij aien nitai iji eigki asega, um abrai ehtaij mika ehtiji apan Joppa ahtaij.

9 ¶ Is wat lahlah an tak apnyin, ehtijis wat apan ahtaij alaig Joppa, um yetpan ubutpotet u nuarin-pece

iyehki, is aridjai an neom ijinies a Pitrus, um alaigaheni an nadiat-adiat:

10 is um ehtelee yin aien, um ahvig nitai caig: ja eris wat ago nitai caig ara, is ahuumtidec aien,

11 um ecetai nolhatag is asalgei, is asuolse ehelen tah nitai is idivaig nap alupas, eris leh pam nesvipas iran is for um areore, um atise an nobohtan:

12 is amen iran niji obotpot itai asega an nobohtan et for neduon, im niji itai aleg, im niji itai ata has, im inman.

13 Is atahaijeg nohran tah aien, is ika, Atidai, ak Pitrus, um atgei, um hegaig.

14 Ja is um ika a Pitrus, O'o, ak Natimarid; kis idim eti caig tah nitai ineig ainyak et has ka itaup irai iji adiat.

15 Is ehcero tas nohran iyehki ehelen, um ika, Jim ika aiek et has nitai ineig et mun ago adicinadicin a Atua.

16 Eris ehcesej ago nedo ineigki: ja par lep aiyihijai nitai iyehki an nolhatag.

17 Is wat aktaktai a Pitrus nesgan nitai ineig is ahuumtidec iran aien, ehtijis ahilek neom o Saimona ahtaij atimi erahki is abrai ehtaij a Kornilyus, um aiji an neucse nathatahau,

18 um ahodaig, um ika, Et amen igcaki a Saimona, tak idan Pitrus, ka o'o?

19 ¶ Is wat aktaktai a Pitrus nitai ineig is ahuumtidec iran aien, is um ika ehelen a Nesgan Upene, Ehtaij ahilek euc natimi et esej:

20 va nitai ineig namu atidai aiek, um asuol, um ahced elitaij, um jim imyisjis: ek mun abrai ehtaij ainyak.

21 Is asuol a Pitrus, um apan ehele natimi erahki is abrai ehtaij a Kornilyus, um ika, Ainyak ap aigki, ehtaij ahilek nyak aijautaij: ehtaij ham aijautaij vanhe?

22 Ehtijis um ika alitaij, Is tas a Atua ehele Kornilyus natimi alupas o ilpu eucsupo, irai nagelo upene o un, um ika yi imyiacaij euc, mika an apan aiek an neom o un, mika yi atahaijeg intas unyum aien; et atimi upene aien, um eccen vai Atua, era asan tas upene vai yin a nupu Jutaia asega.

23 Is ika ehele ehtaij aien, Apam aijautaij an nimnim, um amen. Is wat lahlah an tak apnyin, is apan a Pitrus im lep ehtaij, eris lep ahced yin nahaiji ilpu etoan Joppa.

24 Is wat lep lahlah an tak apnyin, eris yetpan Sisaria ara. Is asjapicnaig ilpu atimi ehpan iran a Kornilyus im ilpu apa o un, um aitgai ra.

25 Is wat yetpan an *nimnim* a Pitrus, is aubillid pan yin a Kornilyus, um atpuse u neduon, um alaighaheni *vai yin*.

26 Ja is um imyiatidai yin a Pitrus, um ika, Atidaijai aiek; ek idim atimi ainyak.

27 Is atga tas ehelen aien, um apan anliin *neom*, um alum atimi is ahinag eris asjapicnaig ara.

28 Is um ika ehele ra aien, Eka ato aijaua, nikavaig, et itaup vai nupu Jutaia napanvaig ehele nup urai taka pece, um amen ehele ra; ja et mun asuptecnaig ehelek a Atua, um ika, Jim ika vaig tah natimi, et takitai aien um has:—

29 va nitai ineigki ek mun ham *ehelema* ainyak an nimyiacaij nyak vaig, um eti imyisjis itai: ek ahodai *caua* ainyak mika, eka ahilek nyak aijaua vanhe?

30 Is um ika a Kornilyus, Kis ti pan itac nadiat is for ainyak um atwakam um imyihum pam an nuarin-nadiat ineig; kis lep alaighaheni ainyak anliin neom unyak an jupki, ja is aiji an nuhup unyak natimi is ethi is ememina napel-umai iran,

31 um ika, Ak Kornilyus, eh mun atahaijeg nalaighaheni unyum,

et lep imyiehva a Atua nedo aiheuc unyum vai ilpu ihki atimi:

32 namu abra *atimi* aiek mika eri apan Joppa ara, um imyiacaij Saimona, tak idan Pitrus; et amen aien anliin neom o Saimona natimi ago arasi kurimatau ubutpotet u injop: et wit ham aien, etpu tas ehelum aien.

33 Kis auroauro ainyak um abra *atimi* mika eri apan ehelum; et upene nedo ineigki na ago aiek par ham. Ecra mun asjapicnaig pam igcaki aijama asega an nuhup u Atua, mika ecri atahaijeg niji itai asega is asaig ehelum a Atua.

34 ¶ Is tas a Pitrus, um ika, Ek idim ato ainyak, nikavaig, et tup ethi ache inliinmopoi Atua vai nup urai iji pece:

35 ja et upene inliinmopon aien vai natimi ineig et eccen vai yin aien, um ago nedo upene, irai iji pece asega.

36 Intas ineig is imyapan ehele nupu Isreel a Atua, nasuptecnaigvaig neigpa vai Iesu Kristo: (et Atimarid aien ira atimi asega:)

37 eka ato intas ineigki aijaua, an ti pan itac vaig nabaptiso ineig is asuptecnaig a Joanes, eris atupun um asuptecnaig Calili, um yetpan an *pece* Jutaia asega;

38 nikavaig, is ati Iesu nup an Nasared a Atua irai Nesgan Upene im nemda o un: is atga jipe aien um ago nedo upene, um ago cehcehe ra asega eris ohocred ara vai Tiapolo; is amen ehelen a Atua.

39 Ecra ilpu atimi asuptecnaig nitai iji eigki asega aijama is ago aien an pece Jutaia, im lep Jerusalem; aien aigki eris aijcaijai yin an nauincei ara, um atgei yin:

40 ja is wat ti pan itac nadiat is esej, is imyinusjai yin a Atua, um ehvaig upene yin;

41 jam eti *ehvai yin* ehele atimi asega, ehelema ache, is upyi ehtai cama a Atua mika ecri asuptecnaig

yin aijama, is wat nusjai aien vai inmas o *un*, ecris ehrihag ehelen aijama um unwig.

42 Is abrai cama aien mika ecri efehtas ehele atimi aijama, um asuptecnai *yin*, um ika, Aien aigki is ati *yin* a Atua mika yi asuptecnaig nintan imi ilpu atimi unumoh aien, im lep ra eris emesmas ara.

43 Eris tas vai *yin* a ilpu profeta asega, um ika, Ara asega era asgeig iran ara, eri eti aru nedo has *ura* va nidan.

44 ¶ Is wat asan tas iji eigki a Pitrus, is asuolse a Nesgan Upene ira ra asega eris atahaijeg intas iyehki ara.

45 Eris imyiali natimi iji ehki irai ilpu atimi aperitome eris imyiisjis ninivaijeg ara, ara asega eris ahced Pitrus ara, va nitai ineigki, nika-vaig, eris lep atladwi Nesgan Upene irai nup urai taka pece, nitai tup ahtai ineigki.

46 Eris atahaijeg ra ara intasvaig irai tas is eche, um imyiahpas Atua. Is um ika a Pitrus,

47 Et ehka vaig tah natimi natapanes inwai vaig, um ika, jim baptiso irai ra sji eigki era mun leh Nesgan Upene ara, um idivai caija.

48 Is um ika aien eri baptiso ira ra an nidai Natimarid. Eris ugni *yin* ara mika yi amen *ehele ra* aien ira adiat inyi eti elpat.

NUARIN-TAS ALUPAS 11.

E RIS atahaijeg a ilpu apostolo im ilpu etoara Jutaia, nikavaig, eris leh intas o Atua a nup urai taka pece.

2 Is wat apan Jerusalem a Pitrus, eris imyiisjis itai iran a ilpu atimi aperitome,

3 um ika, As apan aiek ehele atimi eti aperitome, um hag ehele ra.

4 Ja is atupun a Pitrus um asuptecnaig athiathi ehele ra, um ika,

5 Kis amen ainyak an nuarin-pece Joppa um alaigheni: kis ahuumtidec ainyak an nalmu itai, um ecetai tah nitai is idivaig nap alupas, is ahes an nohatag um asuol, eris leh pam nesvipas iran is for um arore; is yetpam ehelek:

6 kis anani nesganintak iran ainyak, um aktaktai, um ecetai niji itai an noboltan et for neduon, im niji itai aleg, im niji itai ata has, im inman:

7 kis ahgei nohran tah ainyak is ika ehelek, Atidai aiek, ak Pitrus, um atgei, um hegaig.

8 Jai kis ika ainyak, O'o, ak Natimarid: kis idim eti cespan tah nitai ineig ainyak et has ka itaup irai iji adiat.

9 Jai kis lep aketo ainyak um ahgei nohran iyehki is ahes an nohatag, *is ika*, Jim ika aiek et has nitai ineig et mun ago adicinadin a Atua.

10 Eris ehceseij ago nedo ineigki: ja par lep aiyihijai asega an nohatag.

11 An naopan iyehki ehtijis idim yetpan natimi is eseij *ehelek* an neom iyehki kis amen iran ainyak, eris abrai ehtaij Sisaria mika ehtiji apan ehelek.

12 Is ika ehelek a Nesgan Upene ki ahced ehtaij ainyak, um jim imyiisjis. Eris lep ahced nyak a ilpu etoak et siks iji eigki; ecris apan aijama anliin neom o natimi iyehki:

13 is asuptecnaig ehelema aien, mika is ecet nagelo anliin neom o un, is aiji aien, um ika ehelen, Namu abra atimi aiek mika eri apan Joppa ara, um imyiacaij Saimona, tak idan Pitrus;

14 etpu asuptecnaig ehelum aien intas ineig uhpu imyiatamaig euc vaig, im lep ra asega an ninnim unyum.

15 Kis wat atupun ainyak um tas,

is asuol a Nesgan Upene ira ra, is idivaig iyehki iraija itu acen.

16 Kis lep imyiehva ainyak intas o Natimarid is upyi asaig aien, *um ika*, "Is idim baptiso *ira atimi* a Joanes an wai; ja akupu leh nabaptiso o Nesgan Upene iramia aijaua."

17 Et idim ucco, is alupai ra nitai tup ahtai ineig a Atua *is upyi hup aien um alupai* caija, ilpu atimi asgeig irai Iesu Kristo Natimarid, kis idivai di ainyak par imyisjis ehele Atua?

18 Eris wat atahaijeg nitai iji eigki ara, is ti intas ura, eris imyiahpas Atua ara, um ika, Et mun lep alupai nup urai taka pece nitai ineigki a Atua, mika eri adumoij anliinmopura ara, va erupu leh nitai umoh iran.

19 IS wat eteuc nohocred iyehki is atupun an *natgei* Stifanus, eris apan Finaisi im Saiprus im Anteok ara sji ehki eris terimterim ara, um asuptecnaig intas ehele nupu Jutaia ache.

20 Eris upu Saiprus im nupu Sairini nahaiji ra, eris wat apan Anteok ara, eris tas ehele nupu Jutaia iji eig eris tas an tas Crisi ara, um asuptecnai Iesu Natimarid *ehele ra*.

21 Is amen-ehele ra nikmai Natimarid: eris imyisjis ninivaijec natimi is ahinag, um adumoij pan ehele Natimarid.

22 ¶ Eris atahaijeg va nitai iji eigki a nup an nakalasia Jerusalem: eris abrai Barnabas ara, mika yi apan Anteok aien.

23 Is wat yetpan aien, um ecetai naiheuc o Atua *va atimi*, is imyiacitak aien, um ated ra asega mika eri apol ipjin irai Atua ara anliinmopura.

24 Is atimi upene aien, is amen alupas ehelen a Nesgan Upene, *is esjilid* nimyisjis ninivaijec o un: eris ikni irai Natimarid natimi is ahinag.

25 Is lep atga o un a Barnabas um apan Tarsus, mika yi ahilek Saulo:

26 is wat ecet yin aien, is imyia-pan yin Anteok aien. Erus amen arau ehele nup an nakalasia irai yuir is ethi, um esege imi atimi is ahinag. Eris upyi hup um anvi nidai ilpu atimi alaigaheni par ika Ilpu atimi o Kristo Anteok.

27 ¶ An naopan iyehki eris ahes Jerusalem a ilpu profeta, um apan Anteok.

28 Is atidai natimi is ethi ira ra, nidan Acabus, um tas irai Nesgan Upene, um ika, etpu eteuc numlaig has irai iji pece asega: ja is mun *atimarid* a Klatyus Sisar, is par eteuc.

29 Eris tastas jipe a ilpu atimi alaigaheni, um ika eri aiheuc vai ilpu etoara Jerusalem is ase asega ira ra:

30 eris ago ara, um ikni ehele Barnabas im Saulo, mika eru ahtai imi ilpu atimi tas alep arau.

NUARIN-TAS ALUPAS 12.

AN naopan iyehki is atgeig nikman a Herot, um atinas vai nahaiji nup an nakalasia.

2 Is atgei Jakobus aien etoai Joanes an nauitoga.

3 Is wat ato aien, nikavaig, eris imyiacitak a nupu Jutaia *va nedo ineigki o un*, is-lep ika aien yi arop irai Pitrus. (An naopan iyehki *eris asjapienaig* u nareto is ti leven iran.)

4 Is arop iran aien, um atapanes iran anliin neom ipjin, um ika ehele ilpu eucsupo is sikstiin eri aminjinai yin; is aktaktai aien mika, et pit ti pan itac napaska, etpu atcejai yin imi atimi.

5 Eris aminjinai Pitrus anliin neom ipjin; ja eris ugni emda Atua vai yin a nup an nakalasia.

6 Is wat ika a Herot yi imyialau ijo yin, an nepeig iyehki is um um-

jeg a Pitrus juju an niblai neucsupo is ero, eris arore yin an natauhat is ero: erus aiji an neucse neom ahwat atimi aminjinaig neom ipjin.

7 Is idim han ehelen a nagelo o Natimarid, is um lah aijaig inliin neom ipjin: is atcei pan nijihgai Pitrus aien, um imyiatidai yin, um ika, Auroauro aiek um atidai. Is um ispun etjose natauhat an nikman.

8 Is um ika ehelen a nagelo, Aorairairai euc aiek, um ahtit ipjin incedpun eduom: is um ago aien. Is um ika ehelen aien, Aso euc aiek an napelumai unyum, um apitac nyak.

9 Is um alau ijo aien, um apitac yin; is eti ato aien, nikavaig, is ini-vaijec nitai ineig is ago a nagelo; is aktaktai aien mika is umjeg ahnag aien.

10 Erus ahtaregdei natimi aminjinaig neucse neom uhup arau, im lep natimi aminjinaig neucse neom juju, um yetpan u intapanes aiurn pan itac an nuarin-pece; is ispun asalgei vai rau: erus apan itac arau um atga an nefalaig is ethi; is ude yin a nagelo, um atga o un.

11 Is wat eteuc lele Pitrus, is ika aien, Ek idim ato ainyak, nikavaig, et mun abrai nagelo o un a Natimarid mika yi imyiatamaig nyak va nikmai Herot, im lep innerit asega o nupu Jutaia.

12 Is wat aktaktai aien, is apan aien an neom o Mere risi Joanes, tak idan Markus; eris asjapicnaig eahki natimi is ahinag, um alaigheni.

13 Is etcetcei intapanes an neucse nathatahau a Pitrus, is apan a nath-aig is ethi, nidan Rota, par atahajeg.

14 Is wat ato nohrai Pitrus aien, um eti asalgei intapanes va ninyiacitak o un, jam athut pan anliin neom, um asuptecnaig, *um ika*, Et aiji a Pitrus an neucse nathatahau.

15 Eris um ika ehelen ara, Na ahnag aiek. Ja is um imyiisjis aien, *um ika*, Et idim inivaijec. Eris ika ara, Nagelo o un naico.

16 Is amen a Pitrus um etcetcei: eris wat asalgei *intapanes* ara, um ecet yin, um imyiali.

17 Ja is ahpoijaiji ra aien, mika eri jim tas ara, is asuptecnaig ehele ra aien nedo o Natimarid vai yin, nikavaig, is imyialau ijo yin aien anliin neom ipjin: is ika aien, Akumu asuptecnaig nitai iji eigki aijaua ehele Jakobus, im ilpu etoak. Is ahes eahki aien, um apan an taka uarin.

18 ¶ Is wat lahlah an tak apnyin, is etelito inliinmopoi ilpu eucsupo, um ika, Pitrus yek eda?

19 Is ahilek yin a Herot, jam eti ecet *yin*, is ahodaig emda ilpu atimi aminjinaig neom ipjin aien, um tas alep *vai ra*, mika eri atgei ra. Is ahes Jutaia aien, um apan Sisaria, um amen *eahki*.

20 IS edemda alupas a Herot vai nupu Tairus im nupu Saiton: ja eris ehra apan ehelen ara, um ahras; ja eris upyi hup ara um ika ehele Blastus, naheca esjilid o natimarid, yi atau imi ra aien; va nitai ineigki, nikavaig, eris apan ache ara an pece o Natimarid pah leli nitai caig incara.

21 An nadiat ineig eris ati, is aso yin a Herot an napelumai esjilid, um ateuc a dorona o un, um efehtas ehele ra.

22 Is ates nahlaig ijinies o atimi, *um ika*, Nohrai atua *ineigki*, et eti *ohra* atimi.

23 Is auroauro um auud yin a nagelo o Natimarid, va nedo o un, nikavaig, is eti imyiahpas Atua aien: is isjis nija iran aien, is um mas aien.

24 JA is um edel intas o Atua um apaahni.

25 Erus wat ago ehni nauritai *urau* a Barnabas im Saulo, erus lep ahes Jerusalem arau um adumoij pan *Anteok*, is ahced rau a Joanes, tak idan Markus.

NUARIN-TAS ALUPAS 13.

Eris amen an nakalasia Anteok hal ilpu profeta, im ilpu atimi esege; Barnabas, im Simeon, tak idan Naijer, im Luseus nupu Sairini, im Maneen, is eredo aien im Herot natimi alupas an pece, im lep Saulo.

2 Eris wat alaigaheni vai Natimarid ara um atwakam, is um ika a Nesgan Upene, Akumu idim ati imi nyak Barnabas im Saulo aijaua, va nauritai ineig kis ati rau vaig ainyak.

3 Eris atwakam ara um alaigaheni, ja par atijai nikmara ira rau, um abraig pan rau.

4 ¶ Is wat abraig pan rau a Nesgan Upene, erus apan Selusea arau: erus lep ahes eahki arau um atau an nelcau, um apan alaig Saiprus.

5 Erus wat amen Salamis arau, erus asupteanaig intas o Atua arau irai eom alaigaheni o nupu Jutaia: is aheca urau a Joanes.

6 Erus ahced inpece arau um yetpan Pefos, um ecet natimi ahraces is ethi, is aprofeta efaifa aien, is upu Jutaia aien, nidan Barjosua:

7 is amen aien ehele Serjeus Paulus, natimi alupas an pece, im natimi arapakau; is imyiacaig Barnabas im Saulo aien, is merit aien natahaijegvaig intas o Atua.

8 Ja is imyiisjis itai ira rau a Elimas, (nesgan tas an nidan ineigki, natimi ahraces,) is merit aien mika yi imyiadumoi natimi alupas iyehki u nalaigaheni.

9 Ja is amen alupas a Nesgan Upene ehele Saulo, tak idan Paulo, is anani nesganintan aien iran,

10 um ika, Ak at eigki, et esjilid nahcil unyum, im nefai fa unyum, nai hal o Tiapolo aiek, na esjum aiek va nedo atoh asega, na auri aiek par eti atumop um edwedwai nedo atoh o Natimarid?

11 et mun idim amen iram nikmai Natimarid, etpu aupat nesganintam

aiek, napu eti ecetai nagesega aiek an tak aopan. Is um auroauro um arupoig nesganintan um aupat; is atga ahilek atimi aien mika eri atau an nikman.

12 Is wat almoi nitai ineigki a natimi alupas, is imyiisjis ninivaijeg aien, um imyiali nesege o Natimarid.

13 Is wat atceija nelcau Pefos a Paulo im ilpu atimi ahced yin, um apan Perca an pece Pamfilya, is epujai ra eahki a Joanes, um lep adumoi pan Jerusalem.

14 ¶ Eris wat ahes Perca ara, um apan Anteok an pece Pisitya, um apan anliin neom alaigaheni an nadiat atumop, um ateucose.

15 Eris wat esvi intas alep ara im intas o ilpu profeta, eris um ika elele ra a ilpu atimi alupas an neom alaigaheni, Ak ilpu etoama, el et amen ehelemia tah intas ated atimi, akumu asaig aijaua.

16 Is um atidai a Paulo, um ahpoijai ra, um ika,

Ak nupu Isreel, im ilpu atimi eccen vai Atua, akumu atahaijeg aijaua.

17 Is ehtai ilpu retpoi ja a Atua o nupu Isreel iji eigki, um imyiatidai ra an namen ura an pece Ijpt um tak atimi, is lep iknipagki ra aien eahki an nikman emda.

18 Is eti aru nedo has ura aien an namasacen is idivaig inmesese is forte.

19 Is wat auahas nup urai uari pece is seven aien an pece Kenan, ja par atiakoai umara imi ra irai itai asjaaienaig.

20 Is wat ti pan itac nitai iji eigki, is ikni ilpu atimi tas alep aien imi ra is idivaig inmesese is for huntret im fiste, um yetpan irai Samuel naprofeta.

21 Eris apitac ara um ugni natimarid imi ra: is ati Saulo inhal o Kis imi ra a Atua, irai mesese is forte, is mapoi Benjamin aien.

22 Is lep atipagki yin aien, um ati Tevit mika yi atimarid imi ra aien;

is tas vai yin aien, um ika, “Ek mun ecet Tevit ainyak inbal o Jese, et idivaig inliinmopok inliinmopon aien, etpu imyiaiji intas asega unyak aien.”

23 Is imyiatidai Iesu imi nupu Isreel a Atua mika yi Atimi imyiata-maig *ra*, mapoi natimi ineigki, is idivaig intas upyi asaig *o un* :

24 is upyi uhup a Joanes, um asuptecnaig nabaptiso va nadumoijsaig o atimi anliinmopura imi nupu Isreel asega, ja is par ham aien.

25 Is wat ago nauritai o un a Joanes, is ika aien, Eka ika aijaua, ainyak di aigki? ek eti *atimi iyehki* ainyak, ja etpu idim ham tah inyi epitpitac irak aien, ek eti upene ainyak par ahiyi incedpun eduon.”

26 Ak ilpu etoak, ilpu mapoi Ebrahim, im lep aijaua eka eccen vai Atua aijaua, er alupai caua intas va nitai umoh iran ineigki.

27 Ara era amen Jerusalem ara, im lep ilpu atimi alupas ura, eris eti ato yin ara, im intas o ilpu profeta er esvi irai iji adiat atumop asega; va nitai ineigki eris ehneijid *intas vai yin* ara an tas alep ura *vai inmas o un*.

28 Eris eti ecetai tah nitai ineig *ehelen* ara eri atgei *yin* vaig, ja eris ugni Paillet ara mika yi atgei yin aien.

29 Eris wat ago ehni nitai iji eigki asega ara eris aged vai yin, eris atise *yin* ara an nauincal, um ati *yin* an mun nij.

30 Ja is imyinusjai yin a Atua vai inmas *o un*.

31 erisecet yin an nadiat is ahinag a ilpu atimi iji ehki eris ahes Calili ara, um ahced yin um yetpan Jerusalem; era asuptecnaig yin ara ehele nupu *Isreel*.

32 Ecra lep asuptecnaig ehelema aijama intas-upene ineig eris upyi asaig ehele ilpu retpoija,

33 is mun ehneijid a Atua eheleija ilpu mapora, is wat lep imyinusjai Iesu aien; is idivaig eris aged an

Nohranitai tu, *um ika*, “Nai Hal unyak aiek, ek mun apos euc ainyak an nadiat ineigki.”

34 Is lep imyinusjai yin aien vai inmas *o un*, um ika, inyi idim eti muttit aien, is idim ucce intas o un, nikavaig, “Ekpu alupai caua ainyak niji itai upene inivajec o Tevit.”

35 Is lep ika aien an *Nohranitai* is eche, “Anyi ti atceijaig Natimi Upene unyum aiek mika yi muttit.”

36 Is wat imyiaiji intas o Atua a Tevit, um ago ehni nauritai o un ira atimi an naopan iyehki, is umjegse aien; eris ati yin ehele ilpu retpon, is um muttit aien :

37 ja aien, is imyinusjai yin a Atua, is eti muttit aien.

38 ¶ Ak ilpu etoak, akumu ato aijaua mika er asuptecnaig ehelema, nikavaig, natimi ineigki uhmu eti aru nedo has vai yin :

39 ara asega era imyiisjis ninivajec ara, eris ika et atoh nedo ura vai yin, va nitai iji eigki asega is ehka vai intas alep o Moses nikavaig et atoh nedo unyimia.

40 Va nitai ineigki, akumu aminjinai caua aijaua va yi jim yetpan iramia nitai ineigki eris asaig a ilpu profeta, *um ika*;

41 “Ak ilpu atimi imyipalea, akumu almoi aijaua, um imyiali, um atpuh : ek ago nauritai ainyak an naopan unyimia, ja et wit asuptecnaig nauritai *unyak* ehelema tah natimi, akupu eti imyiisjis ninivajec vaig aijaua.”

42 Eris wat ahes anliin neom alaigheni a nupu Jutaia um alau ijo, eris ugnirau a nup uran pece iyehki mika eru lep asuptecnaig ehele ra intas iji eigki an nadiat atumop yiek.

43 Eris wat terinterim natimi, eris apitac Paulo im Barnabas a nupu Jutaia is ahinag, im ilpu atimi upene leh nalaigheni o nupu Jutaia : erus tas ehele ra arau, um ated ra mika eri apol an naiheuc o Atua ara.

44 ¶ Is wat yetpan an nadiat atu-

mop iyehki, eris asjapicnaig is idivaig natimi asega an nuarin-pece, mika eri atahajjeg intas o Atua.

45 Eris wat almoi natimi is ahinag a nupu Jutaia, eris atavaitap alupas ara, um tas has va nitai iji eigki is asaig a Paulo, um imyiisjis itai, um asan tas has esjilid.

46 Ja erus emda a Paulo im Barnabas, um ika, Eris idim ika eri upyi hup um asuptecnaig intas o Atua ehelema: ja akis esjum vaig aijaua, um ika is eti upene vai caua nitai umoh iran ineig inyi ti lep ti, va nitai ineigki ecrau ahidaig pan cumrau aijumrau ehele nup urai taka pece:

47 is tas alep ehelema a Natimarid, *um ika*, “Kis ati euc ainyak mika an nitai lah imi nup urai iji pece, um lep itai imyiatamaig atimi um yetpan u intid an nobohtan.”

48 Eris wat atahajjeg *intas ineigki* a nup uran pece iyehki, eris imyiacitak ara, um imyiahpas intas o Natimarid: eris imyiisjis ninivaijec ara asega, eris anacanac ira ra mika eri leh nitai umoh iran ineig inyi ti lep ti.

49 Eris asuptecnaig intas o Natimarid an pece iyehki asega.

50 Ja eris auahas inliinmopoi ilpu atimi alupas an nuarin-pece a nupu Jutaia, im lep inliinmopoi ilpu takata esga atimi eris leh nalaigaheni o nupu Jutaia ara, um ika eri edemda vai Paulo im Barnabas, eris ahlo rau ara an pece ura.

51 Erus ucjucjaig nobohtan irai eduorau arau vai ra, um apan Aikoneum.

52 Ja is amen alupas ehele ilpu atimi alaigaheni a Nesgan Upene; eris imyiacitak ara.

NUARIN-TAS ALUPAS 14.

E *ERUS* wat amen Aikoneum arau, erus ehrapan arau anliin neom alaigaheni o nupu Jutaia, um tas; eris imyiisjis ninivaijec a nupu Jutaia

is ahinag im nupu Crisi vai intas urau.

2 Ja eris imyiho nup uran pece iyehki nahcil a nupu Jutaia iji ehki, eris imyiisjis nahcil ara, um auahas inliinmopura vai ohwat etoiija eraigki.

3 Ja erus amen arau is itu ira rau, um tas emda vai Natimarid, erus wat asuptecnaig intas aiheuc o un arau, is atau imi rau aien um alupai *rau nemda o un* mika eru ago niji auritai ehka arau im niji auritai imyiali.

4 Ja is acheiachai jipe inliinmopoi atimi is ahinag an nuarin-pece: eris apol irai nupu Jutaia nahaiji ra, ja eris lep *apol* irai ohwat apostolo erahki nahaiji ra.

5 Eris telohtelo pan ira *rau* a nupu *Crisi* im lep nupu Jutaia, im ilpu atimi alupas ura, mika eri abli *rau*, um asji rau irai hat,

6 erus ato arau, um aha pan Listra im Terbe inuari-pece i Likaonya, in lep irai iji uari-pece marahed mih-tag:

7 um asuptecnaig intas-upene eahki.

8 Is amen Listra natimi is ethi is auatialidi neduon aien, is idauidau neduon aien an napos yin vaig, is idim eti atga aien um uhup pan naopan iyehki;

9 is atahajjeg intas o Paulo aien: is anani nimtan iran *a Paulo*, um ato, nikavaig, is imyiisjis ninivaijec aien va uhpu ago cehcehe yin;

10 is efehtas aien, *um ika*, Atidai aiek um aiji. Is efarectidai aien, um atga.

11 Eris wat almoi nedo ineigki atimi is ago a Paulo, eris efehtas ara, um ika an tas Likaonya, Era mun asuol pam eheleija a ilpu atmas, um idiva atimi.

12 Eris ika ara vai Barnabas, Jupiter naico, um *ika* vai Paulo, Merkureus naico; va nitai ineigki, nikavaig, is esjilid aien an tas.

13 Is imyiapan kurimatau im in-tisiaicai u neuse nathatahau a nati-

mi alayi Jupiter, is eteuc *neom itaup o un* ubutpotet u nuarin-pece ura, is ika aien im lep natimi, eri ahlap *vai rau*.

14 Erus wat ato ahwat apostolo Barnabas im Paulo, erus ahpati napelumai urau arau, um athut pan ehele atimi, um ahlaig ijinies,

15 um ika, Ak ilpu atimi alupas, eka auri aijaua par ago nedo ineigki? ecray idim atimi aijumrau, um idi-vai caua; ecray asuptecnaig intas-upene ehelemia aijumrau, mika aki ude nedo ahcil ineigki aijaua, um ahidaig pan caua ehele Atua umoh is ago nohatag aien, im nobolhan, im injop, im niji itai asega *amen* iran:

16 is tup ude nup urai iji pece asega aien itu acen, mika eri ago nedo ura ara:

17 ja is ati nohuun nato yin vaig aien, nikavaig, is ago nedo upene aien, um alupai caija incaupda et ahes an nohatag, im inlidija et ahinag inwah iran, et par imyiacitak inliumopja va nitai caig et ahinag.

18 Is ehka vai rau intakehkevaig ehele atimi an tas ineigki, mika eri jim ahlap vai rau ara.

19 Eris ahes Anteok im Aikoneum a nupu Jutaia, um apan eahki, um auahas inliinmopoi atimi; eris asji Paulo ara irai hat, um aihiaig pan itac *yin* an nuarin-pece iyehki, eris aktaktai ara mika is mun mas aien.

20 Eris wat aiji arahed iran a ilpu atimi alaigaheni, is um lep atidai aien, um apan an nuarin-pece iyehki: is wat lahlah an tak apnyin, is atga o un aien im Barnabas, um apan Terbe.

21 Erus asuptecnaig intas-upene arau an nuarin-pece iyehki, eris um alaigaheni atimi is ahinag vai rau: erus lep adumoij pan Listra arau, im Aikoneum, im Anteok,

22 um ahidaig emda inliinmopoi ilpu atimi alaigaheni, um ated ra mika eri apol an nimyisjsis ninivaijec, um ika, Eris idim ika intupu ohocred

alupas akaija, ja par apan an nelcau o Atua.

23 Erus wat ehtai ilpu atimi tas alep arau irai iji ekalasia asega, erus alaigaheni arau, um atwakam, um ikni ra ehele Natimarid ineig eris asgeig iran ara.

24 Erus ahced *inpece* Pisitya arau, um yetpan Pamfilya.

25 Erus asuptecnaig intas Perca arau, ja par apan Atalaia:

26 erus ahes eahki arau um atga an nelcau, um apan Anteok, nuarin-pece iyehki eris ugni naiheuc o Atua vai rau iran, va nauritai ineig erus ago arau.

27 Erus wat yetpan arau, erus asjapicnaig nup an nakalasia arau, um asuptecnaig niji auritai asega is ago vai rau a Atua, im lep ineig, nikavaig, is atipagki intapanes an nimyisjsis ninivaijec aien vai nup urai iji pece.

28 Erus amen eahki arau is itu ira rau ehele ilpu atimi alaigaheni.

NUARIN-TAS ALUPAS 15.

EERIS ahes Jutaia nahaiji atimi, um apan eahki, um esege imi ilpu etoara, *um ika*, El eka eti leh naperitome iramia aijaua et idivaig is asaig a Moses, uhpu eti imyiatamaig caua.

2 Erus tas emda a Paulo im Barnabas, um imyisjsis itai ira ra; va nitai ineigki eris ika ara eri abraig pan Paulo im Barnabas, im lep hal ra, Jerusalem, ehele ilpu apostolo im ilpu atimi tas alep, vai intas ineig eris imyisjsis itai vaig ara.

3 Eris atau ira rau a nup an nakalasia an natga urau, erus ahced *inpece* Finaisi im Samerya arau, um asuptecnaig, *um ika*, Era mun ahidai ra a nup urai iji pece: eris um imyiacitak intas urau a ilpu etoarau.

4 Erus wat yetpan Jerusalem arau, eris leh rau a nup an nakalasia, im ilpu apostolo, im ilpu atimi tas alep, erus asuptecnaig niji auritai asega arau is ago vai rau a Atua.

5 Ja eris um atidai tahi irai ilpu Farisi eris imyiisjis ninivaijec ara, um ika, Eris idim ika eri aperitome ira ra ara, um asaig ehele *ra* mika eri imyiaiji intas alep o Moses.

6 ¶ Eris asjapicnaig a ilpu apostolo im ilpu atimi tas alep par tas jipe vai intas ineigki.

7 Eris imyiisjis acen ara, ja is um atidai a Pitrus, um ika ehele ra, Ak ilpu etoak, eka ato aijaua, nikavaig, is ati *nyak* a Atua iraija itu acen, mika eri atahaijeg intas-upene a nup urai taka pece an nipjineucsek, um imyiisjis ninivaijec :

8 is lep tas upene ehele ra a Atua ineig et ato inliinmopoi atimi aien, um alupai ra Nesgan Upene, is idivaig *is alupai* caji aien ;

9 is tup ethi ache inliinmopon aien vai caji im lep ra, is ago adicinadin inliinmopura aien va nimyisjis ninivaijec *ura* :

10 va nitai ineigki eka auri aijaua par oop Atua, um atijai nitai ahelwei ineigki irai ilpu atimi alaigaheni, eris auatialiidi a ilpu retpoija naposvaig, im lep akaija ?

11 ja inta imyiisjis ninivaijec nitai ineigki akaija, nikavaig, ulpu imyiatamaig caji va naiheuc o Iesu Kristo Natimarid, et idivai ra.

12 ¶ Eris eti liglig atimi iji ehki asega, jam atahaijeg Barnabas im Paulo, erus wat asuptecnaig niji auritai ehka arau im niji auritai imyiali, is ago vai rau a Atua ehele nup urai iji pece.

13 ¶ Erus wat tas ehni arau, is par tas a Jakobus, um ika, Ak ilpu etoak, akumu atahaijeg nyak aijaua :

14 et mun asuptecnaig *nitai ineig* a Saimona, nikavaig, is upyi ateghe nup urai taka pece a Atua par ikni-pagki atimi ira ra va nidan ;

15 et lep idivaig ineig intas o ilpu profeta ; eris aged, *um ika*,

16 “Et wit ti pan itac nitai iji eigki ekpu adunoij pam ainyak, um lep ago neom ineig o Tevit is jase ;

ekpu imyiatidai *neom* ineig ainyak eris alcapdicraig, um lep ago upene :

17 mika eri ahilek *nyak* Ihova a ilpu atimi tup amen, im lep nup urai taka pece asega era apos nidak ara, is ika a Ihova ineig et ago nitai iji eigki asega aien.”

18 Is ato niji auritai asega o un a Atua an naopan iyelki is pam eti eteuc nobohtan.

19 Va nitai ineigki ek ika ainyak, Ti jim imyidohalav nup urai taka pece iji eigki akaija eris ahidaig pan ra ehele Atua ara :

20 jam aged nitasvitai imi ra, mika eri jim caig nitai iji eigki ara er amcel vaig er ahlap iran vai ilpu atmas, im niji itai er alcinwan, iminja irai itai, um jim ago ingaijid :

21 eris amen ara sji ehki irai iji uari-pece asega eris asuptecnaig *intas* o Moses ara, um esvitai irai eom alaigaheni irai iji adiat atumop asega, itu acen um imyihum pam an naopan ineig.

22 Eris ika a ilpu apostolo, im ilpu atimi tas alep, im nup an nakalasia asega, eri ati natimi inyi ero ira ra ara, um abrai rau mika eru ahced Paulo im Barnabas, um apan Anteok ; *eris abraig pan* Jutas ara, tak idan Barsabas, im Sailas, erus esjilid arau irai ilpu etoarau :

23 eris aged *nitavitai* ara, *um alupai* ra mika eri apos, um ika ;

Ak ilpu etoama, nup urai taka pece, *eka amen* Anteok aijaua, im Sirya, im Silisya, eca aiheuc vai caua aijama, ilpu apostolo, im ilpu atimi tas alep, im lep ilpu etoamia :

24 ecris atahaijeg aijama, nikavaig, eris ahes igcaki nahaiji ma, um imyidohalav caua an tas *ura*, um auahas inliinmopomia, um ika, Aki idim leh naperitome iramia aijaua, um imyiaiji intas alep ; ja ecris eti asaig *intas ineigki* ehele ra aijama :

25 va nitai ineig eca mun elhras-japicnaig aijama, um ika, ecri ati natimi inyi ero aijama, um abrai

rau, mika eru ahced ohwat *etoama* upene eraigki, Barnabas im Paulo, um apan ehelemia,

26 ohwat atimi eti imyicoho nohurau va nidai Iesu Kristo Natimarid uja :

27 eera mun abraig pan Jutas im Sailas *ehelemia* aijama, erupu lep tas *ehelemia* arau va nitai iji eigki :

28 is asaig a Nesgan Upene, im lep aijama, mika eri jim atijai tih nitai ahelwei iramia, nitai iji eigki ache et upene *vai caua* ;

29 nikavaig, aki jim caig nitai iji eigki aijaua er ahlap iran vai ilpu atmas, im inja irai itai, im niji itai er alcinwan, um jim ago ingaijid : el eka aminjinai caua aijaua va nitai iji eigki, akupu ago nedo upene aijaua. Kaiheuc vai caua.

30 Eris wat adcejai ra, eris apan Anteok ara, um asjapicnaig ilpu atimi *alaigaheni* asega, um alupai ra nitasvitai iyehki :

31 eris esvi ara, um imyiacitak intas upene *iran*.

32 Erus atimi esege arau, Jutas im Sailas, erus ated ilpu etoarau arau an tas is ahinag, um ahidaig emda *inliinmopura*.

33 Erus amen eahki arau is laulau, ja eris aiheuc vai rau a ilpu etoarau, um adcejai rau, mika eru apan ehele ilpu apostolo.

34 Ja is ika a Sailas yimu amen eahki.

35 Erus lep amen Anteok arau, Paulo im Barnabas, im nahaiji ra is ahinag, um esege *imi atimi*, um asuptecnaig intas-upene o Natimarid.

36 IS wat ti pan itac nadiat is eti elpat, is um ika a Paulo ehele Barnabas, Tu lep apan akaijau um ateghe ilpu etoaijau irai iji uari-pece asega, intis asuptecnaig intas o Natimarid iran akaijau, *um almoi* nedo ura.

37 Is um ika a Barnabas eru leh Joanes arau, tak idan Markus.

38 Ja is esjum a Paulo inleh yin vaig, is epujai rau aien Pamfilya, um eti ahced rau par auritai.

39 Erus imyiisjis jipe emda arau, va nitai ineigki erus ude jipe rau arau : is leh Markus a Barnabas, um atga an jop, um apan Saiprus ;

40 ja is ika a Paulo yi ahced yin a Sailas, eris ugni Atua a ilpu etoan, mika yi aiheuc vai yin, ja is par atga o un aien.

41 Is ahced *inpece* Sirya aien im Silisya, um ahidaig emda nup an nakalasia.

NUARIN-TAS ALUPAS 16.

IS yetpan Terbe im Lистра aien : is amen eahki natimi alaigaheni is ethi, nidan Timodeus, is upu Jutaia a risin, um imyiisjis ninivaijec ; ja is upu Crisi a etman :

2 eris asan tas upene vai yin a ilpu etoan Lистра im Aikoneum.

3 Is merit a Paulo mika yi ahced yin aien ; is leh yin a Paulo um aperitome iran va nupu Jutaia irai uari-pece iji ehki : eris ato ara asega, nikavaig, is upu Crisi a etman.

4 Eris wat apaahni irai iji uari-pece ara, eris alupai ra intas alep iyehki, eris asaig a ilpu apostolo im ilpu atimi tas alep Jerusalem, mika eri imyiaiji ara.

5 Eris imyiisjis ninivaijec emda nup urai ekalasia, eris eldati pan ehele ra natimi irai iji adiat.

6 Eris apaahni an *pece* Frijya ara, im lep inpece Calesya : ja is acaiji ra a Nesgan Upene mika eri jim asuptecnaig intas Esya ;

7 eris yetpan Misya ara, um lep ika eri apan Bidinya : ja is acaiji ra a Nesgan Upene.

8 Eris ahtaregdei Misya ara, um apok Troas.

9 Is wat epeig, is ehcolios pan ehele Paulo a nupu Masetonea is ethi an numjeg ahnag o un ; is aiji aien, um

ugni yin, um ika, Apam aiek Masetonea, um atau irama.

10 Is wat ecetai nitai ineigki aien, ecris auroauro aijama um ika ecridi apan Masetonea, ecris idim ato aijama, nikavaig, is abrai cama a Natimarid mika ecridi asuptecnaig intas-upene ehele ra aijama.

11 Ecris wat ateciya nelcau Troas aijama, um aheldaktit *inpece* Samodresya, is wat lahlah an tak apuyin *ecris* apahai Napolis aijama;

12 *ecris* ahes eahki aijama, um apahai Filipai, nuarin-pece uhup an nahaijin Masetonea iyehki, is uarin eris amen iran iyehki nupu *Roma*: ecris amen aijama an nuarin-pece iyehki ira adiat is eti elpat.

13 Ecris lep ahes an nuarin-pece iyehki aijama an nadiat atumop, um apan u nofowai an nuarin is ethi eris asjapicnaig iran natimi par alaigaheni; ecris ateusc aijama, um tas ehele ilpu takata eris apan *eahki* ara.

14 ¶ Is atahaijeg *cama* intakata is ethi, nidan Litya, is ahtai *apelumai* cop aien, is up an nuarin-pece Daiataira aien, um alaigaheni vai Atua: is asalgei inliinmopon a Natimarid, mika yi ahgei aien intas iji eigki is asaig a Paulo.

15 Is wat leh nabaptiso iran aien, im lep ra an nimmun o un, is imyiacaij *cama* aien, um ika, El eka aktaktai aijaua, nikavaig, ek ini-vaijee vai Natimarid ainyak, apam aijaua um amen an neom unyak. Is imyiacaij emda *cama* aien.

16 ¶ Ecris wat apan aijama alaig u nalaigaheni, is ehtet irama natahaig is ethi is ahei yin nagelo asigyopdicrai itai; eris anarakosin vai yin a ilpu atimi alupas o un vai intas asigyopdicrai itai o un:

17 is apitac Paulo aien im cama, um ahlaig, um ika, Era ilpu aheca o Atua esjilid acen ara sji eigki, era asuptecnaig imi cama ara nefalaig imyiatamaig *atimi*.

18 Is ago nedo ineigki aien ira

adiat is ahinag. Is taigtaig a Paulo, um ahidai yin, um ika ehele nagelo iyehki, Ek asaig ehelum ainyak an nidai Iesu Kristo mika an deijig yin aiek. Is um deijig *yin* aien an nuarin-nadiat iyehki.

19 Eris wat ato a ilpu atimi alupas o un, nikavaig, eri eti lep auarakosin ara, eris arop irai Paulo im Sailas ara, um aihiaig pan *rau* an tiptag ehele ilpu atimi alupas,

20 um ati *rau* an nuhup u ilpu atimi alupas, um ika, Erau imyido-halav nuarin-pece uja natimi eraigki, erau upu Jutai ara,

21 um asuptecnaig nedo ineigki, et itaup vai caija inlehvaig, um ago, inta upu *Roma* akaija.

22 Eris ehra atidai natimi is ahinag vai *rau*; eris ahpati napelumai urau a ilpu atimi alupas, um ika eri aredei *rau*:

23 eris ehcahinag aredei *rau* ara, ja par ati *rau* anliin neom ipjin, um ika ehele natimi aminjinaig neom ipjin yi aminjinaig upene *rau*:

24 is ati *rau* aien an nidjin neom ipjin vai intas iyehki, um ahtelgaig nauincai irai eduorau.

25 Is wat ijihgau nepeig, eris acesaces nohranitai vai Atua a Paulo im Sailas an nalaigaheni urau: eris atahaijeg *rau* a ilpu atimi amen anliin neom ipjin.

26 Is um auroauro um eteuc nomoi alupas, um amaamai noliun neom ipjin: is auroauro um ispun asalgei intapanes asega, um ehrigrag itai arore ira atimi asega.

27 Is wat aiji lahlah a natimi aminjinaig neom ipjin, um ecetai intapanes an neom ipjin nasalgeivaig, is aihiacse nautoga o un aien, mika yi ispun atgei yin; is aktaktai aien, mika eris mun aha a ilpu atimi arore ra.

28 Ja is ahlaig ijinies a Paulo, um ika, Jim auahas euc aiek: aijama asega aigki ecra amen igcaki.

29 Is ika aien, eri alupai yin incop alahala, is um aliaujui pan aien

anliin *neom*, um uejucjucaij, um atpuse an nuhup o Paulo im Sailas, 30 um imyialau ijo rau, um ika, Ak ohwat atimi alupas, inki fi ago inhe ainyak mika eri imyiatamaig nyak?

31 Erus ika arau, Namu asgeig irai Iesu Kristo Natimarid aiek, uhpu imyiatamaig euc, im lep ra an nimnim unyum.

32 Erus asuptecnaig ehelen arau intas o Natimarid, im lep ehele ra asega an nimnim o un.

33 Is leh rau aien an nuarin-nepeig iyehki, um yiri inmocop *ira rau*; is auroauro aien um leh nabaptiso iran, im lep ra asega *an nimnim* o un.

34 Is imyiapan rau aien an neom o un, um alaa *rau* nitai caig, um imyiacitak, is imyisjis ninivaijec vai Atua aien, im lep ra asega an nimnim o un.

35 Is wat lahlah an tak apnyin, eris abrai ilpu aheca *ura* a ilpu atimi alupas, um ika, Atceijaig natimi eraigko.

36 Is asuptecnaig intas iyehki ehele Paulo a natimi aminjinaig neom ipjin, um ika, Era ika a ilpu atimi alupas uhmu atcejai caurau: va nitai ineig arumu tup eklim atga unyimirau aijaurau.

37 Ja is um ika ehele ra a Paulo, Ecrau upu Roma aijumrau, era mun aredei cumrau ara an nuhup o atimi, jam eti asuptecnaig tah nedo has unyimrau, um lep ati *cumrau* anliin neom ipjin; era ika ara eri echim atcejai cumrau an naopan ineig; o'o; erumu idim ham ara, um ati pok ijo cumrau.

38 Eris asuptecnaig intas iji eigki a ilpu aheca ehele ilpu atimi alupas: eris wat atahajjeg ara, nikavaig, erus upu Roma arau, eris imtitaig ara;

39 eris apan ara, um tas updak ehele rau, um leh pok ijo *rau*, um ugni *rau*, mika eru atga urau arau, um ude nuarin-pece *ura*.

40 Erus epujaig neom ipjin arau, um apan anliin *neom o* Litya: erus wat ecet ilpu etoarau arau, erus tas upene ehele ra arau, um atga urau.

NUARIN-TAS ALUPAS 17.

E RUS ahced *inuarin-pece* Amfipolis arau im lep Apolonea, um yetpan Desalonaika, is eteuc neom alaigaheni o nupu Jutaia eahki:

2 is apan a Paulo is idivaig nupyi edo o un ehele ra, um tas ehele ra an nadiat atumop is eseij an nitas-vitai *itaup*;

3 um asuptecnaig, um ika, eris idim ika yi leh nohocred a Kristo, um lep nusjai vai inmas *o un*; im lep ineig, et Kristo ineigki a Iesu, ek asuptecnai yin ehelemia ainyak.

4 Eris imyisjis ninivaijec nahaiji ra, um apol irai Paulo im Sailas; im lep nupu Crisi leh nalaigaheni o nupu Jutaia is ahinag, im ilpu takata esga atimi is ahinag.

5 Ja eris edemda a nupu Jutaia iji ehki eris eti imyisjis ninivaijec ara, um leucose nahaiji ilpu atimi auatatimi amen an tiptag, um lep asjapiena atimi is ahinag, um auahas inliinmopoi atimi asega an nuarin-pece, um telohtelo pan u neom o Jeson, um ika eri leh pok ijo rau ehele atimi.

6 Ja eris eti ecet rau ara, eris um aihiaig pan Jeson ara, im nahaiji ilpu etoarau, ehele ilpu atimi alupas an nuarin-pece *ura*, um ika, Era mun lep ham igcaki ara sji eigki era ahidaig nobohtan ara;

7 is leh ra a Jeson: era lep ago nedo ineig et eche vai tas alep o Sisar ara sji eigki asega, um ika, Et eteuc Natimarid et eche, Iesu.

8 Eris auahas inliinmopoi atimi im lep ilpu atimi alupas an nuarin-pece ara, an natahajjegvaig nitai iji eigki *ura*.

9 Eris asan nimtan imi Jeson ara, im lep hal ra, ja par atcejai ra.

10 ¶ Eris auroauro a ilpu etoarau, um imyiapan Paulo im Sailas Beria an nepeig: erus wat yetpan *eahki* arau, erus apan arau anliin neom alaigaheni o nupu Jutaia.

11 Is esjilid nedo ura irai *edo o* nupu *Jutaia* amen Desalonaika, eris leh intas ara um imyiacitak, um ahilek an nitasvitai *itaup* irai iji adiat, par ato, kit et inivaijec nitai iji eigki, ka o'o.

12 Eris imyiisjis ninivaijec natimi is ahinag; im lep ilpu takata esga atimi im ilpu atamaig is ahinag, eris upu Crisi ara.

13 Ja eris wat ato a nupu Jutaia amen Desalonaika, nikavaig, is asuptecnaig intas o Atua a Paulo Beria, eris lep apan ara eahki, um auahas inliinmopoi atimi.

14 Eris auroauro a ilpu etoan um abrai Paulo mika yi apok aien u injop: ja erus amen eahki a Sailas im Timodeus.

15 Eris imyiapan Paulo Adens a ilpu atimi ahced yin: eris wat lep adumoij pan ara, eris apos intas o un ara imi Sailas im Timodeus, mika eru auroauro arau um apan ehelen.

16 ¶ Is aitgai rau a Paulo Adens; is wat alum natmassimai is ahinag acen aien im nedo ura an nuarin-pece iyehki, is taigtaig alupas inliinmopon aien.

17 Is imyiisjis itai aien irai upu Jutaia anliin neom alaigaheni *ura*, im lep irai ilpu atimi leh nalaigaheni o nupu Jutaia, im lep ra sji ehki is ecet ra aien an tiptag irai iji adiat.

18 ¶ Eris lep imyiisjis itai iran nahaiji ilpu atimi arapakau irai ilpu atimi leh imi Epikurus, im ilpu Stoiko: eris ika nahaiji ra, Et ikha a natimi auyat ineigki? *eris ika* nahaiji ra, Et asuptecnaig ilpu atmas et eche aien: va nedo o un, nikavaig, is asuptecnai Iesu ehele ra aien, in nusjai o *atimi* vai inmas *ura*.

19 Eris arop iran ara, um imyiapan *yin* ehele ilpu atimi alupas, um ika, Ecra ika aijama eeri ato nesege mat ineigki, nai tas vaig aiek:

20 na mun asaig aiek nahaiji itai imyiali an tikgama: ja ecra merit aijama natovaig nesgan tas iran.

21 Eris eti ago tah nitai a nupu Adens asega, in nup urai taka pece eris tup amen eahki ara, jam asuptecnaig um atahaijeg itai mat ache.

22 ¶ Is aiji a Paulo an nuhup o ilpu atimi alupas, um ika, Ak nupu Adens, ek almoi ainyak mika et ahinag nalaigaheni unyimia.

23 Kis wat atga ainyak, um almoi natmassimai iji eigki eka alaigaheni vaig aijaua, kis ecetai ainyak natau eris aged intas iran, *um ika*, IMI ATUA INEIG ER ETI ATO YIN. Aien, eka eti ato yin aijaua, jam ago nalaigaheni vai yin, aien aigki ek asuptecnai yin ehelemia ainyak.

24 Et eti amen irai eom ahlap er ago irai ikma *atimi* a Atua ineig, is ago nohatag aien im nobohtan, in niji itai asega amen iran, et idim Atimarid an nohatag aien im nobohtan;

25 er eti aheca o un irai ikma atimi, et eti merit vaig tah nitai aien, era idim umumoh vai yin atimi asega, um adeijai ra, um leh niji itai asega;

26 is ago nup urai iji pece asega aien, et tup etli ache nohura, mika eri amen ara an nobohtan; is upyi uhup aien um anacanac an naopan ineigeri *umumoh iran ara*, im inuarin iji eig eri amen iran ara;

27 mika eri ahilek Natimarid ara, um raprap, kit erupu ecet yin ara, ja et eti amen itac acen vai caija asega aien:

28 inta umumoh vai yin akaija, um atga, um eteuc *an naopan ineig*; et idivaig eris lep asaig nahaiji ilpu atimi oyag iramia, *um ika*, "Inta lep ilpu hal o un akaija."

29 Inta idim hal o Atua akaija, va nitai ineigki et eti upene vai caija naktaktaivaig, um ika, Et idi-vaig colt, im silver, im inhat a Atua, era ago atimi an namarero ura.

30 Is pam eti aktaktai a Atua *nedo o atimi* an naopan iyehki u naupat *u iji pece*; ja et tas alep aien ehele atimi asega an naopan ineig irai iji pece asega, mika eri adumolj anliinmopura ara:

31 is idim ati nadiat ineig aien etpu asuptecnaig upene nintan iran aien imi atimi asega, irai natimi ineig is ati yin aien; is asuptecnaig *nitai ineigki* aien ehele atimi asega an nimyinusjai yin o un vai inmas o un.

32 ¶ Eris wat atahajjeg ara va nusjai *o atimi* vai inmas *ura*, eris imyiafakahcil *yin* nahaiji ra: ja eris ika nahaiji ra, Ecrupu atahajjeg euc aijama va nitai ineigki an tak aopan.

33 Is um ude ra a Paulo um atga o un.

34 Ja eris apol iran nahaiji atimi, um imyüisjis ninivajjec: *is amen* ehele ra a Taionisyus natimi alupas is ethi, im lep intakata is ethi, nidan Tamaris, im lep hal ra.

NUARIN-TAS ALUPAS 18.

IS wat ti pan itac nitai iji eigki, is ahes Adens a Paulo, um apan Korindus;

2 is ecet nupu Jutaia is ethi aien *eahki*, nidan Akwila, eris apos yin Pontus; is tuh pam ahes Itale aien, im ehgan Prisilla, va nedo o Klatyus, nikavaig, is tas alep aien, mika eri ahes Roma a nupu Jutaia asega, um atga ura: is apan ehele rau aien.

3 Is tup ethi ache nauritai u ehtaij, va nitai ineigki is amen ehele rau aien, um auritai: erus atimi ago eom apelumai arau.

4 Is tas emda aien anliin neom alaigheni irai iji adiat atumopasega,

um leh updak nupu Jutaia im nupu Crisi.

5 Erus wat ahes Masetonea a Sailas im Timodeus um apan *ehe-len*, is emda alupas inliinmopoi Paulo, is asuptecnaig emda ehele nupu Jutaia aien, um ika, Et Kristo a Iesu.

6 Eris wat edwodwai *intas o un* ara, um asan tas has esjilid, is uc-jucjaig napelumai iran aien, um ika ehele ra, *Etmu amen* iramia inja iramia; ek adicinadicin ainyak: ekpu ahidaig pan nyak ainyak ehele nup urai taka pece.

7 Is ahes eahki aien, um apan anliin neom o natimi is ethi, nidan Justus, is alaigheni vai Atua aien, is eteuc neom o un ubutpotet o neom alaigheni.

8 Is asgeig irai Natimarid a Krispus, natimi alupas an neom alaigheni, iin lep ra asega an nimniin o un; eris lep atahajjeg *intas* a nupu Korindus is ahinag, um imyüisjis ninivajjec, um leh nabaptiso ira ra.

9 Is tas a Natimarid ehele Paulo an nepeig an numjeg ahnag *o un*, um ika, Jim imtitaig aiek, namu tas aiek, um jim eucsup:

10 ek amen ehelum ainyak, inyi ti yat iram tah natimi, um abli euc: era amen natimi unyak et ahinag an nuarin-pece ineigki.

11 Is amen aien *eahki* irai yiir is ethi im inmohoc is siks, um esege imi ra intas o Atua.

12 ¶ Is wat atimi alupas Akea a Calleo, eris ehra yat irai Paulo a nupu Jutaia, um imyiapan yin u nitai ateuc ineig eh tas alep iran,

13 um ika, Et ika a natimi ineigki ehele atimi eri alaigheni vai Atua ara, jam imyipalea intas alep.

14 Is ika a Paulo yi tas, ja is ika a Calleo ehele nupu Jutaia, Ak nupu Jutaia, el et ika nedo has ineigki ka nauatatimi esjilid, et upene ineig el et eropse inliinmopok ainyak vai caua:

15 ja el et imyiisjis itai ineigki vai intas im nida *atimi*, im intas alep unyinia, tup aijaua marom vaig; ek esjum ainyak intas alep vaig va nitai iji eigki.

16 Is ahtahlo ra aien u nitai ateuc ineig eh tas alep iran.

17 Eris arop irai Sosdenes a nupu Crisi asega, natimi alupas an neom alaigaheni, um aredei *yin* an nuhup u nitai ateuc ineig eh tas alep iran: ja is eti aktaktai nitai iji eigki a Calleo.

18 IS lep amen eahki a Paulo is itu iran, ja par aiheuc vai ilpu etoan, um ahes eahki, um atga an nelcau, um apan Sirya; erus ahced yin a Prisilla im Akwila; is eusei nidjinin aien Segkria, vai intas upyi asaig o un.

19 Is yetpan Efesus aien, um ude rau eahki: is apan aien anliin neom alaigaheni, um tas emda ehele nupu Jutai.

20 Eris ugni yin ara mika yi elvamen ehele ra aien, ja is esjum aien;

21 ja is aiheuc vai ra aien, um ika, Ek et hidim ika ainyak ki apan u nasjapicnaig o atimi Jerusalem an naopan ineig: ja par lep adumoij pam ehelemia, tup Atua marom. Is ahes Efesus aien, um atga an nelcau.

22 Is apahai Sisaria aien, um apan *Jerusalem*, um aiheuc vai nup an nakalasia, ja par apan Anteok.

23 Is amen aien *eahki* an nadiat is eti elpat, ja par lep atga o un, um ahced inpece Calesya asega, im Frijya, um ahidaig emda ilpu atimi alaigaheni asega.

24 Is yetpan Efesus a nupu Jutai is ethi, nidan Apollos, eris apos yin Aleksantrea, is atimi tas upene aien, um lep esjilid an nitasvitai *itaup*.

25 Eris esege imi natimi ineigki nedo o Natimarid; is emda inliinmopon aien, um esege emda niji itai

o Natimarid, is ato aien nabaptiso o Joanes ache.

26 Is atupun aien um tas emda anliin neom alaigaheni: erus wat atahajjeg yin a Akwila im Prisilla, erus leh yin arau, um asuptecnaig upene ehelen nedo o Atua.

27 Is wat ika aien yi apan Akea, eris aged nitasvitai a ilpu etoan, um ugni ilpu atimi alaigaheni mika eri leh yin ara: is wat yetpan aien, um atau emda ini ra sji ehki eris imyiisjis ninivajjec ara va naiheuc o *Atua*:

28 is imyiisjis emda irai nupu Jutai aien um auud yi aijiraig intas ura an nuhup o atimi, um ehvaig an nitasvitai *itaup* mika et idim Kristo a Iesu.

NUARIN-TAS ALUPAS 19.

IS wat amen Korindus a Apollos, is ahced iji uari-pece itaho a Paulo, um yetpan Efesus: is ecet ilpu atimi alaigaheni is eti elpat aien *eahki*,

2 um ika ehele ra, Akis leh Nesgan Upene aijaua an nasgeig *iran* unyinia, ka o'o? Eris um ika ehelen ara, Ecra mun idim eti atahajjeg aijama *iran tah*, nikavaig, is *asuol* a Nesgan Upene.

3 Is um ika ehele ra aien, Eris baptiso irania anhe? Eris ika ara, An nabaptiso o Joanes.

4 Is um ika a Paulo, Is idim baptiso *ira atimi* a Joanes an nabaptiso *ineig* eri adumoij anliinmopura ara, um ika ehele atimi eri asgeig iran ara etpu apitac pam iran aien, Iesu Kristo marom.

5 Eris wat atahajjeg *intas ineigki* ara, eris leh nabaptiso ira ra ara an nidai Iesu Natimarid.

6 Is atijai nikman ira ra a Paulo, eris leh Nesgan Upene ara; eris tas ara irai tas irai iji pece, um ahidan tas.

7 Eris idivaig twelv natimi iji ehki asega.

8 Is apan aien anliin neom alaigaheni, um tas emda an mohoc is eselj, um imyiisjis itai, um asuptecnaig niji itai va nelcau o Atua.

9 Ja is wat ipijn inliinmopoi nahaiji ra, eris imyiisjis nahcil ara, um asan tas has va nedo iyehki an nuhup o atimi is ahinag, is ude ra aien, um iknipagki ilpu atimi alaigaheni *ehele ra*, um tas emda irai iji adiat anliin neom esege u natimi is ethi, Tai-rannus.

10 Is eteuc nedo ineigki an mesese is ero; va nitai ineigki eris atahaijeg intas o Iesu Natimarid atimi asega eris amen Esya ara, nupu Jutaia im nupu Crisi.

11 Is ago niji auritai esjilid acen a Atua an nikmai Paulo:

12 va nedo ineig eris wat leucse apelumai an nohun ara, ka nitai aliid, um imyiapan ehele ilpu atimi emehe, is edoaijaig nemehe ira ra, eris lep atcejjai ra a ilpu agelo has.

13 ¶ Eris ika a ilpu atimi ahraces, nupu Jutaia, atimi amen ehcid, eri taam tas an nidai Iesu Natimarid, ehele ra sji ehki eris amen ira ra a ilpu agelo has, um ika, Ecra acaiji caua aijama vai Iesu, aien aigki et asuptecnai yin a Paulo.

14 Eris ago nedo ineigki a ilpu hal o Siva is seven, is upu Jutaia aien, um atimi ahlap esjilid.

15 Is tas a nagelo has, um ika, Ek ato Iesu ainyak, ek lep ato Paulo ainyak; jai aijaua di aigki?

16 Is aliaujai pan ira ra a natimi iyehki is amen iran nagelo has, is esjilid ira ra aien, um abli ra; eris aha ara anliin neom iyehki um alau ijo, um tup atga, is amen innocop ira ra.

17 Eris ato nitai ineigki atimi asega, nupu Jutaia im lep nupu Crisi, eris amen Efesus ara; eris imtitaig ara asega, um imyiahpas nidai Iesu Natimarid.

18 Eris apan a ilpu atimi imyiisjis

ninivaijec is ahinag, um asuptecnaig nedo ura, um ehvaig.

19 Eris lep asjapicnai itasvitai ura a ilpu atimi ahraces is ahinag, um atnamud an nuhup o atimi asega: eris esvi nimitan ara, is apapa pan irai uari silver is fifte dausant.

20 Is um edel alupas intas o Atua, um esjilid acen.

21 ¶ Is wat ti pan itac nitai iji eigki, is aktaktai anliinmopon a Paulo, mika yi ahced *inpece* Masetonea im Akca, ja par apan Jerusalem, um ika, Ek wit apan eahki ainyak, ja par idim lep apan um almoi Roma.

22 Is abraig pan natimi is ero aien Masetonea irai ra sji ehki eris aheca o un ara, Timodeus im Erastus; ja is amen Esya aien ira adiat is eti elpat.

23 An naopan iyehki eris imyiisjis itai alupas va nedo iyehki.

24 *Is eteuc* natimi is ethi, nidan Temitrius, is atimi auritai irai silver aien, is ago nalmun eom silver aien imi Taiena, um leh nimitan alupas imi ilpu atimi auritai;

25 is asjapicnai ra aien, im lep ilpu atimi auritai apa vai yin, um ika, Ak ilpu atimi alupas, eka ato aijaua, nikavaig, inta atimi ikni itai akaija va nauritai ineigki:

26 eka mun almoi aijaua um atahaijeg, nikavaig, is leh updak um ahida atimi is ahinag nat naico Paulo Efesus, im lep ubutpotet an *pece* Esya asega, um ika, Era eti ilpu atua nitai iji eigki er ago irai ikma *atimi*:

27 im lep ineig, eri eti ubutpotet u namcel ache va nauritai ineigki uja; uhpulepude neom ahlap o natmas atahaijeg esjilid Taiena, um auahas natimi alupas o un, era alaigaheni vai yin a nupu Esya asega im nup urai iji *pece*.

28 Eris wat atahaijeg *intas iji eigki* ara, is esjilid intavaitap ura, eris ahlaig ijinies ara, um ika, Et esjilid a Taiena o nupu Efesus.

29 Eris reiman jipe nup an nuarin-pece asega : eris arop irai Ceus im Aristarkus ara, nupu Masetonea erahki, erus ahced Paulo arau an natga o un, eris telohtelo pan ara anliin neom alum itai iran.

30 Is ika a Paulo yi apan anliin neom ehele atimi, ja eris acaiji yin a ilpu atimi alaigaheni.

31 Eris abraig pan atimi ehelen nahaiji ilpu atimi alupas Esya, eris ilpu atimi aiheuc vai yin ara sji ehki, um ugni yin mika yi jim ehcohos pan aien u neom alum itai iran.

32 Eris ahlaig ijinies ara, is asaig tah nitai tah ra, um lep asaig tah nitai tah ra : eris reiman jipe a ilpu atimi asjapicnaig ; eris eti ato nitai ineig natimi is ahinag *ira ra* eris asjapicnaig vaig.

33 Eris ahiaig pan Aleksanter ehele atimi is ahinag, eris ati yin an nuhup o atimi a nupu Jutaia. Is ahpoijaiji ra a Aleksanter, um ika yi tas ehele atimi.

34 Ja eris wat ato ara, nikavaig, is upu Jutaia aien, eris ehra ahlaig ijinies ara et idivaig irai aur is ero, *um ika*, Et esjilid a Taiena o nupu Efesus.

35 Is wat aseigpa an nehtauo o atimi a natimi alupas *an nuarin-pece iyehki*, is ika aien, Ak nupu Efesus, era ato natimi asega, nikavaig, era alaa natmas atahaig esjilid Taiena a nupu an nuarin-pece Efesus, im lep *nalmun natmas* iyehki is alhes an nolatag um etjose :

36 et ehka nikavaig et ahcil nitai iji eigki, va nitai ineigki eris idim ika aki eklim amen aijaua, um jim auroauro um ago tah nitai :

37 eka mun imyiapam igcaki natimi iji eigki aijaua, eris eti ehneg itai irai eom ahlap ara, um eti asan tas has va natmas atahaig unyimia :

38 el era ato tah nitai vaig tah natimi a Temitrius im ilpu atimi auritai era ahced yin ara, et eteuc niji adiat er asuptecnai itai iran, era lep eteuc a ilpu atimi alupas ; erumu

atijai jipe itai ira ra ara *an nuhup ura* :

39 ja el eka ahilek tah nitai et eche aijaua, eru wit asjapicnaig a ilpu atimi alupas, erupu tas alep vaig ara :

40 kit uhpu atijai nehtauo *ineigki* iraija, ja inyi ehka vai caija nasuptecnaigvaig tah nitai ineig era mun asjapicnaig vaig natimi an nadiat ineigki.

41 Is wat ucece intas o un, is imyiterimterim atimi aien.

NUARIN-TAS ALUPAS 20.

IS wat esjaigse nehtauo iyehki, is asjapicnai ilpu atimi alaigaheni ehelen a Paulo, um aiheuc *vai ra*, ja par atga o un, um apan alaig Masetonea.

2 Is ahced niji pece iji ehki aien, um ated emda atimi, ja par yetpan an *pece* Crisi ;

3 is amen aien *eahki* an mohoc is esei. Is wat ika aien yi atga an nelcau um apan Sirya, eris imyiiris yin a nupu Jutaia ; ja is ika aien yi adumojj um atga an *pece* Masetonea.

4 Eris ahced pan yin Esya a Sopater nupu Beria ; im Aristarkus im Sekuntus, ohwat upu Desalonaika ; im Ceus nupu Terbe, im Timodeus ; im Tikikus im Trofinus, ohwat upu Esya.

5 Eris upyi uhup ara sji ehki, um apan Troas um aitagai cama.

6 Is wat ti pan itac nadiat iji ehki *eris ecaig* nareto is ti leven iran, ecris alhes Filipai aijama, um atga an nelcau an nadiat is faiv, um yetpan Troas ehele ra ; ecris amen *eahki* aijama an nadiat is seven.

7 ¶ An nadiat uhup irai wiik, eris wat asjapicnaig a ilpu atimi alaigaheni par iswiswoplec nareto, is asuptecnaig intas ehele ra a Paulo, is ika aien yi wit lahlah an tak apnyin yi atga o un ; is tas aien um yetpan an nijilhan nepeig.

8 Is ahinag incop alahala an nuarin-neom ijinies iyehki eris asjapicnaig iran ara.

9 Is ateuç an mun-neom intakuras is ethi, nidan Yutikus, is umjeg acen aien: is wat tas opira a Paulo, is umjeg acen aien, um etjo an nuarin-neom ijinies, um ahtaregdei nuarin-neom is ero; eris alcacse yin, ja is mas aien.

10 Is asuol a Paulo um aropjai iran, um ablajeraig pam *yin*, um ika, Akumu atinau aijaua; et umoh aien.

11 Is lep aridjai aien, um aswapplec nareto, um caig, um tas is itu iran, um yetpan an nahraren nepeig, ja par atga o un.

12 Eris imyiapan intakuras iyehki ara is umoh aien, um imyiacitak alupas.

13 ¶ Ecris upyi hup aijama, um atcejja nelcau, um apan Assos, ecris ika aijama ecri leh Paulo eahki, is idivaig nasaig o un; is ika aien yi atga ubos.

14 Is wat uhun pan cama aien Assos, ecris leh yin aijama, um apan Mitelini.

15 Ecris ahes eahki aijama um atga an nelcau, is wat lahlah an tak apnyin, ecris apan aijama ubutpotet Kaios; is wat lep lahlah an tak apnyin, ecris yetpan Semos aijama, um amen Trocilyum; is wat lep lahlah an tak apnyin, ecris yetpan Melitus aijama.

16 Is ika a Paulo yi ahtaregdei Efesus, is esjum aien namenvaig Esysa yi itu iran: is auroauro aien par apan Jerusalem, va nadiat Pen-tekost, el is eti ehka vai yin.

17 ¶ Is abra *atimi* Melitus aien, mika eri apan Efesus ara, um imyiacaj ilpu atimi tas alep an nakalasia.

18 Eris wat apan ehelen ara, is um ika ehele ra aien, Eka ato aijaua nedo unyak ehelemia irai iji adiat, an naopan iyehki kis ham Esysa ainyak, um imyihum pam an naopan ineig,

19 kis aheca o Atua ainyak, um esjilid nupoupo u inliinmopok, is lep ahinag nidi imtak, im nohocred is yetpan irak va ninyiiris *nyak* u nupu Jutaiia:

20 kis eti lep ateri tah nitai ineig ainyak is upene *vai caua*, ja kis ehvaig ehelemia ainyak, um esege imi caua an nasjapicnaig *unyimia*, im lep irai iji innim,

21 um asuptecnaig ehele nupu Jutaiia, im nupu Crisi, mika eri adumoij auliinmopura ara vai Atua, um imyisjis ninivaijec vai Iesu Kristo Natimarid uja.

22 Ekpu lep apan Jerusalem ainyak an naopan ineig vai innerit o inliinmopok, jam eti ato nitai iji eigki etpu yetpan irak eahki:

23 nitai ineig ache, et asuptecnaig a Nesgan Upene irai iji uari-pece, um ika, et aitgaig nyak inwau im nohocred.

24 Ja ek eti imtitaig tah nitai *iji eigki* ainyak, um eti lep aktaktai alupas numoh unyak, vai ekpu ahni nathut unyak ainyak, um imyiacitak, um *atiid* nauritai ineig, kis leh ehele Iesu Natimarid ainyak, par asuptecnaig intas-upene va naiheuc o Atua.

25 Ek idim ato ainyak, nikavaig, aki ti lep almoi nesganimtak aijaua asega, kis cedwei jipe caua ainyak um asuptecnaig intas va nelcau o Atua.

26 Va nitai ineig ek asaig ainyak an nuhup unyimia an nadiat ineigki mika, Ek adicinadicin ainyak vai inja ira atimi asega.

27 Kis eti auatialidi ainyak par asuptecnaig ehelemia intas asega o Atua.

28 Akumu aminjinai caua aijaua, im lep siip *o un* asega is ikni caua ilpu atimi aminjinai ra a Nesgan Upene, par alayi nup an nakalasia o Atua, is auanimta ra aien an ja iran.

29 Ek ato nitai ineigki ainyak, nikavaig, ek wit atga unyak ainyak,

erupu ham ehelema kuri aleg has, um auahas siip o un :

30 erupu lep atidai nahaiji atimi iramia, um asaig intas ahcil, mika eri aibiaig pan itac ilpu atimi alaigaheni ehele ra.

31 Va nitai ineigki akumu aiji aijaua, um imyiehva nedo unyak, nikavaig, kis eti atumop ainyak, um taig, um ated caua asega irai iji adiat im niji epeig, an mesese is dri.

32 Ak ilpu etoak, ek ikni caua ainyak an naopan ineig ehele Atua, im lep intas aiheuc o un ; et emda aien par ahidaig emda inliinmopomia, um alupai caua namen upene ehele ilpu atimi upene asega.

33 Et eti has irak ainyak silver, im colt, im napelumai o un tah :

34 maiya, eka idim ato aijaua, nikavaig, is auritai nikmak ineigki va nitai imyiatamaig nohuk, im lep vai ra eris amen ehelek ara :

35 kis asuptecnaig ehelema ainyak niji itai asega, mika aki idim auritai aijaua um idivai *nyak*, um aiheuc vai ilpu atimi auatialidi, um imyiehva intas o Iesu Natimarid, is ika aien, Et esjilid nimyiacitak ura era tup ahtai itai ara, irai *imyiacitak ura* era leh itai ara.

36 ¶ Is wat asaig ehni nitai iji eigki aien, is atpuse aien, um alaigaheni ehele ra asega.

37 Eris ehteigtaig alupas ara asega, um ablajiraig pam Paulo, um aijumnyi yin ;

38 is esjilid intaig ura vai intas ineigki o un is ika aien, eri ti lep almoi nesganintan ara. Eris ahced yin ara, um apan u nelcau.

NUARIN-TAS ALUPAS 21.

ECRIS wat ude ra aijama, um atceija nelcau, ecris aheldaktit *inpece* Koos aijama um apahai, is wat lahlah an tak apnyin, ecris *apan* Rots aijama, um lep ahes eahki um apahai Patara :

2 ecris ecetai nelcau *eahki* aijama eris ika yi apan Finalsi, ecris ahlaujai iran aijama, um atceijaig.

3 Ecris ecetai Saiprus aijama, um ude pan itac an mouma, um atga an jop um apan Sirya, um apahai Tairus : eris ika eri arah an nelcau eahki.

4 Ecris ecet ilpu atimi alaigaheni aijama, um amen eahki an nadiat is seven : eris ika ara ehele Paulo irai Nesgan *Upene* yi jim apan Jerusalem aien.

5 Is wat ti pan itac nadiat iji ehki, ecris atga unyima aijama ; eris ahced cama ara asega, im ehgara, im ilpu hal *ura*, um yetpan an yipin nuarin-pece *ura* itac : ecris atpuse aijama an nohmunjop, um alaigaheni.

6 Ecris wat aiheuc vaig jipe cama aijama, ecris ahlaujai an nelcau aijama ; eris um lep adumoij pan irai immnin ura ara.

7 Ecris ahes Tairus aijama, um apan an jop, um apahai ehnaijai Tolemees, um aiheuc vai ilpu etoama, um amen ehele ra an nadiat is ethi.

8 Is wat lahlah an tak apnyin, ecris ahes eahki aijama ilpu atimi ahced Paulo, um yetpan Sisaria ; ecris apan aijama anliin neom o Filipus, natimi asuptecnaig intas-upene, is atimi is ethi aien ira atimi is seven iji ehki, um amen ehelen.

9 Is for inhalav atahaig o un, eris tup amen ara, um ahidan nesege.

10 Ecris wat amen aijama *eahki* an nadiat is ahinag, is ahes Jutaia naprofeta is ethi, nidan Acabus.

11 Is apan ehelema aien, um leh nitai ahid o Paulo, um arore nikman im neduon *iran*, um ika, Et ika a Nesgan *Upene*, Et idim ucco erupu arore natimi obuun nitai ahid ineigki a nupu Jutaia *era amen* Jerusalem *ara*, um alupai nup urai taka pece *yin*.

12 Ecris wat atahaijeg nitai iji eigki aijama, ecris ugni *yin* aijama im lep nup eahki, mika yi jim apan Jerusalem aien.

13 Ja is um ika a Paulo, Inhe ineigki eka ago aijaua, par ehteigtaig

um aduoprei inliinmopok? ek mun idim apena ainyak va nika eri arore nyak, im lep vai inmas unyak Jerusalem, va nidai Iesu Natimarid.

14 Is wat eti adai intas *unyima* aien, ecris eti lep imyiisjis *iran* aijama, um ika, Tup Natimarid marom.

15 Is wat ti pan itac nadiat iji ehki, ecris auaraga aijama, um apan Jerusalem.

16 Eris lep ahced cama nahaiji ilpu atimi alaigaheni Sisaria, eris imyiapan *cama* ehele natimi is ethi ara, *nidan* Neson, nupu Saiprus, is upyi alaigaheni aien, mika ecri amen ehelen aijama.

17 ECRIS wat apan Jerusalem aijama, eris leucose cama a ilpu etoama, um imyiacitak.

18 Is wat lahlah an tak apnyin, is ahced cama a Paulo, um apan ehele Jakobus; eris asjapicnaig *eahki* a ilpu atimi tas alep asega.

19 Is aiheuc vai ra aien, um asup-tecnaig athiathi nitai iji eigki is ago a Atua irai nup urai taka pece an nauanaheca o un.

20 Eris wat atahaijeg ara, eris imyiahpas Natimarid ara, um ika ehelen, Ak etoama, na alum nupu Jutaia aiek, era ehcahinag dausant ara era imyiisjis ninvaijec ara; jam apol emda an tas alep ara asega:

21 eris atahaijeg ara, nikavaig, na esege imi nupu Jutaia asega aiek *era amen* ehele nup urai taka pece *ara*, mika eri ude intas alep o Moses ara, um ika eri jim aperitome irai ilpu hal ura, um jim apol an nedo *u nupu Jutaia*:

22 *inti ago* inhe *akaija*? erupu atahaijeg natimi asega, nikavaig, na mun ham aiek: erupu idim asjapicnaig ara:

23 namu idim ago nedo ineig aiek ecri asaig ehelum aijama: era amen ehelema natimi et for et eteuc ira ra intas upyi asaig ura;

24 leucose ra aiek, um ago itaup ra im lep euc, um auanintan nitai ahlap vai ra, mika eri eucosei nidajinira ara: erupu ato natimi asega, nikavaig, et eti *inivaijec* nitai iji eigki eris atahaijeg vai euc ara; jai na ago nedo atoh aiek, um imyiaiji intas alep:

25 ja ecris aged nitasvitai aijama va nup urai taka pece, era imyiisjis ninvaijec ara, mika eri jim ago nedo ineigki ara, jam aminjinai ra va nitai iji eigki er ahlap iran vai ilpu atmas, im lep inja irai itai, im niji itai er alcinwan, im ingaijid.

26 Is leucose natimi iji ehki a Paulo, is wat lahlah an tak apnyin, is ago itaup ra aien, im lep yin, um apan anliin neom ahlap, par asup-tecnaig mika uhpu apos nadiat iji ehki eris ago itaup ra iran, um lep ahlap vai ra asega.

27 Is wat ubutpotet o inti pan itac vaig nadiat is seven iji ehki, eris ecet yin anliin neom ahlap a nupu Jutaia eris ahes Esya ara, eris auahas inliinmopoi atimi asega ara, um arop iran,

28 um ahlaig ijinies, *um ika*, Ak nupu Isreel, atau *imi cama* aijaua; natimi iyehki mun eigki, et auoh intak esege imi atimi asega aien irai iji pece asega vai nupu *Jutaia*, im intas alep, im nimnim ineigki: et mun lep imyiapan nupu Crisi aien anliin neom ahlap, um auahas nitaup an nimnim ineigki.

29 Eris upyi hup ara um ecet Trofimus nupu Efesus ehelen an naurin-pece, eris aktaktai ara, mika is imyiapan yin anliin neom ahlap a Paulo.

30 Eris edemda a *nup* an naurin-pece asega, eris athut natini um asjapicnaig: eris arop irai Paulo an neom ahlap ara, um aihiaig pok ijo yin: eris um atapanes irai eucose neom.

31 Eris ika ara eri atgei yin; ja is yetpan intas ehele natimi alupas esjilid o ilpu eucsupo, nikavaig,

Era ehtauo a *nupu* Jerusalem asega:

32 is auroauro aien um leucse ilpu eucsupo, im ilpu atimi alupas *ura*, um athut pan ehele ra: eris wat ecet natimi alupas esjilid ara im ilpu eucsupo *o un*, eris eropropse ara, um eti aredei Paulo.

33 Is apan ubutpotet a natimi alupas esjilid, um arop iran, um ika eri arore *yin* an natau hat yi ero; is ahoda *atimi* aien, *um ika*, Di neigki? et mun ago inhe aien?

34 Eris asaig tah nitai tah ra, um lep asaig tah nitai tah ra, ira atimi asega: ja is wat ehka vai *yin* nato upene vaig va nehtauo *ura*, is ika aien eri imyiapan *yin* an nimnim o ilpu eucsupo.

35 Is wat yetpan aien an naforofata, eris idim apos *yin* a ilpu eucsupo va natamerit o atimi.

36 Eris apitac natimi is ahinag, um ahlai^g ijinies, *um ika*, Eri atgei *yin*.

37 Eris wat ika eri imyiapan Paulo an nimnim o ilpu eucsupo, is um ika aien ehele natimi alupas esjilid, Et upene vai nyak intasvaig ehelum, ka o'o? Is ika aien, Na ato intas Crisi aiek, ka o'o?

38 na upu Ijipt iyehki aiek, ka o'o, is ehtauo an naopan iyehki aien, um imyiapan an namasacen natimi is for dausant eris atgei atmas ara?

39 Is um ika a Paulo, *O'o*, ek idim upu Jutaia ainyak, eris apos nyak Tarsus, an *pece* Silisya, ek atimi an nuarin-pece esjilid et ethi ainyak: ekugni euc ainyak, mika an asaig aiek ki tas ehele atimi ainyak.

40 Is wat adai *intas o un* aien, is atidai a Paulo an naforofata, um alpoi^gaiji atimi. Is adese neigpa *ira atimi asega*, is tas ehele ra aien an tas Hibu, um ika,

etoak, akumu atahaijeg nyak aijaua, ki tas ehelemia ainyak an naopan ineig.

2 (Eris wat atahaijeg *yin* ara intasvaig ehele ra an tas Hibu, is adese upene neigpa ira ra ara: is ika aien,)

3 Ek idim upu Jutaia ainyak, eris apos nyak Tarsus, an *pece* Silisya, jai kis par alupas ainyak an nuarin-pece ineigki, an neduei Camelyel, eris esege imi nyak mika ki imyiaiji upene intas alep o ilpu retpoi^gja, kis emda ainyak vai Atua, um idivai caua asega an naopan ineig:

4 kis edemda va nedo ineigki ainyak, um atgei *atimi* vaig, um arore ilpu atamaig im ilpu takata, um ikni ra iraili eom ipjin.

5 Et idim ato a natimi esjilid an nahlap, im lep ilpu atimi tas alep asega: kis leucse itasvitai ehele ra ainyak imi ilpu etoa^gija, um apan alaig Tamaskus, mika ki arore ra sji ehki eris amen eahki ara, um imyiapan ra Jerusalem, mika eri atgei ra.

6 Kis wat atga an *nefalai^g* ainyak, wat ubutpotet pan Tamaskus an nadiatadiat, is idim auroauro um ememina inlah alupas an nohatag um arahed irak:

7 kis eropse an nobolitan ainyak, um atahaijeg nohran tah, is ika ehelek, Ak Saulo, ak Saulo, na auri aiek par atmas vai nyak?

8 Kis ika ainyak, Aiek tah Natimarid a di aigko? Is um ika ehelek aien, Ek Iesu an Nasared ainyak, na atmas vai nyak aiek.

9 Eris idim almoi inlah a ilpu atimi ahced nyak, um imtitaig; jam eti atahaijeg nohran natimi ineig is tas ehelek aien.

10 Kis ika ainyak, Inki ago inhe ainyak, ak Natimarid? Is um ika ehelek a Natimarid, Atidai aiek, um apan Tamaskus; uhpu asup-tecnaig ehelum eahki nitai iji eigki asega eris idim ika napu ago aiek.

NUARIN-TAS ALUPAS 22.

1 AK ilpu atimi alupas, ilpu

11 Kis eti alum itai ainyak va nememina o inlah iyehki, eris atau an nikmak a ilpu atimi ahced nyak, um imyiapan nyak Tamaskus.

12 *Is amen eahki* natimi is ethi, *nidan* Ananaias, is apos upene intas alep aien, eris asan tas upene vai yin a nupu Jutaia asega eris amen *eahki* ara:

13 is yetpam ehelek aien, um aiji ithak, um ika ehelek, Ak etoak Saulo, etmu lep lah nesganintam aiek. Kis alum yin ainyak tup an nuarin-nadiat iyehki.

14 Is ika aien, Is ati euc a Atua o ilpu retpoija, mika an ato aiek intas o un, um alum Natimi Upene iyehki, um atahaijeg noh-ran:

15 napu atimi asuptecnai yin aiek ehele atimi asega, va nitai iji eigki as almoi aiek um atahaijeg vaig:

16 na auri aiek pah tup amen? atidai aiek, um leh nabaptiso iram, um yiri euc va nedo has unyum, um arohoan nidai Natimarid.

17 Kis wat adumoij pan Jerusalem ainyak, um alaigaheni anliin neom ahlap, kis ahuumtidec ainyak;

18 um ecet yin is ika ehelek aien, Auroauro aiek, um efi ahes Jerusalem, um atga unyum: va nedo ura, nikavaig, eri eti leh intas asuptec-naig nyak unyum ara.

19 Kis ika ainyak, Ak Natimarid, era ato ara, nikavaig, kis atapanes ilpu atimi asgeig iram ainyak iraili eom ipjin, um aredei ra iraili eom alaigaheni asega *ura*:

20 eris wat atladwi inja irai Stifanus, natimi asuptecnai euc iyehki, kis aiji ubutpotet ainyak, um adai *intas ura* vai inmas o un, um lep aminjina apelumai ura eris atgei yin ara.

21 Is um ika ehelek aien, Apan aiek: ekpu abrai euc ainyak mika an apan aiek itac acen ehele nup urai taka pece.

22 ¶ Eris atahaijeg yin ara um

yetpan u intas ineigki, ja eris par ahlaig ijinies ara, um ika, Eri atgei nat naico an nobohtan: et eti upene vai yin numohvaig.

23 Eris ahlaig ijinies ara, um aduacrei ira apelumai *ura*, um eh-rinma an nohatag;

24 is um ika a natimi alupas esjilid, eri imyiapan yin an nimnin o ilpu eucsupo, is ika aien yi aredei yin par ahilek nedo o un, um ato, nikavaig, eris ehtauo vai yin ara is ucce vanhe.

25 Eris wat arore yin ara irai wau, is ika a Paulo ehele natimi alupas o ilpu eucsupo is aiji ubutpotet *ehelen* aien, Et itaup vai caua, ka o'o, naredeivaig natimi ineig et upu Roma aien, eris eti asaig nedo has o un?

26 Is wat atahaijeg a natimi alupas o ilpu eucsupo, is apan aien um asaig ehele natimi alupas esjilid, um ika, Aktaktai nitai ineig napu ago aiek; et upu Roma a natimi ineigki.

27 Is apan a natimi alupas esjilid, um ika ehelen, Asuptecnaig ehelek aiek, na upu Roma aiek, ka o'o? Is um ika aien, Maiya.

28 Is um ika a natimi alupas esjilid, Kis auaniintan alupas natimi alupas ineigki ainyak. Ja is ika a Paulo, Eris wat apos nyak, *kis idim hisko ainyak*.

29 Eris auroauro um ude yin a ilpu atimi iji ehki eris ika ara eri aredei yin: is wat ato a natimi alupas esjilid mika is upu Roma aien, is imtitaig aien va narore yin vaig o un.

30 Is wat lahlah an tak apnyin, is merit aien nato upene vaig nitai iji eigki eris atijai iran a nupu Jutaia, va nitai ineigki is ahiyi yin aien, um ika ehele ilpu atimi ahlap esjilid im ilpu atimi alupas asega ura, eri asjapicnaig ara, is imyiapan Paulo *ehele ra* aien, um ati yin an nuhup ura.

NUARIN-TAS ALUPAS 23.

1 IS almaiijidjid jipe ilpu atimi alupas asjapicnaig a Paulo, um ika, Ak ilpu etoak, kis ago nedo upene ainyak an nuhup o Atua um imyihum pam an naopan ineig.

2 Is ika a Ananaias, natimi esjilid an nahlap, ehele ra eris aiji ehelen ara, eri ahpoi nippineucsen.

3 Is um ika ehelen a Paulo, Etpu lep ahpoi euc a Atua, ak nathatahau ahi: na ateuc aiek par ahilek nedo unyak, et idivaig intas alep, ja na idim edwedwai intas alep aiek, um ika eri ahpoi nyak!

4 Eris um ika ara sji ehki eris aiji *ehelen* ara, Na idim asan tas has vai natimi esjilid an nahlap o Atua aiek.

5 Is um ika a Paulo, Ak ilpu etoak, ek mun eti ato ainyak, nikavaig, natimi esjilid an nahlap ineigki: eris aged, *um ika*, "Jim asan tas has aiek vai natimi alupas an pece unyum."

6 Is wat ato a Paulo, nikavaig, eris ilpu Satusi nahaiji ra, um lep ilpu Farisi nahaiji ra, is efehtas aien an nuhup u ilpu atimi alupas, *um ika*, Ak ilpu etoak, ek Farisi ainyak, um lep inhal o Farisi: er ahilek nedo unyak, va nitai ineig, nikavaig, ek aitga atimi emesmas ainyak mika eri anusjai vai inmas *ura*.

7 Is wat uce intas o un, eris ehtauo jipe a ilpu Farisi im ilpu Satusi: is lep acheiachai jipe intas o atimi asega.

8 Era ika a ilpu Satusi, eri eti lep anusjai natimi, um eti eteuc a ilpu agelo im nesga *atimi*: ja era ika a ilpu Farisi et inivaijee nitai iji eigki asega.

9 Is atupun nimyisjis itai esjilid: eris atidai a ilpu atimi esege irai ilpu Farisi, um imyisjis itai, um ika, Ecra eti ecetai tahi nedo has ehele natimi ineigki aijama: ja el is tas ehelen tahi nesga *atimi*, ka tahi

nagelo, ti jim ati nedoa vai Atua akaija.

10 Is wat esjilid nehtauo *ura*, is intitaig a natimi alupas esjilid o ilpu eucsupo, va eri jim atgeig yamud Paulo ara, is abrai ilpu eucsupo aien mika eri apan ara, um atoraliaik yin ira ra, um imyiapan *yin* an nimmim o ilpu eucsupo.

11 ¶ Is wat epeig, is aiji ehelen a Natimarid, um ika, Etmu emda inliinmopom aiek, ak Paulo: na mun idim asuptecnaig nyak aiek Jerusalema, et un ucco, eris idim ika napu lep asuptecnaig nyak aiek Roma.

12 IS wat lahlah an tak apnyin, eris teduarin nahaiji nupu Jutaiia, um asjis *vai yin*, um ika eri eti hag ara um eti umwig, jam upyi hup um atgei Paulo.

13 Eris forte ara sji ehki um eled, eris teduarin ara.

14 Eris apan ehele ilpu atimi ahlap esjilid ara, im ilpu atimi tas alep, um ika, Ecra asjis vai Paulo aijama, mika ecra eti hag, jam upyi hup um atgei yin:

15 va nitai ineigki akumu aged nitasvitai aijaua, im lep ilpu atimi alupas, imi natimi alupas esjilid o ilpu eucsupo mika yi imyiapan yin ehelemia aien imraig, va nika unyimia aki ahodaig upene yin va nedo o un: ecra imyiiris aijama par atgei yin, inyi idim eti apam ubutpotet aien.

16 Is wat atahaijeg a inhal o nat-ahaig irai Paulo, nikavaig, eris atpajinai *yin* ara, is apan aien an nimmim o ilpu eucsupo, um asaig ehele Paulo.

17 Is ahlaig vai natimi alupas o ilpu eucsupo is ethi a Paulo, um ika, Imyiapan intakuras ineigki aiek ehele natimi alupas esjilid *unyimia*: et merit aien nasuptecnaigvaig ehelen tahi nitai.

18 Is leh yin aien, um imyiapan *yin* ehele natimi alupas esjilid, um ika, Is ahlaig vai nyak a Paulo,

natimi eris arore yin, um ugni *nyak* mika ki imyiapam intakuras ineigki ainyak ehelum, et merit aien nasuptecnaigvaig ehelum tah nitai.

19 Is atau an nikman a natimi alupas esjilid, um echim imyiapan *yin* an taka uarin, um ahodai *yin*, um ika, Inhe ineigki nai merit aiek mika an asuptecnaig ehelek?

20 Is um ika aien, Era mun ehraa ika a nupu Jutaia eri ugni euc, mika an imyiapan Paulo aiek ehele ilpu atimi alupas imraig, va nika ura eri ahodaig upene yin va nedo o un:

21 ja an jim adai intas ura aiek: era atpajinai yin natimi et forte um eled ira ra, eris asjis ara, um ika, eri eti hag um eti umwig, jam upyi hup um atgei yin: era imyiiris *yin* ara an naopan ineig, um aitaig intas unyum.

22 Is abraia intakuras iyehki a natimi alupas esjilid, mika yi atga o un, um ika, Jim asaig ehelen tah natimi aiek mika na mun asuptecnaig nitai iji eigki ehelek.

23 Is ahlaig vai ohwat atimi alupas o ilpu eucsupo aien, um ika, Arumu yecrei ilpu eucsupo inyi tu huntret aijaurau, im ilpu atimi atga a hors inyi sevente, im ilpu atimi apos mopul hat inyi tu huntret, par apan Sisaria an jupjupura;

24 um ikni hal hors va uhpu atijai Paulo iran, um imyiapan upene *yin* ehele Filiks natimarid.

25 Is lep aged nitasvitai aien et idivaig ineig, *um ika*,

26 Ak Filiks natimarid, na esjilid aiek, ek aiheuc vai euc ainyak Clatys Lisyas.

27 Eris arop irai natimi ineigki a nupu Jutaia, um ika eri atgei yin: ja kis wat ato ainyak, nikavaig, is upu Roma aien, kis apan ainyak im lep ilpu eucsupo, um imyiahraa yin.

28 Kis merit ainyak natovaig nitai iji ineigki eris atijai iran, um imyiapan yin an nuhup u ilpu atimi alupas ura:

29 ja kis ecetai ainyak eris atijai iran niji itai er imyiisjis itai vaig an tas alep ura, jam eti atijai iran tah nitai ineig uhpu atgei yin vaig, ka arore yin vaig.

30 Eris wat asuptecnaig ehelek, mika eris atpajinaig natimi ineigki a nupu Jutaia, kis auroauro ainyak um abraig pan *yin* ehelum, um lep ika ehele ilpu atimi atijai itai *iran*, eri asuptecnaig nedo o un ara an nuhup unyum. Kaiheuc vai euc.

31 Eris leh Paulo a ilpu eucsupo, is idivaig eris asaig ehele ra, um imyiapan *yin* Antipatris an nepeig.

32 Is wat lahlah an tak apnyin, eris ude ilpu atimi atga a hors ara par ahced yin, um lep adumoiy pan an nimmim o ilpu eucsupo:

33 eris wat yetpan Sisaria ara, eris alupai natimarid nitasvitai iyehki ara, um ati Paulo an nuhup o un.

34 Is esvi a natimarid, ja par ahodaig inpece o un. Is wat ato aien, nikavaig, *is* upu Silisya aien,

35 is ika aien, Ekpu atahajeg euc ainyak, eru wit lep ham a ilpu atimi atijai itai iram. Is ika aien eri aminjinai yin anliin neom tas alep iran o Herot.

NUARIN-TAS ALUPAS 24.

IS wat ti pan itac nadiat is faiv, is asuol a Ananaiaa natimi esjilid an nahlap, im ilpu atimi tas alep, im lep natimi tas esjilid is ethi, *nidan* Tertullus, eris asuptecnaig nedo o Paulo ara ehele natimarid.

2 Eris wat imyiapan *Paulo*, is atupun a Tertullus um atijai itai *iran*, um ika, Ak Filiks, na esjilid aiek,

3 va nitai ineigki, nikavaig, eera idim amen upene aijama vai euc, er lep ago nedo upene an pece ineigki irai iji adiat, im lep irai iji uarin asega, va narapakau unyum,

ecra leli *nupene ineig* aijama, um naaurineig alupas vai euc.

4 Ja nimyidohalav euc neig unyak, ek ugni euc ainyak, mika an aiheuc *vai cama* aiek, um atahaijeg intas ipjidipjid unyima.

5 Ecra ato aijama, nikavaig, et atimi auatatimi a nat eigki, um auahas inliinmopoi nupu Jutaia asega irai iji pece asega, et lep atimi esjilid aien ira ra era apol ira alaigheni u nup an Nasared ara:

6 is lep ika aien yi auahas nitaup anliin neom ahlap: ja ecriis arop iran aijama, um ika ecri aru nedo has o un et idivaig intas alep unyima;

7 ja is apam *ehelema* a Lisyas, natimi alupas esjilid o ilpu eucsupo, um atoraliaik emda *yin* an nikmama,

8 um ika ehele ilpu atimi atijai itai iran eri ham ehelum ara: na wit ahodai yin aiek, napu ato aiek nitai iji eigki asega ecra atijai iran aijama.

9 Eris ehresaig a nupu Jutaia, um ika, is idim ucco nitai iji eigki.

10 Is wat imyiarop nidjimin a natimarid vai Paulo mika yi asuptecnaig aien, is tas aien, *um ika*, Ek ato ainyak, nikavaig, as idim atimi tas alep aiek an pece ineigki an mesese is ahinag, va nitai ineigki ek eti imtitaig ainyak nasuptecnaigvaig *nedo* unyak:

11 et tup upene vai euc natovaig, mika kis apan Jerusalem ainyak, um alaigheni, ja par ti pan itac nadiat is twelv:

12 eris idim eti ecet nyak ara anliin neom ahlap, ka iraili eom alaigheni *ura*, ka an nuarin-pece iyehki, nimyisjis itai vaig ehelen tah, ka nauahasvaig inliinmopoi atimi:

13 et lep ehka vai ra nago inivaijec vaig nitai iji eigki, era atijai irak ara:

14 ja ek asuptecnaig nitai ineigki ehelum ainyak, nikavaig, ek alaigheni vai Atua o ilpu retpok ainyak, an nedo ineigki era anvi nidan ara par ika intakitai, um imyisjis nini-

vaijec nitai iji eigki asega, eris aged an tas alep im lep *an tas u* ilpu profeta:

15 ek lep asgeig irai Atua ainyak, era lep asan tas ineigki ara, mika erupu anusjai natimi vai inmas *ura*, ilpu atimi upene im lep ilpu atimi auatatimi:

16 ek auritai ainyak an nedo ineigki, mika yi upene inliinmopok ainyak vai Atua im lep *va* atimi irai iji adiat:

17 is wat ti pan itac inmesese is ahinag, kis ham ainyak, um apos naiheuc vai nup uran pece unyak, im niji itai ahlap:

18 *kis* wat *ago* nedo ineigki *ai-nyak*, eris ecet nyak anliin neom ahlap nadicinadicinvaig hal upu Jutaia eris ahes *Esya* ara, ja *kis* eti *amen* ehele atimi is ahinag *ai-nyak*, is eti lep eteuc nehtauo;

19 el era ato tah nitai vai nyak ara, el et upene vai ra napamvaig igcaki an nuhup unyum, um atijai *irak*:

20 el eris ecetai tah nedo has unyak ara sji eigki an naiji unyak an nuhup u nasjapicnaig o ilpu atimi alupas *ura*, erumu lep asuptecnaig ara;

21 intas is ethi ache ineigki, nika-vaig, kis aiji ainyak an nuhup *ura*, um efehtas, *um ika*, Er ahilek nedo unyak an naopan ineig va nusjai o atimi vai inmas *ura*.

22 ¶ Is wat atahaijeg nitai iji eigki a Filiks, is acaiji ra aien, va nupyi ato upene nedo ineigki o un, um ika, Et wit ham a Lisyas natimi alupas esjilid o ilpu eucsupo, ekpu ahilek upene nitai iji eigki unyimia ainyak.

23 Is ika aien ehele natimi alupas o ilpu eucsupo yi aminjinai Paulo aien, um jim arore yin, um jim acaiji ilpu etoan mika eri jim ham ehelen ara, um aheca *o un*.

24 Is wat ti pan itac nadiat is eti elpat, is han a Filiks im Trusilla ehgan, is takata Jutaia aien, is ahlaig vai Paulo aien, um atahaijeg intas

o um va nimyiisjis ninivaijec vai Kristo.

25 Is tas aien va nedo atoh, im nedo upene, im *nadiat* almaijidjid etpu yetpam, ja is ucjucujaij a Filiks, um ika, Atga unyum aiek an naopan ineig; ek wit tup eklim amen ainyak, ja par ahlaig vai euc.

26 Is lep aktaktai aien mika etpu alupai yin mune a Paulo, mika yipu atcejaij yin aien: va nitai ineigki is ehcahinag ahlaig vai yin aien, um tas ehelen.

27 Is wat ti pan itac inmesese is ero, is isjipigmoig Filiks a Porsyus Festus: ja is merit a Filiks mika yi upene inliinmopoi nupu Jutaia vai yin, va nitai ineigki is ude Paulo aien an narore yin vaig.

NUARIN-TAS ALUPAS 25.

IS wat han a Festus an pece iyehki is atimarid iran aien, is amen Sisaria aien an nadiat is esejj, ja par ahes eahki um apan Jerusalem.

2 Is tas ehelen vai Paulo a natimi esjilid an nahlap, im ilpu atimi alupas o nupu Jutaia, um ugni emda yin,

3 mika yi leh imi ra aien vai yin, um abra atimi eri imyiapan yin Jerusalem; ja uhpu atpajijnai yin an nefalaig par atgei yin.

4 Ja is ika a Festus, Uhpu aminjina Paulo Sisaria, um lep ika, Ekpup lep apan ainyak *eahki* tupko.

5 Is lep ika aien, Erumu ahced nyak a ilpu atimi emda iramia, um apan, um atijai itai irai natimi iyehki, el et eteuc tah nedo *has* o un.

6 Is amen ehele ra aien an nadiat is ten um eled, ja par asuol Sisaria; is wat lahlah an tak apnyin, is ateuc aien an nitai ateuc ineig eh tas alep iran, um ika eri leh pan Paulo.

7 Is wat apan aien, eris aiji arahed *iran* a nupu Jutaia eris ahes Jerusalem ara, um atijai irai Paulo

intas asuptecnaig is ahinag um has, ja is ehka vai ra nago inivaijec vaig.

8 Ja is asuptecnai yin aien, um ika, Kis idim eti ago tah nedo has ainyak vai intas alep o nupu Jutaia, ka va neom ahlap, ka vai Sisar.

9 Ja is merit a Festus mika yi upene inliinmopoi nupu Jutaia vai yin, va nitai ineigki is tas aien, um ika, Nai merit aiek napanvaig Jerusalem, mika eri ahilek nitai iji eigki eahki an nuhup unyak, ka o'o?

10 Is um ika a Paulo, Ek aiji ainyak an nuhup u nitai ateuc o Sisar eh tas alep iran, inuarin ineig eris idim ika eri ahilek nedo unyak iran: kis eti ago tah nedo has vai nupu Jutaia ainyak, na idim ato aiek:

11 el ekis ago nedo has ainyak, ka tah nedo ineig et upene inmas vaig, ek eti esjum ainyak inmasvaig: ja el et eti *inivaijec* nitai iji eigki era atijai irak ara, inyi ehka vaig tah tup natcejaij nyak vaig imi ra: ek arohoai Sisar ainyak.

12 Is tas jipe a Festus im ilpu atimi alupas, ja par ika, Na mun arohoai Sisar aiek; napu idim apan ehele Sisar aiek.

13 Is ti pan itac nadiat is eti elpat, ja erus apan Sisaria a Acrippa natimarid im Bernaisi, par aiheuc vai Festus.

14 Erus amen eahki arau ira adiat is ahinag, ja is par asuptecnaig intas vai Paulo ehele natimarid iyehki a Festus, um ika, Et amen igcaki natimi et ethi, is ude yin a Filiks an narore yin vaig:

15 kis wat amen Jerusalem ainyak, eris tas vai yin ehelek a ilpu atimi ahlap esjilid, im ilpu atimi tas alep Jutaia, um ugni *nyak*, mika ki asuptecnaig nimitan imi yin ainyak.

16 Kis tas ehele ra ainyak, um ika, Et ti nedo o nupu Roma in-

eigki par tup atceijaig tah natimi mika eri atgei yin; *nedo ura ineigki*, era ati natimi ineig ara er atijai itai iran an nuhup u atimi iji eig era atijai itai *iran* ara, um ika ehelen yi asuptecnaig nitai iji eigki aien er atijai *iran*.

17 Va nitai ineigki, eris wat ham ara igcaki, is wat lahlah an tak apnyin, kis auroauro ainyak um ateuc an nitai ateuc ineig eh tas alep iran, um ika eri leh pam *ehелек* natimi ineigki.

18 Eris wat atidai a ilpu atimi atijai itai iran, eris eti asuptecnaig nitai iji eigki ara kis aktaktai ainyak vaig;

19 jai hal itai inyiisjis itai vaig an nalaigaheni ura, im lep vai natimi is ethi, *nidan* Iesu, is mas aien, ja is ika a Paulo, et umoh aien.

20 Kis wat eti ato ainyak nahilek-vaig nitai iji eigki, kis ahodai *yin* ainyak, *um ika*, Nai merit aiek napanvaig Jerusalem, ka o'o, mika eri ahilek nitai iji eigki eahki?

21 Ja is wat arohoai Acustus a Paulo, mika eri aminjinai yin yipu atahaijeg *yin* aien, kis ika ainyak eri aminjinai yin um imyihum pan an naopan iyehki, ekpu imyiapan yin ainyak ehele Sisar.

22 Is um ika ehele Festus a Acrippa, Ek merit ainyak natahaijegvaig natimi ineigki. Is um ika aien, Napu idim atahaijeg yin aiek imraig.

23 Is wat lahlah an tak apnyin, is apan a Acrippa im Bernaisi, erus yecrei upene rau arau, erus apan arau anliin neom eh tas alep iran, im lep ilpu atimi alupas esjilid o ilpu eucsupo, im ilpu atimi alupas an nuarin-pece iyehki; is abra *atimi* a Festus, ja eris par leh pan Paulo.

24 Is ika a Festus, Ak Acrippa natimarid, im ilpu atimi alupas asega, eka mun asjapicnaig pam ehelema aijaua, eka almoi natimi *ineigki* aijaua, eris imyiisjis itai

irak vai yin a nupu Jutaia asega Jerusalem, im lep igcaki, um efehtas, um ika, Eris idim ika yi jim umoh aien.

25 Ja kis wat ato ainyak, nika-vaig, is eti ago tah nedo ineig aien eri atgei yin vaig, is wat lep arohoai Acustus aien, kis ika ainyak ki imyiapan yin *ehelen*.

26 Ja ek eti ato tah nitai ineig ainyak, ekpu aged vai yin imi natimarid *unyak*; va nitai ineigki ek mun imyiapan yin ainyak an nuhup unyimia, im lep esjilid an nuhup unyum, ak Acrippa natimarid; uhu wit ahilek nedo o un, kit ekpu ato tah nitai ainyak par aged:

27 et idim eti upene vai nyak ninyiapanvaig tah natimi ineig eris arore yin, jam eti asuptecnaig nedo has ineig er atijai iran.

NAURIN-TAS ALUPAS 26.

1 IS um ika a Acrippa ehele Paulo, Eris ika, namu ispum asuptecnaig nedo unyum aiek. Is atgeig yapidi nikman a Paulo, um tas, *um ika*,

2 Ak Acrippa natimarid, ek ika ainyak ek mun ahesmoij, va nitai ineig, nikavaig, ekpu auud yi aijiraig nitai iji eigki asega ainyak an nuhup unyum an nadiat ineig, era atijai *irak* a nupu Jutaia:

3 na idim ato upene aiek nedo asega o nupu Jutaia, im nitai iji eigki er inyiisjis itai vaig: va nitai ineigki ek ugni euc ainyak, mika an jim auatiemda irak aiek um atahaijeg nyak.

4 Eris ato a nupu Jutaia asega nedo unyak an takuras *unyak*, um imyihum pam an naopan ineig, an nupyi amen unyak ehele nup uran pece unyak Jerusalem;

5 eris ato nyak ara itu acen (el era ika ara eri asuptecnaig) mika kis apol ainyak irai ilpu Farisi, um imyiaiji nalaigaheni ineig iraija is opouc nagovaig.

6 Ja ek aiji ainyak an naopan ineig mika eri tas alep vai nyak, va nitai ineig, nikavaig, ek eteuc ainyak an tas upyi asaig o Atua ehele ilpu retpoja:

7 Era lep aitgaig a ilpu mapoi ilpu hal o Isreel et twelv, mika eri yetpan an *tas upyi asaig* ineigki, um alaigaheni irai iji adiat im niji epeig. Ak Acrippa natimarid, era atijai itai irak a nupu Jutaia vai *intas upyi asaig* iyehki ek lep aitgaig ainyak.

8 Eka auri aijaua par ika et ehka vai Atua nimyianusjai ilpu atimi emesmas vaig?

9 Kis idim aktaktai ainyak, eris idim ika ki ago niji itai et ahinag yi has va nidai Iesu nup an Nasared:

10 kis lep ago nedo ineigki ainyak Jerusalem, um atapanes ilpu atimi upene is ahinag iraili eom ipjin, kis leh intas alep o ilpu atimi ahlap esjilid ainyak; eris wat atgei ra, kis lep adai intas vai *ra* ainyak:

11 kis lep ehcahinag abli ra ainyak iraili eom alaigaheni asega, um imyiisjis itai mika eri asan tas has ara; is esjilid acen intavaitap unyak ira ra, kis atmas *vai ra* ainyak, um yetpan irai taka uari-pece.

12 *Kis* wat ago nedo ineigki ainyak um apan alaig Tamaskus, um *apos* intas alep o ilpu atimi ahlap esjilid, eris abrai nyak ara;

13 ak natimarid, is wat adiatadiat, kis ecetai inlah an nefalaig ainyak, is ahes an nohatag, is esjilid nememina o un irai nagesega, is ememina um arahed irak, im lep ira ra eris ahced nyak ara.

14 Ecris wat eropse an nobohtan aijama asega, kis atahaijeg nohran tah ainyak, is ika ehelek an tas Hibru, Ak Saulo, ak Saulo, na auri aiek par atmas *vai* nyak? et ehka vai euc natgaig pan itac vaig neduom irai idjai mopol.

15 Kis ika ainyak, Aiek tah na-

timarid a di aigko? Is um ika aien, Ek Iesu ainyak na atmas vai nyak aiek:

16 jam atidai aiek, um aiji: ek mun ehcohos ehelum ainyak va nitai ineig, mika ki ati euc mika an aheca *unyak* aiek, um atimi asuptecnaig nitai iji eigki na mun ecetai aiek, im lep nitai iji eigki ekpu ehcohos pam iran ehelum ainyak;

17 ekpu imyialhras euc ainyak vai nupu *Jutaia*, im lep *vai* nup urai iji taka pece ekpu abraig pan euc ira ra ainyak,

18 va apu asalgei nesganimtara aiek, mika eri ahidai ra an naupat pam u inlah, um lep *ahidai ra* u nemda o Satana pam iran u Atua, va uhpu eti aru nedo has ura, mika eri ehrileh namen upene ehele ilpu atimi upene, va nasgeig irak *ura*.

19 Va nitai ineigki, ak Acrippa natimarid, kis eti imyipalea nitai ehvaig iyehki ainyak is ahes an nohatag:

20 jam upyi hup um asuptecnaig ehele ra Tamaskus, im lep Jerusalem, im lep irai iji uari pece Jutaia, im lep ehele nup urai taka pece, mika eri adumoij anliinmopura ara, um ahidaig pan ra ehele Atua, um ago nauritai iji eigki et upene va nadumoijvaig *ura ara*.

21 Va nitai iji eigki eris imyiarop irak a nupu Jutaia anliin neom ahlap, um ika eri atgei *nyak*.

22 Ja is atau imi nyak a Atua, va nitai ineigki ek emda ainyak um aiji um uhum pam an naopan ineig, um asuptecnaig ehele tup atimi im lep ehele ilpu atimi alupas, um asaig nitai iji eigki ache, eris asaig a ilpu profeta im lep Moses, um ika, etpu yetpam:

23 eris idim ika etpu mas a Kristo, um lep uhup um nusjai vai inmas o *un*, um ehvaig inlah ehele nupu *Jutaia*, im lep ehele nup urai iji taka pece.

24 Is wat ucce intas o *un*, is efeltas a Festus, *um ika*, Ak Paulo, na ahnag aiek; na idim ahnag aiek va

nato niji itai asvi itai et ahinag unyū.

25 Ja is ika aien, Ak Festus, na esjilid aiek, ek eti ahnag ainyak, jam asan tas inivaijēc um arapakau :

26 et ato nitai iji eigki a natimarid ineig, ek tas emda ainyak an nuhup o un : ek idim ato ainyak, nikavaig, er eti adenaig tah nitai iji eigki vai yin ; eris eti ago nitai ineigki an nuarin adenaig :

27 ak Acrippa natimarid, na imyisjis ninivaijēc ilpu profeta aiek, ka o'o ? ek ato ainyak mika na imyisjis ninivaijēc aiek.

28 Is um ika a Acrippa ehele Paulo, Et mun ubutpotet u nahidaig nyak vaig ainyak mika ki atimi o Kristo vai intas unyū.

29 Is ika a Paulo, Ek ugni Atua ainyak, mika an eti idivaig nyak tintin aiek, im lep ra sji eigki asega era atahaijēc nyak ara an nadiat ineigki, jam idim idivaig nyak asega, nitai arore iji eigki ache.

30 Is wat ucece intas o un, erus atidai natimarid is ero crahki, im Bernaisi, im lep ra eris ateuc ehele ehtaij ara.

31 Eris wat atga ura ara, um tas jipe, um ika, Is eti ago tah nitai a natimi ineigki uhpu atgei yin vaig, ka imyarore yin.

32 Is um ika a Acrippa ehele Festus, El is eti arohoai Sisar a natimi ineigki, el eh mun atceijai yin.

NUARIN-TAS ALUPAS 27.

E RIS wat ika ecri atga an nelcau an pece Itale aijama, eris ati Paulo im lep nahaiji ilpu atimi eris arore ra ehele *natimi is ethi*, nidān Juleus, natimi alupas o ilpu eucsupo iji ehki *eris anvi nidara mika* Ilpu eucsupo o Akustus.

2 Ecris aridjai aijama an nelcau is ahes Atramityum, um atceijai, mika ecri athut tarere an yipin pece

Esya ; is amen ehelema a Aristarkus nupu Desalonaika an pece Masetonea.

3 Is wat lahlah an tak apnyin, ecris atise inhititautau aijama Saiton. Is ago nedo upene vai Paulo a Juleus, um ika yi apahai ehele ilpu etoan aien, eri aiheuc vai yin ara.

4 Ecris ahes eahki aijama, um lep atceija *nelcau*, um athut tarere an yipin pece Saiprus va nintinjop has.

5 Ecris apaahni an tuboahau Silisya im Pamfilya aijama, ja par apahai Maira, *inuarin-pece* an *pece* Lisya.

6 Is ecetai nelcau is ethi a natimi alupas o ilpu eucsupo is ahes Aleksantrea, eris ika yi apan Itale ; is ikni cama iran aien.

7 Ecris tup eklim athut aijama an nadiat is aninag, um uhum pan Naitus, ja is ehka, is has nintinjop ; ja ecris athut tarere aijama an yipin pece Kriti, ubutpotet u Salmoni ;

8 is idim ehka, ja ecris alhtaregdei aijama, um apan an nuarin is ethi nidān Nafaiava Upene ; et ubutpotet pan o un nuarin-pece Lasia.

9 Is ti pan itac nadiat is ahinag, is lep ehka naheledvaig an naopan iyehki, is idim ti pan itac nadiat atwakam, va nitai ineigki is tas ehele ra a Paulo,

10 um ika, Ak ilpu atimi alupas, ek ato ainyak mika inyi ehka um has acen inheldai ineigki, vai nelcau, im niji itai iran, im lep nohuja.

11 Ja is eteuc an tas o natimi alupas im natimi ohuun nelcau a natimi alupas o ilpu eucsupo, jam eti eteuc an tas ineig is asaig a Paulo.

12 Is eti upene nafaiava iyehki namenvaig *iran* an naopan ehio, va nitai ineigki eris ika nahaiji ra is ahinag, eri ahes eahki ara um atceija *nelcau*, el et eti ehka napanvaig Finiks, um amen eahki an naopan ehio ; nafaiava an pece Kriti iyehki, et tahijpen vai nuritoga atahaig, im lep natokorau.

13 Is wat eklim ata nuritoga atamaig, eris aktaktai ara mika eris mun leh inmerit *ura* ara, eris atceija *nelcau eahki* ara, um athut tarere an yipin pece Kriti.

14 Ja is eti laulau um apok eahki nehio alupas, nidan Yurokliton.

15 Is uhun pan nelcau, is ehka nahauvaig nohuun nimtinjop, ecris lep atai aijama.

16 Ecris athut tarere aijama an yipin haklin-pece Klata, is ehka vai cama inlehvaig bot:

17 eris wat aiyihijai ara, eris ago upene itai ara, um arorapicnaig nelcau; eris imtitaig ara va yi jim ecetaig an nauanavig, eris iknise ipan ara, is atga an nidjin nelcau.

18 Is ahlapitpit alupas irama aijama nehio, is wat lahlah an tak apnyin, eris arah an nelcau ara;

19 is wat ti pan itac nadiat is eseij, ecris ethaigse an *jop* niiji itai an nelcau aijama.

20 Is eti ehcohos nagesega im lep inmoiyeuv ira adiat is ahinag, um lep esjilid nehio, ecris aktaktai aijama mika ecrumu eti umumoh.

21 Ecris eti hag aijama ira adiat is ahinag, ja is par atidai a Paulo an nuhup ura, um ika, Ak ilpu atimi alupas, eris idim ika aki imyiaiji intas unyak aijaua, um eti atceija *nelcau* Kriti, el et eti eteuc niiji itai ehka um has iji eigki;

22 ja ek asaig ehelemia ainyak an naopan ineig mika yi emda inliinmopomia aijaua: inyi eti auah tah anuarin tah caua, nelcau ache:

23 et mun idim aiji ehelek an nepeig ineigki a nagelo o Atua ineig, ek *aheca* o un ainyak, um alaigaheni vai yin,

24 um ika, Jim imtitaig aiek, ak Paulo; -eris idim ika napu aiji aiek an nuhup u Sisar: et mun idim lep alupai euc ra asega a Atua, eka ehratga aijaua an nelcau.

25 Va nitai ineigki etmu emda inliinmopomia aijaua, ak ilpu atimi alupas: ek idim eteuc an tas o Atua

ainyak, mika uhpu idivaig eh mun asaig ehelek.

26 Ja eris idim ika intupu poijigjigse akaija an haklin-pece inyi ethi.

27 Is wat ti pan itac nadiat is fortiin wat lep epeig, ecris apetpet jipe aijama an *jop* Etreia, eris aktaktai a ilpu atimi aminjina nelcau mika eris mun ubutpotet pahai an tah anpece;

28 eris atagat ara, um ato, mika is twente fadom: eris eti elvathut ara, ja par lep atagat, um ato, mika is fiftiin fadom.

29 Eris imtitaig ara va yi jim ecetaig an moiجه, eris atise inhititautau is for ara an nilpun nelcau itac, um merit mika yi fi adiat.

30 Eris ika a ilpu atimi aminjina nelcau eri ahna an nelcau ara, eris atise bot an *jop* ara, um ika eri aheldai hititautau an nilpun nelcau uhup;

31 is um ika a Paulo ehele natimi alupas o ilpu eucsupo, im lep ehele ilpu eucsupo, El era eti amen an nelcau ara sji eigki, inyi ehka vai caua nimyatamaig caua vaig.

32 Eris ucsamud jaula a bot a ilpu eucsupo, is um etjose an *jop*.

33 Eris wat aitga nadiat ara, is ika ehele ra asega a Paulo eri hag ara, um ika, Akis amen aijaua an nadiat is fortiin um eti hag:

34 va nitai ineigki ek ika ehelemia ainyak, aki hag aijaua um asjira nohumia: inyi idim eti etjose tah numri nidjinin tah iramia.

35 Is wat uce intas o un, is leh nareto aien, um naaurineig vai Atua an nuhup ura asega: is wat iswo-plecoplec aien, um atupun um caig.

36 Is emda inliinmopura ara asega, eris um hag ara.

37 Ecris tu huntret im sevente siks aijama asega an nelcau.

38 Eris wat gaije ara, eris arah an nelcau ara, um ethaigse hwiit an *jop*.

39 Is wat lahlah pan, eris eti ato inpece iyehki ara: ja eris cetai

nafaiava is ethi ara, im lep naua-
navig iran, eris ika ara, el is
eti ehka, eri imyiapan nelcau
iran.

40 Eris ucsamud *jaula irai* hiti-
tautau ara, um lep atceijaigse an
jop, um alihi nitai arore nehev apos
nelcau, um aiyihijai nepan va nim-
tinjop, um athut pahai.

41 Is apan *nelcau* an nuarin is
ethi is acetaig injop is ero iran, is
um ecetaig nelcau; is ecetaig aktit
nilpun nelcau uhup, um eti amaamai,
ja is ahpagrei nilpun nelcau itac
nepeau alupas.

42 Eris tas jipe a ilpu eucsupo, um
ika eri atgei ilpu atimi arore ra, va
yi jim agag tah ira ra, um aha.

43 Ja is merit a natimi alupas o
ilpu eucsupo nimyiatamaigvaig
Paulo, um acaiji naktaktai ura; um
ika ehele ra sji ehki eris ato ara par
agag, eri uhup ara um aliaujaise *an*
jop, um apahai:

44 *eris* lep *ahman* nahaiji ra irai
uari-cai, im nahaiji ra irai *iji itai*
an nelcau.

Eris arijai ara asega an pece.

NUARIN-TAS ALUPAS 28.

1 ERIS wat arijai ara, eris ato ara,
nikavaig, nidan haklin-pece iyehki
Meleta.

2 Eris aiheuc vaig alupas cama a
nup *uran pece iyehki*, jam eche intas
ura: eris adnan cop ara, um leucse
cama asega, vai incaupda iyehki is
asuol, im neiweyu.

3 Is arecai a Paulo, um ikuijai an
cop, is ahes an cop nimyiv is ethi,
um apol an nikman.

4 Eris wat almoi nitai aleg iyehki
a nup ealiki napolvaig an nikman,
eris tas jipe ara, *um ika*, Et idim
atimi atgei atmas a natimi ineigki,
is eti mas an jop aien, ja et idivaig
uhpu aru nedo has o un, inyi ti
umoh aien.

5 Ja is auhaigjai nitai aleg iyehki

an cop aien, um eti auah tah nedo
vaig.

6 Eris amen ara um almoi mika
etpu atop aien, ka auroauro um
eropse um mas: ja eris wat amen
ara um almoi is itu ira ra, jam eti fi
ecet yin nauah tah nedo vaig, is lep
eche naktaktai ura ara, um ika et
tah atua aien.

7 Is eteuc nuari obohtan o natimi
alupas esjilid an pece, nidan Publeus,
an nahaijin pece iyehki; is leucse
cama aien, um aminjinaig upene
cama an nimnim o un, an nadiat is
eseij.

8 Is asjeuc a etnai Publeus va
nemehe ihlup, im naredared an ja:
is apan ehelen a Paulo, um alaiga-
heni *vai yin*, um atijai nikman iran,
um ago cehcehe yin.

9 Is wat ago nedo ineigki aien, eris
lep apan ehelen hal atimi an pece
iyehki eris emeche ara, is ago cehcehe
ra aien:

10 eris eccen vai cama ara an niji
itai upene is ahinag, um alupai *cama*
nitai *iji eigki* is upene *vai cama*, an
lep atceija *nelcau* unyima.

11 ¶ Is wat ti pan itac inmohe is
eseij, ecri atceija nelcau ineig aija-
ma is ahes Aleksantrea, is amen an
haklin-pece iyehki an naopan ehio,
natmassimai iran iraigki, Kastor im
Polluks.

12 Ecri apahai Sairakyus aijama,
um amen *eahki* an nadiat is eseij.

13 Ecri lep ahes eahki aijama um
atahaki um yetpan Rijeum: is wat
ti pan itac nadiat is ethi, is ehlehel
an muritoga atamaig, is wat lahlah
an tak apnyin, ecri yetpan Putiolai
aijama:

14 ecri ecet ilpu etoama eahki
aijama, eris imyiacaig cama ara mika
ecri amen chele ra aijama an nadiat
inyi seven: ja ecri par apan aijama
alaig Roma.

15 Eris wat atahaijeg vai cama a
ilpu etoama, eris ahes eahki ara, um
yetpan an Tiptag o Appeus, im lep
an Neom is eseij ehele atimi asega:

um aubillid cama, is wat ecet ra a Paulo, is naaurineig vai Atua aien, is lep emda inliinmopon aien.

16 ECRIS wat yetpan Roma aijama, is atcejiai ilpu atimi arore ra a natimi alupas o ilpu eucsupo imi natimi alupas esjilid o ilpu eucsupo: ja eris ika yi echim amen a Paulo, im neucsupo is ethi par aminjinai yin.

17 Is wat ti pan itac nadiat is esejj, is asjapicnai ilpu atimi alupas o nupu Jutaia a Paulo: eris wat asjapicnaig ara, is ika ehele ra aien, Ak ilpu etoak, kis eti ago tah nedo has va atimi *an pece uja* ainyak, ka nedo o ilpu retpoiija, ja eris arore nyak Jerusalem, um ati nyak an nikmai nupu Roma:

18 ja eris wat ahilek nedo unyak ara, eris ika ara eri atcejiai *nyak*, kis eti ago tah nedo ineig ainyak ki mas vaig:

19 eris wat imyiisjis a nupu Jutaia, is ehka vai nyak intup amen-vaig, jai kis arohoai Sisar ainyak; ja ek eti ika ainyak ki atijai tah nitai irai nup uran pece unyak:

20 ek mun asjapicnai caua ainyak va nitai ineigki, mika ki alum *caua*, um tas ehelemia: eris idim arore nyak an natauhah ineigki va nitai ineig eris ika a nupu Isreel etpu yetpam.

21 Eris um ika ehelen ara, Ecris idim eti leh tah nitasvitai ahes Jutaia vai euc aijama, is idim eti aniv euc tah, um eti asuptecnaig tah nedo has unyum tah irai ilpu etoaija:

22 ja eera merit aijama natahaijeg-vaig naktaktai unyum; eera idim ato aijama, nikavaig, er asan tas has va nesege ineigki irai iji pece asega.

23 Eris anvi nadiat is ethi imi yin

ara, eris apan ehelen natimi is ahi-nag an neom o un; is tas ehele ra aien, um asuptecnaig nelcau o Atua, um esege upene imi ra niji itai vai Iesu, an tas alep o Moses, im *intas o* ilpu profeta, *is tas aien* an nuhialeq um yetpan an jupura.

24 Eris imyiisjis ninivaijeg *intas o un* nahaiji ra, ja eris imyipalea nahaiji ra.

25 Is wat acheiachei inliinmopura ara, eris atga ura ara, ja is upyi hup a Paulo um asan tas is ethi ache ineigki, um ika, Et inivaijeg *intas is* asaig a Aiseya naprofeta irai Nesgan Upene ehele ilpu retpoiija,

26 um ika, "Apan aiek ehele nup igcaki, um ika, Akupu idim atahaijeg itai aijaua, jam eti ato; akupu idim alum itai aijaua, jam eti al-muktit:

27 et ipjin inliinmopoi nup igcaki, um tehen intikgara, era atapanes nesganimtara ara; va eri jim alum itai an nesganimtara ara, um atahaijeg itai an tikgara, um ato itai anliinmopura, um adumoiij, mika ki ago cehcehe ra ainyak:"

28 va nitai ineigki akumu ato aijaua, nikavaig, er alupai nup urai iji taka pece nitai imyiatamaig *atimi* ineig *et ahes* ehele Atua; erupu idim atahaijeg ara.

29 Is wat ucce *intas o un* aien, eris atga ura a nupu Jutaia, um imyiisjis itai alupas jipe ira ra.

30 IS amen a Paulo an mesese is ero an neom o un ineig is aua-nimtan aien, um leucse ra asega eris apan ehelen ara,

31 um asuptecnaig nelcau o Atua, um esege niji itai vai Iesu Kristo Natimarid, is esjilid nemda o un, is eti lep acaiji yin tah natimi.

NITASVITAI O PAULO NAPOSTOLO

IMI

NUPU ROMA.

NUARIN-TAS ALUPAS 1.

AK nupu Roma asega iji eig, et aiyu inliinmopoi Atua vai caua, *eka* atimi eris ahlaig vai ra *aijaua*, *um* atimi upene, ek aiheuc vai caua ainyak Paulo, naheca o Iesu Kristo, *ek* atimi eris ahlaig vai yin *ainyak*, *um* apostolo, eris ati nyak vai intas-upene o Atua,

2 is upyi asaig aien irai ilpu profeta o un, an nitasvitai itaup,

3 vai Inhal o un Iesu Kristo Natimarid uja, aien aigki is mapoi Tevit aien an nohun;

4 eris lep asuptecnaig upene yin, mika et Hal o Atua aien va nupene an nesgan, an nusjai o *un* vai iumas o *un*;

5 ecri lep leh naiheuc ineig aijama vai yin, mika ecri ago nauritai o ilpu apostolo, va erupu imyiaiji nalaig-aheni a nup urai iji pece asega va nidan:

6 eka lep amen ehele ra aijaua, is ahlaig vai caua a Iesu Kristo:

7 *Etmu amen* ehelemia naiheuc im neigpa et ahes ehele Atua Etmaija, im lep Iesu Kristo Natimarid.

8 ¶ Ek uhup ainyak um naaurineig vai Atua unyak irai Iesu Kristo vai caua asega, va nimyisjis nini-vaijec unyimia eh tas vaig an noboltan asega:

9 et idim ato a Atua ineig ek alaigaheni vai yin ainyak anliinmopok an tas-upene o Inhal o un,

mika ek eti omot ainyak par aniv caua;

10 um ugni *yin* an nalaigaheni unyak irai iji adiat, el et ika a Atua yi upene vai nyak tupko napanvaig ehelemia;

11 ek idim merit ainyak nalum caua vaig, mika ki alupai caua tah nitai tup ahtai va nesgamia, va akupu amen aktit aijaua;

12 nikavaig, ti ehra imyiacitak vai caua akaija, va nimyisjis jipe ninivaijec unyimia im lep unyak.

13 Ak ilpu etoak, ek merit ainyak mika aki ato aijaua, nikavaig, kis ehcahinag ika ainyak ki apan ehelemia, (ja is ehka um imyihum pam an naopan ineig,) mika ki lep leh tah nohoai itai iramia, et idivaig irai nup urai iji pece asega.

14 Eris idim ika ki ahtai itai ainyak ehele nupu Crisi, im nup urai iji pece eche intas ura; *im lep* ehele ilpu atimi arapakau, im ilpu atimi eti ato itai.

15 Va nitai ineigki et merit inliinmopok ainyak inlep asuptecnaig-vaig intas-upene ehelemia, ak nupu Roma.

16 Ek idim eti imyiehcama intas-upene o Kristo ainyak, nemda o Atua ineigki par imyiatamaig ra sji eigki asega era imyisjis nini-vaijec ara; nupu Jutaiia uhup, im lep nupu Crisi.

17 Er lep ehvaig iran nika o Atua et atoh nedo o natimi ineig et asgeig *iran* aien, mika eri asgeig *iran*: et

idivaig eris aged, *um ika*, "Etpu umoh a natimi ineig et atoh nedo o un va nimityisjis ninivaijec *o un*."

18 ER idim ehvaig intavaitap o Atua an nohatag va nedo eti eccen asega *vai Atua*, im nedo efaifa asega o ilpu atimi iji eigki, era atapanes intas inivaijec ara an nedo efaifa *ura*;

19 va nitai ineigki, nikavaig, er ehvaig ira ra nitai iji eigki er ato vai Atua; is idim ehvaig ehele ra a Atua:

20 eris almoi niji itai o un er eti ecetai an naopan iyehki eris pam ati nobohtan *um imyihum pam an naopan ineig*, nikavaig, nemda o un inyi ti lep ti im Natua o un; et idim ucco, er lep ato va niji itai eris ago, mika yi ehka vai ra intasvaig:

21 va nitai ineigki, nikavaig, eris ato Atua ara, jam eti imyiahpas *yin* is idivai Atua, um eti naaurineig *vai yin*; ja is takitai naktaktai *ura*, is lep aupat inliinmopura ahnag:

22 eris ika ara eris arapakau, ja eris idim ahnag ara,

23 um isjipigmoig natimi alupas o Atua ineig inyi ti lep ti aien, an natmassimai et idivaig natimi ineig etpu idim ti aien, im lep inman, im niji itai emanohwan neduon, im niji itai ata has.

24 Va nedo ineigki is atceijaig pan ra a Atua u nedo has vai merit has u inliinmopura, mika eri auoh ehcamai jipe va nohura ara:

25 eris isjipigmoig Atua inivaijec ara an nitai ahcil, um imyiahpas niji itai eris ago, um alaigaheni vaig, jam ude yin is ago itai aien, aien aigki uhpu imyiahpas yin irai iji mesese. Emen.

26 Va nitai ineigki is atcejai ra a Atua mika eri merit ara va nedo ineig er ehcamai vaig: eris isjipigmoig nedo ineig et atoh a ilpu takata *ura* an nedo ineig et eti atoh:

27 eris lep ude nedo ineig et atoh vai ilpu takata a ilpu atamaig, um merit jipe vai ra irai merit has *ura*:

eris lep ago jipe vai ra a ilpu atamaig nedo ineig er ehcamai vaig, um leh nintan imi ra et idivaig nedo ahnag *ura*.

28 Eris esjum ara natovaig Atua anliinmopura, va nitai ineigki is atcejai ra a Atua mika eri imyiaaij inliinmopura ahnag ara, um ago nitai iji eigki eris ika eri idim eti ago;

29 eris ohua ara an nedo has asega, *im ingaijid*, *im nauatatimi*, *im inmerit* vai inpadiaig, *im inliinmopura* has; *eris lep* ohua *ara* an nauatai, *im natgei* atmas, *im nimityisjis* itai, *im nefaiifa*, *im naktaktai* has;

30 eris *lep* ilpu atimi tas upoupo ara, *im* ilpu atimi hos tas, *im* ilpu atimi amcel vai Atua, *im* ilpu atimi ago nedo ijinies, *im* ilpu atimi ijinies inliinmopura, *im* ilpu atimi tas ijinies, *im* ilpu atimi aktaktai nedo has, *im* ilpu atimi imyipalea ilpu atmil *ura*,

31 *im* ilpu atimi ahnag, *im* ilpu atimi ahcil, *im* ilpu atimi agahas irai ilpu atimi ehpan ira ra, *im* ilpu atimi erucal inliinmopura, *im* ilpu atimi eti aiheuc va atimi:

32 era ato intas alep o Atua ara, nikavaig, erupu emesmas a ilpu atimi et ucce nedo *ura*, ja era ago nitai iji eigki ara, um lep imyiacitak ra sji eigki era ago ara.

NUARIN-TAS ALUPAS 2.

VA nitai ineigki et ehka vai euc intasvaig, ak natimi *ira* ra asega, na ated *intak atimi* aiek: na wit ated intak atimi aiek va nedo *o un*, na ated euc aiek; na ated *intak atimi* aiek, jam idim ago nedo *o un*.

2 Ja inta ato akaija, nikavaig, et atoh neruvaig o Atua imi ra sji eigki era ago nitai iji eigki ara.

3 Ak natimi ated ra sji eigki era ago nitai iji eigki ara, jam lep ago nitai iji eigki, na aktaktai aiek mika, napu aha va neruvaig o Atua, ka o'o?

4 Ka na esjum aiek va nedo aieheuc alupas o un, im nedo erop *o un*, im nedo eti auatiemda *o un*, um eti ato, nikavaig, et ahugni euc nedo aieheuc o Atua, mika an adumoi j aiek anliinmopom?

5 Ja nai ikni intavaitap vai euc aiek vai *inliinmopom* ipjin im inliinmopom uucai, an nadiat u intavaitap, uhu wit ehvaig neruvaig atoh o Atua;

6 etpu idim aru aien ira atimi asega inyi idivaig auritai ura:

7 *um alupai* ra sji eigki nitai umoh iran ineig inyi ti lep ti, era amen akitit ara an nedo upene, um ahilek nimyiahpas, im nitai upene, im neti mas *ura* :

8 ja *uhpu ati* imi ra sji eigki, era imyisjis itai ara, um imyipalea intas inivaijec, jam imyiaiji nedo has, intavaitap, im nedemda,

9 *im* nohocred, im nerekinman ira ra, ira atimi asega era ago nedo has ara, muhup urai nupu Jutaia, um *yepan* irai nupu Crisi:

10 jam nimyiahpas, im nitai upene, im neigpa, ira atimi asega era ago nedo upene ara, muhup urai nupu Jutaia, um *yepan* irai nupu Crisi:

11 et idim eti asjaaicnaig ira atimi a Atua.

12 ¶ Ara asega eris eti leh intas alep *o Atua* ara, jam ago nedo has, uhpu auahas ra, ja eti an tas alep: ja ara asega eris leh intas alep ara, jam ago nedo has, uhpu asuptecnaig nimitan imi ra an tas alep;

13 an nadiat iyehki etpu ahilek niji itai adenaig o atimi a Atua irai Iesu Kristo, et idivaig intas-upene *ineig ek asuptecnaig* ainnyak:

14 (et eti atoh nedo o ilpu atimi atahaijeg intas alep an nuhup o Atua, ja er ika et atoh nedo o ilpu atimi imyiaiji intas alep.

15 Et eti amen intas alep ehele nup urai iji taka pece, ja eru wit ispara ago nedo an tas alep ara, era

tas alep imi ra ara, ja et eti amen ehele ra intas alep:

16 er ehvaig nauritai an tas alep eris aged anliinmopura ara, et asuptecnaig *vai ra* naktaktai ura, et lep ated jipe ra inliinmopura um imyiahpas *jipe* ra.)

17 ¶ Im lep ineig, er anvi nidam par ika nupu Jutaia, na lep asgeig an tas alep aiek, um tas emda vai Atua,

18 um ato intas *o un*, um almai-jidjid niji itai acheiachei, eris esege imi euc an tas alep;

19 na aktaktai aiek mika na atimi atau irai ilpu atimi aupat nesganimitara, *um lep* itai lah imi ra sji eigki era amen an naupat ara,

20 *im* natimi ated ilpu atimi ahnag, *im* natimi esege imi ilpu halav; et amen ehelum nohuun asjaaicnaig an narapakau, im ninivaijec an tas alep.

21 Im lep ineig, ak natimi esege imi tak atimi, na idim eti esege imi euc aiek; ak natimi asuptecnaig, um ika, jim ehneg itai, na idim ehneg itai aiek;

22 aiek na ika aiek, jim ago ingaijid, na idim ago ingaijid aiek; aiek na amcel vai ilpu atmas aiek, na idim ahneg nitai iji eigki aiek et itaup;

23 aiek na tas emda aiek vai intas alep, na idim auahas intas alep aiek, um auoh ehcamai vai Atua vaig.

24 “Era idim tas has va nidai Atua a nup urai iji pece vai caua,” et idivaig eris aged.

25 ¶ Et upene naperitome, el et imyiaiji intas alep aiek; ja el et auahas intas alep aiek, et eti aperitome naperitome iram.

26 Va nitai ineigki el era apos niji edo an tas alep a ilpu atimi eti aperitome, uhpu idim asaig mika et aperitome neti aperitome ira ra;

27 el era imyiaiji intas alep a ilpu atimi iji eig era eti aperitome ira ra an tup nedo ura, erupu idim ated euc ara, na auahas intas alep aiek,

an *namen* u intas *itaup ehelum* im naperitome.

28 Et eti upu Jutaia natimi ineig et upu *Jutaia* an nohun *ache*; et lep eti aperitome nitai ineig *eh leh* an nohun er almoi:

29 ja et upu Jutaia natimi ineig et upu *Jutaia* anliinmopon aien; et lep aperitome nitai ineig *eh leh* anliinmopon va nesgan, jam eti va nohun *ache*; et eti ahes nimyiahpas vaig ehele atimi, ja et ahes ehele Atua.

NUARIN-TAS ALUPAS 3.

1 EL et idim ucco, era esjilid a nupu Jutaia anhe? et lep upene naperitome vanhe?

2 *Era* esjilid *ara* an niji itai asega: um uhup ineig, eris alupai ra niji tas o Atua.

3 Eris idim eti imyiisjis ninivaijec nahaiji ra; ja etpu takitai nedo inivaijec o Atua va neti imyiisjis ninivaijec ura, ka o'o?

4 Inyi idim eti ucce: maiya, etmu inivaijec a Atua, jam ahcil natimi asega; et idivaig eris aged, *um ika*, "Eri ika na upene aiek irai tas unyum; nai lep esjilid aiek, uhu wit ahilek nedo unyum."

5 ¶ Ja el eh ehvaig upene nedo atoh o Atua va nedo has uja, in-tupu ikha akaija? et eti atoh nedo o Atua et ago neruvaig *ira atimi* aien, ka o'o? (Ek tas ainyak et idivaig natimi.)

6 Et idim eti ucce: el et ucce, etpu asaig nintan imi atimi an nobohtan a Atua um uauo?

7 El et esjilid nedo inivaijec o Atua er imyiahpas yin vaig va nedo ahcil unyak, er auri par ika vai nyak ek atimi auatatimi ainyak um uhum pam naopan ineig?

8 *Inta* lep *auri akaija* par eti *asaig*, (et idivaig era asan tas has vai cama nahaiji ra, um ika eera ika aijama,) Intumu ago nedo has akaija va etpu yetpam niji itai

upene? et atoh nintan nedo has ura.

9 ¶ Im lep ineig, *inta esjilid ira ra akaija*, ka o'o? O'o: *ecris upyi hup aijama um asuptecnaig*, mika era atimi auatatimi ara asega, nupu Jutaia, im lep nupu Crisi;

10 et idivaig eris aged, um ika, "Et idim eti atoh nedo o un tah;

11 et eti ato itai tah, um eti ahilek Atua tah;

12 era alnag ara asega, era ehrs has ara; et idim eti ago nedo aiheuc tah;"

13 "et li ehpanitai inhuigopul ura; et efaifa intas ura;" "et *amen* nitai acen irai imyiv ithan *narasin* nipjineucsera:"

14 "et ohua nipjineucsera an tas has im intas edemda:"

15 "et auroauro neduora par atgei atmas:

16 et *ugnyin* nedo ura nauatatimi im nobocred:

17 era eti ato nedo eigpa ara:"

18 "et eti eteuc nimitai Atua an nuhup u nesganimtara."

19 ¶ *Inta* idim ato akaija, nikavaig, nitai iji eigki asega er ika an tas alep, er asaig ehele ra eris leh intas alep ara; va uhpu atapanes nipjineucse atimi asega, um lep ika era atimi has natimi asega an nobohtan an nuhup u Atua.

20 Va nitai ineigki eri eti ika et atoh nedo o un tah an nuhup o un va nimyiaiji intas alep: er idim ato nedo has o *atimi* vai intas alep.

21 JA er ehvaig an naopan ineig nika o Atua et atoh nedo o *atimi*, jam eti vai intas alep, eris asuptecnaig an tas alep im lep ilpu profeta;

22 nedo ineig marom, nika o Atua et atoh nedo o *atimi* va nasgeig irai Iesu Kristo, imi ra asega, im lep ira ra asega era imyiisjis ninivaijec ara: era eti acheiachei jipe atimi:

23 eris idim ago nedo has atimi asega, jam eti leh nimyiahpas o Atua;

24 uhpu ika et atoh nedo ura vai intup naiheuc o un, va nimitaija o Iesu Kristo:

25 aien aigki is ati yin a Atua mika yi itai ahlap aien va nasgeig an ja iran *uja*, va uhpu ehvaig nika o un et atoh nedo o *atimi*, va neti aruvaig nedo has eris upyi ago, va nedo erop o Atua;

26 va uhpu ehvaig nika o un et atoh nedo o atimi an naopan ineig, mika yi atoh nedo o un, im lep atimi ika et atoh nedo o natimi ineig et asgeig irai Iesu aien.

27 ¶ Etpu lep ispun tas vai yin a di? Er idim acaiji yin. *Er acaiji yin* an neveh tas alep? *An tas alep* va nimyiaiji, ka o'o? O'o; jai intas alep va nimyiisjis ninivaijec.

28 Va nitai ineigki ecra ika aijama er ika et atoh nedo o atimi va nimyiisjis ninivaijec *ura*, jam eti va nimyiaiji intas alep.

29 *El Atua* o nupu Jutaia ache a Atua, ka o'o? ka et lep *Atua* o nup urai iji taka pece *aien*? Maiya, et idim lep *Atua* o nup urai iji taka pece *aien*:

30 im lep ineig, et tup ethi ache Atua ineig, etpu ika aien et atoh nedo o ilpu atimi aperitome irai imyiisjis ninivaijec *ura*, im ilpu atimi eti aperitome va nimyiisjis ninivaijec *ura*.

31 Inta auahas intas alep akaija va nimyiisjis ninivaijec *uja*, ka o'o? et idim eti ucce; inta idim ati ipjin intas alep akaija.

NUARIN-TAS ALUPAS 4.

IM lep ineig, intupu ika akaija is leh inhe a Ebrahim etpoiia va nedo an nohun?

2 *El* eris ika is atoh nedo o Ebrahim va nimyiaiji *intas alep*, is eteuc ehelen nitai ispun tas vaig, jam ti an nuhup o Atua.

3 Et asan he intas ineig^{eris} aged? "Is eteuc an tas o Atua a Ebrahim,

eris lep ika is atoh nedo o un vaig."

4 Ja er eti ika et tup naiheuc nimitan imi yin et imyiaiji *intas alep* aien, ja et eruvaig;

5 ja er ika vai yin et eti imyiaiji *intas alep* aien, jam asgeig iran et ika aien et atoh nedo o ilpu atimi auatatimi, et edo atoh nimyiisjis ninivaijec o un:

6 et idivaig is lep tas a Tevit um imyiahes natimi ineig, et ika a Atua et atoh nedo o un aien, jam eti va nimyiaiji *intas alep*,

7 *um ika*, "Era mun ahesmoij ara sji eigki eri eti aru nedo has ura, um lep adahpoi nauatatimi ura:

8 et mun ahesmoij natimi ineig et eti esvi nedo has o un a Ihova."

9 *Et yetpam* nimyiahes ineig irai ilpu atimi aperitome ache, ka et lep yetpam irai ilpu atimi eti aperitome? ecra idim ika aijama eris ika vai Ebrahim is edo atoh nimyiisjis ninivaijec o un.

10 Ja eris ika *is atoh nedo o un aien* vaig an nahopan? an naperitome o un, ka an neti fi aperitome o un? *eris eti ika* an naperitome o un, ja an neti fi aperitome o un.

11 Is lep leh naperitome iran aien par itai asjaaenaig; nitai ati ipjin nika o *Atua* et atoh nedo o un va nimyiisjis ninivaijec iyehki, *is amen* ehelen an neti fi aperitome o un; va etpu etpoi ilpu atimi eti aperitome asega aien era imyiisjis ninivaijec ara; va uhpu lep ika vai ra et atoh nedo ura:

12 um lep *mika yi* etpoi ilpu atimi aperitome ehele ra sji eigki eris idim aperitome ira ra, um lep atga irai ugnya eduon an nimyiisjis ninivaijec iyehki o etpoiia Ebrahim, *is amen* ehelen an neti fi aperitome o un.

13 ¶ Eris idim eti upyi asaig ehele Ebrahim mika yi ohuun nobohtan aien im lep ilpu mapon va *nimyiaiji* intas alep, ja va nika o *Atua* et atoh nedo o un va nimyiisjis ninivaijec o un.

14 El era atimi ohuun ara sji eigki era *apol* an tas alep ara, et takitai nimyisjis ninivajec, um eti upene intas upyi asaig :

15 er idim asuptecnag neruva nedo has an tas alep : et wat ti intas alep, et ti nedo has.

16 Va nitai ineigki era *atimi ohuun ara* va nimyisjis ninivajec *ura* va uhpu aiheuc *vai ra*; va etpu amen aktit intas upyi asaig imi ilpu mapon asega; jam eti imi ra sji eigki ache era *apol* an tas alep ara, jam lep imi ra sji eigki era imyisjis ninivajec ara, et idivai Ebrahim; et etpoiia asega aien;

17 (et idivaig eris aged, um ika, "Ek mun ati euc ainyak mika an etpoi nup urai iji pece et ahinag aiek,") an nuhup o Atua is asgeig iran aien, *aien aigki* et imyiatamumoh ilpu atimi ememas aien, um tas va nitai iji eigki et pam eti eteuc et idivaig el et eteuc.

18 Is wat ehka, is imyisjis ninivajec vai inmerit o un aien, va etpu etpoi nup urai iji pece et ahinag aien, et idivaig eris asaig, *um ika*, "Erupu idim ucco a ilpu mapom:"

19 is lep eti auatialidi nimyisjis ninivajec o un aien, is eti aktaktai aien mika is mas nohun an naopan iyehki, is idivaig wun huntret mesese iran, im lep nipjinetgai Sera is mas;

20 is eti imyisjis naheil intas upyi asaig o Atua aien vai inliinmopon auatialidi; ja is imyisjis ninivajec emda aien, um imyahpas Atua;

21 is ato upene aien mika et emda aien par ago nitai ineig is upyi asaig aien.

22 Va nitai ineigki eris ika is atoh nedo o un aien *va nimyisjis ninivajec o un*.

23 Eris eti aged *intas iyehki* vai yin ache, nikavaig, eris ika is atoh nedo o un aien;

24 ja vai caija, uhpu lep ika et atoh nedo uja, el ta asgeig iran

akaija is imyinusjai Iesu aien Natimarid uja vai iumas o un;

25 aien eris ahtai yin va nedo has uja, um lep imyinusjai yin mika eri ika yi atoh nedo uja akaija.

NUARIN-TAS ALUPAS 5.

ER ika et atoh nedo uja akaija va nimyisjis ninivajec *uja*, va nitai ineigki et amen eheleija neigpa o Atua vai Iesu Kristo Natimarid uja:

2 intis lep imyisjis ninivajec akaija, um uhpu pam naiheuc ineig vai yin inta aiji aktit iran akaija, um imyiacitak naitgaigvaig niji itai upene o Atua.

3 Im lep ineig, inta lep imyiacitak akaija an nohocred *uja*: inta ato akaija mika et atupun nedo eti auatiemda nohocred;

4 um lep *atupun* nato itai upene nedo eti auatiemda; um lep *atupun* naitgaig upene nato itai upene;

5 er eti lep ehcamai va naitgaig upene ineig; va nitai ineigki, nikavaig, er atladwi anliinmopja Nesgan Upene ineig er alupai caija va naiheuc o Atua.

6 Intis wat auatialidi akaija, is idim mas a Kristo an naopan iyehki eris ati, par asitu irai ilpu atimi auatatimi.

7 Et ehka vaig tah inmasvaig par asitu iran tah natimi et atoh nedo o un; ja kit etpu emda tah um mas par asitu irai tah natimi upene.

8 Ja is ehvaig naiyu u inliinmopon a Atua vai caija, nikavaig, intis wat ilpu atimi auatatimi akaija, is mas a Kristo par asitu iraija.

9 Etpu idim ucco, el eh ika et atoh nedo uja akaija an naopan ineig vai inja iran, uhpu idim imyiatamaig caija vai yin va nedemda *etpu yetpam*:

10 im lep ineig, intis wat ilpu atimi tak atimi *iran* akaija, is asan

neigpa cheleija a Atua vai inmas o Inhal o un; etpu idim ucco, eris wat asan neigpa cheleija, uhpu idim imyiatanaig caija va numoh o un.

11 Im lep ineig, inta lep imyiacitak Atua akaija vai Iesu Kristo Natimarid uja, aien aigki eris asan neigpa cheleija vai yin an naopan ineig.

12 Va nitai incigki is yetpam nedo has an nobohtan vai natimi is ethi, im lep inmas va nedo has; et um ucco, is apaahni inmas ira atimi asega, va nitai ineigki, nikavaig, eris idim ago nedo has natimi asega:

13 Is idim eteuc nedo has an nobohtan um imyihum pan naopan iyelki *eris asaig* intas alep: ja et wat ti intas alep, er eti esvi nedo has.

14 Ja is ahes inmas irai Atam um yetpan irai Moses, um apaahni ira ra eris eti ago nedo has is idivaig nimityipalea o Atam ara, is almun aien eris ika etpu han aien.

15 Ja et eti idivaig nedo has iyelki nitai tup ahtai: eris idim ememas natimi is ahinag va nedo has o natimi is ethi; etpu idim ucco, etpu apaahni ira atimi inyi ahinag naiheuc o Atua, im lep nitai tup ahtai va naiheuc o natimi et ethi, Iesu Kristo *marom*.

16 Et lep eti idivaig nedo has o natimi is ethi nitai tup ahtai: *eris* idim *asuptecnaig* nimtan nedo has is ethi mika uhpu aru; ja *er ahtai* intup naiheuc va nedo has et ahinag, va uhpu eti aru.

17 Et idim esjilid inmas vai natimi et ethi, va nedo has o un; etpu idim ucco, erupu umumoh upene vai natimi et ethi, Iesu Kristo *marom*, ara sji eigki era leh naiheuc esjilid o *Atua* ara, nikavaig, nitai tup ahtai ineig eris ika et atoh nedo ura vaig.

18 Va nitai ineigki *eris idim asaig nimtan* imi atimi asega va nedo has is ethi, va uhpu aru *ira ra*; et um ucco, *et apaahni* ira atimi asega

nitai tup ahtai va nedo atoh et ethi, va uhpu eti aru *ira ra*, jam ika eri umumoh.

19 Eris idim ika era ilpu atimi auatatimi natimi et ahinag va nimityipalea o natimi is ethi; et um ucco, uhpu ika era ilpu atimi atoh nedo ura natimi et ahinag va nimityiaiji o natimi et ethi.

20 Is ehcohos pam intas alep, va etpu ahinag nedo has. Ja et wat ahinag nedo has, et lep esjilid acen naiheuc o *Atua*:

21 is esjilid nedo has an mas, et um ucco, et lep esjilid naiheuc o *Atua* va nika o un et atoh nedo o *atimi*, mika *eri leh* nitai umoh iran ineig *ara* inyi ti lep ti, vai Iesu Kristo Natimarid uja.

NUARIN-TAS ALUPAS 6.

INTUPU asan he akaija? Inti apol an nedo has akaija va etpu esjilid naiheuc o *Atua*, ka o'o?

2 Inyi idim eti ucce. Inta ememas u nedo has akaija, va nitai ineigki et ehka inlep apolvaig iran.

3 Eka ato aijaua mika, nahaijija iji eig eris baptiso iraija irai Iesu Kristo, eris baptiso iraija an mas o un:

4 maiya, eris ehratelmoi caija ehelen an nabaptiso iraija an mas: mika ti umumoh akaija um ago nedo ineig et ahes inliinmopja mat, et idivaig eris imyinusjai Kristo vai inmas o un an nemda o Etman.

5 Inta idim tup ethi ache pan ehelen akaija an mas o un; etpu idim ucco, intupu lep *ethi ache pan ehelen* akaija an nusjai o un:

6 inta ato nitai ineigki akaija, mika er ehratgei inliinmopja itu ehelen an nauincai atgeig, va uhpu auahas nohuun nedo has, vai ti jim aheca u nedo has akaija.

7 Aien is mas aien, eh mun atcejai yin va nedo has o un.

8 Im lep ineig, intis ehremesmas ehele Kristo akaija, va nitai ineigki inta imyiisjis ninivaijec akaija, nikavaig, intupu ehrumoh ehelen akaija:

9 inta ato akaija, mika eris imynusjai Kristo vai inmas *o un*, ja inyi ti lep mas aien; inyi ti lep esjilid iran inmas.

10 Is wat mas aien, is ehceathi mas aien va nedo has: ja et lep umoh aien, jam umoh vai Atua.

11 Etpu idim ucco, akumu lep aktaktai aijaua mika, eka idim emesmas u nedo has aijaua, jam umumoh vai Atua irai Iesu Kristo Natimarid uja.

12 ¶ Va nitai ineigki etmu jim amense nedo has an nohumia auatialidi, mika aki aheca o un irai merit has ura:

13 um jim ikni inuari-ohumia urin nauatatimi, mika yi itai ago nedo has iran: jam ikni caua imi Atua, et idivai ilpu atimi anusjai vai inmas *ura*, um lep *ikni* inuari-ohumia imi Atua, mika yi itai ago nedo atoh iran.

14 Inyi idim eti esjilid irania nedo has; va nitai ineig, nikavaig, eka eti amen ithan tas alep aijaua, ja *eka amen* ithan naiheuc *o Atua aijaua*.

15 ¶ Im lep ineig, intupu ago nedo has akaija, va nitai ineigki, nikavaig, inta eti amen ithan tas alep akaija, jam *amen* ithan naiheuc *o Atua*, ka o'o? Inyi idim eti uce.

16 Eka idim ato aijaua, mika, aku wit ikni caua aijaua imin tah par imyiaiji intas o un, eka ilpu aheca o un aijaua eka imyiaiji intas o un aijaua; kit nedo has eh mas vaig, ka nimyiaiji er ago nedo atoh vaig.

17 Jai naaurineig vai Atua, akis idim ilpu aheca u nedo has aijaua *an naopan iyehki*, ja akis *par apitac* aijaua um imyiaiji nedo an nesege ineigki anliinmopomia eris ikni caua iran;

18 eris wat ahiyi caua u nedo has, akis lep ilpu aheca u nedo atoh aijaua.

19 Ek tas ainyak et idivaig nedo o atimi, va nauatialidi u iliimopomia: akis ikni inuari-ohumia aijaua, mika yi aheca u nedo has im nedo imyipalea par imyipalea; et um ucco, akumu ikni inuari-ohumia aijaua, mika yi aheca u nedo atoh, va uhpu upene.

20 Akis wat ilpu aheca u nedo has aijaua, eris ahiyi caua u nedo atoh.

21 Neveh ohoai itai ineig akis leh aijaua an naopan iyehki, an nitai iji eigki eka ehcamai vaig aijaua an naopan ineig? et idim imtan nitai iji eigki inmas.

22 Er ahiyi caua u nedo has, eka lep aheca o Atua aijaua an naopan ineig, um leh nohoai itai ineig va uhpu upene, ja *par leh* nintan, nitai umoh iran ineig inyi ti lep ti.

23 Nintan nedo has neigki, inmas; jai intup naiheuc o Atua neigki, nitai umoh iran ineig inyi ti lep ti, irai Iesu Kristo Natimarid uja.

NUARIN-TAS ALUPAS 7.

AK ilpu etoak, (ek tas ainyak ehele atimi ato intas alep,) eka idim ato aijaua mika, et esjilid intas alep irai natimi ineig et umoh aien.

2 Et wat eteuc natamnyu un tah intakata, et amen ehele natamnyu un aien an numoh o un vai intas alep; ja el et mas a natamnyu un, eh mun atcejai yin u intas alep iyehki.

3 El et amen aien ehele intak atamaig an numoh u natamnyu un, uhpu anvi nidan par ika intakata ago ingaijid: ja el is mas a natamnyu un, eh mun ahiyi yin u intas alep; el et amen vaig ehele intak atamaig aien, el et eti ago ingaijid aien.

4 ¶ Et idim ucco, ak ilpu etoak, eka lep ememas u intas alep aijaua va nohui Kristo; mika aki amen chele tak atimi aijaua, aien marom eris imyinusjai yin vai inmas o un, mika ti ohoai itai akaija imi Atua.

5 Intis wat aheca u nedo has akaija, is auritai irai uari-ohuja inmerit has iji cigki is ahes an tas alep, um ohoan nitai iji eigki er ememas vaig.

6 Ja er atcejai caija an tas alep an naopan ineig, is lep mas nitai ineigki eris atapanes caija iran; vai intupu aheca o Atua akaija anliinmopja mat, um eti idivaig intas itu eris aged.

7 INTUPU asan he akaija? et has intas alep, ka o'o? Et idim eti ucce. El et eti eteuc intas alep, el ek eti ato nedo has ainyak: el eris eti tas alep, um ika, "Etmu jim has iram aiek itai," el ek eti ato ainyak inhas irak itai.

8 Ja is wat emda nedo has vai intas alep, is atupun inhas irak asega itai anliinmopok. Et wat eti ehcohos pam intas alep, et mas nedo has.

9 Is wat eti ehcohos pam intas alep itu acen, kis umoh ainyak: ja is wat ehcohos pam intas alep, is lep nusjai nedo has, kis lep mas ainyak:

10 kis lep ato ainyak, mika is itai mas vaig intas alep ineig eris ati mika eri umoh vaig.

11 Is wat emda nedo has vai intas alep, is idim imyiahnag nyak, um auahas *nyak*.

12 ¶ Va nitai ineigki et itaup intas alep; et lep itaup intas eris asaig, um atoh, um upene.

13 Et itai auahas nyak nitai ineig et upene, ka o'o? Et idim eti ucce. Ja et itai *auahas nyak* nedo has, va uhpu ecetai inhas iran, an nauahas nyak vaig va nitai ineig et upene; mika yi has esjilid nedo has vai intas alep.

14 ¶ Inta ato akaija, mika et idi-vaig nesga atimi intas alep; ja ek idivaig nohu atimi ainyak, eris alitai nyak, mika ki aheca u nedo has ainyak.

15 Ja ek eti imyiahpas ainyak nitai ineig ek ago: ek eti ago nitai ineig ainyak ek merit vaig; ja ek ago nedo ineig ainyak ek amcel vaig.

16 El ek ago nedo ineigki ainyak ek eti merit vaig, ek ika ainyak et upene intas alep;

17 ek mun idim eti lep ago ainyak, ja nedo has ineig et amen anliinmopok.

18 Ek ato ainyak mika et eti amen tahi nitai upene ehelek, nika-vaig, an nohuk: ek idim merit ainyak, jam eti ato par ago nedo ineig et upene.

19 Ek eti ago nedo upene ineig ainyak ek merit vaig: ja ek ago nedo has ineig ainyak ek eti merit vaig.

20 Ja el ek ago nedo ineig ainyak ek eti merit vaig, ek idim eti ago ainyak, ja nedo has ineig et amen ehelek.

21 Ek lep ecetai nedo emda ineigki ainyak, mika, ek wat merit ainyak nagovaig nedo upene, et amen ehelek nedo has.

22 Ek idim imyiacitak intas alep o Atua ainyak anliinmopok:

23 ja ek lep almoi ainyak nedo emda ineig et eche et amen irai uari-ohuk, et ago nedoa vai nedo emda ineig et amen anliinmopok, mika ki aheca u nedo has ineig ainyak et amen irai uari-ohuk.

24 Kaiheuc vai nyak, ek atimi ohocred ainyak! etpu imyiatamaig nyak a di va nohun ineig inki mas vaig?

25 Ek naaurineig vai Atua ainyak vai Iesu Kristo Natimarid uja. Va nitai ineigki ek aheca u intas alep o Atua ainyak anliinmopok; jam aheca u nemda ineigki u nedo has an nohuk.

NUARIN-TAS ALUPAS 8.

1 VA nitai iji eigki eri ti ika uhpu aru nedo has ura, era amen ehele Iesu Kristo ara, era eti ago nedo ineig ara et ahes anliinmopura itu, ja nedo ineig et ahes an Nesgan *Upene*.

2 Eris ahiyi nyak u nemda ineigki u nedo has im inmas, va nedo emda ineigki u Nesgan er umumoh vaig irai Iesu Kristo.

3 Is wat auatialidi intas alep va nauatialidi u atimi, is abraí Inhal o un a Atua an nohun, an nalmun nohuja has, *par itai ahlap* va nedo has, um esjilid irai nedo has an nohuja:

4 va uhpu imyiaiji ehni nedo atoh yi idivaig intas alep vai caija, inta eti ago nedo ineig et ahes anliinmopja itu akaija, ja nedo ineig et ahes an Nesgan *Upene*.

5 Ara era apol anliinmopura itu ara, era aktaktai niji itai u inliinmopura itu ara; ja ara era apol an Nesgan *Upene* ara, era aktaktai niji itai u Nesgan *Upene* ara.

6 Inmas neigki, naktaktaivaig niji itai u inliinmopja itu; ja nitai umoh iran im neigpa neigki, naktaktaivaig niji itai o Nesgan *Upene*:

7 et idim amcel vai Atua inliinmopja itu; et eti imyiaiji intas alep o Atua, et lep ehka *nimyiaijivaig*:

8 et lep ehka vai ra et amen ehele ra inliinmopura itu nagovaig nedo ineig et upene vai Atua.

9 Ja el et amen ehelemia a Nesgai Atua, eka eti apol anliinmopomia itu aijaua, jam apol an Nesgan *Upene*. El et eti amen a Nesgai Kristo ehelen tah natimi, et ti *natimi* o un aien.

10 El et lep amen ehelemia a Kristo, et emesmas nohumia va nedo has; ja et umumoh nesgamia va nika o Atua et atoh nedo *unyimia*.

11 Ja el et amen ehelemia a Nesgan is imyinusjai Iesu aien vai inmas o un, etpu lep imyiatamumoh nohumia auatialidi aien, is imyinusjai Kristo aien vai inmas o un,

irai Nesgan *Upene* et amen anliinmopomia aien.

12 VA nitai ineigki, ak ilpu etoak, eris idim ika intupu eti aheca u inliinmopja itu akaija, par ago nedo ineig et ahes anliinmopja itu:

13 el eka ago nedo ineig et ahes anliinmopomia itu aijaua, akupu emesmas aijaua; ja el eka atgei nedo o nohumia aijaua an Nesgan *Upene*, akupu umumoh aijaua.

14 Ara asega et uhup ira ra a Nesgai Atua, era ilpu hal o Atua ara.

15 Akis eti leh inliinmopoi ilpu aheca aijaua, va akupu lep imtitaig aijaua; ja akis leh inliinmopoi ilpu halav aijaua, inta ahlaiak akaija iran, *um ika*, Abba, Ak Etmama.

16 Et lep ato inliinmopja akaija vai Nesgan *Upene*, mika inta ilpu hal o Atua akaija:

17 el ta ilpu hal o un akaija, intupu ohuun itai akaija; intupu ohuun itai o Atua akaija, um ehra-sipiaig itai ehele Kristo; el ta ehrileucse nohocred ehelen akaija, mika ti lep ehramen ehelen akaija an pece upene.

18 ¶ Ek aktaktai ainyak mika, et tintin nohocred *uja* an naopan ineig, ja etpu esjilid niji itai upene uhpu ehvaig eheleija.

19 Et aitgaig naopan iyehki, uhu wit ehvaig ilpu hal o Atua, niji itai asega eris ago, um merit emda vaig.

20 Eris ikni niji itai eris ago mika yi takitai, ja is eti ucce vai inmerit iran, ja vai *inmerit* o un is ikni aien:

21 ja er aitgaig naopan iyehki, uhu wit ahiyi niji itai eris ago va naheca u unmas, um ika yi asipiaig pan namen upene o ilpu hal o Atua.

22 Inta ato akaija, mika is ehraunyawuwaig um ahka niji itai asega eris ago, um imyihum pam an naopan ineig:

23 jam eti echim hiski ache, inta lep aunyawuwaig anliinmopja akaija, intis leh inhupnan o Nesgan *Upene* akaija, um aminjinaig naopan

iyehki, intupu idivai ilpu hal o Atua akaija va ninyiatamaig nohuja.

24 Intis aitgaig ninyiatamaig caija vaig akaija: ja er eti aitgaig nitai ineig er ecetai; et auri tah natimi par aitgaig nitai ineigki et mun ecetai aien?

25 Ja el ta aitgaig nitai ineigki akaija inta eti ecetai, inta aminjinaig akaija anliinmopja eti auatiemda.

26 ¶ Im lep ineig, et lep atau imi caija a Nesgan *Upene* va nauatialidi uja: inta eti ato akaija nitai iji eigki et upene mika ti alaigaheni vaig akaija; ja et ugni vai caija a Nesgan *Upene* an lelesjai *uja* et ehka nasaigvaig.

27 Aien et ahilek inliinmopoi atimi aien, et ato inmerit o Nesgan *Upene* aien, et idim ugni itai vai ilpu atimi upene aien et idivaig *intas alep o Atua*.

28 ¶ Inta lep ato akaija, mika et ehauritai niji itai asega, mika yi upene vai ra et aiyu inliinmopura ara vai Atua, is ahlaig vai ra aien is idivaig nupyi aktaktai *o un*.

29 Is lep anacanac irai ra sji eigki aien is upyi ato ra aien, mika eri idivai Inlah o un ara, va etpu metto aien irai ilpu etoan inyi ahinag;

30 is lep ahlaig vai ra sji eigki aien is anacanac ira ra aien: is lep ika aien et atoh nedo u ra sji eigki is ahlaig vai ra aien: is lep alupai ra sji eigki inpece upene aien is ika aien et atoh nedo ura.

31 ¶ Intupu asan he akaija va nitai iji eigki? el et leh imi caija a Atua, di neigki et tak atimi iraija?

32 Aien is eti imyiaaij Inlah o un aien, jam alhtai yin vai caija asega, etpu idim tup alupai caija niji itai asega aien ehelen.

33 Di neigki etpu atijai *tah nitai* irai ilpu atimi iji eigki is ehtai ra a Atua? Atua neigki et ika aien et atoh nedo *uja*.

34 Di neigki et ika eri aru nedo has *uja*? Kristo neigki is mas aien, ja par idim lep nusjai, et lep amen

aien an matai Atua, um imyiahra caija *ehelen*.

35 Di neigki etpu iknipagki caija an naiheuc o Kristo? *Inyi auatialidi* nohocred, im nerekinman *iraija*, im nedemda *vai caija*, im numlaig has, im nihki natimi, im nitai mas vaig, im nedoa:

36 et idivaig eris aged, um ika, "Er auahas cama an nadiat asega vai euc; eris ika ecra idivaig siip aijama ulpu atgei ra."

37 Jai inta idim esjilid akaija an nitai iji eigki asega vai yin is aiheuc vai caija aien.

38 Ek imyiisjis ninivaijec ainyak, mika inyi auatialidi inmas, im nitai umoh iran, im ilpu agelo, im ilpu atimi alupas, im ilpu atimi emda, im niji itai an naopan ineig, im niji itai etpu yetpam,

39 im niji itai jipagko, im niji itai sepagko, im tah nitai et eche, par iknipagki caija an naiheuc o Atua, et amen irai Iesu Kristo Natimarid uja.

NAURIN-TAS ALUPAS 9.

EK asan tas inivaijec ainyak irai Kristo, ek eti asan tas ahcil ainyak, et lep ato inliinmopok ainyak an Nesgan *Upene*,

2 mika ek ohocred alupas ainyak, et lep taigtaig inliinmopok ainyak irai iji adiat,

3 (kis idim merit ainyak mika ulpu atipagki nyak ehele Kristo,) vai ilpu etoak, ilpu atimi ehpan irak an nohuk:

4 era upu Isreel ara; era lep ilpu hal o *Atua* ara; et amen *ehele* ra inlah o *un*, im intas-etipup o *un*, im intas alep o *un* eris alupai *ra*, im nalaigaheni *vai yin*, im intas upyi asaig o *un*;

5 era ahes ehele ilpu retpoma ara; is lep ahes ehele ra an nohun a Kristo, aien aigki et esjilid aien irai iji itai asega, Atua marom er imyiahpas yin irai iji mesese. Emen.

6 Ja et eti takitai intas o Atua. Era idim eti upu Isreel ara sji eigki asega, eris ahes ehele Isreel ara:

7 era eti lep ilpu mapoi Ebrahim ara asega eris ahes ehelen ara: ja "uhpu anvi nidai ilpu mapom irai Aisak."

8 Eris eti ika era ilpu hal o Atua ara sji eigki eris apos ra an nedo an nobohtan: ja eris ika era ilpu hal o un ara sji eigki eris apos ra an tas upyi asaig.

9 Intas upyi asaig ineigki, eris ika, "Ekpu ham ainyak an naopan iyehki eris ati, etpu lep apos inhal o un a Sera."

10 Im lep ineig, is wat lep opouc a Ribeka vaig tah, Aisak marom etpoma;

11 is wat eti fi apos rau aien, erus wat lep eti ago tah nedo upene arau, ka tah nedo has, va etpu amen aktit naktaktai o Atua *vai rau*, et idivaig is anacanac *ira rau* aien, *jam* eti ago va nauritai *urau*, ja vai yin ache is ehtai *rau* aien;

12 eris asaig ehelen mika, "Etpu aheca u inharei a inmetto:"

13 et idivaig eris aged, *um ika*, "Is aiyu inliinmopok ainyak vai Jakob, jam esjum vai Isa."

14 Inti asan he akaija? Et eti atoh nedo o Atua, ka o'o? Et idim eti ucce.

15 Is um ika ehele Moses aien, "Ekmu ti ehريس irai natimi ineig ainyak, ek ika ainyak ki ti ehريس iran, ekmu lep aiheuc vai natimi ineig ainyak, ek ika ainyak ki aiheuc vai yin."

16 Va nitai ineigki et eti ahes ehele natimi ineig et merit aien, ka natimi ineig et athut aien, ja et ahes ehele Atua ineig et aiheuc aien.

17 Is um ucce intas ineig eris aged ehele Fero, um ika, "Kis imyiatidai euc ainyak va nitai ineigki, mika ki ehvaig nemda unyak iran, va uhpu asuptecnaig nidak an nobohtan asega."

18 Va nitai ineigki et aiheuc vai

natimi ineig aien et ika aien *yi ai-heuc* vai yin, et lep ago ipjin natimi ineig aien et ika *yi ago ipjin* yin.

19 Ja napu ika ehelek aiiek, Et auri aien par acaiji *tah?* is atapanes intas o un a di?

20 Eklim erop, ak natimi ineigki, aiiek di aigki na imyiisjis itai irai Atua? etmu jim ika nitai ineig eris mun ago ehele natimi ineig is mun ago aien, As auri aiiek par ago nyak is ucce?

21 Et eteuc nemda irai intan apol ehele natimi ago ipjiitai, par ago an nuarin-aplamod et ethi ache nipjinitai et ethi va nauritai esjilid, im nipjinitai et ethi va nauritai tup eti esjilid.

22 Ja el et ika a Atua yi asuptecnaig nedemda o un aien, um ehvaig nemda o un, jam ago nedo eti aatiemda esjilid vai ipjiitai iji eigki er edemda vai ra, eris ikni ra mika eri auahas ra, tup aien marom:

23 ja mika yi ehvaig niji itai esjilid an natimi alupas o un aien ehele ipjiitai iji eigki er aiheuc vai ra, is upyi yecrei ra aien vai inpeece upene,

24 akaija marom, is ahlaig vai caija aien, jai eti ehele nupu Jutaiia ache, jam lep nup urai iji taka pece:

25 et idivaig intas o un *is aged* a Hosia, *um ika*, "Ekpu anvi nidai ra sji eigki ainyak par ika ilpu atimi unyak, eris eti ilpu atimi unyak ara; etpu lep aiyu inliinmopok ainyak vai intakata ineig is eti aiyu inliinmopok *ainyak* vai yin."

26 "Im lep ineig, uhpu anvi nida atimi par ika ilpu hal o Atua umoh, an nuarin iyehki eris ika ehele ra, Eka eti ilpu atimi unyak aijaua."

27 Is lep tas a Aiseya vai nupu Isreel, *um ika*, "El eh wat esvi nupu Isreel, el era idivaig nau-anahvig an nohmunjop ara, ja uhpu imyiatamaig nahaiji ra tintin ache:

28 etpu idim auroauro aien um aru

ehni, um ago ipjidiipjid nedo atoh *o un*: etpu auroauro a Ihova um ago ehni neruvaig *o un* an nobohtan.”

29 Is idivaig is upyi asaig a Aiseya, *um ika*, “El is eti ude nahaiji ilpu mapja vai caija a Ihova ineig et esjilid acen aien, ele tis idivai *nupu* Sotom akaija, um lep idivai *nupu* Comora.”

30 Intupu asan he akaija? Eris eti ahilek nika *o Atua* et atoh nedo *ura* a nup urai iji taka pece, ja eris leh nika *o Atua* et atoh nedo *ura* ara, nika ineig marom *o Atua* et atoh nedo *ura* va nimyiisjis ninivaijec *ura*.

31 Ja eris wat apol an tas alep a nupu Isreel, va uhpu eti aru nedo has *ura*, eris eti uhumi pan intas alep ineig ara, uhpu eti aru nedo has *ura* vaig.

32 Vanhe? Va nitai ineig, nika-vaig, *eris* eti *ahilek ara* an nimyiisjis ninivaijec *ura*, ja an nimyiaiji intas alep: eris epihtau ara an hat ineig er epihtau iran;

33 et idivaig eris aged, *um ika*, “Ek idim ati a Saion ainyak inhat epihtau iran, im nefehat er eropse vaig: ara asega era asgeig iran ara, eri ti ehcamai ara.”

NUARIN-TAS ALUPAS 10.

AK ilpu etoak, ek merit emda ainyak, um ugni Atua vai nupu Isreel, mika uhpu imyiatamaig ra.

2 Ek lep asaig ainyak, mika era emda vai Atua ara, ja et ti an nato itai.

3 Era eti ato nika *o Atua* ara et atoh nedo *ura*, um lep merit par apol an nedo atoh ineig et ahes ehele ra; va nitai ineigki era eti imyiaiji nika *o Atua* ara et atoh nedo *ura*.

4 Is apos asega intas alep a Kristo, mika eri ika et atoh nedo *u ra* sji eigki asega era asgeig *iran* ara.

5 Is aged intas a Moses va mika *o*

intas alep et atoh nedo *o atimi*, *um ika*, “Natimi ineig et ago nitai iji eigki aien, etpu umoh vaig aien.”

6 Ja et ucce intas va nika *o* nimyiisjis ninivaijec et atoh nedo *o atimi*, nikavaig, “Jim ika anliinmopom aiek, Etpu aridjai an nohatag a di,” par imyiasuol sepam Kristo?

7 “ka, Etpu asuol an nuarin ubou a di,” par imyinusjai Kristo vai inmas *o un*?

8 ja er asaig, *um ika*, “Et ubutpotet ehelum intas ineig, *et lep amen* an nipjineucsum, im lep anliinmopom:” intas inivaijec marom, eera asuptecnaig aijama;

9 mika, el et asuptecnai Iesu Natimarid an nipjineucsum aiek, um imyiisjis ninivaijec anliinmopom, mika is imyinusjai yin a Atua vai inmas *o un*, uhpu imyiatamaig euc.

10 Inta imyiisjis ninivaijec anliinmopja akaija, mika eri ika et atoh nedo *uja*; um lep asuptecnaig an nipjineucseija, va uhpu imyiatamaig *caija*.

11 Et ika intas ineig eris aged, “Ara asega era asgeig iran ara, eri ti ehcamai ara.”

12 Era eti eche a nupu Jutaia im nupu Crisi: et tup ethi ache Natimarid *ura* asega, et lep efalupai ra asega itai aien era ahlaig vai yin ara:

13 va nitai ineigki “ara asega era arohoan nidai Ihova ara, uhpu imyiatamaig ra.”

14 Ja erupu ahlaig vai yin ara era eti asgeig iran ara, um uauo? erupu lep asgeig iran ara eris eti atahaijeg *intas* vai yin ara, um uauo? erupu lep atahaijeg *intas* ara et wit ti natimi par asuptecnaig *ehele ra*, um uauo?

15 erupu lep asuptecnaig ara el eh eti abrai ra, um uauo? et idivaig eris aged intas, *um ika*, “Et eklim upene neduei ra sji eigki era asuptecnaig intas-upene va neigpa ara,

um asuptecnaig intas va niji itai upene!"

16 Ja eris eti imyiaiji intas-upene ara asega. Is idim ika a Aiseya, "Ak Ihova, is imyiisjis ninivaijec a di an natahaijeg cama vaig?"

17 Va nitai ineigki et ahes an natahaijegvaig nimyisjis ninivaijec, er lep atahaijeg vai intas o Atua.

18 Ja ek ika ainyak, Eris atahaijeg ara, ka o'o? Maiya, "is idim apaahni nohrara irai iji pece asega, im lep intas ura an tid an nobohtan."

19 Ja ek ika ainyak, Eris idim ato a nupu Isreel, ka o'o? Is uhup a Moses um ika, "Ekpu atupun nauatitai unyimia va atimi era tak-itai ara, um lep auahas inliinmopomia vai nup uran pece iji eig era eti ato itai."

20 Ja et emda a Aiseya, um ika, "Eris ecet nyak ara sji eigki eris eti ahilek nyak ara; eris ehvaig nyak ehele ra eris eti ahodai nyak."

21 Ja is lep tas ehele nupu Isreel aien, *um ika*, "Kis ada nikmak ero ainyak an nadiat asega, vai ilpu atimi imyipalea, im ilpu atimi iji eig era imyiisjis itai ara."

NUARIN-TAS ALUPAS 11.

1 VA nitai ineig ek ika ainyak, Is atcejai ilpu atimi o un a Atua, ka o'o? Is idim eti ucce. Ek lep upu Isreel ainyak, um ahes ehele Ebrahim, um mapoi Benjamin.

2 Is eti atcejai ilpu atimi o un a Atua is upyi ato ra aien. Eka idim ato aijaua intas ineig eris aged vai Elaija, et asuptecnaig ehele Atua aien vai nupu Isreel, um ika,

3 "Ak Ihova, eris atgei ilpu profeta unyum ara, um alcapidicraig efata unyum; ja ek echim amen ainyak, era lep tas jipe ara mika eri atgei nyak."

4 Ja et ihka ehelen intas ineig is

ahes ehele Atua? "Kis ikni imi nyak ainyak natimi et seven dau-sant, eris eti atpuse an nuhup u Beel ara."

5 Et lep ucce an naopan ineig, et eteuc natimi et eti elpat eris ehtai ra an naiheuc o Atua.

6 El is ahes an naiheuc o *un nehtai ra*, et eti ahes an nauritai *ura*: el et eti ucce, el et eti lep nedo aiheuc naiheuc o *un*. Ja el et ahes an nauritai *ura*, el et eti ahes an naiheuc o *un*: el et eti ucce, el et eti lep nauritai nauritai *ura*.

7 Et idim ucco, eris eti leh nitai ineigki eris ahilek a nupu Isreel; ja eris leh a ilpu atimi eris ehtai ra, eris lep ipjin natimi is eche,

8 um imyihum pam an naopan ineig; et idivaig eris aged, *um ika*, "Is alupai ra inliinmopura umjeg a Atua, *im* nesganimtara eti alum itai, im intikgara eti ahgei itai."

9 Is lep ika a Tevit, "Etmu itai apro ra nitai caig ura, im nitai auahas ra, im nitai epihtau iran, im neruvaig imi ra:

10 etmu aupat nesganimtara ara, mika eri jim alum itai ara, etmu lep avakavak incehera ara vai euc irai iji adiat."

11 Va nitai ineig ek ika ainyak, Eris epihtau ara mika eri eropse, ka o'o? Is idim eti ucce; ja *et mun yetpam* ehele nup urai iji taka pece nitai imyiatamaig *ra* va neropse ura, mika eri auatitai ara.

12 El era ikni itai natimi an nobohtan va neropse u ra sji eigki, el era lep ikni itai a nup urai iji taka pece va nasuolvaig u ra sji eigki, erupu idim esjilid ara va nasjapicnaig ehni u ra sji eigki.

13 Ek tas ehelemia ainyak, ak nup urai iji taka pece, va nitai ineigki, nikavaig, ek apostolo ainyak imi nup urai iji taka pece, ek lep imyiahpas nauanaheca unyak ainyak:

14 mika ki emda ainyak par

atupun nauatitai o ilpu atimi ehpan irak, um inyiatamaig nahaiji ra.

15 El eh asan neigpa ehele nup urai iji pece va natceijai ra, uhu wit lep aiheuc vai ra, inyi idivaig nusjai o atimi vai inmas *ura*.

16 El et upene inhupnan, etpu lep upene nohoan asega: el et upene nievancai, et lep upene inran *asega*.

17 Na tup auincai oliv aiek, ja el eh asvi nahaiji ran um ehcil iram irai *ran*, va apu umoh aiek va nievancai oliv im lep nidin ;

18 jim tas ijinies amcel vai ran aiek: el et tas ijinies amcel vai *ran* aiek, et eti umoh nievan vai euc, ja *na umoh* aiek va nievan.

19 Ja napu ika aiek, Eris asvi ran, mika eri ehcil irak iran.

20 Et idim ucco; eris idim asvi ra va nimyiisjis nahcil *ura*, ja na amen aktit aiek va nimyiisjis nini-vajec *unyum*. Etmu jim ijinies inliinmopom aiek, jam imtitaig:

21 el is eti imyialep ran inivaijec a Atua, *aminjinai euc aiek* vai yi jim eti lep imyialep euc aien.

22 Namu almoi aiek naiheuc o Atua, im nedemda o un: nedemda o un vai ra eris eropse ara; jam nedo aiheuc vai euc, el et amen aktit aiek an naiheuc o un; el et eti ucce, uhpu lep atipagki euc.

23 El era eti apol an nedo imyiisjis nahcil *ura* ara, uhpu ehcil ira ra iran: et idim emda a Atua par lep ehcil ira ra iran.

24 El eris acaldei euc an nauincal oliv tup ededel, um ehcil iram an nauincal oliv upene, et eti idivaig nedo iran; uhpu idim lep ehcil irai *ran* inivaijec iji eigki an nauincal oliv *ura*.

25 Ak ilpu etoak, ek eti merit ainyak mika aki jim ato nitai adenaig ineigki aijaua, va aki jim aktaktai aijaua mika arapakau; mika era ipjin nahaiji nupu Isreel, um imyihum pan an naopan iyehki uhpu asjapicnaig elni nup urai iji taka pece:

26 et idim ucco, uhpu imyiata-maig nupu Isreel asega: et idivaig eris aged, *um ika*, "Etpu ahes a Saion a Natimi imyiatamaig *caija*, um atapanes nedo has o ilpu mapoi Jekob:

27 ek wit atipagki nedo has *ura* ainyak, etpu tas-etipup unyak ehele ra ineigki."

28 Era lep tak atimi ara an tas-upene ineig vai caua: ja et aiyu inliinmopon vai ra an nehtai ra vaig vai ilpu retpoma:

29 et idim eti ero naktaktai o Atua va niji itai tup ahtai o un im nahlaig va atimi o un.

30 Akis idim eti imyiaiji intas o Atua aijaua itu acen, ja er aiheuc vai caua an naopan ineig va nimyiisjis nahcil u ra sji eigki:

31 et idim ucco, era lep eti imyiaiji intas o un ara sji eigki, ja uhpu aiheuc vai ra va naiheuc o un vai caua.

32 Is ahtapanes ra asega a Atua an nimyiisjis nahcil vaig *ura*, mika yi aiheuc vai ra asega.

33 Et esjilid nikni itai o Atua, im narapakau o un, im nato itai o un! et ehka nahilekvaig auritai atoh o un, um lep ehka natovaig nedo o un!

34 "Is ato inliinmopoi Ihova a di? um atimi tas jipe ehelen a di?"

35 ka "is upyi alupai yin itai a di, ja par ika yi lep leh nimtan imi yin aien?"

36 Is idim ahes ehelen niji itai asega, um lep *eteuc* vai yin, um lep imi yin: uhnu imyialhpas yin irai iji mesese. Emen.

NUARIN-TAS ALUPAS 12.

AK ilpu etoak, ek idim ugni caua ainyak va nedo aiheuc o Atua, mika aki ahtai ohumia aijaua, nitai ablap umumoh, um itaup, um imyiacitak vaig a Atua, nauritai ahes anliinmopomia neigki;

2 akumu jim idiva atimi an nobohtan ineigki aijaua: akumu

eche aijaua vai inliinmopomia mat, mika aki ato upene inmerit o Atua aijaua et upene, um imyiacitak vaig, um ti inhas iran.

3 Ek lep asaig ehelemia asega ain-nyak, va naiheuc ineig eris alupai nyak, mika yi jim ijinies naktaktai o un tah, um eti idivaig ineig eris idim ika yi aktaktai; jam ika yi arapakau naktaktai o un, et idivaig nimyisjis ninivaijec ineig et ahaig athiathi ira atimi asega a Atua.

4 Et idivaig et ahinag inuarin-nohun tah et ethi iraija, jam achei-achei nauritai u iji uarin asega:

5 et idim ucco, inta ahinag akaija, jam ohun et ethiache irai Kristo; jam elpatelpat jipe nuari-ohuja asega;

6 et lep uja niji itai tup ahtai acheiachei, et idivaig eris aiheuc vai caija; va nitai ineig, el et wat atimi ahidan tas *tah, etmu ahidan tas aien* et idivaig nohuun nimyisjis ninivai-*jec o un;*

7 erumu lep auritai a ilpu atimi auritai; erumu lep esege a ilpu atimi esege;

8 erumu lep ated *atimi* a ilpu atimi ated *atimi*; aien et ahtai itai aien, etmu inivaijec inliinmopon aien; aien et aminjina *atimi* aien, etmu emda aien; aien et aiheuc *va atimi* aien, etmu imyiacitak aien.

9 Etmu jim efaifa naiheuc *unyim-ia*; amcel va niji itai has aijaua, um apol an niji itai upene.

10 Etmu aiya sjipe inliinmopomia vai caua aijaua, um idivai ilpu raimu; akumu lep esjilid aijaua an nedo eccen jipe vai caua;

11 *um* jim esjum u nauritai; etmu emda inliinmopomia aijaua; *um* aheca u Natimarid;

12 *um* imyiacitak an naitgaig *unyim-ia*; *um* ago nedo eti auatiemda an nohocred *unyim-ia*; *um* apol ipjin an nalaigaheni;

13 *um* ahtai itai imi ilpu atimi upene era ihki atimi ara; *um* emda um alayi tak atimi itai.

14 Asan tas upene vai ra era edemda vai caua ara: asan tas upene, um jim asan tas has.

15 Akumu imyiacitak ehele ra aijaua era imyiacitak ara, um ehteig-taig ehele ra era ehteigtaig ara.

16 Etmu tup ethi ache inliinmopo-mia aijaua vai caua: jim aktaktai niji itai esjilid, ja etmu upoupo inliinmopomia aijaua. Jim ika aijaua eka arapakau.

17 Jim aru nedo has o un tah natimi an nedo has. Ago nedo ineig aijaua et upene an nuhup u atimi asega.

18 El et eti ehka, akumu emda aijaua, um amen eigpa ehele atimi asega.

19 Ak ilpu *etoak* upene, jim aru nedo has vai caua aijaua; jam ika etpu aru a *Atua*; eris aged, *um ika*, "Et ika a Ihova, *Et amen* ehelek neruva nedo has; ekpu aru ainyak."

20 Va nitai ineigki, el et ehteleg yin a natimi tak atimi iram, alaan nitai caig; el et ahvig wai aien, aluman: napu atijai an midjinin aiek inmehtan cop an nedo ineigki.

21 Etmu jim esjilid iram nedo has, jam esjilid irai edo has aiek an nedo upene.

NUARIN-TAS ALUPAS 13.

E RUMU imyiaiji intas o ilpu atimi alupas iji eigki natimi asega era esjilid *ira ra*: era eteuc a ilpu atimi alupas vai Atua ache: et idim ikni ilpu atimi alupas a Atua.

2 Aien et imyipalea ilpu atimi alupas aien, et lep imyipalea intas alep o Atua aien: erupu leh neru-vaig imi ra ara sji eigki era imyipa-*lea* ara.

3 Er eti imtitai ilpu atimi alupas va nedo upene, ja va nedo has. Na idim merit aiek mika an eti imtitai ilpu atimi alupas aiek; namu ago nedo upene aiek, va erupu asan tas upene vai euc ara:

4 et aheca u Atua aien par ago nedo upene vai euc: ja el et ago nedo has aiek, namu intitaig aiek; et eti apos nautoga aien vai intak-itai: et aheca u Atua aien, im natimi ago neruvaig iran et ago nedo has aien.

5 Eris idim lep ika aki imyiaiji intas o un aijaua, jam eti va neruvaig ache, jam lep va naktaktai u inliinmopomia.

6 Va nitai ineigki akumu lep akwanaham imi ra aijaua: era ilpu aheca u Atua ara, um aminjinaigse emda nauritai ineigki.

7 Alupai atimi asega nitai iji eig eris idim ika eri leucse ara: nakwanaham imi ra sji eigki *eris idim ika eri leh* nakwanaham ara; im mune imi ra sji eigki *eris idim ika eri leh* mune ara; um imtitai ra sji eigki *eris idim ika* aki imtitai ra aijaua; um ago nedo eccen vai ra sji eigki *eris idim ika* aki eccen vai ra aijaua.

8 Akumu jim tup leh tah nitai o un tah aijaua jam eti leh nimtan, ja etmu aiyu jipe inliinmopomia aijaua vai caua: aien et aiyu inliinmopon aien vai tak atimi, et imyiaiji upene intas alep o Atua aien.

9 Intas alep iji eigki, *nikavaig*, "Namu jim ago ingaijid aiek," "Namu jim atgei atmas aiek," "Namu jim ehneg itai aiek," "Namu jim asan tas aheil aiek," "Etmu jim has iram aiek itai;" el et lep eteuc tah intas alep, et eteuc an tas ipjid-ippid ineigki, *nikavaig*, "Etmu aiyu inliinmopom aiek va natimi eblaam-nem unyum, et idivaig *naiyu u inliinmopom* vai euc."

10 Et eti ago nedo has va natimi eblaamnem o un natimi ineig et aiyu inliinmopon aien vai yin: va nitai ineigki er imyiaiji intas alep an naiyu u inliinmepja va atimi.

11 IM lep ineig, inta ato naopan ineig akaija, *nikavaig*, et mun yetpam naopan aiji lahlah va numjeg

uja: et idim ubutpotet nimyiatamaig caija vaig an naopan ineig, ja is itac acen u naopan iyehki intis *upyi* imyiisjis ninivaijtec akaija.

12 Et mun ti pan itac nahaijin-nepeig ineig et opra, et lep ubutpotet u nadiat: va nitai ineigki intumu atceijaig nedo iji eig akaija er ago an naupat, um leucose itai iji eigki er ago nedo an lah vaig.

13 Intumu ago nedo upene akaija, et idivaig an nadiat; um jim auaramai um ahnag vai kava, um jim ago nedo acitak im ingaijid, um jim ehtauo um auatitai.

14 Ja akumu aso caua aijaua irai Iesu Kristo Natimarid, um jim aktaktai vai inmerit has u inliinmopomia itu.

NUARIN-TAS ALUPAS 14.

A KUMU leh yin aijaua et auatiali-idi nimyisjis ninivaijtec o un aien, jam eti leh yin mika yi tas aien va niji itai er imyiisjis itai vaig.

2 Et ika natimi et ethi et upene vai yin incaigvaig niji itai asega: ja et auatialiidi intak atimi, um caig inceslum ache.

3 Aien et caig aien, etmu jim esjum vai yin aien et eti caig aien; aien et eti caig aien, etmu jim aktaktai has aien vai yin et caig aien; et mun leh yin a Atua.

4 Aiek di aigki na aktaktai has aiek va naheca u intak atimi? et aiji aien ka asuol va natimi alupas o uu ache. Etpu idim aiji aktit aien: et emda a Atua par imyiaiji aktit yin.

5 Et aktaktai natimi et ethi mika et esjilid tah nadiat iran tah nadiat: et aktaktai intak atimi mika et tup apapa nadiat asega. Etmu imyiisjis ninivaijtec inliinmopoi atimi asega.

6 Aien et apos tah nadiat aien, et apos aien vai Natimarid; aien et eti apos tah nadiat aien, et eti apos aien vai Natimarid. Aien et caig aien, et caig aien vai Natimarid,

um naaurineig vai Atua; aien et eti caig aien, et eti caig aien vai Natimarid, um naaurineig vai Atua.

7 Et eti umoh tah caija echim vai yin ache, um eti lep mas tah natimi echim vai yin ache.

8 Intu wit umumoh akaija, inta umumoh akaija vai Natimarid; intu wit emesmas akaija, inta emesmas akaija vai Natimarid: va nitai ineigki inta u Natimarid akaija an numumoh uja, im lep an nemesmas uja.

9 Va nitai ineigki is mas a Kristo, um nusjai, um lep umoh, mika yi Atimarid o ilpu atimi emesmas im lep ilpu atimi umumoh.

10 Jai na auri aiek par aktaktai has vai etoam? na auri aiek par esjum vai etoam? intupu idim aiji akaija asega an nuhup u nitai ateuc ineig etpu asuptecnaig nimitan iran a Kristo.

11 Eris aged, *um ika*, "Et ika a Ihova, Ek umoh ainyak, erupu atpuse an nuhup unyak natimi asega, erupu lep imyialpas Atua natimi asega.

12 Va nitai ineigki intupu asuptecnaig nedo uja akaija asega athi-athi ehele Atua.

13 Intumu jim lep aktaktai has jipe vai caija akaija; jam aktaktai nitai ineigki, mika yi jim ati nitai epihtau iran vai etoan *tah natimi*, ka nitai eropse vaig.

14 Ek ato ainyak, um imyiisjis ninivajec nitai ineigki vai Iesu Natimarid, mika et eti ispun itaup tah nitai; ja el et ika tah et itaup tah nitai, et itaup vai yin *incaigvaig*.

15 Ja el et taigtaig a etoam va nitai caig *unyum*, na eti ago nedo aiheuc *vai yin* aiek. Jim auahas tah is mas vai yin a Kristo aiek an nitai caig unyum:

16 uhmu jim asan tas has va namen upene unyimia:

17 et eti ohuun nelcau o Atua nitai caig im nitai umnyi; jai nedo atoh, im neigpa, im nimityacitak vai Nesgan Upene.

18 Aien et aheca u Kristo aien an nitai iji eigki, et upene aien an nuhup u Atua, era lep tas upene vai yin natimi.

19 Intumu ahilek nitai iji eigki akaija etpu eigpa vaig, im lep nitai iji eigki intupu emda jipe vaig akaija.

20 Namu jim auahas nauritai o Atua aiek va nitai caig. Et idim upene niji itai asega; ja et has nedo o natimi ineig et caig aien um auahas inliinmopoi atimi.

21 Et eti upene par caig nohu itai, um umnyi waina, um *ago* tah nedo ineig et epihtau vaig a etoam, ka eropse vaig, ka auatialidi vaig.

22 Et eteuc nimityisjis ninivajec unyum, ka o'o? etmu eteuc vai euc an nuhup u Atua ache. Et mun ahesmoij natimi ineig et eti ated yin inliinmopon va nitai ineig et ika aien et upene.

23 Aien et etehto inliinmopon aien *va nitai caig*, el et hag aien, etpu leh neruvaig imi yin aien, va nitai ineig, nikavaig, *et eti hag* aien va nimityisjis ninivajec: et has nedo asega ineigki et eti ahes an nimityisjis ninivajec *uja*.

NUARIN-TAS ALUPAS 15.

1 ERIS idim lep ika ti eropse akaija ilpu atimi emda va nedo acalacal o ilpu atimi auatialidi, um eti imyiaiji inmerit uja.

2 Intumu imyiaiji inmerit o atimi eblaammem *uja* akaija asega an nitai ineig et upene *vai ra* mika eri emda ara.

3 Is idim eti imyiaiji inmerit o un a Kristo; ja et idivaig eris aged, *um ika*, "Eris asan tas has vai nyak ara sji eigki era asan tas has vai euc ara."

4 Nitai iji eigki asega eris upyi aged itu acen, eris aged par esege imi caija, mika ti aigtaig akaija an nedo eti auatiemda ineig im nim-

yiacitak ineig eris aged an nitas-vitai *itaup*.

5 Etmu lep alupai caua inliinmopomia et tup ethi ache a Atua ineig et ahes ehelen nedo eti auati- emda im nimyiacitak, *mika aki idi- vai Iesu Kris o aijaua* :

6 um lep imyiahpas Atua, et Et- mai Iesu Kristo aien Natimarid uja, anliinmopomia tup ethi ache, im nijineucsemia tup ethi ache.

7 Akumu lep leucse jipe caua aijaua, et idivaig is leh caija a Kristo, va uhpu imyiahpas Atua.

8 EK lep ika ainyak, is aheca u ilpu atimi aperitome a Iesu Kristo vai intas inivaijec o Atua, mika yi ehneijid intas eris upyi asaig ehele ilpu retpoma :

9 va erupu imyiahpas Atua a nup urai iji taka pece va naiheuc o *un* ; et idivaig eris aged, *um ika*, “Va nitai ineigki ekpu imyiahpas euc ainyak an nuhup u nup urai iji taka pece, ekpu lep acesaces nohranitai ainyak va nidam.”

10 Is lep ika aien, “Ak nup urai iji taka pece, akumu ehrimyiacitak aijaua ehele ilpu atimi o *un*.”

11 Im lep ineig, “Akumu imyiah- pas Ihova aijaua, nup urai iji taka pece asega ; um naaurineig vai yin, natimi asega.”

12 Is lep ika a Aiseya, “Etpu ahes ehele Jesse tali inyi ethi, aien aigki etpu atidai aien um Atimarid irai nup urai iji taka pece ; erupu asgeig iran a nup urai iji taka pece.”

13 Akumu ohua aijaua an nim- yiacitak asega im neigpa asega vai Atua ineig et ahes ehelen niji itai aitgaig, va nimyisjis ninivaijec *un- yimia*, mika aki aitgaig alupas aijaua va nemda o Nesgan Upene.

14 AK ilpu etoak, et imyisjis ninivaijec inliinmopok ainyak vai caua, nikavaig, eka ohua aijaua va nedo upene, um lep ohua va nato

itai asega, eka lep emda aijaua par ated jipe caua.

15 Ja ek mun emda ainyak, ak ilpu etoak, um aged intas ineig imi caua, va nitai ineig, mika ki ahugni lelnia ainyak, va naiheuc ineig o Atua is alupai nyak aien,

16 mika ki aheca u Iesu Kristo ainyak vai nup urai iji taka pece, par ago nauritai o natimi ahlap an tas-upene o Atua, va uhpu ika et upene nitai ahlap o nup urai iji taka pece, an nago upene ra u Nesgan Upene.

17 Et amen ehelek nimyiacitak niji itai o Atua vai Iesu Kristo.

18 Ja ek eti emda ainyak intas- vaig vaig tah nitai iji eigki is eti ago vai nyak a Kristo, mika eri atahaijeg a nup urai iji taka pece, vai intas *unyak* im nedo *unyak*,

19 va nemda u niji auritai ehka im niji itai imyiali, va nemda o Nesgai Atua ; kis idim ahes Jeru- salem ainyak um asuptecnaig emda intas-upene o Kristo um arahed, um yetpan Ilirikum :

20 kis idim merit alupas ainyak nasuptecnaig intas-upene vaig, jai eti an nuarin ineig eris *upyi* aniv Kristo iran, vai ki jim acta *neom* ai- nyak an tinan *neom* u intak atimi :

21 ja et idivaig eris aged, *um ika*, “Erupu alum *yin* ara sji eigki eris eti asuptecnai yin ehele ra : erupu lep ato *yin* ara sji eigki eris eti atahaijeg ara.”

22 Va nitai ineigki is ahtapanes nyak niji itai is ahinag an nika *unyak* ki apam ehelemia.

23 Ja et eti lep eteuc tah anuarin amen imi nyak irai iji pece iji eigki an naopan ineig, kis lep merit alupas ainyak irai mesese is ahinag napamvaig ehelemia ;

24 ek wit apan Speen ainyak, ekpu lep ateghe caua ainyak : ek ika ainyak ki alum caua an natga *unyak*, akupu lep ahced pan nyak aijaua eahki, ja inki uhup ainyak um imyiacitak caua.

25 Ja ekpu apan Jerusalem ainyak an naopan ineig, par ahai itai imi ilpu atimi upene.

26 Eris tup merit a nupu Mase-tonea im nupu Akea, mika eri as-japicnaig tahi naiheuc *ura* imi ilpu atimi upene era ihki atimi ara Jerusalem.

27 Eris idim tup merit ara; eris idim ika eri aru ra ara. El eris asipiaig niji itai an nohatag ura a nup urai iji taka pece, eris idim ika eri alupai ra niji itaian nobohtan ara.

28 Ek wit ago ehni nitai ineigki ainyak, um alupai ra naiheuc ineigki, ekpu ateghe caua ainyak, ja par apan Speen.

29 Ek lep ato ainyak mika, ek wit apan ehelemia ainyak, ekpu apan ainyak, jam ohua va niji itai esjilid an tas-upene o Kristo.

30 Ak ilpu etoak, ek ugni caua ainyak vai Iesu Kristo Natimarid uja, im lep va naiheuc o Nesgan *Upene*, mika aki ehratau imi nyak aijaua an nalaigaheni *unyimia* vai Atua vai nyak;

31 va uhpu imyiatamaig nyak vai ilpu atimi imyipalea Jutaia; um lep mika eri ika a ilpu atimi upene, et upene naiheuc ineig ek *imyipapan* ainyak Jerusalem;

32 mika yi asaig a Atua ki apan ainyak ehelemia, um imyiacitak, um ehratumop ehelemia.

33 *Etmu amen* ehelemia asega a Atua an neigpa. Emen.

NUARIN-TAS ALUPAS 16.

EK tas upene vai Fibi ehelemia ainyak natahaig iraija, et lep imtaam aheca aien an nakalasia Segkria:

2 mika aki ago nedo o ilpu atimi upene aijaua, um leh yin vai Natimarid, um atau imi yin an niji itai asega kit etpu merit vai caua aien vaig: is idim atau imi atimi is ahinag aien, im lep nyak.

3 Aiheuc vai Prisilla im Akwila aijaua, erus ehratau imi nyak arau vai Iesu Kristo:

4 erus adan nipek urau arau mika ki umoh ainyak; ek naaurineig vai rau ainyak, im lep nup urai ekalasia asega irai iji taka pece:

5 um lep *aiheuc* vai nup an nakalasia an nimnim urau. Aiheuc vai Epinetus *etoak* upene, is hupnan aien vai Kristo an pece Akea.

6 Aiheuc vai Mere: is auritai alupas aien vai cama.

7 Aiheuc vai Antronaikus im Junya ohwat atimi ehpan irak, erus lep ehramen ehelek arau anliin neom ipjin; era ato upene rau a ilpu apostolo; erus lep upyi hup irak arau um apol irai Kristo.

8 Aiheuc vai Ampleas, *etoak* upene vai Natimarid.

9 Aiheuc vai Urbeni, natimi atau imi cama irai Kristo, im lep Stekis *etoak* upene.

10 Aiheuc vai Apelles, eris ika et upene aien vai Kristo. Aiheuc vai ra an nimnim o Aristobulus.

11 Aiheuc vai Herotyon natimi ehpan irak. Aiheuc vai ra an nimnim o Narsissus, era apol irai Natimarid ara.

12 Aiheuc vai Traifina im Traifosa, erau auritai vai Natimarid arau. Aiheuc vai Persis *etoak* atahaig upene, is alupas nauritai o un vai Natimarid.

13 Aiheuc vai Rufus, is ehtai yin a Natimarid, im lep risimrau.

14 Aiheuc vai Asinkritus, *im* Flicon, *im* Hermas, *im* Patrobas, *im* Hermes, im lep ilpu etoaija era amen ehele ra ara.

15 Aiheuc vai Filolocus, im Julya, *im* Nirysus, im natahaig iran, im Olimp, im lep ilpu atimi upene asega era amen ehele ra ara.

16 Aiheuc vaig jipe caua aijaua an naijumnyi upene. Era aiheuc vai caua a nup urai ekalasia o Kristo.

17 Ak ilpu etoak, ek lep ugni caua ainyak, mika aki asjaaicnaig irai

ra sji eigki aijaua era atupun ninyiisjis itai ara im nedo oop, et eti idivaig nesege ineig akis lehi aijaua; um ude ra:

18 era cti aheca u Iesu Kristo Natimarid uja ara sji eigki era ago nedo ineigki ara, ja era aheca u nijjinetgara ara; era lep imyiahnag inliinmopoi ilpu atimi eti ahidaig nedo ura ara, an tas updak ura im intas imyiahpas ra.

19 Era ato nedo inyiaiji unyimia atimi asega. Ek imyiacitak caua ainyak; ja ek merit ainyak mika aki arapakau aijaua an nitai iji eigki et upene, jam iswol u nedo has.

20 Etpu auroauro um ehtoplecoplec Satana ithan neduomia a Atua an neigpa. *Etmu amen* ehelemia naiheuc o Iesu Kristo Natimarid uja. Emen.

21 Et aiheuc vai caua a Timodeus natimi taam auritai ehelek, im Tersys, im Jeson, im Sosipater, chtaij atimi ehpan irak ahtaij.

22 Ek aiheuc vai caua ainyak

Tersys vai Natimarid, ek aged nitasvitai ineigki ainyak.

23 Et aiheuc vai caua a Ceus natimi alaak itai, et lep *alayi* nup an nakalasia asega *itai aien*. Et aiheuc vai caua a Erastus naheca esjilid an nuarin-pece ineigki, im lep Kwartus etoaija.

24 *ETMU amen* ehelemia asega naiheuc o Iesu Kristo Natimarid uja. Emen.

25 *Uhm*u imyiahpas yin et emda aien par imyiaiji aktit caua et idivaig intas-upene unyak im intas asuptecnai Iesu Kristo, et idivaig nehvaig nitai adenaig, eris eti asuptecnaig itu acen,

26 ja er ato an naopan ineig, um asuptecnaig, an tas ineig eris aged a ilpu profeta, vai intas alep o Atua ineig is umoh aien irai iji mesese, va erupu imyisjis ninivaijec a nup urai iji pece asega um imyiaiji *intas o un*;

27 *uhmu* imyiahpas Atua ineig et arapakau ache aien, vai Iesu Kristo, irai iji mesese. Emen.

NITASVITAI UHUP O PAULO NAPOSTOLO

IMI

NUPU KORINDUS.

NUARIN-TAS ALUPAS 1.

AK nup an nakalasia o Atua Korindus, eris ago upene caua vai Iesu Kristo, eka atimi eris ahlaig vai ra aijaua, *um* ilpu atimi upene, im lep ra asega era archoan nidai Iesu Kristo ara Natimarid uja irai iji pece asega, ura im lep uja,

2 *ek aiheuc* vai caua ainyak Paulo, im Sosdenes etoaija, ek atimi eris

ahlaig vai yin ainyak, *um* apostolo o Iesu Kristo, vai intas o Atua:

3 *etmu amen* ehelemia naiheuc im neigpa et ahes ehele Atua Etmajja, im Iesu Kristo Natimarid.

4 Ek naaurineig vai Atua unyak ainyak irai iji adiat vai caua, va naiheuc o Atua eris alupai caua irai Iesu Kristo;

5 va nitai ineig, nikavaig, eris efalupai caua niji itai asega vai yin, intas asega, im nato itai asega;

6 et idivaig eris ago ipjin intas asuptecnaig vai Kristo ehelemia:

7 eka eti apitac aijaua an tah nitai tup ahtai; eka lep aitgaig nehcohos pam o Iesu Kristo aijaua, Natimarid uja:

8 etpu ago emda caua aien, um yetpan irai iji adiat, *mika eri* eti acaiji *caua* vaig tah nitai an nadiat o Iesu Kristo Natimarid uja.

9 Et inivaijec a Atua, is imyiacaij caua aien mika aki amen aijaua ehele Inhal o un Iesu Kristo Natimarid uja.

10 AK ilpu etoak, ek ugni caua ainyak an nidai Iesu Kristo Natimarid uja, mika yi tup ethi ache intas unyimia aijaua, um jim ahoai jipe caua; jam etmu tup ethi ache inliinmopomia aijaua, im lep nak-taktai unyimia.

11 Ak ilpu etoak, eris asuptecnaig ehelek ara *eris ahes an nimmim* o Kloyi ara, mika eka imyiisjis itai jipe iramia aijaua.

12 Ek asan tas ineigki ainyak, nikavaig, et ika tah caua, Ek *atimi* o Paulo ainyak; um *ika tah caua*, Ek *atimi* o Apollos ainyak; um *ika tah caua*, Ek *atimi* o Sifas ainyak; um *ika tah caua*, Ek *atimi* o Kristo ainyak.

13 Et idim eti elpatelpat Kristo; eris idim eti atgei Paulo an nauincai atgeig vai caua; eris idim lep eti baptiso iramia an nidai Paulo.

14 Ek naaurineig vai Atua ainyak va nitai ineigki, nikavaig, kis eti baptiso iran tah caua ainyak, Krispus im Ceus ache;

15 vai yi jim ika tah kis baptiso *ira atimi* an nidak ainyak:

16 kis lep baptiso irai Stefanas ainyak, im lep ra an nimmim o un; kit kis baptiso iran tah natimi is eche ainyak, ja ek mun eti imyiehva ainyak:

17 is eti abrai nyak a Kristo mika ki baptiso *ira atimi* ainyak, ja mika ki asuptecnaig intas-upene:

jam eti *asuptecnaig* an tas arapakau, vai yi jim takitai nauincai atgeig o Kristo.

18 Et takitai intas va nauincai atgeig ehele ra, ulpu auahas ra; ja et itai emda o Atua eheleija, ulpu imyiatamaig caija.

19 Eris aged, *um ika*, “Ekpu auahas narapakau o ilpu atimi arapakau ainyak, ekpu lep atipagki nato itai o ilpu atimi ato itai ainyak.”

20 Natimi arapakau yek eda? natimi esege yek eda? natimi imyiisjis itai an nobohtan ineigki yek eda? is auahas narapakau an nobohtan ineigki a Atua.

21 Is ika a Atua, an narapakau o un, eris eti ato Atua natimi an nobohtan va narapakau *ura*; ja is upene vai Atua par imyiatamaig ra era imyiisjis ninivaijec ara, va nasuptecnaig *intas-upene ineigki er ika vaig* et takitai.

22 Era idim ugni nitai asjaaicnaig a nupu Jutaiia, era lep ahilek narapakau a nupu Crisi:

23 ja eera asuptecnaig Kristo aijama eris atgei yin an nauincai atgeig, et itai epilttau iran imi nupu Jutaiia aien, im lep takitai imi nupu Crisi;

24 ja et itai emda o Atua a Kristo, um arapakau o Atua, imi ra eris ahlaig vai ra, *nikavaig*, nupu Jutaiia, im nupu Crisi.

25 Et esjilid nedo ahnag o Atua irai *arapakau* o atimi; um lep esjilid nauatialidi o Atua irai *emda* o atimi.

26 Akumu aktaktai nedo an nahlaig vai caua aijaua, ak ilpu etoak, era eti elpat *iramia* a ilpu atimi arapakau an nobohtan, *um* eti elpat a ilpu atimi emda, *um* eti elpat a ilpu atimi esjilid;

27 ja is ehtai ilpu atimi ahnag an nobohtan a Atua, mika eri ehcamai a ilpu atimi arapakau; um lep ehtai ilpu atimi auatialidi an nobohtan a Atua, mika eri ehcamai a ilpu atimi emda;

28 um lep ehtai ilpu ihki atimi an nobohtan a Atua, im ilpu atimi er ancel vai ra, im ilpu atimi takitai, mika eri tup takitai a ilpu atimi esjilid:

29 vai yi jim asan tas emda tah natimi an nuhup o un.

30 Eka lep amen ehele Iesu Kristo aijaua vai Atua, is ati yin aien mika yi ahes ehelen narapakau uja, im nika o Atua et atoh nedo uja, im nedo upene uja, im nitai imyi-atamaig caija:

31 et idivaig eris aged, *um ika*, "Aien et tas emda aien, etmu tas emda vai Ihova aien."

NUARIN-TAS ALUPAS 2.

1 IM lep ineig, ak ilpu etoak, kis wat ham ehelemia ainyak, kis eti ham ainyak um asan tas esjilid, ka arapakau, par asuptecnaig ehelemia intas is asaig a Atua:

2 kis ika ainyak, ki ti ato tah nitai ehelemia, Iesu Kristo ache, aien aigki marom eris atgei yin an nauincai atgeig.

3 Kis amen ehelemia ainyak an nauatialiid *unyak*, im nimtitaig *unyak*, im neucjucjucaij alupas *unyak*:

4 kis eti tas ainyak um asuptecnaig intas irai tas updak an narapakau o atimi, jai irai tas ehvaig o Nesgan *Upene*, im nemda *uja*:

5 mika yi eteuc ninyiisjis nini-vaijec unyimia va uemda o Atua, jam eti *eteuc* va narapakau o atimi.

6 Ecra idim asuptecnaig narapakau aijama ehele ilpu atimi ato upene itai: ja et eti ahes an nobohtan narapakau ineig, um eti ahes ehele ilpu atimi alupas an nobohtan ineigki iji eig, erupu takitai ara:

7 ja ecra asuptecnaig narapakau o Atua aijama an nitai adenaig, *narapakau* ineig marom eris adenaig, ja is anacanac iran a Atua an naopan iyehki is pam

eti eteuc nobohtan, mika inti upene akaija:

8 is eti ato nitai ineigki tah irai ilpu atimi alupas an nobohtan ineigki: el eris ato ara, el eris eti atgei Natimarid esjilid ara an nauincai atgeig.

9 Ja et idivaig eris aged, *um ika*, "Is eti ecetai an nesganimtan tah, um lep eti ahgei an tikgan tah, um lep eti aktaktai anliinmopon tah, nitai iji eigki is ikni a Atua vai ra et aiyu inliinmopura ara vai yin."

10 Ja is ehvaig eheleija a Atua irai Nesgan *Upene*: et idim ato niji itai asega a Nesgan *Upene*; maiya, *et* ato niji itai adenaig o Atua *aien*.

11 Natimi ineig yek eda, et ato niji itai o atimi aien? *et* ispun *ato* inliinmopon ache natimi; et idim ucco, et eti ato niji itai o Atua tah natimi, Nesgai Atua ache.

12 Intis eti leh inliinmopja an nobohtan akaija, jai Nesgan *Upene* ineig et ahes ehele Atua; mika inti ato akaija nitai iji eigki is tup alupai caija a Atua.

13 Ecra lep eti asuptecnaig nitai iji eigki aijama irai tas iji eig et ahes an narapakau o atimi, jai irai *tas iji eig* et esege *imi cama* a Nesgan *Upene*; um asuptecnaig nahaiji itai et ahes an Nesgan *Upene*, im nahaiji et eche et ahes an Nesgan *Upene*, mika yi apapa.

14 Et eti leh niji itai o Nesgai Atua a natimi ineig et amen iran inliinmopon itu: et takitai nitai iji eigki vai yin; et lep ehka vai yin natovaig, er idim ato vai Nesgan *Upene* ache.

15 Et ato niji itai asega a natimi ineig et amen iran a Nesgan *Upene*, ja et eti ato yin tah natimi.

16 "Natimi ineig yek eda is ato inliinmopoi Ihova aien, mika yi esege imi yin aien?" ja et amen ehelema inliinmopoi Kristo.

NUARIN-TAS ALUPAS 3.

AK ilpu etoak, is ehka vai nyak intasvaig ehelemia is idivai ilpu atimi aktaktai niji itai anliinmopomia mat, jam idivai ilpu atimi aktaktai niji itai anliinmopomia itu, um idivai ilpu halav irai Kristo :

2 kis alidamia nided ainyak, jam eti *alaamia* nitai caig : is ehka vai caua *inlehvaig* itu, et lep ehka vai caua an naopan ineig :

3 eka idim ilpu atimi aktaktai niji itai anliinmopomia itu aijaua : eka wat auatitai aijaua, um imyiisjis itai, um ehtauo, eka idim aktaktai niji itai anliinmopomia itu aijaua, um ago nedo o atimi :

4 et wat ika tah et ethi, Ek *atimi* o Paulo ainyak ; im lep tah et ethi, Ek *atimi* o Apollos ainyak ; eka idim aktaktai niji itai anliinmopomia itu aijaua.

5 Di neigki a Paulo ? im lep di neigki a Apollos ? ecau aheca *u Atua* aijumrau akis imyiisjis nini-vaijec vai cumrau aijaua, et idivaig is alupaig jipjipe cumrau a Nati-marid.

6 Kis ahoaig upsi itai ainyak, is leh inwai uarin a Apollos ; ja et ededel nupsi itai vai Atua.

7 Et auatialidi aien et ahoaig upsi itai aien, im lep yin et leh inwai uarin ; ja *et emda* a Atua ineig et ededel upsi itai vai yin.

8 Et tup ethi ache aien et ahoaig upsi itai aien, im lep yin et leh inwai uarin aien : erupu lep leh nimtan ini rau arau inyi idivaig nauritai jipjipe urau.

9 Ecau atimi ehauritai ehele Atua aijumrau : eka eseian o Atua aijaua, *um lep* eom o Atua.

10 Is idivaig naiheuc o Atua is alupai nyak aien, kis ati nededuon ainyak, et idivaig natimi arapakau et asjaaicnaig an neom aien, ja et par actaig natimi et eche : ja erupu

imyitau atimi asega irai actai eom *ura* :

11 et ehka vaig tah natimi nativaig nededuon et eche, *nededuon* iyehki ache eris ati, Iesu Kristo marom.

12 Ja el etpu actaigjai a colt, *im* silver, *im* inhat esjilid, tah natimi an nededuon ineig, *ka* nauincai, *im* nefelelicai, *im* nehrieg ;

13 uhpu ehvaig nauritai o atimi asega : uhpu idim asuptecnaig an nadiat iyehki ; uhpu ato vai incop ; uhpu ahilek nauritai o atimi asega an cop, par ato nedo iran.

14 Aien etpu amen aktit neom o un is actaig iran aien, etpu leh nimtan aien :

15 aien eri ahli neom o un, inyi ti leh nimtan aien : uhpu imyiata-maig yin ; ja etpu idivaig *natimi er imyiatamaig yin* an cop aien.

16 Eka idim ato aijaua, mika eka eom ahlap o Atua aijaua, et amen ehelemia a Nesgai Atua.

17 El et auahas neom ahlap o Atua tah natimi, etpu auahas yin a Atua ; et itaup neom ahlap o Atua, eka *eom ahlap* ineigki aijaua.

18 Etmu jim efaifa vai yin tah natimi : el et ika tah natimi iramia et arapakau aien an niji itai an nobohtan ineigki, etmu ika aien et atimi ahnag aien, va etpu arapakau aien.

19 Et takitai an nuhup u Atua narapakau an nobohtan ineigki ; eris aged, *um ika*, “Et arop irai ilpu atimi arapakau aien an nika *ura* era imyitaualep ra :”

20 im lep ineig, “Et ato naktaktai o ilpu atimi arapakau a Ihoval, mika et takitai.”

21 Va nitai ineigki etmu jim imyiacitak atimi tah : et unyimia niji itai asega ;

22 kit Paulo, ka Apollos, ka Sifas, ka nobohtan, ka nitai umoh iran, ka inmas, ka niji itai an naopan ineig, ka niji itai etpu yetpan ; et unyimia niji itai asega ;

23 eka lep o Kristo aijaua; um lep o Atua a Kristo.

NUARIN-TAS ALUPAS 4.

ERU MU aktaktai cumrau atimi, et idivai ohwat aheca u Kristo, im ohwat atimi aminjina niji itai adenaig o Atua.

2 Im lep ineig, er ahilek nedo o ilpu atimi aminjinai itai, mika eri inivaijec ara.

3 Et idim takitai imi nyak nahilek nedo unyak unyimia, im lep nahilek nedo unyak o atimi: maiya, ek lep eti ahilek nedo unyak ainyak.

4 Ek eti ato tah nedo *has* unyak ainyak; ja er eti ika et atoh nedo unyak va nitai ineig: aien etpu ahilek nedo unyak aien et Atimarid aien.

5 Va nitai ineig akumu jim fi auroauro aijaua um ahilek tah nedo *va atimi*, jam aitgaig napam o Natimarid, etpu ehvaig nitai iji eigki aien er adenaig an naupat, um asup-tecnaig naktaktai u inliinmopoi *atimi*: etpu imyiahpas atimi asega a Atua an naopan iyehki.

6 Ak ilpu etoak, ek mun ecsipece an nitai iji eigki ainyak vai nyak im Apollos, vai caua; mika eceru esege imi caua aijumrau, mika aki aktaktai *atimi* aijaua et idivaig intas ineig eris aged, va aki jim imyiacitak tah aijaua, um lep esjum vaig tah.

7 Et ika a di an esjilid aiek? nitai ineig ehelum nevitai as eti leh aiek? al is leh aiek, na auri aiek par imyiahpas euc, et idivaig as eti leh aiek?

8 Eka idim gaije aijaua, eka idim ilpu atimi ikni itai aijaua, eka idivai ilpu atimarid aijaua, *um* eti *merit* vai cumrau: et idim ueco, ek merit alupas ainyak mika aki ilpu atimarid aijaua, mika eceru tup ethi ache pan iramia aijumrau molhat atimarid.

9 Ek ika ainyak, is ikni cama ilpu apostolo a Atua, mika ecri ilpu atimi

upoupo, im ilpu atimi er ika eri atgei ra: er idim ikni cama an nobohtan, mika eri alum cama a ilpu agelo, im lep atimi:

10 *ecra ilpu atimi* ahnag aijama vai Kristo, ja *eka ilpu atimi* arapakau aijaua irai Kristo; *ecra ilpu atimi* auatialidi aijama, ja *eka ilpu atimi* emda aijaua; *er* eccen vai caua, jam amcel vai cama.

11 Is ehtele cama aijama, um ahvig wai, um aso cama an napelumai has, um imyilum pam an naopan ineig; er lep ahpoi cama, *ecra* idim amen ehcid aijama;

12 um aarahaeca, um auritai irai ikmama: eh wat ehniw has vai cama, *ecra* asan tas upene aijama; eh wat atmas vai cama, *ecra* eti aru aijama:

13 eh wat tas edemda vai cama, *ecra* tas updak aijama: er ika *ecra* ohok an nobohtan aijama, *im lep* itai has esjilid irai iji itai asega, um imyilum pam an naopan ineig.

14 Ek eti aged nitai iji eigki ainyak, mika aki ehcamai aijaua; ja ek ated *caua* ainyak et idivai ilpu halav cop unyak.

15 El era amen ehelemia a ilpu atimi esege irai Kristo et ten dau-sant, ja *era* eti *amen* a ilpu etmamia et ahinag: kis apos caua ainyak irai Iesu Kristo an tas-upene:

16 va nitai ineigki ek ugni caua ainyak, mika aki apitac nyak aijaua.

17 Ek abraig pam Timodeus ehelemia ainyak va nitai ineigki, et halav cop unyak aien, um inivaijec irai Natimarid, etpu ahugni lelmia aien va nedo unyak irai Kristo, et idivaig ek esege ainyak imi nup urai iji ekalasia, irai iji pece asega.

18 Et ijinies inliinmopoi nahaiji atimi, era ika ara inki ti ham ehelemia ainyak:

19 ja ekpu ham ainyak ehelemia tupko, tup Natimarid marom, ekpu eti ato intas ache o atimi iji eigki ainyak, et ijinies inliinmopura ara;

ja ekpu ato nemda ura ainyak, *kit et inivaijec*.

20 *Et eteuc* nelcau o Atua va nemda *iran*, jam eti *eteuc* vai intup intas.

21 Eka merit vanhe aijaua? ekpu apam ehelemia ainyak um atuh *caua*, ka *ekpu apam ainyak* anliin-mopok eropse?

NUARIN-TAS ALUPAS 5.

ER idim asaig asega mika et *eteuc* ingaijid iramia; maiya, ingaijid ineig era eti tas vaig a ilpu atimi aupat, nikavaig, is leh ehgai etman tah et ethi.

2 Ja eka imyiacitak aijaua, um eti taigtaig vaig, va uhpu atipagki yin ehelemia is ago nedo ineigki aien.

3 Ek eti amen *ehelemia* ainyak an nohuk, ja anliinmopok ache; ja ek mun idim tas alep ainyak vai yin is ago nedo ineigki aien, et idivaig el ek amen *ehelemia* ainyak;

4 *ek ika ainyak* an nidai Iesu Kristo Natimarid uja, aku wit asjap-icnaig aijaua, im lep nesgak, an nemda o Iesu Kristo Natimarid uja,

5 aki atcejai natimi ineigki imi Satana aijaua, mika eri auahas nohun, va uhpu imyiatamaig nesgan an nadiat o Iesu Natimarid.

6 Et eti upene intas emda unyima. Eka idim ato aijaua, nikavaig, et ahlai asega nuari-*flaur* aplamod va leven tintin:

7 akumu atipagki leven itu aijaua, mika aki uari-*flaur* tupaplamod aijaua, et idivaig eh ti leven iramia. Eris idim atgei Kristo vai caija napaska uja:

8 va nitai ineig intumu apos nadiat asjapicnaig akaija; jam jim irai leven itu, im nedo has, im nauatatimi, et idivaig leven *itu*; jam irai nedo upene, im nedo inivaijec, et idivaig nareto ti leven iran.

9 Kis aged imi caua ainyak an

nitassvitai, mika aki jim amen pan aijaua ehele ilpu atimi ago ingaijid:

10 jam eti *ude* ehni atimi an nobohtan ineigki era ago ingaijid ara, ka has ira ra itai, ka atoraliak itai, ka alaigaheni vai ilpu atmas; et ehka vai caua nagovaig nedo ineigki, el eka eti ude nobohtan aijaua:

11 ja kis idim aged imi caua ainyak, mika aki jim amen ehelen tah etoamia aijaua, el et ago ingaijid aien, ka has iran itai, ka alaigaheni vai ilpu atmas, ka asan tas ehni has, ka ahnag vai kava, ka atoraliak itai; akumu jim hag aijaua ehele natimi ineig et ucce nedo o un.

12 Et eti unyak naruvaig nedo o ilpu atimi itac; eka idim aru nedo o ilpu etoamia aijaua:

13 etpu aru nedo o ilpu atimi itac a Atua. Va nitai ineigki akumu atipagki natimi auatatimi iyehki ehelemia aijaua.

NUARIN-TAS ALUPAS 6.

EL eka imyisjis jipe itai aijaua, eka eti imtitaig aijaua *napanvaig* ehele ilpu atimi auatatimi, mika eri tas alep vai caua ara, jam eti *apan* ehele ilpu atimi upene?

2 Eka idim ato aijaua, mika erupu tas alep va nobohtan ineigki a ilpu atimi upene; al ekupu tas alep va nobohtan aijaua, et eti ehka vai caua intas alep vaig vai intakitai.

3 Eka idim ato aijaua, mika intupu tas alep vai ilpu agelo akaija; va nitai ineig et eti ehka *vai caija intas alep vaig va* niji itai an nobohtan ineigki.

4 El eka imyisjis itai aijaua va niji itai an nobohtan ineigki, akumu ikni ilpu atimi iji eig aijaua, era eti eccen vai ra a nup an nakalasia, *mika eri tas alep ara*.

5 Ek asan tas ineigki ainyak,

mika aki ehcamai aijaua. Et inivaijec ineig, ka o'o, nikavaig, et eti eteuc tah natimi arapakau et ethi iramia, et emda aien intas alep vaig an nuhup u ilpu etoan?

6 Ja era imyiisjis jipe itai ara sji eigki era raimu ara, ehele ilpu atimi imyiisjis nahcil.

7 Et idim maumau nedo unyimia, nikavaig, eka imyiisjis jipe itai aijaua: eh wat ago nedo has vai caua, eka auri aijaua par eti eklim tup amen? eh wat atoraliaik itai unyimia, eka auri aijaua par eti eklim tup amen?

8 ja eka ago nedo has vai ilpu etoamia aijaua, um atoraliaik itai *ura*.

9 Eka idim ato aijaua, mika eri ti apan an nelcau o Atua a ilpu atimi auatatimi: akumu jim efaifa vai caua aijaua: eri idim eti apan an nelcau o Atua a ilpu atimi ago nedo has, im ilpu atimi alaigaheni vai ilpu atmas, im ilpu atimi ago ingaijid, im ilpu atimi ahilek nedo has, im ilpu atimi auarobotpotedo,

10 im ilpu atimi ehneg itai, im ilpu atimi has ira ra itai, im ilpu atimi ahnag vai kava, im ilpu atimi asan tas ehniv has, im ilpu atimi atoraliaik itai.

11 Is lep ucece nedo o nahaijimia; ja eris yiri caua, um ago upene caua, eris lep ika et atoh nedo unyimia an nidai Iesu Natimarid, im lep an Nesgai Atua nja.

12 ET eti itaup vai nyak tah nitai, ja et eti upene niji itai asega: et eti itaup vai nyak *inhegaigvaig* niji itai asega, ja inyi ti esjilid irak tah nitai.

13 *Eris ati* niji itai caig uri nipjinetga *atimi*, im lep *eris ati* nipjinetga *atimi* uri niji itai caig; ja etpu auahas *nippjinetgan* im nitai iji eigki a Atua. *Eris* eti *ati* noliu *atimi* uri ingaijid, ja *eris ati* vai Natimarid; *eris* lep *ati* Natimarid va nohu *atimi*.

14 Is imyinusjai Natimarid a Atua, etpu lep imyianusjai caija aien an nemda o un.

15 Eka idim ato aijaua, mika et uari-nohui Kristo nohumia; va nitai ineigki inki idim eti ikni uari-nohui Kristo ainyak, mika yi uari-nohu intakata ago nedo has; inyi idim eti ucece.

16 Maiya! eka ato aijaua, nika-vaig, aien et amen ehele intakata ago nedo has aien, et tup ethi ache pan *iran* aien an nohun; et ika aien, "Etpu tup ethi ache nohurau arau."

17 Ja aien et amen ehele Natimarid aien, et tup ethi ache pau *iran* aien an nesgan.

18 Akumu aha vai ingaijid aijaua. Et eti amen an nohun tah natimi tah nedo has et ago aien; ja aien et ago ingaijid aien, et ago nedo has va nohun aien.

19 Eka idim ato aijaua, mika et eom ahlap u Nesgan Upene nohumia, *et amen* ehelemia *aien*, is ahes ehele Atua aien vai caua, eka lep eti ohuun caua aijaua:

20 eris auarimtamia: va nitai ineig akumu imyiahpas Atua irai ohumia aijaua, im lep nesgamia; et idim ohuun ehro a Atua.

NUARIN-TAS ALUPAS 7.

IM lep ineig, va nitai iji ehki akis I aged nitasvitai imi nyak vaig aijaua: Et upene mika yi jim leh ehgan tah natamaig.

2 Ja erumu leh ehgara athiathi a ilpu atamaig asega, erumu lep amen ehele ilpu atamnyura athiathi a ilpu takata asega, va niji edo has.

3 Erumu ago nedo aiheuc ineig vai ehgara a ilpu atamaig eris idim asaig; etmu lep ucece nedo o ilpu takata vai ilpu atamnyura.

4 Et eti ohuun nohun ache intakata, jai natamnyu un; um lep eti

ohuun nohun ache natamaig, jai ehgan.

5 Akumu jim acaiji sjipe caua aijaua, ja el et tup ethi ache inliinmopomia, tup aijaua marom, ira adiat inyi eti elpat ache, mika aki tup amen aijaua va aki atwakam um alaigaheni; ja par lep ehramen, vai yi jim oop caua a Satana va nauatialidi unyimia.

6 Ja ek eti tas alep ainyak va nitai ineigki, ek tup imyiabrai *caua* ainyak.

7 Ek merit ainyak mika eri idivai nyak natimi asega: ja et ahtai imi atimi asega a Atua nitai ineig et upene imi ra: et eche o natimi et ethi, jam lep eche o natimi et ethi.

8 Ek asaig ainyak ehele ilpu atimi tup amen, im ilpu takata eris ememas ilpu atamnyura, *mika*, Et upene vai ra, el era *tup* amen ara et idivai nyak:

9 ja el et ehka vai ra namen upene vaig, erumu atidai ara; et upene natidaivaig, jam has naktaktaivaig nedo has.

10 Ja ek asaig ainyak ehele ilpu atimi iji eig eris mun atidai ara; ja et eti *intas* unyak, jai *intas* o Natimarid, *mika*, Etmu jim ude natamnyu un tah intakata:

11 ja el et ude yin aien, etmu tup amen aien, ka adumoij pan um amen upene ehele natamnyu un: etmu lep jim abrai ehgan tah natamaig.

12 Jai intas unyak ehele atimi asega et eche neigki, et eti *intas* o Natimarid, *nikavaig*, El et eteuc ehgan tah irai ilpu etoaija, jam eti imyiisjis ninivaijce, etmu jim abrai yin aien, el et merit aien namenvaig ehelen.

13 El et eteuc natamnyu un tah intakata, jam eti imyiisjis ninivaijce, etmu jim ude yin aien, el et merit aien namenvaig ehelen.

14 Et idivaig upene natamaig ineig, et eti imyiisjis ninivaijce aien, vai ehgan: et lep idivaig upene in-

takata ineig, et eti imyiisjis ninivaijce aien, vai natamnyu un: el et eti ucce, el era idivaig has a ilpu hal unyimia; ja era mun idim idivaig upene ara.

15 Ja el et atga o un aien et eti imyiisjis ninivaijce aien, tup aien marom. Eh wat ago nedo ineigki vaig tah natamaig, ka tah intakata, irai ilpu etoaija, etmu eklim amen aien: is imyiacaig caija a Atua u neigpa.

16 Ak intakata, na idim eti ato aiek, kit napu imyiatamaig natamnyu *unyum* aiek; ak natamaig, na idim eti ato aiek, kit napu imyiatamaig ehgan aiek.

17 Erumu atga *an nefalaig inei*, atimi asega is ati vai ra a Atua, is ahlaig vai ra iran a Natimarid. Et idim ucco intas alep unyak imi nup urai ekalasia asega.

18 El eris ahlaig vaig tah natimi eris aperitome iran, etmu jim ohpod-ohpod naperitome iran aien: el eris ahlaig vaig tah eris eti aperitome iran, etmu jim leh naperitome iran aien:

19 et takitai naperitome, um lep takitai neti aperitome; jam *upene ache* naposvaig intas alep o Atua.

20 Erumu apol atimi asega an namen ineig eris ahlaig vai ra vaig.

21 Al is aheca o un tah aiek, eris wat ahlaig vai euc, etmu eropse inliinmopom aiek: ja el eh atcejai euc, el et upene.

22 Aien eris ahlaig vai yin irai Natimarid, is wat aheca aien, eris ahiyi yin vai Natimarid: im lep ineig, aien eris ahlaig vai yin, is wat eti aheca aien, et aheca u Kristo aien.

23 Eris auarintamia; akumu jim aheca u atimi aijaua.

24 Ak ilpu etoak, erumu apol ehele Atua atimi asega an namen ineig eris ahlaig vai ra vaig.

25 Im lep ineig, et eti eteuc intas alep o Natimarid ehelek vai ilpu atahaig: ja ek asuptecnaig naktaktai *unyak* ainyak, et idivaig tah et aheuc vai yin a Natimarid mika yi inivaijce aien.

26 Ek lep ika ainyak, et upene nedo ineigki va nohocred et eteuc an naopan ineig: et idim upene va atimi mika eri hiski ara.

27 El et eteuc ehgam, jim ahilek nude yin vaig aiek: el et tup amen aiek, jim ahilek ehgam aiek.

28 Ja el et leh ehgam aiek, na eti ago nedo has aiek; el et leh natamnyu un a natahaig, el et eti ago nedo has aien. Ja erupu ohocred ara sji eigki irai ohura: ja ek aiheuc vai caua ainyak.

29 Ja ek asan tas ineigki ainyak, ak ilpu etoak, mika et ipjidiipjid naopan *uja*; va erupu idivai ilpu atimi tup amen a ilpu atimi et eteuc ehgara:

30 um idivai ilpu atimi eti ehteigtaig a ilpu atimi ehteigtaig; um idivai ilpu atimi eti imyiacitak a ilpu atimi imyiacitak; um idivai ilpu atimi eti eteuc *inpadiaig ura* a ilpu atimi auarimtai itai;

31 um idivai ilpu atimi eti aua-has niji itai an nobohtan a ilpu atimi ohuun niji itai: inyi idim ti nedo an nobohtan ineigki.

32 Ek merit ainyak mika yi eropse inliinmopomia aijaua. Natimi ineig et tup amen aien, et aktaktai niji itai o Natimarid aien, mika yi upene inliinmopoi Natimarid vai yin:

33 jai natimi ineig et eteuc ehgan aien, et aktaktai niji itai an nobohtan aien, mika yi upene inliinmopoi ehgan vai yin.

34 Et eche a ehgan *tah*, jam lep eche natahaig: et aktaktai niji itai o Natimarid a intakata tup amen, mika yi upene aien an nohun, im lep an nesgan: ja aien et eteuc natamnyu un, et aktaktai niji itai an nobohtan aien, mika yi upene inliinmopoi natamnyu un vai yin.

35 Ek asan tas ineigki ainyak, mika aki leh nitai upene vaig aijaua; ek eti merit ainyak nativaig nitai apro caua, jai nitai ineig et upene, mika aki aheca u Natimarid aijaua, um eti arahed inliinmopomia.

36 Ja el et aktaktai tah natimi, mika et eti ago nedo upene vai inhalav atahaig o un, el et alupas aien, um ehka *vai yin intup amenvaig*, etmu ago nedo ineig et merit vaig aien, et eti ago nedo has aien; etmu leh natamnyu un a *inhalav atahaig o un*.

37 Ja aien et emda inliinmopon aien, um eti ehka vai yin, um esjilid intas o un, um ika inliinmopon yi tup amen a inhalav atahaig o un, et upene nedo o un.

38 Va nitai ineig aien et atcejiai *inhalav atahaig o un* aien, mika yi leh natamnyu un, et ago nedo upene aien; ja aien et ika yi tup amen aien, et esjilid nedo o un.

39 Et itaup vai intakata nudevaig natamnyu un an numoh o un; ja el et mas a natamnyu un, et eti itaup vai yin inlep lehvaig *natimi ineig* et merit vai yin aien, jai vai Natimarid ache.

40 Ja el et tup amen aien, etpu esjilid namen o un; intas unyak ineigki; ek lep aktaktai ainyak, mika et amen ehelek a Nesgai Atua.

NUARIN-TAS ALUPAS 8.

IM lep ineig, va nitai iji eigki er ahlap iran vai ilpu atmas, inta ato akaija mika inta ilpu atimi ato itai akaija asega: et ijinies inliinmopoi *atimi* va nato itai *ura*, ja et emda inliinmopura va naiheuc *ura*.

2 El et aktaktai tah mika et ato itai, et eti ato tah nitai aien et idivaig cris idim ika yi ato aien.

3 Ja el et aiyu inliinmopon tah vai Atua, et ato yin a *Atua*.

4 Vai inhegaigvaig nitai iji eigki er ahlap iran vai ilpu atmas, inta ato akaija mika et tup takitai natmas an nobohtan, et idim eteuc a Atua et ethi ache, um eti lep eteuc tah.

5 Et idim eteuc *nitai iji eigki*, er anvī nidara par ika ilpu atua, kit an nohatag, ka an nobohtan, et idivaig

era ahinag a ilpu atua, um lep ahinag ilpu atimarid ;

6 ja *et eteuc* Atua et ethi ache eheleija, *nikavaig*, Etmajja, *is* ahes ehelen niji itai asega, *inta* lep *eteuc* akaija vai yin ; im lep Natimarid et ethi ache, Iesu Kristo, *et eteuc* iran niji itai asega, *inta* lep *eteuc* iran akaija.

7 Ja era eti ato *nitai iji eigki* natimi asega : era ato nahaiji ra, *nikavaig*, et atmas nitai iyehki, um caig itai et idivaig nitai er ahlap iran va natmas, um imyihum pam an naopan ineig ; er auahas inliinmopura auatialidi.

8 Ja et eti upene inliinmopoi Atua vai caija va nitai caig : *inta* eti esjilid akaija vai inhegaigvaig itai ; *inta* lep eti has akaija va neti hegaigvaig itai.

9 Ja akumu aktaktai upene aijaua, vai yi jim itai epihtau iran imi ilpu atimi auatialidi namen upene unyimia ineigki.

10 Ak natimi ato itai, el et ecet euc tah nateucvaig um hag anliin neom ahlap o ilpu atmas, etpu atidai inliinmopoi natimi ineig et auatialidi aien, par hegaig nitai iji eigki er ahlap iran vai ilpu atmas ;

11 uhpu idim auahas etoam auatialidi ineig va nato itai unyum, *is* mas vai yin a Kristo.

12 Ja aku wit ago nedo has ineig vai ilpu etoamia aijaua, um auahas inliinmopura auatialidi, eka lep ago nedo has vai Kristo aijaua.

13 Va nitai ineigki, el et itai epihtau iran imi etoak nitai caig, inki ti lep caig nohu itai ainyak irai iji mesese, vai ki jim epihtau irai etoak ainyak.

idim ecet Iesu Kristo Natimarid uja ainyak ; eka idim auritai unyak irai Natimarid aijaua.

2 El ek eti apostolo ehele tak atimi ainyak, ek idim *apostolo* ehemia ainyak : eka itai asjaaicnaig *unyak* aijaua irai Natimarid, *nikavaig*, ek *apostolo* ainyak.

3 Intas asuptecnaig unyak ineigki ehele ra sji eigki, era tas ahodaig nyak ara,

4 *nikavaig*, Et eti itaup vai cumrau inhagvaig um lep umwig ;

5 *um* eti itaup vai cumrau nahced cumrau vaig ohwat ehgamrau imyisjis ninivaijec, et idivai ilpu apostolo asega, im lep ilpu etoai Natimarid, im lep Sifas ;

6 um lep eti itaup vai nyak ache, im Barnabas, nudevaig nauritai.

7 Et eucsupo a di, jam eti leh nimtan? *um lep* ahoaig vaine anliin nekaro o *un* a di, jam eti caig nohoan? um lep asgi siip a di, jam eti umnyi nidenided iran?

8 Ek eti asan *tas* iji eigki ainyak et idivaig natimi ; ja et asan *tas* iji eigki intas alep.

9 Eris aged an tas alep o Moses, *um ika*, "Namu jim arore nipjin-eucse kurimatau aiek, et wit auhi hwiit aien." Et aktaktai kurimatau a Atua,

10 ka et asan *tas ineigki* aien vai cama ache? Vai cama marom eris aged *intas ineigki*, mika yi aitgai itai aien et acujitai aien ; um lep leh itai er aitgaig aien et auhi hwiit aien.

11 El ecriis ahoaig niji itai imyiatamaig nescgamia aijama, *et* eti itai alupas ineigki, el ecria ehlek niji itai imyiatamaig nohuma unyimia aijama.

12 El era leucse nemda iramia intak atimi, ecria esjilid *ira ra* aijama ; ja ecriis eti ago nedo ineigki aijama ; ecria eti tas upoupo vaig tah nitai aijama, va ecri jim atapanes intas-upene o Kristo.

13 Eka ato aijaua, mika era he-

NUARIN-TAS ALUPAS 9.

EK idim apostolo ainyak ; ek idim eti aheca o un tah ainyak ; kis

gai itai an neom ahlap ara sji eigki, era auaraleca ara irai itai itaup *an neom ahlap*; era lep leucose nuari itai ahlap an nefata ara sji eigki, era aminjinaig nefata ara.

14 Et idim ucco, is tas alep a Natarid, *um ika*, Uhm u aminjinai ra sji eigki vai intas-upene, era asuptecnaig intas-upene ara.

15 Ja kis eti ago tah nedo ineigki ainyak: ek lep eti aged intas iji eigki ainyak, mika eri ago nedo ineigki vai nyak: et upene vai nyak inmasvaig, ja et eti upene mika yi atapanes intas emda unyak tah natimi.

16 El ek asuptecnaig intas-upene ainyak, et ehka vai nyak nispuk imyaniv nyak vaig: eh tas alep vaig ehelek; maiya, auwe vai nyak, el ek eti asuptecnaig intas-upene ainyak!

17 El ek ago nauritai ineigki ainyak, jam eti alaig esjum iran, ekpu leh nintan ainyak: ja el ek alaig esjum iran ainyak, eris ati imi nyak nauritai ineigki.

18 Nintan imi nyak nevitai? *Ineigki marom*, ek wit asuptecnaig intas-upene ainyak, etpu ti nintan tas-upene o Kristo vai nyak, mika ki ti ago an nemda unyak ainyak an tas-upene.

19 Ek eti upoupo iran tah natimi ainyak, jai kis aheca u atimi asega ainyak, mika ki leucose atimi yi ahinag:

20 kis idivai nupu Jutai ainyak ehele nupu Jutai, mika ki leucose nupu Jutai; *um idivaig natimi ineig et amen* ithan tas alep *aien*, ehele ra *era amen* ithan tas alep *ara*, mika ki leucose ra *era amen* ithan tas alep *ara*;

21 *um idivaig natimi ineig et eti amen an tas alep aien*, ehele ra *era eti amen an tas alep ara*, mika ki leucose ra *era eti amen an tas alep ara*; ja kis eti *atimi ineig* ainyak et eti amen an tas alep ehele Atua, kis lep imyiaiji intas alep o Kristo ainyak:

22 kis idivaig natimi auatialidi ainyak ehele ilpu atimi auatialidi, mika ki leucose ilpu atimi auatialidi: ek idivaig niji itai asega ainyak ehele atimi asega, mika ki imyiatanaig nahaiji ra irai edo asega.

23 Ek ago nedo ineigki ainyak vai intas-upene, mika ti ehraipiaig akaija.

24 Eka idim ato aijaua, nikavaig, eru wit athut an nefalaig natimi, era athut ara asega, ja et leh nintan natimi et ethi ache; etnu idim ucco, akumu athut aijaua mika aki leh *nintan*.

25 Im lep ineig, ara asega era ika ara eri esjilid an nathut, era ago nedo upene va nohura ara an niji itai asega: *era ago nedo ineigki* ara, mika eri leh korona inyi imlai; ja *inta ago ineigki* akaija, *mika ti leh korona* inyi ti imlai.

26 Va nitai ineigki ek athut ainyak um idivai *ra*, jam eti *athut* has; ek lep ago nedoa ainyak, jam eti idivaig tali et atcei nintinjop aien:

27 ek acaiji nohuk ainyak, um lep esjilid iran; va eri jim ahlo nyak, ek wat efehtas ehele tak atimi ainyak.

NUARIN-TAS ALUPAS 10.

IM lep ineig, ak ilpu etoak, ek merit ainyak mika aki ato aijaua, nikavaig, is ataluopni ilpu retpoija asega nepeig iyehki; eris lep algauwig an jop ara asega;

2 eris baptiso ira ra asega irai Moses an nepeig iyehki, im lep an jop:

3 eris hegaig nitai caig iyehki ara asega is alaa ra a Atua;

4 eris lep umnyi inwai iyehki ara asega is aluma ra a Atua: eris idim umnyi inwai iyehki ara is ahes an nij iyehki is ati a Atua, is

ahced *ra*; is idivaig Kristo. nij iyehki.

5 Ja is edemda va atimi is ahinag ira ra a Atua: is auahas ra aien an namasacen.

6 Is itai asjaaicnaig nitai iji eliki vai caija, vai ti jim ahvig niji itai has akaija, et idivaig eris ahvig ara.

7 Akumu jim alaigaheni vai ilpu atmas aijaua, et idivaig nahaiji ra; eris aged, *um ika*, "Eris ateucose atimi, um hag, um umwig, ja par lep atidai, um auaredo."

8 Intumu jim lep ago ingaijid akaija, et idivaig eris ago ingaijid nahaiji ra; ja eris emesmas an nadiat is ethi natimi is twente dri dausant.

9 Intumu jim lep oop Kristo akaija, et idivaig eris oop *yin* nahaiji ra; ja eris auahas ra ninayiv.

10 Akumu jim lep tas upoupo aijaua, et idivaig eris tas upoupo nahaiji ra; ja is auahas ra *nagelo* auahas atimi.

11 Is yetpan ira ra nitai iji ehki asega, *mika eri* itai asjaaicnaig ara: eris lep aged par esege imi caija, inta umumoh akaija ira adiat apitac iji eigki.

12 Va nitai ineigki etmu aminjinai *yin* a natimi ineig, et ika aien et aiji aktit, vai yi jim eropse aien.

13 Et eti eche nitai oop caua im nitai oop atimi asega: ja et inivaijec a Atua, etpu eti ude caua aien, mika aki auatialidi aijaua va nedo oop caua; uhu wit oop *caua*, etpu lep ati nefalaig aha vaig iran aien, mika aki emda aijaua naposvaig.

14 Va nitai ineigki, ak ilpu *etoak* upene, akumu aha va nalaigaheni vai ilpu atmas aijaua.

15 Ek tas *ehelemia* ainyak, et idivaig ehele ilpu atimi arapakau; akumu aktaktai intas unyak aijaua.

16 Nipjinitai naaurineig iran ineigki inta naaurineig vaig akaija,inja irai Kristo neigki, inta idim umnyi akaija; nareto ineigki inta

aswaplec akaija, nohui Kristo neigki, inta idim caig akaija.

17 Et ethi ache nareto, inta ahinag akaija, ja et tup ethi ache nohuja akaija; va nitai ineig, nika-vaig, inta asipiaig nareto et ethi ache iyehki akaija asega.

18 Almoi ra sji eigki era upu Isreel an nohura ara: era idim asipiaig nefata ara sji eigki era hegaig nitai iji eigki ara er ahlap iran.

19 Inki asan he ainyak? Et idim takitai natmas; et lep takitai nitai ineig er ahlap iran vai ilpu atmas:

20 *ek lep ika ainyak*, nitai iji eigki era ahlap iran a ilpu atimi aupat, era ahlap iran ara vai ilpu agelo has, jam eti *ahlap iran* vai Atua: ek merit ainyak mika aki jim asipiaig itai ehele ilpu agelo has aijaua.

21 Et ehka vai caua numwigvaig an nipjinitai u Natimarid, im lep nipjinitai u ilpu agelo has: et ehka vai caua inhagvaig an nitai hag u Natimarid, im nitai hag u ilpu agelo has.

22 Intumu jim oop Natimarid akaija mika yi uporei aien; inta eti esjilid iran akaija.

23 Et eti itaup vai nyak tah nitai, ja et eti upene niji itai asega: et eti itaup vai nyak tah nitai, ja et eti ahidaig emda *caija* niji itai asega.

24 Etmu jim ahilek niji itai *upene* vai *yin* ache tah natimi, ja *erumu ahilek* niji itai *upene* vai tak atimi atimi asega.

25 Akumu hegaig nitai iji eigki asega aijaua er ahtai an nuarin ahtai itai iran, um jim ahodaig tah nitai vai inliinmopomia:

26 "et idim ohuun nobohtan a Ihova, im niji itai asega amen iran."

27 El et imyiacaj pan caua *u inhag* tah natimi imyiisjis nahcil, el eka merit aijaua napanvaig, akumu hegaig aijaua *nitai caig* asega er ati an nuhup unyimia, um jim ahodaig tah nitai vai inliinmopomia.

28 Ja el et ika chelemia tah natimi, Et itai ahlap ineigki er ahlap iran vai ilpu atnas, jim hegaig aijaua vai natimi ineig is asuptecnaig *chelemia*, im lep vai inliinmopon: “et idim ohuun nobohtan a Ihova, im niji itai asega amen iran:”

29 ek asaig ainyak, Vai inliinmopon, jam eti vai inliinmopom; et auri intak atimi par aktaktai has anliinmopon vai nyak va nitai ineig et eti itaup *vai nyak*?

30 El ek leh ainyak va naiheuc o *Atua*, er auri par asan tas has vai nyak, va *nitai caig* ineig ek naaurineig vaig ainyak?

31 El eka hag aijaua, ka umwig, ka ago tah nitai, akumu ago niji itai asega aijaua mika eri imyiahpas *Atua* vaig.

32 Akumu jim ati nitai epihtau iran aijaua imi nupu Jutai, ka nupu Crisi, ka nup an nakalasia u *Atua*:

33 et idivaig ek ago nedo ineig ainyak, et upene va atimi asega irai iji itai asega, ek eti ahilek nitai iji eigki ainyak et upene vai nyak, ja va atimi asega, va uhpu imyiatamaig ra.

NUARIN-TAS ALUPAS 11.

1 Akumu apitac nyak aijaua, et idivaig ek *apitac* Kristo ainyak.

2 EK imyiahpas caua ainyak, ak ilpu etoak, va nedo ineigki, nika-vaig, eka imyiehva nyak aijaua an niji itai asega, um imyiaiji intas alep iji ehki kis upyi asaig chelemia ainyak.

3 Ek merit ainyak mika aki ato aijaua, nikavaig, et idjini atamaig asega a Kristo; um lep idjini intakata a natamaig; um lep idjini Kristo a *Atua*.

4 El et alaigaheni tah natamaig, ka tas ahidan tas, um adgai itai an nidjinin, et auoh ehcamai yin aien an nidjinin.

5 Ja el et alaigaheni tah intakata, ka tas ahidan tas, jam eti adgai itai an nidjinin, et auoh ehcamai yin aien an nidjinin: et tup ethi ache nedo ineig im nekpei *nidjinin*.

6 Ja el et eti adgai itai a intakata, uhmu lep eucse *nidjinin*: ja el et ehcamai a intakata an neucsevaig *nidjinin*, ka ekpei, etmu adgai itai aien.

7 Eris idim ika inyi ti adgai itai natamaig an nidjinin, va nitai ineig, nikavaig, et almui *Atua* aien, um itai imyiahpas yin vaig: ja et itai imyiahpas natamaig vaig a intakata.

8 Is eti ahes irai intakata a natamaig; ja is ahes irai natamaig a intakata.

9 Eris lep eti ago natamaig vai intakata; ja *eris ago* intakata va natamaig.

10 Va nitai ineig eris idim ika inyi adgai itai a intakata an nidjinin vai ilpu agelo.

11 Ja *et* eti echim *eteuc* a natamaig, um eti echim *eteuc* a intakata, irai Natimarid.

12 Is idim ahes irai natamaig a intakata, et lep ucco, *et eteuc* a natamaig vai intakata; ja is ahes irai *Atua* niji itai asega.

13 Akumu aktaktai aijaua: et eti upene vai intakata nalaigahenivaig, um eti adgai itai.

14 Eka ispumia ato aijaua, nika-vaig, el et opra numri *nidjini* natamaig, et itai ehcamai vaig ehelen.

15 Ja el et opra numri *nidjini* intakata, et itai imyiahpas yin vaig ehelen: er alupai yin numri *nidjinin*, mika yi itai adgai imi yin.

16 Ja el et ika tah natimi yi imyisjis itai, et ti nedo unyima ineigki, *et lep* eti *eteuc nedo ineigki* iran tah nakalasia u *Atua*.

17 EK eti imyiahpas *caua* ainyak va nedo ineigki, ek asuptecnaig *chelemia* ainyak, nikavaig, eka wat asjapicnaig aijaua, et eti edel

nedo upene *unyimia*, jam edel nedo has.

18 Et uhup neigki, ek atahaijeg vaig ainyak, nikavaig, eka wat ah-tag pan aijaua an nasjapicnaig *unyimia*, eka imyisjis itai jipe aijaua; ek eteuc tintin *an tas ineigki* ainyak.

19 Eris idim ika inyi eteuc nahaiji imyisjis itai iramia, va erupu ahcaahos a ilpu atimi iji eig iramia, eris ika eris upene ara.

20 Eka wat asjapicnaig aijaua an nuarin et ethi, et eti idivaig incaig inlag itaup u Natimarid.

21 Eka wat hag aijaua, era uhup atimi asega um echim hegai itai: et um ehtelev nahaiji atimi, um lep ahnag *va waina* nahaiji atimi.

22 Eka auri aijaua par eti hag um umwig irai innim unyimia? eka auri aijaua par ika, et takitai nakalasia u Atua, um auoh ehcamai vai ilpu ihki atimi? Ekpu asan he ainyak ehelemia? ekpu imyiahpas caua ainyak va nedo ineigki, ka o'o? O'o, ek eti imyiahpas *caua* ainyak.

23 Kis leh ehele Natimarid ainyak *intas* ineig kis asuptecnaig ehelemia ainyak, nikavaig, is leh nareto a Iesu Natimarid an nepeig iyehki eris aniv yin:

24 is naaurineig aien, um aswaplec, um ika, Leh aijaua, *um* caig; nohuk neigki, eris aswaplec vai caua: ago nedo ineigki aijaua par imyiehva nyak.

25 Im lep ineig, is caig aien, ja par lep *leh* nipjinitai, um ika, Intas-etipup mat vai inja irak nipjinitai ineigki: akumu ago nedo ineigki aijaua, aku wit umnyi aijaua, par imyiehva nyak.

26 Aku wit caig nareto ineigki aijaua, um umwig an nipjinitai ineigki, eka ehvaig inmas u Natimarid aijaua um imyihum pan napam o un.

27 Ja ara asega era caig nareto ineigki ara um umwig an nipjinitai

ineigki u Natimarid, jam eti upene, era ago nedo has ara va nohui Natimarid im inja iran.

28 Erumu ahilek inliinmopura atimi, ja pah caig nareto *ineigki*, um umwig an nipjinitai *ineigki*.

29 Aien et caig aien um umwig, jam eti upene, et caig aien um umwig neruva nedo has o un, et eti ecetai nohui Natimarid aien.

30 Va nedo ineigki era auatialidi natimi et ahinag iramia, um emehe; era lep umjeg natimi et ahinag.

31 Ele tis ahilek nedo uja akaija, uhpu eti aru nedo uja.

32 Ja el eh wat aru nedo uja, et acaiji nedo has uja a Natimarid, vai ti jim leh neruvaig akaija ehele atimi an nobohtan.

33 Va nitai ineigki, aku wit asjapicnaig aijaua, ak ilpu etoak, mika aki hag, akumu aitgaig jipe caua aijaua.

34 El et ehtelev tah natimi, etmu hag an nimmim o un aien; va aki jim asjapicnaig aijaua, um leh neruvaig. Ek wit yetpam *ehelemia* ainyak, ekpu ikni upene niji itai et eche ainyak.

NUARIN-TAS ALUPAS 12.

IM lep ineig, va niji itai *tup ahtai* u Nesgan *Upene*, ak ilpu etoak, ek merit ainyak mika aki ato aijaua.

2 Eka ato aijaua, nikavaig, akis ilpu atimi aupat aijaua, et idivaig eris imyiahnag caua, um imyiapan caua u ilpu atmas pop iji eigki.

3 Ek lep asuptecnaig *nitai ineig* ehelemia ainyak, nikavaig, et wat tas tah natimi vai Nesgai Atua, et eti ika aien, Et has a Iesu: um lep ehka vaig tah nikavaig, Et Atimarid a Iesu, et wat eti amen ehele a Nesgan *Upene*.

4 Et acheiachei niji itai *tup ahtai*, ja et *tup ethi* ache a Nesgan *Upene*:

5 um lep acheiachei niji aua-

raheca, ja et tup ethi ache a Nati-marid :

6 um lep acheiachei niji auritai, ja et tup ethi ache a Atua ineig, et ago *nauritai* asega aien ira *atimi* asega.

7 Ja er alupai atimi asega nitai ehcohos an Nesgan *Upene*, mika eri ago upene itai ara.

8 Et alupai natimi et ethi intas arapakau a Nesgan *Upene*; um lep *alupai* natimi et eche intas ato itai vaig a Nesgan *Upene* iyecki;

9 et *alupai* natimi et ethi nim-yiisjis ninivaijec a Nesgan *Upene* iyecki; um lep *alupai* natimi et eche nemda a Nesgan *Upene* iyecki, mika yi ago cehcehe atimi;

10 um lep *alupai* natimi et eche nemda, mika yi ago niji auritai es-jilid aien; im lep natimi et eche, mika yi tas ahidan tas aien; im lep natimi et eche, mika yi ato inliin-mopoi atimi aien; im lep natimi et eche, *mika yi tas an* tas irai iji pece *aiien*; im lep natimi et eche, mika yi asuptecnaig nesgan tas an tas *irai iji pece* aien :

11 et ago *nauritai* iji eigki asega a Nesgan *Upene* iyecki et tup ethi ache, um alaiig ini atimi asega an nika o un yi idim ucece.

12 Et tup ethi ache nohuja, jam ahinag inuari-ohuja, um lep ohuja ethi ache inuari-ohuja asega et ahinag: et idim ucco a Kristo.

13 Eris idim baptiso iraija asega an Nesgan *Upene* et tup ethi ache, mika yi ethi ache nohuja akaija, kit inta upu Jutaija akaija, ka upu Crisi, kit inta ilpu abeca akaija, ka ilpu atimi eti abeca: et tup ethi ache a Nesgan *Upene* ineig intis unwig iran akaija asega.

14 Et eti uarin et ethi ache nohun *tah*, ja et ahinag.

15 El et ika neduon *tah*, Ek eti nikman ainyak, va nitai ineigki ek eti uarin-nohun ainyak; et eti *inivaijec intas* ineig, mika et eti uarin-nohun.

16 El et ika intikgan *tah*, Ek eti nesganimtan ainyak, va nitai ineigki ek eti uarin-nohun ainyak; et eti *inivaijec intas* ineig, mika et eti uarin-nohun.

17 El et tup esganimtaija ache nohuja asega, intupu ahgei itai akaija um uauo? El et tup tik-gaija ache *nohuja* asega, intupu ipnyi itai akaija um uauo?

18 Ja is idim ikni inuari-ohuja asega an nohuja a Atua an nika o un yi idim ucece.

19 El et tup ethi ache nuari-ohuja asega, *etpu eteuc* nohuja um echamecha?

20 Et idim ahinag inuari-ohuja, jam tup ethi ache nohuja.

21 Et ehka va nesganimtan *tah* nikavaig ehele nikman, Na eti upene vai nyak aiek: um lep *ehka va* nidjinin *tah* nikavaig ehele neduon ehro, Erau eti upene vai nyak aijaurau.

22 Maiya, et idim ehka *vai caija* natceijaigvaig inuari-ohuja iji eigki eris ika et auatialidi:

23 im lep ineig, inta yecrei upene inuari-ohuja iji eigki akaija, inta ika akaija et eti esjilid; inta lep yecrei upene *inuari-ohuja* iji eigki akaija et eti esjilid:

24 et eti upene itai vai *uari-ohuja* esjilid: ja is ago upene nohuja asega a Atua, is yecrei upene *inuarin* ineigki aien et eti upene:

25 mika yi jim ehtauo sjipe inuari-ohuja; jam aminjinaig upene sjipe ra.

26 El et ohocred inuarin-nohuja et ethi, et idim ahgei inuari-ohuja asega; ja el eh imyiahpas inuarin-nohuja et ethi, et idim imyiacitak inuari-ohuja asega.

27 Eka ohui Kristo aijaua, um lep inuari-ohun asega.

28 Is ikni nahaiji atimi a Atua an nakalasia o un, uhup irai ilpu apostolo, ja par apitac irai ilpu profeta, im lep ilpu atimi esege, im lep ilpu atimi ago niji auritai esjilid, im

ilpu atimi ago cehcehe atimi, im ilpu aheca, im ilpu atimi tas alep, im ilpu atimi tas an tas irai iji pece.

29 Era idim eti ilpu apostolo natimi asega; um eti ilpu profeta natimi asega; um eti ilpu atimi esege natimi asega; um eti ago niji auritai esjilid natimi asega;

30 um eti ago cehcehe atimi natimi asega; um eti tas an tas *irai iji pece* natimi asega; um eti asuptecnaig nesgan tas *an tas irai iji pece* natimi asega.

31 Akumu merit alupas va niji itai tup ahtai esjilid aijaua: ja ekpu asuptecnaig ehelemia ainyak nedo esjilid *imi caua iran yehki*.

NUARIN-TAS ALUPAS 13.

1 EL ek tas ainyak irai tas o atimi, im lep *irai tas* o agelo, jam eti aiyu inliinmopok *va atimi*, el ek idivaig nohrai intoho ainyak, ka nohra neleau:

2'el ek profeta ainyak, um ato niji itai adenaig asega, im nara-pakau asega; el ek imyiisjis emda ninivaijec ainyak, um tup upene vai nyak niknipagki lola edoon vaig um ikni an taka uarin, jam eti aiyu inliinmopok *va atimi*, el ek takitai ainyak:

3 el ek ahtai niji itai asega unyak ainyak um alayi *ilpu ihki atimi*, um lep atceijaig nohuk mika eri atnamud, jam eti aiyu inliinmopok *va atimi*, inki ti leh nimtan ainyak.

4 Et eti auatiemda inliinmopja aiyu *va atimi*, jam updak; et eti auatitai inliinmopja aiyu *va atimi*; um eti imyiisjis itai, *um* eti ijinies,

5 *um* eti maumau nedo o un, *um* eti ahilek itai o un ache, *um* eti fi auroauro um edemda, *um* eti aktaktai has;

6 *um* eti imyiacitak nedo has, jam imyiacitak nedo inivaijec;

7 *um* apos niji itai asega, *um* imyiisjis ninivaijec niji itai asega, *um*

aktaktai upene va niji itai asega, *um* leucose nohocred asega.

8 Et amen aktit inliinmopja aiyu *va atimi*; ja etpu ti amen nauritai u ilpu profeta; uhpu eti lep tas an tas *irai iji pece*; inyi ti lep amen nato itai.

9 Inta ato itai tintin akaija *an naopan ineig*, um esege tintin;

10 ja et wit yetpam *naopan* upene asega, uhpu eti lep *ato* tintin ache *itai*.

11 Kis wat halav ainyak, kis tas ainyak et idivaig inhalav, *um* ato itai et idivaig inhalav, *um* aktaktai itai et idivaig inhalav; ja ek wat ohoig metto ainyak, ek mun ude nedo o inhalav ainyak.

12 Inta alum itai akaija an naopan ineig irai itai naunau, jam eti almuktit; ja *intupu alum* esgai-imaiaja sjipe *akaija* an naopan iyehki: ek ato tintin itai ainyak an naopan ineig, ekpu ato itai ainyak an naopan iyehki et idivaig eris ato nyak.

13 Etpu amen aktit nimityisjis ninivaijec *uja*, im inliinmopja aitgai itai, im inliinmopja aiyu *va atimi*, et eseij nitai eraigki; ja et esjilid iran raigki naiyu u inliinmopja *va atimi*.

NUARIN-TAS ALUPAS 14.

1 AKUMU ugni emda inliinmopomia aiyu *va atimi* aijaua, um ahilek niji itai *tup ahtai* u Nesgan *Upene*, jam merit alupas mika aki asuptecnaig intas o *Atua*.

2 Aien et tas aien an tas *an taka pece*, et eti tas ehele atimi aien, ja et tas ehele *Atua aien*: et eti ato intas o un tah natimi; ja et asuptecnaig niji itai adenaig anliinmopon aien.

3 Aien et asuptecnaig intas aien, et tas ehele atimi aien par ahidaig emda ra, um ated ra, um ago eropse inliinmopura.

4 Aien et tas aien an tas *an taka pece*, et ahidaig emda yin ache aien; ja aien et asuptecnaig intas aien, et lep ahidaig emda ilpu atimi asjapicnaig aien.

5 Ek merit ainyak mika aki tas aijaua asega an tas *irai iji pece*, ja *ek merit* alupas *ainyak* mika aki asuptecnaig intas aijaua: aien et asuptecnaig intas aien, et esjilid aien irai natimi ineig et tas an tas *irai iji pece* aien, el et eti asuptecnaig nesgan tas aien, va uhpu ahidaig emda ilpu atimi asjipicnaig.

6 Ak ilpu etoak, el ek ham ehele-mia ainyak, um tas an tas *irai iji pece*, inyi ti upene vai caua, el ek eti tas ehele-mia ainyak an tas er ehvaig, ka an tas arapau, ka an tas asuptecnaig, ka an tas esege.

7 Et lep ucco niji itai et eti umumoh ja er atahaijeg nohraiitai, kit inhutlavlav ka harp, el et eti acheiachei nohran, el et ehka nato-vaig nohranitai ineig er ahlai inhutlavlav ka auud harp iran.

8 El et eti acreh nohran toho, etpu yecrei yin a di va nedoa?

9 Et idim ucco, el eka eti tas an nipjineucsemia aijaua irai tas er ato, uhpu ehvato intas *unyimia*? akupu tas ehele nimtinjop aijaua.

10 Et idim eteuc intas et ahinag an noboltan, um acheiachei, jam eti *eteuc* neig et ti nesgan tas iran.

11 Ja el ek eti ato nesgan tas ainyak, ekpu idivaig natimi an taka pece ainyak ehele natimi ineig et tas aien, *etpu lep idivaig* natimi an taka pece ehelek aien et tas aien.

12 Eka idim merit alupas va *niji itai tup ahtai* u Nesgan *Upene* aijaua, et idim ucco, akumu lep merit aijaua mika aki esjilid, va uhpu ahidaig emda ilpu atimi asjapicnaig.

13 Va nitai ineigki aien et tas an tas *an taka pece* aien, etmu ugni *Atua* aien, mika yi *ato* par asuptecnaig nesgan tas.

14 El ek alaigaheni ainyak an tas *an taka pece*, et alaigaheni inliin-mopok ainyak, jam eti ohoai itai naktaktai unyak.

15 Inki auri ainyak? Ekpu alaigaheni ainyak an tas eri eti ato, um lep alaigaheni an tas er ato; ekpu acesaces nohraiitai ainyak an tas er eti ato, um lep acesaces nohrai-itai an tas er ato.

16 Na wit imyiahpas aiek an tas er eti ato, inyi ehka vai natimi ineig et eti ato intas iyehki aien nikavaig Emen; na wit naaurineig aiek, et idim eti ato nesgan tas an tas unyum aien:

17 na idim naaurineig upene aien, jam eti ahidaig emda intak atimi.

18 Ek naaurineig vai *Atua* unyak ainyak, ek esjilid iramia asega ainyak intasvaig an tas *irai iji pece*:

19 ja ek merit ainyak nasaigvaig intas er ato et faiv an nasjapicnaig *u atimi*, mika ki esege imi atimi ainyak, jam eti merit nasaigvaig intas et ten dausant irai tas *er eti ato*.

20 AK ilpu etoak, akumu jim ilpu halav aijaua an naktaktai *unyimia*: akumu ilpu halav aijaua an nedo has ache, ja akumu ilpu atimi metto aijaua an naktaktai *unyimia*.

21 Eris aged an tas alep, um ika, "Et ika a Ihova, Ekpu tas ehele atimi iji eigki ainyak irai tas inyi eche, im lep irai ipjieucese atimi inyi eche; ja erupu eti atahaijeg nyak ara."

22 Va nitai ineigki et itai asjaaic-naig vai ilpu atimi imyiisjsis nahcil intasvaig an tas *irai iji pece*, jam eti *eteuc* vai ilpu atimi imyiisjsis ninivaijec: ja er asuptecnaig intas vai ilpu atimi imyiisjsis ninivaijec, jam eti *asuptecnaig* vai ilpu atimi imyiisjsis nahcil.

23 El era asjapicnaig ilpu atimi alaigaheni asega an nuarin et ethi, el era tas atimi asega an tas *irai iji*

pece, el era ham a ilpu atimi eti ato *intas an taka pece*, ka ilpu atimi imyiisjis nahcil, erupu ika ara, Eka ahnag aijaua.

24 Ja el era asuptecnaig intas ara asega, el et ham tah natimi imyiisjis nahcil, ka tah natimi eti ato *intas an taka pece*, era ahidaig inliinmopon ara asega, um ated yin ara asega :

25 et idim ucco, er ehvaig nijj itai adenaig u inliinmopon; et um eropse an nesganimtan aien, um alaigaheni vai Atua, um asuptecnaig, um ika, Et idim amen ehelemia a Atua.

26 EKA auri aijaua, ak ilpu etoak? eka wat asjapicnaig aijaua, et ika tah caua yi acesaces nohranitai, um ika *tah* yi esege, um ika *tah* yi tas an tas *an taka pece*, um ika *tah* yi ehvan tas, um ika *tah* yi asuptecnaig nesgan tas. Akumu ago nijj itai asega aijaua mika eri ahidaig emda atimi vaig.

27 El et tas tah natimi an tas *an taka pece*, erumu tas natimi inyi ero ka inyi esejj ache, jam athiathi; etmu lep asuptecnaig nesgan tas tah natimi inyi ethi.

28 Ja el et eti eteuc tah par asuptecnaig, etmu jim tas aien an nasjapicnaig; etmu tas ehelen ache aien im lep ehele Atua.

29 Erumu tas naprofeta inyi ero ka inyi esejj; erumu lep aktaktai *intas ura* a ilpu etoara.

30 Ja el eh ehvaig *tah nitai* ehelen tah et ateuc aien, etmu aldin tas o un natimi ineig is upyi hup aien um tas.

31 Et upene vai caua mika aki asuptecnaig athiathi intas aijaua asega, mika eri ato itai natimi asega, um eropse inliinmopura asega.

32 Era imyiaiji intas o ilpu profeta a nesgai ilpu profeta.

33 Et eti ahes nehtauo ehele Atua, jai neigpa ache, et idivaig irai asjapicnaig asega u ilpu atimi upene.

34 Erumu jim tas a ilpu takata

unyimia irai asjapicnaig *unyimia*: et itaup vai ra intasvaig; ja *eris ika* eri atahajjeg ache, et idivaig et lep asaig intas alep:

35 el era merit ara natovaig tah nitai, erumu ahodai ilpu atamnyura ara irai innim *ura*: et maumau vai ilpu takata intasvaig an nasjapicnaig u atimi.

36 Is idim eti ahes ehelemia intas o Atua, um lep eti yetpam ehelemia ache.

37 El et ika tah natimi et aprofeta aien, ka et amen ehelen a Nesgan *Upene*, etmu ika aien et tas alep o Natimarid intas iji eigki ek aged imi caua ainyak.

38 Ja el et eti ato itai tah natimi, etmu idim eti ato itai aien.

39 Va nitai ineigki, ak ilpu etoak, akumu merit aijaua mika aki asuptecnaig intas: jam jim acaiji atimi intasvaig an tas *irai iji pece*.

40 Akumu ago nijj itai asega aijaua an nedo atoh im nedo upene.

NUARIN-TAS ALUPAS 15.

IM lep ineig, ak ilpu etoak, ek ahugni lelmia ainyak vai intas-upene ineig kis asuptecnaig ehelemia ainyak, akis lep leh aijaua, um aiji aktit iran;

2 er lep imyiatamaig caua vaig, el eka imyiehva intas iyeliki aijaua kis asuptecnaig ehelemia ainyak, el et eti takitai nimyiisjis ninivaigjek unyimia.

3 Kis upyi asan tas iyehki ehelemia ainyak kis leh ainyak, nika-vaig, is mas a Kristo va nedo has nja, et idivaig eris aged;

4 eris um atelmoi yin, ja is wat ti pan itac nadiat is esejj, is lep nusjai aien, et idivaig eris aged:

5 is ecet yin a Sifas, im lep natimi is twelv iji ehki:

6 eris lep ehvas ecet yin a ilpu etoaija is faiv huntret um eled; era umumoh natimi et ahinag ira

ra an naopan ineig, ja era umjegse nahaiji ra:

7 Is lep ecet yin a Jakobus, im lep ilpu apostolo asega.

8 Ja kis par apitac ainyak ira ra asega um ecet yin, et idivaig in-halav apos has.

9 Ek upoupo ainyak irai ilpu apostolo, ek eti upene ainyak mika eri aniv nyak par ika napostolo, va nedo ineigki, nikavaig, kis atmas vai nup an nakalasia u Atua ainyak.

10 Ja et ahes an naiheuc o Atua nedo unyak asega: is eti takitai naiheuc o un vai nyak; ja kis aur-itai ainyak um esjilid ira ra asega: ja *kis* eti *ispuk ago* ainyak, jai naiheuc o Atua *is amen* ehelek.

11 El *ek asuptecnaig* ainyak, ka ara, et um ucco nasuptecnaig unyima, um lep ucco nimyiisjis nini-vaijec unyimia.

12 El eh asuptecnaig Kristo mika is nusjai aien vai inmas *o un*, era auri nahaijimia par ika, Inyi ti nusjai *nohui* atimi emesmas?

13 El eh eti imyianusjai atimi vai inmas *ura*, el is eti nusjai a Kristo *vai inmas o un*:

14 ja el is eti nusjai *vai inmas o un* a Kristo, el et takitai intas eera asuptecnaig aijama, um lep takitai nimyiisjis ninivaijec unyimia.

15 Im lep ineig, eh lep alumi cama ilpu atimi asuptecnaig intas aheil vai Atua; va nedo ineigki, nikavaig, ecriis asuptecnai Atua aijama, um ika, is imyinusjai Kristo aien: ja is eti imyinusjai yin aien, el eh eti imyianusjai *nohui* atimi emesmas.

16 El eh eti imyianusjai *nohui* atimi emesmas, el is eti nusjai a Kristo:

17 el is eti nusjai a Kristo, el et takitai nimyiisjis ninivaijec unyimia; et idim amen ehelemia nedo has unyimia:

18 era lep erekinman ira ra ara era umjegse ehele Kristo ara.

19 El ta aitgai Kristo akaija an nobohtan ineigki ache, et esjilid nohocred uja irai *ohcred* oi tak atimi asega.

20 Ja is idim nusjai a Kristo vai inmas *o un*, et metto aien ira atimi iji ehki eris umjegse ara.

21 *Et eteuc* inmas vai natimi is ethi, et um ucco, uhpu lep imyianusjai atimi emesmas vai natimi et ethi.

22 Era idim emesmas atimi asega irai Atam, et idim ucco, erupu anusjai atimi asega irai Kristo.

23 Ja *erupu anusjai* atimi asega an nuarim esyei ra: *is uhup* a Kristo immetto; ja erupu apitac a ilpu atimi u Kristo an nehcohos pam o un.

24 *Etpu yetpam* nehni o itai an naopan iyehki, et wit atceija nel-cau *o un* aien imi Atua, et Etman aien; ja etpu uhup aien um atipagki natimarid asega, im natimi alupas asega, im nemda asega.

25 Eris idim ika etpu atimarid aien, um imyihum pan an naopan iyehki, etpu ikni ilpu atimi edemda asega aien ithan neduon.

26 Etpu atipagki natimi edemda apitac ineigki aien, Inmas.

27 “Is idim ikni niji itai asega ithan neduon aien;” ja et wat ika aien, “Eris ikni niji itai asega *ehelen*,” er idim ato mika eris eti *ati* yin, is ikni niji itai asega aien ehelen.

28 Ulu wit ikni niji itai asega ehelen, uhpu lep ati Inhal *o un* ehele *Etman* is ikni niji itai asega aien ehelen, va etpu esjilid a Atua irai iji itai asega.

29 El era eti anusjai atimi emesmas, uhpu uauo ra eris leh nabaptiso va *nika ura* eri anusjai atimi emesmas? era auri ara par leh nabaptiso va *nika ura* eri anusjai atimi emesmas?

30 Eera auri aijama par leucse nohocred irai iji uari-adiat?

31 Ek idim asaig ainyak, va nim-

yiaticak caua unyak ineig et ahes ehele Iesu Kristo Natimarid uja, *mika*, ek mas ainyak irai iji adiat.

32 El ekis ehtauo ainyak imi niji itai aleg Efesus, et idivaig nedo o atimi, et eti upene vai nyak: el eh eti anusjai atimi emesmas, "ti hag akaija um umwig; intupu emesmas akaija imraig."

33 Akumu aktaktai upene aijaua: nedo auahas nedo upene *ungimia* neigki, par amen pan ehele ilpu atimi auatatimi.

34 Akumu aiji lahlah aijaua, *um ago* nedo atoh, um jim ago nedo has; era eti ato Atua nahaijimia: ek asan *tas ineigki* ainyak, mika aki ehcamai aijaua.

35 JA etpu ika tah, Erupu anusjai atimi emesmas um uauo? inyi idivanhe nohura ineigki erupu ehcohos pam iran ara?

36 Ak natimi ahnag! el et eti muttit *nupsi itai* ineig na ahoaig aiek, el et eti edel:

37 na wit ahoaig itai aiek, na eti ahoaig nohu itai ineig aiek etpu edel, jai tup nupsi itai, kit *nupsi* hwiit, ka *nupsi* itai et eche:

38 ja et ati nohun a Atua, an nika o un yi idim ucco, *et ika aien yi eteuc* nohu iji obotpot upsi itai asega.

39 Et eti tup ethi ache nohu itai asega: ja et eche nohu atimi, um lep eche nohui kurimatau, um lep eche *nohui* mu, um lep eche *nohui* man:

40 *et eteuc* nohu itai an nohatag, um lep *eteuc* nohu itai an nobohtan: ja et eche naijorai *ohu itai* an nohatag, jam lep eche *naijorai ohu itai* an nobohtan:

41 et eche naijoran nagesega, jam lep eche naijoran mohoc, jam lep eche naijorai moijeuv; et eti apapa naijorai moijeuv asega.

42 Inyi idim ucco an nusjai u atimi vai inmas *ura*: er ahoaig nitai muttit, *ja etpu* nusjai nitai ineig inyi ti muttit:

43 er ahoaig nitai er amcel vaig, *ja etpu* nusjai nitai ineig er imyiahpas; er ahoaig nitai auatiali-idi, *ja etpu* nusjai nitai ineig et emda:

44 er ahoaig tup nohun, *ja etpu* nusjai nohun esgan. Et eteuc tup nohu *atimi*, jam lep eteuc nohun esgan:

45 et idivaig eris aged, *um ika*, "Eris ati Atam uhup, mika yi tup atimi umoh aien;" *ja eris ati* Atam apitac, mika yi esgan aien *um imyiatumumoh atimi*.

46 Ja is eti uhup *nohuja* esgan, *ja tup nohuja*; *ja par* apitac *nohuja* esgan.

47 Is ahes an nobohtan a natimi uhup, um idivaig nobohtan aien: is ahes an nohatag a natimi apitac, Natimarid marom.

48 Era idivai yin is ahes an nobohtan aien atimi an nobohtan: *ja era idivai yin* is ahes an nohatag aien atimi an nohatag.

49 Intis idim apos nalmu *natimi ineig* akaija is ahes an nobohtan aien, et idim ucco, intupu apos nalmun akaija is ahes an nohatag aien.

50 Ek ika ainyak, ak ilpu etoak, et elika va nohuja namenvaig an nelcau o Atua; *et lep ehka* va niji itai muttit namenvaig an nuarin ineig et eti amen tah nitai muttit iran.

51 Ekpu idim asuptecnaig nitai adenaig ehelemia ainyak: Inti eti umjegse akaija asega; *ja etpu* eche nohuja akaija asega,

52 an nuarin-nadiat dikjai, an natanes nesganimtan natimi, uhu wit *ahlai* intoho apitac: uhpu idim ahlai intoho, erupu anusjai atimi emesmas jam eti lep muttit, etpu lep eche nohuja akaija.

53 Eris idim ika uhpu aso nitai ineig inyi muttit an nitai ineig inyi ti muttit; uhpu lep aso nitai ineig inyi mas an nitai ineig inyi ti mas.

54 Uhu wit aso nitai ineig inyi

muttit an nitai ineig inyi ti muttit, um lep aso nitai ineig inyi mas an nitai ineig inyi ti mas, etpu ehneijid intas eris aged, *um ika*, "Er ahau Inmas um atleg."

55 "Ak Inmas, naces atimi unyum yek eda? Ak Nehpanitai, nahau atimi unyum yek eda?"

56 Naces atimi u Inmas neigki, nedo has; nemda an nedo has neigki, intas alep.

57 Jai naaurineig vai Atua, et ika aien inti esjilid akaija vai Iesu Kristo Natimarid uja.

58 Va nitai ineig, ak ilpu etoak upene, akumu amen aktit aijaua, *um jim amaamai, um aheca* alupas an nauritai u Natimarid irai iji adiat, eka ato aijaua, nikavaig, inyi ti taktitai nauritai unyimia irai Natimarid.

NUARIN-TAS ALUPAS 16.

IM lep ineig, vai *mune* er asjapic-naig vai ilpu atimi upene, et idivaig kis asaig ainyak ehele nup urai ekalasia an *pece* Calesya, akumu lep ago aijaua.

2 An nadiat uhup irai wiik akumu ikni *mune* ehelemia aijaua asega, um aminjinaig, et idivaig et alupai caua itai a *Atua*, va eri jim asjapicnai itai an napam unyak.

3 Ek wit apam ainyak, ekpu aged itasvitai ainyak, um abraig pan ra sji eigki akupu aniv ra aijaua, mika eri apos pan naiheuc unyimia ara Jerusalem.

4 Ja el eh ika ki apan ainyak, erupu ahced nyak ara.

5 Ekpu apam ehelemia ainyak, ek wit atga an *pece* Masetonea ainyak: ekpu idim atga an *pece* Masetonea ainyak.

6 Kit ekpu amen ehelemia ainyak, maiya, kit ekpu amen ainyak an mesese, mika aki imyiapan nyak aijaua an nefalaig ineig ekpu apan iran ainyak.

7 Ek eti merit ainyak nalum caua vaig an naopan ineig an napan unyak; ja ek ika ainyak ki elva-men jak ehelemia, tup Natimarid marom.

8 Ja ekpu amen ainyak Efesus, um yetpan nadiat Pentekost.

9 Eh mun asalgei alupas intapanes vai nyak, et mun lah neucse neom, ja era lep ahinag a ilpu atimi edemda.

10 JA el et wat ham a Timodeus, akumu aminjinai yin aijaua, mika yi amen ehelemia aien um eti im-titaig tah nitai: et ago nauritai u Natimarid aien, et idivaig ek lep ago ainyak.

11 Va nitai ineig etmu jim amcel vai yin tah, jam imyiapan yin an neigpa, mika yi apam ehelek aien: ek aitgai yin ainyak an napam u ilpu etoaija.

12 Im lep ineig, vai Apollos etoak, kis ugni emda yin ainyak, mika yi ahced ilpu etoaija aien, um apam ehelemia: ja is eti merit aien napamvaig an naopan ineig; ja etpu apam aien et wit tup upene vai yin.

13 Akumu aminjinai caua aijaua, um amen aktit an nimyiisjis nini-vajec *unyimia*, um ago nedo o ilpu atimi metto, *um emda*:

14 akumu ago nedo asega unyimia anliinmopomia aiya *va atimi* aijaua.

15 AK ilpu etoak, eka ato ra an nimmim u Stefanas aijaua, nikavaig, eris hupnan ara an *pece* Akea, eris lep ispara tup ago nedo aiheuc vai ilpu atimi upene ara:

16 ek ugni caua ainyak, mika aki atahajeg aijaua intas o atimi iji eigki, im lep ra asega era atau imi *ra* ara, um ago nauritai.

17 Ek imyiacitak ainyak va napam u Stefanas, im Fortunetus, im Akeekus, ehtaij isjipicmoig cava ahtaij:

18 et emda inliinmopok ainyak, im lep inliinmopomia, va nedo o ehtaij: akumu leh upene ehtaij rahki aijaua.

19 Era aiheuc vai caua a nup urai ekalasia an *pece* Esysa. Erau lep aiheuc vaig alupas caua a Akwila im Prisilla, im lep nup an nakalasia *era asjapicnaig* an nim-nim urau *ara*.

20 Era aiheuc vai caua a ilpu etoak asega. Akumu aiheuc vaig jipe caua aijaua, um aijumnyi upene caua,

21 NAIHEUC *vai caua* unyak neigki, Paulo, *maged* an nikmak:

22 El et eti aiyu inliinmopon tahi natimi vai Iesu Kristo Natimarid, etmu erikinman iran aien. Etpu ham a Natimarid.

23 *Etmu amen* ehelemia naiheuc o Iesu Kristo Natimarid *uja*.

24 Et aiyu inliinmopok ainyak vai caua asega irai Iesu Kristo. Emen.

NITASVITAI ERO O PAULO NAPOSTOLO

IMI

NUPU KORINDUS.

NUARIN-TAS ALUPAS 1.

1 AK nup an nakalasia o Atua Korindus, im lep ilpu atimi upene asega irai *uari pece* Akea asega, *ek aiheuc* vai caua *ainyak* Paulo, napostolo o Iesu Kristo va nasaig o Atua, im lep Timodeus etoaija:

2 *Etmu amen* ehelemia naiheuc im neigpa ineig et ahes ehele Atua Etmaija, im lep Iesu Kristo Natimarid.

3 NAAURINEIG vai Atua, Etmai Iesu Kristo Natimarid *uja*, *um lep* Etmaija ineig et ahes ehelen nihi aiheuc, um lep Atua ineig et ahes ehelen nedo erop asega;

4 et ago eropse nyak aien an nohocred asega unyak, mika ki emda ainyak par ago eropse ra sji eigki era ohocred ara, an nedo erop ineig et ago eropse nyak iran a Atua.

5 Et alupas nohocred unyak vai

Kristo, et um ucco, et esjilid nedo erop unyak irai Kristo.

6 Ek ohocred ainyak va nitai ineig, mika eri ago eropse caua, um imyiatamaig caua, er ago nitai ineigki an napos nohocred iji eigki *unyimia* ek lep apos ainyak; ek lep eropse ainyak va nitai ineig, mika eri ago eropse caua, um imyiatamaig caua.

7 Ek aktaktai emda caua ainyak, ek ato ainyak mika, eka ilpu atimi asipiaig nohocred *unyak* aijaua, et um ucco, *akupu* lep *ilpu atimi asipiaig* nedo erop *unyak* aijaua.

8 Ak ilpu etoak, ek merit ainyak mika aki ato aijaua nohocred unyak is yetpam irak an *pece* Esysa, kis ohocred alupas ainyak um auatialidi, kis aktaktai ainyak mika ki mas:

9 kis ika ainyak ki mas, vai ki

jim asgeig irak ainyak, jam *asgeig* irai Atua ineig et imyanusjai atimi emesmas aien :

10 is imyiatamaig nyak aien vai inmas esjilid iyehki, et lep imyiatamaig *nyak* aien : ek aitgai yin ainyak mika yi imyiatamaig *nyak* aien an tak aopan ;

11 eka wat ehralaigaheni vai nyak aijaua, um atau imi nyak, mika eri naaurineig atimi et ahinag va naiheuc iyehki ek *leh* ainyak va *nalaigaheni* u atimi et ahinag.

12 Intas imyiacitak unyak neigki, intas asuptecnaig u inliinmopok ineigki, nikavaig, et upene nedo *unyak* um inivaijec *inliinmopok an nuhup* u Atua, an namen unyak an nobolitan, jam esjilid vai caua, jam eti *ago* va narapakau u atimi, jai va naiheuc o Atua ache.

13 Ek aged nitai iji eigki ache ainyak ehelemia eka esvi aijaua um ato upene; ek lep ika ainyak, akupu lep ato aijaua um yetpan an tid *iramia* ;

14 eris ato upene nyak nahaijimia, mika ek itai imyiacitak unyimia ainyak, et idivaig eka lep *itai imyiacitak* unyak aijaua an nadiat u Iesu Natimarid.

15 Kis wat asgeig iran neigki ainyak, kis merit ainyak mika ki uhup um apam ehelemia, mika aki ehcero leh naiheuc aijaua,

16 um ahtaregdei caua, um apan Masetonea, ja par lep ahes Masetonea um apam ehelemia, mika aki ahced nyak aijaua an napan unyak alaig Jutai.

17 Is wat uce inmerit unyak, is eti elpatelpat naktaktai unyak; kis wat merit va nitai iji eigki ainyak, jam eti merit et idivaig nedo o atimi, mika ki asaig, *um ika*, O'o, o'o, ka, Maiya, maiya.

18 Et inivaijec a Atua, et idim ucco, kis eti ohoh an tas ainyak ehelemia.

19 Is eti ohoh an tas a Iesu Kristo Inhal o Atua, kis asuptec-

nai yin ehelemia ainyak, im lep Sailas, im Timodeus, ja is eteuc ache intas inivaijec ehelen.

20 Et idim inivaijec um ipjin intas upyi asaig asega o Atua vai yin, va uhpu imyialipas Atua vai cumtaij.

21 Aien et ago emda cumtaij ehelemia aien irai Kristo, um ikni cumtaij, et Atua aien ;

22 is asjaaicnaig iraija aien, um alupai *caija* nitai asjaaicnaig u Nesgan *Upene* anliinmopja.

23 Im lep ineig, ek arohoai Atua ainyak mika yi ahilek inliinmopok aien, um ato mika, kis eti fi ham Korindus ainyak, va naiheuc unyak vai caua :

24 ektaij eti esjilid aijumtaij irai imyiisjis ninivaijec unyimia, ja ektaij atau imi caua aijumtaij, mika aki imyiacitak aijaua : eka amen aktit aijaua va nimityiisjis nini-vaijec *unyimia*.

NUARIN-TAS ALUPAS 2.

1 KIS ika ainyak anliinmopok inki eti lep ham ehelemia um ohocred.

2 El eka taigtaig aijaua vai *intas* unyak, ek mun imyiacitak di ainyak? natimi ineig marom, et taigtaig aien vai *intas* unyak.

3 Kis aged intas ineigki ehelemia ainyak, vai ki jim ohocred ainyak an napam unyak vai ra sji eig eris idim ika ki imyiacitak ra; ek asgeig iramia asega ainyak, nika-vaig, eka *imyiacitak* aijaua asega va nimityiacitak unyak.

4 Kis wat aged imi caua ainyak, is taigtaig um ohocred alupas inliinmopok ainyak, is ahinag nidi intak; *kis* eti *aged ainyak* mika aki ohocred aijaua, jam mika aki ato naiheuc esjilid unyak vai caua.

5 El is atupun nohocred tah, is eti ago ohocred nyak ache aien, jam lep nahaijimia; vai ki jim ated caua asega ainyak.

6 Is upene neruvaig ineigki imi natimi iyehki, *eris ati imi yin* atimi is ahinag.

7 Va nitai ineigki akumu jim lep aru nedo has *o un* aijaua, jam ago eropse *inliinmopon*, vai yi jim auahas yin nohocred alupas *o un*.

8 Im lep ineig, ek ugni caua ainyak, mika aki lep aiheuc vai yin inivaijec aijaua.

9 Va nitai ineigki kis aged ainyak, mika ki ato nedo unyimia, kit akupu atahaijeg *nyak* aijaua irai iji itai asega, ka o'o.

10 El eka eti aru nedo has *o un* tah aijaua, ekpu *eti lep aru* ainyak: el ekis eti aru nedo has *o un* tah ainyak, kis eti aru nedo has *o un* ainyak vai caua an nuhup u Kristo;

11 vai yi jim imyiahnag caija a Satana: inta ato nefai'a *o un* akaija.

12 IM lep ineig, kis wat yetpan Troas ainyak par *asuptecnaig* intas-upene u Kristo, is asalgei intapanes vai nyak a Natimarid,

13 is ehioehio inliinmopok ainyak, va nitai ineig, nikavaig, kis eti ecet Taitus etoak ainyak; ja kis ude ra ainyak, um ahes eahki um apan Masetonea.

14 Jai naaurineig vai Atua ineig et ika aien ek esjilid ainyak vai Kristo irai iji adiat, um ehvaig nitai auanipin upene an nato yin irai iji uarin asega vai nyak:

15 ek itai auanipin upene u Kristo ainyak imi Atua ehele ilpu atimi iji eigki er imyiatamaig ra, im lep ehele ilpu atimi iji eigki er auahas ra:

16 *ek* itai auanipin eh mas vaig *ainyak* imi ra sji eigki; jam itai auanipin er umumoh vaig imi ra sji ehki. Ja et emda a di par *ago* nitai iji eigki?

17 Ek eti idiva atimi et ahinag ainyak, era asuptecnaig efaifa intas o Atua ara: ja ek asan tas ini-

vaijec ainyak vai *intas alep o* Atua, an nuhup u Atua, irai Kristo.

NUARIN-TAS ALUPAS 3.

EK idim eti lep atupun ainyak par imyiahpas nyak; et lep eti upene vai nyak inleucsevaig itasvitai imyiahpas *nyak* imi caua, et idivaig tak atimi, ka inleucsevaig *itasvitai* imyiahpas *nyak* unyinia.

2 Eka itasvitai unyak aijaua, eris aged anliinmopok, era ato atimi asega um esvi:

3 er idim ehvaig upene caua et idivaig nitasvitai u Kristo va nauritai unyak, eris eti aged an wai apig, ja an Nesgai Atua umoh; un eti *aged* an hat, ja anliinmopomia updak.

4 Et eteuc ehelek nimyiisjis ninivaijec ineig vai Atua irai Kristo:

5 ek eti tup ispuk emda ainyak par aktaktai tahi nitai; ja ek emda ainyak vai Atua;

6 aien aigki is ati nyak aien, mika ki aheca emda ainyak an tas-etipup mat; *ek* eti *aheca* u *intas ache ainyak*, jai nesgan: et atgei *caija* intas, ja et imyiatumumoh *caija* nesgan.

7 El is esjilid nauritai iyehki eris emesmas vaig, eris aged um ati nugnyan an hat, is ehka va nupu Isreel naespanvaig nesganimitai Moses va nememina iran; ja is um lep tup ti ehpan *nememina* iyehki;

8 etpu idim esjilid acen nauritai u Nesgan *Upene*.

9 El is esjilid nauritai ineig is asuptecnaig nimitan nedo has, el et idim esjilid acen nauritai ineig et ika et atoh nedo *o atimi*.

10 Is esjilid *nauritai* iyehki, ja is eti lep esjilid va nupene u nauritai ineig et esjilid acen.

11 El is esjilid *nauritai* iyehki is tup ti ehpan, el et lep esjilid acen *nauritai* ineig et amen.

12 Ek idim asgeig irai itai iji eigki ainyak, va nitai ineigki ek tas emda ainyak :

13 um eti idivai Moses, is adahpoi nesganimtan aien, mika eri eti ecetai nehni o nitai iyehki a nupu Isreel, is tup ti ehpan :

14 ja is ipjin inliinmopura ara : et lep amen nitai adahpoi iyehki ira ra, um imyihum pam an naopan ineig, era wat esvi ara an tas-etipup itu ; jam eti ato ara, nikavaig, eris atipagki vai Kristo.

15 Ja eh wat esvi *intas* o Moses an naopan ineig, et amen nitai adahpoi anliinmopura :

16 ja uhu wit adumoij pan ehele Natimarid, uhpu atipagki nitai adahpoi iyehki.

17 Et esgan iyehki a Natimarid : er amen upene an *nuarin* ineig, *et amen* iran a Nesgai Natimarid.

18 Inta almoi natimi alupas u Natimarid akaija asega an nitai nau-nau, an nesganimtan er eti adahpoi, inta lep idivaig nalmun akaija, um yetpan an naunau vai Nesgai Natimarid.

NUARIN-TAS ALUPAS 4.

1 VA nitai ineigki an neteuc unyak an nauritai ineig, ek eti auatialidi ainyak va naiheuc o Atua vai nyak ;

2 ja kis ude nedo ehcamai vaig ainyak er adenaig, um eti ago efaifa, um eti asuptecnaig efaifa intas o Atua ; ja ek asuptecnaig intas ini-vaijiec ainyak, um ehvai nyak ehele atimi asega, um ahidan liinmopura an nuhup u Atua.

3 El eh adenaig intas-upene unyak, er adenaig vai ra er auahas ra :

4 et ago aupat inliinmopoi ra sji eigki a atua an nobohtan ineigki, era imyiisjis nahcil ara, vai yi jim cespan ra najjoran lah an tas-upene esjilid u Kristo, et almui Atua aien.

5 Ek eti asuptecnaig nyak ainyak, jai Iesu Kristo Natimarid ; im lep nyak naheca unyimia vaig vai Iesu.

6 Atua ineig is ika aien yi cespan naupat najjoran lah, um lep ika aien yi cespan inliinmopok najjoran lah, mika ki lah ainyak, um ato natimi alupas o Atua, an nesganimtai Iesu Kristo.

7 JA ek apos nitai upene ineig ainyak an nijjinitai obohtan, mika yi ahes ehele Atua nemda esjilid, jam eti ahes ehelek.

8 Ek ohocred ainyak an niji itai asega, jam eti auatialidi ; et ehio-ehio inliinmopok ainyak, jam eti agaigai lelek ;

9 er atmas vai nyak, ja er eti ude nyak ; um ahcai nyak, jam eti ecjipidai nyak ;

10 ek apos inmas vai Iesu Natimarid an nohuk ainyak irai iji adiat, mika eri ehvaig numoh u Iesu an nohuk ;

11 ek umoh ainyak, ja er ati nyak mika ki mas ainyak vai Iesu irai iji adiat, mika eri ehvaig numoh u Iesu an nohuk auatialidi.

12 Et idim ucco, et auritai irak inmas, ja *et auritai* irania numoh.

13 Et eteuc ehelek nesgan niniyiisjis ninivaijiec, et idivaig eris aged, *um ika*, “Kis imyiisjis ninivaijiec ainyak, va nitai ineigki kis tas ainyak ;” ek lep imyiisjis ninivaijiec ainyak, va nitai ineigki ek tas ainyak :

14 ek ato ainyak mika, aien is imyinusjai Iesu Natimarid aien, etpu lep imyinusjai nyak aien vai Iesu, um ati *nyak*, im lep caua.

15 *Et eteuc* niji itai asega vai caua, mika eri naaurineig emda vai Atua atimi et ahinag, um imyah-pas yin va naiheuc esjilid o *un vai ra*.

16 Va nitai ineigki ek eti aua-

tialidi ainyak; et wat areci nohuk ainyak, jam emda inliinmopok irai iji adiat.

17 Et haklin nohocred uja um ipjidiipjid, jam atupun nimyiacitak alupas uja, um esjilid acen, inyi ti lep ti;

18 inta wat eti almoi nitai iji eigki akaija er ecetai, ja nitai iji eigki er eti ecetai: inyi ti amen nitai iji eigki er ecetai; ja etpu amen irai iji mesese nitai iji eigki er eti ecetai.

NUARIN-TAS ALUPAS 5.

1 INTA ato akaija, nikavaig, el eh alcapdicra niimwudig *ineigki*, nikavaig, neom uja an nobohtan, et eteuc neom uja ineig *is alcei* a Atua, neom eris eti alcei irai ikma *atimi*, etpu lep amen an nohatag irai iji mesese.

2 Inta ahlaig isjum akaija an neom ineigki, um merit emda, mika eri aso caija an neom uja iyehki et ahes an nohatag:

3 el uhu wit ecet caija, inti eti tup atga akaija, jam aso caija.

4 Inta ahlaig isjum akaija um ohocred an niimwudig ineigki: ja inta eti merit akaija, nikavaig, uhpu iknipagki caija, jam aso caija, va etpu atleg nitai inyi mas nitai umoh iran.

5 Aien is ago upene caija aien va nitai ineigki, et Atua aien; is lep alupai caija Nesgan *Upene* aien, mika yi itai asjaaicnaig.

6 Va nitai ineigki inta emda akaija irai iji adiat, inta ato akaija, nikavaig, inta wat amen irai ohuja akaija, inta itac acen vai Natimarid akaija:

7 inta atga akaija va nimyisjis ninivajec *uja*, jam eti ecetai:

8 inta emda akaija, um merit alupas natceijaigvaig nohuja, um amen ehele Natimarid.

9 Va nitai ineigki inta auritai akaija, mika yi upene inliinmopon

vai caija, kit inti amen *irai ohuja* akaija, ka inti eti amen.

10 Eris idim ika intupu ehcoh-os pan akaija asega an nuhup u dorona o Kristo, mika eri leucose neruvaig atimi asega va nitai iji eigki *eris ago* irai ohura *ara*, et idivaig nedo ura, kit is upene, ka is has.

11 EK ato nimitai Natimarid ainyak, va nitai ineigki ek ated atimi ainyak; ja et ato nyak a Atua; im lep ineig, ek ika ainyak eka lep ato nyak aijaua anliinmopomia.

12 Ek eti lep tas upene vai nyak ainyak ehelema, ja ek alupai caua natupun intas emda vai nyak ainyak, mika aki emda aijaua par *tas* ehele ra sji eigki, era tas emda ara an nuhup u atimi, jam eti ini-vaijec.

13 El ek ahnag ainyak, *ek ahnag* vai Atua *ainyak*: ja el et eteuc lelek ainyak, *et eteuc lelek* vai caua.

14 Et idim ohrai nyak naiheuc o Kristo; ek ika ainyak, el is mas natimi is ethi va atimi asega, eris ememas ara asega:

15 is mas aien va atimi asega, mika eri jim lep umumoh vai ra ache a ilpu atimi umumoh, jam *umumoh* vai yin is mas aien vai ra, jam lep nusjai.

16 Va nitai ineigki ek lep eti ato tah natimi ainyak va niji itai an nobohtan: maiya, el ekis ato Kristo ainyak an niji itai an nobohtan, ek eti lep ato *yin* ainyak.

17 Va nitai ineigki, el *et amen* ehele Kristo tah natimi, et atimi mat aien: eh mun ti pan itac niji itai itu; et mun mat niji itai asega.

18 Et ahes ehele Atua niji itai asega, et upene inliinmopon aien vai caija vai Iesu Kristo, um ikui cama mika ecri asuptecnaig nauritai ineig aijama yi upene inliinmopon aien *va atimi* vaig;

19 *nikavaig*, is asan neigpa an noboltan a Atua irai Kristo, um ika inyi ti aru nedo has o atimi; um ikni cana mika ceri asupteanaig intas ineig aijama yi upene inliinmopon aien *va atimi* vaig.

20 Ecra idim ilpu aheca u Kristo aijama, et idivaig et ugni caua a Atua irama: ecra isijipicmoig Kristo aijama, um ugni caua mika yi eropse inliinmopomia aijaua vai Atua.

21 Aien aigki is eti ato nedo has aien, is ati yin a Atua mika yi itai ahlap aien va nedo has uja, mika eri ika et atoh nedo uja, an nuhup u Atua, vai yin.

NUARIN-TAS ALUPAS 6.

1 IM lep ineig, ek ated caua ainyak, natimi ehauritai *ehelen*, mika aki jim leh has naiheuc o Atua aijaua;

2 (Et ika aien, “Kis atahaijeg euc ainyak an naopan upene, kis lep atau imi euc ainyak an nadiat inyiatamaig *euc*.” et idim *eteuc* naopan upene an naopan ineig; um *eteuc* nadiat inyiatamaig *atimi* an naopan ineig.)

3 ek eti ago tah nedo auahas inliinmopon tali natimi ainyak, va eri jim asan tas has va nauritai *unyak*:

4 ja ek ago nedo er imyiahpas nyak vaig ainyak irai iji itai asega, et idivaig naheca u Atua, an nedo eti auatiemda alupas, *im* niji ohocred *unyak*, *im* niji ilhki natimi *unyak*, *im* niji erekinman *irak*,

5 *im* niji aredei *nyak*, *im* niji amen *unyak* irai li eom ipjin, *im* niji amen eheid *unyak*, *im* niji auritai, *im* niji aitgai itai, *im* niji isji *nyak* vaig numlaig;

6 *im* nedo upene, *im* nato itai, *im* nedo eropse, *im* nedo aiheuc *va atimi*, *im* niji itai *tup ahtai* u Nesgan Upene, *im* naiyu u inliinmopok et eti efaifa,

7 *im* intas inivaijeg, *im* nemda u

Atua, va nij va atimi an nedo atoh an matak im inmouk,

8 *im* nimyiahpas *nyak*, im namecel *vai nyak*, *im* intas has *vai nyak*, *im* intas upene: um idivaig natimi efaifa, jam inivaijeg;

9 um idivaig natimi er eti ato yin, jam ato upene *nyak*; um idivaig natimi ika yi mas, ja ek idim umoh ainyak; um idivaig natimi er aredei yin, jam eti auahas *nyak*;

10 um idivaig natimi ohocred, ja ek cediaig ainyak irai iji adiat; um idivaig nihki natimi, ja era ikni itai atimi et ahinag *vai nyak*; um idivaig natimi eti ohuun itai, ja ek ohuun niji itai asega ainyak.

11 AK nupu Korindus, ek asalgei nippjineucsek ainyak *vai caua*, *um lep* ahidaig alupas inliinmopok *vai caua*:

12 et eti haklin naiyu u inliinmopok ainyak *vai caua*, ja et haklin naiyu u inliinmopomia aijaua *vai nyak*.

13 ek tas ehelemia ainyak et idivai ilpu hal *unyak*, etmu lep uece nedo unyimia aijaua *vai nyak*, um ahidaig alupas inliinmopomia *vai nyak*.

14 Akumu jim ehramen ehele ilpu atimi imyiisjis nahcil aijaua, *namen* eti apapa *neigki*: et eche nedo upene imi nedo has; um lep eche inlah im naupat;

15 et eche inliinmopoi Kristo, jam lep eche inliinmopoi Bilyal; et lep ehka va natimi imyiisjis ninivaijeg im natimi imyiisjis nahcil nasipiai itai vaig.

16 Er lep eti ikni ilpu atmas an neom ahlap o Atua; eka eom ahlap o Atua umoh aijaua, et idivaig is asaig a Atua, *um ika*, “Ekpu amen ehele ra ainyak, um ahced jipe *ra*; ekpu Atua ura ainyak, erupu ilpu atimi *unyak ara*.”

17 Va nitai ineigki, et ika a Natimarid, “Akumu ude ra aijaua, um echim amen, um jim ubli pan tah nitai has, ekpu leh caua ainyak;”

18 et ika a Natimarid ineig et

emda alupas aien, “Ekpu Etmamia ainyak, akupu lep ilpu halav atamaig im ilpu halav atahaig unyak aijaua.”

NUARIN-TAS ALUPAS 7.

1 AK ilpu etoak, et amen eheleija intas upyi asaig iji eigki; va nitai ineigki intumu yiri caija akaija va nedo has asega u nohuja im lep nesgaija, um imtitaig Atua, um ago nedo upene asega.

2 AKUMU leh nyak aijaua; kis idim eti ago nedo has vaig tah natimi ainyak, *um* eti auahas inliinmopon tah, *um* eti efaifa vaig tah um leh tah nitai o un.

3 Ek eti asan *tas ineigki* ainyak par ated *caua*: kis upyi asaig ainyak mika, eka amen anliinmopok aijaua, mika ki mas ainyak um lep umoh *iramia*.

4 Ek tas emda ehelemia ainyak, *um lep* imyiahpas emda *caua*: et eropse alupas inliinmopok ainyak, *um lep* esjilid nimyiacitak unyak an nohocred asega unyak.

5 Ek wat yetpam Masetonea ainyak, is eti eropse nohuk ainyak va nohocred unyak; eris arahed *irak* um abli *nyak*; eris ehtauo imi nohuk, is lep imtitaig inliinmopok ainyak.

6 Ja is ago eropse nyak va napam u Taitus a Atua ineig, et ago eropse ilpu atimi upoupo *inliinmopura* aien;

7 jai *kis* eti *eropse ainyak* va napam o un ache, jai va nedo unyimia, nikavaig, akis ago eropse yin aijaua, is wat asuptecnaig ehelek aien inmerit alupas unyimia, *im* intaig unyimia, *im* naiheuc alupas unyimia vai nyak; va nitai ineigki kis lep imyiacitak alupas ainyak.

8 Kis taig ainyak va nitai ineig, nikavaig, is ohocred inliinmopomia aijaua va nitasvitai *unyak*; ja ek

idim eti taig ainyak an naopan ineig: ek ato ainyak mika, is idim ohocred inliinmopomia aijaua an naopan iyehki va nitasvitai iyehki, jam ipjidiipjid.

9 Ek eti imyiacitak ainyak va nohocred u inliinmopomia, jai va nadumoijsaig unyimia anliinmopomia an nohocred unyimia: is eteuc nohocred u inliinmopomia ineig is ahes ehele Atua, vai ki jim auahas *caua* ainyak an tah nitai.

10 Era adumoijs anliinmopura atimi, um leh nitai umoh iran, va nohocred u inliinmopura ineig et ahes ehele Atua, er eti lep taig vaig: ja et atupun inmas nohocred u inliinmopura ineig et ahes an nobohtan.

11 Eka ato aijaua, nikavaig, is wat eteuc nohocred u inliinmopomia ineig is ahes ehele Atua, is esjilid naktaktai unyimia, im intas asuptecnaig nedo *unyimia*, im nedemda, im nimitaig, im inmerit alupas, im nemda, im naruvaig! Akis asuptecnaig asega aijaua mika, eka upene aijaua an nitai ineigki.

12 Va nitai ineigki, kis wat aged *nitassvitai* imi *caua* ainyak, *kis* eti *aged ainyak* vai yin *ache* is ago nedo has aien, ka vai yin *ache* eris ago nedo has vai yin; jai va nitai ineigki, mika aki ato aijaua naktaktai unyak vai *caua* an nuhup u Atua.

13 Va nitai ineigki kis eropse ainyak va neropse unyimia: maiya, is lep esjilid acen nimyiacitak unyak va nimyiacitak u Taitus, akis ahidaig emda inliinmopon aijaua asega.

14 El ekis asuptecnaig emda *caua* ehelen ainyak vaig tah nitai, ek eti ehcamai ainyak; jai kis idim *tas* inivaijec ehelemia ainyak irai iji itai asega, et idim ucco, et inivaijec nasuptecnaig emda unyak iyehki, *kis asaig ainyak* ehele Taitus.

15 Et wat imyiehva nimyiaiji intas o un unyimia asega aien, nikavaig, akis imtitaig aijaua um

eucjuejacaij, jam leh yin, et aiyu alupas inliinmopon aien vai caua.

16 Ek asgeig iramia ainyak irai iji itai asega, va nitai ineigki ek inmyiacitak ainyak.

NUARIN-TAS ALUPAS 8.

AK ilpu etoak, ek asuptecnaig ehelemia ainyak naiheuc o Atua eris alupai nup urai ekalasia Masetonea:

2 is esjilid nohoered ura ara, ja eris idim cediaig ara; um esjilid nihki natimi ura irai itai, ja eris ago nedo aihenc esjilid ara.

3 Ek asaig ainyak mika eris tup ispara *ahta* ara, is idivaig namen u niji itai *ura*, maiya, um esjilid ira amen u niji itai *ura*:

4 eris ugni emda nyak ara, mika ki leh nitai tup ahtai *ura* ainyak, um atau *ra* an naheca *ura* imi ilpu atimi upene.

5 *Eris ago nedo ineigki ara*, ja is eti idivaig naktaktai unyak, eris upyi hup ara um alupai Natimarid *ra*, ja *par apitac um alupai* nyak *ra*, et idivaig intas o Atua.

6 Va nitai ineigki kis ugni Taitus ainyak, mika yi ago ehni nedo aihenc ineig aien ehelemia is atupun aien.

7 Eka idim esjilid aijaua irai iji itai asega, *nikavaig*, nimyisjis nini-vaijec, im nasuptecnaig intas, im nato itai, im naktaktai asega, im naiyu u inliinmopomia vai nyak, etmu idim ucco, akumu lep esjilid aijaua an naiheuc ineigki.

8 Ek eti tas alep ainyak, ja ek tas ainyak va nauroauro oi tak atimi, va uhpu ato, kit et inivaijec naiheuc unymia, ka o'o.

9 Eka idim ato naiheuc o Iesu Kristo Natimarid uja aijaua, *nikavaig*, is ikni itai aien, ja is ihki natimi aien vai caua, mika aki ikni itai aijaua va nihki natimi o un.

10 Ek asuptecnaig naktaktai u-

nyak ainyak va nitai ineigki: et upene nedo ineigki vai caua, akis atupun aijaua um ago, um lep ika aki ago itai, jam lep ti pan itac inmesese et ethi:

11 va nitai ineigki akumu ago ehni itai aijaua; *akis* idim auroauro *aijaua* um merit, etmu idim ucco, *akumu* ago ehni itai *aijaua* yi aseasega iramia.

12 El et eti esjum inliinmopon tah natimi, um taam ase iran, el et eti apapa pan irai iji itai o *un tah*, er ika et idim upene.

13 *Ek eti merit ainyak* mika eri tup amen nahaiji atimi, ja aki ahelwei itai ache aijaua:

14 jam ika yi apapa, *mika aki alupai ra* nahaiji padiaig alupas unymia *aijaua* va nihki natimi ura an naopan ineig, va *erupu* lep *alupai caua* nahaiji padiaig alupas *ura ara an tak aopan* va nihki natimi unymia; mika yi idim apapa:

15 et idivaig eris aged, *um ika*, "Aien *is asjapicnaig* alupas aien, is eti eled tah nitai imi yin; ja aien *is asjapicnaig* haklin aien, is eti ihki natimi aien."

16 Jai naaurineig vai Atua is alupai Taitus aien inliinmopon ineig, is aktaktai alupas caua iran aien.

17 Is idim atahaijeg intas ugni *yin unyak* aien; ja is auroauro aien, um ispun ham ehelemia.

18 Ek lep abrai etoak ineig ainyak, er inmyiahpas yin an tas-upene irai ekalasia asega, mika yi ahced yin aien;

19 im lep ineig, eris lep aniv yin a nup urai ekalasia, mika yi ahced nyak aien, an *naposvaig* naiheuc ineig ek ahaig ainyak, va uhpu inmyiahpas Natimarid, um lep *asuptecnaig* inmerit u inliinmopomia:

20 kis aminjinaig nyak ainyak va nitai ineig, vai yi jim asan tas has vai nyak tah natimi, va nitai tup ahtai alupas iji eigki ek ahaig ainyak:

21 ek ago nedo atoh ainyak, jam eti an nuhup u Natimarid ache, jam lep an nuhup u atimi.

22 Kis lep abraï etoak ineig ainyak yi ahced rau, kis ehcelpat ato naktaktai o un ainyak irai iji itai is ahinag; ja et lep aktaktai alupas aien an naopan ineig va nimyiisjis ninivaijec emda o un vai caua.

23 El *eh ahodai* Taitus, *ek ika ainyak*, Et apah unyak aien, im natimi atau imi nyak vai caua: el *eh ahodai* ohwat etoak, *ek ika ainyak*, Erau apostolo irai ekalasia arau, um itai imyiahpas u Kristo.

24 Va nitai ineigki akumu ehvaig ehele ehtaij aijaua, im lep an nuhup u nup urai ekalasia, mika et inivaijec naiheuc unyimia, im lep nasuptecnaig emda caua unyak.

NUARIN-TAS ALUPAS 9.

1 ERIS idim eti ika ki aged intas ehelemia ainyak, va naiheuc iyehki vai ilpu atimi upene:

2 ek idim ato inmerit emda u inliinmopomia ainyak, ek lep asuptecnaig emda caua vaig ainyak ehele nupu Masetonea, um ika, eris mun asjapicnaig ehni itai a nupu Akea, ja pah ti pan itac innesese et ethi; era lep emda natimi et ahinag va nemda unyimia.

3 Jai kis abraïg pan *ehelemia* ehtaij etoak erahki ainyak, vai yi jim ahcil nasuptecnaig emda caua unyak an nitai ineig; mika aki upyi asjapicnaig ehni itai aijaua, et idi-vaig *intas iyehki* kis asaig ainyak:

4 el era ahced nyak *tah* nupu Masetonea, um ato mika, eka mun eti asjapicnaig ehni itai aijaua, ekpu ehcamai ainyak, (jam eti ika ainyak aijaua,) va nasuptecnaig emda *caua* iyehki.

5 Va nitai ineigki kis ika ainyak ki ugni ehtaij etoak erahki, mika ehtiji upyi hup ahtaij um ham

ehelemia, um asjapicnaig ehni naiheuc unyimia, eris upyi tas vaig, mika yi eteuc et idivaig naiheuc inivaijec *unyimia*, um eti idivaig *nika* et has *irak* itai.

6 Im lep ineig, aien et ahoaig tintin itai aien, etpu asjapicnaig tintin itai aien; ja aien et ahoaig alupas itai aien, etpu asjapicnaig alupas itai aien.

7 *Erumu ahtai itai* atimi asega et idivaig naktaktai u inliinmopura; jam jim meteg, um jim imyiaaig itai: et aiyu inliinmopoi Atua vai natimi ineig et ahta upene aien.

8 Et lep emda a Atua par alupai caua niji itai tup ahtai asega; va akupu emda aijaua u nauritai upene asega, et wit ahinag niji itai asega unyimia irai iji adiat:

9 (et idivaig eris aged, *um ika*, "Is ahai itai *a natimi upene*; is alupai ilpu ihki atimi itai aien: et amen nedo aiheuc o un irai iji mesese."

10 Im lep ineig, aien et alupai natimi ahapol nupsi itai aien, um *alaa atimi* nitai caig incara, etmu alupai caua nupsi itai inyi ahinag aien, um ika yi ahinag nohoai itai an nedo aiheuc unyimia:)

11 aku wit ikni niji itai asega aijaua, va akupu ago nedo aiheuc; eh naaurineig vai Atua vaig vai nyak.

12 Et upene nahaigvaig naiheuc ineigki imi ilpu ihki atimi irai ilpu atimi upene; et lep esjilid par ago naaurineig et ahinag vai Atua;

13 era wat leh naiheuc ineigki ara, era imyiahpas Atua ara, va natahaijeg intas-upene u Kristo ineig unyimia er asaig, im lep naiheuc esjilid *unyimia* imi ra, im lep imi atimi asega;

14 era lep ugni *Atua* vai caua ara, um aiyu alupas inliinmopura vai caua, va naiheuc esjilid o Atua vai caua.

15 Naaurineig vai Atua va nitai tup alitai o un et ehka nasuptecnaig-vaig.

NUARIN-TAS ALUPAS 10.

EK ated caua ainyak Paulo, va nedo eigpa im nedo erop u Kristo, ek ihki natimi ainyak iramia an nohuk, ja ek wat amen ainyak an taka uarin, ek tas emda ehelema ainyak :

2 ek ugni *caua* ainyak, vai ki jim tas emda ainyak an nuhup unyimia an nemda ineig, ek ika ainyak ki tas emda vaig ehele ra sji eigki, era tas vai cama ara, um ika, eera ago nedo an nobohtan aijama.

3 Eera idim umumoh an nobohtan aijama, ja eera eti ago nedoa aijama et idivaig nedo an nobohtan :

4 (et eti ahes an nobohtan nij va atimi unyima, ja et emda vai Atua, va uhpu alcapdicraig niji eom ipjin:)

5 eera alcapdicraigse naktaktai u *atimi* im inliinmopura ijinies asega aijama, et atapanes inlah u Atua, um avaktit aktaktai asega *ura*, va uhpu imyiaiji intas o Kristo ;

6 ecrupu lep aitgaig aijama, mika ecri aru nedo imyipalea asega, aku wit imyiaiji elni aijaua.

7 Eka idim almoi iji itai aijaua et idivaig er ecetai. El et ika tah natimi et *aheca* u Kristo aien, etmu lep ispun aktaktai nitai ineigki aien, nikavaig, el *et aheca* u Kristo aien, et idim ucco, ek lep *aheca* u Kristo ainyak.

8 El ek tas alupas ainyak um esjilid va nemda ineig unyak, is alupai nyak a Natimarid, mika ki ahidaig emda *caua* ainyak, jam eti auahas caua, el ek eti ehcamai ainyak :

9 ek *asan tas ineigki ainyak*, va aki jim ika aijaua, ek aged itasvitai ainyak mika aki imtitaig vaig aijaua :

10 et ika *tah*, Et esjilid niji itasvitai o un um emda ; ja et auatalidi nohun par ecetai, um takitai intas o un :

11 etmu ato a natimi iyelki, nika-vaig, et tup ethi ache intas *unyak* irai itasvitai, an namen unyak an taka uarin, im nedo *unyak* an napam unyak *ehelema*.

12 Ek imtitaig ainyak nati nyak vaig *ehele ra*, um ika, ek idivai ra sji eigki ainyak era imyialhpas ra ara: ja eru wit isparah tas vai ra ara, um ika, era esjilid a ilpu haiji ra irai ilpu haiji ra, era eti arapakau ara.

13 Ekpu eti tas alupas ainyak va nuarin iji eigki eris eti ikni *imi nyak*, ja va nuarin iji eigki ache, is ikni imi nyak a Atua, et lep eteuc nuarin ineig et yetpam ehelema.

14 Ek wit apam ehelema ainyak, ek eti ude nuarin ineig ainyak eris ati imi nyak ; ja kis upyi hup ainyak um ham ehelema, um *asup-tecnaig* intas-upene u Kristo :

15 ek eti tas alupas ainyak irai ugnya auritai oi tak atimi, an nuarin ineig eris eti ati *imi nyak*; ja ek ika ainyak, et wit esjilid nimyiisjis ninivajec unyimia, ekpu esjilid acen ainyak vai caua an nuarin ineig eris ati imi nyak,

16 um asup-tecnaig intas-upene irai taka pece eabki, um eti tas alupas irai ugnya auritai oi tak atimi, is upyi hup aien um ago.

17 Ja “aien et tas alupas aien, etmu tas alupas irai Ihova aien.”

18 Et eti esjilid a natimi ineig et ispun imyialhpas yin aien, ja *et esjilid* a natimi ineig et imyialhpas yin a Natimarid.

NUARIN-TAS ALUPAS 11.

1 EK merit alupas ainyak mika yi eropse tintin inliinmopomia aijaua vai nyak, va nedo ahnag *unyak* : ja etmu idim eropse inliinmopomia aijaua vai nyak.

2 Ek oporei vai caua ainyak an noporei u Atua: kis aniv caua ai-

nyak imi natamaig et ethi, mika ki ikni *caua* ehele Kristo ainyak, et *idivaig* natahaig upene nedo o un.

3 Ja ek imtitaig ainyak vai yi jim auahas inliinmopomia tah, mika aki ude nedo inivaijec *unyimia* vai Kristo, et idivaig is imyiah-nag Iva a Nimyiv an nedo ahcil o un.

4 El et asuptecnai Iesu et eche natimi ineig et ham, ecris eti asuptecnai yin aijama, el eka leh Nesgan *Upene* et eche aijaua, akis eti leh yin aijaua, ka intas-upene et eche, akis eti eteuc iran aijaua, el et upene vai *caua* mika yi eropse inliinmopomia aijaua *vai yin*.

5 Ek ika ainyak, kis eti upoupo ainyak irai ilpu apostolo iji eig era esjilid ara.

6 El et eti esjilid intas unyak, ja et *esjilid* nato itai unyak; eka ato upene nyak aijaua irai iji itai asega, an nuhup u atimi asega:

7 kis idim eti ago nedo has ainyak, kis ago nedo upoupo ainyak, mika aki esjilid aijaua, kis wat asuptecnaig intas-upene u Atua ehelemia ainyak, um eti ahilek nimitan.

8 Kis atoraliaik itai irai ekalasia is eche ainyak, um leucse nimitan *ehele ra*, mika ki aheca unyimia.

9 Kis wat amen ehelemia ainyak um ihki natimi, jam eti ehtipidaig tah: eris wat ahes Masetonea a ilpu etoak um apam, eris alupai *nyak* itai ara an nihki natimi unyak: kis ispuk aminjinai nyak ainyak, va aki jim ohocred aijaua vai nyak vaig tah nitai, ekpu lep aminjinai *nyak* ainyak.

10 Et idim amen ehelek nitai ini-vaijec u Kristo, inyi ti atapanes intas emda ineigki unyak tah natimi irai iji uari pece Akea.

11 Vanhe? va nitai ineig, nika-vaig, ek eti aiheuc vai *caua* ainyak, ka o'o? et idim ato a Atua.

12 Jai nitai ineig ek ago ainyak, ekpu lep ago ainyak, um atapanes

intas has u ra sji eigki, era merit ara intas has vaig; mika eri idivaig nyak ara an nitai iji eigki era tas alupas vaig ara.

13 Era ilpu apostolo ahcil ara sji eigki, *um* ilpu atimi auritai efaifa, era ika ara era apostolo o Kristo.

14 Et eti itai imyiali *nitai ineig*; et lep ika a Satana et agelo lah aien:

15 et eti itai esjilid *nitai ineig*, el era ika a ilpu aheca o un, era ilpu aheca an nedo upene; erupu leh neruvaig ara et idivaig nedo ura.

16 Ek lep asaig ainyak mika, etmu jim ika tah ek atimi ahnag ainyak; ja el eti ucce, akumu leh nyak aijaua, et idivaig natimi ahnag, mika ki tup asan tas alupas ainyak.

17 Ek eti asan tas ineigki ainyak et idivaig nedo o Natimarid, ja et idivaig intas ahnag *unyak* neigki, an nedo emda ineigki an tas alupas.

18 Era tas alupas atimi et ahinag an niji itai an nobohtan, ekpu lep tas alupas ainyak.

19 Et eropse inliinmopomia aijaua, um eti esjum vai ilpu atimi ahnag, eka idim arapakau aijaua.

20 Et eropse inliinmopomia aijaua, el et ika tah natimi aki ilpu aheca o un aijaua, el et atoraliaik *itai unyimia* tah natimi, ka arop *iramia* tah natimi, ka esjilid *iramia* tah natimi, ka ahpoi nesganimitamia tah natimi.

21 Ek tas ainyak va nitai iji eigki er ehcamai vaig, um idivaig natimi auatialidi. Ja el et tas emda tah natimi vaig tah nitai, (ek tas ahnag ainyak,) ek lep idim tas emda ainyak.

22 Era wat tas Hibru ara sji eigki, *ek idim* lep *ucce* ainyak: era wat upu Isreel ara, *ek idim* lep *ucce* ainyak: era wat ilpu mapoi Ebrahim ara, *ek idim* lep *ucce* ainyak:

23 era wat ilpu aheca u Kristo

ara, (ek tas ainyak et idivaig natimi ahnag,) ek esjilid *ira ra* ainyak; is ahinag nauritai *unyak*, eris ehcahinag acen aredei *nyak*, *um* ehcahinag *amen ainyak* irai li eom ipjin, *kis* ehcahinag mas *ainyak*:

24 eris ehcefaiv aredei *nyak* a nupu Jutai, *um* ehcedirte im nain *ahpoi nyak an naredei nyak ura*:

25 eris ehceseij aredei *nyak* irai auicai, *um* ehcetli asji *nyak* irai hat, *um* ehceseij etgeig yigrei nelcau irak; kis *amen ainyak* an tup ahuahau an nepeig is ethi im nadiat is ethi;

26 *kis* ehcahinag atga ubos *ai-nyak*, *um* ubutpotet u unmas *unyak* vai ofowai, *im lep* vai ilpu atimi atoraliak itai, *im lep* vai nup uran pece *unyak*, *im lep* vai nup urai iji taka pece, *im lep* irai uari-pece, *im lep* irai amasacen, *im lep* an jop, *im lep* vai ilpu etoak efaifa;

27 *kis* ehcahinag auatialidi *ai-nyak*, *um* ohocred, *um* eti umjegse an tah nepeig, *um* ehtelee *nyak*, *um* ahvig wai, *um* ehcahinag isji *nyak* numlaig, *um* eyueyu, *um* ti nitai aso *nyak*.

28 Et eteuc nitai iji eigki, *im lep* ineig, et eti omot ehelek irai iji adiat naminjinaigvaig nup urai ekalasia asega:

29 el et auatialidi tah, ek lep auatialidi ainyak; el et epihtau tah, ek lep ohocred ainyak.

30 El et idim ika ki tas alupas ainyak, ekpu tas alupas ainyak vai iji auatialidi *unyak*.

31 Atua ineig, et Etmai Iesu Kristo Natimarid uja aien, er imyahpas yin irai iji mesese, et idim ato aien mika, ek eti asan tas ahcil ainyak.

32 Natimi alupas an nuarin-pece Tamaskus, is ati yin a Aretas natimarid, is ikni ilpu eucsupo o un aien eahki, mika eri atpaijinaig *nyak*, *um* arop irak.

33 Ja eris ati pan itac *nyak* an

mun-neom, *um* aiyihise *nyak* an yipin nathatahau an nefeheat; kis aha va nikman ainyak.

NUARIN-TAS ALUPAS 12.

1 ET idim eti upene vai *nyak* intas alupas vaig. Ja ekpu yetpan ainyak u niji itai eris almoi, im niji itai is ehcolhos a Natimarid iran.

2 Ek ato natimi et ethi ehele Kristo ainyak, eris aiyihijai yin an nohatag ijinies acen, ja pah ti pan itac inmesese is fortiin, (ek eti ato ainyak, kit *is amen* an nohun *aien*, ka *is* eti *amen* an nohun *aien*; et ato a Atua.)

3 Ek ato natimi iyehki ainyak, (ek eti ato ainyak, kit *is amen* an nohun *aien*, ka *is* eti *amen* an nohun *aien*; et ato a Atua;)

4 eris aiyihijai yin a Paratais, is atahajeg niji tas aien et ehka nasuptecnaigvaig, et itaup vaig tah nasaigvaig.

5 Ekpu tas alupas ainyak vai natimi iyehki: jai inki eti tas alupas vai *nyak* ainyak, vai iji auatialidi *unyak* ache.

6 El ek merit ainyak intas alupas vaig, inki eti atimi ahnag ainyak; ekpu asan tas inivaijec ainyak: jai inki eti ago nedo ineigki ainyak, vai yi jim esjilid naktaktai o un tah natimi irai itai iji eigki et ecetai ehelek aien, *um* atahajeg vaig irak.

7 Im lep ineig, vai yi jim ijinies inliinmopok ainyak va niji itai ehvaig is ahinag, eris ati ehelek nitai ahcai nohuk, nagelo o Satana, par ahpoi *nyak*, vai yi jim ijinies inliinmopok ainyak.

8 Kis ehceseij ugni Natimarid ainyak va *nohocred* ineigki, mika yi ude *nyak*.

9 Ja is ika ehelek aien, Et alupas naiheuc *unyak* vai euc: et esjilid nemda *unyak* an nauatialidi. Va

nitai ineigki ek eti esjum ainyak intas alupas vaig vai iji auatialidi unyak, mika yi amen chelek nemda u Kristo.

10 Ek idim imyiacitak ainyak vai iji auatialidi *unyak*, im niji tas has *vai nyak*, im niji ihki atimi *unyak*, im niji edemda *vai nyak*, im niji ohocred *unyak*, vai Kristo: ek wat auatialidi ainyak, jam emda.

11 Ek atimi ahnag ainyak vai intas alupas unyak; *ja* is ehka vai nyak intup amenvaig va nedo unyimia: is upene vai caua intas upene vaig vai nyak: ek eti upoupo ainyak irai ilpu apostolo iji eig era esjilid ara, *ja* ek idim takitai ainyak.

12 Eris idim ago niji itai asjaaicnaig u ilpu apostolo an nuhup unyimia, an nedo eti auatiemda asega, *nikavaig*, niji auritai ehka, im niji itai imyiali, im niji auritai esjilid.

13 Akis idim eti tup apapa pan irai upu ekalasia is eche anhe aijaua? nitai ineigki ache, kis eti ehtipidai caua ainyak; akumu jim aktaktai nedo has ineigki unyak aijaua.

14 Ek ika ainyak ki auroauro um ehceseij ham ehelemia; inki eti ehtipidai caua ainyak: ek eti ahilek niji itai unyimia ainyak, *ek ahilek* caua ache *ainyak*: eris idim ika eri eti ikni itai vai ilpu atmil *ura* a ilpu hal *ura*, *ja* eri *ikni itai* vai ilpu hal *ura* a ilpu atmil *ura*.

15 Ek idim eti esjum ainyak naitai itai vaig, um lep nauritaivaig, va nescamia; *ja* et wat alupas naiyu u inliinmopok vai caua, et lep tintin naiyu u inliinmopomia vai nyak.

16 Inyi idim ucco, kis eti ehtipidai caua ainyak: jai kit kis arapakau ainyak, um arop iramia an nefaifa.

17 Kis idim eti leh tah nitai unyimia ainyak vaig tah ehtaij, kis abraig pam ehtaij ehelemia ainyak.

18 Kis ugni Taitus ainyak, kis lep abraig pan *ehelen* etoak iyehki

ainyak. Is idim eti leh tah nitai unyimia a Taitus: is tup ethi ache inliinmopoma aijama, im nedo unyima.

19 Akumu jim lep aktaktai aijaua, mika ki tup ispuk athai intas ehelemia ainyak: ek tas ainyak an nuhup u Atua irai Kristo: *ja ek ago* niji itai asega *ainyak*, mika ki ahidaig emda caua, ak ilpu *etoak* upene.

20 Ek imtitaig ainyak vai ki jim eti ecet caua an napam unyak, yi idivaig inmerit unyak, *ek lep imtitaig ainyak* va aki jim eti ecet nyak aijaua, yi idivaig inmerit unyimia: kit *etpu eteuc iramia* nedo inyiisjis itai, *im* nauatitai, *im* nedemda, *im* nehtauo, *im* intas has, *im* inhos tas, *im* intas ijinies, *im* nedoa:

21 vai ki jim ehcamai ainyak vai Atua unyak an nuhup unyimia, an napam unyak, um lep imyitaig natimi inyi ahinag eris ago nedo has ara, jam eti adumoij anliinmopura va nedo has, im ingaijid, im nacitak, eris ago ara.

NUARIN-TAS ALUPAS 13.

NEHCESEIJ ham unyak ehelemia neigki. “Etpu ipjin intas asega va atimi asuptecnaig inyi ero ka inyi eseij.”

2 Kis upyi asaig *ehelemia* ainyak, um lep asuptecnaig *ehelemia*, et idivaig nehcerø amen unyak ehelemia; ek amen ainyak an taka uarin an naopan ineig, um aged intas imi ra sji eigki, eris upyi hup ara um ago nedo has, im lep imi hal ra asega, mika, *ek lep* ham ainyak, inyi ti eropse nedo unyak *vai ra*:

3 eka idim ahilek nitai asjaaicnaig aijaua mika, et tas irak a Kristo, et eti auatialidi vai caua aien, *ja* et emda imi caua aien.

4 Eris atgei yin an nauincai atgeig va nauatialidi *o un*, *ja* et

umoh aien va nemda u Atua. Ek lep auatialidi ainyak pan iran, ja ekpu umoh ainyak ehelen va nemda u Atua ehelemia.

5 Akumu ahilek inliinmopomia aijaua, kit eka imyiisjis ninivaijec aijaua; akumu ato caua aijaua. Eka idim ato caua aijaua, nikavaig, et amen ehelemia a Iesu Kristo, el eka eti atimi efaifa aijaua.

6 Ja ek ika ainyak aki ato aijaua mika, ek eti atimi efaifa ainyak.

7 Ek ugni Atua ainyak, mika aki jim ago tah nedo has aijaua; *ek* eti *ahilek* naktaktai upene u atimi vai nyak *ainyak*, ja *ek merit ainyak* mika aki ago nedo atoh aijaua, kit ek idivaig natimi efaifa ainyak.

8 Et ehka vai nyak nago tah nitai vaig par auahas intas inivaijec, jam imyiahra intas inivaijec ache.

9 Ek imyiacitak ainyak, ek wit auatialidi ainyak, ja aki emda aijaua: ek lep merit ainyak mika aki upene asega aijaua.

10 Va nitai ineig ek aged intas iji eigki ainyak, an namen unyak an taka uarin, vai ki jim ago nedo ipjin ainyak, an namen unyak ehelemia, et idivaig nemda ineig is alupai nyak a Natimarid, mika ki ahidaig emda *atimi* ainyak, jam eti auahas *ra*.

11 IM lep ineig, ak ilpu etoak, ek aiheuc vai caua ainyak. Akumu upene asega aijaua, etnu eropse inliinmopomia aijaua, *um* tup ethi ache inliinmopomia, *um* amen eigpa; etpu lep amen ehelemia a Atua ineig et aiheuc *va atimi* aien um eigpa.

12 Akumu aiheuc vaig jipe caua aijaua, um aijumnyi upene caua.

13 Era aiheuc vai caua a ilpu atimi upene asega.

14 *Etmu* aiheuc *vai caua* a Iesu Kristo Natimarid; *etmu* aiyu inliinmopoi Atua *vai caua*; *etmu* amen ehelemia asega a Nesgan Upene. Emen.

NITASVITAI O PAULO NAPOSTOLO

IMI

NUPU CALESYA.

NUARIN-TAS ALUPAS 1.

AK nup urai ekalasia an *pece* Calesya, *ek aiheuc* vai caua ainyak Paulo, im lep ilpu etoaija asega era ahced nyak ara;

2 ek apostolo ainyak, eris eti abraig nyak atimi, um eti ati nyak tah natimi; ja is ati nyak a Iesu Kristo, im lep Atua Etman, is imyinusjai yin aien vai inmas *o un*;

3 *Etmu* amen ehelemia naiheuc im neigpa ineig et ahes ehele Atua Etmaiia, im Iesu Kristo Natimarid uja;

4 is ispun ahtai yin aien va nedo has uja, mika yi imyiatamaig caija aien va nedo an nobohtan has ineigki, et idivaig nasaig u Atua Etmaiia:

5 *uhmu* imyiahpas yin irai iji mesese. Emen.

6 EK imyiali ainyak, nikavaig, akis auroauro aijaua um atidjimia iran is imyiacaij caua aien u naiheuc o Kristo, vai intas-upene et eche :

7 Ja et eti eteuc *intas-upene* et eche; ja era imyidohalav caua hal, um merit par auahas intas-upene u Kristo.

8 Ja el ecria asuptecnaig ehelemia intas-upene aijama, ka tah nagelo an nohatag, um eti idivaig intas-upene iyehki ecriis uhup aijama um asuptecnaig ehelemia, etmu erekinman iran aien.

9 Ecriis upyi hup aijama um asan tas ineig *ehelemia*, ek lep idim asaig *ehelemia* ainyak an naopan ineig, *nikavaig*, El et asuptecnaig ehelemia intas-upene et eche tah natimi, um eti idivaig iyehki akis leh aijaua, etmu erekinman iran aien.

10 Ek idim eti ahilek naiheuc o atimi ainyak an naopan ineig, o Atua ache; ek eti lep ahilek nimyiahpas u atimi ainyak; el era imyiahpas nyak natimi um uhup pam, el ek eti aheca u Kristo ainyak.

11 Ek idim asaig ehelemia ainyak, ak ilpu etoak, mika, is eti ahes ehele atimi intas-upene ineig kis asuptecnaig ainyak :

12 kis idim eti leh ehele atimi ainyak, is eti lep esege imtak *tah*; ja is ehvaig *ehelek* a Iesu Kristo.

13 Akis atahaijeg nedo unyak aijaua, an naopan iyehki kis wat apol an nalaigaheni u nupu Jutaia ainyak, nikavaig, kis esjilid an natmas vai nup an nakalasia u Atua ainyak, um auahas ra :

14 kis esjilid ainyak an nalaigaheni u nupu Jutaia irai ilpu ehas unyak is ahinag an pece unyak, kis apol emda ainyak an tas alep u ilpu retpok.

15 Is wat upene irai Atua ineig, is ati nyak aien an naopan iyehki eris pam apos nyak, um ahlaig vai nyak an naiheuc o un,

16 par ehvaig Inhal o un ehelek,

mika ki asuptecnai yin ainyak ehele nup urai iji pece, kis eti ahilek intas iran ehele atimi ainyak :

17 kis eti apan Jerusalem ainyak ehele ra eris upyi hup irak ara um ilpu apostolo; jai kis auroauro ainyak um apan Arebya, um lep adumoij pan Tamaskus.

18 Is wat ti pan itac inmesese is esej, kis apan Jerusalem ainyak mika ki ateghe Pitrus, um amen ehelen ira adiat is fiftiin;

19 jam eti ecet tah irai ilpu apostolo, Jakobus ache etoai Natimariid.

20 Et idim ato a Atua ek eti asan tas ahcil ainyak, an nitai iji eigki ek aged ainyak imi caua.

21 Is wat ti pan itac nitai iji eigki, kis apan ainyak irai uari pece Sirya im Silisia;

22 eris eti ato nesganimtak a nup urai ekalasia an *pece* Jutaia iji ehki, *eris apol* irai Kristo ara :

23 ja eris atahaijeg ache ara, nika-vaig, Aien ahki is atmas vai caija aien itu acen, et asuptecnaig nimyisjis ninivaijeg ineig aien, is auahas aien an naopan iyehki.

24 Eris um imyiahpas Atua vai nyak ara.

NUARIN-TAS ALUPAS 2.

1 IS wat ti pan itac inmesese is fortiin, kis lep apan Jerusalem ainyak, im lep Barnabas, kis lep leh Taitus ehelek ainyak.

2 Kis apan ainyak va nabrai nyak u *Natimarid*, um asuptecnaig ehele ra intas-upene ineig, ek lep asuptecnaig ehele nup urai iji taka pece ainyak; jai kis upyi hup ainyak um asuptecnaig ehele ilpu atimi esjilid, vai yi jim takitai nauritai unyak ineig kis upyi ago, ka ineig ek ago.

3 Ja eris idim eti ika yi leh naperitome iran a Taitus, nupu Kriisi, is ahced nyak aien :

4 va nedo o ilpu etoama efaifa

eris apam ehelema ara, ja ecris eti ato ra aijama, eris asgeig pan irama ara jam efaifa, par almoi namen upene unyima vai Iesu Kristo, mika eri lep atijai nedo ehka irama :

5 ecris idim eti atahaijeg ra aijama an tah naur is ethi; va etpu amen ehelema intas inivaijec an tas-upene.

6 Ara eris esjilid ara, ek eti ato itai vai ra ainyak; et tup ethi ache inliinmopoi Atua va atimi asega: eris eti esege imi nyak tah nitai ara sji eigki eris esjilid ara:

7 ja is eche *nedo u ehtaij*, ehtijis wat almoi ahtaij mika, eris alupai nyak intas-upene imi ilpu atimi eti aperitome, et idivaig *eris alupai Pitrus intas-upene* imi ilpu atimi aperitome;

8 (aien is alupai Pitrus nemda aien mika yi ago nauritai u n-postolo vai ilpu atimi aperitome aien, is lep alupai nyak nemda aien *mika ki esege* imi nup urai iji taka pece *ainyak*;))

9 ehtijis wat almoi a Jakobus, im Sifas, im Joanes, naiheuc ineig eris alupai nyak, ehtijis idivai aboutau ahtaij, ehtijis adai matai ehtaij ahtaij vai nyak im Barnabas, um tup ethi ache aijama; mika *ecru apan* ehele nup urai iji taka pece aijumrau, jam *apan* ahtaij ehele ilpu atimi aperitome.

10 Ja *ehtijis* ika *ahtaij* *ecru* imyiehva ilpu ihki atimi aijumrau; kis idim merit ainyak par ago nedo ineigki.

11 Ja is wat apan Anteok a Pitrus, kis imyiahcen nesganintan ainyak, va nedo maumau o un.

12 Is upyi hup aien um hag ehele nup urai taka pece, ja eris par ahes ehele Jakobus hal: eris wat ham ara, is ude *nupu urai taka pece* aien, um eti apan *ehele ra*, is imtitai ilpu atimi aperitome aien.

13 Eris lep apitac yin a nupu

Jutaia asega eahki um efaifa; eris lep imyiahnag Barnabas ara an nedo efaifa ura.

14 Jai kis wat almoi ainyak mika, eris ago nedo acalacal ara, um eti idiva nedo inivaijec an tas-upene, kis ika ehele Pitrus ainyak an nuhup *ura* asega, El et upu Jutaia aiek, jam ago nedo o nup urai taka pece, um eti *ago* nedo o nupu Jutaia, na auri aiek par ika eri ago nedo o nupu Jutaia a nup urai taka pece?

15 inta esgan halav Jutaia akaija, um eti *esgan halav* irai taka pece, um ilpu atimi auatatimi,

16 inta ato akaija, nikavaig, er eti ika et atoh nedo o atimi va nimyiaiji intas alep, jai va nasgeig irai Iesu Kristo ache, inta lep asgeig irai Iesu Kristo akaija, mika eri ika et atoh nedo uja va nasgeigvaig irai Kristo, um eti va nimyiaiji intas alep: er idim eti ika et atoh nedo o un tah natimi va nimyiaiji intas alep:

17 ja ele ta ahilek akaija mika eri ika et atoh nedo uja vai Kristo, jam ago nedo has, et aheca u nedo has a Kristo va nitai ineigki, ka o'o? Et idim eti ucce.

18 El ek lep imyiitidai nitai iji eigki ainyak kis alcapdicraig ainyak, el ek ika ainyak ek atimi imyipalea ainyak.

19 Ek idiva natimi mas ainyak u intas alep vai intas alep, mika ki umoh ainyak vai Atua.

20 Ek ehrimas ainyak an nauincai atgeig ehele Kristo; ek eti tup ispuk umoh ainyak, ja et umoh ehelek a Kristo: ek idim umoh ainyak an naopan ineig an noboh-tan va nasgeigvaig irai Inhal o Atua, is aiyu inliinmopon aien vai nyak, um ispun ahtai yin vai nyak.

21 Ek idim eti imyipalea naiheuc o Atua ainyak: el eh ika et atoh nedo o atimi vai intas alep, el et tup takitai inmas u Kristo.

NUARIN-TAS ALUPAS 3.

AK nupu Calesya ahnag, is imyiahnag caua a di, mika aki jim imyiaiji intas inivaijcec aijaua, eris mun ehvaig upene Iesu Kristo an nuhup unyimia, eris atgei yin an nauincai atgeig ehelemia?

2 Ek merit ainyak natovaig ehelemia nitai et ethi ache ineigki, nikavaig, Akis leh Nesgan *Upene* aijaua an nimyiaiji intas alep, ka an nesege va nasgeig *irai Iesu*?

3 Eka idim ahnag aijaua; akis atupun an Nesgan *Upene* aijaua, ja eka ika aijaua yi ago ehni caua a *Atua* an nedo an nobohtan.

4 Akis leucose nohocred is ahinag aijaua, ja et mun takitai; el et idim takitai.

5 Aien et alupai caua Nesgan *Upene* aien, um ago niji auritai esjilid ehelemia, *et ago aien* an nimyiaiji intas alep, ka an nesege va nasgeig *irai Iesu*?

6 Et idim ucco, "is asgeig irai Atua a Ebrahim, va nitai ineigki eris ika is atoh nedo o un aien."

7 Akumu lep ato aijaua, nika-vaig, era ilpu hal o Ebrahim ara sji eigki, era imyisjis ninivaijcec ara.

8 Eris upyi ato an tas ineig eris aged, um ika, etpu ika a Atua et atoh nedo o nup urai iji pece va nimyisjis ninivaijcec *ura*, eris upyi asuptecnaig ehele Ebrahim intas-upene, um ika, "Erupu ahesmoij a nup urai iji pece asega vai euc."

9 Va nitai ineigki era mun ahesmoij a ilpu atimi imyisjis ninivaijcec, um idivai Ebrahim natimi imyisjis ninivaijcec.

10 Uhp u idim aru ira ra asega era *apol* an nimyiaiji intas alep ara: eris aged, *um ika*, "Uhp aru ira atimi asega era eti apos niji itai asega eris aged an nitasvitai an tas alep, um imyiaiji."

11 Im lep ineig, er idim ato, nika-vaig, er eti ika et atoh nedo o un

tah natimi vai intas alep an nuhup u Atua: "Erupu idim umumoh a ilpu atimi atoh nedo ura va nimyisjis ninivaijcec *ura*."

12 Et eti itai imyisjis ninivaijcec vaig intas alep: jai, "Natimi ineig et imyiaiji nitai iji eigki aien, etpu umoh aien vaig."

13 Is imyiatamaig caija a Kristo va nintan tas alep, an nedo o un, nikavaig, is leucose nintan aien vai caija: eris idim aged, *um ika*, "Era leucose nintan atimi iji eigki asega er aijcaijai ra an nauincai."

14 va etpu yetpan ehele nup urai iji taka pece intas upyi asaig ehele Ebrahim vai Iesu Kristo; va intupu leh Nesgan *Upene* ineig akaija eris upyi asaig vaig, va nimyisjis ninivaijcec *uja*.

15 Ak ilpu etoak, ek tas ainyak et idiva nedo o atimi; El et eteuc intas-etipup u intah natimi, um ipjin, el et eti imyipalea tah natimi, um eti ehcel pan iran.

16 Ja eris asan tas upyi asaig ehele Ebrahim im lep ilpu mapon. Et eti ika aien "Ehele ilpu mapom jipjipe," et idivai ra era ahes ehele atimi et ahinag ara; ja *et ika aien* "Ehele ilpu mapom," et idivai ra era ahes ehele natimi et ethi ache ara, et Kristo aien.

17 Ek lep ika ainyak, intas-etipup iyehki, is upyi ago ipjin a Atua vai Kristo, is eti auahas intas alep ineig is epitpitac iran irai mesese is for huntret im dirte, vai yi jim takitai intas upyi asaig.

18 El eh ohuun itai iji ehki vai intas alep, el *eh* eti *ohuun* vai intas upyi asaig: ja is tup ahtai imi Ebrahim *nitai iji ehki* a Atua vai intas upyi asaig *o un*.

19 *Eris asan* tas alep vanhe? Eris ati va nedo has *u atimi*, mika yi *amen* um uhum pan naopan iyehki, erupu yetpam a ilpu mapon iji ehki eris upyi tas chele ra; eris ati a ilpu agelo an nikmai natimi imyice sji pe intas.

20 Ja et eti eteuc natimi imyiee sjipe intas vaig et ethi, ja et idim ethi ache a Atua.

21 Et itai auahas intas upyi asaig u Atua intas alep, ka o'o? Et idim eti uccc: el eris ati intas alep et emda par imyiatamumoh *atimi*, el er ika et atoh nedo o atimi vai intas alep.

22 Ja eris ika an tas eris aged, era *atimi* auatatimi natimi asega, va uhpu alupai ilpu atimi imyiisjis ninivaijec intas upyi asaig va nasgeig irai Iesu Kristo *ura*.

23 An naopan iyehki is pam eti fi yetpam nimyiisjis ninivaijec, eris atapanes cama an tas alep, ecris aitgaig nimyiisjis ninivaijec ineig aijama, uhpu asuptecnaig an tak aopan.

24 Va nitai ineigki is idiva naheca aminjinai cama intas alep, *par imyiapan cama* ehele Kristo, va uhpu ika et atoh nedo unyima va nimyiisjis ninivaijec *unyima*:

25 ja et wat yetpam nimyiisjis ninivaijec, et eti lep esjilid irama naheca aminjinai *cama*.

26 Eka ilpu hal o Atua aijaua asega va nasgeig irai Iesu Kristo *unyimia*.

27 Akis aso caua aijaua asega irai Kristo, eris baptiso iramia irai Kristo.

28 Era eti lep eche a nupu Jutaia im nupu Crisi, im ilpu aheca im ilpu atimi eti aheca, im ilpu atamaig im ilpu takata: eka idim tup ethi ache aijaua asega irai Iesu Kristo.

29 El eka ilpu atimi u Kristo aijaua, eka lep ilpu mapoi Ebrahim aijaua, um ilpu atimi oluun itai, et idivaig intas upyi asaig.

NUARIN-TAS ALUPAS 4.

1 EK asaig *chelemia* ainyak mika, et wat halav natimi ineig etpu oluun itai aien, et eti eche aien

irai ilpu aheca, ja et o un niji itai asega;

2 et upoupo aien irai ilpu atimi esege *imi yin*, im ilpu atimi aminjinai niji itai *o un*, um imyihum pan naopan iyehki is asaig a etman.

3 Et idim ucco, intis aheca akaija an nupyi esege an nobohtan, an naopan iyehki intis halav akaija:

4 ja is wat yetpam ehni naopan *o un*, is abraig pan Inhal o un a Atua, is apos yin intakata, is amen ithan tas alep aien,

5 mika yi imyiatamaig ra, eris amen ara ithan tas alep, mika ti ilpu hal *o un* akaija.

6 Eka ilpu hal o Atua aijaua, va nitai ineigki is ati Nesgai Inhal o un aien anliinmopomia, et ahlaig aien, *um ika*, Abba, ak Etmama.

7 Va nitai ineigki na eti aheca aiek, jam hal *o un*; el *et* hal o un *aiek*, na oluun itai u Atua *aiek* vai Kristo.

8 Im lep ineig, an naopan iyehki akis wat eti ato Atua aijaua, akis aheca ura aijaua era idim eti atua ara.

9 Ja eka wat ato Atua aijaua an naopan ineig, maiya, et wat idim ato caua a Atua, eka auri aijaua par lep adumoij pan u nupyi esege et auatialidi um takitai, eka merit aijaua inlep ahecavaig?

10 Eka apos niji adiat aijaua, im niji mohoc, im niji opan, im niji mesese.

11 Ek imtitaig ainyak vai caua, kit et takitai nauritai unyak vai caua.

12 Ek ugni caua ainyak, ak ilpu etoak, mika aki idivai nyak aijaua; ek idim idivai caua ainyak: akis eti agahas irak aijaua an tah nitai.

13 Eka ato aijaua, nikavaig, is auatialidi nohuk ainyak, an naopan iyehki, kis upyi hup ainyak um asuptecnaig intas-upene ehelemia;

14 akis eti amcel vai nyak aijaua, um eti esjum vai nyak va nohocred

an nohuk; ja akis leh nyak aijaua is idiva nagelo o Atua, *um lep* idivai Iesu Kristo.

15 Nimyiacitak iyehki yek ed unyimia? ek idim ato ainyak, nika-vaig, el is eti ehka, al ekis iknipagki nesgaiintamia aijaua, um alupai nyak.

16 Ek tak atimi iramia ainyak vaig neig, nikavaig, ek asan tas inivaijec ehelemia ainyak, ka o'o?

17 Era emda vai caua ara, *jam* eti upene; maiya, era merit ara natapanes caua vaig, mika aki emda aijaua vai ra ache.

18 Ja et upene nemdavaig an *nedo* upene irai iji adiat, jam eti an namen unyak ehelemia ache.

19 Ak ilpu hal unyak, ek lep ahka ainyak vai caua, um uhum pam nehcohos o Kristo anliinmopomia;

20 ek merit ainyak namenvaig ehelemia an naopan ineig, yi eche intas unyak, et idim ehioehio inliinmopok ainyak vai caua.

21 Ak ilpu atimi merit namenvaig ithan tas alep, asuptecnaig ehelek aijaua, eka ahaijeg an tas alep aijaua, ka o'o?

22 Eris aged, um ika, is ero inhal o Ebrahim; is apos is ethi a naheca atahaig o *un*, is lep apos is ethi a intakata atimi alupas:

23 ja aien is ahes aien ehele naheca atahaig o *un*, eris apos yin et idiva nedo an nobohtan; ja aien is ahes aien ehele intakata atimi alupas, *eris apos yin* vai intas upyi asaig.

24 Et almui itai nitai iji eigki: erau idivaig intas-etipup erahki ahwat takata erahki; is ahes an nedoon Saine *intas-etipup* et ethi, um apos ilpu hal o un mika eri aheca, et idivai Hecar *intas-etipup* ineigki.

25 Im lep ineig, et idiva nedoon Saine an pece Arebya a Hecar, um lep tup ethi ache pan iran Jerusalem an naopan ineig, im lep natimi iran era aheca ara.

26 Ja et idivaig *intakata* atimi alupas Jerusalem ineig et ijinies, et lep risja asega aien.

27 Eris idim aged, *um ika*, "Namu imyiacitak aiek, ak intakata eti asvalav, um eti apos inhal unyum; namu cediaig aiek um ahlaig ijinies, na eti ohocred aiek va naposvaig ilpu hal unyum: et ahinag ilpu hal u intakata ineig et tup amen aien, irai intakata ineig et eteuc natamnyu un."

28 Ak ilpu etoak, inta lep atimi akaija eris apos ra vai intas upyi asaig, et idivai Aisak.

29 Ja aien eris apos yin an nedo an nobohtan, is idim atmas aien vai yin *eris apos yin* an tas o Nesgan *Upene* an naopan iyehki, et idim ucco an naopan ineig.

30 Ja er ika an tas eris aged? Ahlo naheca atahaig iyehki im inhal o un: inyi ti ohuun itai inhal u naheca atahaig, um eti tup ethi ache pan irai inhal u intakata atimi alupas."

31 Va nitai ineigki, ak ilpu etoak, inta eti ilpu hal u naheca atahaig akaija, jam *ilpu hal* u intakata atimi alupas iyehki.

NUARIN-TAS ALUPAS 5.

AKUMU aiji aktit aijaua an namen upene ineig is ikni caua iran a Kristo, um jim lep eccen an nedo aheca.

2 Ek idim ika ehelemia ainyak Paulo, el eka leh naperitome iramia aijaua, inyi idim eti upene vai caua a Kristo.

3 Ek lep imyiabrai ilpu atimi asega ainyak eris leh naperitome ira ra ara mika, eris idim ika eri ago nedo asega an tas alep ara.

4 Eris iknipagki caua vai Kristo, ak ilpu atimi ika et atoh nedo unyimia an tas alep; akis adumoj an naiheuc o *Atua* aijaua.

5 Inta aitgaig nika o *Atua* ineig akaija et atoh nedo uja va ninyiisjis ninivaijec *uja*, inta merit vaig akaija irai Nesgan *Upene*.

6 Et takitai irai Iesu Kristo naperitome, um lep *takitai* neti aperitome; jam *upene* ache ninyiisjis ninivaijec o *un tah* et ahes iran naiyu u inliinmopon.

7 Akis athut upene aijaua; *ja* is atapanes caua a di mika aki jim imyiaiji intas inivaijec aijaua?

8 Is eti ahes nesegé naico ehelen, is ahlaig vai caua aien.

9 Et imyileven inuari-*flaur* asega inuarin leven tintin.

10 Ek asgeig iramia ainyak vai Natimarid mika, etpu eti lep eche inliinmopomia aijaua: ja ara asega era imyidohalav caua ara, erupu leh neruvaig imi ra ara.

11 Ak ilpu etoak, el ek ika ainyak eri leh naperitome ira ra atimi, er auri par atmas vai nyak? el eh eti amcel va nauincai atgeig.

12 Ek merit ainyak mika uhpu iknipagki ra, era auahas inliinmopomia ara.

13 Ak ilpu etoak, eris imyiacaij caua an namen upene; jam jim *ago* nedo u inliinmopomia itu an namen upene ineig, jam aheca sjipe unyimia aijaua anliinmopomia aiyu.

14 Er imyiaiji intas alep asega an tas et ethi ache ineigki, nikavaig, "Etmu aiyu inliinmopom aiek va atimi eblaammem unyun, et idivaig *naiyu u inliinmopom* vai euc."

15 Ja el eka acis jipe caua aijaua um ehtauo jipe, aminjinai caua aijaua va aki jim auahas jipe caua.

16 Ek ika *ehelémia* ainyak, Akumu ahced Nesgan *Upene* aijaua, akupu lep eti imyiaiji inmerit u inliinmopomia itu.

17 Et eche inmerit u inliinmopja itu, jam lep eche inmerit u Nesgan *Upene*: et acheiachei jipe nitai eraigki; va nitai ineig eka idim eti

ago nitai iji eigki aijaua eka merit vaig aijaua.

18 Ja el et atau iramia a Nesgan *Upene*, eka eti amen ithan tas alep aijaua.

19 Er idim ecetai nedo u inliinmopja itu, nikavaig, ingaijid, *im* naitak, *im* nedo has, *im* naktaktai has,

20 *im* nalaigaheni vai ilpu atmas, *im* nahraces, *im* nedemda, *im* intavaitap, *im* noporei, *im* ninyiisjis itai, *im* nehtauo, *im* nauahas inliinmopoi atimi, *im* nedo etyiokowai atimi,

21 *im* nauatitai, *im* natgei atmas, *im* nahnag vai kava, *im* nauatiakirij-akirij, *im* nedo et idivaig ji eigki: ek imyiabrai caua ainyak, et idivaig kis upyi imyiabrai *caua* ainyak, nikavaig, eri eti leh nelcau o *Atua* ara era ago nedo iji eigki ara.

22 Ja nohoai itai u Nesgan *Upene* iji eigki, nikavaig, naiyu u inliinmopja, *im* incediaig, *im* neigpa, *im* nedo eti auatiemda, *im* nedo updak, *im* nedo upene, *im* ninyiisjis ninivaijec,

23 *im* nedo eropse, *im* nalitapanes inmerit has: el et eteuc nitai iji eigki, el et ti intas alep.

24 Ara era ilpu atimi u Kristo ara, eris atgei inliinmopura itu ara an nauincai atgeig, *im* naktaktai has ura, *im* inmerit u inliinmopura va nedo has.

25 Ele ta amen ehele Nesgan *Upene* akaija, intumu ahced Nesgan *Upene* akaija.

26 Etmu jim ijinies inliinmopja akaija vai intakitai, um jim auahas jipe inliinmopja, um jim auatitai jipe.

NUARIN-TAS ALUPAS 6.

AK ilpu etoak, el et ago tah nedo has tah natimi va neti aktaktai o un, akumu lep imyia-

dumoiy yin anliinmopomia eropse aijaua, ak ilpu atimi et amen ehelomia a Nesgan *Upene*; namu aktaktai euc aiek, kit uhpu lep oop euc.

2 Akumu apos jipe itai apos unyimia aijaua, um imyiaiji intas alep o Kristo an nedo ineigki.

3 El et ika tah natimi et upene aien, jam eti upene, et efaifa vai yin aien.

4 Erumu ispara aktaktai jippipe nedo ura natimi asega, va erupu imyiacitak vai ra ache ara, um eti vai intak atimi.

5 Erupu echim apos jippipe neruvaig ura natimi asega.

6 Ara er esege imi ra intas, erumu aiheuc vai ilpu atimi esege *imi ra* ara irai iji itai upene asega.

7 Akumu jim efaifa vai caua aijaua; et itaup namcelvaig vai Atua: nitai ineig et ahoaig tah natimi, etpu lep ehlek aien.

8 Aien et ahoai itai anliinmopon itu aien, etpu lep ehlek nitai auahas *yin* aien vai inliinmopon itu; ja aien et ahoai itai an Nesgan *Upene* aien, etpu ehlek nitai umoh iran ineig aien inyi ti lep ti, vai Nesgan *Upene*.

9 Intumu ago nedo upene akaija, um jim atumop: intupu idim ehlek akaija an naopan o un, ele ta eti auatialidi akaija.

10 Et wit eteuc naopan, intumu ago nedo upene akaija va atimi asega; jam uhup vai ilpu atimi imyiisjis ninivaijec.

11 AKUMU almoi nitasvitai ineigki aijaua ek aged alupas imi caua ainyak an nikmak.

12 Ara era merit ara mika eridiva atimi upene an nuhup u atimi, era imyiisjis ara mika aki leh naperitome iramia aijaua; va nitai ineigki ache, nikavaig, eri jim leucose nohocred ara va nauincai atgeig o Kristo.

13 Era idim eti imyiaiji intas alep ara sji eigki eris leh naperitome ira ra ara; ja era merit ara mika aki leh naperitome iramia aijaua, va erupu imyiahpas *nedo ura* irai ohumia.

14 Jai inki idim eti imyiahpas tah nitai ainyak, nauincai atgeig ache o Iesu Kristo Natimarid uja, et mas niji itai an nobohtan ehelek vai yin, ek lep *mas* ainyak u niji itai an nobohtan.

15 Et takitai irai Iesu Kristo naperitome, um lep *takitai* neti aperitome; jam *upene* ache inliinmopoi *atimi* mat.

16 Ara asega era imyiaiji intas alep ineigki ara, *etmu amen* neigpa im naiheuc ehele ra, im lep ehele nupu Isreel u Atua.

17 Im lep ineig, etmu jim lep imyidohalav nyak tah natimi: ek idim apos nuhri an nohuk ainyak vai Iesu Natimarid.

18 AK ilpu etoak, *etmu amen* anliinmopomia naiheuc o Iesu Kristo Natimarid uja. Emen.

NITASVITAI O PAULO NAPOSTOLO

IMI

NUPU EFESUS.

NUARIN-TAS ALUPAS 1.

AK ilpu atimi upene Efesus, eka inivaijec aijaua um apol irai Iesu Kristo, *ek aiheuc* vai caua *ainyak* Paulo, napostolo o Iesu Kristo va nasaig u Atua:

2 *Etmu amen* ehelemia naiheuc im neigpa ineig et ahes ehele Atua Etmaiija, im Iesu Kristo Natimarid.

3 Naaurineig vai Atua Etmai Iesu Kristo Natimarid uja, is alupai caija niji itai upene asega aien, et ahes an Nesgan *Upene* an nohatag irai Kristo:

4 et idivaig is ehtai caija aien vai yin an naopan iyehki is pam eti eteuc nobohtan, mika ti upene akaija, um ti nedo has uja, an nuhup o un:

5 is lep upyi hup aien um anaclelen iraija va naiyu u inliinmopon *vai caija*, mika ti ilpu hal o un akaija vai Iesu Kristo, vai intup naiheuc an nasaig o un;

6 mika ti imyiahpas naiheuc esjilid o un ineig, is aiheuc vai caija vaig aien irai *Inhalav* cop o un:

7 aien aigki is auanintaija aien an ja iran, nikavaig, eris ikuipagki nedo has *uja*, et idiva naiheuc esjilid acen o un;

8 va nitai ineig is efalupai caija aien narapakau asega im namarero;

9 um asuptecnaig eheleija niji itai adenaig anliinmopon aien, et idivaig naktaktai upene o un, is ispun anacanac iran aien;

10 mika yi asjapicnaig yi tup ethi

ache ehele Kristo niji itai asega, niji itai an nohatag, im lep an nobohtan, ehelen ache, an nauritai iyehki is yetpam ehni naopan o un:

11 eris ehtai caija vai yin, mika yi lep ohuun caija aien, is anaclelen iraija aien, an nupyi anacanac iran o un et ago niji itai asega aien et idivaig naktaktai u inliinmopon:

12 mika eri imyiahpas natimi alupas o un vai cama, ecriis upyi hup aijama um asgeig irai Kristo.

13 Akis wat atahaijeg intas inivaijec aijaua, intas-upene par imyiatamaig caua, *akis asgeig* iran aijaua: akis wat asgeig iran aijaua, is lep asjaaicnaig iramia a Nesgan *Upene* ineig eris asan tas upyi asaig vaig:

14 nitai asjaaicnaig neigki vai itai iji eigki intupu ohuun akaija, mika yi leh ehni aien nitai iji eigki is auanimtan aien, mika eri imyiahpas natimi alupas o un.

15 Im lep ineig, kis wat atahaijeg ainyak va ninyiisjis ninivaijec unyimia vai Iesu Natimarid, im naiyu u inliinmopomia vai ilpu atimi upene asega,

16 kis eti atumop ainyak naaurineigvaig vai caua, um aniv caua an nalaigaheni unyak;

17 mika yi alupai caua Nesgan *Upene* a Atua o Iesu Kristo Natimarid uja, Etmaiija esjilid, mika yi arapakau um lah inliinmopomia aijaua, va akupu ato yin aijaua;

18 um ago lah nesganimtan liinmopomia; mika aki ato nitai ineig

aijaua et imyiacaij caua vaig aien mika aki aitgaig aijaua, im lep niji itai upene o un er imyiahpas yin vaig irai ilpu atimi upene et ohuun ra aien,

19 im lep nemda esjilid o un vai caija ilpu atimi imyisjis ninivaijec, et idiva nemda esjilid o un ineig is efauritai aien,

20 um ago irai Kristo, an naopan iyehki is imyinusjai yin aien vai inmas o un, um ati yin an matan an nohatag,

21 mika yi esjilid aien irai ilpu atimarid asega, im ilpu atimi alupas, im ilpu atimi emda, im ilpu atimi esjilid, im lep atimi asega er anvi nidara an naopan ineig, im lep an naopan iyehki etpu yetpam :

22 um ikni niji itai asega ithan neduon, um ati yin mika yi idjini iji itai asega aien va nakalasia o un ;

23 nohun neigki, et amen alupas iran aien aigki, et ika aien yi ohua niji uarin asega va niji itai asega amen iran.

NUARIN-TAS ALUPAS 2.

1 AKIS wat ememas aijaua an nauatatimi im nedo has *unyimia*, is *imyiatamumoh* caua aien ;

2 akis atga iran aijaua itu et idiva nedo an nobohtan ineig, um *atahaijeg* natimarid ineig et esjilid aien an nuanohatag, et esgan has aien et auritai anliinmopoi ilpu atimi imyipalea an naopan ineig :

3 intis lep tup ethi ache pan ira ra akaija asega itu an merit inliinmopja itu, um ago inmerit inliinmopja itu im naktaktai has ; intis lep ilpu atimi eris atavaitap vai ra akaija an tup nedo *uja* itu, et idiva atimi asega.

4 Ja et esjilid naiheuc o Atua, is idim aiyu alupas inliinmopon aien vai caija,

5 um ehrimiyiatam umoh caija ehele Kristo, an naopan iyehki intis emes-

mas irai edo has *uja* akaija, (er imyiatamaig caua va naiheuc o un ;)

6 um ehrimyanusjai *caija*, um ika ti ehrateuc *akaija* an nohatag, ehele Iesu Kristo :

7 mika yi ehva naiheuc esjilid o un aien, im nedo upene o un, vai caija irai Iesu Kristo an naopan iyehki etpu yetpam.

8 Er idim imyiatamaig caua va naiheuc o un va nimyisjis ninivaijec *unyimia* ; ja et eti ahes ehelemia : nitai tup ahtai o Atua neigki :

9 eris eti *imyiatamaig caua* va nimyiaiji *intas alep*, vai yi jim asan tas ijinies tahi natimi.

10 Inta idim auritai o un akaija, is ago caija aien irai Iesu Kristo, mika ti ago nedo upene ineig *akaija*, is upyi hup a Atua um anacanac iran mika ti ago akaija.

11 Im lep ineig, akumu imyiehva aijaua mika, *akis* ilpu atimi aupat irai ohumia aijaua itu acen, eris anvi nidamia par ika ilpu atimi eti aperitome ara sji eigki, er anvi nidara par ika ilpu atimi aperitome irai ohura irai ikma atimi ;

12 an naopan iyehki is eti amen ehelemia a Kristo, akis eti amen aijaua an nelcau u nupu Isreel, akis amen itac acen aijaua vai intas-etipup eris upyi asaig, akis eti aitgai itai upene aijaua, is eti amen ehelemia a Atua, *akis apol* an nobohtan *aijaua* :

13 akis amen itac acen aijaua an naopan iyehki, ja eka amen ubutpotet aijaua an naopan ineig va namen ehele Iesu Kristo, vaiinja iran.

14 Et eigpa uja aien, is ika aien ti tup ethi ache akaija, is auahas natcai an niblaija aien,

15 *nikavaig*, nitai amcel jipe vaig, um atipagki an nohun nedo iyehki eris asaig va nalaigaheni u nupu *Jutaija*, mika yi leh natimi et ero um echaijehgai rau, um ago natimi

mat iran yi tup ethi ache, va etpu eteuc neigpa;

16 um lep ago eropse inliinmopoi Atua vai ra, era olun et ethi ache ara, an nauincai atgeig *o un*, is atgei nitai amcel vaig iran aien :

17 is lep ham aien um asuptecnaig neigpa ehelema akis amen itac acen aijaua, im lep ehele ra eris amen ubutpotet ara.

18 Et eti itaup vai caija asega napanvaig ehele Etmaija, vai yin, irai Nesgan *Upene* et ethi ache.

19 Im lep ineig, eka eti up urai taka pece aijaua um up urai tak elcau, ja eka ilpu etoa atimi upene aijaua, um ilpu hal o Atua;

20 er actaigjai caua an nededuon neom ineig *eris actaig* a ilpu apostolo im ilpu profeta, et idim *hat* an nesvi va neom ineig a Iesu Kristo;

21 er actaig upene neom asega vai yin, et ehlaujai um yetpan u neom ahlap upene irai Natimarid :

22 eh lep actaig caua pan iran, mika aki eom aijaua yi amen iran a Atua irai Nesgan *Upene*.

NUARIN-TAS ALUPAS 3.

VA nitai ineigki ainyak Paulo aigki, natimi u Iesu Kristo, eris arore nyak vai caua nup urai taka pece,

2 akis idim atahaijeg aijaua nauritai ineig va naiheuc o Atua, is alupai nyak aien vai caua:

3 is ehva nitai adena *o un* aien ehelek, um asuptecnaig ehelek; et idivaig kis upyi hup ainyak um aged an tas is eti elpat;

4 aku wit esvi aijaua, akupu ato aijaua nato itai unyak an nitai adenaig u Kristo,

5 eris eti asuptecnaig ehele atimi itu acen, et idiva nasuptecnaig u Nesgan *Upene* ehele ilpu apostolo upene o un im ilpu profeta, an naopan ineig;

6 nikavaig, eri ehrasipiaig a nup urai taka pece *ehelema*, um tup ethi ache pan *irama*, um ehras leh *ehelema* intas upyi asaig o un, irai Kristo, an tas-upene :

7 eris ati nyak mika ki aheca uarin ainyak, et idiva nitai tup ahtai an naiheuc o Atua, is alupai nyak aien an nedo emda o un is efauritai *irak* aien.

8 Ek idim upoupo ainyak irai ilpu atimi upene asega, ja eris alupai nyak naiheuc ineigki, mika ki asuptecnaig ainyak ehele nup urai taka pece intas-upene u Kristo ineig, et ehka natovaig nesjilid iran;

9 um eka ehele atimi asega eri ato nasipiaig nitai adenaig ineigki is adenaig ehelen a Atua an naopan iyehki is pam eti eteuc nobohtan, is ago niji itai asega aien irai Iesu Kristo:

10 va erupu ato a ilpu atimi alupas im ilpu atimarid an nohatag narapakau jipjiipe asega u Atua va nakalasia *o un*,

11 et idivaig nupyi anacanac iran ineig, is ago aien irai Iesu Kristo Natimarid uja an naopan iyehki is pam eti eteuc nobohtan:

12 inta emda akaija um han ehelen, um eti imtitaig, va nasgeig iran *uja*.

13 Va nitai ineigki ek lep ated caua ainyak, mika aki jim auatalidi aijaua va niji ohocred unyak vai caua, nitai inyiactak imi caua neigki.

14 Va nitai ineigki, ek atpuse ainyak an nuhup u Etinai Iesu Kristo Natimarid uja,

15 aien aigki era apos nidan a ilpu hal *o un* asega an nohatag im nobohtan,

16 mika yi ahidaig emda inliinmopomia aien an Nesgan *Upene*, et idivaig niji itai upene *o un* er imyialpas yin vaig;

17 mika yi amen anliinmopomia a Kristo va nimyisjis ninivaijee *unyimia*, mika aki amense an naiyu

u inliinmopomia aijaua, um ateuc aktit iran;

18 mika aki emda aijaua im lep ilpu atimi upene asega, par ato netgeig an naiyu u inliinmopoi Kristo *vai caija*, im nupra *iran*, im nubou *iran*, im nijinies *iran*;

19 maiya, par ato naiyu ineig, ja et ehka natovaig, mika aki ohua aijaua an niji itai asega u Atua.

20 Aien aigki et emda aien par ago itai et esjilid irai itai iji eigki asega inta ugni *yin* vaig akaija, ka aktaktai, et idiva nemda *o un* et efauritai iran aien anliinmopja,

21 uhm u imyiahpas yin irai Iesu Kristo an nakalasia, irai iji mesese asega, um eti lep ti! Emen.

NUARIN-TAS ALUPAS 4.

VA nitai ineigki ek ated caua ainyak, natimi u Natimarid eris arore nyak, mika aki eklim amen upene aijaua yi idiva nimyiacaij caua,

2 um ago nedo upoupo, im nedo erop, im nedo eti auatiemda, um lep aiyu jipe inliinmopomia aijaua vai caua, um jim ago nedo ceigmeru;

3 um emda, um aminjinaig nethi ache u inliinmopomia ineigki et ahes ehele Nesgan *Upene*, um apol an nedo eigpa.

4 Et ethi ache nitai ineig eris imyiacaij caua vaig, mika aki aitgaig aijaua, yi idiva nimyiacaij caua; et idim ucco, et ethi ache nohun, um ethi ache Nesgan *Upene*.

5 um ethi ache Natimarid *uja*, um ethi ache nimyisjis ninivaijec *uja*, um ethi ache nabaptiso *iraija*,

6 um ethi ache Atua *uja*, Etnai atimi asega, et esjilid aien irai iji itai asega, et auritai aien irai iji itai asega, et lep amen aien ehelemia asega.

7 Ja eris alupai caija asega naiheuc et tup apapa pan an nitai tup

ahtai ineig is asjaaicnaig iran a Kristo.

8 Va nitai ineigki is ika aien, "Is wat aridjai an nohatag aien, is imyapan ilpu atimi is ahinag aien eris arore ra, um alupa atimi niji itai tup ahtai.

9 Im lep ineig, (is aridjai an nohatag aien vaig neigki, is upyi lup aien um asuol anliin tan;

10 aien is asuol sepam aien, aien aigki is aridjai aien ijinies irai ohatag asega, mika yi ohua niji itai asega iran.)

11 Is ikni ahaiji atimi aien, mika eri ilpu apostolo ara; im nahaiji ra, mika eri ilpu profeta ara; im nahaiji ra, mika eri ilpu atimi asup-tecnaig upene ara; im nahaiji ra, mika eri ilpu atimi asgi ara, im ilpu atimi esege;

12 mika eri ikni upene asega ilpu atimi upene ara, um auritai an nalaigaheni, um aminjina nohui Kristo:

13 um imyihum pan an naopan iyehki, etpu ethi ache inliinmopja akaija asega, par asgeig irai Inhal o Atua, um ato yin, mika ti atimi eteuc lelra akaija, um atimi ohoigmetto, um idivai Kristo:

14 vai ti jim lep halav akaija, er hedidaig jipe ra irai imtinjop asega, um imyiahnag ra, an nesege u ilpu atimi efaifa, im nedo oop ura; era imyiiris *caija* iran ara par imyiahnag *caija*;

15 ja intumu imyiaiji intas inivaijec akaija anliinmopja aiyu, mika ti esjilid akaija an niji itai asega vai Kristo, et idjineija aien:

16 er acaijehgaig upene nohun asega vai yin, et lep tup ethi ache, va nedyelcei va nohun asega iran er alaan, et idiva nemda ineig et ago irai iji uarin asega, et alupas nohun, um emda an naiyu jipe u inliinmopja.

17 Im lep ineig, ek tas ehelemia ainyak um ated caua vai Natimarid, mika aki jim ago nedo ineig aijaua

era ago a ilpu atimi aupat asega anliinmopura ahnag :

18 et aupat inliinmopura ara, era lep ahidaigpagki ra ara va nedo ineig et ahes ehele Atua, va neti ato itai ura *im* nipjin u inliinmopura ;

19 et ipjin inliinmopura ara, era ispara ago ingaijid ara, im nacistak asega, um eti gaije iran.

20 Is eti auanesege nitai iji eigki imi caua a Kristo ;

21 al ekis atahaijeg yin aijaua, um leh nesege o un, nikavaig, intas inivaijec ineig et amen ehele Iesu :

22 mika aki atipagki natimi itu aijaua, et has aien va niji itai efaifa et merit vaig aien, *um ude* nedo itu *unyimia* ;

23 mika aki eche aijaua vai Nesgan *Upene et auritai* anliinmopomia *aien* ;

24 um aso caua an natimi mat, er ago yin an nalmui Atua, an nedo atoh, im nedo upene, *im nedo* inivaijec.

25 Im lep ineig, akumu atipagki intas ahcil aijaua, “um asan tas inivaijec ehele ilpu atimi eblaam-nem unyimia aijaua asega :” inta tup ethi ache akaija.

26 “Aku wit edemda aijaua, jam jim ago nedo has :” etnu jim ete nagesega an nedemda unyimia :

27 um jim ahidai caua vai Tia-polo.

28 Aien et acaig aien, etnu jim lep acaig aien : etnu emda an nikman aien, um ago nauritai ineig et upene, va etpu ohuun itai aien pah lep aiheuc vai ilpu ihki atimi.

29 Etnu jim ahes an nipjineuc-semia intas has, jai intas ineig ache et upene nahidaig emda vaig *atimi*, mika yi ago upene ilpu atimi atahaijeg vaig :

30 um jim auahocred Nesgan *Upene* u Atua, is asjaaienaig iramia aien um imyihum pan an naopan iyehki ulpu imyiatamaig *caua*.

31 Ude nedo acen asega aijaua, im intavaitap, im nehniv, im intas ijinies, im inhos tas, im nauatitai asega :

32 akumu lep ago nedo upene jipe vai caua aijaua, *um* updak inliinmopomia, *um* jim aru jipe nedo has unyimia vai caua, et idivaig ineig, nikavaig, et eti aru nedo has unyimia a Atua irai Kristo.

NUARIN-TAS ALUPAS 5.

1 AKUMU ilpu atimi apitac irai Atua aijaua, et idivai ilpu halav cop o un ;

2 um aiyu jipe u inliinmopomia vai caua, et idiva naiyu u inliinmopoi Kristo vai caija, is ispun ahtai yin aien mika eri atgei yin, nitai ahlap vai Atua, nitai auanipin upene.

3 Akumu amcel emda vai ingaijid aijaua, im nacistak asega, um jim has iramia itai, et idivai ilpu atimi upene ;

4 um jim asan tas has esjilid, im intas aupat, im intas auyat ; et eti upene nitai iji eigki : jam naaur-ineig.

5 Eka idim ato aijaua, nikavaig, eri eti amen an nelcau u Kristo im Atua a ilpu atimi asega ago ingaijid, im ilpu atimi ago nedo has esjilid, im ilpu atimi has ira ra itai, et atua ura intakitai.

6 Etnu jim imyiahnag caua tah natimi an tas ahnag : etpu yetpan intavaitap u Atua irai ilpu atimi imyipalea va nitai iji eigki.

7 Akumu jim tup ethi ache pan ira ra aijaua.

8 Akis idim aupat aijaua itu acen, ja eka lah aijaua an naopan ineig vai Natimarid : akumu ago nedo o ilpu atimi lah aijaua ;

9 (nohoai itai u Nesgan *Upene* ji eigki, nedo upene asega, im nedo atoh, im nedo inivaijec ;)

10 um ahilek nitai ineig et upene vai Natimarid;

11 um jim tup ethi ache pan irai ilpu atimi ago nedo aupat ineig et eti upene, jam acaiji *ra* vaig.

12 Nitai ehcamai vaig neigki, nasuptecnaigvaig nitai iji eigki era ago ara, jam adenaig.

13 Ja eh wat acaiji nitai iji eigki asega et ehcohos pan an lah: va nitai ineig, nikavaig, et lah u niji itai asega et ehcohos pan.

14 Va nitai ineigki et ika aien, Namu aiji lahlah aiek, tak umjeg, jam nusjai vai inmas *unyum*, etpu imyilah euc a Kristo.

15 Akumu eklim atga upene aijaua, *um* idivai ilpu atimi arapakau, um jim idivai ilpu atimi ahnag,

16 um imyiiris naopan upene, et esjilid nedo has an naopan ineig.

17 Va nitai ineig akumu jim ahnag aijaua; jam ato upene intas o Natimarid.

18 Akumu jim umnyi alupas waina aijaua, er ahnag vaig; ja etmu amen alupas ehelemia a Nesgan *Upene*;

19 um tas jipe ehelemia irai ohraitai im niji tas ahces im niji tas auaramai irai Nesgan *Upene*, um acesaces nohraiitai, um cediaig anliinmopomia vai Natimarid;

20 um naaurineig irai iji adiat va niji itai asega, vai Atua Etmaija, an nidai Iesu Kristo Natimarid uja;

21 *um* ago nedo eccen jipe vai caua, um imtitai Atua.

22 ¶ Ak ilpu takata, akumu imyiaiji intas o ilpu atamnyu unyimia aijaua, et idivaig *intas* o Natimarid.

23 Et idjini ehgan a natamnyu un, et idivaig et idjini nakalasia a Kristo; et lep atimi imyiatamaig nohun aien.

24 Et idim imyiaiji intas o Kristo nakalasia *o un*, et idim ucco, *erumu imyiaiji intas* o ilpu atamnyura a ilpu takata irai iji itai asega.

25 ¶ Ak ilpu atamaig, etmu aiyu inliinmopomia aijaua vai ilpu ehgamia, et idivaig is aiyu inliinmopoi

Kristo va nakalasia *o un*, um ahtai yin vaig;

26 mika yi yiri aien an wai, um ago adicinadicin an tas *o un*,

27 mika yi ati imi yin aien nakalasia esjilid, yi ti nemeig iran, um ti necceneccen iran, um ti itai et idivaig; jam upene, um ti nitai has iran.

28 Eris idim ika yi tup ethi ache naiyu u inliinmopoi ilpu atamaig vai ehgara pan irai ohura. Aien et aiyu inliinmopon aien vai ehgan, et lep aiyu inliinmopon aien vai yin.

29 Et idim eti ispun amcel vai nohun tah natimi; jam alaan, um aminjinaig, et idiva *nedo* o Natimarid va nakalasia *o un*:

30 inta uari-nohun akaija; um *uari-nemihtan*, um lep *uari-eduon*.

31 “Va nitai ineigki etpu ude etman im risin natamaig, um amen aien im ehgan; etpu ethi ache nohura arau.”

32 Et esjilid nitai adenaig ineigki; ja ek tas ainyak vai Kristo, im lep va nakalasia *o un*.

33 Im lep ineig, etmu aiyu inliinmopomia aijaua asega vai ilpu ehgamia, et idiva *naiyu u inliinmopomia* vai caua; erumu lep eccen vai ilpu atamnyura a ilpu takata.

NUARIN-TAS ALUPAS 6.

1 AK ilpu halav, akumu imyiaiji intas o ilpu atmil unyimia aijaua vai Natimarid: et upene nedo ineigki.

2 “Namu eccen vai etmam im risum aiek;” intas alep uhup neigki, eris lep asan tas upyi asaig vaig;

3 “*va* apu amen upene aiek, etpu opra numoh unyum an nobohtan.”

4 Ak ilpu etmara, akumu jim auahas inliinmopoi ilpu hal unyimia aijaua: jam aminjinai ra vai

Natimarid, um esege imi ra, um ated ra.

5 Ak ilpu aheca, akumu imyiaiji intas o ilpu atimi alupas unyimia aijaua an nobohtan, um imyiim-tacintac *ra*, um eccen *vai ra*, um lep inivaijec inliinmopomia, et idi-va *nimyiaiji intas* o Kristo *un-ymia*:

6 *um* jim avaraheca almoi, et idi-vai ra era ahilek nimyiahpas u atimi ara, jam idivai ilpu aheca u Kristo, um imyiaiji intas o Atua an nesgamia;

7 um emda, um auritai, vai Natimarid, jam eti va atimi ache:

8 eka ato aijaua, nikavaig, et wat ago nedo upene tah natimi, etpu leh neruvaig ehele Atua aien, kit et aheca aien, ka et eti aheca aien.

9 Ak ilpu atimi alupas, akumu ago nitai iji eigki vai ra aijaua, um jim tas edemda: eka ato aijaua mika, et lep amen a Natimi alupas unyimia an nohatag; et idim atoh nimitan o un aien imi atimi asega.

10 IM lep ineig, ak ilpu etoak, akumu emda aijaua vai Natimarid, im lep va nemda esjilid o un.

11 Akumu aso caua aijaua an napelumai asega u Atua uri edoa, va akupu emda aijaua par atapanes nedo efaifa u Tiapolo *vai caua*.

12 Inta eti ati nedoa akaija va atimi an nobohtan ache, jai vai ilpu atimarid, *im* ilpu atimi alupas, *im* ilpu atimi esjilid an naupat an nobohtan ineigki, *im* ilpu agelo has an nananohatag:

13 va nitai ineigki akumu leh napelumai asega u Atua uri edoa aijaua, va akupu emda aijaua par atapanes itai an nadiat has; aku wit ahau ra asega aijaua, um aiji aktit.

14 Akumu aiji aijaua, um arcre

nijihgamia an nitai inivaijec, um atapanes inritimia an nedo atoh,

15 um atohoi eduomia an tas-upene er eigpa vaig, va akupu athut emda aijaua;

16 im lep ineig, akumu leh nim-yiisjis ninivaijec *imi caua* aijaua, nitai adahpoi *caua*, va akupu emda aijaua, par ahni nidjan nefaua cop asega u natimi auatatimi iyehki:

17 um leh incat adgaig *imi caua*, nitai imyiatamaig *caua*, im naitoga u Nesgan *Upene*, nikavaig, intas o Atua:

18 *um* alaigaheni irai iji adiat, um emda um ugni itai vai Nesgan *Upene*, um aminjina *nalaigaheni unyimia* um jim auatialidi, um alaigaheni vai ilpu atimi upene asega,

19 im lep vai nyak, mika eri alupai nyak intas ki asalgei nipji-neucsek ainyak um tas emda, um asuptecna nitai adena an tas-upene ineigki,

20 ek aheca u *Natimarid* vaig ainyak eris arore nyak vaig; *akumu ugni yin aijaua* mika ki tas emda vaig ainyak, et idivaig eris idim ika ki tas ainyak vaig.

21 JA etpu asuptecnaig ehelemia niji itai asega a Tikikus, et etoak upene aien, im naheca inivaijec u Natimarid, va akupu ato aijaua namen unyak, *im* nedo vai nyak:

22 ek abraig pam yin ehelemia ainyak vaig neig, mika aki ato aijaua namen unyima, um lep *mika* yi ago eropse inliinmopomia aien.

23 *ETMU amen* ehele ilpu etoaija neigpa, im naiheuc, im nimyiisjis ninivaijec, et ahes ehele Atua Et-maija, im Iesu Kristo Natimarid.

24 *Etmu amen* naiheuc ehele ra asega et aiyu inivaijec inliinmopura ara vai Iesu Kristo Natimarid uja. Emen.

NITASVITAI O PAULO NAPOSTOLO

IMI

NUPU FILIPAI.

NUARIN-TAS ALUPAS, 1.

AK ilpu atimi upene asega u Iesu Kristo Filipai, im ilpu atimi aminjina nakalasia, im ilpu atimi ehced, *ecrau aiheuc* vai caua *aijumrau*, Paulo im Timodeus, ohwat aheca u Iesu Kristo:

2 *Etmu amen* ehelemia naiheuc im neigpa ineig et ahes ehele Atua Etmaija, im Iesu Kristo Natimarid.

3 EK naaurineig vai Atua unyak ainyak irai iji imyiehva asega caua *unyak*,

4 um ugni itai vai caua asega irai iji alaigaheni asega unyak irai iji adiat, um imyiacitak,

5 va nasipiaig intas-upene unyimia, ahes an nadiat uhup iyehki um imyihum pam an naopan ineig;

6 ek imyiisjis ninivaijec nitai ineigki ainyak, nikavaig, aien is atupun nauritai upene ehelemia aien, etpu idim ago aien um imyihum pan an nadiat u Iesu Kristo:

7 et idim upene vai nyak naktaktaivaig nitai ineigki vai caua asega, va nitai ineig, nikavaig, et aiyu inliinmopok ainyak vai caua; eka taam apos ehelek naiheuc o *Atua* aijaua asega, an narore nyak, im lep an nasuptecnaig intas-upene *unyak*, im ninyiisjis emda unyak.

8 Et ato a *Atua* mika, et aiyu alupas inliinmopok ainyak vai caua asega, et idiva naiyu u inliinmopoi Iesu Kristo.

9 Ek lep ugni nitai ineig ainyak,

mika yi esjilid acen naiyu u inliinmopomia aijaua, an nato itai *unyimia*, im narapakau asega *unyimia*;

10 mika aki ato nitai iji eig aijaua et upene; mika yi inivaijec inliinmopomia aijaua, um eklim amen upene, um imyihum pan an nadiat u Kristo;

11 *um* amen alupas ehelemia nohoai itai upene vai Iesu Kristo, va *uhpu asuptecnaig* natimi alupas o *Atua* im ninyiahpas yin.

12 Im lep ineig, ak ilpu etoak, ek merit ainyak mika aki ato aijaua, nikavaig, et mun apaalni intas-upene va nitai iji eigki *eris ago* irak;

13 er idim ato irai imnim asega u ilpu eucuspo, im lep irai iji *uarin* asega, nikavaig, eris arore nyak vai Kristo;

14 era lep emda a ilpu etoaija et ahinag vai Natimarid va narore nyak, um asuptecnaig emda intas, um eti imtita atimi.

15 Era asuptecnai Kristo nahaiji ra va nauatitai im ninyiisjis itai *ura*; im lep nahaiji ra vai inliinmopura upene:

16 era asuptecnai Kristo ara sji ehki era auatitai ara, jam eti inivaijec, era aktaktai ara mika eri ati nohocred irak an narore nyak:

17 ja *era asuptecnai yin* ara sji eigki et aiyu inliinmopura ara, era ato ara mika, eris ati nyak mika ki imyiisjis intas-upene ainyak.

18 Ja er uli uauo? eli wat asup-tecnai Kristo an tah nedo, kit et ini-vaijec inliinmopura ara, ka et efaifa; ek imyiacitak ainyak vaig; maiya, ekpu idim imyiacitak ainyak.

19 Ek idim ato ainyak mika, etpu upene nimitan imi nyak va nedo ineigki *ura, im lep* va nalaigaheni unyimia, im natau *irak* u Nesgai Iesu Kristo,

20 et idivaig inmerit emda unyak im aktaktai unyak, mika ki ti eh-camai ainyak vaig tah nitai, jam tas emda an naopan ineig, et idivaig irai iji adiat, um imyiahpas Kristo an nohuk, kit an numoh *unyak*, ka an mas *unyak*.

21 Ek umoh ainyak vai Kristo, ja el et mas ainyak, *ekpu leh* nimitan *ainyak*.

22 Ja el et ohoan nauritai unyak nitai ineig, nikavaig, numoh *unyak* an nobohtan, ek idim eti ato ainyak nitai ineig ekpu merit vaig ainyak.

23 Et ero inliinmopok ainyak, ek merit ainyak napänvaig ehele Kristo, um amen *ehelen*; et esjilid acen neigki:

24 ja et upene namenvaig *unyak* an nobohtan vai caua.

25 Nimyisjisjis ninivaijec unyak neigki, ek ato ainyak mika, ekpu umoh ainyak um amen ehelemia asega, mika aki imyisjis ninivaijec emda aijaua um cediaig;

26 mika aki imyiacitak alupas aijaua irai Iesu Kristo vai nyak, ek wit lep ham ehelemia ainyak.

27 Etmu idiva *nedo* an tas-upene u Kristo nedo unyimia: mika, el ek ham *ehelemia* ainyak um ateghe caua, ka amen an taka uarin, ki atahaijeg ainyak va na-men unyimia, nikavaig, eka aiji aktit aijaua, um tup ethi ache inliinmopomia, um ehirmyiaiji intas-upene, um imyisjis ninivaijec;

28 um jim imtitai ilpu atimi tak atimi iramia: et itai asjaaicnaig imi ra neigki naualias *ra* vaig, ja
288

et *itai asjaaicnaig* imi caua neigki nimyiatamaig *caua* vaig, nitai ineigki et idim ahes ehele Atua.

29 Eris alupai caua vai Kristo *nemda* mika aki asgeig iran aijaua, um lep leucose nohocred vai yin;

30 er ati nedoa ineig vai caua, akis upyi ecetai irak aijaua an *naopan iyehkki*, um lep atahaijeg *mika et eleuc* irak an naopan ineig.

NUARIN-TAS ALUPAS 2.

EL et ago eropse a Kristo, el eka imyiacitak aijaua va naiyu u inliinmopomia, el et tup ethi ache inliinmopomia aijaua, el eka atar-aces atimi aijaua um aiheuc vai ra;

2 etmu lep tup ethi ache naktaktai unyimia aijaua, um tup ethi ache naiyu u inliinmopomia, um tup ethi ache nesgamia, um tup ethi ache nanaclelen unyimia, va ekpu imyiacitak alupas caua ainyak.

3 *Uhm*u jim *ago* tah nitai an nimyisjis itai, ka va nimyiahpas u atimi; ja etmu upoupo inliinmopomia aijaua, um aktaktai mika era esjilid iramia intak atimi.

4 Etmu jim aktaktai niji itai o un ache tah natimi, ja *erumu* lep *aktaktai* niji itai oi tak atimi natimi asega.

5 Etmu idiva naktaktai u Iesu Kristo naktaktai unyimia aijaua:

6 is idivaig Atua aien, um ika yi tup apapa pan irai Atua, jam eti ika nehneig itai neigki:

7 ja is ude natimi alupas o un aien, um tup idiva naheca, um tup ethi ache pan ira atimi:

8 is wat tup ethi ache pan ira atimi aien, is ago nedo upoupo aien, um leh inmas, inmas an nauincai atgeig marom.

9 Va nitai ineigki is imyiaridjai yin a Atua mika yi esjilid aien, um alupai yin nidan et esjilid irai ida *atimi asega*:

10 va erupu atpuse an nidai Iesu

atimi asega an nohatag, im noboh-tan, im lep anliin tan ;

11 um lep asuptecnai yin natimi asega, um ika, Et Atimarid a Iesu Kristo, par imyialpas Atua Et-man.

12 Va nitai ineig, ak ilpu etoak, akis idim imyiaiji intas o Atua aijaua irai iji adiat, eti an namen unyak ehelemia ache, jam esjilid an naopan ineig an namen unyak irai taka uarin, etmu idim ucco, akumu ahilek nitai imyiatamaig caua aijaua, anliinmopomia imtitaig. um ehioehio ;

13 va nitai ineig, nikavaig, et auritai a Atua anliinmopomia vai intup naiheuc o un, mika aki merit aijaua, um auritai.

14 Aku wit ago tah nitai aijaua, jim tas upoupo, um jim imyiisjis itai :

15 mika aki eklim amen upene aijaua um inivaijec, *um idivai* ilpu hal o Atua, va uhpu eti ated caua an nuhup u ilpu atimi imyipalea, im ilpu atimi auatatimi, eka amen ehele ra aijaua, um idivai moiyeuv ehcohos an noboh-tan,

16 um asuptecnaig intas umoh vaig ; mika ki imyiacitak ainyak an nadiat u Kristo, va nitai ineig, nikavaig, kis eti athut ainyak vai intakitai, um eti auritai vai intak-itai.

17 Maiya, el eh atladwijaiinja irak an nitai ahlap *unyak* im nauanaheca *unyak*, an ninyiisjis ninivaijec unyimia, el ek cediaig ainyak, um imyiacitak ehelemia asega.

18 Va nitai ineig akumu lep cediaig aijaua, um imyiacitak ehelek.

19 Im lep ineig, ek ika ainyak vai Iesu Natimarid, ki abraig pam Timodeus ehelemia tupko, mika yi imyiacitak inliinmopok ainyak, an nato namen unyimia unyak.

20 Et eti amen ehelek tah natimi

et idivai *yin*, um ispun aktaktai namen unyimia :

21 era aktaktai niji itai ura ache natimi asega, *jam* eti *aktaktai* niji itai u Iesu Kristo ;

22 ja eka ato nedo o un aijaua, nikavaig, is auritai ehelek aien vai intas-upene, is idiva nedo o unhal o *un tah* ehele etman.

23 Ek ika ainyak, ek wit ato niji itai irak ainyak etpu echam-echa, ki auroauro um abraig pam yin ehelemia.

24 Ja ek imyiisjis ninivaijec ainyak vai Natimarid, mika ki lep auroauro um apam ehelemia.

25 Jai kis aktaktai ainyak mika, et upene nabraig pam vaig Ipafrotaitus ehelemia, et etoak aien, um atimi imtaam auritai ehelek, um eucsupo atau imi nyak, jai naheca unyimia, im lep natimi is aiheuc vai nyak aien an nihki natimi unyak :

26 is idim merit alupas vai caua asega aien, is lep ohocred aien, akis wat atahaijeg aijaua, nikavaig, is emehe aien.

27 Is idim emehe aien, um ubutpotet u unmas o *un* : ja is aiheuc vai yin a Atua ; jam eti *aiheuc* vai yin ache, *is* lep *aiheuc* vai nyak *aien*, vai yi jim esjilid acen nohocred unyak.

28 Kis auroauro ainyak um abraig pam yin, mika, aku wit ecet yin aijaua, aki lep imyiacitak aijaua, um lep tintin nohocred unyak.

29 Akumu leh yin aijaua vai Natimarid, um imyiacitak alupas ; um ago nedo eccen va atimi era idivai yin ara :

30 va nitai ineig, nikavaig, is ubutpotet u unmas o *un* aien va nauritai u Kristo, ja is eti imyicoho nohun aien, mika yi asitu iramia, um ago elni naheca ineig vai nyak, akis eti ago aijaua.

NUARIN-TAS ALUPAS 3.

IM lep ineig, ak ilpu etoak, akumu imyiacitak Natimarid aijaua. Ek idim eti esjum ainyak nagedvaig nitai iji eigki imi caua, et idim lep upene vai caua.

2 Akumu aminjinai caua aijaua vai kuri, *um* aminjinai caua vai ilpu atimi auritai has, *um* aminjinai caua vai ilpu atimi tup aperitome.

3 Inta ilpu atimi aperitome *ini-vaijec* akaija, um alaigaheni vai Atua an Nesgan *Upene*, um imyiacitak Iesu Kristo, um eti asgeig irai iji itai an nobohtan:

4 et tup upene vai nyak nasgeigvaig irai iji itai an nobohtan. El et aktaktai tah natimi mika, et amen tah nitai ineig iran an nobohtan, el et asgeig iran aien, ek esjilid ainyak:

5 is wat eet nadiat irak ainyak, eris aperitome irak, ek ahes irai Isreel ainyak, *um* mapoi Benjamin, *um* atimi ira ra eris upyi tas Hibru itu ara; *um* lep Farisi an tas alep;

6 kis emda ainyak um abli nup an nakalasia; is ehka nacaiji nyak vaig va nedo atoh an tas alep.

7 Ja nitai iji eigki is upene vai nyak, kis lep ika ainyak is takitai vai Kristo;

8 maiya, ek idim ika ainyak et takitai niji itai asega va nitai ineigki et esjilid ache, natovaig Iesu Kristo Natimarid unyak: kis atcejiaig niji itai asega ainyak vai yin, um ika et ohok, mika ki leh Kristo,

9 um amen ehelen, um eti asgeig an nedo atoh ineig unyak an tas alep, jam *asgeig an nedo atoh* ineig *eh leh* va nasgeig irai Kristo, nika o Atua et atoh nedo *unyak*, va nimyisjis ninivaijec *unyak*:

10 va ekpu ato yin ainyak, im nemda u nimyinusjai yin, um tup ethi ache pan an nohocred o un, um idivai *yin* an mas o un;

11 mika ki leh nimyinusjai *nyak*

ainyak vai inmas *unyak*, el et eti ehka.

12 Ek mun idim eti leh *nitai ineigki* ainyak, um eti upene asega: ja ek athut pan ainyak, mika ki leh nitai ineigki is leh nyak vaig a Iesu Kristo.

13 Ak ilpu etoak, ek eti aktaktai ainyak mika ek mun leh: ja *ek ago* nitai et ethi *ineigki ainyak*, ek eti imyiehva niji itai an nidjik ainyak, jam athut pan u niji itai an nuhup *unyak*;

14 ek ahau pan nitai asjaaicnaig ainyak va nintan ineig et imyiacaij *caija* vaig a Atua an nohatag vai Iesu Kristo.

15 Etmu ucce naktaktai uja akaija asega, inta ato upene akaija: ja el et eche naktaktai unyimia an tah nitai, etpu asuptecnaig nitai ineigki ehelemia a Atua.

16 Etmu tup ethi ache natga uja, um tup ethi ache naktaktai uja, an nuarin ineig inta mun yetpan iran akaija.

17 Ak ilpu etoak, akumu ehrapitac nyak aijaua, um alum ra era ago nedo ineigki ara, et idivaig eera itai asjaaicnaig imi caua vaig aijama.

18 (Era ago nedo ineig natimi et ahinag, kis ehcalinag tas vai ra ehelemia ainyak, ek lep asaig *ehelemia* ainyak um taigtaig vaig *mika*, era tak atimi an nauincai atgeig u Kristo ara;

19 nintan imi ra neigki, nauahas ra vaig, et atua ura nipjinetgara, era imyiacitak nedo ehcamai vaig ura *ara*, era lep aktaktai niji itai an nobohtan ara.)

20 Ja et eteuc nuarin-pece uja an nohatag; inta aitgaig natimi imyiatamaig *caija* iran akaija, Iesu Kristo Natimarid:

21 etpu ago eche nohuja auatinalidi aien, vai yi pu idiva nohun esjilid, et idiva nauritai emda ineig o un et ika aien yi esjilid irai iji itai asega vaig par ohuun.

NUARIN-TAS ALUPAS 4.

1 VA nitai ineigki, ak ilpu etoak, etmu idim ucco, akumu aiji aktit jaiua irai Natimarid, et aiyu inliinmopok ainyak vai caua, um merit vai caua, eka itai imyiacitak *unyak* aijaua, um korona unyak, ak ilpu *etoak* upene.

2 Ek ated Yuoteas ainyak, um lep ated Sinteki, mika yi tup ethi ache inliinmopurau arau vai Natimarid.

3 Ek lep ugni euc ainyak, ak natimi atau *imi nyak* inivaijec, mika an atau imi ohwat raigki aiek, erus ehauritai ehelek arau an tas-upene, im lep Klement, im ilpu atai imtaam auritai ehelek et eche, *eris aged* nidara an nitas-vitai va nitai umoh iran.

4 AKUMU imyiacitak Natimarid aijaua irai iji adiat: ek lep ika ainyak, Akumu imyiacitak aijaua.

5 Akumu ehva nedo erop unyimia aijaua ehele atimi asega. Et ubutpotet a Natimarid.

6 Jim aktaktai alupas aijaua vaig tah nitai; jam asuptecnaig inmerit unyimia ehele Atua va niji itai asega an tas alaigaheni, im intas ugni, im naaurineig;

7 etpu ago eropse inliinmopomia im naktaktai unyimia vai Iesu Kristo neigpa ineig u Atua et idim ehka natovaig.

8 Im lep ineig, ak ilpu etoak, nitai iji eigki et inivaijec, nitai iji eigki *et* upene, nitai iji eigki *et* atoh, nitai iji eigki *et* adicinadin, nitai iji eigki *et* aiyu inliinmopoi atimi vaig, nitai iji eigki *eh* tas upene vaig; el *et lep eteuc* tah nedo upene, ka tah nitai er imyiah-pas, akumu aktaktai nitai iji eigki aijaua.

9 Akumu ago nitai iji eigki aijaua eris esege imi caua, akis leh aijaua, um atahajeg vaig, um almoi ehelek: etpu lep amen ehelemia a Atua ineig et ahes neigpa ehelen.

10 Ja ek imyiacitak alupas Natimarid ainyak, va nitai ineigki, nikavaig, eka lep aktaktai nyak aijaua an naopan ineig; akis idim aktaktai nyak aijaua, ja is eti eteuc naopan o un imi caua.

11 Ek idim eti tas ainyak va nihki natimi *unyak*: eris esege imtak, mika yi eropse inliinmopok ainyak, an namen asega unyak:

12 ek ato ainyak nedo upoupo, um lep ato nedo an nikni itai: eris esege imtak nedo an gaije, im lep nedo an namud, nedo an nikni itai, im lep nedo an nihki natimi, irai iji uarin asega, im lep irai iji itai asega:

13 ek emda ainyak nagovaig niji itai asega vai Kristo, et ago emda nyak aien.

14 Ja akis ago nedo upene aijaua, par aiheuc *vai nyak* an nohocred unyak.

15 Eka lep ato aijaua, ak nupu Filipai, kis wat ahes Masetonea ainyak, an naopan iyehki akis upyi alaigaheni aijaua, eris eti asipiaig imi nyak nup uran tah nakalasia, par ahtai itai um leucse itai, aijaua ache.

16 Akis ehcero imyiapan itai aijaua Desalonaika an nihki natimi unyak.

17 Ek eti merit va nitai tup ahtai ainyak: ja ek merit ainyak mika aki aho aijaua, pah leh nimtan alupas imi caua.

18 Ja et eteuc niji itai asega imtak, ek ikni itai ainyak: et ahinag niji itai unyak ainyak, kis leh ehele Epafrotaitus ainyak nitai iji eigki *akis imyiapam ehelek* aijaua, nitai auanipin upene, nitai ahlap npene, et imyiacitak vaig a Atua.

19 Ja etpu alupai caua nitai iji eigki asega et upene vai caua a Atua unyak, et idiva niji itai esjilid o un et ahinag acen, vai Iesu Kristo.

20 *Uhm*u imyiahpas Atua Etmajai irai iji mesese. Emen.

21 AKUMU aiheuc vai ilpu atimi upene asega aijaua irai Iesu Kristo. Era lep aiheuc vai caua a ilpu etoaija era amen ehlek ara:
22 era aiheuc vai caua a ilpu

atimi upene asega, um esjilid *naiheuc vai caua* ura an niinnim u Sisar.

23 *Elmu amen* ehelemia asega naiheuc o Iesu Kristo Natimarid uja. Emen.

NITASVITAI O PAULO NAPOSTOLO

IMI

NUPU KOLOSE.

NUARIN-TAS ALUPAS 1.

AK ilpu atimi upene Klose, im ilpu etoak inivaijec u Kristo, *ek aiheuc* vai caua *ainyak* Paulo, napostolo o Iesu Kristo, va nasaig u Atua, im lep Timodeus etoaija:

2 *Elmu amen* ehelemia naiheuc im neigpa ineig et ahes ehele Atua Etmajja, im Iesu Kristo Natimarid.

3 Ecras naaurineig aijumrau vai Atua, Etmaj Iesu Kristo Natimarid uja, um alaigaheni vai caua irai iji adiat,

4 ecras atupun aijumrau an natahaijeg unyimrau va nasgeig unyimia irai Iesu Kristo, im naiyu u inliinmopomia vai ilpu atimi upene asega;

5 va nitai iji eigki eka aitgaig aijaua eris ikni vai caua an nohatag, akis upyi atahaijeg vaig aijaua an tas inivaijec an tas-upene ineig;

6 is yetpam ehelemia, et idivaig an nobolitan asega; et lep ohoai itai, et idivaig iramia, an naopan iyehki akis atahaijeg vaig aijaua, um ato upene naiheuc o Atua, um imyihum pam an naopan ineig;

7 et idivaig is asuptecnaig ehelemia a Epafra *etoamrau* upene, *im*

natimi atau imi cumrau, et lep aheca inivaijec u Kristo aien imi caua; 8 is lep asuptecnaig ehelemrau aien naiyu u inliinmopomia an Nesgan *Upene*.

9 Va nitai ineigki, ecras wat atahaijeg aijumrau, ecras alaigaheni vai caua aijumrau an naopan iyehki, um eti atumop, um imyihum pam an naopan ineig, um ugni mika aki ato upene nasaig o un aijaua, an narapakau asega im nato itai an Nesgan *Upene*;

10 um ago nedo ineig et upene vai Natimarid, mika yi upene inliinmopon aien *vai caua*; um lep ohoai itai an nedo upene asega, um esjilid an nato Atua;

11 um emda alupas, et idiva nemda an natimi alupas o un, mika aki ago nedo eti auatiemda asega aijaua, im nedo erop, um inyiacitak;

12 um lep naaurineig vai Etmajja, is ago upene caija aien, mika ti tup ethi ache akaija, um amen ehele ilpu atimi upene an nuarin lah:

13 is iknipagki caijaa aien an nelcau aupat, um ikni *caija* an nelcau u Inhalav cop o un:

14 aien aigki et inyiatamaig caija aien an ja iran, er iknipagki nedo has *uja* vaig:

15 et almui Atua ineig aien er eti ecet yin, um metto irai iji itai asega :

16 va nitai ineig, nikavaig, eris ago niji itai asega vai yin, niji itai an nohatag, im lep niji itai an nobohtan, niji itai er ecetai, im lep niji itai er eti ecetai, nika-vaig, ilpu atimarid, im ilpu atimi esjilid, im ilpu atimi alupas, im ilpu atimi emda : eris ago niji itai asega vai yin, im lep imi yin :

17 is upyi uhup aien irai iji itai asega, et lep eteuc niji itai asega vai yin :

18 et lep idjini nohun, nikavaig, nakalasia o un aien, is idim atupun *niji itai asega* aien, et lep metto aien irai ilpu atimi anusjai vai inmas *ura* ; mika yi esjilid aien irai iji itai asega.

19 Is idim ika a Atua yi amen alupas ehelen niji itai asega ;

20 um lep eropse inliinmopon aien va niji itai asega vai yin, niji itai an nobohtan, im niji itai an nohatag, an nasan neigpa o un an ja *iran* an nauincai atgeig o un.

21 Akis tak atimi *iran* aijaua itu, um acen inliinmopomia *vai yin*, an nedo has *unyimia* ; ja et mun asan neigpa *vai caua* aien an naopan ineig,

22 an mas o un, an nohun an nobohtan, mika yi ikni caua aien an nuhup o un, aki upene aijaua, um ti nitai has iramia, um ti nitai ineig uhpu acaiji caua vaig :

23 el eka amen aijaua an nimyiis-jis ninivaijec, um emda o un, um apol *iran*, um eti adumoij an tas-upene ineig eka aitgaig aijaua, akis atahajeg vaig aijaua, eris lep asuptecnaig ehele atimi asega ithan nohatag ; ek lep aheca uarin ainyak Paulo ;

24 jam imyiacitak an naopan ineig irai iji ohocred unyak vai caua, ek lep leucse ehni niji ohocred u Kristo is eti ehni, an nohuk ainyak, va nohun, nikavaig, nakalasia o un :

25 ek aheca uarin ainyak, et idi-va nauritai ineig is ati imi nyak a Atua vai caua, mika ki asuptec-naig asega intas o Atua ainyak ;

26 nitai adenaig neigki eris adenaig vai ilpu retpoiia im natimi itu acen, ja er asuptecnaig ehele ilpu atimi upene o un an naopan ineig :

27 is ika a Atua yi asuptecnaig ehele ra niji itai esjilid an nitai adenaig ineigki ehele nup urai iji pece, nikavaig, Kristo ehelemia neigki, eka aitgaig inlah vaig aijaua ;

28 ecra asuptecnai yin aijama, um ated atimi asega, um esege imi atimi asega an narapakau asega ; mika ecri ikni atimi asega aijama eri upene asega vai Iesu Kristo :

29 ek idim auritai ainyak va nitai ineigki, um imyiisjis emda et idi-va nauritai o un et auritai emda irak aien.

NUARIN-TAS ALUPAS 2.

EK lep merit ainyak, mika aki ato aijaua nohocred alupas unyak vai caua, im lep *vai* ra Leotesia, im lep *vai* ra asega eris eti ecetai nesganimtak ara ;

2 mika yi eropse inliinmopura ara, um aiyu jipe vai ra, um tup ethi ache inliinmopura, um esjilid acen nimyiisjis ninivaijec ura an nato itai, va erupu ato upene ara nitai adenaig u Atua Etmaija, im Kristo ;

3 aien aigki, eris adenaig ehelen niji itai upene asega an narapakau im nato itai.

4 Ek asan tas ineigki ainyak, vai yi jim imyiahnag caua tali natimi an tas updak.

5 El ek eti amen ehelemia ainyak an nohuk, ek amen ehelemia ainyak an nesgak, um imyiacitak *caua*, um almoi natah iramia, im nemda u nimyiisjis ninivaijec unyimia vai Kristo.

6 Im lep ineig, akis upyi leh Iesu Kristo Natimarid aijaua, et idim ucco, akumu apitac yin aijaua:

7 um amense ehelen, um ateuca aktit, um apol an ninyiisjis ninivaijec *unyimia*, et idivaig eris esege imi caua, um emda, um lep naaurineig iran.

8 Aminjinai caua aijaua, vai yi jim imyiapan caua tah natimi u narapakau *esaisa* im nedo ahcil, et idivaig intas alep u atimi, im nesege an nobohtan, um eti idivai Kristo.

9 Et idim amense niji itai asega u Atua ehelen an nohun.

10 Eka esjilid aijaua vai yin, et esjilid aien irai ilpu atimi alupas asega, im ilpu atimi emda:

11 eka lep leh naperitome ineig iranai aijaua vai yin er eti ago irai ikma atimi, nitai iknipagki nedo has *unyimia* irai liimopomia itu, an naperitome u Kristo:

12 eris lep ehratelmoi caua ehelen an nabaptiso, eka lep ehranusjai vaig aijaua *ehelen* va ninyiisjis ninivaijec *unyimia* an nauritai emda u Atua, is imyinusjai yin aien vai inmas *o un*.

13 Akis wat emesmas aijaua an nedo has *unyimia*, im neti aperitome irai liimopomia itu, is ehrimiyiatamumoh caua aien ehelen, um eti imyiehva tah nedo has *unyimia*;

14 um ohpodohpod vai caija intas alep ineig eris aged is acaiji caija, um atipagki, um etcijiraig an naurincai atgeig *o un*;

15 um ahau ilpu atimi alupas im ilpu atimi emda, um ehvai ra an nuhup u atimi asega, is idim esjilid ira ra aien ache.

16 Etmu jim tas alep ehelemia tah natimi vai inhag *unyimia*, im numwig *unyimia*, im nasjapicnaig *unyimia an mesese*, im lep va nupyi het, im lep va adiat atumop:

17 et tup almui itai etpu yetpam

nitai iji eigki; ja *et* ahes irai Kristo nohun.

18 Etmu jim ahneg nimtan imi caua tah natimi an tup nedo upoupo, im nalaigaheni vai ilpu agelo, an nahilekvaig nitai iji eigki et eti ato aien, an nijinies u inliinmopon va naktaktai o un et ahes an nobohtan,

19 im neti apol an Nidjinin, aien eigki et ahes ehelen nitai umumoh vaig an nohun asega, irai wau im nidyelcei, um tup ethi ache vaig, um alupas va nika o Atua yi alupas.

20 Al ekis ehremesmas aijaua ehele Kristo an nesege an nobohtan, eka auri aijaua par ago nedo o atimi an nobohtan, um imyiaiji intas alep iji eigki;

21 *eris ika*, Jim caig, jim atimtim, jim ubli;

22 etpu ti nitai iji eigki asega er ago, um idivaig intas alep im nesege u atimi?

23 Et idiva narapakau nitai iji eigki an nalaigaheni ineig er ispar ago, im tup nedo upoupo, im neti aminjinaig nohura; ja et eti upene *nedo ineigki*, et imyiacitak vaig inliinmopura itu ache.

NUARIN-TAS ALUPAS 3.

AL ekis ehranusjai ehele Kristo aijaua, akumu ahilek niji itai an nohatag aijaua, an nuarin ineig et amen iran a Kristo um ateuca an matai Atua.

2 Akumu aktaktai niji itai an nohatag aijaua, um jim *aktaktai* niji itai an nobohtan.

3 Akis emesmas aijaua, er lep adenaig nitai umumoh iran imi caua irai Kristo ehele Atua.

4 Et wit ehcolios a Kristo, nitai umumoh iran vaig uja, akupu lep ehcolios pan ehelen aijaua an natimi alupas o un.

5 Va nitai ineigki akumu auahas

nedo o inliinmopomia itu aijaua an nobohtan, *nikavaig*, nedo has, naci-tak, naktaktai has, inmerit has, im inhas iramia itai, nalaigaheni vai intakitai neigki:

6 etpu yetpam intavaitap u Atua irai ilpu atimi imyipalea va nitai iji eigki:

7 akis ago nitai iji eigki aijaua an naopan iyehki, an namen iran unyimia:

8 ja akumu atceijaig nitai iji eigki asega aijaua, *nikavaig*, nedemda, intavaitap, inliinmopomia acen, *um atipagki* intas has, im intas ehlek afakahcil, an nipjineuc-semia.

9 Jim asan tas ahcil jipe ehelemia aijaua, akis idim adi natimi itu aijaua, im nedo o un;

10 um aso caua an *natimi* mat, eh lep ago yin an nato itai, um idiva nalmui *Atua* ineig is ago yin aien:

11 et ti nupu Crisi im nupu Jutai a igcaki; *um ti* ilpu atimi aperitome, im ilpu atimi eti aperitome; *um ti* nup urai taka pece *im* nup an namasacen, *im* ilpu aheca *im* ilpu atimi eti aheca: ja et iji itai asega a Kristo, ira atimi asega.

12 Akumu ago nedo o atimi upene aijaua, is ehtai ra a Atua um aiyu inliinmopon vai ra, um aso caua an nedo aiheuc *va atimi*, *im* nedo upene *vai ra*, *im* nedo upoupo, *im* nedo erop, *im* nedo eti auatiemda;

13 etmu jim edemda jipe inliinmopomia aijaua vai caua, um jim imyiehva jipe nedo has unyimia vai caua, el et has inliinmopon tah vaig tah natimi: et idivaig is eti imyiehva nedo has unyimia a Kristo, etmu ucce nedo unyimia aijaua.

14 Im lep ineig, akumu adahpoi nitai iji eigki asega aijaua va naiyu u inliinmopomia *va atimi*, nitai ahid esjilid neigki.

15 Etmu esjilid neigpa u Atua. anliinmopomia, er imyiacaig caua iran, mika aki tup ethi ache pan an

nohun aijaua; akumu lep naaurineig aijaua.

16 Etmu amen alupas ehelemia intas o Kristo an narapakau asega; um esege jipe imi caua, um ated jipe caua irai ohraiitai im niji tas ahces im niji tas auaramai an Nesgan *Upene*, um acesaces nohrai-itai vai Natimarid anliinmopomia an naiheuc o *Atua*.

17 Nitai iji eigki asega eka ago aijaua an tas *unyimia*, im lep an nedo *unyimia*, *akumu ago* asega *aijaua* an nidai Iesu Natimarid, um naaurineig vai Atua Etmaija vai yin.

18 AK ilpu takata, akumu imyiaiji intas o ilpu atamnyu unyimia aijaua, et idiva nedo upene ehele Natimarid.

19 Ak ilpu atamaig, etmu aiyu inliinmopomia aijaua vai ilpu eh-gamia, um jim edemda vai ra.

20 Ak ilpu halav, akumu imyiaiji intas o ilpu atmil *unyimia* aijaua irai iji itai asega; et idim upene neigki vai Natimarid.

21 Ak ilpu etmara, jim auahas inliinmopoi ilpu hal unyimia aijaua, va eri jim auatialidi ara.

22 Ak ilpu aheca, akumu imyiaiji intas o ilpu atimi alupas *unyimia* aijaua an nobohtan irai iji itai asega; um jim avaraheca almoi, et idivai ra era ahilek nimyiahpas u atimi ara; ja etmu inivaijec inliinmopomia aijaua, um imtitai Atua:

23 nitai iji eigki asega eka ago aijaua, akumu emda aijaua, um auritai, et idiva *nedo* vai Natimarid, um eti *idiva nedo* va atimi;

24 eka ato aijaua mika, akupu leh namen upene aijaua nimtan imi caua vai Natimarid: eka idim aheca u Kristo Natimarid aijaua.

25 Aien et ago nedo has aien, etpu leh neruva nedo has o un aien: et idim atoh nimtan u Atua imi atimi asega.

NUARIN-TAS ALUPAS 4.

1 Ak ilpu atimi alupas, akumu alupai ilpu aheca *unyimia* nimitan ineig aijaua et atoh um upene *imi ra*; eka ato aijaua, nikavaig, et amen a natimi alupas unyimia an noliatag.

2 AKUMU emda aijaua um alaigaheni, um aminjina nedo ineigki, um naaurineig;

3 akumu lep alaigaheni vai cama aijaua, mika yi asalgei vai cama nitai atapanes intasvaig a Atua, va ecrupu ehva nitai adenaig u Kristo aijama, er arore nyak vaig:

4 mika ki asuptecnaig ainyak, et idivaig eris idim ika ki tas ainyak.

5 Akumu ago nedo arapakau aijaua vai ra era eti alaigaheni ara, um imyiiris naopan upene.

6 Etmu upene intas unyimia aijaua irai iji adiat um ohoanjop, mika aki ato aijaua intas ineig aki asaig ehele atimi asega.

7 Etpu asuptecnaig ehelemia a Tikikus namen asega unyak, et etoak upene aien, um aheca ini-vaijec, um atimi imtaam auritai *ehelek* irai Natimarid:

8 ek abraig pam yin ainyak ehelemia va nitai ineigki, mika yi ato namen unyimia aien, um ago eropse inliinmopomia;

9 im lep Onesinus, etoak upene um inivaijec, et *up uran pece* unyimia aien; erupu asuptecnaig ehelemia arau niji itai asega *er ago* igcaki.

10 ET aiheuc vai caua a Aris-

tarkus natimi ineig er ehrarore cumrau, im Markus, inraimu u Barnabas, (aien aigki akis leh intas vai yin aijaua: et wit ham ehelemia aien, akumu leh yin aijaua;)

11 im lep Josua, tak idan Justus, ehtaij atimi eris aperitome irai ehtaij. Ehtaij ehauritai *ehelek* ahtaij rahki ache an nelcau o Atua, et lep emda inliinmopok ainyak vai ehtaij.

12 Et aiheuc vai caua a Epafra, et *up uran pece* unyimia aien, um lep aheca u Kristo, et ugni emda vai caua aien irai iji adiat ira alaigaheni, mika aki aiji aktit aijaua um upene asega an tas asega o Atua.

13 Ek asuptecnai yin *ehelemia* ainyak mika, et merit alupas vai caua aien, im lep ra Leotesia, im ra Haierapolis.

14 Et aiheuc vai caua a Lukas, natimi atipagki nemehe et aiyu inliinmopok vai yin, im lep Timas.

15 Akumu aiheuc vai ilpu etoaija aijaua era amen Leotesia ara, im Nimfas, im lep nup an nakalasia an ninnim o un.

16 Aku wit esvi nitasvitai ineigki aijaua, akumu asaig aijaua mika eri lep esvi ehele nup an nakalasia Leotesia; akumu lep esvi aijaua *nitavital* ineig inyi ahes Leotesia.

17 Akumu tas ehele Arkippus aijaua, *um ika*, Aminjina nauritai ineig aiek eris ati euc vaig u Natimarid, mika an ago.

18 NAIHEUC unyak neigki Paulo an nikmak. Akumu imyiehva natu hat irak aijaua. *Etmu amen* naiheuc ehelemia. Emen.

NITASVITAI UHUP O PAULO NAPOSTOLO

IMI

NUPU DESALONAIKA.

NUARIN-TAS ALUPAS 1.

AK nup an nakalasia Desalonaika u Atua Etmajja, im Iesu Kristo Natimarid, *ek aiheuc* vai caua *ainyak* Paulo, im lep Sailas, im Timodeus: *Etmu amen* ehelemia naiheuc im neigpa ineig et ahes ehele Atua Etmajja, im Iesu Kristo Natimarid.

2 Ek naaurineig vai Atua ainyak vai caua asega irai iji adiat, um aniv caua ira alaigaheni unyak,

3 um eti atumop, an nuhup u Atua Etmajja, par imyiehva nauritai an nimyiisjis ninivaijec unyimia, im nauanaheca an naiheuc *unyimia*, im nedo eti auatiemda *unyimia* va nitai ineig eka aitgaig aijaua irai Iesu Kristo Natimarid uja;

4 ek ato ainyak, ak ilpu etoak, et aiyu inliinmopoi Atua vai caua, mika eris ehtai caua:

5 va nitai ineig, nikavaig, is eti yetpam intas-upene unyak ehelemia an tas ache, ja an nemda, im lep an Nesgan Upene, im lep an nimyiisjis alupas; eka idim ato aijaua nedo unyak vai caua, an namen unyak ehelemia.

6 Akis apitac irak aijaua, im lep Natimarid, um leh intas an nohored alupas, jam imyiacitak vai Nesgan Upene:

7 va nitai ineig akis lep idim itai asjaaicnaig aijaua ini ilpu atimi imyiisjis ninivaijec asega Masetonea im Akea.

8 Eris idim atahaijeg intas o

Natimarid iramia an *pece* Masetonea, im lep Akea, et mun lep apaahni *intas* va nimyiisjis ninivaijec vai Atua unyimia irai iji uarin asega; va nitai ineigki et eti upene vai nyak nasaigvaig tah nitai.

9 Era idim asuptecnaig ara nedo an napam unyak ehelemia, im lep nedo *unyimia*, nikavaig, akis atidjimia irai ilpu atmas aijaua vai Atua, um aheca u Atua umoh um inivaijec;

10 um aitgai Inhal o un ineig etpu ahes an nohatag aien, Iesu *marom*, is imyinusjai yin aien vai inmas o un, aien aigki is imyiatamaig caija aien vai intavaitap etpu yetpam.

NUARIN-TAS ALUPAS 2.

EKA idim ato aijaua, ak ilpu etoak, napam unyak ehelemia, mika is eti takitai:

2 kis upyi hup ainyak um ohocred, eris lep ago nedo has vai nyak Filipai, et idivaig eka ato aijaua; jai kis emda ainyak vai Atua uja, um imyiisjis alupas, um asuptecnaig ehelemia intas-upene o Atua.

3 Is eti ahcil nesege unyak, um eti has, um eti efaifa:

4 ja is idim ati nyak a Atua par aminjinaig intas-upene, et idim ucco, ek tas ainyak; jam eti ahilek nimyiahpas u atimi, jai u Atua ineig ache et ato inliinmopok aien.

5 Kis idim eti asan tas imyiahpas atimi ainyak an tah naopan, et idivaig eka ato aijaua, um eti *ago* nedo efaifa vai inhas irak itai; et ato a Atua:

6 kis lep eti ahilek nimyiahpas nyak ainyak ehelemia, ka ehele tak atimi, ja is milta vai nyak nehtip-idaí *caua* vaig, et idivai ilpu apostolo o Kristo.

7 Jai kis ago nedo updak vai *caua* ainyak; is esjilid acen naiheuc unyak vai *caua*, et idiva nedo o un tah intakata vai ilpu hadi o un;

8 va nitai ineigki kis merit ainyak nasuptecnaigvaig ehelemia intas-upene o Atua, um lep *ahtai* nesgak *vai caua* va naiyu u inliinmopok vai *caua*.

9 Eka imyiehva aijaua, ak ilpu etoak, nauanaheca unyak im naur-itai: kis ago itai ainyak irai iji adiat im niji epeig, vai ki jim ehtip-idaig tah *caua* ainyak, um asuptec-naig ehelemia intas-upene o Atua.

10 Eka ato aijaua, et lep ato a Atua, nikavaig, kis ago nedo upene ainyak, im nedo atoh, im nedo er eti acaiji, ehelemia ilpu atimi im-iyisjis ninivaijec:

11 eka lep ato aijaua nedo unyak ehelemia asega, kis tas ehelemia ainyak, um ago eropse inliinmopomia, um ated *caua*, et idiva nedo o un tah natimi vai ilpu hal o un,

12 mika aki ago nedo ineig aijaua et upene vai Atua, aien aigki is imyiacaij *caua* aien an nelcau o un, im natimi alupas o un.

13 Ek lep naaurineig vai Atua ainyak, um eti atumop, va nitai ineigki, nikavaig, akis wat leh intas ineig o Atua aijaua *akis* atahaijeg ehelek *aijaua*, akis eti leh aijaua *is idivaig* intas o atimi, jam *idivaig* intas o Atua, et idim inivaijec neigki, et auritai emda anliinmopomia, ak ilpu atimi imyisjis ninivaijec.

14 Ak ilpu etoak, eka idivai nup urai ekalasia u Atua aijaua an *pece* Jutaia, era amen ehele Iesu Kristo

ara: akis lep ohocred aijaua vai nup uran *pece* unyimia, et idivaig *eris ohocred* ara vai nupu Jutaia:

15 eris lep atgei Iesu Natimarid ara, im ilpu profeta ura, um lep ahlo nyak; et eti upene nedo ura vai Atua, era tak atimi ara ira atimi asega:

16 um acaiji nyak mika ki jim tas ainyak ehele nup urai taka *pece* va uhpu imyiatanaig ra, mika yi esjilid nedo has ura irai iji adiat: et idim esjilid acen intavaitap u Atua vai ra.

17 AK ilpu etoak, eris lep atipagki ipjidipjid nyak ehelemia an nohuk, ja eti anliinmopok, va nitai ineigki kis imyisjis emda ainyak, um merit alupas inlep alum nesganimtamia vaig.

18 Kis idim merit ainyak napamvaig ehelemia, *kis* idim ehceró merit ainyak marom, Paulo; ja is atapanes nyak a Satana.

19 Ek aitgan he ainyak, um imyiacitak inhe, um cediaig neveh korona? *caua* marom an nuhup u Iesu Kristo Natimarid uja an napam o un.

20 Eka idim itai imyiacitak unyak aijaua, um itai cediaig.

NUARIN-TAS ALUPAS 3.

1 VA nitai ineig, is wat ehka vai nyak nacaijivaig *inmerit unyak vai caua*, kis ika ainyak is upene ki echim amen Adens;

2 kis abraig pam ehelemia Timodeus ainyak, etoak, im naheca u Atua, im natimi imtaam auritai ehelek an tas-upene u Kristo, mika yi ahidaig emda *caua* aien, um ago eropse inliinmopomia va nimyisjis ninivaijec unyimia:

3 vai yi jim etehto inliinmopon tah natimi va nohocred iji eigki: eka idim ato aijaua mika eris ikni caija va nitai iji eigki.

4 Im lep ineig, kis wat amen ehelemia ainyak, kis upyi hup ainyak um asuptecnaig ehelemia, mika intupu ohocred akaija; et idivaig et mun yetpam *iraija*, eka idim ato ajjaua.

5 Va nitai ineigki, is wat ehka vai nyak nacaijivaig *inmerit unyak vai caua*, kis abraig pam *tah ehelemia* ainyak par ato nimyisjsis ninivajec unyimia, kit is oop caua a natimi oop, etpu lep takitai nauritai unyak.

6 Ja is wat ahes ehelemia a Timodeus, um apam ehelek, um apos intas upene ehelek va nimyisjsis ninivajec im naiheuc unyimia, im nimyiehva upene nyak unyimia irai iji adiat, im inmerit alupas unyimia nalum nyak vaig, et idivaig *inmerit unyak nalum caua vaig* :

7 va nitai ineigki, ak ilpu etoak, is eropse inliinmopok ainyak vai caua an nohocred asega unyak, im neucjucjucij *unyak*, va nimyisjsis ninivajec unyimia :

8 va nitai ineig, nikavaig, ek nusjai ainyak an naopan ineig, el eka aiji aktit irai Natimarid ajjaua.

9 Inki auaneve naaurineig vai Atua ainyak vai caua, va nimyiacitak asega unyak vai caua an nuhup u Atua uja?

10 ek ugni emda ainyak irai iji adiat im niji epeig, mika ki almoi nesganintamia ainyak, um ago emda nimyisjsis ninivajec ineig unyimia et auatialiidi.

11 Etmu imyiasjaainaig nyak an nefalaig yetpam ehelemia a Atua, aien aigki et Etmajja aien, im lep Iesu Kristo Natimarid uja.

12 Etmu lep ika ehelemia a Natimarid, yi aiyu alupas jipe inliinmopomia ajjaua vai caua, um emda, im lep va atimi asega, et idiva nedo unyak vai caua:

13 va etpu emda inliinmopomia ajjaua, uhpu eti acaiji *caua*, an nedo upene an nuhup u Atua Etmajja, an naopan iyehki etpu yet-

pam a Iesu Kristo Natimarid uja, im ilpu atimi upene o un asega.

NUARIN-TAS ALUPAS 4.

IM lep ineig, ak ilpu etoak, ek ugni caua ainyak, um ated *caua* vai Iesu Natimarid, nikavaig, akis idim leh ehelek ajjaua nesege imi caua va namen unyimia an nedo ineig et upene an nuhup u Atua, et idim ucco, aki ago nedo ineig ajjaua um esjilid acen iran :

2 eka idim ato ajjaua intas alep iji eigki kis asaig ehelemia ainyak vai Iesu Natimarid.

3 Intas o Atua neigki, mika aki upene ajjaua, um jim ago ingaijid :

4 va akupu ato nedo ineigki ajjaua asega par aminjinaig nohumia, va akupu adicinadicin ajjaua um upene ;

5 um jim apol irai aktaktai has, et idivai nup urai iji pece, era eti ato Atua ara :

6 etmu jim auarahcil tah natimi, um ago nedo efaifa, vai etoan an nitai ineigki : etpu idim aru irai ra sji eigki asega a Natimarid, et idivaig kis upyi hup ainyak um tas ehelemia, um asuptecnaig.

7 Is eti imyiacaij caija a Atua va nedo has, ja va nedo upene ache.

8 Va nitai ineigki aien et imyipalea aien, et eti imyipalea atimi aien, jai Atua, aien aigki is lep alupai caija Nesgan Upene aien.

9 Im lep ineig, va naiyu u inliinmopomia vai ilpu etoamia, et eti upene vai nyak nagedvaig imi caua: et idim esege imi caua a Atua, mika yi aiyu jipe inliinmopomia vai caua ajjaua.

10 Eka idim ago nedo ineigki ajjaua vai ilpu etoaija asega an *pece* Masetonea asega : ja ek ated caua ainyak, ak ilpu etoak, mika aki esjilid acen ajjaua ;

11 um aktaktai par eklum amen upene, um ago niji itai unyimia,

um auritai irai ikmambia, et idivaig kis asaig ehelemia ainyak;

12 um ago nedo upene vai ilpu atimi eti alaigaheni, um jim ilpu ilki atimi aijaua an tahi nitai.

13 IM lep ineig, ek merit ainyak, ak ilpu etoak, mika aki ato aijaua vai ra era umjegse ara, va aki jim inyitaig *ra*, et idivai ra sji eigki era eti aiggaig *nusjai u atimi vai inmas ura* ara.

14 Ele ta imyisjis ninivajec akaija, nikavaig, is idim mas a Iesu, um lep nusjai, et idim ucco, etpu lep leucose pan ra sji eigki ehelen a Atua era umjegse ehele Iesu ara.

15 Ek asuptecnaig nitai ineigki ehelemia ainyak vai intas o Natimarid, nikavaig, inti eti uhup irai ra sji eigki era umjegse ara akaija, inti unumoh akaija um amen um uhup pan an naopan iyehki etpu ham a Natimarid.

16 Etpu idim ahes an nohatag a Natimarid um asuol pam, etpu esjilid nahlaig o un, *im lep* nohrai Nagelo esjilid, im lep intoho o Atua: erupu uhup um anusjai a ilpu atimi eris emesmas ara ehele Kristo:

17 ja uhpu lep aiyihijai caija ehele ra irai epeig intupu unumoh akaija um amen, mika ti aubillid Natimarid an nauanoahatag: etpu idim ucco, intupu amen akaija ehele Natimarid irai iji mesese.

18 Va nitai ineigki akumu ago eropse jipe inliinnopomia aijaua irai tas iji eigki.

NUARIN-TAS ALUPAS 5.

IM lep ineig, ak ilpu etoak, va naopan iyehki im nadiat iji iyehki, et eti upene vai nyak nagedvaig imi caua.

2 Eka idim ato upene aijaua mika, etpu yetpam nadiat u Natimarid et idiva natimi ehneig itai an nepeig.

3 Eru wit ika ara, Et eigpa um upene; etpu auroauro um yetpam ira ra nitai auahas *ra*, et idiva nohocred u intakata opouc; eri eti aha vaig ara.

4 Ja eka eti amen an naupat aijaua, ak ilpu etoak, va etpu yetpam iramia nadiat iyehki, et idiva natimi ehneig itai.

5 Eka ilpu atimi lah aijaua asega, im ilpu atimi an nadiat: inta eti amen an naupat akaija, um eti *amen* an mehcin.

6 Va nitai ineigki intumu jim umjeg akaija, um idivai tak atimi; jam aiji lahlah, um aminjina nedo uja.

7 Ara era umjeg ara, era umjeg an nepeig ara; ara era ahnag vai kava ara, era ahnag vai kava an nepeig ara.

8 Intumu aminjina nedo uja akaija, ilpu atimi lah, um aso caija an nitai adahpoi inritja, nikavaig, ninyisjis ninivajec *uja*, im naiheuc *va atimi*; im lep nitai adgaig an nidjineja, nikavaig, naitgaig ninyi-atamaig *caija*.

9 Is eti ikni caija a Atua, mika yi erekinman iraija, ja mika ti leh ninyiatamaig *caija* akaija vai Iesu Kristo Natimarid uja,

10 aien aigki is mas vai caija aien, mika ti ehrumumoh ehelen akaija, kit intupu aiji lahlah akaija, ka unjeg.

11 Va nitai ineigki akumu ago eropse jipe inliinnopomia aijaua, um ahidaig emda jipe inliinnopomia, et idivaig eka lep ago aijaua.

12 EK lep ugni caua ainyak, ak ilpu etoak, mika aki ato ra aijaua era auritai ehelemia ara, um aminjinai caua irai Natimarid, um ated caua;

13 etmu aiyu alupas inliinnopomia aijaua vai ra, um eccen vai *ra* va nauanaheca ura. Akumu amen neigpa jipe aijaua.

14 Ek lep ugni caua ainyak, ak

2 NUPU DESALONAIKA, 1.

ilpu etoak, mika aki ated ilpu atimi ago nedo acalacal aijaua, *um* ago emda ilpu atimi et auatialidi inliinmopura ara, *um* aiheuc vai ilpu atimi areci, *um* ago nedo eti auatiemda va atimi asega.

15 Almoi vai yi jim aru nedo has o un tah natimi tah an nedo has; jam ahilek nitai iji eigki irai iji adiat et upene vai caua jipjipe, im lep va atimi asega.

16 Akumu imyiacitak aijaua irai iji adiat.

17 Akumu alaigaheni aijaua um jim atumop.

18 Akumu naaurineig va niji itai asega aijaua: intas o Atua neigki vai caua vai Iesu Kristo.

19 Akumu jim ahni Nesgan *Upene* aijaua:

20 akumu jim edwudwai intas o ilpu profeta aijaua:

21 akumu almaijidjid intas asega

ura aijaua; *um* apol an nitai ineig et upene.

22 Akumu ude niji obotpotet edo has asega aijaua.

23 Etmu ago upene asega caua a Atua ineig et ahes neigpa ehelen; uhmu aminjinaig upene asega caua, nikavaig, nesgamia im inliinmopomia im nohumia, um imyihum pan an naopan iyehki etpu ham a Iesu Kristo Natimarid uja.

24 Et inivaijec aien et ahlaig vai caua aien; etpu lep ago aien.

25 Ak ilpu etoak, akumu alaigaheni vai nyak aijaua.

26 Aiheuc vai ilpu etoaija asega, um aijumnyi upene ra.

27 Ek efasaig ehelemia ainyak vai Natimarid, mika eri esvi nitasvitai neigki ehele ilpu etoaija upene asega.

28 *Etmu amen* ehelemia naiheuc o Iesu Kristo Natimarid uja. Emen.

NITASVITAI ERO O PAULO NAPOSTOLO

IMI

NUPU DESALONAIKA.

NUARIN-TAS ALUPAS 1.

AK nup an nakalasia Desalonaika u Atua Etmaiija, im Iesu Kristo Natimarid, *ek aiheuc* vai caua *ainyak* Paulo, im lep Sailas, im Timodeus:

2 *Etmu amen* ehelemia naiheuc im neigpa ineig et ahes ehele Atua Etmaiija, im Iesu Kristo Natimarid.

3 Et idim upene vai nyak naaurineigvaig vai Atua irai iji adiat vai caua, ak ilpu etoak, et idim atoh nedo ineig, va nitai ineig, nikavaig, et esjilid acen nimyiisjis nini-

vaijec unyimia, um lep aiyu alupas jipe inliinmopomia vai caua asega;

4 ek idim tas emda vai caua ainyak irai ekalasia u Atua, va nedo eti auatiemda unyimia, im nimyiisjis ninivaijec *unyimia*, irai iji atmas asega vai caua, im niji ohocred eka leucose aijaua:

5 nitai ehva nedo atoh o Atua neigki, va uhpu ika eka upene aijaua namenvaig an nelcau o Atua, eka lep ohocred vaig aijaua:

6 et idim atoh vai Atua naruvaig nohocred ira ra era auaohocred caua ara,

7 im lep nitai atumop imi caua

ehelek eka ohocred aijaua, an nehcolhos an nohatag u Iesu Natimarid, im lep ilpu agelo an nemda o un,

8 an cop alauma, par aru ira ra era eti ato Atua ara, um eti imyiaiji intas-upene u Iesu Kristo Natimarid uja :

9 ara aigki ulpu aru ira ra, um auahas ra irai iji mesese, um ahlo ra ehele Natimarid an nemda esjilid o un ;

10 an naopan iyehki et wit ham aien, mika uhpu imyiahpas yin irai ilpu atimi upene o un, um lep imyiali yin irai ilpu atimi imyiisjis ninivaijec asega, (akis idim imyiisjis ninivaijec intas asuptecnaig unyak aijaua.)

11 Va nitai ineigki ek lep ugni Atua uja vai caua ainyak irai iji adiat, mika yi ika aien aki upene aijaua va nitai ineigki eris imyiacaij *caua* vaig, um alupaig emda *caua* inmerit va nedo upene asega, im nimyisjis ninivaijec ineig et auritai :

12 va uhpu imyiahpas nidai Iesu Kristo Natimarid uja vai caua, um lep *imyiahpas* caua vai yin, va naiheuc o Atua uja, im Iesu Kristo Natimarid.

NUARIN-TAS ALUPAS 2.

EK ugni caua ainyak, ak ilpu etoak, va napam u Iesu Kristo Natimarid uja, im nasjapicnaig uja ehelen,

2 mika aki jim auroauro aijaua, um ehioehio inliinnopomia, um amaamai, vaig tah *natimi et ika aien et tas an Nesgan Upene*, ka tah intas, ka tah nitasvitai, et idivaig is ahes ehelek, um ika, et mun yetpam nadiat u Kristo.

3 Etmu jim imyiahnag caua tah natimi an tah nitai: *etpu eti yetpam nadiat iyehki*, el eri eti uhup atimi um adumoij, um lep ehcolhos natimi auatatimi iyehki, inhal u inpece has ;

4 aien aigki et imyiisjis itai aien, um ika, et esjilid aien irai iji itai asega er anvi nidan par ika Atua, im lep niji itai er alaigaheni vaig ; va nitai ineig et ateuc aien anlin neom ahlap u Atua et idivai Atua, et ehvai yin aien um ika et Atua aien.

5 Eka idim imyiehva aijaua, nika-vaig, kis asuptecnaig nitai iji eigki ehelemia ainyak, an namen unyak ehelemia ;

6 eka lep ato aijaua nitai ineig et atapanes *yin*, mika yi ehcolhos aien an naopan o un.

7 Et idim auritai an naopan ineig nedo has er adenaig ; um imyihum pan naopan iyehki uhpu atipagki yin et atapanes aien :

8 etpu ehcolhos a Natimi imyipalea intas alep an naopan iyehki, aien aigki etpu ahlaadai yin a Natimarid an nohran nipjineucsen, um auahas yin an naijoran ineig etpu ham iran aien :

9 etpu ham nat naico et idiva nauritai emda u Satana, an nedo asega irai iji itai emda, im niji itai ehka, im niji itai imyiali, jam ahcil *asega*,

10 im lep nefaiifa asega irai edo has ehele ra sji eig uhpu auahas ra ; va nitai ineig, nikavaig, eris eti leh intas inivaijec ara, um eti merit vaig, va uhpu imyiatamaig ra.

11 Va nitai ineigki etpu ika a Atua eri ahnag esjilid ara, mika eri eteuc an tas ahcil ara :

12 va etpu erekinman ira ra ara asega eris eti asgeig an tas inivaijec ara, jam imyiacitak nedo has.

13 Ja et upene vai nyak naaurineigvaig vai Atua irai iji adiat vai caua, ak ilpu etoak, et aiyu inliinnopoi Natimarid vai caua, va nitai ineig, nikavaig, is anaclelen iramia a Atua an naopan iyehki is pam eti eteuc noboltan, mika uhpu imyiatamaig caua an nadicinadicin *unyimia* irai Nesgan *Upene*, im nasgeig an tas inivaijec ;

14 is imyiacaij caua vaig aien an tas-upene unyak, mika aki asipiaig niji itai upene u Iesu Kristo Natimarid uja aijaua.

15 Va nitai ineigki akumu aiji aktit aijaua, ak ilpu etoak, um apol irai tas alep eris esege imi caua, kit an tas *unyak*, ka an nitasvitai unyak.

16 Et aiyu inliinmopoi Iesu Kristo Natimarid uja vai caija, im lep Atua Etmajja, um alupai *caija* ninyiacitak ineig inyi ti lep ti, im inliinmopja aitgaig niji itai upene va naiheuc o un ;

17 etmu lep ago eropse inliinmopomia aien, um ago emda caua an tas *upene* asega im nedo upene.

NUARIN-TAS ALUPAS 3.

IM lep ineig, ak ilpu etoak, akumu alaigaheni vai nyak aijaua, mika yi auroauro um apaalni intas o Natimarid, um esjilid, et idivaig ehelemia ;

2 um lep ika eri imyiatamaig nyak vai ilpu atimi ahnag im ilpu atimi auatatimi : era idim eti imyisjis ninivaijec atimi asega.

3 Ja et inivaijec a Natimarid, etpu ago emda caua aien, um aminjinai *caua* va natimi auatatimi iyehki.

4 Ek imyisjis ninivaijec a Natimarid ainyak vai caua, nikavaig, eka ago nitai iji eigki aijaua ek asaig ehelemia ainyak, akupu lep ago aijaua.

5 Etmu atau imi caua a Natimarid, mika yi aiyu inliinmopomia aijaua vai Atua, um lep ago nedo eti auatiemda u Kristo.

6 Ek lep efasaig ehelemia ainyak, ak ilpu etoak, an nidai Iesu Kristo Natimarid uja, mika aki ude ilpu etoamia asega aijaua et acalacal nedo ura, um eti idiva nedo an tas alep ineig akis atahaijeg vaig ehelek aijaua.

7 Eka ato aijaua nedo ineig eris idim ika aki apitac nyak vaig aijaua : kis idim eti ago nedo acalacal ehelemia ainyak.

8 Kis lep eti tup hegaig nitai caig o un tah natimi ainyak ; jai kis auanaheca ainyak, um auritai, um ago itai, irai iji adiat im niji epeig, vai ki jim ehtipidaig tah caua ainyak :

9 et eti itaup vai nyak ; jam ika ki itai asjaaicnaig imi caua ainyak, va akupu apitac nyak aijaua.

10 Kis wat amen ehelemia ainyak, kis asaig ehelemia ainyak mika, el et esjum tah nauritaivaig, etmu jim hegai itai aien.

11 Kis atahaijeg ainyak, nikavaig, era amen ehelemia hal era ago nedo acalacal ara, um eti ago tah nauritai, jam ilpu atimi hos tas.

12 Ek idim asaig ehele ra sji eigki ainyak, um ated ra, vai Iesu Kristo Natimarid uja, mika eri eklim amen ara, um auritai, um hegai itai hegaig ura.

13 Ja akumu jim auatialidi aijaua u nedo upene, ak ilpu etoak.

14 El et eti imyiaiji intas unyak an nitasvitai ineigki tah natimi, akumu asjaaicnaig iran aijaua, um jim ehramen pan ehelen, va etpu ehcamai aien :

15 jam jim ika et tak atimi *iramia* aien, jam ated *yin* et idivai etoamia.

16 Etmu alupai caua neigpa a Natimarid ineig et ahes ehelen neigpa, irai iji adiat, an niji itai asega. *Etmu amen* ehelemia asega a Natimarid.

17 **NAIHEUC** *unyak* neigki Paulo an nikmak, nitai asjaaicnaig neigki irai itasvitai asega : naged unyak neigki :

18 *Etmu amen* ehelemia asega naiheuc o Iesu Kristo Natimarid uja. *Amén.*

NITASVITAI UHUP O PAULO NAPOSTOLO

IMI

T I M O D E U S.

NUARIN-TAS ALUPAS 1.

AK Timodeus, inhal *unyak* ini-vaijec an nimityisjis ninivaijec, *ek aiheuc* vai euc *ainyak* Paulo, napostolo o Iesu Kristo vai intas alep o Atua ineig et imyiatamaig caija aien, im Iesu Kristo Natimarid, inta aitgai yin akaija:

2 *Etmu amen ehelum* naiheuc, *im* neti aru, *im* neigpa, et ahes ehele Atua Etmajja, im Iesu Kristo Natimarid uja.

3 Kis idim ugni euc ainyak mika an amen Efesus aiek, an naopan iyehki an napan unyak Masetonea, um acaiji nahaiji ra va eri jim esege intas et eche ara,

4 um jim aktaktai intas ecsipece vai intakitai, im nidai ilpu retpora itu acen, et atupun nimityisjis itai nitai iji eigki, jam eti ahidaig nemda ineig et ahes ehele Atua an nimityisjis ninivaijec.

5 Jai nesgan tas alep neigki, naiheuc ineig *va atimi* et ahes anliinmopja upene, im naktaktai upene *uja*, im nimityisjis ninivaijec et eti efaifa:

6 eris ude nitai iji eigki nahaiji ra, um ahidai ra pan u intas vai intakitai;

7 eris merit ara mika eri ilpu atimi esege intas alep; ja era eti ato ara nitai iji eigki era tas vaig ara, im nitai iji eigki era taam imyisjis ara.

8 Ja inta ato akaija, nikavaig, et

upene intas alep, el et apos tah natimi et idiva nedo an tas alep;

9 eh lep ato, nikavaig, eris eti ati intas alep va natimi atohi nedo o un, ja vai ilpu atimi esjum vai intas alep, im ilpu atimi imyipalea, *im* ilpu atimi auatatimi, im ilpu atimi ago nedo has, *im* ilpu atimi auati-imrigimrig, im ilpu atimi afakahcil has, *im* ilpu atimi atgei etmara, im ilpu atimi atgei risira, *im* ilpu atimi atgei atmas,

10 *im* ilpu atimi ago ingaijid, *im* ilpu atimi auarobotpotedo, *im* ilpu atimi ahneg atimi, *im* ilpu atimi asan tas ahcil, *im* ilpu atimi asan tas efaifa, im lep nedo asega et eche an nesege inivaijec;

11 et idivaig intas-upene esjilid u Atua ineig er imyiahpas yin, eris ati ehelek.

12 Ek lep naaurineig ainyak vai Iesu Kristo Natimarid uja, is alupai nyak nemda aien, um ika kis ini-vaijec ainyak, um ati nyak va nauritai ineigki *o un*;

13 kis atimi asan tas has ainyak itu acen, um abli *atimi*, um ahlo *ra*; ja eris aiheuc vai nyak, va nitai ineigki, nikavaig, kis ago *nedo ineigki* ainyak va neti ato itai unyak, im nimityisjis nahcil *unyak*,

14 ja is esjilid acen naiheuc o Natimarid uja, *is alupai nyak* nimityisjis ninivaijec *aien*, im inliinmopok aiyu *vai yin* irai Iesu Kristo.

15 Et inivaijec intas ineigki, um upene neteuc iran asega vaig, nika-

vaig, is asuol sepam a Iesu Kristo an nobohtan ineigki, mika yi imyiatamaig ilpu atimi auatatimi; ek esjilid ira ra ainyak.

16 Jai va nitai ineigki, eris aihuec vai nyak, mika yi uhup a Iesu Kristo um ehva nedo eti aua-tiemda esjilid *o un* irak, va ekpu itai asjaaicnaig ainyak imi ra sji eigki, erupu asgeig iran ara va nitai umoh iran ineig inyi ti lep ti.

17 Im lep ineig, *uhmu ago* nedo eccen vai Natimarid ineig inyi amen aien irai iji mesese, *um* eti lep ti, er eti ecet yin, Atua ineig et arapakau ache aien, *uhmu* lep imyiahpas yin irai iji mesese. Emen.

18 Ak inhal *enyak* Timodeus, ek ati intas ineig ehelum ainyak, et idivaig intas iji eigki eris upyi asaig vai euc, mika an ago nedoa upene aiek irai itai iji eigki;

19 um apol aktit an nimyiisjis ninivaijec, im inlinmopom upene; eris atceijaig nitai ineigki hal, um etgeig yi egrei nimyiisjis ninivaijec *ura* :

20 erau atimi ira ra a Haimenius im Aleksanter; kis atceijai rau imi Satana ainyak, va uhpu esege imi rau va eru jim asan tas has arau.

NUARIN-TAS ALUPAS 2.

EK upyi hup ainyak um ated *euc*, mika uhpu ugni itai va atimi asega, um alaigaheni vai ra, um imyiahbras ra, um naaurineig vai ra;

2 vai ilpu atimarid, im lep ra asega era ilpu atimi alupas ara; mika ti amen upene akaija, um eigpa, um ago nedo eccen vai Atua im nedo upene *va atimi*.

3 Et esjilid um upene nedo ineigki an nuhup u Atua ineig et imyiatamaig caija aien;

4 et ika aien eri leh nitai imyiatamaig ra natimi asega, um ato intas inivaijec.

5 *Et eteuc* Atua et ethi ache, im natimi asan neigpa et ethi ache juju an niblaija atimi im Atua, natimi ineig Iesu Kristo;

6 is alhtai yin aien nintan va atimi asega, *ja* uhpu ato an naopan o un;

7 eris ati nyak vaig, mika ki atimi asuptecnaig ainyak, um apostolo, (ek asan tas inivaijec irai Kristo ainyak, um eti ahcil,) um atimi esege imi nup urai iji pece an nimyiisjis ninivaijec im intas inivaijec.

8 Va nitai ineigki ek ika ainyak, eri alaigaheni a ilpu atamaig irai iji uarin asega, um adaigjai nikmara adicinadicin, um jim edemda, um jim imyiisjis itai.

9 *Ek* lep *ika ainyak*, eri aso ra a ilpu takata an napelumai ineig et upene *vai ra*, um aktaktai upene, um jim acitaacera, um jim atij numri nidjinira, um *jim yecrei ra* a colt, im perl, im napelumai er auanimtan alupas;

10 jam *aso ra* an nedo upene, et esjilid nedo ineigki vai ilpu takata era ika ara era alaigaheni vai Atua.

11 Erumu atahaijeg intas a ilpu takata, um imyiaiji upene, jam jim tas.

12 Ja ek acaiji ilpu takata ainyak va eri jim esege ara, um jim esjilid irai ilpu atamaig, jam atahaijeg ache.

13 Eris upyi hup um ago Atam, ja par apitac irai Iva.

14 Eris eti ago nefaifa vai Atam, ja eris ago nefaifa vai intakata, is um imyipalea aien.

15 Ja uhpu imyiatamaig ra an naposvaig ilpu hal *ura*, el era aktaktai upene ara, um apol an nimyiisjis ninivaijec, um ago nedo aihuec *va atimi* im nedo upene.

NUARIN-TAS ALUPAS 3.

ET inivaijec intas ineigki, *nika-*vaig, El et merit tah natimi

naminjinaigvaig nakalasia, et merit vai nauritai upene aien.

2 Eris idim ika va natimi aminjina nakalasia, er eti lep acaiji yin vaig tah nitai, inyi ethi ache ehgan, *um* aminjina nedo o un, *um* aktaktai upene, *um* ago nedo upene, *um* alaa atimi, *um* ato par esege;

3 *um* eti umnyi alupas waina, *um* eti abli atimi, *um* eti merit alupas vai inpadiaig has vaig; jam tup eklim amen, *um* eti ehtauo, *um* eti has iran itai;

4 *um* aminjinaig upene ra an nimmim o un, *um* ika eri imyiaiji intas o un a ilpu hal o un *um* ago nedo upene asega;

5 (el eti ato tah natimi par aminjinai ra an nimmim o un, et ehka vai yin naminjinaigvaig nakalasia u Atua;)

6 *um* eti atimi paam alaigaheni, vai yi jim ijinies inliinmopou aien, *um* lep leucose neruvaig idivai Tia-polo.

7 Im lep ineig, eris idim ika eri tas upene vai yin atimi eti alaigaheni; vai yi jim eropse aien vai intas has, *um* lep apro yin a Tia-polo.

8 ¶ Et idim lep ucco vai ilpu atimi ehcid, erumu upene ara, *um* jim ero intas ura, *um* jim umnyi alupas waina, *um* jim merit alupas vai inpadiaig has vaig;

9 jam apol an nitai adenaig an nimyisjis ninivaijec anliinmopura inivaijec:

10 uhmu lep upyi hup um ato ra; ja erupu ehcid ara, el eh eti acaiji ra vaig tah nitai.

11 Et idim lep ucco vai ilpu ehgara, erumu upene ara, *um* jim tas has va atimi, *um* aminjina nedo ura, *um* inivaijec an nedo asega.

12 Etmu ethi ache ehgai ilpu atimi ehcid: erumu aminjinaig upene ilpu hal *ura* ara, im lep ra an nimmim ura.

13 Ara era ehcid upene ara, erupu aridjai ara, un lep emda

alupas nimyisjis ninivaijec *ura* vai Iesu Krisio.

14 ¶ Ek aged nitai iji eigki imi euc ainyak, ja ek ika ainyak ki ham ehelum tupko:

15 ja el ek elvamen ainyak, mika an ato aiek nedo ineig eris idim ika an ago aiek anliin neom u Atua, nikavaig, nakalasia u Atua unoh, et oboutau um itai ahtadai an tas inivaijec.

16 ET idim inivaijec neigki, nikavaig, et esjilid nitai adenaig an nedo eccen vai Atua, *nikavaig*, Is ehcohos a Atua an nohun, is ika a Nesgan *Upene* et atoh nedo o un, eris ecet yin a ilpu agelo, eris asuptecnai yin ehele nup urai iji pece, eris asgeig iran an nobohtan, eris lep imyiapan yin an pece upene.

NUARIN-TAS ALUPAS 4.

ET idim ika a Nesgan *Upene*, erupu adumoij an nimyisjis ninivaijec nahaiji atimi an tak aopan, *um* imyiaiji intas o ilpu atimi imyiahnag *ra*, im nesege irai ilpu atmas:

2 an nefaisa u ilpu atimi asan tas ahcil; etpu lep ipjin inliinmopura ara vai inhat ehri;

3 erupu acaiji atimi ara mika eri jim asa atmehgan ara, *um lep ika*, uhmu jim hegai itai hegaig, nitai iji eigki is ago a Atua, mika eri leh um naaurineig vaig a ilpu atimi ato intas inivaijec, um eteuc iran.

4 Et upene niji itai asega is ago a Atua, ulmu jim esjum vaig tah nitai, el eh leh um naaurineig iran:

5 et adicinadecin *nitai caig* vai intas o Atua im nalaigaheni.

6 El et ahugni lele ilpu etoaija aiek an nitai iji eigki, napu aheca upene u Iesu Kristo aiek, eris asuptecnaig ehelum intas an nini-

yiisjis ninivaijec, im nesege upene ineig, na apol iran aiek.

7 Ja namu esjum aiek vai intas eesipece va nedo aupat im intakitai, jam esege imi euc aiek nedo eccen vai Atua.

8 Et upene tintin ache nesege u nohuja: ja et upene nedo eccen vai Atua an niji itai asega, eris upyi asaig uhpu leh nitai umoh iran an naopan ineig, im lep an tak aopan.

9 Et inivaijec intas ineigki, um upene neteuc iran asega vaig.

10 Va nitai ineigki inta auritai akaija, um leucose nohocred vai intas has u atimi, ja inta aitgai Atua umoh ineig akaija, et imyiatamaig atimi asega aien, jam *imyiataamaig* esjilid ilpu atimi asgeig *iran*.

11 Namu asuptecnaig nitai iji eigki aiek, um esege.

12 ¶ Etmu jim imyipalea intakuras unyum tah natimi; jai namu itai asjaaicnaig aiek imi ilpu atimi imyiisjis ninivaijec, an tas *unyum*, im nedo *unyum*, im naiheuc va atimi *unyum*, im inliinmopom, im nimyiisjis ninivaijec *unyum*, im nadicinadin *unyum*.

13 Namu emda aiek um esvi intas *itaup*, um ated *atimi*, um esege *imi ra*, um imyihum pan an naopan iyebki ekpu ham ainyak.

14 Jim ude nemda ineig eris alupai euc, vai intas upyi asaig, im lep natijai nikmai ilpu atimi tas alep *iram*.

15 Namu aktaktai nitai iji eigki aiek, um eteuc iran; mika eri ato nemda unyum atimi asega.

16 Aminjinai euc aiek, im nesege *unyum*; um apol iran: napu imyiatamaig euc aiek an nedo ineigki, im lep ra era atahai'eg euc ara.

tup ated *yin* et idivai etmam; *im* ilpu takuras, et idivai ilpu etoam;

2 *im* ilpu takata efatimi, et idivai ilpu risum; *im* ilpu atahaig, et idivai ilpu atahaig iram, an nedo adicinadin asega.

3 ¶ Aiheuc vai ilpu takata iji eig aiek, eris ememas a ilpu atamnyura, um atih ilpu atimi ehpan ira ra.

4 Ja el et eteuc ilpu hal o un tah intakata is mas natamnyu un, ka ilpu mapon, erumu ato ara par ago nedo aiheuc vai ilpu atimi ehpan ira ra, um lep ago neruvaig imi ilpu atmil ura: et esjilid um upene nedo ineigki an nuhup u Atua.

5 Aien is mas natamnyu un, et um echim amen aien, et asgeig irai Atua aien, um alaigaheni, um ugni Atua irai iji adiat im niji epeig.

6 Ja aien et acitak aien, et *idivaig* natimi mas aien an numohi o un.

7 Namu asuptecnaig nitai iji eigki aiek, mika eri eti lep acaiji ra vaig tah nitai.

8 El et eti aminjinai ilpu atimi ehpan iran tah natimi, im lep ra an nimnim o un, et atceijaig nimyiisjis ninivaijec o un aien, et lep esjilid nedo has o un irai *edo has* u ilpu atimi imyiisjis nahcil.

9 Aged ilpu takata iji eig ache aiek eris ememas ilpu atamnyura, um sikste inmesese ira ra, im lep athi ache natamnyura;

10 eh lep tas upene va niji auritai upene ura; el eris aminjinai ilpu hal ura ara, um aiheuc vai nup urai tak uarin, um yiri eduei ilpu atimi upene, um ago nedo upene vai ilpu atimi ohocred, um apol aktit an niji auritai upene asega.

11 Jam ude ilpu takata takuras iji eig eris ememas a ilpu atamnyura: eru wit acitak ara um esjum vai Kristo, erupu ika ara eri lep atidai;

12 uhpu asuptecnaig nimitan imi ra va nedo ura, nikavaig, era mun atceijaig nimyiisjis ninivaijec uhup ura ara.

NUARIN-TAS ALUPAS 5.

JIM tas emda aiek ehele natimi ineig et efatimi aien, jam eklim

13 Era lep esjum ara nagovaig itai, um amen ehcid; jam eti esjum ache nagovaig itai, era lep hos tas ara, um erisecris tas, um asan tas ineig et eti upene *vai ra na-saigvaig*.

14 Va nitai ineigki ek ika ainyak, eri lep atidai a ilpu takata takuras eris emesmas a ilpu atamnyura, *um asvalav, um aminjina nimnim ura*, um jim ago tali nedo ineig erupu tas has vaig a ilpu atimi tak atimi *iraija*.

15 Eris idim adumoij pan ehele Satana nahaiji ra.

16 El era amen a ilpu takata eris emesmas a ilpu atamnyura ehelen tah natimi imyiisjis ninivaijec, ka intakata imyiisjis ninivaijec, erumu aiheuc vai ra ara, um jim ude ra ehele nup an nakalasia; mika eri aiheuc vai ilpu takata iji eig ara eris idim emesmas a ilpu atamnyura, um atih ilpu atimi ehpan ira ra.

17 ¶ Uhmu ago nedo eccen upene vai ilpu atimi tas alep era aminjinaig upene *atimi* ara, jam esjilid vai ra era auritai ara an tas im nesege.

18 Eris aged, um ika, "Jim arore nipjineuse kurimatau aiek, et wat aulhi hwiit aien." Im lep ineig, "Er alupai natimi auritai nimtan."

19 Namu jim atahaijeg intas er atijai irai natimi tas alep aiek, el et eti asuptecnaig intas iyehki a natimi inyi ero, ka inyi esej.

20 Namu ated ra sji eig aiek, era ago nedo has ara, an nuhup u atimi asega, va erupu lep imtitaig atimi asega.

21 Ek efasaig *chelum* ainyak an nuhup u Atua, im Iesu Kristo Nati-marid, im ilpu agelo eris ehtai ra, mika an inyiaiji nitai iji eigki aiek, um tup ethi ache inliinmopom va atimi asega, um jim ago tah nitai an tup innerit *unyum vaig tah*.

22 Jim auroauro aiek um atijai nikmam ijinies iran tah natimi, um

jim asipiaig nedo has oi tak atimi; namu aminjinai euc aiek va apu adicinadicin aiek.

23 Jim lep umnyi inwai ache aiek, jam unnyi waina tintin va nipjinetgam, im lep va nehcahinag auatiahidi unyum.

24 Er uhup um ato nedo has u ahaiji atimi, ja par apitac neruvaig; er apitac *um lep ato nedo has u ahaiji ra*.

25 Et idim ucco, er uhup um lep ato nedo upene *u ahaiji atimi*; et lep ehka nadenaigvaig *nedo er eti ato o ahaiji ra*.

NUARIN-TAS ALUPAS 6.

E RUMU ago nedo eccen esjilid vai ilpu atimi alupas ura a ilpu aheca asega era aheca *ura* ara, va uhpu eti asan tas has va nidai Atua, im nesege *o un*.

2 Eru wit imyiisjis ninivaijec a ilpu atimi alupas ura, erumu jim imyipalea *ra* ara, vai inrainu ura; jam esjilid um aheca *ura*, va nitai ineigki, nikavaig, era imyiisjis ninivaijec ara sji eigki, um rainu upene, er auaraleca upene ura. Namu esege nitai iji eigki aiek, um ated *atimi vaig*.

3 El et esege nedo et eche tah natimi, um eti adai intas inivaijec, *nikavaig, intas* o Iesu Kristo Nati-marid uja, im nesege ineig et idiva nedo eccen vai Atua;

4 et ijinies inliinmopon aien, um eti ato itai, jam merit alupas par ahodai itai um imyiisjis itai vai intas, nedo atupun nauatitai neigki, *im nehtano, im intas edemda, im naktaktai has*,

5 im nimyisjis itai jipe u ilpu atimi et has inliinmopura, et eti amen ehele ra intas inivaijec, era lep aktaktai ara mika eri leh inpadiaig va nedo eccen *ura* vai Atua: ude ra sji eigki aiek et ucce nedo *ura ara*.

1 TIMODEUS, 6.

6 Jai inpadiaig esjilid neigki, nedo eccen vai Atua im inlinmopja eropse.

7 Intis eti apos pam tah nitai an nobohtan ineigki akaija, er idim ato, nikavaig, et ehka vai caija inlep apos pan vaig tah nitai *iran*.

8 Ja el et eteuc nitai caig uja im nitai aso caija, etpu eropse inlinmopja vaig akaija.

9 Jai ara era merit ara nikni itai vaig, era epihtau ara an nedo oop *ra*, im nitai apro *ra*, im lep inmerit ahnag et ahinag um has, era ete vaig natimi an nohocred im inmas.

10 Et idim atupun nitai has iji eigki asega inmerit vai inpadiaig: eris wat anahna o un nahaiji ra, eris ude nimyiisjis ninivaijec ara, um acjaktit ra an nohocred et ahinag.

11 Jai namu aha aiek va nitai iji eigki, ak natimi u Atua; um apol an nedo atoh, *im* nedo eccen vai Atua, *im* nimyiisjis ninivaijec, *im* naiheuc *va atimi*, *im* nedo eti auatimemda, *im* nedo erop.

12 Ago nedoa upene an nimyiisjis ninivaijec aiek, *um* asjiraig nitai umoh iran ineig inyi ti lep ti, eris inyiacaig euc vaig, as lep asuptecnaig upene aiek an nuhup u atimi is ahinag.

13 Ek efasaig ehelum ainyak an nuhup u Atua ineig et imylatamumoh niji itai asega aien, im lep Iesu Kristo, aien aigki is asuptecnaig upene aien an nuhup u Ponjus Paillet;

14 mika an apos intas alep ineigki aiek, inyi ti nitai has iran, *um*

ti nedo ineig er acaiji vaig, um imyihum pan an naopan iyehki etpu ehcolhos a Iesu Kristo Natimarid uja:

15 etpu ehvai yin aien an naopan o un, aien et amen upene aien, um emda ache, *um* Atimarid irai ilpu atimarid, um Atimi alupas irai ilpu atimi alupas;

16 et tup ispun umoh aien ache, um amen an lah ineig et ehka vaig tah natimi napanvaig iran; is eti ecet yin tah natimi, et lep ehka necet *yin* vaig: *etmu eteuc* nimyahpas yin, im nemda, irai iji mesese. Emen.

17 Efasaig ehele ra sji eig aiek, era ikni itai an nobohtan ineigki ara, mika yi jim ijinies inlinmopura ara, um jim asgeig an padiaig ineig et eti amen, jam asgeig irai Atua umoh ineig et efalupai caija niji itai asega aien mika ti imyiacitak vaig akaija;

18 mika eri ago nedo upene ara; yi lep ahinag nauritai upene ura, *um* esjilid naiheuc ura *va atimi*; eri *lep* eti esjum nahtaivaig itai ura,

19 *jam* ikni nededuon upene imi ra vaig an tak aopan, va erupu asjiraig nitai umoh iran ineig ara inyi ti lep ti.

20 Ak Timodeus, aminjinaig nitai ineig aiek eris ati *ehelum*, um esjum vai intas ahnag, *im intas* vai intakitai, im nimyiisjis itai iji eig er anvi nidan mika narapakau jam aheil:

21 eris apol an nitai ineigki nahaiji atimi, um adumoij an nimyiisjis ninivaijec *ura*.

Uhm aiheuc vai euc. Emen.

NITASVITAI ERO O PAULO NAPOSTOLO

IMI

T I M O D E U S.

NUARIN-TAS ALUPAS 1.

AK Timodeus, inhalav cop *unyak*, *ek aiheuc* vai euc *ainyak* Paulo, napostolo o Iesu Kristo va nasaig u Atua, *par asuptecnaig* intas upyi asaig va nitai umoh iran ineig *et amen* ehele Iesu Kristo:

2 *Etmu amen ehelum* naiheuc, *im* neti aru, *im* neigpa, et ahes ehele Atua Etmajia, im Iesu Kristo Natimarid uja.

3 Ek naurineig ainyak vai Atua ineig ek aheca o un ainyak anliinmopok inivaijec, et idivai ilpu retpok, um eti atumop par imyiehva euc an nalaigaheni unyak irai iji adiat im niji epeig;

4 ek lep merit ainyak nalum euc vaig, mika yi imyiacitak alupas inliinmopok ainyak; ek idim imyiehva intaig unyum ainyak;

5 ek wit imyiehva nimyiisjis ninivaijec unyum is eti efaifa, is upyi amen ehele etpom takata Lois, im risum Yunaisi; ek lep imyiisjis ninivaijec ainyak mika, *et lep amen* ehelum.

6 Va nitai ineigki ek ated euc ainyak, mika an ahugni nitai tup ahtai o Atua aiek, et amen anliinmopom, va natijaivaig nikmak ainyak *iram*.

7 Is eti alupai caija inliinmopja imtac a Atua; jai inliinmopja emda, um aiyu, um arapakau.

8 Va nitai ineigki namu jim im-

yiehcamai Natimarid uja aiek, par asuptecnai yin, im lep nyak natimi o un eris arore nyak; jam imtaam ohocred vai intas-upene, an nemda ineig et ahes ehele Atua;

9 aien aigki is imyiatamaig caija aien, um ahlaig *vai caija* an nahlaig upene o *un*, *is* eti *ago aien* va nedo uja, ja va nupyi aktaktai o un, im intup naiheuc o *un*, is alupai caija aien irai Iesu Kristo, an naopan iyehki is pam eti eteuc nobohtan;

10 ja er ato upene an naopan ineig, va nehcohos pam u Iesu Kristo, Natimi imyiatamaig caija, aien aigki is atipagki inmas aien, um asuptecnaig nitai umoh iran ineig inyi ti lep ti an tas-upene:

11 eris ati nyak vaig, mika ki atimi asuptecnaig ainyak, um apostolo, um atimi esege imi nup urai iji pece.

12 Va nitai ineig ek lep ohocred ainyak va nitai iji eigki; ja ek eti ehcamai ainyak: ek idim ato yin ainyak ek asgeig iran ainyak, ek lep ato upene ainyak mika, et emda aien par aminjinaig nitai ineig kis ati *ehelen* ainyak va nadiat iyehki.

13 Etmu itai asjaaicnaig imi euc intas inivaijec, as atahajjeg vaig ehelek aiek, an nimyiisjis ninivaijec *unyum* im naiyu u inliinmopom ineig et ahes ehele Iesu Kristo.

14 Namu aminjinaig nitai upene ineig aiek eris ati *ehelum* irai Nes-

gan Upene ineig et amen eheleija aien.

15 Na ato aiek, nikavaig, eris ude nyak nupu Esya iji ehki asega; erau lep atimi ira ra a Fijellus im Hermojines.

16 Etmu aiheuc vai ra an nimnim u Onesiforus a Natimarid; is idim ehcalinag aiheuc vai nyak aien, um lep eti ehcamai va natau bat irak :

17 ja is wat amen Roma aien, is ahilek emda nyak aien, um ecet *nyak*.

18 Etmu ika a Natimarid yi leh naiheuc aien ehele Natimarid an nadiat iyehki: na lep ato upene aiek niji itai et ahinag is aheca *unyak* iran aien Efesus.

NUARIN-TAS ALUPAS 2.

VA nitai ineigki etmu emda inliinmopom aiek, ak inhal u-nyak, an naiheuc ineig *et amen* ehele Iesu Kristo :

2 nitai iji eigki as atahaijeg ehlelek aiek an nuhup u atimi is ahinag, namu ikni aiek ehele ilpu atimi inivaijec iji eig, erupu emda ara par esege imi tak atimi.

3 Namu leucse nohocred aiek, et idiva neucsupo upene u Iesu Kristo :

4 et eti imyieccen yin an niji itai an uobohtan a natimi ineig et ago nedoa aien; mika yi imyiacitak yin is ati yin aien mika yi eucsupo.

5 El et ika tah natimi yi esjilid aien an nathut *u atimi*, jam eti imyiaiji intas alep an nathut o un, eri eti adgai korona imi yin.

6 Natimi aha pol ineig et auritai aien, eris idim ika etmu upyi hup aien um leh inwah iran.

7 Aktaktai intas unyak aiek; etmu lep alupai euc narapakau a Natimarid an niji itai asega.

8 Namu imyiehva Iesu Kristo mapoi Tevit aiek, eris imyinusjai

yin vai inmas *o un*, et idivaig intas-upene unyak :

9 ek lep leucse nohocred vaig ainyak, et idivai natimi auatatimi, eris lep atapanes irak vaig; ja er eti atapanes an tas o Atua.

10 Va nitai ineig ek leucse niji itai has asega ainyak vai ra sji eigki eris ehtai ra, mika eri leh nitai imyiatamaig *ra* ineig ara *et amen* ehele Iesu Kristo, im nimyiacitak ineig inyi ti lep ti.

11 Et inivaijec intas ineigki, nika-vaig, Ele ta ehremesmas *ehelen* akaija, intupu lep ehrumumoh *ehelen* akaija :

12 ele ta leucse niji itai has akaija, intupu lep ehratimarid *ehelen* akaija: ele ta ateri *yin* akaija, etpu lep ateri caija aien :

13 ele ta imyisjsis nahcil akaija, et idim inivaijec aien: et ehka vai yin nateri yin vaig.

14 Ahugni lelra aiek an nitai iji eigki, um ated *ra* an nuhup u Natimarid, mika eri jim imyisjsis itai vai intas ara, et eti upene nedo ineig, etpu imyiahnag ilpu atimi atahaijeg vaig.

15 Namu emda aiek, va apu upene aiek an nuhup u Atua, natimi auritai eti ehcamai, um ahaig upene intas inivaijec.

16 Jam ude intas ahnag, *im intas* vai intakitai: etpu esjilid nedo has ura ara;

17 etpu caig *atimi* intas ura et idivaig inmocop: erau lep atimi ira ra a Haimenius im Felitus;

18 erus ahnag an tas inivaijec arau, um ika, Is ti pan itac inusjai u atimi; um imyiahnag nahaiji ra u nimyisjsis ninivaijec *ura*.

19 Ja et eteuc aktit nededuon ineig is ati a Atua, er aged iran intas ineig, *nikavaig*, Et ato ra a Natimarid era ilpu atimi o un ara: im lep ineig, Erumu lep ude nedo has *ura* ara asega era anvi nidai Kristo ara.

20 Ja et eti amen nipjicolt im nipjisilver ache an tah neom esjilid,

et lep amen nipjicai im nipjihat; et upene nahaijin, jam eti upene nahaijin.

21 El et ago adicinadicin yin tai natimi irai itai iji eigki, iny ijjin-itai upene aien, er ago adicin-adicin, um upene vai natimi alupas o un, um yecrei vai nauritai upene asega.

22 Namu aha aiek vai innerit has u ilpu takuras; jam ahilek nedo atoh aiek, *im* nimyiisjis ninivaijec, *im* naiheuc va atimi, *im* neigpa, ehele ra era arohoai Natimarid ara anliinmopura adicinadicin.

23 Jam ude intas ahnag, *im* intas vai intakitai, na idim ato aiek, nikavaig, et atupun nimyiisjis itai nitai iji eigki.

24 Eris idim ika yi jim imyiisjis itai a naheca u Natimarid; jam ago nedo updak va atimi asega, etmu lep emda aien par esege, *um* ago nedo eti auatiemda,

25 *um* esege updak imi ra sji eigki era imyiisjis itai ara; kit etpu alupai ra nadumoij u inliinmopura a Atua, va erupu ato upene intas inivaijec ara;

26 *um* aiji lahlah, *um* apjo nitai apro itai u Tiapolo, eris adumoij pam ara vai yin, mika eri imyiaiji intas o Atua.

NUARIN-TAS ALUPAS 3.

NAMU lep ato aiek mika, etpu yetpam niji opan ohocred an naopan iyehki.

2 Erupu aktaktai ra ache natimi, *um* has ira ra itai, *um* auyat, *um* ijinies inliinmopura, *um* asan tas has, *um* imyipalea ilpu atuil ura, *um* eti naaurineig vai itai, *um* amcel va nedo upene,

3 *um* esjum vai ilpu atimi ehpan ira ra, *um* iruhcai inliinmopura, *um* athai intas aheil, *um* auatialidi inliinmopura, *um* ijjin nedo ura, *um* amcel vai ilpu atimi upene,

4 *um* efaifa, *um* auroauro inliinmopura, *um* ijinies inliinmopura, *um* aiyu alupas inliinmopura va niji itai imyiacitak, jam aiyu tintin vai Atua;

5 *um* alaigaheni an nipjineucsera, jam ateri nemda o un: ude ra sji eigki aiek.

6 Era idivai ra sji eigki ara atahas pan irai iji innim ara, *um* imyiahnag ilpu takata auatialidi, et ahinag nedo has ura, et lep imyiahnag ra innerit has acheiachei jipe ura,

7 er esege imi ra irai iji adiat, ja et idim ehka vai ra natovaig intas inivaijec.

8 Erus idim imyiisjis itai irai Moses a Jannes im Jambres, et idim ucco, era lep acaijaig intas inivaijec ara: atimi iji eig et has inliinmopura ara, era lep ahnag an nimyiisjis ninivaijec ara.

9 Ja uhpu atapanes ra; erupu ectai nedo ahnag ura atimi asega, et idiva nedo ahnag o ohwat raigki.

10 Ja as apol upene an nesegge unyak aiek, *im* nedo unyak, *im* naktaktai u inliinmopok, *im* nimyiisjis ninivaijec unyak, *im* nedo erop unyak, *im* naiheuc va atimi unyak, *im* nedo eti auatiemda unyak,

11 *im* niji atnas vai nyak, *im* niji ohocred unyak is yetpam irak Anteok, *im* Aikoneum, *im* Listra; na ato natnas iji eigki aiek kis leucose ainyak; ja is imyiatamaig nyak vaig asega a Natimarid.

12 Maia, erupu lep leucose atnas vai ra ara asega, era ika ara eri ago nedo eccen vai Atua ara irai Iesu Kristo.

13 Ja etpu esjilid acen nedo has u ilpu atimi auatatimi, *im* ilpu atimi imyiahnag atimi, erupu imyiahnag atimi ara, ja uhpu lep imyiahnag ra.

14 Jam apol aktit aiek an nitai iji eigki as atahaijeg aiek *um* imyiisjis ninivaijec vaig, na idim ato yin aiek is esege imi euc aien;

15 As upyi ato aiek, an halav unyum um imyihum pam an naopan ineig, Intas itaup ineig eris aged, et emda par alupai euc narapakau ineig ulpu imyiatamaig *euc* vaig, va ninyiisjis ninivaijec ineig et eteuc ehele Iesu Kristo.

16 Is ahes ehele Nesgai Atua Intas asega eris aged, et lep upene va nasuptecnaigvaig *ehele atimi*, um ated *ra*, um imyiadumoij *ra*, um esege *imi ra* nedo atoh:

17 va etpu ato niji itai asega natimi u Atua, *um* emda acen an nauritai upene asega.

NUARIN-TAS ALUPAS 4.

1 EK efasaig *ehelum* ainyak an nuhup u Atua, im lep Iesu Kristo Natimarid ineig etpu asuptecnaig nintan aien imi ilpu atimi umumoh im ilpu atimi emesmas, an nehcohos pam o un an nelcau o un;

2 mika an asuptecnaig intas aiek; namu emda aiek an naopan ineig et upene, im lep an naopan ineig et eti upene; namu tas aiek *ehele atimi*, *um* acaiji *ra*, *um* ated *ra*, auliinmopom eropse im nesege asega unyum.

3 Etpu yetpam naopan iyek eru wit esjum ara va nesege inivaijec; ja erupu ikni ilpu atimi esege imi ra ara, yi idivaig innerit has ura, etpu aceigceig intikgara ara;

4 erupu auhaig pan intikgara ara eahki vai intas inivaijec, um atgeig pan u intas ecisipece vai intakitali.

5 Jam aminjinai euc aiek an niji itai asega, *um* leucse nohocred, *um* ago nauritai u natimi asuptecnaig intas-upene, *um* ago ehni nauritai unyum.

6 Er atupun par ahlap irak, et mun lep ubutpotet u naopan mas unyak ainyak.

7 Kis mun ago nedoa upene ainyak, kis mun athut ehni ainyak, kis apol an ninyiisjis ninivaijec ainyak:

8 eris lep ati ini nyak korona va nedo atoh, etpu alupai nyak an nadiat iyek a Natimarid ineig etpu asuptecnaig upene nintan *imi atimi* aien: jam eti imi nyak ache, jam lep imi ra asega era imyiacitak ara va nehcohos pam o un.

9 Namu auroauro aiek, um apam ehelek tupko:

10 is ude nyak a Timas, is aiyu inliinmopon aien va nobohtan ineigki, is lep atga o un aien um apan Desalonaika; *um lep* apan Calesya a Kresens, *um lep* apan Talmesya a Taitus.

11 Et amen ache ehelek a Lukas. Leh Markus aiek, um imyiapam yin ehelek; et upene aien natau imi nyak vaig an nauritai.

12 Kis abrai Tikikus ainyak mika yi apan Efesus aien.

13 Na wit ham aiek, um apos napelumai iyehki kis ude ainyak Troas ehele Karpus, im lep nitasvitai iji ehki, *um jim* ude iji eig er aged ira arasi karimatau.

14 Is ago nedo has is ahinag vai nyak a Aleksanter, natimi auritai irai bras: etmu aru iran a Natimarid yi idiva nauritai o un:

15 namu aminjinai euc aiek vai yin; is atapanes emda intas unyima aien.

16 Is eti amen ehelek tah natimi an nupyi asuptecnaig unyak, eris ude nyak atimi asega: uhmu jim atijai ira ra *nedo ineigki*.

17 Ja is amen ehelek a Natimarid, um ago emda nyak; mika ki asuptecnaig ehni *intas-upene* ainyak; eri lep atahaijeg a nup urai iji pece asega: eris lep imyiatamaig nyak u nipjineucse laion.

18 Etpu imyiatamaig nyak a Natimarid va niji auritai has asega, um aminjinaig *nyak* pan an nelcau o un an nohatag: *uhmu* imyialhpas yin irai iji mesese. Emen.

19 NAMU aiheuc vai Priska aiek

im lep Akwila, im ra an ninnim u Onesiforus.

20 Is amen Korindus a Erastus: jai kis ude Trofimius ainyak Melitus, is emehe aien.

21 Namu auroauro aiek, um uhup um apam, ja etpu mesese. Et

aiheuc vai euc a Yubulus, im Putens, im Lainus, im Klatya, im ilpu etoaija asega.

22 *Etmu amen* anliinmopom a Iesu Kristo Natimarid.

Uhm aiheuc vai caua. Emen.

NITASVITAI O PAULO NAPOSTOLO

IMI

T A I T U S.

NUARIN-TAS ALUPAS 1.

AK Taitus, inhal inivaijec *unyak* an nimyisjis ninivaijec uja asega, *ek aiheuc* vai euc *ainyak* Paulo, naheca u Atua, im napostolo o Iesu Kristo, *par asuptechnaig* nimyisjis ninivaijec ehele ra sji ehki is ehtai ra a Atua, mika eri ato upene intas inivaijec ara par ago nedo eccen vai Atua,

2 um aitgaig nitai umoh iran ineig inyi ti lep ti, is upyi asaig a Atua ineig et eti aheil aien, an naopan iyelki is pam eti eteuc nobohtan;

3 ja is ehvaig intas o un aien an naopan o un an nesege ineig eris ati imi nyak, et idivaig intas alep o Atua ineig et imyiatamaig caija aien:

4 *Etmu amen ehelum* naiheuc, *im* neti aru, im neigpa, et alies ehele Atua Etmajja, im Iesu Kristo Natimarid, Natimi imyiatamaig caija.

5 VA nitai ineigki kis ude euc Kriti ainyak, mika an ago atoh nitai iji eigki aiek eris eti ago ehni, um ikni ilpu atimi tas alep irai iji uari-pece asega, et idivaig intas n eig kis asaig ehelum ainyak:

6 el et eteuc tah el eh eti acaiji yin vaig tah nitai, *um* ethi ache ehgan, *um* imyisjis ninivaijec a ilpu hal o un, er eti lep tas va nauatatimi *ura*, im nedo imyipalea.

7 Eris idim ika va natimi aminjina nakalasia, er eti acaiji yin vaig tah nitai, et idivaig naheca u Atua; *um* eti imyisjis itai, *um* eti fi auroauro um atavaitap, *um* eti umnyi alupas waina, *um* eti abli atimi, *um* eti merit alupas vai inpadiaig has vaig;

8 jam alaa atimi, *um* aiyu inliinmopon vai ilpu atimi upene, *um* ago nedo erop, *im* nedo atoh, *im* nedo upene, *um* ahtapanes immerit has o un,

9 *um* apol aktit an tas inivaijec, et idivaig eris esege *imi yin*, va etpu emda aien par ated ilpu atimi imyisjis itai, um ahidai ra, an nesege inivaijec o un.

10 Era ahinag a ilpu atimi imyipalea, *im* ilpu atimi asaig intakitai, im ilpu atimi efaifa; ja era has esjilid ara ilpu atimi eris aperi-tome ira ra:

11 eris idim ika uhpu auud yi aiji-raig intas ura; era imyialmag atimi asega irai immim et ahinag

ara, um esege nitai iji eigki et eti upene, mika eri leh inpadiaig has vaig.

12 Is ika natimi is ethi ira ra, is aprofeta ura aien, "*Era atimi asan tas aheil a nupu Kriti irai iji mesese, um atimi esjilid an nauatatimi, um atimi esjum nago itai vaig, jam hag alupas.*"

13 Et inivaijec intas ineigki. Va nitai ineigki namu ated emda ra aiek, mika eri cehcehe ara an nin-yiisjis ninivaijec *ura*;

14 *um* eti imyiaiji intas ecsipece vai intakitai u nupu Jutaiia, im intas alep u atimi iji eig era atidjira ara an tas inivaijec.

15 Et upene niji itai asega imi ilpu atimi upene; ja et eti upene tah nitai imi ilpu atimi auatatimi im ilpu atimi imyiisjis nahcil; et lep has inliinmopura ara im nak-taktai *ura*.

16 Era ika ara era ato Atua, jam ateri *yin* an nedo *ura*; era ilpu atimi auatatimi ara, um ilpu atimi imyipalea, um auatialidi nagovaig tah nauritai upene.

NUARIN-TAS ALUPAS 2.

NAMU asuptecnaig nitai iji eigki aiek et upene an nesege inivaijec, *nikavaig*,

2 eri aminjina nedo ura a ilpu fatimi, *um* ago nedo upene, *um* aktaktai upene; *etmu* cehcehe ninyiisjis ninivaijec *ura*, *im* naiheuc *va atimi ura*, *im* nedo eti auatiemda *ura*.

3 Et idim lep ucco vai ilpu takata efatimi, *erumu lep ago* nedo ineigki ara et upene vai ilpu takata alaig-aheni, *um* jim tas has *va atimi*, *um* jim umnyi alupas waina, jam esege niji itai upene;

4 um lep ated upene ilpu takata takuras, mika yi aiyu inliinmopura ara vai ilpu atamnyura, im lep vai ilpu hal *ura*,

5 *um* aktaktai upene, *um* eti ago ingaijid, *um* aminjinaig upene ninnim *ura*, *um* ago nedo upene, *um* imyiaiji intas o ilpu atamnyura, va uhpu eti asan tas has vai intas o Atua.

6 Um lep ated ilpu takuras aiek, mika eri aktaktai upene ara:

7 namu itai asjaaicnaig aiek an nedo upene asega: *etmu* inivaijec nesege unyum, *um* upene, *um* emda,

8 *um* asan tas inivaijec ineig, *in-yi ehka vaig tah* nauud yi aijiraig vaig; va erupu ehcamai a ilpu atimi imyiisjis itai, um ti asan tas has vai caua.

9 *Namu ated* ilpu aheca *aiek*, mika eri imyiaiji intas o ilpu atimi alupas ura ara, um ago nedo ineig et upene *vai ra* an niji itai asega; um jim imyiisjis itai;

10 um jim ehneg itai, jam ago nedo inivaijec asega; va uhpu imyiahpas nesege u Atua vai ra an niji itai asega, aien aigki et imyiatamaig caija aien.

11 Is ehcolhos pam naiheuc ineig o Atua er imyiatamaig atimi asega vaig,

12 um esege imi caija, mika ti ude nedo has akaija, im inmerit has u inliinmopja itu, jam aktaktai upene, um ago nedo atoh, im nedo eccen vai Atua, an nobohtan ineigki;

13 um eas va nitai upene ineig er idim aitgaig, im nehcolhos pam u natimi alupas u Atua esjilid, im Natimi imyiatamaig caija Iesu Kristo;

14 aien is ahtai yin aien vai caija, mika yi auarimtaija aien va nedo has *uja*, um ago adicinadicin ilpu atimi esjilid imi yin, *um* emda u nedo upene.

15 *Namu esege* nitai iji eigki aiek, um tas upene *ehele atimi*, um ated emda *ra*. *Etmu* jim amcel vai cuc tah natimi.

NUARIN-TAS ALUPAS 3.

AHUGNI lelra aiek, mika eri
 eccen ara vai ilpu atimarid,
 im ilpu atimi tas alep, *um lep* im-
 yiaiji intas o ilpu atimi alupas,
um aitgaig par ago nauritai upene
 asega,

2 *um* eti asan tas has va atimi,
um eti chtauro, jam ago nedo
 erop, *im* nedo updak asega va
 atimi asega.

3 Intis idim ahnag akaija itu
 acen, *um* imyipalea, *um* imyiisjis
 nahcil, *um* aheca u inmerit has *u*
inliinmopja im niji itai imyiaci-
 tak aheiachei jipe, *um* ago nedo
 edemda im nedo auatitai, *um* acen
 inliinmopoi *atimi* vai caija, *um*
 amcel jipe vai caija.

4 Ja is ehva nedo upene im nedo
 aiheuc va atimi o un a Atua ineig
 et imyiatamaig caija aien,

5 *um* imyiatamaig caija an nai-
 heuc o un, *jam* eti va nedo atoh
 intis ago akaija, ja is yiri *caija* aien
 an lep apos *caija*, *um* ago upene
caija an Nesgan Upene;

6 aien aigki is atladwi alupas iraija
 aien, irai Iesu Kristo Natimi in-
 yiatamaig caija;

7 mika uhpu ika et atoh nedo uja
 va naiheuc o un, inta lep ilpu hal o
 un akaija par aitgaig nitai umoh
 iran ineig inyi ti lep ti.

8 Et inivaijec intas ineigki, ek
 lep merit ainyak mika an asup-

tecnaig nitai iji eigki aiek irai
 iji adiat; mika eri aktaktai upene
 a ilpu atimi asgeig irai Atua par
 ago nedo upene. Et upene nitai
 iji eigki va atimi, uhpu lep leh
 nintan.

9 Jam ude intas vai intakitai, im
 intas va nidai ilpu retpoija, im neh-
 tauo, im ninyiisjis itai vai intas
 alep; et maumau nedo ineigki, *um*
 ahnag.

10 Uhpu ehcero ated natimi ineig
 et atupun ninyiisjis itai aien, ja
 par atcejai yin;

11 na idim ato aiek mika, et mun
 adumoiy aien, *um* ago nedo has, et
 lep ated yin inliinmopon.

12 EK wit abraig pam Artemas
 ka Tikikus ehelum ainyak, namu
 auroauro aiek, *um* apam ehelek
 Nikopolis: ek ika ainyak ki amen
 eahki an mesese ineig.

13 Namu emda aiek *um* ahced
 Sinas natimi asuptecnaig intas alep,
 im Apollos, an natga urau, va eru
 jim ihki natimi arau vaig tah
 nitai.

14 Namu lep esege imi ilpu etoaija
 aiek, mika eri emda ara, *um* ago
 nauritai upene par aiheuc va atimi,
 va erupu ohoi itai ara.

15 Era aiheuc vai euc natimi
 asega amen ehelek. Namu aiheuc
 vai ra aiek et aiyu inliinmopura ara
 vai cama va ninyiisjis ninivaijec.

Uhm^u aiheuc vai caua asega.
 Emen.

NITASVITAI O PAULO NAPOSTOLO

IMI

FILIMON.

A K etoamrau Filimon, natimi im-taam auritai ehelemrau, *ecrau aiheuc* vai euc *aijumrau*, Paulo, natimi ineig eris arore nyak vai Iesu Kristo, im Timodeus etoai-jau,

2 *ecrau* lep *aiheuc* vai Afea etoamrau *aijumrau*, im Arkippus neucsupo etoamrau, im lep nup an nakalasia an nimnim unyum:

3 *Etmu amen* ehelemia naiheuc im neigpa ineig et ahes ehele Atua Etnaija, im Iesu Kristo Natimarid.

4 EK naaurineig vai Atua unyak ainyak, um aniv euc an nalaigaheni unyak irai iji adiat;

5 kis idim atahajjeg intas va naiyu u inliinmopom ainyak, im nimyiisjis ninivajjec unyum vai Iesu Natimarid, im ilpu atimi upene asega;

6 mika yi emda nasipiaig nimyiisjis ninivajjec unyum, va ulpu ato niji itai upene asega iramia vai Iesu Kristo.

7 *Ecrau* imyiacitak *aijumrau* um cediaig va naiyu u inliinmopom, et lep imyiacitak inliinmopoi ilpu atimi upene vai euc, ak etoak.

8 ¶ Ek idim emda ainyak vai Kristo par tas alep ehelum va nitai ineig et upene;

9 ja ek ugni *euc* ainyak va naiyu u inliinmopom *vai nyak*, ek mun efatimi ainyak Paulo, um lep atimi ineig eris arore nyak vai Iesu Kristo.

10 Ek ugni euc ainyak vai Onesi-

mus inhal unyak, kis apos yin ainyak an narore nyak vaig:

11 is takitai vai euc aien itu acen; ja et upene aien vai nyak, im lep vai euc, an naopan ineig:

12 ek mun lep abraig pam yin *ehelum* ainyak: namu leh yin aiek, et idivaig inhal unyak aien:

13 kis idim merit ainyak mika yi amen ehelek aien, um isjipigmoig euc, *um* aheca unyak, an narore nyak vaig vai intas-upene;

14 jai kis ika ainyak ki upyi ato inliinmopom *vai yin*, ja par ago, va an jim ago nedo upene ineig aiek va nimyiisjis *unyak*, jam vai intup naiheuc *unyum*.

15 Kit is ude *euc* ipjidipjid aien, mika napu lep leh yin aiek *yi amen* ehelum irai iji mesese;

16 jam eti lep idivaig naheca, et esjilid irai aheca aien, et idivaig etoak upene, ja et lep etoam aien um atimi ehpan iram, an nohun, im lep irai Natimarid.

17 El et ika aiek ek apah *unyum* ainyak, namu leh yin aiek, um idivaig nyak.

18 El is ahneg tah nitai unyum aien, ka eti aru *tah nitai unyum*, namu aged nitai iyelki aiek ehelek;

19 ek mun aged *intas ineigki* ainyak Paulo an nikmak, ekpu aru ainyak: ja ek eti ika ehelum ainyak, na eti aru unyak aiek vai euc.

20 Maiya, ak etoak, ekmu imyiacitak ainyak irai Natimarid vai euc: namu lep auacediaig inliinmopok aiek irai Natimarid.

21 Ek ato ainyak, nikavaig, napu

imyiaiji intas *unyak* aiek, va nitai ineigki ek mun aged *nitastvitali* im-tam ainyak, ek lep ato ainyak mika, napu ago nedo esjilid iran neigki aiek ek mun asaig ainyak.

22 Im lep ineig, namu imyecrei neom ineig aiek, ekpu amen iran ainyak: ek ika ainyak uhpu lep ati nyak ehelema va nalaigaheni unyimia.

23 ET aiheuc vai euc a Epafra, eris eharore cumrau vai Iesu Kristo;

24 *im lep* Markus, *im* Aristarkus, *im* Timas, *im* Lukas, ilpu atimi imtaam auritai ehelek.

25 *Etmu amen* anliinmopomia naiheuc o Iesu Kristo Natimarid uja. Emen.

NITASVITAI

IMI

ILPU HIBRU.

NUARIN-TAS ALUPAS 1.

IS ehcahinag tas a Atua ehele ilpu retpoiija itu acen irai ilpu profeta *o un*, is acheiachei *intas o un*;

2 ja par apitac um tas eheleija an naopan ineig irai Inhal *o un* ineig, is ati yin aien mika yi ohuun niji itai asega aien, is lep ago nohatag im nobohtan aien vai yin;

3 is aijoran natimi alupas *o un* aien, is lep tup idivai neteuc *o un* aien, um aminjinaig niji itai asega an tas emda *o un*; is wat ahlap va nedo has uja iran aien, is ateucese aien an matai Natimi alupas ijinies acen;

4 et esjilid aien irai ilpu agelo, et lep esjilid nidan ineig eris alupai yin irai idara.

5 Is eti tas a Atua ehelen tah nagelo an tah naopan, *um ika*, "Nai Hal unyak aiek, ek mun apos euc ainyak an nadiat ineigki:" im lep ineig, "Ekpu Etmu ainyak, etpu lep Hal unyak aien:"

6 im lep ineig, et wat lep imyiapam Inhal *o un* inmetto aien an nobohtan, et ika aien, "Erumu atpuse an nuhup *o un* a ilpu agelo o Atua asega."

7 Ja is ika aien vai ilpu agelo *o un*, "Et ago ra aien eri idivai imtinjop a ilpu agelo *o un*, um idiva nawainapit a ilpu aheca *o un*."

8 Ja is ika aien ehele Inhal *o un*, "Ak Atua, et amen natimi alupas unyum irai iji mesese, *um lep* atoh nedo asega unyum an nelcau unyum:

9 as merit va nedo atoh aiek, jam amcel va nedo has; va nitai ineigki is aspi euc a Atua ineig, et Atua unyum aien, an narakei ineig er imyiacitak, na lep esjilid aiek irai ilpu etoam."

10 Im lep ineig, "Ak Natimarid, as ati nededuon nobohtan aiek itu acen, et lep auritai u niknam nobatag:

11 etpu idim ti nitai iji eigki; ja napu amen aiek: etpu molitai itai niji itai asega et idivaig napelu-mai;

12 napu asvi aiek et idiva napamas, etpu lep eche : ja nai tup ethi ache aiek, inyi ti lep ti inmesese iram."

13 Ja is eti tas aien ehelen tah nagelo an tah naopan, *um ika*, "Namu ateuc aiek an matak, um uhum pan naopan iyehki ekpu ikni ilpu atimi tak atimi iram ainyak, mika eri itai atijai neduom iran."

14 Era esgai itai ara asega par aheca, eris abraï ra mika eri apan ara um auritai vai ra sji eigki erupu leh nimyiatamaig ra ara.

NUARIN-TAS ALUPAS 2.

1 VA nedo ineigki eris idim ika ti apos upene nitai iji eigki akaija tis atahaijeg vaig akaija, vai ti jim ehveliek akaija an tah naopan.

2 El is ipjin intas iyehki eris asuptecnaig a ilpu agelo, el eris lep ati neruvaig atoh nedo has im nedo imyipalea asega ;

3 intupu aha akaija um han id, ele ta eti aktaktai nitai imyiatamaig *caija* esjilid akaija, is upyi hup a Natimarid um tas vaig, ja eris par apitac ara sji ehki um asuptecnaig upene eheleija, eris atahaijeg *yin* ara ;

4 is lep ago ipjin *intas ura* a Atua irai itai asjaaicnaig, im itai imyiali, im auritai ehka acheiachei, im niji itai tup ahtai u Nesgan Upene, is idiva nasaig o un ?

5 Is eti ikni ilpu agelo aien, mika eri esjilid ara irai itai iji eigki etpu yetpam, eera tas vaig aijama.

6 Ja is tas tah is ethi an nuarin is ethi, um ika, "Et idivanhe natimi, mika an imyiehva yin aiek ? *et* lep *idivanhe* inhal u natimi, mika an aminjinai yin aiek ?

7 as ati yin aiek, mika yi upo-
upo tintin irai ilpu agelo aien ; as
asaig aiek mika ulmu imyiahpas

yin, um ago nedo eccen vai yin ;
as lep ati yin aiek, mika yi esjilid
aien irai auritai an nikmam :

8 as ikni niji itai asega ithan
neduon aiek." Is wat ikni niji
itai asega ithan aien, is eti ude tah
nitai ineig aien, is eti ati ithan.
Ja inta eti ecetai niji itai asega
ithan akaija an naopan ineig.

9 Ja inta alum Iesu akaija is
upoupo tintin irai ilpu agelo aien,
ja er asaig mika ulmu imyiahpas
yin, um ago nedo eccen vai yin, vai
inmas ohocred o un ; is idim leh
inmas aien va atimi asega va nai-
heuc o Atua.

10 Is upene vai yin, *et eteuc* niji
itai asega vai yin, is ago niji itai
asega aien, par ika yi esjilid natimi
alupas imyiatamaig ra, va ohocred
o un, et wat imyiapan ilpu hal o un
is ahinag an nohatag aien.

11 *Et* ethi ache *etmara* asega,
nikavaig, aien et ago upene *ra*
aien, im lep ra sji eigki er ago
upene ra ; va nitai ineig et eti eh-
camai aien nanvi nidara vaig par
ika ilpu etoan,

12 um ika, "Ekpu asuptecnaig
nidam ehele ilpu etoak ainyak :
ekpu acesaces nohranitai vai euc
ainyak an nuhup u atimi asjapic-
naig ;"

13 im lep ineig, "Ekpu asgeig
iran ainyak." im lep ineig, "Alum
nyak aiek, im ilpu hal *unyak* iji
eigki is alupai nyak a Atua."

14 Va nitai ineig, et idim eteuc
nohui ilpu hal o un, im lep inja *ira*
ra, et idim ucco, is lep leh *nohun*
aien ; mika yi auahas natimarid an
mas, Tiapolo marom, vai inmas o
un ;

15 um imyiatamaig ra sji eigki
eris ohocred ara irai iji adiat an
numumoh *ura* va nintitan mas
ura.

16 Et idim eti atau imi ilpu agelo
aien ; ja et atau imi ilpu mapoi
Ebrahim aien.

17 Va nedo ineigki eris idim ika

yi idivai ilpu etoan aien an niji itai asega, va etpu atimi esjilid an nahlap aien, um aiheuc *vai caija*, um inivaijec, an niji itai u Atua, mika yi ahlap vai edo has u atimi, um asan neigpa.

18 Is idim ohocred aien an noop yin vaig, va nitai ineigki et lep emda aien par atau irai ra sji eigki er oop ra.

NUARIN-TAS ALUFAS 3.

AK ilpu etoak upene, eris imyia-caij caua u niji itai an nohatag, akumu aktaktai Iesu Kristo aijaua, Napostolo im Natimi esjilid an nahlap an nalaigaheni uja;

2 is inivaijec aien ehelen is ati yin aien, et idivaig *is inivaijec a* Moses an neom asega o un.

3 Is idim esjilid aien irai Moses an natimi alupas o un, et idivaig et esjilid an neom a natimi ineig et ago neom aien.

4 Era ago sjipe niji eom asega atimi; ja aien is ago niji itai asega aien et Atua aien.

5 *Is* idim inivaijec a Moses an neom asega o un, is idivaig naheca o un par asuptecnaig nitai iji eigki uhpu asaig *an tak aopan*;

6 ja et idivaig Inhal o un a Kristo, um esjilid an neom o un; inta lep eom o un akaija, ele ta apol aktit akaija an tas emda, im nitai ineig inta aitgaig akaija um tas alupas vaig, um yetpan an nehni o un.

7 Va nitai ineigki et idivaig et ika a Nesgan Upene, "El eka atahajeg intas o un aijaua an naopan ineig,

8 etmu jim ipjin inliinmopomia, et idivaig an nimyiisjis itai, an naopan iyehki marom eris ago nedo oop iran an namasacen:

9 eris ago nedo oop nyak eahki a ilpu retpomia, *um* imyipalea intas

unyak, um almoi niji auritai unyak, irai mesese is forte:

10 kis edemda ainyak va atimi an naopan iyehki, um ika, Et ahnag inliinmopura ara irai iji adiat; era lep eti ato nedo unyak ara:

11 va nitai ineigki kis asig yi aktit intas ainyak an nedemda unyak, *um ika*, Eri eti apan ara an nuarin atumop unyak."

12 Ak ilpu etoak, akumu amin-jinai caua aijaua, vai yi jim amen ehelen tah caua inliinmopon has, et imyiisjis nahcil, um ude Atua umoh.

13 Jam ated sjipe caua irai iji adiat, eh wat anvi nidan par ika, "An naopan ineig;" vai yi jim ipjin inliinmopon tah caua va nefaifa an nedo has o un.

14 Inta tup ethi pan irai Kristo akaija, ele ta apol aktit akaija an nimyiisjis inivaijec uhup uja, um yetpan u nehni o un;

15 eris idim asaig, *um ika*, "El eka atahajeg intas o un aijaua an naopan ineig, etmu jim ipjin inliinmopomia, et idivaig an nimyiisjis itai."

16 Eris wat atahajeg hal ra, eris imyiisjis itai ara, jam eti ara sji ehki asega is iknipagki ra an *pece* Ijpt a Moses.

17 Ja is edemda aien vai di irai mesese is forte? Vai ra sji ehki marom, eris ago nedo has ara, eris auahas nohura an namasacen.

18 Is lep asig yi aktit intas aien ehele di, mika eri eti apan ara an nuarin atumop o un? Ehele ra sji ehki marom, eris imyipalea ara.

19 Inta idim ato akaija mika, is ehka vai ra napanvaig *iran* va nimyiisjis nahcil *ura*.

NUARIN-TAS ALUPAS 4.

1 **VA** nitai ineigki intumu imtitaig akaija, vai yi jim eti leh nuarin atumop ineig o un tah caua, eris upyi tas vaig eheleija.

2 Eris asupteanaig intas-upene eheleija, et idivaig *eris asupteanaig* ehele ra; ja is eti edel intas iyehki eris asupteanaig *anliinmopoi* ra sji ehki eris atahajjeg ara, eris eti inyiisjis ninivaijec vaig ara.

3 Ja intupu apan an nuarin atumop iyehki akaija ilpu atimi inyiisjis ninivaijec, et idivaig is tas aien, *um ika*, "Kis idim asig yi aktit intas ainyak an nedemda unyak, *mika* eri eti apan ara an nuarin atumop unyak;" ja is ago ehni niji auritai *o un aien* an naopan iyehki eris ati nobohtan.

4 Is ucece intas o un an nuarin-tas is ethi va *nadiat* seven, *um ika*, "Is atumop a Atua an nadiat seven va niji auritai asega o un."

5 Is lep ucece *intas o un* an *nuarin-tas* ineig, *um ika*, "Eri eti apan ara an nuarin atumop unyak."

6 Va nitai ineigki, erupu apan an *nuarin atumop* nahaiji ra, ja eris eti apan *iran* ara sji eigki, eris uhup ara um atahajjeg intas iyehki, jam imyipalea:

7 (im lep ineig, et asjaaicnaig nadiat et ethi aien, et ika aien irai Tevit, "An naopan ineig," *nika-raig*, is wat ti pan itac inmesese is ahinag; et idivaig eris asaig, *um ika*, "El eka atahajjeg intas o un aijaua an naopan ineig, etmu jim ipjin inliinmopomia.")

8 El is alupai ra nuarin atumop a Josua, el is eti tas aien va nadiat is eche an ti pan itac vaig nitai iji ehki.

9 Et idim amen naopan atumop imi ilpu atimi u Atua.

10 Aien et mun apan aien an nuarin atumop o un, et atumop aien va niji auritai o un, et idivaig *is atumop* a Atua va niji auritai o un.)

11 Va nitai ineigki ti fi auroauro akaija, um apan an nuarin atumop ineig, vai yi jim imyipalea tah natimi, um etjo, um idivai *ra*.

12 Et idim umoh intas o Atua, um emda, um esjilid an nautoga ineig et arig nahaijin im nahaijin, et ahcai *caiija*, um ahoai noluja im nesgaija, im lep nidiyelcei *vai caiija* im nucni *edueija*, et lep ehvaig naktaktai u inliinmopja im innerit *uja*:

13 et lep eti eteuc tah nitai ineig er adenaig vai yin: ja er elgelgei niji itai asega um ehvaig an nuhup o un, etpu ahilek nedo uja aien.

14 ET idim eteuc a natimi esjilid an nahlap alupas uja is apan an nohatag aien, Iesu Inhal o Atua, va nitai ineigki intumu apol aktit an nalaigaheni *uja* akaija.

15 Et eti ehka va natimi esjilid an nahlap uja par ato nauatialidi uja; eris oop yin irai iji itai asega um idivai *caiija*, ja is eti eteuc tah nedo has *o un*.

16 Va nitai ineigki intumu emda akaija um apan u dorona aiheuc *o un*; mika *yi* aiheuc vai *caiija aien*, um atau imi *caiija* an naopan upene.

NUARIN-TAS ALUPAS 5.

1 NATIMI esjilid an nahlap asega er ehtai ra ira atimi, er lep ikni ra va atimi an niji itai u Atua, mika eri ahlap ara an niji itai tup ahtai im niji itai ahlap vai edo has:

2 et lep eti ehka vai ra par aiheuc vai ilpu atimi eti ato itai, im lep ra era ahnag ara, et idim arahed ira ra nauatialidi *ura*.

3 Va nitai ineig eris idim ika eri ahlap va nedo has u atimi, im lep ucece, va *nedo has* ura.

4 Et eti tup ispun atakoai nauritai upene ineigki tah, aien ache et aniv yin a Atua, is idivai Eron.

5 Et idim ucco, is eti ispun aktaktai a Kristo mika yi atimi esjilid an nahlap; ja aien ache, is ika

ehelen aien, “Nai Hal unyak aiek, ek mun apos eue ainyak an nadiat ineigki.”

6 Is idim lep ika aien an *nuarin-tas* is eche, “Na atimi ahlap aiek irai iji mesese, um idivaig nati Melkisetek.”

7 Is wat amen aien an nobohtan, is alaigheni aien, um ugni itai, um ahlaig ijinies, um taig, an nuhup o un is emda aien par imyiata-maig yin vai inmas o un, is atahajjeg yin aien va nedo eccen o un;

8 is idim Hal aien, ja eris esege imi yin par imyiaiji intas o un an nohocred o un;

9 is wat esjilid aien, is alupai ra sji eigki asega aien nitai umoh iran ineig inyi ti lep ti, era imyiaiji intas o un ara;

10 is anvi nidan a Atua par ika natimi esjilid an nahlap, um idivaig nati Melkisetek.

11 Ek ika ainyak ki asuptec-naig niji itai et ahinag vai yin, ja et ehka nasaigvaig, va naupat u inliinmopomia.

12 Eris idim ika eka ilpu atimi esege aijaua va *namen unyimia* um itu, ja et upene vai caua, mika yi lep esege imi caua tah niji itai uhup an tas o Atua: eka idivai ra sji eigki aijaua, et upene nidenided lumara, jam eti *upene* nitai caig incara.

13 Ara asega era ided ara, era eti ato nesege an nedo atoh ara; era ilpu hadi ara.

14 Ja et upene nitai caig incal ilpu atimi ohoigmetto, era injijene ara va nedo *ura* an natovaig nitai upene im nitai has.

NUARIN-TAS ALUPAS 6.

VA nitai ineigki ekmu ude nesege ulhup vai Kristo ainyak, um apan an nesege esjilid; um jim lep

ati inpan neom an nadumoij u inliinmopja irai edo has, im ninyiisjis ninivaijce vai Atua,

2 (*nikavaig*, nesege va nabaptiso, im natijaivaig nikma *atimi*,) im nusjai u ilpu atimi emesmas, im neruvaig ineig inyi ti lep ti.

3 El et ika a Atua, ekpu ago *nitai* ineig ainyak.

4 Et idim ehka vai ra eris upyi lah ara, um atimtim an nitai tup ahtai an nohatag, um amen ehele ra a Nesgan Upene,

5 um atimtim an tas upene o Atua, im niji auritai esjilid an napan iyehki etpu yetpam,

6 el era adumoij ara, *inyi ehka* inlep imyiadumoij inliinmopura vaig, an lep atgei Inhal o Atua ura an nauincai atgeig vai ra, um imyiafakaheil *yin* an nuhup u atimi.

7 Et ika a Atua yi upene nobohtan ineigki et umnyi incaupda et ehcahinag asuol pam iran, el et ededel inceslun upene vai ra sji eig era acujitai iran ara:

8 ja er ude *nuarin ineig* et ededel nitai upunupun iran, im nefelelicai has; uhpu auroauro um asan tas has vaig, ja par apitac um ahli.

9 Ak ilpu etoak, et idim ucco intas unyak, ja ek idim aktaktai ainyak, nikavaig, et upene nedo unyimia um idiva nedo o atimi iji er imyiatamaig ra.

10 Et eti acalacal *nedo o* Atua, inyi ti ahnag an nauritai unyimia aien im nedo aiheue *unyimia*, akis ago aijaua va nidan, akis wat aheca u ilpu atimi upene aijaua, *um aketo* um aheca *ura*.

11 Ek lep merit ainyak mika aki emda aijaua asega, um ago nedo iyehki, um aigag emda inmerit unyimia, um yetpan an nehni o un:

12 um jim auatialidi, jam apitac irai ra sji eig era leh nitai iji eigki ara eris upyi asaig, va nim-

yiisjis ninivaijēc *ura*, im nedo eti auatiemda *ura*.

13 Is wat asan tas upyi asaig a Atua ehele Ebrahim, is wat ehka par asig yi aktit intas vaig tah is esjilid iran aien, is asig yi aktit intas vai yin ache aien,

14 um ika, “Ekpu idim ago nedo upene vai euc ainyak, ekpu lep ika ainyak eri ahinag acen a ilpu mapom.”

15 Et idim ucco, is eti auatiemda inliinmopon aien, ja pah leh nitai iji eigki eris upyi asaig.

16 Era asig yi aktit intas atimi vaig tah et esjilid *ira ra* aien: era eti lep imyiisjis itai ara vai intas upyi asig yi aktit *ura*, et ipjin.

17 Is um ucce, is merit alupas a Atua nasuptecnaigvaig ehele ra sji eig, erupu ohuun nitai iji eigki ara eris upyi asaig, mika et ipjin naktaktai o un, is asig yi aktit intas *vaig* aien:

18 mika ti imyiacitak acen akaija va nitai aktit eraig et ero, et ehka vai Atua nasaig tas aheil vaig iran, intis aba pan akaija, mika ti asjiraig nitai ineig inta aitgaig akaija er ehvaig *eheleija*.

19 Et amen eheleija *nitai* ineig *inta* aitgaig akaija, et idivaig inhititautau va nesgaija, et emda um ipjin, et lep amen an *nuarin itaup* anliin natcai apelumai;

20 is uhup a Iesu um apan an nuarin ineig vai caija, eris ati yin natimi esjilid an nahlap irai iji mesese et idivaig nati Melkisetek.

NUARIN-TAS ALUPAS 7.

Is atimarid Selem a Melkisetek ineigki, *um* atimi ahlap vai Atua esjilid acen; is aubillid Ebrahim aien an nahes u natgei ilpu atimarid iji ehki o un, um asan tas upene vai yin;

2 is um alupai yin nuarin itai is ethi irai ten a Ebrahim irai iji itai

asega: nesgan tas uhup an nidan ineigki Natimarid an nedo atoli, et lep Atimarid Selem aien, nesgan tas ineigki Natimarid an neigpa;

3 is ti etman, *um* ti risin, *um* ti ilpu retpon; is ti nadiat apos yin iran, um ti nadiat mas iran; is idivai Inhal o Atua aien; et lep atimi ahlap aien irai iji mesese.

4 Akumu aktaktai natimi alupas u natimi ineigki aijaua, is alupai yin nuarin itai is ethi irai ten a etpoiija Ebrahim ira aga iji ehki eris atoraliak.

5 Eris idim asaig ehele atimi iji eig irai ilpu mapoi Livai, eris ikni ra ilpu atimi ahlap, mika eri leucose nuarin itai inyi ethi irai ten ehele atimi, et idivaig intas alep; ilpu etoara marom era idim ahes ehele nohui Ebrahim ara:

6 ja aien is eti ahes ehele ra aien, is leucose nuarin itai is ethi irai ten aien ehele Ebrahim, um asan tas upene vai yin eris asan tas upyi asaig ehelen.

7 Et idim inivaijēc neig, nika-vaig, et asan tas upene va natimi upoupo a natimi ineig et esjilid *iran* aien.

8 Et idim ucco, era leucose nuarin itai et ethi irai ten atimi eri emesmas ara, ja et idim *leucose* aien, era ika ara vai yin, et umoh aien.

9 Ek lep asan tas ineigki ainyak vai *ilpu mapoi* Livai, era leucose nuarin itai et ethi irai ten ara, ja eris alupai *yin* nuarin itai is ethi irai ten ara vai Ebrahim.

10 Eris amen an nohui etmara ara an naopan iyehki is aubillid yin a Melkisetek.

11 El eris upene asega *natimi* va nahlap u ilpu mapoi Livai, eris idim leh intas alep atimi an namen *ura*, el is eti upene mika yi atidai natimi ahlap is eche, “et idivaig nati Melkisetek,” jam eti idivaig nati Eron an nanvi nidan.

12 Eris eche a ilpu atimi ahlap, va nitai ineigki eris idim lep ika yi eche intas alep.

13 Aien er asuptecnaig nitai iji eigki vai yin, et mapoi intak atimi aien, natimi ineig marom is eti aiji u natau tah irai ilpu mapon.

14 *Er* idim ato mika, is ahes ehele Juta a Natimarid uja; is eti asuptecnaig tali nitai a Moses vai ilpu mapon, mika eri ilpu atimi ahlap ara.

15 Ja er idim ato upene, nikavaig, et atidai natimi ahlap et eche et idivaig nati Melkisetek,

16 eris eti ati yin vai intas alep an nobohtan, ja va nemda u nitai umoh iran ineig inyi ti lep ti.

17 Et asaig aien, um ika, "Napu atimi ahlap aiek irai iji mesese, um idivaig nati Melkisetek."

18 *Er* idim atipagki intas alep uhup, va nitai ineig, nikavaig, is auatialidi, um takitai.

19 Is eti upene asega tah nitai vai intas alep, ja eris atupun nitai esjilid ineig inta aitgaig akaija; inta apan ehele Atua vaig akaija.

20 Im lep ineig, eris asig yi aktit intas vai yin, *mika yi atimi ahlap aien*;

21 eris ikni ilpu atimi ahlap iji ehki, jam eti asig yi aktit intas vai ra; ja is asig yi aktit intas va natimi ineigki aien is ika ehelen aien, "Is asig yi aktit intas a Ihova, ja etpu ti lep eche inliinmopon aien," *um ika*, "Napu atimi ahlap aiek irai iji mesese, um idivaig nati Melkisetek:"

22 et idim ucco, eris ati Iesu, mika yi apos intas-etipup ineig aien, et esjilid *iran yehki*.

23 Im lep ineig, eris ahinag a ilpu atimi ahlap iji ehki, va nitai ineig, nikavaig, is ehika vai ra namenvaig vai inmas *ura* :

24 ja inyi ti lep isjipigmoig natimi ineig tah an nahlap o un, va nitai ineig, nikavaig, inyi amen aien irai iji mesese.

25 Va nitai ineigki et lep emda aien par imyiatamaig ehni ra sji eigki era apan ehele Atua ara vai yin, et idim umoh aien irai iji mesese par imyiahra ra.

26 Et upene vai caija natimi esjilid an nahlap ineigki, *et upene aien, um eigpa nedo o un, um ti nitai has iran, um eti amen ehele ilpu atimi auatatimi*, et lep aridjai an nohatag aien ijinies aceu;

27 et eti idivai ilpu atimi esjilid an nahlap iji eigki aien, eris idim ika eri ahlap irai iji adiat ara, jam uhup *um ahlap* va nedo has ura, ja par apitac *um ahlap va nedo has* u atimi: is echethi ahlap ache aien an naopan iyehki is ahtai yin aien.

28 *Er* ikni atimi iji eig era auatialidi ara mika eri ilpu atimi esjilid an nahlap vai intas alep iyehki; ja *er ati Inhal o Atua* vai intas asig yi aktit et epitpitac an tas alep iyehki, et esjilid aien irai iji mesese.

NUARIN-TAS ALUPAS 8.

NOHUUN tas iji eigki kis asuptecnaig ainyak *neigki, nika-vaig*: Et eteuc a natimi esjilid an nahlap uja ineig, et ateucse aien u dorona u Natimarid an matan an nohatag;

2 et aheca aien an nuarin itaup, im neom *alaigaheni* inivaijec ineig is ati a Natimarid, *eris* eti *ti* atimi.

3 *Er* ikni ilpu atimi esjilid an nahlap asega, mika eri ahlap ara irai iji itai tup ahtai im niji itai ahlap: va nitai ineigki et lep upene va natimi ineigki nahlapvaig an tah nitai.

4 Ja el et amen aien an nobohtan, el et eti atimi ahlap aien, era eteuc a ilpu atimi ahlap era ahlap ara irai iji itai tup ahtai et idivaig intas alep:

5 era aheca ara irai itai iji eigki, et itai asjaicnaig irai iji itai an nohatag um almun, et idivaig is

asaig a Atua ehele Moses an naopan iyehki is ika aien yi ago neom *alaigaheni*: is idim ika aien, "Almoi aiek, um ago niji itai asega et idivaig nitai asjaaicnaig iyehki as almoi aiek an lolan nedoon."

6 Et idim ucco, et esjilid nauritai o un, et idim atimi asan neigpa aien vai intas-etipup ineig et esjilid *iran yehki*, um lep amen aktit irai tas upyi asaig et esjilid *iran ji ehki*.

7 El is upene asega *intas-etipup* iyehki is uhup, el is eti eteuc *ineigki* et apitac.

8 Ja is acaiji ra aien, um ika, "Et ika a Ihova, Etpu yetpam naopan iyehki, ekpu ati intas-etipup mat ainyak imi nupu Isreel im nupu Juta:

9 inyi ti idivaig intas-etipup iyehki, kis ati ainyak ehele ilpu ret-pora, an naopan iyehki kis asjiraig nikmara ainyak, um iknipagki ra an pece Ijpt; eris eti apos intas-etipup unyak ara, kis lep eti aktaktai ra ainyak, et idim ucco intas o Ihova.

10 Et lep asaig a Ihova, *um ika*, Et wit ti pan itac nadiat iji ehki, ekpu ati intas-etipup ineigki imi nupu Isreel ainyak; Ekpu ikni intas alep unyak ainyak irai esgara, um lep aged irai liimopura; ekpu Atua ura ainyak, erupu lep ilpu atimi unyak ara:

11 eri eti esege imi ilpu atimi eblaamnem ura natimi asega, um eti lep *esege imi* ilpu etoara natimi asega, um ika, Akumu ato Ihova aijaua: erupu ato nyak ara asega, ilpu atimi alupas im lep tup atimi.

12 Ekpu idim aiheuc vai ra ainyak vai edo acalacal ura, um eti lep imyiehva edo has ura im nauatatimi ura."

13 Is wat ika aien, "*Intas-etipup* mat," is ika aien is itu iyehki is uhup: nitai ineig itu et mun muttit, et eti laulau um tup ti ehpan.

NUARIN-TAS ALUPAS 9.

ET inivaijec ineig, is eteuc niji auritai an nalaigaheni vai *intas-etipup* uhup, um lep neom itaup an nobohtan;

2 eris ago neom ahlap, *um eh-tipenes; is amen* an *nilpun* neom uhup lamp, im nitai hag, im nareto eris ahlap iran; is idan *nilpun* neom ineigki Nuarin Itaup.

3 Eris anvi nidan *nilpun* neom, anliin natcai apelumai an nidjin, mika Nuarin Itaup Esjilid;

4 is amen iran nefata colt eris atnamud nitai auanipin upene iran, im nelcau an tas-etipup, eris aso irai colt, *is amen* iran nipjicolt eris ati manna iran, im niseuc u Eron is ehcohos nerin, im inhat erahki u intas-etipup;

5 *is amen* ijnies Jerub is ero u natimi alupas u *Atua*, um adahpoi nuarin asan neigpa iran; et ehka nasuptecnaig upene vaig an naopan ineig.

6 Eris wat ago nitai iji eigki, eris apan a ilpu atimi ahlap an *nilpun* neom uhup irai iji adiat, um ago nauritai an nalaigaheni.

7 Ja *is* ehcethi *apan* a natimi esjilid an nahlap an *nilpun* neom itac irai iji mesese, aien ache, is apos inja aien, um ahlap vai yin, im lep *vai* edo has u atimi:

8 is asuptecnaig a Nesgan Upene an nedo ineig mika, eris eti ehvaig upene nefalaig apan an nuarin itaup, an naopan iyehki is wat eteuc neom *alaigaheni* uhup:

9 is almui itai *neom* iyehki an naopan iyehki, eris ahlap iran irai iji itai tup ahtai im niji itai ahlap; ja is auatialidi nitai iji eigki nago upene asega vaig inliinmopoi natimi ineig is ago nauritai iji eigki aien.

10 *Eris ago nedo ineigki* an nitai caig, im nitai umnyi, im inyiri acheiachai, im nedo an nobohtan,

eris ikni um ulum pan naopan iyehki uhpu lep ikni upene itai.

11 Ja is ehcolios pam a Kristo natimi esjilid an nahlap an nitai upene iji eigki etpu yetpam, *is apan aien* an neom *alaigaheni* alupas, um esjilid *iran yehki*, eris eti ago irai ikma atimi, nesgan tas neigki, eris eti ago *an no-bohtan*;

12 is idim ehcethi apan aien an nuarin itaup, jam eti *apan* vai inja ira anin im inhakli kurimatau, ja vai inja iran, is leh nitai umoh iran neig aien inyi ti lep ti *vai caija*.

13 El et emda inja irai kurimatau atamaig im nanin, im noha irai kurimatau atahaig eris ohaig, par ago adicinadicin nohu atimi eti adicinadicin;

14 et idim esjilid inja irai Kristo, par ago adicinadicin inliinmopomia va nauritai mas vaig, mika aki aheca u Atua umoh aijaua: is ti nitai has iran, is ispun ahlap iran aien vai Atua irai Nesgan *Upene* ineig et amen irai iji mesese.

15 Va nitai ineig et atimi asan neigpa aien vai intas-etipup mat, is mas aien nitai ahlap va nedo has *eris ago* an naopan iyehki an namen u intas-etipup uhup, mika eri leh intas upyi asaig va niji itai upene inyi amen irai iji mesese ara er ahlaig vai ra.

16 (*Et wit eteuc* nitasvitai va niji itai etpu ohuun tah, eris idim ika inyi ti ipjin um yetpan an mas u natimi ineig uhpu isjipigmoig yin.

17 Eru wit emesmas atimi, et ipjin intas er aged va niji itai uhpu ohuun: ja et wat umoh a natimi ineig uhpu isjipigmoig yin, et eti ipjin.)

18 Et idim ucco, eris ago ipjin an ja *intas-etipup* uhup.

19 Is wat esvi intas asega o Atua a Moses ehele atimi asega, et idi-vaig intas alep, is leh inja irai kurimatau atamaig im nanin aien, im inwai, im nalau irai siip, is cop,

im hissop, um ohaig an nitasvitai im lep ira atimi asega,

20 um ika, "Inja neigki vai intas-etipup is ati ehelema a Atua."

21 Is idim lep ucco, is lep ohan ja an neom *alaigaheni* aien, im nijjiitai asega er ago itai iran.

22 Er ago adicinadicin niji ubut-potet u itai asega an ja, et idivaig intas alep; el eh eti atladwi inja, el eh eti atipagki *nedo has*.

23 Eris idim ika eri ago adicin-adicin nalmu itai an nohatag va nitai *ahlap* iji eigki; jai niji itai an nohatag irai iji itai ahlap esjilid iran ji eigki.

24 Et eti apan a Kristo an *nuarin* itaup eris ago irai ikma *atimi*, um lep idiva *neom* inivaijec; ja *is* idim *apan* aien an nohatag, mika yi ehcolios pan an nuhup u Atua vai caija an naopan ineig:

25 inyi ti lep ehcahinag ahlap iran aien, um idivaig natimi esjilid an nahlap, et apan aien an nuarin itaup irai iji mesese, um *apos* inja irai itai et eche;

26 el is ucce, el is idim ehcahinag mas aien an naopan iyehki eris ati nobolhtan um imyihum pam naopan ineig: ja *is* idim ehcethi ehcolios pam aien an nehni u itai, mika yi atipagki nedo has an nitai ahlap o un.

27 Eris idim asaig mika eri ehcethi emesmas atimi, ja par apitac nasupteanaigvaig nintan *imi ra*:

28 et idim ucco, eris ehcethi ahlap irai Kristo, mika yi leucose *nintan* nedo has u atimi is ahinag aien, ja etpu lep aketo aien um ehcolios pam ehele ra era aitgai yin ara par imyiatamaig *ra*, ja inyi ti eteuc nedo has *iran*.

NUARIN-TAS ALUPAS 10.

ET almui itai upene iji eigki etpu yetpam intas alep, jam eti idi-vaig asega; va nitai ineigki et

auatialidi par ago upene asega ra sji eigki, era pan ara um ahlap irai itai ahlap iji eigki irai mesese asega, um eti atumop.

2 El is uce, el eris atumop, um eti lep ahlap; el eris ehcethi ago adicinadin upene ilpu atimi alaigheni, el eris eti lep ato nedo has *ura* ara.

3 Ja er imyieliva nedo has irai mesese asega va *nitai ahlap* iji eigki.

4 Et lep ehka vaiinja irai kurimatau atamaig im nanin niknipagkivaig edo has.

5 Va nitai ineig, is wat ehcohos pam an noboltan aien, is ika aien, "As eti merit va nitai ahlap aiek, im nitai tup ahtai, ja as ati nohuk aiek:

6 as eti imyiacitak aiek va niji itai ahlap er atnamud, im *niji itai ahlap* va nedo has:

7 jai kis ika ainyak, Ek idim ham ainyak (eris aged an nitasvitai vai nyak) par imyiaiji intas unyum, ak Atua."

8 Is wat asan tas iyehki aien, um ika, "As eti merit va niji itai ahlap aiek, im niji itai tup ahtai, im niji itai ahlap er atnamud, im *niji itai ahlap* va nedo has, um eti imyiacitak *vaig*," er ahlap an nitai iji eigki et idivaig intas alep;

9 is ika aien, "Ek idim ham ainyak, mika ki imyiaiji intas unyum, ak Atua." Et atipagki nitai uhup aien, mika yi ati nitai apitac.

10 Er ago upene caija an tas iyehki, va nohui Iesu Kristo ineig, eris ehcethi ahlap iran ache.

11 Era aiji a ilpu atimi ahlap asega irai iji adiat, um aheca, um ehcabinag ahlap an nitai ahlap et ethi, et ehka niknipagkivaig edo has iran:

12 ja is wat ehcethi ahlap ache aien va nedo has irai iji mesese, is ateuse aien an matai Atua;

13 et aitgaig aien um uhup pan

naopan iyehki, ulpu ikni ilpu atimi tak atimi iran, mika eri itai atijai neduon iran.

14 Is ago upene asega ra sji eigki aien eris upene ara irai iji mesese, an nitai ahlap o *un* is tup ethi ache.

15 Im lep ineig, et asuptecnaig eheleija a Nesgan Upene; ja is upyi hup aien um asaig, *um ika*,

16 "Et ika a Ihova, Et wit ti pan itac nadiat iji ehki, ekpu ati intas-etipup ineigki imi ra ainyak; Ekpu ikni tas alep unyak ainyak irai esgara, um lep aged irai liimopura;

17 ekpu ti lep imyieliva edo has *ura* ainyak, im nauatatimi *ura*."

18 Eh wat iknipagki edo has, er eti lep ahlap vaig.

19 AK ilpu etoak, et eti itaup vai caija napanvaig an nuarin itaup vaiinja irai Iesu,

20 an nefalaig mat um umoh, is ati vai caija aien an nateai apelumai iyehki, nohun marom;

21 *et lep eteuc* a natimi esjilid an nahlap an neom u Atua;

22 va nitai ineigki intumu apan ubutpotet anliinmopja inivaijec akaija, um imyisjis ninivaijec emda, um ago adicinadin inliinmopja va naktaktai has uja, um yiri nohuja an wai weilah.

23 Intumu apol akaija an nitai ineig inta aitgaig akaija, um jim amaamai; et inivaijec aien is asan tas upyi asaig aien;

24 intumu aktaktai sjipe caija akaija, um ated sjipe *caija*, mika yi aiyu *sjipe* inliinmopja *vai caija*, um ago nedo upene:

25 intumu jim ude nasjapicnaig uja akaija, et idiva nedo o nahaiji atimi; jam ated *sjipe caija*: akumu lep emda acen aijaua, va nitai ineig, nikavaig, eka ato aijaua mika et ubutpotet u nadiat iyehki.

26 Ele ta ato intas inivaijec akaija, ja par ispaija ago nedo has akaija,

et eti lep eteuc tah nitai ahlap et eche vai edo has,

27 ja uhpu aitgaig tah neruvaig *imi ra* er imtitaig vaig, im incop emda, etpu auahas ilpu atimi imyipalca.

28 Aien et imyipalca intas alep o Moses aien, et mas aien vai intas asuptecnaig u natimi et ero ka et esej, er lep eti aiheuc vai yin:

29 ja eka ikha aijaua, etpu esjilid neruvaig ineig eri asuptecnaig imi yin is auhi Inhal o Atua aien, um ika et takitai inja irai intas-etipup iyehki eris ago upene yin iran, um imyiafakahcil Nesgan *Upene* et aiheuc?

30 Inta ato yin akaija, is ika aien, “*Nauritai* unyak neigki neruvaig, ekpu aru ainyak; et ika a Ihova:” im lep ineig, “Etpu ahilek nedo o ilpu atimi o un a Ihova.”

31 Nitai imtitaig vaig neigki, netjose an nikmai Atua umoh.

32 Akunnu imyiehva naopan iyehki aijaua, akis upyi hup aijaua um lah, ja par leucse niji ohocred alupas, um ehtauo vaig;

33 akis wat itai asjaaicnaig aijaua, vai intas has *vai caua*, im nohocred *unyimia*; im lep ineig, akis wat tup ethi ache pan irai ra sji eigki aijaua eris ago nedo ineigki vai ra.

34 Maiya, akis aiheuc vai nyak aijaua an narore nyak vaig, eris wat atoraliak niji itai unyimia, akis imyiacitak aijaua, akis idim ato aijaua mika, et eteuc niji itai esjilid imi caua an nohatag, etpu lep amen.

35 Akumu jim atceijaig nimyisjis ninivaijec unyimia aijaua, et eteuc nimitan esjilid *imi caua* vaig.

36 Et upene vai caua nedo eti auatiemda, va, aku wit imyiaiji intas o Atua aijaua, akupu leh itai aijaua eris asan tas upyi asaig vaig.

37 “Inyi eti laulau, ja etpu eh-

cohos pam aien, eris ika etpu ham aien, ja inyi ti itu.”

38 Etpu lep umoh a natimi et atoh nedo o un va nimyisjis ninivaijec *o un*:” ja “el et adumoij nesgak, inyi ti imyiacitak vai yin ainyak.”

39 Inta eti adumoij pan akaija u nauahas *caija*; ja inta imyisjis ninivaijec akaija va ninyiatanaig-vaig nesgaija.

NUARIN-TAS ALUPAS 11.

ET esgan nitai iji eigki er aitgaig nimyisjis ninivaijec *uja*, um lep itai ehvaig nitai iji eigki er eti almoi.

2 Eris ika vai ilpu retpoiija eris ilpu atimi upene ara, va *nimyisjis ninivaijec ura*.

3 Inta ato akaija va nimyisjis ninivaijec *uja* mika, is eteuc niji itai asega vai intas o Atua, eris eti ago niji itai er almoi irai iji itai er ecetai.

4 Is imyisjis ninivaijec a Ebel, is um esjilid nahlap o un vai Atua an *nahlap* u Kein; va nitai ineigki eris ika vai yin is atoh nedo o un, is lep ika a Atua is upene niji itai tup ahtai o un: is mas aien, ja et tas vaig aien an naopan ineig.

5 Is imyisjis ninivaijec a Inok, eris um atipagki yin, mika yi jim mas aien; “eris eti ecet yin, is idim atipagki yin a Atua:” eris wat eti fi atipagki yin, eris ika, is upene inliinmopoi Atua vai yin.

6 El et eti imyisjis ninivaijec *tah*, et ehka *vai yin* par ago nedo ineig et upene inliinmopoi *Atua* vaig: aien et apan ehele Atua aien, eris idim ika yi imyisjis ninivaijec aien mika, et eteuc aien, etpu lep ago neruvaig imi ra sji eig aien era ahilek emda yin ara.

7 Is wat asuptecnaig ehele Noa a Atua niji itai eris eti fi ecetai, is imyiisjis ninivaijec aien, um imtitaig, um ago nelcau par imyiatamaig atimi an nimmim o un; is ated atimi an nobohtan aien an nedo ineigki, um ohuun nika et atoh nedo o atimi va nimyisjis nini-vaijec ura.

8 Is wat imyiacaij Ebrahim a Atua, mika yi apan aien an pece iyehki, etpu leh aien an tak aopan um ohuun; is imyiisjis ninivaijec aien, is um imyiaiji aien um apan, jam eti ato nuarin ineig inyi apan iran:

9 is imyiisjis ninivaijec aien, um amen an pece iyehki eris asan tas upyi asaig vaig, is idivaig an taka pece; is amen aien irai tup innim, im lep Aisak im Jakob; ja eris asan tas upyi asaig iyehki, mika ehtijpu ohuun itai ahtaij:

10 is aitgaig nuarin-pece iyehki aien, et eteuc inpai eom iran, is asjaaicnaig iran a Atua, um ago.

11 Is imyiisjis ninivaijec a Sera, is um emda aien, um asvalav, um apos inhal o un an nefatimi o un, is idim ika aien, et inivaijec aien is asan tas upyi asaig aien:

12 va nitai ineigki eris ahes ehele natimi is ethi, is idivaig natimi mas aien, natimi is ahinag, um idivai moiyeuv an nohatag, um lep idivaig nauanahvig, et ehka nesvivaig.

13 Eris mun ememas ara sji ehki asega an nimyisjis ninivaijec ura, eris eti fi ohuun itai eris asan tas upyi asaig vaig, ja eris ecetai itac acen ara, um imyiisjis nini-vaijec vaig, um imyiacitak, um asuptecnaig, um ika, eris up uran pece is eche ara, um ilpu atimi amen ehcid an nobohtan.

14 Ara era asan tas iji eigki ara, era asuptecnaig upene ara mika, era ahilek inpece ura.

15 Et inivaijec ineig, el eris aktaktai inpece iyehki ara eris ahes iran ara, el is tup upene vai ra inlep adumoj pan vaig iran:

16 ja era idim ahilek inpece esjilid imi ra ara, an nohatag marom: va nitai ineigki et eti ehcamai vai ra a Atua naniv yin vaig mika Atua ura: is idim yecrei nuarin-pece imi ra aien.

17 Is wat ahilek inliinmopoi Ebrahim a Atua, is imyiisjis nini-vaijec aien, um ahlap irai Aisak: maiya, is ahlap irai inhal o un is tup ethi ache aien, aien aigki is imyiisjis ninivaijec niji tas upyi asaig iji eigki aien,

18 eris asaig ehelen, um ika, "Erupu ahes ehele Aisak a ilpu mapom:"

19 is ika aien is emda a Atua nymyinusjai yin vaig vai inmas o un; is um lep leh yin o un, is idivaig nescipece.

20 Is imyiisjis ninivaijec a Aisak, um asan tas upene vai Jakob im Isa va niji itai etpu yetpam.

21 Is wat ubutpotet u unmas u Jakob, is imyiisjis ninivaijec aien, um asan tas upene vai ohwat hal o Josef; "is aijisji an niseuc o un aien, um alaigaheni."

22 Is wat ubutpotet u unmas u Josef, is imyiisjis ninivaijec aien, um asuptecnaig va napan u nupu Isreel, um asan tas o un va niji eduon.

23 Erus wat apos Moses ahwat atmil o un, erus imyiisjis ninivai-jec arau, um adenai yin an mohoc is esej; erus idim alum yin arau mika, is halav esjilid aien; erus eti imtitaig intas alep u natimarid arau.

24 Is wat alupas a Moses, is imyiisjis ninivaijec aien, um esjum nanvi nidan vaig mika inhal u inhalav atabaig u Fero;

25 is ika aien is upene iran inleucsevaig nohocred ehele ilpu atimi u Atua, jam eti upene ninyiacitakvaig nedo has et eti laulau;

26 is ika aien is itai esjilid inleha-vaig namcel vai Kristo irai padiaig an *pece* Ijpt: is aktaktai nimitan esjilid aien:

27 is imyiisjis ninivaijec aien, um ude Ijpt, um eti imtitaig intavaitap u natimarid: is amen aktit aien et idivaig *tah et* alum yin *aien* er eti ecet yin:

28 is imyiisjis ninivaijec aien, um apos napaska, um lep ohan ja, vai yi jim ubli ra aien is auahas ilpu halav *atamaig* inmetto aien:

29 Eris imyiisjis ninivaijec a *nupu Isreel*, um algauwaig an jop cop, is idivaig *nobohtan* mese; eris wat ika a nupu Ijpt *eri lep algauwaig*, eris atpujij ara.

30 Eris wat arahed an nathatahau Jeriko ara ira adiat is seven, is echedeliexse *nathatahau* va ninyiisjis ninivaijec *ura*.

31 Is imyiisjis ninivaijec a Rehab intakata ago ingaijid iyehki, is um leh ohwat atimi almaijidjid *inpece* erahki aien, um aiheuc *vai rau*, is um eti mas aien ehele ilpu atimi imyipalea.

32 Ekpu asan he ainyak? et ehka vai nyak an naopan ineig nasuptecnaigvaig Citeon, im Berak, im Samson, im Jefda, im Tevit, im Samuel, im ilpu profeta:

33 eris imyiisjis ninivaijec ara, um esjilid irai up urai iji taka *pece*, um ago nedo atoh, um ohuun itai eris asan tas upyi asaig vaig, um atapanes nipjieucse laion,

34 um ahni incop alupas, um ethan nauitoga; eris emda ara an nauatialidi *ura*, um esjilid an nedoa, um ahau ilpu eucsupo irai taka *pece*:

35 eris leucse ilpu hal *ura* a ilpu takata, eris imyianusjai ra vai

inmas *ura*: eris um auud nahaiji ra, eris ika *atimi* eri atcejai ra, ja eris esjum ara; va uhpu imyianusjai upene ra:

36 eris um imyiafakahcil nahaiji ra, um aredei ra, um arore ra, um ikni *ra* iraili eom ipjin,

37 um asji ra irai hat, um ucsamud ra, um oop ra, um atgei ra irai autoga: eris amen ehcid ara, um aso ra ira arasi siip im narasi anin; eris ilpu ihki atimi ara, um cheigtaig, um ohocred;

38 is eti upene nedo o atimi an nobohtan mika eri amen ehele ra; eris amen ira amasacen ara, im lep lola edoon, im inmai ij, im iumai tan.

39 Eris ika vai ra sji eigki asega eris ilpu atimi upene ara, va ninyiisjis ninivaijec *ura*; ja eris eti ohuun itai iji eig ara, eris asan tas upyi asaig vaig:

40 ja is ato tah nitai esjilid imi caija a Atua, mika eri upene asega ara um tup ethi ache pan iraija.

NUARIN-TAS ALUPAS 12.

ERA arahed iraija natimi et ahi-nag acen, um almaijidjid *caija*, va nitai ineigki intumu iknipagki niji itai opouc asega akaija, im nedo has ineig et apol *iraija*, um athut emda an nathut ineig er ati an nuluhu-ja,

2 um aes pan Iesu, aien aigki is atupun ninyiisjis ninivaijec *uja* aien, um lep ago ehni; is lep mas aien an nauincai atgeig, jam eti ehcamai, va ninyiacitak ineig eris ati an nuluh o un, et lep ateuc aien u dorona u Atua an matan.

3 Akumu aktaktai yin aijaua, eris imyiisjis itai emda vai yin a ilpu atimi auatatimi, va aki jim areci

aiaua, um auatialiidi inliinmopomia.

4 Akis eti emesmas aiaua an nimyisjis itai unyimia par atapanes nedo has :

5 eka ahnag irai tas ated *caua* aiaua, et tas ehelemia et idivai ilpu halav, *um ika*, “Ak inhal unyak, jim imyiacal nated *euc* u lhova aiek, um jim auatialiidi vai intas acaiji *euc* o un :

6 et acaiji ra sji eigki a lhova et aiyu inliinmopon aien vai ra, um aredei ilpu hal *o un* asega iji eig et leh ra aien.”

7 El et ated *caua* a Atua, eka idivai ilpu hal *o un* aiaua; inhalav a di neigki et eti ated yin a etman?

8 El eh eti ated *caua*, el eka ilpu halav an nefalaig aiaua, um eti ilpu halav *inivaijec*, eris ated ra asega.

9 Im lep ineig, eris ated *caija* a ilpu etmai ohuja, intis eccen vai *ra* akaija; et idim ucco, intumu emda akaija par imyiaiji intas o Etmai esgaija, par umumoh :

10 eris ated *caija* ara ira adiat is eti elpat vai inmerit ura; ja *et ated caija* aien, mika ti esjilid akaija, um ehraipiaig nupene o un.

11 Et eti imyiacitak tah an naopan ineig va nated yin, *et taigtaig* vaig *aien*: ja erupu ohoai itai an nedo atoh um eigpa an tak aopan ara sji eigki, era aktaktai upene va *nated ra* ara.

12 Va nitai ineigki akumu regeig irai ikmamia asjiluc aiaua, im neduomia auatialiidi;

13 um “ahped efalaig va neduomia,” vai yi jim atga ahnag a natimi isvihteuc neduon; etmu idim cehcehe aien.

14 AKUMU ahilek neigpa ehele atimi asega aiaua, um *ago* nedo upene; el *et* eti *ago nedo* ineigki tah, inyi ti alum Natimarid aien :

15 um aminjinaig upene *caua*, vai

yi jim etjo itac tah, um eti leh naiheuc o Atua; vai yi jim edel tah nievan itai acen, um imyido-halav *caua*, um auahas atimi inyi ahinag ;

16 vai yi jim *eteuc* tah natimi ago ingaijid, ka natimi imyipalea, et idivaig Isa, is metto aien, jam ahtai natimi alupas o un vai inhag is ethi ache.”

17 Eka idim ato aiaua mika, is wat ti pan itac nitai iji eigki, is wat merit aien inlehvaig intas upene *vai yin*, eris atapanes yin; is ahilek emda aien, um taig; ja is eti ecetai tah nuarin nadumoj u inliinmopoi *etman* aien.

18 Eka mun eti ahtag pam aiaua an lolan nedoon ineig er ubli, um ahli, um *eti ahtag pam* an nepeig, im naupat, im neiho,

19 im nohran toho, im inmotjan tas; ara eris atahaijeg *inmotjan tas* iyehki ara, eris ugni ara, mika ulmu jim lep tas ehele ra;

20 is ehka vai ra natahaijegvaig intas alep iyehki, *nikavaig*, “El et ubli lolan nedoon tah nitai emanohwan neduon, ulmu asji an hat, ka ahcai an mopul :”

21 eris um imtitaig alupas nitai iji ehki eris ecetai, va nitai ineig is ika a Moses, Ek imtitaig alupas ainyak, um eucjucjucaij :

22 ja akis ahtag pam aiaua an lolan nedoon Saion, im nuarin-pece u Atua umoh, Jerusalem an no hatag, im lep ehele ilpu agelo et ahinag acen,

23 im ilpu atimi et ahinag er asjapicnaig, im nup an nakalasja ilpu metto, er esvi ra an nohatag, im Atua ineig etpu asuptecnaig nintan imi atimi asega aien, im nesgai ilpu atimi upene era upene asega ara,

24 im Iestu natimi asan neigpa vai intas-etipup mat, im inja er ohaig, et asuptecnaig niji itai esjilid an *ja irai* Ebel.

25 Akumu aktaktai aijaua, um jim esjum vai yin et tas aien: el eris eti ethai *yin* ara eris esjum vai yin ara is tas aien an nobohtan, etpu ehka vai caija *nethai yin vaig*, ele ta atidjaija akaija iran et *tas* aien an nohatag:

26 is ahecatina nobohtan va nohran an naopan iyehki: ja et mun tas aien an naopan ineig, um ika, “Ekpu lep ehceethi amaamai an nobohtan ainyak, im lep an nohatag.”

27 Nesgan *tas* ineigki “lep ehceethi *amaamai*,” nikavaig, eri ikni-pagki nitai iji eigki er amaamai, et idivaig niji itai er ago, mika yi amen aktit nitai iji eigki et asjeuc ahtu.

28 Inta mun leh nelcau asjeuc ahtu akaija, va nitai ineigki intumu apol an naiheuc *o un* akaija, mika ti aheca upene u Atua iran, um eccen *vai yin*, um imtitai *yin*:

29 va nitai ineig, nikavaig, “et cop atnamud itai a Atua uja.”

NUARIN-TAS ALUPAS 13.

ETMU amen naiyu jipe u inliin-mopomia aijaua vai caua, et idivai ilpu raimu.

2 Jim ahnag iran aijaua par aiheuc va atimi irai taka uarin: eris idim aiheuc vai ilpu agelo nahaiji ra an nedo ineigki, jam eti ato.

3 Akumu imyiehva ra aijaua er arore ra, et idivaig er arore caua um tup ethi ache pan *ira ra*; *im lep* ra era leucose nohocred ara, et idim eteuc nohumia aijaua.

4 *Etmu* upene natmehgan *un-yimia* an niji itai asega, um jim ago ingaijid: etpu idim aru nedo o ilpu atimi acitak a Atua, im ilpu atimi ago ingaijid.

5 *Etmu* jim has iramia *aijaua* itai: *jam* eklim amen upene va niji

itai unyimia: is idim ika aien, “Ekpu idim amen ehelemia ainyak, um eti lep ude caua:”

6 va nitai ineigki inta emda akaija nasaigvaig *mika*, “*Et* atau imi nyak a Ihova, inki ti im-titaig ainyak tah nedo o atimi vai nyak.”

7 Akumu imyiehva ra aijaua eris aminjinai caua ara, um asup-tecnaig intas o Atua ehelemia, etnu lep idivaig nimyisjis ninivaijec *ura nimyisjis ninivaijec* unyimia, um aktaktai nehni u nedo *ura*.

8 *Et* tup ethi ache a Iesu Kristo an naopan iyehki, im lep an naopan ineig, im lep irai iji mesese.

9 *Etmu* jim ahnag inliinmopomia aijaua va nesege acheiachei im nesege mat: nitai upene neigki, mika et amen aktit inliinmopomia va naiheuc *o Atua*; jam eti *amen aktit* va nitai caig, is eti upene neigki vai ra eris aheca iran ara.

10 Et eteuc nefata uja, et itaup vai ra inhagvaig iran era aheca an neom *itaup* ara.

11 Er atnamud nohui itai umumoh iji ehki an yipin nirahed itac, et apos pan ja iran va nedo has an nuarin itaup a natimi esjilid an ahlap:

12 et idim ueco, is mas a Iesu an yipin nathatahau itac, va etpu ago adicinadicin ilpu atimi *o un* an ja iran.

13 Va nitai ineigki intumu apan ehelen akaija an yipin nirahed itac, um leucose nitai ehcamai vaig et idivai yin.

14 Et eti eteuc nuarin-pece uja igcaki inyi amen, ja inta ahilek nuarin-pece iyehki akaija etpu yetpam.

15 Intumu ahlap vai yin akaija an nitai ahlap ineigki, nika-vaig, nimyiahpas Atua irai iji adiat, nikavaig, nohoai itai an nippineucseija, naaurineig va nidan.

16 Jam jim ahnag iran aijaua par ago nedo upene im nedo aiheuc: et imyiacitak nitai ahlap iji eigki a Atua.

17 Akumu imyiaiji intas ura aijaua era aminjinai caua ara, um jim imyiisjis itai: era aminjina nesgamia ara, et idivai ilpu atimi uhpu ahodai ra vaig, mika eri ago nedo ineigki ara, um imyiacitak, um eti ohocred; inyi idim ti upene vai caua nitai ineig.

18 Akumu alaigaheni vai cama aijaua: eera ato aijama mika, et upene inliinmopoma, eera lep merit aijama neklim amen upene vaig irai iji itai asega.

19 Ja ek idim ugni *caua* ainyak, mika aki ago nedo ineigki aijaua, va uhpu efi inyiapam nyak ehemia.

20 Atua ineig et ahes neigpa ehelen, is imyinusjai Iesu aien vai inmas *o un*, Natimarid uja marom, natimi asgi siip *o un* et esjilid aien,

vai inja an tas-etipup ineig inyi amen irai iji mesese,

21 etmu ika aien aki esjilid aijaua an nedo upene asega par imyiaiji intas *o un*, um ago nedo ineig vai caua et upene an nuhup *o un*, vai Iesu Kristo; uhmu imyiahpas yin irai iji mesese. Emen.

22 Ak ilpu etoak, ek ugni caua ainyak *mika* aki imyiaiji intas ated caua ineigki aijaua: ek mun aged nitasvitai ipjidipjid ini caua ainyak.

23 Akumu ato aijaua mika, eris atcejai Timodeus etoaija; el et efi ham aien, ecrupu ehrateghe caua aijumrau.

24 Kaiheuc vai ra asega era aminjinai caua ara, im lep ilpu atimi upene asega. Era aiheuc vai caua a nupu Itale.

26 *Uhm*u aiheuc vai caua asega. Emen.

NITASVITAI

o

JAKOBUS NAPOSTOLO.

NUARIN-TAS ALUPAS 1.

AK ilpu mapoi ilpu hal *o Isreel* is twelv, eka terimterim jipe aijaua, *ek* aiheuc vai caua *ainyak* Jakobus, naheca u Atua im Iesu Kristo Natimarid.

2 Ak ilpu etoak, akumu imyiacitak alupas aijaua, et wit yetpam iramia niji ohocred acheiachei;

3 eka idim ato aijaua mika, uhu wit oop nimyisjis ninivaijec unyimia, uhpu atupun nedo eti auatiemda *unyimia*.

4 Ja etmu ehcohos upene nedo eti auatiemda *unyimia*, va akupu esjilid aijaua, um upene asega, *um* eti ihki natimi an tah nitai.

5 El et ti narapakau *o un* tah iramia, etmu ugni Atua vaig aien, et ahtai alupas imi atimi asega

aien, um eti atuh *ra*; uhpu alupai yin.

6 Ja etmu ugni aien an ninyiisjis ninivaijec, um jim imyiisjis nahcil: aien et imyiisjis nahcil aien, et idivaig nepeau an jop aien, et ahre um elgei va nintinjop:

7 etmu jim aktaktai natimi ineigki mika, etpu leh tah nitai aien ehele Natimarid:

8 et ero inliinmopoi natimi ineigki, *um* amaamai irai edo asega o un.

9 Eh wat atijai etoaija ineig et upoupo aien, etmu imyiacitak aien:

10 im lep natimi ikni itai, et wit upoupo aien; va nitai ineig, nikavaig, etpu ti aien et idivaig intisiancai.

11 Et wat aridjai nagesega um esjilid nihlup, et idim imlai nefe-lecai, et lep aijis intisian, um ti neklum upene o un is elwa; et idim ucco, etpu imlai natimi ikni itai irai iji edo o un.

12 Et mun ahesmoij natimi ineig et leucose nohocred aien: et wat esjilid aien irai ohocred vaig o un, etpu leh korona aien va nitai umoh iran, is upyi asaig a Natimarid imi ra et aiyu inliinmopura ara vai yin.

13 Eh wat oop tah natimi, etmu jim ika aien et oop yin a Atua: et ehka noop Atua vaig an niji itai has, et lep eti oop tah natimi aien:

14 ja er oop ra sji eigki asega, et wat aihiai ra inmerit has ura um anai ra:

15 et wat opoue inmerit has o un tah, et apos nedo has; eh wat ago elni nedo has, et apos inmas.

16 Ak ilpu etoak upene, akumu jim ahnag aijaua:

17 et ahes jipagko *um* asuol niji itai tup ahtai upene asega, im niji itai tup ahtai esjilid, ehele Etmai niji itai lah an *nohatag*; aien aigki et eti aurobotpotedo aien, um ti naiyu *iran* va nahidai yin vaig.

18 Is apos caji aien va nasaig o un an tas inivaijec, vai tupu lup-

nan ohoai itai akaija irai iji itai is ago aien.

19 Va nitai ineigki, ak ilpu etoak upene, erumu auroauro natimi asega um atahaijeg, *jam* jim efitas, *um* jim efi atavaitap:

20 et idim eti atupun nedo atoh ineig et ahes ehele Atua intavaitap u atimi.

21 Akumu lep atceijaig niji itai has asega aijaua, im nedo has et ahinag *unyimia*, um leh intas ineig er ahoag anliinmopomia eropse, et emda par imyiatamaig nesgamia.

22 Akumu lep imyiaiji intas aijaua, um jim atahaijeg ache, um efaifa vai caua.

23 El et atahaijeg intas tah, jam eti imyiaiji, et idiva natimi ineig aien et almoi nesganintan ineig eris apos yin iran aien an nitai naunau:

24 et idim almoi yin aien, um atga o un, um auroauro um eti imyiehva nalum yin vaig o un.

25 Ja aien et almaijidjid intas alep upene ineig aien et ahiyi *atimi*, um apol *iran*, um atahaijeg jam eti ahnag *iran*, um ago nauritai, etpu ahesmoij natini ineig va nedo o un.

26 El et ika tah natimi iramia, et alaigaheni aien, jam eti aminjinaig intas o un, jam efaifa vai inliinmopon, el et takitai nalaigaheni o un.

27 Nalaigaheni inivaijec um upene an nuhup u Atua Etmaija neigki, *nikavaig*, nateghe ilpu umnyij im ilpu takata eris ememas a ilpu atamnyura an nohocred ura, *im* naminjina yin vai yi jim has aien an nobohtan.

NUARIN-TAS ALUPAS 2.

AK ilpu etoak, akumu apol an ninyiisjis ninivaijec u Iesu Kristo Natimarid esjilid uja aijaua, jam jim ago nedo acheiachei va atimi.

2 El et apam an nasjapicnaig un-

yimia tah natimi et amen iran nitai ethado colt, im napelumai esjilid; um lep ham tah nihki natimi et aso yin ira apelumai has:

3 el eka ago nedo eccen aijaua vai yin et aso yin ira apelumai upene, um ika ehelen, Ateucse aiek igcaki an nuarin upene; um lep ika ehele nihki natimi, Aiji aiek eagko, ka, Ateucse aiek igcaki u nitai atijai neduok iran:

4 eka idim imyiisjis nahcil anliinmopomia aijaua, eka atimi aktaktai maumau aijaua an nasuptecnaigvaig nintan *unyimia*.

5 Akumu atahaijeg aijaua, ak ilpu etoak upene, is idim ehtai ilpu ihki atimi *iji eigki* an nobohtan ineigki a Atua, era esjilid ara an nimyiisjis ninivaijec *ura*, um lep ohuun nelcau ineig is upyi asaig aien ehele ra et aiyu inliinmopura ara vai yin.

6 Ja eka amcel vai ilpu ihki atimi aijaua. Era idim auaohocred caua a ilpu atimi ikni itai, um aihiaig pan caua irai iji uarin eh tas alep iran:

7 era lep asan tas itaup ara va nidan upene ineig er anvi nidamia iran.

8 El eka imyiaiji intas alep esjilid aijaua, et idivaig eris aged, *um ika*, "Etmu aiyu inliinmopom aiek va atimi eblaamnem unyum, et idivaig *naiyu u inliinmopom* vai euc," el et upene nedo unyimia:

9 ja el eka ago nedo acheiachei va atimi aijaua, el eka ago nedo has aijaua, eh lep ated caua an tas alep, et idivai ilpu atimi auatatimi.

10 Aien et imyiaiji intas alep asega aien, jam imyipalea et ethi ache, uhpu aru iran *et idivaig* asega.

11 Aien is ika aien, "Jim ago ingaijid," is lep ika aien, "Jim atgei atmas." Ja el et eti ago ingaijid aiek, jam atgei atmas, na atimi imyipalea intas alep aiek.

12 Etmu ucce intas unyimia, im

nedo unyimia, et idivai ra uhpu asaig nintan imi ra an tas alep ineig et ahiyi *atimi*.

13 Aien is eti aiheuc *va atimi* aien, uhpu aru iran, jam eti aiheuc vai yin; et lep tas emda naiheuc *va atimi* va neruvaig.

14 Ak ilpu etoak, *et* eti upene vaig tah natimi par ika, Ek imyiisjis ninivaijec ainyak, jam eti auritai; et eti emda nimyiisjis ninivaijec iyehki par imyiatamaig yin.

15 El et ti napelumai o un tah etoamia ka natahaig iramia, um ti nitai caig incara irai iji adiat;

16 el et ika tah iramia ehele ra, Atga unyimia aijaua an neigpa, akumu ehehtin aijaua um gaije; jam eti alupai ra nitai iji eigki et upene va nohura; el et eti upene.

17 Et idim ucco nimyiisjis ninivaijec *unyimia*, el et eti auritai, et idim mas, et tup echim *eteuc*.

18 Ja kit etpu ika tah natimi, Na imyiisjis ninivaijec aiek, ja ek auritai ainyak: ehvaig ehelek aiek nimyiisjis ninivaijec unyum jam ti nauritai unyum, ekpu lep ehvaig ehelum ainyak nimyiisjis ninivaijec unyak an nauritai unyak.

19 Na imyiisjis ninivaijec aiek mika, et eteuc Atua et ethi ache; et upene nedo unyum: era lep imyiisjis ninivaijec a ilpu agelo has, um eucjucjucaij.

20 Ak natimi ahnag, nai merit aiek natovaig mika, et mas nimyiisjis ninivaijec *unyum* et wat ti nauritai *o un*, ka o'o?

21 Eris idim ika is atoh nedo o Ebrahim etmaija va nauritai *o un*, is wat atijai Aisak inhal o un aien an nefata par ahlap iran.

22 Na ato aiek mika, is ehrauritai nimyiisjis ninivaijec *o un*, *im* nauritai *o un*; is lep upene asega nimyiisjis ninivaijec *o un* va nauritai *o un*:

23 eris lep ehneiijd Intas eris aged, um ika, "Is imyiisjis ninivaijec Atua a Ebrahim, eris lep

ati imi yin nika ineig *o Atua* et atoh nedo *o un*:² eris anvi nidan *par ika* natimi ineig et almuktit yin a *Atua*.

24 Eka almoi aijaua mika, er ika et atoh nedo o atimi va nauritai *ura*, jam eti va nimyiisjis ninivaijec *ura* ache.

25 Eris lep ika is idim atoh nedo o Rehab intakata ago ingaijid va nauritai *o un*, nikavaig, is leh ohwat atimi erahki aien eris abrairau, um abraig pan rau an nefalaig is eche.

26 Et idim mas nohuja, et wat ti nesgaija iran; et idim ucco, et lep mas nimyiisjis ninivaijec *uja*, et wat ti nauritai.

NUARIN-TAS ALUPAS 3.

AK ilpu etoak, akumu jim ilpu atimi esege inyi alinag aijaua, eka idim ato aijaua mika, etpu esjilid neruvaig imi caija.

2 Inta ahnag akaija asega an niji itai et alinag. El et eti ahnag tah natini an tas *o un*, et upene asega natimi ineigki, um lep emda par acaiji nohun asega.

3 Inta ikni itai aces yi aijiraig irai ipjieucse hors akaija, mika eri imyiaiji caija; inta lep ahida nohura asega akaija.

4 Akumu lep almoi nelcau aijaua, et alupas acen, et lep ahtalekraig nintinjop alupas, ja er aparaig an nehev tintin an nuarin ineig et merit vaig a natimi apos.

5 Et um ucco, et uarin-nohuja tintin namaija, ja et tas ijinies acen. Et idim atni nesei alupas incop tintin!

6 Et incop namaija, um esjilid acen nauatatimi *o un*: et um ucco, et amen namaija irai uari-ohuja, um auahas nohuja asega, um lep atni niji itai asega; eh lep atni *nitai ineig an cop* an pece has.

7 Era eti aaij niji obotpot itai

asega, nikavaig, niji itai aleg, im niji man, im niji imyiv, im niji itai amen an jop, era idim eti aaij ara va atimi.

8 Ja et ehka vaig tah natimi nacaijivaig nama atimi, nitai has *neigki* et ehka nacaijivaig, et *lep* ohua iran nitai acen ineig eh mas vaig.

9 Inta asan tas upene vai *Atua* Etmaiija iran akaija; inta lep asan tas has va atimi iran akaija, is ago ra a *Atua* an nalmun.

10 Et ahes an nipjineucsen et ethi intas upene im intas has. Ak ilpu etoak, eris idim ika yi jim ucce nitai iji eigki.

11 Et eti ahlau ohua nintan-wai *inwai* aiyu im *inwai* acen an mun-wai et ethi.

12 Ak ilpu etoak, et ehka va nateg nohovaig um ohoai oliv, um lep *ehka* va vaine nohovaig um ohoai ateg; et um ucco, et *ehka* nahlau ohua vaig *inwai* acen im *inwai* aiyu an nintan-wai et ethi.

13 Natimi arapakau im natimi ato itai iramia a di? etmu ehvaig nauritai o un aien an nedo upene *o un* anliinmopon eropse um arapakau.

14 Ja el et amen nauatitai has irai liinopomia imyiisjis itai; akumu jim tas emda aijaua, um jim ahcil vai intas inivaijec.

15 Et eti ahes an nohatag narakau ineig, ja *et* ahes an noboh-tan, *im* inliinmopja itu, *im* ilpu agelo has.

16 *Et amen* nehtauo im nauritai has asega an nuarin ineig er auatitai um imyiisjis itai iran.

17 Ja et uhup um upene narakau ineig et ahes an nohatag, um lep eigpa, *um* erop, *um* eti imyiisjis itai, *um* ohua va naiheuc va atimi, um ohoai itai upene, *um* eti ago nedo acheiachei va atimi, um eti efaifa.

18 Era ahoaig nohoan nedo atoh an neigpa a ilpu atimi ago nedo eigpa.

NUARIN-TAS ALUPAS 4.

ET ahes anhe nimyiisjis itai im nehtauo unyimia? *et idim ahes* irai merit has iji eigki unyimia, et ago nedoa iraili uari-ohumia.

2 Eka merit vai itai aijaua, jam eti leh: eka atgei atmas aijaua, um auatitai, ja et ehka inlehmaig: eka ehtauo aijaua, um imyiisjis itai, jam eti leh itai, va nitai ineig, nikavaig, eka eti ugni aijaua.

3 Eka ugni itai aijaua, jam eti leh, va nitai ineig, nikavaig, eka ugni has aijaua, mika aki eduoraprap aijaua irai merit has unyimia.

4 Ak ilpu atamaig im ilpu takata ago ingaijid, eka idim ato aijaua, nikavaig, nedemda vai Atua neigki, naiyu u inliinmopja va nobohtan; aien et ika aien yi aiyu inliinmopon va nobohtan, et atimi tak atimi vai Atua aien.

5 Akumu jim ika aijaua, et tak-itai intas eris aged; Et idim oporei a Nesgan *Upene* ineig et amen eheleija aien.

6 Ja et alupai *caija* naiheuc es-jilid aien. Va nitai ineigki et ika aien, "Et ahcadaí ilpu atimi et ijinies inliinmopura ara a Atua, ja et alupai ilpu atimi upoupo naiheuc o un aien."

7 Va nitai ineigki akumu upoupo irai Atua aijaua. Ahcadaí Tiapolo aijaua, etpu lep aha vai caua aien.

8 Akumu apan ubutpotet ehele Atua aijaua, etpu lep apam ubutpotet ehelemia aien. Akumu ahis-jum aijaua, ak ilpu atimi auatatimi; akumu lep ago adicinadin inliinmopomia aijaua, ak ilpu atimi ero inliinmopomia.

9 Akumu ohocred aijaua, um taigtaig, um ehteigtaig: etmu is-jipigmoig inlaav unyimia intaigtaig, etmu lep isjipigmoig nimyiacitak *unyimia* nohocred.

10 Ago nedo upoupo aijaua an nuhup u Natimarid, etpu lep atijai caua aien.

11 Jim tas has jipe vai caua, ak ilpu etoak. Aien et tas has vai etoan aien, um aktaktai has vai etoan, et tas has vai intas alep aien, um aktaktai has vai intas alep; ja el et aktaktai has aiek vai intas alep, na eti atimi imyiaiji intas alep aiek, jam atimi aktaktai *vai*g.

12 Et eteuc Natimi tas alep et ethi, et emda aien par imyiatamaig *atimi* um lep anahas *ra*: aiek di aigki na par aktaktai has vai intak atimi?

13 IM lep ineig, ak ilpu atimi iji eigki eka ika aijaua, Intupu apan akaija an tah anuarin-pece ineig ka imraig, um amen eahki irai yiir et ethi, um auarimtai itai um ahtai itai, um leh inpadiaig;

14 eka eti ato aijaua nitai iji eigki *etpu yetpam* imraig: inhe numumoh unyimia? Et idim inmosso, et eh-cohos ipjidipjid, ja pah ti.

15 *Et upene* vai caua nasaigvaig, *um ika*, El et ika a Natimarid, inti umumoh akaija, um ago nitai ineig, ka nitai inaico.

16 Ja an naopan ineig eka imyiacitak tas ijinies unyimia aijaua: et has nimyiacitak asega et idivaig ineig.

17 Va nitai ineigki, el et ato tah nagovaig nedo upene, jam eti ago, et has nedo o un.

NUARIN-TAS ALUPAS 5.

IM lep ineig, ak ilpu atimi ikni itai, akumu ehteigtaig aijaua um aunyauwaig, va nohocred etpu yetpam iramia.

2 Et muttit inpadiaig unyimia, et lep ages niji apelumai unyimia.

3 Et epera colt im silver unyimia; et itai asuptecnaig vai caua nepera iran, etpu caig nohumia et idivaig incop. Akis ikni itai aijaua ira adiat apitac.

4 Et idim anlaig ijinies nimtān imi ilpu atimi auritai, eris asjapic-

nai nohoai itai umamia, ja akis imyiaaig aijaua an nedo efaifa: et yetpan nahlaig u ilpu atimi asjapicnai nohoan an tikgai Natimarid ineig et esjilid acen aien.

5 Akis umumoh upene an nobohtan aijaua, um acitak; akis alaamia aijaua et idivaig niji *itai umumoh* an nadiat atgei *ra* iran.

6 Akis ika aijaua eri atgei natimi atoh nedo o un, *um lep* atgei *yin*; et eti *lep* ahcadai caua aien.

7 Va nitai ineigki, ak ilpu etoak, akumu ago nedo eti auatiemda aijaua, um yetpan an nehcohos pam u Natimarid. Almoi natimi ahapol, et imyialep nohoai itai upene an nobohtan aien, um aitgaig nitu iran vaig, um imyihum pan an naopan iyehki, et leh incaupda uhup in *incaupda* apitac.

8 Akumu lep ago nedo eti auatiemda aijaua; etmu emda inliinmopomia aijaua: et idim ubutpotet napam u Natimarid.

9 Akumu jim ulikulik jipe vai caua aijaua, ak ilpu etoak, va uhpu eti asaig nintan imi caua: et idim aiji an neuse neom a Natimi asaig nintan.

10 Ak ilpu etoak, akumu aktaktai ilpu profeta aijaua, eris tas ara an nidai Natimarid, era atimi asjaicnaig *imi caua* ara an leusevaig nohocred, im lep an nedo eti auatiemda.

11 Inta idim ika akaija era mun ahesmoij ara era eti auatiemda ara. Akis atahajeg aijaua va nedo eti auatiemda u Job, um ato nedo o Natimarid *vai yin*; et idim eropse inliinmopoi Natimarid, um esjilid naiheuc o un.

12 Ja et esjilid nitai ineigki, ak

ilpu etoak, akumu jim tas atcinuhri aijaua, jim *tas atcinuhri* va nohatag, ka nobohtan, ka tah nitai et eche: akumu maiya ache aijaua, um o'o ache; va uhpu eti asaig nintan imi caua.

13 Et wit ohocred tah iramia, etmu alaigaheni aien. Et wit imyiacitak tah, etmu acesaces ohraiiitai aien.

14 Et wit emehe tah iramia, etmu ahlaig vai ilpu atimi tas alep an nakalasia aien; erumu aspi yin ara an narakei an nidai Natimarid, um alaigaheni vai yin:

15 etpu umoh a natimi emehe va nalaigaheni et ahes anliinmopura imyisjis ninivaijec, etpu imyiatidai yin a Natimarid; el is ago nedo has aien, uhpu eti aru iran.

16 Akumu asuptecnaig jipe nedo has *unyimia* vai caua aijaua, um alaigaheni jipe vai caua, mika aki ceheche aijaua. Et upene acen nalaigaheni emda u natimi atoh nedo o un.

17 Is atimi et idivai caija a Elaija, ja is alaigaheni emda aien mika yi jim ehe: is idim eti ehe an nobohtan an mesese is esej im in-mohoc is siks:

18 is lep alaigaheni aien, ja is par ahes incaupda an nohatag, is um ededel itai an nobohtan.

19 AK ilpu etoak, el et adumoij an tas inivaijec tah iramia, um lep imyiadumoij yin tah;

20 etmu ato aien, nikavaig, aien et imyiadumoij tah natimi auatitimi an nefalaig has o un aien, et imyiatamaig natimi et ethi vai inmas aien, et lep adalpoi nedo has et ahinag *o un* aien.

NITASVITAI UHUP

o

PITRUS NAPOSTOLO.

NUARIN-TAS ALUPAS 1.

AK ilpu atimi amen irai taka uarin, eka terimterim aijaua Pontus, *im* Calesya, *im* Kapatosya, *im* Esya, *im* Bidinya,

2 *ek aiheuc* vai caua *ainyak* Pitrus, napostolo o Iesu Kristo, eris ehtai caua et idivaig nupyi ato o Atua Etmaija, an nago upene *caua* irai Nesgan Upene, va akupu imyiaiji *intas o un aijaua*, uhpu lep ohaig *iramia* inja irai Iesu Kristo: Etmu amen alupas ehelemia naiheuc *im* neigpa.

3 UHMU imyiahpas Atua, Etmai Iesu Kristo Natimarid uja, aien is aketo aien um apos caija an naiheuc esjilid o un, mika ti aitgaig nitai umoh iran akaija va nusjai u Iesu Kristo vai inmas *o un*,

4 um ohuun nitai iji eigki inyi ti muttit, um eti has, um eti imlai, eris ikni an nohatag imi caua,

5 ak ra sji eig er aminjinai caua an nemda u Atua va nimyiisjis nini-vaijec *unyimia*, va akupu leh nimyiatamaig *caua* ineig aijaua, eh mun ago ehni, va uhpu ehvaig an naopan apitac.

6 Eka lep imyiacitak vaig aijaua, ja, el et upene *vai caua*, eka taigtaig aijaua an naopan ineig, ja et ipjid-ipjid, va niji oop *caua* et acheiachei:

7 va uhpu ecetai nimyiisjis nini-vaijec unyimia, eris ahilek, um ato mika, et esjilid irai colt ineig etpu

ti, ja er ati an cop par ato; uhpu lep tas upene vaig, um naaurineig, um imyiahpas, an naopan iyehki etpu ehcohos a Iesu Kristo:

8 akis eti alum yin aijaua, ja et aiyu inliinmopomia aijaua *vai yin*; eka eti alum *yin* aijaua an naopan ineig, jam asgeig iran *ache*, ja eka cediaig aijaua, an nimyiacitak ineig et ehka nasuptecnaigvaig, um esjilid acen:

9 um lep leh nitai ineig eka imyisjis nini-vaijec vaig aijaua, *nika-vai*g, nimyiatamaig nesgamia.

10 Eris eas um ahilek emda nimyiatamaig *atimi* ineig a ilpu profeta iji ehki, eris upyi tas ara va naiheuc ineig *etpu yetpam* iramia:

11 *um lep* aktaktai naopan iyehki im nedo iran, is ehvaig ehele ra a Nesgai Kristo, is wat upyi hup aien um asuptecnaig nohocred u Kristo, im natimi alupas *o un* etpu apitac:

12 ja eris ehvaig *nitai ineigki* ehele ra, nikavaig, eris eti *aheca* ura ara, jam aheca uja an nitai iji eigki, eris asaig ehelemia a ilpu atimi asuptecnaig *intas-upene* ehelemia, vai Nesgan Upene eris abrai yin an nohatag; era lep merit a ilpu agelo nalmoivaig nitai iji eigki.

13 Va nitai ineigki akumu aroraijiraig inliinmopomia aijaua, um aminjina nedo unyimia, um aitgaig emda naiheuc ineig, uhpu alupai caua an naopan iyehki etpu ehcohos a Iesu Kristo;

14 et idivai ilpu halav imyiaiji

intas, um jin ago nedo et idivai merit has *unyimia* itu acen an naupat unyimia:

15 ja, et idim upene aien is ahlaig vai caua aien, et idim ucco, akumu upene aijaua an nedo asega *unyimia*;

16 va nitai ineig, nikavaig, eris aged, *um ika*, "Akumu upene aijaua; ek idim upene ainyak."

17 El eka anvi nidai Etmamia aijaua, et asuptecnaig atoh nintan aien imi atimi asega et idivaig nauritai ura, akumu imtitai *yin* aijaua an namen unyimia *igcaki*:

18 eka idim ato aijaua, nikavaig, eris eti auarintamia irai itai muttit, *nikavaig*, silver im colt, va nedo ahnag unyimia *akis ago aijaua vai intas alep* is ahes ehele ilpu ret-pomia;

19 ja an ja esjilid irai Kristo, et idivaig *inja* an hakli siip et upene asega um ti nitai has iran:

20 eris idim upyi ati yin an napan iyelki is pam eti eteuc noboh-tan, ja is ehcohos aien ira aopan apitac iji eigki vai caua,

21 eka asgeig irai Atua ineig vai yin aijaua, is imyinusjai yin aien vai inmas *o un*, um alupai yin natimi alupas *o un*; va nitai ineigki eka asgeig irai Atua aijaua, um aitagai yin.

22 *Åkis* idim ago adicinadicin inliinmopomia aijaua an nimyiaiji intas inivaijec vai Nesgan *Upene*, um aiheuc inivaijec vai ilpu etoaija, etmu lep aiyu jipe alupas inliinmopomia aijaua vai caua, um inivaijec:

23 eris aketo um apos caua, jam eti *apos caua* an nupsinitai ineig inyi muttit, ja an nupsinitai ineig inyi ti muttit, nikavaig, intas o Atua et umoh um amen irai iji mesese:

24 va nitai ineig, nikavaig, "era idivaig nefelelicai natimi asega, et lep idivaig intisiancai natimi alupas asega u atimi. Et imlai nefelelicai, um lep eijis intisian:

25 ja inyi amen intas o Natimarid irai iji mesese." Intas neigki, er asuptecnaig ehlelemlia an tas-upene.

NUARIN-TAS ALUPAS 2.

1 VA nitai ineigki akumu atcei-jai nedemda asega aijaua, im nedo ahcil asega, im nefaiifa, im nauatitai, im intas has asega,

2 um ahvig nidenided inivaijec an tas, et idivai ilpu halav tup pam apos ra, va akupu emda vaig aijaua:

3 al ekis atimtim an naiheuc o Natimarid aijaua.

4 Akis ham ehelen aijaua, et hat umoh aien, eris um esjum vai yin natimi, ja is ehtai yin a Atua, *um imyiahpas* yin,

5 eris lep actaig caua et idivaig hat umumoh, *mika aki* eom va Nesgan *Upene aijaua*, *um* ilpu atimi ahlap upene, par ahlap an niji itai ahlap anliinmopomia, et upene an nuhup u Atua irai Iesu Kristo:

6 va nitai ineigki eris lep aged intas ineigki, *um ika*, "Ek idim ati a Saion ainyak inhat esjilid an nesvi va neom, eris ehtaig, eris lep imyiahpas: aien et asgeig iran aien, inyi ti ehcamai aien."

7 *Et* idim itai imyiahpas imi caua eka imyisjsis ninivaijec aijaua: ja "inhat ineig eris esjum vaig a ilpu atimi acta neom, et *hat* esjilid an nesvi va neom" imi ilpu atimi imyipalea,

8 et lep "hat epiltau iran, im inhat auahas" *ra* era imyipalea intas *o un* ara, um epiltau *iran*: eris lep ikni ra va nitai ineigki.

9 Ja eka "ilpu atimi eris ehtai ra aijaua, *um* ilpu atimi ahlap atimarid, *um* ilpu atimi itaup," *um* ilpu atimi eris auarintara; mika aki ehvaig aijaua nupene o un is ahlaig pan vai caua aien an naupat *unyimia*, um ikni caua an lah o un ineig er imyiali:

10 *akis* eti ilpu atimi *u Atua*

aijaua itu acen, ja *eka* ilpu atimi *o un* aijaua an naopan ineig: eris eti aiheuc vai caua, ja er aiheuc vai caua an naopan ineig.

11 AK ilpu *etoak* upene, eka idi-vai ilpu atimi amen ehcid aijaua, im ilpu atimi amen irai taka uarin, va nitai ineigki ek ugni *caua* ainyak, mika aki ude inmerit iji eigki u inliinmopomia itu aijaua, et ago nedoa vai nesgania,

12 um ago nedo upene an nuhup u ilpu atimi aupat: mika, eru wit almoi nedo upene *unyimia* ara, eri imyiahpas Atua ara an nadiat ateghe *o un*, an nitai ineig era tas vai caua vaig ara, um ika eka ago nedo has aijaua.

13 Akumu imyiaiji intas alep asega u atimi aijaua vai Natimarid; kit *intas alep* u natimarid ineig et esjilid aien;

14 ka ilpu atimi alupas, is ikni ra aien, mika eri aru nedo has u ilpu atimi auatatimi, um lep imyiahpas ra era ago nedo upene ara.

15 Et idim asaig a Atua, mika aki atapanes intas aupat u ilpu atimi ahnag aijaua, an nedo upene unyimia:

16 eka ilpu atimi eti aheca aijaua; ja akumu jim adahpoi nedemda *unyimia* aijaua va neti aheca *unyimia*, jam ago nedo o ilpu aheca u Atua.

17 Akumu ago nedo eccen va atimi asega aijaua. Etmu aiya inliinmopomia aijaua vai ilpu etoamia. Akumu imtitai Atua aijaua. Ago nedo eccen vai natimarid *unyimia* aijaua.

18 AK ilpu aheca, akumu imyiaiji intas o ilpu atimi alupas *unyimia* aijaua, um imtitai ra; kit era upene ara um erop, ka era ipjin ara.

19 Er imyiahpas nedo ineigki, et wat leucose nohocred tah natimi va nimyiaiji intas o Atua, *jam*

ohocred va nedo eit atoh *vai yin*.

20 Nimyiahpas *caua* yek ed, el et eropse inliinmopomia aijaua uhu wit abli caua va nedo has unyimia? ja el et eropse inliinmopomia aijaua, aku wit ago nedo upene aijaua, jam ohocred vaig, el et upene irai Atua nedo ineigki.

21 Eris idim imyiacaij caua va nitai ineigki: is idim lep ohocred a Kristo vai caija, um uhup um asjaaicnaig *an nefalaig* imi caija, mika aki apitac aijaua an nugnyan neduon:

22 “aien aigki is eti ago tah nedo has aien, eris eti lep ecetai tah nefaifa an nipjineusen:”

23 eris wat atuh yin, is eti lep atuh *atimi* aien; is wat ohocred aien, is eti asan tas edemda aien; ja is ati *yin* aien ehelen et asupte-naig nimtan atoh aien:

24 is lep leucose *nimtan* nedo has uja an nohun aien an nauincei *atgeig*, mika ti umumoh u nedo atoh akaija, an nemesmas uja an nedo has: “eka cehcehe aijaua va naredei yin.”

25 Akis idivaig siip ahnag aijaua; ja eka mun lep adumoij pan aijaua ehele natimi ineig et alaamia aien, um aminjina nesgania.

NUARIN-TAS ALUPAS 3.

1 ETMU idim ucco, ak ilpu ehgara, akumu imyiaiji intas o ilpu atamnyu unyimia aijaua; el era imyisjis nahcil intas tah, kit uhpu leucose ra, jam eti *leucose* ra an tas, ja an nedo upene u ilpu ehgara;

2 eru wit almoi nedo upene unyimia ara, im nedo eccen *unyimia*:

3 um jim yecrei inyipe *nohumia* ache, um atij numri nidjinimia, um ahradei a colt, um aso caua ira apelumai;

4 jam *yecrei* inliinmopomia er eti ecetai, an nitai ineig inyi ti muttit, nikavaig, nedo erop um eigpa, et

upene acen nitai ineigki an nuhup u Atua.

5 Eris lep yecrei ra a ilpu takata upene itu acen is ucce, eris aitagai Atua ara, um imyiaiji intas o ilpu atamnyura:

6 is idivaig is imyiaiji intas o Ebrahim a Sera, um anvi nidan natimi alupas: eka lep ilpu halav atahaig o un aijaua, aku wit ago nedo upene aijaua, um eti imtitaig tah nitai er imtitaig vaig.

7 Etmu idim ucco, ak ilpu atamnyura, akumu amen ehele ilpu ehgama aijaua, um arapakau, va nitai ineig, nikavaig, et auatialidi nohura ara, um ago nedo eccen vai ra, va nitai ineig, nikavaig, akupu ehrohuun nitai umoh iran ineig aijaua, er tup alupai *caua*; va uhpu eti atapanes nalaigaheni unyimia.

8 IM lep ineig, *etmu* tup ethi ache naktaktai unyimia aijaua asega, *um* aiheuc jipe vai *caua*; *etmu* aiyu jipe inliinmopomia aijaua et idivai ilpu raimu, *um* aiheuc va atimi, *um* amen imi *atimi*:

9 jim aru nedo has aijaua an nedo has, im intas has an tas has; jai eche nedo *unyimia*, *um* asan tas upene; eka idim ato aijaua, nikavaig, eris imyiacaij *caua* va nitai ineigki, mika aki leh niji itai upene aijaua.

10 Va nitai ineig, nikavaig, "aien et merit aien nimyiacitakvaig nitai umoh iran, um almoi niji adiat upene, etmu atapanes nipjineucsen aien vai *intas* has, um jim asaig tah intas efaifa:

11 etmu aha va nedo has aien, um ago nedo upene; etmu ahilek neigpa aien, um aho pan:

12 et idim alum ilpu atimi atoh nedo ura a Natimarid, et lep atahajjeg nalaigaheni ura aien; ja *et aiji* nesganimtai Natimarid ira ra era ago nedo has ara."

13 Aien di aigki etpu ago tah nedo has vai *caua* aien, el eka apitac yin aijaua et upene aien?

14 Ja el eka ohocred aijaua va nedo atoh, eka mun ahesmoij aijaua: "um jim imtitaig nitai ineig era imtitaig ara, um jim eucjucjucaij;

15 jam eccen vai Atua Nati-marid" anliinmopomia: akumu lep apena aijaua irai iji adiat par asup-tecnaig, ehele atimi asega era ahodai *caua* ara, intas va naitgaig u inliinmopomia, an nedo erop im nedo eccen:

16 etmu lep upene naktaktai unyimia aijaua; mika eri ehcamai ara sji eigki, era asan tas ahcil ara va nedo upene unyimia irai Kristo, an nitai ineig era tas vai *caua* vaig ara, um ika eka ago nedo has aijaua.

17 *Et* idim upene, el et asaig a Atua, mika aki ohocred aijaua an nagovaig nedo upene, ja eti an nagovaig nedo has.

18 Va nitai ineig, nikavaig, is echethi ache ohocred a Kristo vai edo has, natimi atoh nedo o un vai ilpu atimi auatatimi, mika yi aihiaig pam caija ehele Atua aien; eris atgei yin an nohun, ja eris imyiatanumoli yin an nesgan:

19 is lep apan aien vaig, um asup-tecnaig intas ehele nesga *atimi* *amen* an neom ipjin;

20 eris imyiisjis nahcil ara itu acen, is wat aitagai ra a Atua an nedo eti auatiemda o un ira adiat u Noa, eris wat ago nelcau, eris imyiatamaig an wai natimi is eti elpat iran, nikavaig, natimi is eet.

21 Nalmui nabaptiso neigki, et lep imyiatamaig caija an naopan ineig, (ja *et* eti *imyiatamaig* *caija* an natipagkivaig nemeig irai ohuja, ja nasuptecnaigvaig inliinmopja upene vai Atua,) va nusjai u Iesu Kristo:

22 is apan aien an nohatag, um amen an matai Atua; era lep upo-
upo iran a ilpu agelo, im ilpu atimi esjilid, im ilpu atimi emda.

NUARIN-TAS ALUPAS 4.

IS ohocred a Kristo an nohun vai caija, va nitai ineigki etmu emda inliinmopomia aijaua um idivai yin: aien et leucse nohocred an nohun aien, et mun ude nedo has aien;

2 mika aki jim lep umumoh aijaua, an namen *unyimia* irai ohumia et eled, *par ago* merit has u atimi, jam *imyiaiji* intas o Atua.

3 Is opra namen uja an nobohtan itu acen par imyiaiji intas o ilpu atimi aupat, an naopan iyehki intis ago nedo acitak akaija, *um* merit vai edo has, *um* umnyi alupas waina, *um* imyiacitak, *um* ahnag vai kava, um ago edo has esjilid an nalaigaheni vai ilpu atmas:

4 era inyiali ara, um asan tas has *vai caua*, va nedo unyimia, nika-vaig, eka eti ehrathut aijaua *eheler*, um ago nedo has esjilid um idivai ra:

5 erupu asuptecnaig nedo *ura* ara sji eigki ehelen, et apena aien par asaig nimitan imi ilpu atimi umumoh im ilpu atimi emesmas.

6 Eris lep asuptecnaig intas-upene ehele ra eris emesmas ara, va nitai ineigki, mika eri asaig nimitan imi nohura natimi, jam imyiatamumoh nesgara a Atua.

7 JA et ubutpotet nehni u itai asega: va nitai ineigki akumu aktaktai upene aijaua, um aminjina nedo unyimia, um alaigaheni.

8 Ja etmu upyi hup um aiyu emda jipe inliinmopomia aijaua vai caua: va nitai ineig, nikavaig, "etpu adahpoi nedo has et ahinag naiyu u inliinmopja."

9 Akumu alaamia sjipe itai hegaig aijaua, um jim adelelmia.

10 Et idivaig eris leh nedo aiheuc *vai ra* natimi, *et um ucco*, erumu lep ahaig jipe ira ra ara asega, et idivai ilpu aheca upene an naiheuc acheiachei jipe o Atua.

11 El et tas tah natimi, *etmu tas*

aien et idivaig intas o Atua: el et ago naheca tah natimi, *etmu ago aien* an nemda ineig et alupai yin a Atua: va uhpu imyiahpas Atua an niji itai asega irai Iesu Kristo; *aien aigki* et amen ehelen nimyiahpas im nemda irai iji mesese. Emen.

12 Ak ilpu *etoak* upene, akumu jim imyiali nohocred esjilid ineig aijaua et yetpam iramia, va uhpu ato caua vaig, et idim eti yetpam iramia tah nitai mat:

13 jam imyiacitak va nitai ineigki, nikavaig, eka asipiaig nohocred u Kristo aijaua; mika aki lep imyiacitak alupas aijaua, an naopan iyehki uhpu ehvaig natimi alupas o un.

14 El eh asan tas has vai caua va nidai Kristo, eka mun ahesmoij aijaua; et idim amen iramia Nesgan esjilid, *nikavaig*, *Nesgai* Atua: era asan tas has vai yin ara, ja eka imyiahpas yin aijaua.

15 Ja etmu jim leucse nohocred tah iramia, et idivaig natimi atgei atmas, ka natimi ehneg itai, ka natimi ago nedo has, ka natimi ahilek niji itai oi tak atimi.

16 Ja el *et leucse nohocred tah* et idivaig natimi u Kristo, etmu jim ehcamai aien; jam imyiahpas Atua va nitai ineigki:

17 va nitai ineig, nikavaig, *et mun yetpam* naopan ineig er atupun neruvaig an neom u Atua: el et uhup *um atupun* iraija, *uhpu* uauo ra era imyipalea intas-upene o Atua ara?

18 El et ehka nimyiatamaigvaig ilpu atimi atoh nedo *ura*, erupu ehchos eda a ilpu atimi eti alaigaheni, im ilpu atimi auatatimi?

19 Va nitai ineigki erumu ikni esgara *ehelen* ara sji eigki, era leucse nohocred ara vai intas o Atua, an nedo upene *ura*, et idivaig ehelen et inivajec aien, is um ago *niji itai asega*.

NUARIN-TAS ALUPAS 5.

EK ated ilpu atimi tas alep ehele-
mia ainyak, ek lep atimi tas alep
ainyak, um atimi asuptecnaig noho-
cred u Kristo, um atimi asipiaig
nupene ineig ulpu ehvaig:

2 akumu alayi siip u Atua ehele-
mia aijaua, um aminjinai *ra*, um
jim esjum, jam merit vaig; um jim
ago vai inmerit vai inpadiaig, jam
ago anliinmopomia cediaig;

3 um jim idivai ilpu atimarid
irai ilpu atimi eris ikni *imi caua*;
ja akumu asjaaicnaig an nefalaig
aijaua imi siip *o un*.

4 Et wit ehcolhos natimi alayi siip
esjilid, akupu leh korona esjilid
ineig aijaua inyi ti imlai.

5 Etmu idim ucco, ak ilpu takuras,
akumu imyiaiji intas o ilpu atimi
tas alep aijaua: akumu lep upo-
upo jipe vai caua aijaua asega, um
ahid nedo eropse imi caua: “et
idim ahcadai ra a Atua et ijinies in-
liinmopura ara, ja et aiheuc vai ra
aien et upoupo inliinmopura ara.”

6 Va nitai ineigki etmu upoupo
inliinmopomia aijaua *an namen* u
nikmai Atua emda iramia, va etpu
atijai caua aien an naopan upene:

7 um atijai iran naktaktai alupas
asega unyimia; et idim aktaktai
caua aien.

8 **AKUMU** aminjina nedo unyi-
mia aijaua, *um aiji lahlah*; et idim

atga jipe a Tiapolo, natimi tak atimi
iramia, et idivaig laion aunyau-
waig, um ahilek atimi par auahas
ra:

9 akumu ahcadai yin aijaua,
um aiji aktit an nimyisjis ninivai-
jec, eka ato aijaua, nikavaig, era
lep leucse niji ohocred iji eigki a
ilpu etoamia *an namen ura* an no-
bohtan.

10 Aku wit ohocred ipjidipjid ai-
jaua, etmu ago upene asega caua a
Atua, *um ikni ahtu caua*, *um ago*
emda *caua*, *um ikni upene caua*:
aien aigki et esjilid naiheuc o un,
is lep imyiacaij caija aien va nitai
upene iji eigki o un inyi ti lep ti,
vai Iesu Kristo.

11 *Etmu amen* natimi alupas ehe-
len, im nemda, irai iji mesese.
Emen.

12 EK mun aged intas ipjidipjid
imi caua ainyak irai Sailas, ek ika
ainyak et etoamia inivaijec aien,
um ated *caua*, um asuptecnaig
mika, naiheuc inivaijec o Atua
neigki eka apol iran aijaua.

13 Era aiheuc vai caua *nup an*
nakalasia Babelon, eris ehra ehtai
ra pan *ehelelia*, im lep Markus
inhal unyak.

14 Akumu aiheuc vai caua aijaua
an naijumnyi aiheuc.

Etmu amen neigpa ehelelia ase-
ga, eka *amen* ehele Iesu Kristo
aijaua. Emen.

PITRUS NAPOSTOLO.

NUARIN-TAS ALUPAS 1.

AK ilpu atimi leh nimyiisjis nini-
vajec upene et idivai cama, an
nedo atoh o Iesu Kristo Atua uja,
im Natimi imyiatamaig *caija*, *ek*
aiheuc vai caua *ainyak* Saimona
Pitrus, naheca im napostolo o Iesu
Kristo:

2 Etmu amen alupas ehelemia
naiheuc im neigpa an nato Atua
unyimia, im lep Iesu Natimarid
uja;

3 et idivaig eris alupai *caija* ni-
jii itai asega er umumoh vaig um
eccen vai Atua, an nemda esjilid o
un, va nato yin is ahlaig vai *caija*
aien vai natimi alupas im nemda o
un:

4 er lep alupai *caija* vaig niji tas
upyi asaig esjilid acen um upene;
va akupu asipiaig inliinmopoi Atua
aiaua irai itai iji eigki; akis idim
aha va nedo has ineig aiaua, *et*
amen an nobohtan vai immerit has
u atimi.

5 Im lep ineig, akumu auritai
alupas aiaua um asiaig pan nedo
upene an nimyiisjis ninivaijec
unyimia; im nato itai an nedo upene;

6 im nedo cesnitai an nato itai;
im nedo eti auatiemda an nedo ces-
nitai; im nedo eccen vai Atua an
nedo eti auatiemda;

7 im naiyu u inliinmopomia vai
ilpu etoamia an nedo eccen vai
Atua; im naiheuc va atimi an
naiyu u inliinmopomia vai ilpu
etoamia.

8 El et amen nitai iji eigki ehe-
lemia um esjilid, akupu eti tup
amen aiaua, jam ohoai itai an
natovaig Iesu Kristo Natimarid
uja.

9 Ja aien et eti o un nitai iji eigki,
et aupat nesganintan aien, *um*
aropoig, et *lep* eti imyiehva aien
mika, eris ago adicinadicin yin va
nedo has o un itu acen.

10 Va nitai ineigki akumu aur-
itai alupas aiaua, ak ilpu etoak,
um ago yi ipjin nahlaig vai caua
vaig, im nanacanac iramia: el eka
ago nitai iji eigki aiaua, akupu eti
lep adumoiy aiaua:

11 uhpu idim ago alupas vai
caua nefalaig pan an nelcau ineig
inyi ti lep ti o Iesu Kristo Nati-
marid uja, im Natimi imyiatamaig
caija.

12 Va nitai ineigki, eka idim ato
nitai iji eigki aiaua, um aiji aktit
an tas inivaijec ineig et ehcohos
pam, ja inki ti auatialidi ainyak
par ahugni lelmia irai iji adiat:

13 ek lep aktaktai ainyak mika,
et upene *vai nyak*, an namen unyak
an neom atga ineigki, par ahugni
caua, mika *aki* imyiehva itai *ai-
jaua*;

14 ek idim ato ainyak mika, ekpu
ude neom atga ineigki ainyak tupko,
et idivaig is ehvaig ehelek a Iesu
Kristo Natimarid uja.

15 Ekpu auritai emda ainyak,
mika, ek wit mas ainyak, yi amen
ehelemia nimyiehvaig nitai iji
eigki irai iji adiat.

16 Ecris idim eti apol aijama an tas ecsipece arapakau jam ahcil, an nasuptecnaig ehelemia unyima nemda im napam u Iesu Kristo Natimarid uja; ecris idim almoi natimi alupas o un aijama.

17 Is leh nedo eccen ehele Atua Etman aien, im nimyiahpas *yin*, an naopan iyehki is wat ahes nohran tah an lah esjilid, *um ika*, "Inhalav cop unyak neigki, ek imyiacitak *yin* ainyak."

18 Ecris atahaijeg nohran iyehki aijama is ahes an nohatag, an namen ehelen unyima an lolan nedoon itaup.

19 Et lep amen eheleija intas esjilid ineig um inivaijec, eris upyi asaig a ilpu profeta; et upene vai caua naktaktaivaig, et idivaig inlah er ecetai an nuarin aupat, um imyihum pan an naopan iyehki etpu athut nadiat anliinmopomia, um lep ehcohos inmoijeuv an nadiat *iran* :

20 akumu uhup aijaua um ato mika, et eti tup ispun ehcohos tah intas eris aged a ilpu profeta.

21 Is eti tup ispun ahes ehele atimi itu acen intas ineig eris upyi asaig a ilpu profeta: ja eris tas a ilpu atimi upene u Atua, is idivaig is ahu intas ira ra a Nesgan Upene.

NUARIN-TAS ALUPAS 2.

JA eris lep amen hal ilpu profeta efaifa ehele atimi, etpu idim ucco, erupu amen hal ilpu atimi esege efaifa ehelemia, erupu tup eklim atupun nesegene ineig ara et auahas *atimi*, um lep ateri Natimarid ineig is auarimlara, era inyiapam nitai ineig ira ra ara etpu auroauro um auahas ra.

2 Erupu apol an nedo has ura natimi inyi ahinag; uhpu lep asan tas has va nefalaig inivaijec va nedo ura.

3 Erupu lep leucose nimtan vai caua ara an tas efaifa vai inhias ira itai: inyi ti atumop um itu neruvaig ira ra, inyi ti imtatte nauahas ra vaig.

4 El is eti aiheuc vai ilpu agelo a Atua eris ago nedo has ara, jam ethaigse *ra* an nuarin aupat, um arore *ra* an wau an naupat, par aitgaig nadiat asuptecnaig nimtan iran;

5 um eti aiheuc va atimi an nobohtan itu acen, jam imyiatamaig Noa natimi asuptecnaig nedo atoh, im lep atimi is seven, um ika yi ahgarero nobohtan va atimi eti eccen vai Atua;

6 is lep atnamud inuarin-pece eraigki aien, Sotom im Comora, um auahas *atimi* an neruvaig esjilid, um ikni *ra*, mika *eri* atimi asjaicnaig *ara* imi ra sji eigki, erupu lep eti eccen vai Atua ara;

7 jam imyiatamaig Lot, natimi atoh nedo o un, is ohocred aien va nedo has esjilid u ilpu atimi auatatimi :

8 (is amen ehele ra natimi iyehki is atoh nedo o un, ja is ohocred inliinmopon atoh irai iji adiat va nedo imyipalea ineig *ura*, is almoi aien um atahaijeg :)

9 et ato a Natimarid par imyiatamaig ilpu atimi era eccen vai *yin* ara va nedo oop *ra*, um lep aminjinai ilpu atimi auatatimi um imyihum pan nadiat iyehki, uhpu asuptecnaig nimtan *imi ra* par aru nedo ura :

10 jam esjilid irai ra sji eigki, era ago nedo o nohura ara an merit acitak *ura*, um imyipalea ilpu atimi alupas *ura* : era ago nedo ijinies *ara*, um imyiisjis itai; era eti imtitaig ara par asan tas has vai ilpu atimarid.

11 Et esjilid nemda im natimi alupas u ilpu agelo, ja era eti asan tas has ara vai ra an nuhup u Natimarid.

12 Ja era idivai itai umoh et ti

lelra ara sji eigki, era tup ohun |
ache ara, eris ikni ra mika eri arop
ira ra um auahas ra, era tas has
ara va nitai iji eigki era eti ato
ara; uhpu idim auahas ra an nedo
has ura;

13 erupu leh nimtan nedo has ura
ara, *et idivai* ra era aktaktai ara,
um ika, et upene nimyiacitakvaig an
nadiat et ethi. *Era* itai emeig ara,
um itai has, um imyiacitak va nedo
efaifa ura, an hag ura ehelemia;

14 et ohua nesganimtara an gaij-
id, um eti atumop *par almoi* nedo
has; era anai ilpu atimi auatialidi
ara: et lep imjiyeuc inliinmopura
u inhas ira ra itai; uhpu idim au-
ahas ra;

15 eris ude nefalaig atoh ara, um
ahnag, um ahced nefalaig u Belam
inhal o Bosor, aien aigki is merit
nimtan nedo has aien;

16 ja eris ated yin va nedo has o
un; is tas *ehelen* nifo pop o un an
nohra atimi, um acaiji nedo ahnag
u naprofeta iyehki.

17 Era ehpai wai ara sji eigki,
jam ame, *im* naupat et ahre neihio;
eris ago vai ra inmechcim esjilid
inyi ti lep ti:

18 era asan *tas* ijinies acen ara
vai intakitai, um anai ra sji eigki
eris upyi aha ara vai ilpu atimi
ahnag, an merit has u nohura, im
nedo acitak:

19 era upyi asaig ara sji eigki
ehele ra mika eri eti aheca ara, ja
era idim ilpu aheca u nedo has ara:
et wat esjilid tah natimi iran tah, et
aheca o un aien.

20 El era aha va niji itai has an
nobohtan ara va nato Iesu Kristo
ura, Natimarid im Natimi imyiata-
maig *caiija*, ja par lep eccen um
auatialidi iran, et has namen apitac
ura iran yehki uhup.

21 El eris eti ato nefalaig an nedo
atoh ara, el is upene vai ra; jam
has natovaig, ja par lep atidjira an
tas alep upene eris alupai ra.

22 Ja et ucce nedo ura et idivaig

nasai itai inivaijec ineig, nikavaig,
“Et lep adumoij kuri u nitai ineig
et mun alo iran aien;” im lep
“picad eris yiri yin u nereucvaig
an nosal.”

NUARIN-TAS ALUPAS 3.

AK ilpu *etoak* upene, ek ehcero
aged nitasvitai ehelemia ai-
nyak; ek ahugni inliinmopomia
inivaijec ainyak iran raigki, mika
aki aktaktai aijaua:

2 um imyiehva intas eris upyi
asaig a ilpu profeta upene, im lep
nesege unyima ilpu apostolo o Na-
timarid im Natimi imyiatamaig
caiija:

3 akumu uhup aijaua um ato nitai
ineigki, nikavaig, erupu ehcohos a
ilpu atimi imyiafakahcil ira adiat
apitac, um ago niji merit has ura,

4 um ika, Intas upyi asaig va
napam o un eda? eris emesmas a
ilpu retpoiija itu acen, ja et amen
niji itai asega um uhup pam na-
opan ineig et idivaig an naopan
iyehki eris ago.

5 Ja era eti merit ara natovaig
nitai ineigki, nikavaig, is eteuc
nohatag itu acen, is lep ehlohohos
nobohtan an wai, um lep *amen* irai
wai, vai intas o Atua,

6 eris auahas nobohtan iyehki
iran, is ahgarero inwai iran:

7 jai nohatag im nobohtan an
naopan ineig, et amen vai intas
ineigki, er lep aminjinaig urin cop
va nadiat iyehki, uhpu asuptechnaig
nimtan imi atimi iran, um auahas
ilpu atimi era eti eccen vai Atua
ara.

8 Ja, ak ilpu *etoak* upene, akumu
ato nitai ineigki aijaua, nikavaig,
et idivai mesese wun dausant
nadiat et ethi an nuhup u Nati-
marid, et lep idivaig nadiat et ethi
mesese wun dausant.

9 Et eti esjaigse intas upyi asaig
o un a Natimarid, et idivaig nika u

nahaiji atimi *et mun* esjaigse *aien* ; ja et eropse inliinmopon aien vai caija, et eti merit aien mika eri emesmas tahi, ja *et merit aien* mika yi adumoiy pam inliinmopoi atimi asega.

10 Ja etpu yetpam nadiat u Natimarid et idivaig natimi ehneg itai an nepeig ; etpu yetpan an tid iran nohatag an nohran inyi alupas inmotjan, etpu ataigataig nohuu iji itai an cop alupas, uhpu lep atnamud nobohtan im niji auritai iran.

11 Uhpu idim auahas nitai iji eigki asega, va nitai ineigki eris idim ika akupu esjilid aijaua an nedo upene asega im nedo eccen vai Atua,

12 um aitgaig, um imyiehio napam u nadiat u Atua, uhpu ahli nohatag iran um auahas, etpu lep ataigataig nohuu iji itai an cop alupas.

13 Ja inta aitgaig nohatag mat akaija, im nobohtan mat, etpu amen iran nedo atoh, et idivaig intas upyi asaig o un.

14 Ak ilpu *etoak* upene, eka idim aitgaig nitai iji eigki aijaua ; va nitai ineigki akumu auritai emda

aijaua, mika yi ecet caua aien an neigpa, um ti nemeig im nitai has iramia ;

15 um aktaktai mika, et itai imyiatamaig *caua* nedo eti auatiemda u Natimarid uja ; et idivaig is lep aged imi caua a Paulo etoama upene, an narapakau ineig eris alupai yin ;

16 et idivaig is lep tas aien va nitai iji eigki, an nitasvitai asega *o un* ; ja et ehka natovaig nahaiji itai iran, era lep ago acal a ilpu atimi eti ato itai, im ilpu atimi eti amen aktit, et idivaig *era* lep ago ara irai tas et eche eris aged, va uhpu auahas ra.

17 Ak ilpu *etoak* upene, eka uhup aijaua um ato *nitai iji eigki* ; va nitai ineigki akumu aminjinai caua aijaua, va aki jim ahnag aijaua va nefaifa u ilpu atimi auatatimi, um adumoiy an nitai ineigki eka aiji aktit iran aijaua :

18 jam esjilid an naiheuc, im natovaig Iesu Kristo Natimarid uja im Natimi imyiatamaig *caiia*. *Uhm*u imyiahpas yin an naopan ineig im lep irai iji mesese. Emen.

NITASVITAI UHUP

o

J O A N E S.

NUARIN-TAS ALUPAS 1.

ECRA asuptecnaig ehelema *aijama* nitai iji eigki is eteuc itu acen um uhup pan, ecris atahajeg aijama, um almoi an nesganimtama, um ecetai, um ubli an nikmama, vai Intas umoh ;

2 (is lep ehcohos nitai umoh iran ineig, ecris almoi aijama, um tas vaig, um asuptecnaig ehelema nitai umoh iran ineig inyi ti lep ti, is amen ehele Etinan, is um ehcohos ehelema ;

3 *ecra* asuptecnaig ehelema *aijama* nitai iji eigki, ecris almoi

aijama, um atahaijeg, mika aki asipiai itai ehelema aijaua: eera idim asipiai itai ehele Etman aijama, im lep Iesu Kristo Inhal o un.

4 Eera aged nitai iji eigki imi caua aijama, mika aki imyiacitak alupas aijaua;

5 Ecris idim atahaijeg intas ineigki aijama ehelen, um asuptecnaig ehemia, nikavaig, et itai lah a Atua, et eti amen ehelen tah naupat.

6 Ele ta ika akaija inta asipiai itai ehelen, jam atga an naupat, inta ahcil akaija, um eti ago nedo inivaijec:

7 ja ele ta atga an lah akaija, et idivaig et amen an lah aien, inta asipiai itai ehelen akaija, et lep ago adicinadin caija va nedo has asega *uja* inja irai Iesu Kristo Inhal o un.

8 Ele ta ika akaija et ti nedo has uja, inta efaifa vai caija akaija, um eti amen nedo inivaijec eheleija.

9 Ele ta asuptecnai edo has uja akaija, et inivaijec aien, um atoh nedo o un, mika yi iknipagki edo has *uja*, um yiri caija va nauatati asega *uja*.

10 Ele ta ika akaija intis eti ago nedo has akaija, inta ika akaija et atimi ahcil aien, et lep eti amen eheleija intas o un.

NUARIN-TAS ALUPAS 2.

AK ilpu hal unyak, ek aged nitai iji eigki imi caua ainyak, mika aki jim ago nedo has aijaua. El et ago nedo has tah natimi, et eteuc natimi imyiahra caija ehele Etman, Iesu Kristo et atoh nedo o un:

2 et itai ahlap va nedo has uja aien: ja eti va *nedo has* uja ache, jam lep va *nedo has* u atimi asega an nobohtan.

3 Inta ato akaija mika, inta ato yin akaija va nitai ineigki, nikavaig, ele ta imyiaiji tas alep o un akaija.

4 Aien et ika aien, Ek ato yin

ainyak, jam eti imyiaiji tas alep o un, et atimi ahcil aien, um eti amen nedo inivaijec ehelen.

5 Ja aien et imyiaiji intas o un aien, et idim aiyu asega inliinmopon aien vai Atua: va nitai ineigki inta ato akaija mika, inta amen ehelen akaija.

6 Aien et asaig aien mika et amen ehelen aien, et upene vai yin nagovaig nedo et idiva nedo ineig is ago aien.

7 Ak ilpu etoak, ek eti aged tah intas alep mat imi caua ainyak, ja intas alep itu acen is amen ehemia irai iji adiat. Intas alep itu acen neigki, et lep intas iyehki akis atahaijeg aijaua itu acen um imyihum pam an naopan ineig.

8 Im lep ineig, ek aged intas alep mat imi caua ainyak; is inivaijec nitai ineig vai yin, *et lep inivaijec* vai caua, is idim ti pan itac naupat, et lep ememina inlah inivaijec an naopan ineig.

9 Aien et ika aien et amen aien an lah, jam acen inliinmopon vai etoan, is amen aien an naupat um uhum pam an naopan ineig.

10 Aien et aiyu inliinmopon aien vai etoan, et amen aien an lah, et eti eteuc nitai epihtau iran anliinmopon.

11 Ja aien et acen inliinmopon aien vai etoan, et amen aien an naupat, um atga an naupat, um eti ato nuarin ineig et apan iran aien; et idim eti alum itai nesganimitan va naupat.

12 Ek aged *intas* imi caua ainyak, ak ilpu hal *unyak*, va nitai ineig, nikavaig, uhpu eti aru nedo has unyimia va nidan.

13 Ek aged *intas* imi caua ainyak, ak ilpu atimi alupas, va nitai ineig, nikavaig, eka ato yin aijaua is eteuc aien itu acen um uhum pam. Ek aged *intas* imi caua ainyak, ak ilpu takuras, va nitai ineig, nikavaig, eka esjilid irai natimi auatatimi inaico aijaua.

Ek aged *intas* imi caua ainyak, ak ilpu hal *unyak*, va nitai ineig, nika-vaig, eka ato Etman aijaua.

14 Ek mun aged *intas* imi caua ainyak, ak ilpu atimi alupas, va nitai ineig, nikavaig, eka ato yin aijaua is eteuc aien itu acen um uhun pam. Ek mun aged *intas* imi caua ainyak, ak ilpu takuras, va nitai ineig, nikavaig, eka emda aijaua, is lep amen anliinmopomia *intas* o Atua, eka lep esjilid aijaua irai natimi auatatimi inaico.

15 Etmu jim aiyu inliinmopomia aijaua va nobohtan, im lep niiji itai an nobohtan. El et aiyu inliinmopon tah va nobohtan, el et eti aiyu inliinmopon aien vai Etmajja.

16 Et eti ahes ehele Etmajja niiji itai asega an nobohtan, *nikavaig*, inmerit has u nohuja, im inmerit has u nesganintajja, im *intas* ijinies vai inpadiaig, ja et ahes an nobohtan.

17 Etpu yetpan nobohtan, im lep nitai iiji eigki eh merit vaig: ja aien et imyiaiji *intas* o Atua aien, etpu amen aien irai iiji mese.

18 Ak ilpu hal *unyak*, naopan apitac neigki: akis idim atahaijeg aijaua mika etpu ham intaka kristo, et idim ucco, era amen intaka kristo et ahinag an naopan ineig; va nitai ineigki inta ato akaija mika, naopan apitac neigki.

19 Eris ude caija ara, ja eris eti tup ethi ache pan iraija ara: el eris tup ethi ache pan iraija ara, el eris amen eheleija ara: ja *eris ude caija* ara, va uhpu ato mika, eris eti tup ethi ache pan iraija ara asega.

20 Ja is aspi caua Aien et upene aien, eka lep ato niiji itai asega aijaua.

21 Ek mun eti aged *intas* imi caua ainyak va neti ato *intas* inivaijec unyimia, ja va natovaig unyimia; im lep va nitai ineig, nikavaig, et eti ahes an tas inivaijec tah *intas* ahcil.

22 Natimi ahcil a di? aien marom et asaig aien mika, et eti Kristo a

Iesu; et taka kristo aien, et ateri Etman im Inhal o un aien.

23 Aien et ateri Inhal o Atua aien, et eti amen ehelen a Etman: *ja aien et asuptecnaig Inhal o Atua aien, et amen ehelen a Etman.*

24 Etmu amen anliinmopomia nitai ineigki, akis atahaijeg aijaua itu acen um uhun pam. El et amen anliinmopomia nitai ineigki, akis atahaijeg aijaua irai iiji adiat, akupu lep apol aktit aijaua irai Etman im Inhal o un.

25 *Intas* upyi asaig o un neigki, is upyi asaig eheleija aien, nikavaig, nitai umoh iran ineig inyi ti lep ti.

26 Ek mun aged nitai iiji eigki ainyak imi caua vai ra era imyiah-nag caua ara.

27 Ja et amen anliinmopomia naspi caua ineigki, akis leh ehelen aijaua, et eti lep upene vaig tah natimi nesege imi caua vaig: ja er esege imi caua niiji itai asega an naspi *caua* ineigki, et lep inivaijec, um eti ahcil, er idim esege imi caua *an nedo ineigki*, et idim ucco, akupu apol aktit iran aijaua.

28 Va nitai ineigki, ak ilpu hal *unyak*, akumu apol aktit iran aijaua; va etpu emda inliinmopja akaija an naopan iyehki etpu ehcolhos aien, um eti ehcamai an nuhup o un an napam o un.

29 El eka ato aijaua mika, et atoh nedo o un, eka lep ato aijaua mika, is apos ra asega aien era ago nedo atoh ara.

NUARIN-TAS ALUPAS 3.

1 AKUMU almoi aijaua naiheuc esjilid ineig o Etmajja vai caija, nikavaig, er anvi nidaija par ika ilpu hal o Atua! va nitai ineigki era eti ato caija natimi an nobohtan, va nitai ineig, nikavaig, eris eti ato yin ara.

2 Ak ilpu *etoak* upene, inta ilpu hal o Atua akaija an naopan ineig;

er eti ato an naopan ineig, nikavaig, intupu idivai di akaija, ja inta ato akaija mika, et wit ehcohos aien, intupu idivai yin akaija; va nitai ineig, nikavaig, intupu ecet iktit upene yin akaija.

3 Ara asega era aitgai yin ara va nitai ineigki, era ago upene ra ara, et idivaig et upene aien.

4 Ara asega era ago nedo has ara, era lep imyipalea intas alep ara: et idim edo has neigki, nimyipaleavaig intas alep.

5 Eka ato aijaua mika, is ehcohos aien par iknipagki edo has uja; ja et eti eteuc tah nedo has o un.

6 Ara asega era amen ehelen ara, era eti ago nedo has ara: ara asega era ago nedo has ara, eris eti ecet yin ara, um eti ato yin.

7 Ak ilpu hal *unyak*, etmu jim imyiahnag caua tah natimi: aien et ago nedo atoh aien, et atoh nedo o un, et idivaig et atoh nedo o un.

8 Aien et ago nedo has aien, is ahes ehele Tiapolo aien; is ago nedo has a Tiapolo itu acen um uhun pam. Va nitai ineigki, is idim ehcohos a Inhal o Atua, mika yi auahas nauritai u Tiapolo.

9 Ara asega is apos ra a Atua, era eti ago nedo has ara; et idim amen anliinmopura nupsinitai o un: et ehka vai yin nagovaig nedo has, va nitai ineig, nikavaig, is apos yin a Atua.

10 Er ato ilpu hal o Atua, im ilpu hal o Tiapolo, va nitai ineigki: ara asega era eti ago nedo atoh ara, eris eti ahes ehele Atua ara, im lep ra et eti aiyu inliinmopura ara vai ilpu etoara.

11 Akis atahaijeg intas alep ineigki aijaua itu acen um uhun pam, mika yi aiyu jipe inliinmopja akaija vai caija:

12 *um* eti idivai Kein, aien is ahes ehele natimi auatatimi inaico aien, um atgei etoan. Is atgei yin aien vanhe? Va nitai ineig, nikavaig, is has nedo o un, ja is atoh nedo o etoan.

13 Ak ilpu etoak, jim imyiali aijaua, el era edemda vai caua natimi an nobohtan.

14 Inta ato akaija, nikavaig, intis anusjai vai inmas akaija, um umumoh, va nitai ineig, nikavaig, et aiyu inliinmopja akaija vai ilpu etoaija. Aien et eti aiyu inliinmopon aien vai etoan, et amen an mas aien.

15 Ara asega et acen inliinmopura ara vai ilpu etoara, era atimi atgei atmas ara: eka lep ato aijaua mika, et eti amen nitai umoh iran ineig inyi ti lep ti, anliinmopon tah natimi atgei atmas.

16 Inta ato akaija naiyu u inliinmopon, va nitai ineig, nikavaig, is mas aien vai caija: eris idim ika ti emesmas akaija vai ilpu etoaija.

17 Aien et ikni itai aien an nobohtan, um almoi nihki natimi u etoan, jam eti aiheuc vai yin, et idim eti aiyu inliinmopon aien vai Atua.

18 Ak ilpu hal *unyak*, ti jim aiheuc va atimi akaija an tas im nipjineucseija ache; jam *aiheuc vai ra* an nedo *uja*, um inivaijec.

19 Va nitai ineigki inta ato akaija mika, inta inivaijec akaija; etpu lep emda inliinmopja akaija an nuhup o un.

20 El et ated caija inliinmopja, et esjilid a Atua irai inliinmopja, et lep ato niji itai asega aien.

21 Ak ilpu *etoak* upene, el et eti ated caija inliinmopja, intupu ahlahusjai akaija an nuhup u Atua:

22 intupu lep leh nitai iji eigki asega akaija, inta ugni yin vaig akaija, va nitai ineig, nikavaig, inta imyiaiji tas alep o un akaija, um ago nedo ineig et upene an nuhup o un.

23 Intas alep o un neigki, nikavaig, inti asgeig an nidai Iesu Kristo Inhal o un akaija, um lep aiyu jipe inliinmopja vai caija, et idivaig is tas alep vai caija aien.

24 Aien et imyiaiji tas alep o un aien, et amen ehelen aien, *et* lep

amen aien ehelen. Inta ato akaija mika, et amen eheleija aien va nitai ineigki, nikavaig, is alupai caija Nesgan *Upene* aien.

NUARIN-TAS ALUPAS 4.

AK ilpu *etoak* upene, akumu jim imyiisjis ninivajec natimi asega aijaua, er ahu intas ira ra, jam aktaktai ra sji eigki, kit eris ahes ehele Atua ara, ka o'o: eris apaahni an nobohtan a ilpu profeta efaifa et ahinag.

2 Akupu ato Nesgai Atua aijaua va nitai ineigki, nikavaig, natimi asega er ahu intas ira ra, um ika is ham an nohun a Iesu Kristo, era ahes ehele Atua ara:

3 ja natimi asega er ahu intas ira ra, um ika is eti ham an nohun a Iesu Kristo, era eti ahes ehele Atua ara: intaka kristo neigki, akis atahajeg vaig aijaua mika etpu ham aien; et idim amen aien an nobohtan an naopan ineig.

4 Akis ahes ehele Atua aijaua, ak ilpu hal *unyak*, eka lep esjilid ira ra aijaua: et idim esjilid aien *et amen aien* ehele mia iran naico, et *amen aien* ehele atimi an nobohtan.

5 Era atimi an nobohtan ara: va nitai ineigki era tas ara va nobohtan, era lep atahajeg ra natimi an nobohtan.

6 Ecra ahes ehele Atua aijama; aien et ato Atua aien, et atahajeg cama aien; aien et eti ahes ehele Atua aien, et eti atahajeg cama aien. Va nitai ineigki inta ato nesgan nimityisjis ninivajec akaija, im lep nesgan nimityisjis nahcil.

7 **A**K ilpu *etoak* upene, etmu aiyu jipe inliinmopja akaija vai caija: et idim ahes ehele Atua naiyu u inliinmopja; is apos ra asega a Atua et aiyu inliinmopura ara *va atimi*, era lep ato Atua ara.

8 Aien et eti aiyu inliinmopon aien *va atimi*, et eti ato Atua aien, et idim itai aiyu a Atua.

9 Nitai ehvaig naiyu u inliinmopoi Atua vai caija neigki, nika-vaig, is abraig pam Inhal o un aien an nobohtan, is apos yin aien is tup ethi ache, mika ti umumoh akaija vai yin.

10 Neti aiyu neigki, nikavaig, is aiyu inliinmopja akaija vai Atua, ja *naiyu neigki*, is aiyu inliinmopon aien vai caija, um abrai Inhal o un, *mika yi* itai ahlap aien vai edo has uja.

11 Ak ilpu *etoak* upene, el is ucce naiyu u inliinmopoi Atua vai caija, eris idim ika eheleija yi aiyu jipe inliinmopja akaija vai caija.

12 Is eti ecet Atua tah natimi an tah naopan. El et aiyu jipe inliinmopja akaija vai caija, el et amen eheleija a Atua, et lep aiyu asega inliinmopja akaija vai yin.

13 Inta ato akaija, nikavaig, inta amen ehelen akaija, um lep *amen* eheleija aien, va nitai ineig, nika-vaig, is alupai caija Nesgan *Upene* aien.

14 Ecris ecetai aijama, um asuptecnaig mika, is abrai Inhal o un a Etman, *mika yi* atimi imyiatamaig atimi an nobohtan aien.

15 Aien et asuptecnaig aien, um ika et Hal o Atua a Iesu, et amen ehelen a Atua, um lep *amen* ehele Atua aien.

16 Inta ato akaija um imyiisjis ninivajec naiyu u inliinmopoi Atua vai caija. Et itai aiyu a Atua; aien et amen an naiyu u inliinmopon, et amen ehele Atua aien, um lep *amen* ehelen a Atua.

17 Et idim aiyu asega inliinmopja akaija, vai intupu ahlahusjai akaija an nadiat asuptecnaig nintan imi atimi; va nitai ineig, nikavaig, inta amen an nobohtan akaija et idivai yin.

18 Et eti ahes nimtitaig anliinmopja aiyu; ja et ahlo nimtitaig

naiyu asega anliinmopja: nitai auahocred *atimi* neigki, nimitaig *ura*. Aien et imtitaig aien, et eti aiyu asega inliinmopon aien.

19 Et aiyu inliinmopja akaija vai yin, va nitai ineig, nikavaig, is upyi hup aien um aiyu inliinmopon vai caija.

20 El et ika tah natimi, Et aiyu inliinmopok ainyak vai Atua, jam acen inliinmopon vai etoan, et atimi ahcil aien: aien et eti aiyu inliinmopon aien vai etoan et ecet yin aien, et ehka vai yin par aiyu inliinmopon vai Atua et eti ecet yin aien.

21 Intis leh intas alep ineigki ehelen akaija, nikavaig, Aien et aiyu inliinmopon aien vai Atua, etmu lep aiyu inliinmopon aien vai etoan.

NUARIN-TAS ALUPAS 5.

ARA asega era imyiisjis ninivaijec nitai ineigki ara, nikavaig, et Kristo a Iesu, is apos ra a Atua: ara asega et aiyu inliinmopura ara vai etman *tah*, et lep aiyu inliinmopura ara vai inhal o un.

2 Inta ato akaija mika, et aiyu inliinmopja akaija vai ilpu hal o Atua an nitai ineigki, nikavaig, an naiyu u inliinmopja vai Atua, im lep an nimyiaiiji tas alep o un uja.

3 Naiyu u inliinmopja vai Atua neigki, nimyiaiijivaig tas alep o un uja: et idim eti opouc intas alep o un.

4 Ara asega is apos ra a Atua, era idim esjilid ara irai iji itai an nobohtan: nitai er esjilid vaig irai iji itai an nobohtan neigki, *nikavaig*, nimyisjis ninivaijec uja.

5 Aien di aigki et esjilid aien irai iji itai an nobohtan? aien marom et imyiisjis ninivaijec aien mika, et Hal o Atua a Iesu.

6 Aien aigki is ham aien an wai im inja *iran*, Iesu Kristo marom; is eti *ham aien* an wai ache, ja an wai im lep inja *iran*. Et asuptec-

nai *yin* a Nesgan *Upene*, va nitai ineig, nikavaig, et inivaijec a Nesgan *Upene*.

7 Ehtaij asuptecnaig an nobatag ahtaij, nikavaig, Etman, *im* Intas, im Nesgan *Upene*: ja ehtaij tup ethi ache ahtaij raigki.

8 Ehtaij lep asuptecnaig an nobohtan ahtaij, nikavaig, Nesgan, im lep inwai, im inja *iran*: ja et idim tup ethi ache nitai eraigki.

9 Ele ta eteuc an tas asuptecnaig u atimi akaija, et esjilid intas asuptecnaig u Atua: intas asuptecnaig u Atua neigki, is ati vai Inhal o un aien.

10 Aien et imyiisjis ninivaijec vai Inhal o Atua aien, et amen nitai asuptecnaig anliinmopon: aien et eti imyiisjis ninivaijec vai Atua aien, et ika aien et ahcil aien; et eti imyiisjis ninivaijec aien nasuptecnaig u Atua vai Inhal o un.

11 Nasuptecnaig u Atua neigki, nikavaig, is alupai caija nitai umoh iran ineig inyi ti lep ti, et lep amen nitai umoh iran ineigki ehele Inhal o un.

12 Aien et amen ehelen a Inhal o un, et umoh aien; ja aien et eti amen ehelen a Inhal o Atua, et eti umoh aien.

13 EK mun aged nitai iji eigki ainyak imi caua, eka asgeig an nidai Inhal o Atua aijaua; va akupu ato aijaua, nikavaig, et amen ehelenja nitai umoh iran ineig inyi ti lep ti, um lep asgeig an nidai Inhal o Atua.

14 Nimyisjis ninivaijec vai yin uja neigki, nikavaig, ele ta ugni tah nitai akaija et idivaig nasaig o un, et atahaijeg caija aien:

15 ele ta ato akaija, nikavaig, et atahaijeg caija aien an nugni *yin* uja vai itai, inta ato akaija, nikavaig, inta leh akaija nitai iji eigki inta ugni yin vaig akaija.

16 El et alum etoan tah natimi nagovaig nedo has, jam eti *ago*

nedo has ineig ch mas vaig, etmu ugni itai aien, etpu alupai yin nitai umoh iran a *Atua* imi ra, era eti ago nedo has ineig ara ch mas vaig. Et eteuc nedo has ineig eh mas vaig: ek eti asaig ainyak mika yi alaigaheni vaig aien.

17 Nedo has neigki, nedo asega et eti atoh; ja et lep eteuc nedo has ineig er eti mas vaig.

18 Inta ato akaija, nikavaig, era eti ago nedo has ara asega is apos ra a *Atua*; ja et aminjinai yin aien is apos yin a *Atua*, et eti lep ubli yin natimi auatatimi inaico.

19 Inta ato akaija, nikavaig, intis ahes ehele *Atua* akaija, era lep amen atimi asega an nobohtan ehele natimi auatatimi inaico.

20 Inta lep ato akaija, nikavaig, is ham a *Inhal* o *Atua*, is lep alupai caija narapakau aien, mika ti ato yin akaija et inivaijec aien: inta lep amen ehelen akaija et inivaijec aien, Iesu Kristo *Inhal* o un. *Atua* inivaijec neigki, im lep nitai umoh iran ineig inyi ti lep ti.

21 Ak ilpu hal *unyak*, aminjinai caua aijaua vai ilpu atmas. Emen.

NITASVITAI ERO

o

J O A N E S.

AK intakata esga atimi eris ehtai euc, im ilpu hal unyum, *ek aiheuc* vai caua *ainyak*, natimi tas alep; et aiyu inivaijec inliinmopok ainyak vai caua; ja et ti ainyak ache, jam lep ra asega era ato intas inivaijec ara;

2 vai intas inivaijec et amen anliinmopja, etpu lep amen eheleija irai iji mesese:

3 Etmu amen ehelemia naiheuc, *im* neti aru, *im* neigpa, et ahes ehele *Atua* Etmajja, im lep Iesu Kristo Natimarid, *Inhal* o Etman, an nini-vaijec im naiyu.

4 Kis imyiacitak alupas ainyak, va nitai ineig, nikavaig, kis ecet nahaiji ilpu hal unyum ainyak nagovaig nedo inivaijec, et idivaig inleli intas alep u Etmajja uja.

5 Ek lep ugni euc ainyak, ak in-

takata esga atimi, ja ek eti aged intas alep mat imi euc ainyak, ja intas alep ineig is amen eheleija itu acen um uhun pam, nikavaig, yi aiyu jipe inliinmopja akaija vai caija.

6 Naiyu u inliinmopja *vai yin* neigki, mika ti ago nedo uja akaija et idivaig intas alep o un. Intas alep o un neigki, et idivaig akis atahaijeg aijaua itu acen um uhun pam, mika aki ago nedo ineigki aijaua.

7 Era adala an nobohtan a ilpu atimi efaifa et ahinag, era eti asupte-naig ara, um ika, is ham a Iesu Kristo an nohun. Natimi efaifa neigki, im lep intaka kristo.

8 Akumu aminjinai caua aijaua, va ecri jim etjo u nitai iji eigki aijama ecri ago aijama, jam leh neruvaig upene.

9 Ara asega era imyipalea ara,

um eti apol an nesege u Kristo, et eti amen ehele ra a Atua. Aien et apol an nesege u Kristo aien, et amen ehelen a Etman, im lep *Inhal o un*.

10 El et ham ehelemia tah, jam eti apos nesege ineigki, jim leh pam yin iraili eom *unyimia*, um jim ika ehelen, Kaiheuc vai euc :

11 aien et ika aien ehelen, Kai-

heuc vai euc, et asipiai edo has o aien.

12 Kis ika ainyak ki aged niji itai et ahinag imi caua, ja ek eti merit ainyak *nagedvaig* a peper im inwai apeig : ja ek ika ainyak ki apam ehelemia, mika ti tas jipe akaija, um imyiacitak alupas.

13 Era lep aiheuc vai euc a ilpu hal o etoam eris ehtai yin. Emen.

NITASVITAI ESEIJ

O

J O A N E S.

AK Ceus *etoak* upene, *ek aiheuc* vai euc *ainyak*, natimi tas alep ; et aiyu inivaijec inliinmopok ainyak vai euc.

2 Ak *etoak* upene, ek ugni *Atua* ainyak, mika an amen upene aiek an niji itai asega, um celcehe, et idivaig namen upene u nesgam.

3 Eris wat ham a ilpu etoaijau, um asuptecnaig *ehelek* nedo inivaijec unyum, et idivaig napol unyum an tas inivaijec, kis imyiacitak alupas ainyak.

4 Ek wat atahaijeg ainyak, nika-vaig, era apol an tas inivaijec a ilpu hal unyak, et imyiacitak esjilid inliinmopok ainyak.

5 Ak *etoak* upene, et inivaijec nedo iji eigki asega as ago aiek vai ilpu etoaijau, im lep vai tak atimi :

6 eris asuptecna nedo aiheuc unyum ara sji eigki an nuhup u nup an nakalasia : el et atau imi ra aiek an natga ura, et idiva *nedo aiheuc* u Atua, etpu upene nedo unyum :

7 eris apan ara vai nidan, jam eti leh tah nitai ehele nup urai tak pece.

8 Eris idim ika eheleija ti ago nedo aiheuc va atimi idivai ra sji eigki akaija, mika ti ehratau *ira ra* an tas inivaijec.

9 Kis aged intas imi nup an nakalasia ainyak : ja et eti atahaijeg cama a Taiotrifas, aien aigki et merit aien, mika yi esjilid ira ra.

10 Va nitai ineigki, el ek apam ainyak, ekpu imyiehva ainyak nedo ineig et ago aien, et asan tas ahnag vai cama aien, im intas has : jam eti ago nitai ineigki ache, et lep eti leh ilpu etoaija aien, jam acaiji ra era merit ara, um iknipagki ra an nakalasia.

11 Ak *etoak* upene, namu jim apitac an nitai ineig et has aiek, jai nitai ineig ache et upene. Aien et ago nedo upene aien, is ahes ehele Atua aien : ja aien et ago nedo has aien, is eti ecet Atua aien.

12 Era asan tas upene va Temitreus natimi asega, et idim inivaijec intas ura; egra lep asupteanaig *vai yin* aijama; eka lep ato aijaua mika, et inivaijec intas asupteanaig unyima.

13 Kis ika ainyak ki aged niji itai et ahinag, ja ek eti merit ai-

nyak nagedvaig imi euc an wai apeig im nitai aged:

14 ek ika ainyak ki alum euc tupko, tu tas jipe akaijau.

Etmu amen ehelum neigpa. Era aiheuc vai euc a ilpu etoaija. Namu aiheuc vaig athiathi ilpu etoaija aiek.

NITASVITAI

o

J U T A.

AK ilpu atimi iji eigki, is ago upene caua a Atua Etmaija, *um* aminjinai caua irai Iesu Kristo, eris upyi ahlaig vai caua, *ek aiheuc* vai caua *ainyak* Juta, naheca u Iesu Kristo, im etoi Jakobus:

2 Etmu amen alupas ehelemia naiheuc, im neigpa, im naiyu.

3 Ak ilpu *etoak* upene, kis wat auritai emda ainyak nagedvaig imi caua va nitai umoh iran ineig imi atimi asega, is idim ika irak ki aged *intas* imi caua, um ated *caua*, mika aki imyiisjis emda aijaua vai intas inivaijec ineig, eris ehcethi ache alupai ilpu atimi upene.

4 Eris auarahcil pam *cheleija* nahaiji atimi, eris upyi aged ra itu acen, mika eri leh neruvaig ineigki ara; ilpu atimi eti eccen vai Atua, era auoh tak ago ara an naiheuc o Atua pan an nedo has esjilid *ura*, um ateri Atua Natimarid et ethi ache, im Iesu Kristo Natimarid uja.

5 Ek lep merit ainyak nahug-nivaig lelmia an nitai ineigki, ja eka idim ato aijaua, nikavaig, is imyiatamaig ilpu atimi o un a

Natimarid an pece Ijipt, ja par apitac um auahas ra eris eti imyiisjis ninivaijec ara:

6 im lep ilpu agelo iji eig eris eti aiji aktit ara an natimi alupas ura, jam ude inuarin ineig eris amen iran, et aminjinai ra aien an naupat ineig et arahed ira ra um eti lep ti, um inyihum pan neruvaig *imi ra* an nadiat alupas:

7 et idivaig *nupu* Sotom im *nupu* Comora, im nup urai iji uari-pece arahed ira ra, eris ago nedo et idiva nedo ura ara, um acitak, um ispara apitac jipe ra a ilpu atamaig, eris ikni ra mika itai asjaaicnaig ara, um leucose nohocred an cop ineig inyi ti lep ti:

8 et um ucco, era lep ago emeig irai ohura a ilpu atimi umjeg almag iji eigki, um imyipalea ilpu atimarid, um asan tas has vai ilpu atimi alupas.

9 Ja is wat imyiisjis itai a Maikel, nagelo esjilid, ehcle Tiapolo, is imyiisjis aien va nohui Moses, ja is imtitaig aien par asan tas has vai yin, is tup ika aien, Etmu ated euc a Natimarid.

10 Ja eris asan tas has ara sji eigki va nitai iji eigki eris eti ato ara: ja era auahas ra ara an nitai iji eigki era ispara ato ara, et idivaig niji itai umumoh et eti eteuc lelra.

11 A'a, auwe vai ra! eris idim ago nedo o Kein ara, um athut emda pan u nedo ahnag u Belam va nintan, um auahas ra an nehtauo u Kora.

12 Era *idivaig* neduei itai ara sji eigki irai hag an naiyu jipe u inliinmopomia, an hag ura ehelemia, era hag ara jam eti imtitaig: era *idivaig* naupat ara et eti amen incaupda iran, et ahre jipe nintinjop; *im* incal imlai, eh ti nohoan iran, *um* mas acen, er atecrei pan an nievan;

13 *im* nepeau agrei an jop, er asuptecnaig nitai ehcamai vaig ura; *im* moijeuv et eti amen aktit, erupu amen ara an mehcim esjilid irai iji mesese.

14 Is lep upyi asaig vai ra sji eigki a Inok, natimi is seven ahes irai Atam, um ika, "Etpu idim ham a Natimarid im lep ilpu atimi upene o un et ahinag acen ehelen,

15 par asuptecnaig nintan imi atimi asega; um lep aru irai ilpu atimi asega eti eccen vai Atua ira ra, va nedo eti eccen asega ura vai Atua, eris ago ara an nedo eti eccen vai Atua ura, im lep vai *intas* has asega, eris asaig vai Atua a ilpu atimi eti eccen vai yin."

16 Era ulikulik ara sji eigki, um etgai itai, um imyiaiji merit has ura; era lep asan tas ijinies acen ara, um imyiahpas atimi mika eri leh niji itai *ura* ara.

17 Ak 'ilpu *etoak* upene, akumu lep aktaktai aijaua intas eris upyi asaig a ilpu apostolo o Iesu Kristo Natimarid uja;

18 eris idim asaig ehelemia ara mika, erupu ehcohos a ilpu atimi imyiafakahcil an naopan apitac, um imyiaiji merit has ura an neti eccen vai Atua *ura*.

19 Ara aigki era ude caua ara, um ago nedo an nobohtan, et eti amen ehele ra a Nesgan *Upene*.

20 Ja akumu aiji aktit aijaua, ak ilpu *etoak* upene, an nimyisjis ninivaijec unyimia et upene acen, um ugni itai irai Nesgan *Upene*;

21 etmu lep amen naiyu u inliinmopomia aijaua vai Atua, um aitagai naiheuc o Iesu Kristo Natimarid uja, va nitai umoh iran ineig inyi ti lep ti.

22 Akumu aiheuc va ahaiji atimi aijaua, um aktaktai ra an neche u nedo ura:

23 jam imyiatamaig nahaiji ra an nimyicoho, um atoraliak ra an cop; akumu lep amcel vai napelumai *ura* aijaua et emeig va nohura.

24 AIEN et emda aien par aminjinai caua, va aki jim eropse aijaua, um ikni *caua* upene an nuhup u natimi alupas o un, an nimyiacitak alupas *unyimia*,

25 aien et Atua arapakau ache aien, im Natimi imyiatamaig caija, *etmu eteuc* nimyiahpas yin, im natimarid o un, *im* natimi alupas o un, im nemda o un, an naopan ineig im lep irai iji mesese. Emen.

NITAI EHVAIG

IS AGED

A J O A N E S.

NUARIN-TAS ALUPAS 1.

NITAI ehvaig u Iesu Kristo, is alupai yin a Atua, mika yi asuptecnaig aien ehele ilpu aheca o un nitai iji eigki eris idim ika inyi ti laulau um yetpam; is lep abraï nagelo o un aien, mika yi asuptecnaig aien ehele Joanes naheca o un :

2 aien aigki is tas aien vai intas o Atua, im lep va nasuptecnai Iesu Kristo, im lep va niji itai asega is ecetai aien.

3 Et mun ahesmoij natimi ineig et esvi intas iji eigki eris upyi asuptecnaig aien, im lep ra era atahaijeg, um aminjinaig nitai iji eigki er aged iran : et mun ubutpotet u naopan iye hki.

4 **AK** nup urai ekalasia *an nuarin-pece* et seven an *pece* Esys, *ek aiheuc* vai caua *ainyak* Joanes : *Etmu amen* ehelemia naiheuc im neigpa ineig et ahes ehelen, is upyi eteuc aien, um lep eteuc an naopan ineig, ja etpu lep eteuc aien ; im lep ehele Nesgan et seven era amen ara an nuhup u dorona o un ;

5 im lep ehele Iesu Kristo, natimi asuptec naiginivaijeg, *um* metto irai ilpu atimi anusjai vai inmas ura, *um* esjilid irai ilpu atimarid an nobohtan. Aien aigki is aiyu inliinmopon aien vai caija, um yiri caija vai edo has uja an ja iran,

6 um ikni caija, mika ti ilpu atimarid akaija, um ilpu atimi ahlap u Atua Etman ; *etpu* esjilid aien, um lep atimarid, irai iji mesese. Emen.

7 ¶ **Etpu** idim ham aien irai epeig ; erupu ecet yin atimi asega, im lep ra eris aheca yin ara : erupu aunyauwaig vai yin nup urai iji pece asega an nobohtan. Maiya, Emen.

8 Ek Alfa ainyak um lep Omeca, natupun u itai um lep nehni u itai, et ika a Natimarid ineig, is upyi eteuc aien, um lep eteuc an naopan ineig, ja etpu lep eteuc aien ; et idim emda acen aien.

9 Ek Joanes ainyak etoamia, ek lep apah *vai caua* ainyak an nohored *uja*, im lep an nelcau u Iesu Kristo, im nedo eti auatiemda o un, kis amen ainyak an haklin-pece iye hki, nidan Patmos, vai intas o Atua, im lep va nasuptecnai Iesu Kristo.

10 Kis alhuumtidec ainyak an nadiat u Natimarid, um atahaijeg nohran esjilid an nidjik, is idivaig intoho,

11 is ika, Ek Alfa ainyak um Omeca, natimi uhup um lep natimi apitac : Namu aged aiek an nitasvitai nitai iji eigki na mun ecetai aiek, um inyiapan ehele ekalasia *an nuarin-pece* et seven an *pece* Esys, nikavaig, Efesus, im Smirna, im Percamos, im Daiataira, im Sarris, im Filatelfea, im Leotesia.

12 Kis ahidai nyak ainyak, mika ki ato nohran iyehki is tas ehelek. Kis wat ahidai nyak ainyak, um ecetai lamp colt is seven;

13 im lep *tah is ethi* juju an niblai lamp is seven, et idivaig Inhal o natimi, is amen iran.napel-umai um ahlause u neduon, im lep nitai ahid colt an nijihgan.

14 *Is* ahi numri nidjinin, um idivaig numri siip ahi, is idivai sno nidjinin; um idivaig incopre nesganintan;

15 is idivaig bras naunau neduon, eh wat ahen an cop; is idivaig inmotjan jop alupas nohran;

16 is amen an matan inmoijeuv is seven; is ahes an nipjineucsen nauitoga is arig nahaijin im nahaijin: is idivaig nagesega nesganintan an nememina alupas o un.

17 Kis wat ecet yin ainyak, kis eropse u neduon ainyak, um idivaig natimi mas. Is atijai inmatan aien irak, um ika ehelek, Jim imtitaig aiek; ek atimi uhup ainyak, um lep atimi apitac:

18 ek atimi umoh ainyak; kis mas ainyak; ja ekpu idim umoh ainyak irai iji mesese. Emen. Et lep amen ehelek kii urin umatmas im inmas.

19 Aged nitai iji eigki aiek na mun ecetai aiek, im nitai iji eigki et eteuc, im nitai iji eigki etpu eteuc an ti pan itac vaig nitai iji eigki;

20 *nikavaig*, nitai adenaig vai moijeuv et seven, na mun ecetai aiek an matak, im lep lamp colt et seven. Era ilpu agelo irai ekalasia an *nuarin-pece* et seven inmoijeuv et seven; et lep ekalasia an *nuarin-pece* et seven lamp et seven, na mun ecetai aiek.

NUARIN-TAS ALUPAS 2.

NAMU aged *intas* aiek imi nagelo an nakalasia Efesus, *um ika*,

Et asan tas iji eigki aien, et asjiraig inmoijeuv et seven an matan aien, *um atga* an niblai lamp colt et seven, *um ika*,

2 Ek ato niji auritai unyum ainyak, im nauanaheca unyum, im nedo eti auatiemda unyum, im nesjum unyum vai ilpu atimi ago nedo has: as lep ahilek nedo ura aiek era ika ara era ilpu apostolo, ja o'o, um ato mika, era ilpu atimi ahcil ara:

3 as ohocred aiek, um eti auatiemda, as lep auanaheca aiek va nidak, um eti auatialidi.

4 Ja ek ato ainyak *nitai ineig* vai enc, nikavaig, as ude nupyi aiyu u inliinmopom aiek.

5 Aktaktai nitai ineig aiek as eropse iran aiek, um adumoij anliinmopom, um ago nauritai iji eigki as upyi ago aiek; el et eti ucce, ki auroauro ainyak um yetpam ehelum, um atipagki lamp unyum an nuarin o un, el et eti adumoij anliinmopom aiek.

6 Ja na ago nitai ineigki aiek, nikavaig, na amcel vai edo o ilpu atimi leh imi Nikolas aiek, ek lep amcel vaig ainyak.

7 Aien et eteuc intikgan aien, etmu atahaijeg aien intas iji eigki et asaig a Nesgan *Upene* ehele ekalasia: Aien et esjilid aien, ekpu alaan ainyak, mika yi caig aien nohoan cai ineig er umumoh vaig, juju a paratais u Atua.

8 NAMU aged *intas* aiek imi nagelo an nakalasia Smirna, *um ika*,

Et asan tas iji eigki aien, is atimi uhup aien um lep atimi apitac, aien is mas aien um lep umoh, *um ika*,

9 Ek ato niji auritai unyum ainyak, im nohocred unyum, im nihki natimi unyum, (ja na ikni itai aiek,) *ek lep ato ainyak* intas has esjilid ura, era ika ara era upu Jutai, ja o'o, era ilpu atimi alaigaheni vai Satana ara.

10 Jim imtitaig tah nohocred iji eig napu leucse aiek: etpu idim ikni nahaijimia iraili eom ipjin a Tiapolo, mika yi oop caua; akupu leucse nohocred aijaua ira adiat inyi ten: *ja* etmu inivaijec inliinmopom aiek um yetpan u unmas *unyum*, ekpu adgaig korona imi euc ainyak va nitai umoh iran.

11 Aien et eteuc intikgan aien, etmu atahaijeg aien intas iji eigki et asaig a Nesgan *Upene* ehele ekalasia. Aien et esjilid aien, inyi ti auahas yin inmas apitac.

12 NAMU aged *intas* aiek imi nag-clo an nakalasia Percamos, *um ika*,

Et asan tas iji eigki aien, et amen ehelen nautoga ineig et arig nahaijin im nahaijin, *um ika*,

13 Ek ato niji auritai unyum ainyak, im lep inuarin ineig na amen iran aiek, inuarin *et amen* iran dorona o Satana: ja na apol an nidak aiek, as lep eti ateri nim-yiisjis ninivaijec nyak aiek, ira adiat iji ehki eris atgei Antipas ehelemia, an nuarin ineig et amen iran a Satana, *is* atimi asuptecnaig inivaijec unyak aien.

14 Ja ek ato ainyak niji itai et eti elpat vai euc, nikavaig, era amen ehelum tah era apol an nesege u Belam ara, is esege imi Belak aien, mika yi ati nitai epihtau iran an nuhup u nupu Isreel, mika eri caig nitai iji eigki ara eris ahlap iran vai ilpu atmas, um ago ingaijid.

15 Era lep amen ehelum ara sji eigki era apol an nesege ineig u ilpu atimi leh imi Nikolas ara, ek amcel vaig ainyak.

16 Adumoij aiek anliinmopom; el et eti ucce, ki auroauro ainyak um yetpam ehelum, um ati nedoa vai ra an nautoga ineig *et ahes* an nijineucsek.

17 Aien et eteuc intikgan aien, etmu atahaijeg aien intas iji eigki et asaig a Nesgan *Upene* ehele ekal-

asia. Aien et esjilid aien, ekpu alaan manna ainyak er adenaig, ekpu lep alupai yin inhat ali ainyak, *et amen* nidan mat iran hat iyehki er aged, ja et eti ato tah natimi, aien ache et leh aien.

18 NAMU aged *intas* aiek imi nag-clo an nakalasia Daiataira, *um ika*,

Et asan tas iji eigki a Inhal o Atua, aien et idivaig incopre nes-ganimtan aien, um lep idivaig bras naunau neduon, *um ika*,

19 Ek ato niji auritai unyum ainyak, im naiheuc *unyum*, im nauanaheca *unyum*, im ninyiisjis ninivaijec *unyum*, im nedo eti auatiemda unyum, im niji auritai unyum; *et* esjilid niji eigki et apitac iran ji ehki is upyi hup.

20 Ja ek ato ainyak niji itai et eti elpat vai euc, nikavaig, as eti acaiji intakata iyehki Jesebel aiek, et ika aien et aprofeta, vai yi jim esege aien um imyiahnag ilpu aheca unyak, mika eri ago ingaijid ara, um hegai itai er ahlap iran vai ilpu atmas.

21 Kis ati naopan ainyak mika yi adumoij anliinmopon aien vai ingaijid o un; ja is eti adumoij anliinmopon aien.

22 Ekpu idim atise yin an tinan ainyak, etpu lep esjilid nohocred ura era ago ingaijid iran ara, el era eti adumoij anliinmopura ara vai edo ura.

23 Ekpu auahas ilpu hal o un ainyak an mas; erupu ato a nup urai ekalasia asega mika, ainyak aigki ek ahilek naktaktai u *atimi* ainyak im inliinmopura: ekpu lep aru iramia asega ainyak yi idivai edo unyimia.

24 Ja ek asaig ainyak ehelemia, im lep ehele ra Daiataira, ara asega eris eti leh nesege ineigki ara, um eti ato nedo ubo o Satana, et idivaig era asaig ara, *um ika*, Inki ti atijai iramia ainyak tah nitai ahel-wei et eche.

25 Ja akumu apol emda aijaua an nitai ineig et amen ehelemia, um yetpan an naopan iyehki ekpu ham ainyak.

26 Aien et esjilid aien, um amin-jinaig nauritai unyak um yetpan an nehni o un, ekpu ati yin ainyak, mika yi esjilid aien irai iji pece:

27 etpu atimarid ira ra aien an mopul hat; uhpu ahtagrei ra et idivaig nipjihat: et idivaig kis leh ehele Etmak ainyak.

28 Ekpu alupai yin inmoijeuv u nadiat ainyak.

29 Aien et eteuc intikgan aien, etmu atahajeg intas iji eigki aien, et asaig a Nesgan *Upene* ehele ekalasia.

NUARIN-TAS ALUPAS 3.

1 NAMU aged *intas* aiek imi nagelo an nakalasia Sartis, *um ika*,

Et asan tas iji eigki aien, et amen ehelen Nesgai Atua et seven, im inmoijeuv et seven, *um ika*, Ek ato niji auritai unyum ainyak, er ika na umoh aiek, ja nai mas aiek.

2 Namu aiji aiek, um ago emda nitai iji eigki et amen *ehelum*, jam ubutpotet u inmasvaig: ek mun ecetai ainyak, nikavaig, et eti upene asega niji auritai unyum an nuhup u Atua.

3 Namu imyiehva nedo unyum aiek as wat leh *intas-upene* aiek um atahajeg vaig, um apol upene *iran*, um adumoij anliinmopom. El et eti aiji aiek, ekpu ham ehelum ainyak et idivaig natimi ehneg itai, napu eti ato aiek inuarin-nadiat ineig ekpu ham ehelum ainyak.

4 *Ja* era amen ehelum Sartis natimi et eti elpat, eris eti emeig ira apelumai ura ara; erupu edo ehelek ara ira *apelumai* ahi; era idim upene ara.

5 Aien et esjilid aien, uhpu aso yin ira apelumai ahi, ekpu eti ohpodohpod nidan ainyak an nitas-

vitai va nitai umoh iran, ja ekpu asuptecnaig nidan ainyak an nuhup u Etmak, im lep an nuhup u ilpu agelo o un.

6 Aien et eteuc intikgan aien, etmu atahajeg intas iji eigki aien, et asaig a Nesgan *Upene* ehele ekalasia.

7 NAMU aged *intas* aiek imi nagelo an nakalasia Filatelfea, *um ika*,

Et asan tas iji eigki aien et upene aien, aien et inivaijec aien, aien et amen ehelen "kii u Tevit, aien et asalgei intapanes aien, ja et eti atapanes tah natimi; um lep atapanes, ja et eti asalgei tah natimi," *um ika*,

8 Ek ato niji auritai unyum ainyak: ek mun idim ati an nuhup unyum ainyak neucese neom et asalgei, ja et eti emda tah natimi natapanesvaig iran: na wat eti emda aiek, jam imyiaiji intas unyak, um eti ateri nidak.

9 Ekpu idim abrai nahaiji ra sji eigki ainyak era ilpu atimi alaigheni vai Satana ara, era ika ara era upu Jutai, ja o'o, era ahcil ara; ekpu abrai ra ainyak, mika eri apam ara um atpuse u neduom, um ato mika et aiyu inliinmopok ainyak vai euc.

10 As aminjinai intas va nedo eti auatiemda unyak aiek, va nitai ineigki ekpu aminjinai euc ainyak, an naopan iyehki uhu wit ohocred atimi asega, par oop ra era amen an nobolhtan ara.

11 Ekpu idim auroauro ainyak um ham: namu asjiraig ipjin nitai ineig aiek, et amen ehelum, vai yi jim atipagki korona unyum tah natimi.

12 Aien et esjilid aien, ekpu ati yin ainyak, mika yi oboatau aien an neom ahlap u Atua unyak; inyi ti lep alau ijo aien: ekpu aged iran ainyak nidai Atua unyak, im nidai inuarin-pece u Atua unyak, Jerusalem mat *neigki*, et ahes ehele

Atua unyak an nohatag, um asuol sepa: *ekpu* lep *aged iran* tidak mat *ainyak*.

13 Aien et eteuc intikgan aien, etmu atahaijeg intas iji eigki aien, et asaig a Nesgan *Upene* ehele ekalasias.

14 NAMU *aged intas* aiek imi nagelo an nakalasias Leotesias, *um ika*,

Et asan tas iji eigki a Emen, natimi asupteanaig upene um ini-vaijeg, aien is upyi eteuc aien irai iji itai is ago a Atua, *um ika*,

15 Ek ato niji auritai unyum ain-yak, nikavaig, na eti eyueyu aiek, um eti ehri: ek merit ain-yak mika an eyueyu aiek, ka ehri.

16 Ekpu alo iram ain-yak, va nitai ineig, nikavaig, na aheyueyu aiek, jam eti eyueyu, um eti ehri.

17 Na ika aiek, Ek idim ikni itai ain-yak, um ahinag inpadiaig u-nyak, um eti ihki natimi ain-yak; jam eti ato, nikavaig, na ohocred aiek, um eti esga natimi, um ihki natimi, um aupat nesganintam, um tup atga.

18 Va nitai ineigki ek ika ehelum ain-yak, namu auanimtai colt ineig aiek vai nyak er ago upene an cop, va apu ikni itai aiek; im lep apelu-mai ahi, va apu aso euc aiek *iran*, va uhpu eti ecetai intup atga un-yum, nitai ehcamai vaig; um lep aspi nesganintam aiek an nitai aspi esgaiimta atimi, va apu alum itai aiek.

19 Ara asega et aiyu inliinmopok ain-yak vai ra, ek acaiji ra ain-yak, um ated ra: va nitai ineigki namu emda aiek, um adumoij anliin-mopom.

20 Ek idim aiji ain-yak u intap-anes, um eteceteci: el et atahaijeg nohrak tah, um asalgei intapanes, ekpu han anliin *neom* ain-yak ehe-len, um hag ehelen; *etpu* lep *hag* ehelek aien.

21 Aien et esjilid aien, ekpu alu-

pai yin ain-yak, mika yi ateuc ehe-lek aien a dorona unyak, et idivaig kis lep esjilid ain-yak, um ateuc ehele Etmak a dorona o un.

22 Aien et eteuc intikgan aien, etmu atahaijeg intas iji eigki aien, et asaig a Nesgan *Upene* ehele ekalasias.

NUARIN-TAS ALUPAS 4.

IS wat ti pan itac nitai iji eigki, I kis almoi ain-yak, um ecetai intap-anes an nohatag is asalgei: kis atahaijeg nohran tah ain-yak nuhup-vaig, is idivaig intoho; is tas ehe-lek, um ika, Aridji pam aiek ig-caki, ekpu ehvaig ehelum ain-yak nitai iji eigki eris ika etpu yetpam an tak aopan.

2 Kis auroauro ain-yak um ahu-umtidec: *kis* idim ecetai dorona is ethi *ain-yak* eris ati an nohatag, is ateuc a dorona iyehki tah is ethi:

3 aien is ateuc *iran* aien, is idi-vaig inhat naunau aien im inhat cop: is arahed a dorona inluterau, is idivaig inhat emelmat.

4 *Is amen* nitai ateuc is twente for, um arahed a dorona iyehki: kis ecet ilpu atimi tas alep is twente for ain-yak nateucvaig irai itai ateuc iji ehki, eris aso ra ira apelumai ahi; eris lep adgaig korona colt ara.

5 Is ahes a dorona nawainapit, im innumuka, im nohrai itai: *is amen* an nuhup u dorona incop ala-hala is seven; Nesgai Atua et seven ji eigki.

6 *Is* lep *amen* an nuhup u dorona injop ahula, is idivaig narasin no-hatag: *eris amen* an niblai dorona um arahed iran niji itai umumoh is for, is ahinag nesgaiimtura an nuhup ura, im lep irai idjira.

7 *Is* idivaig laion nitai umoh is ethi, um lep idivaig kurimatau nitai umoh is ethi, um lep idivaig nes-ganimta atimi nesganintan nitai

umoh is ethi, um lep idivaig in-meijcop ae nitai umoh is ethi.

8 Is siks ehni nehpa iji itai umumoh is for iji ehki: is lep ahinag nesgaiimtara iraili *ehpara* ara, um arahed ira *ra*: era eti atumop ara irai iji adiat im niji epeig, um ika, Na upene, na upene, na upene aiek, ak Natimarid Atua emda acen, as upyi eteuc aiek, um lep eteuc an naopan ineig, jai napu lep eteuc aiek.

9 Eru wit imyiahpas, um ago nedo eccen, um naaurineig vai yin, et ateuc a dorona iyehki aien, um umoh irai iji mesese, a niji itai umumoh iji ehki,

10 erupu eropse an nuhup o un et eteuc aien a dorona a ilpu atimi tas alep twente for, um alaigaheni vai yin et umoh aien irai iji mesese, um erekhaigse korona ura an nuhup u dorona, um ika,

11 Ak Natimarid, na upene aiek inlehvaig nimyiahpas, im natimi alupas, im nemda: as ago niji itai asega aiek, eris upyi ago va nasaig unyum, et lep amen *an naopan ineig*.

NUARIN-TAS ALUPAS 5.

KIS ecetai nitasvitai is ethi ainyak an matan is ateuc aien a dorona, eris aged inliin im lep itac, is amen nitai atapanes is seven iran.

2 Kis lep ecet nagelo emda is ethi ainyak, is ahlaig aien, is ijinies nohran, *um ika*, Et upene a di nalgeivaig nitasvitai ineigki, um ikni-pagki itai atapanes iran?

3 Ja is eti emda tah an nohatag, im nobohtan, im lep ithan nobohtan, nalgeivaig nitasvitai iyehki, um almoi.

4 Kis taig alupas ainyak, va nitai ineig, nikavaig, eris eti ecet tah is upene aien nalgeivaig nitasvitai iyehki, um esvi, ka almoi.

5 Ja is ika ehelek tah is ethi irai ilpu atimi tas alep, Jim taig aiek, et

idim emda a Laion irai ilpu mapoi Juta, et mapoi Tevit aien, nalgeivaig nitasvitai, um ikni-pagki itai atapanes et seven iran.

6 Kis lep ecetai ainyak, is idim aiji juju an niblai dorona im niji itai umumoh is for iji eigki im lep ilpu atimi tas alep, Lam is ethi, is idivaig eris atgei yin, is seven nepat o un, um seven nesganimitan; Nesgai Atua et seven ji eigki, er imyiterimterim an nobohtan asega.

7 Is apan aien, um leh nitasvitai iyehki an matan is ateuc a dorona.

8 Is wat leh nitasvitai iyehki aien, eris eropropse an nuhup u Lam niji itai umumoh is for iji ehki, im ilpu atimi tas alep is twente for, eris apos niji harp ara asega, im niji ipjicolt is ohua nitai auanipin upene iran; niji alaigaheni u ilpu atimi upene ji eigki.

9 Eris acesaces nohranital mat ara, um ika, Na upene aiek inlehvaig nitasvitai ineigki, um ikni-pagki itai atapanes iran; eris idim atgei euc, as auarimtama an ja iram aiek vai Atua ehele nup urai iji pece asega, im niji tas, im niji elcau, im niji immim;

10 as lep ikni cama aiek, mika eeri ilpu atimarid aijama im ilpu atimi ahlap u Atua unyima: erupu esjilid an nobohtan aijama.

11 Kis almoi ainyak, um ahgei nohrai ilpu agelo is ahinag eris arahed a dorona ara, im niji itai umumoh iji ehki, im ilpu atimi tas alep, eris ehcahinag ten dausant ara, um ehcahinag dausant;

12 eris ahlaig ijinies ara, um ika, Et upene a Lam ineig, eris atgei yin, inlehvaig natimi alupas *o un*, im niji itai ikni, im narapakau, im nemda, im nimyiahpas, im naunau, im naaurineig.

13 Kis ahgei niji itai asega eris ago ainyak, et amen an nohatag, im nobohtan, im ithan nobohtan, im in-jop, im niji itai asega amen iran, eris ika ara, *Etmu eteuc* naaurineig, im

nimyiahpas, im naunau, im nemda, vai yin et ateuc aien a dorona, im lep vai Lam, irai iji mesese.

14 Eris ika niji itai umumoh is for iji ehki, Emen. Eris eropropse a ilpu atimi tas alep is twente for, um alaigaheni vai yin et umoh aien irai iji mesese.

NUARIN-TAS ALUPAS 6.

IS wat atipagki nitai atapanes is ethi a Lam, kis almoi ainyak, um atahaijeg tah is ethi irai iji itai umumoh is for iji ehki, is idivaig immunuka nohran, is ika aien, Apam aiek, um almoi.

2 Kis almoi ainyak, um ecetai hors ahi is ethi: aien is ateuc iran aien, is apos nefana aien; eris lep alupai yin korona is ethi: is apan aien um ahau *atimi*, mika yi esjilid nahau ra.

3 Is wat lep atipagki nitai atapanes tu aien, kis atahaijeg nitai umoh tu ainyak, is ika aien, Apam aiek, um almoi.

4 Is lep apan hors is eche is cop: eris alupai yin is ateuc iran aien, mika yi atipagki neigpa an nobohtan, mika eri atgei jipe ra ara: eris alupai yin nauitoga alupas.

5 Is wat lep atipagki nitai atapanes dri aien, kis atahaijeg nitai umoh dri ainyak, is ika aien, Apam aiek, um almoi. Kis almoi ainyak, um ecetai hors apeig; aien is ateuc iran aien, is apos nitai asjaaic-naig an nikman aien.

6 Kis atahaijeg nohran tah an niblai iji itai umumoh is for iji ehki ainyak, is ika, *Etmu* imtai hwiit inuari-mune et ethi an nip-jinitai et ethi, um imtai barle inuari-mune et ethi an nipjinitai et esej; um jim aualas nidi oliv im nidi vaine.

7 Is wat lep atipagki nitai atapanes for aien, kis atahaijeg nohran

nitai umoh for ainyak, is ika aien, Apam aiek, um almoi.

8 Kis almoi ainyak, um ecetai hors yag: nidan natimi iyehki is ateuc iran Inmas, is apitac yin Umatmas. Eris alupai rau nemda an nuarin et ethi irai uarin et for an nobohtan, mika eru atgei *atimi* an nauitoga, im numlaig has, im nemehe has, im lep niji itai aleg an nobohtan.

9 Is wat lep atipagki nitai atapanes faiv, kis ecetai nesga atimi ainyak ithan nefata, eris atgei ra vai intas o Atua, im lep vai intas asupteenaig ura:

10 Eris ahlaig ijinies ara, um ika, Ak Natimarid, na upene aiek um inivaijec, napu ahilek aiek an nahopan, um aru inmas unyima ira ra era amen an nobohtan ara?

11 Eris alupai ra asega apelu-mai abi; eris lep asaig ehele ra, mika eri atumop ipjidipjid ara, um imyihum pan an naopan iyehki, uhpu asjapicenaig ehni ilpu atimi era ehraheca ara, im lep ilpu etoara, uhpu lep atgei ra etpu tup ethi ache.

12 Is wat lep atipagki nitai atapanes siks aien, kis almoi ainyak; is idim eteuc nomoi alupas; is apeig nagesega, um idivaig napelumai alau irai itai, is lep idivaig inja immohoc;

13 is ehlelelse an nobohtan niji moijeuv an nohatag, et idivaig et ehlelel nohoai ateg mat, an nai-hoivaig nintinjop alupas:

14 is apohod nohatag, um idivaig inuari-peper er asvi; eris apan an taka uarin niji lola edoon, im niji hakli-pece asega.

15 Eris atpuh irai mai tan, im lep irai mai ij irai lola edoon, a ilpu atimarid an nobohtan, im ilpu atimi alupas, im ilpu atimi ikni itai, im ilpu atimi esjilid irai ilpu eucsupo, im ilpu atimi emda, im ilpu aheca asega, im ilpu atimi eti aheca asega;

16 um ika ehele lola edoon im nij, Eropse irama, um adenai cama va nesganimitan et ateuc aien a dorona, im lep vai intavaitap u Lam :

17 et mun yetpam nadiat alupas u intavaitap o un ; inyi emda a di naijivaig *an nuhup o un ?*

NUARIN-TAS ALUPAS 7.

IS wat ti pan itac nitai iji eigki, kis ecet ilpu agelo is for ainyak, eris aiji ara an nesvi va nobohtan et for, um asjiraig nimtinjop an nobohtan et for, vai yi jim iji nimtinjop an nobohtan, ka injop, ka tah incal.

2 Kis lep ecet nagelo is ethi is eche ainyak, is ahes an ridjai o un aien um aridjai, is apos nitai asjaaicnaig u Atua umoh aien : is ahlaig ijinies aien ehele ilpu agelo is for iji ehki, eris ikni ra mika eri auahas nobohtan im injop,

3 um ika, Jim auahas nobohtan aijaua, ka injop, ka niji cai, um imyihum pan an naopan iyehki, ecrupu asjaaicnaig irai ilpu aheca u Atua uja aijama irai ipjiimtara.

4 Kis atahajjeg ainyak nesvi ra sji ehki vaig, eris ati nitai asjaaicnaig ira ra : eris ati nitai asjaaicnaig ira atimi is wun huntret *im* forte for dausant irai upu Isreel asega.

5 Eris asjaaicnaig ira atimi is twelv dausant irai ilpu mapoi Juta. *Um lep* asjaaicnaig ira atimi is twelv dausant irai ilpu mapoi Ruben. *Um lep* asjaaicnaig ira atimi is twelv dausant irai ilpu mapoi Cat.

6 *Um lep* asjaaicnaig ira atimi is twelv dausant irai ilpu mapoi Eser. *Um lep* asjaaicnaig ira atimi is twelv dausant irai ilpu mapoi Naf-talai. *Um lep* asjaaicnaig ira atimi is twelv dausant irai ilpu mapoi Manasi.

7 *Um lep* asjaaicnaig ira atimi is twelv dausant irai ilpu mapoi Sim-

eon. *Um lep* asjaaicnaig ira atimi is twelv dausant irai ilpu mapoi Livi. *Um lep* asjaaicnaig ira atimi is twelv dausant irai ilpu mapoi Issakar.

8 *Um lep* asjaaicnaig ira atimi is twelv dausant irai ilpu mapoi Sebulun. *Um lep* asjaaicnaig ira atimi is twelv dausant irai ilpu mapoi Josef. *Um lep* asjaaicnaig ira atimi is twelv dausant irai ilpu mapoi Benjamin.

9 Is wat ti pan itac nitai iji eigki, kis almoi ainyak, um alum atimi is ahinag is ehka vaig tah nesvi ra vaig, irai iji pece asega, im niji immim, im niji elcau, im niji tas, naijivaig an nuhup u dorona iyehki, im lep an nuhup u Lam, eris aso ra ira apelumai ahi ara, um apos eri eaig.

10 Eris ahlaig ijinies ara, um ika, *Et ahes* nitai imyiatamaig atimi ehele Atua uja, aien et ateuc aien a dorona, im lep ehele Lam.

11 Eris aiji a ilpu agelo asega um arahed a dorona, im lep irai ilpu atimi tas alep, im niji itai umumoh is for iji ehki, um eropropse irai esgaiimtara an nuhup u dorona, um alaigaheni vai Atua,

12 um ika, Emen : *Etmu eteuc* incediaig, im inlah, im narapakau, im naaurineig, im nimyiahpas, im natimi alupas, im nemda, vai Atua uja irai iji mesese. Emen.

13 Is tas tah is ethi irai ilpu atimi tas alep, um ika ehelek, Di sji eigki et amen ira ra niji apelumai ahi ? eris ahes eda ara ?

14 Kis ika ehelen ainyak, Ak natimi alupas, na ato aiek. Is ika ehelek aien, Eris ahes an nohocred alupas ara sji eigki, um yiri apelumai ura, um ago ahi, an ja irai Lam :

15 va nitai ineigki era aiji ara an nuhup u dorona u Atua, um aheca o un an neom ahlap o un, irai iji adiat im niji epeig : etpu amen ehele ra aien et ateuc aien a dorona :

16 inyi ti lep ehte le ra ara, um eti lep ahvig wai; inyi ti lep ces ra nagesega, um eti *auahas* ra nililup:

17 etpu alaa ra nitai caig a Lam, aien *et aiji* aien an nuhup u dorona, um asgi pan ra irai imtaiwai umoh et ahlau ohua: etpu yiri nidi nimitara asega a Atua.

NUARIN-TAS ALUPAS 8.

1 IS wat atipagki nitai atapanes seven a *Lam*, is eigpa an nohatag is idivaig nahaiji aur is ethi.

2 KIS ecet ilpu agelo is seven iji eigki ainyak, era aiji ara an nuhup u Atua: eris alupai ra intoho is seven.

3 Is lep apam a nagelo is ethi is eche, um aiji u nefata, is apos nipjicolt aien; eris alupai yin nitai auanipin upene is alupas, mika yi ati aien ira alaigaheni u ilpu atimi upene asega an nefata colt iyehki *is amen* an nuhup u dorona.

4 Is ahes an nikmai nagelo nadaran nitai auanipin upene, *um tup ethi ache pan ira* alaigaheni u ilpu atimi upene, um aridjai an nuhup u Atua.

5 Is leh nipjinitai iyehki a nagelo, um leh incop an nefata um ati iran, is um ohua, um ethaigse an nobohtan: is eteuc nohrai itai, im inmunuka, im nawainapit, im nomoi.

6 Eris yecrei ra a ilpu agelo is seven iji ehki, eris apos intoho is seven ara, mika eri ahlai.

7 Is ahlai intoho o un a nagelo uhup, ja is par apitac incaupda hat im incop pelaig an ja, eris erekhaigse an nobohtan, is acescas nahaiji cai is ethi an nahaijin is eseij, is lep atah nefeledicai mat asega.

8 Is lep ahlai intoho o un a nagelo tu, eris ethaigse an jop *nitai* is idivaig nedoon alupas is alaulau incop iran: is idivaiginja

nahaijin jop is ethi an nahaijin is eseij;

9 eris emesmas nahaiji iji itai umumoh an jop is ethi an nahaijin is eseij; eris auahas nahaiji elcau is ethi an nahaijin is eseij.

10 Is lep ahlai intoho o un a nagelo dri, is ahes an nohatag inmoijeuv alupas um asuol, is alauma um idivaig incop alahala, is eropse an nahaiji ofowai is ethi an nahaijin is eseij, im lep irai imtaiwai ahlau ohua;

11 nidan moijeuv iyehki Nitai acen, is um acen nahaiji wai is ethi an nahaijin is eseij; eris lep emesmas natimi is ahinag vai inwai, va nitai ineig, nikavaig, is acen *inwai*.

12 Is lep ahlai intoho o un a nagelo for, eris auud nahaijin nagesega is ethi an nahaijin is eseij, im nahaijin mohoc is ethi an nahaijin is eseij, im nahaijin moijeuv is ethi an nahaijin is eseij; is aupat nahaijin is ethi an nahaijin is eseij iran, is eti lah inuarin-nadiat is ethi an nuarin-nadiat is eseij, um lep ucce nepeig.

13 Kis almoi ainyak, um atahaijeg nagelo is ethi is ae aien juu an nauanohatag, um ahlai ijinies, um ika, Auwe, auwe, kaiheuc va atimi era amen an nobohtan ara, va nohrai intoho et eche u ehtaij agelo et eseij, ehtijpu ahlai ahtaij!

NUARIN-TAS ALUPAS 9.

IS lep ahlai intoho o un a nagelo I faiv, kis ecetai inmoijeuv is ethi an nohatag ainyak, is asuol an nobohtan: eris alupai yin nitai asalgei *intapanes* an nehpanitai ineig er eti ecetin nehni o un.

2 Is asalgei *intapanes* an nehpanitai aien er eti ecetin nehni o un; is ahlahos nadaran cop an nehpanitai, is idivaig nadarai suata; is aupat nagesega, um *acnapnes* naua-

nohatag, va nadaran cop an nehpanitai.

3 Eris ahes an nadaran cop inheled an nobohtan: eris alupai ra nemda, et idivaig nemda u nispeuv an nobohtan.

4 Eris asaig ehele ra mika eri jim auahas nefeledicai an nobohtan, ka tah nitai mat, ka tah incal; jai ilpu atimi iji ehki ache is eti amen nitai asjaaicnaig u Atua irai ipjiimtura.

5 Eris alupai ra mika eri jim atgei *ilpu atimi* iji ehki, jam auoh ohocred ra an mohoc inyi faiv: nohocred ura neigki, is idivaig nohocred u natimi ineig is ahcai yin a nispeuv.

6 An naopan iyehki erupu ahilek inmas atimi, jam eti ecetai; erupu merit ara inmasvaig, ja inyi aha vai ra inmas.

7 Eris idivaig hors eris yecrei ra va nedoa inheled iji ehki; *is amen* irai idjinira niji itai is idivaig korona colt, *is* lep idiva nesganimta atimi nesganimtura.

8 Is idivaig numri nidjini takata nalau ira ra, is lep idivaig *nejjei* laion nejjera.

9 Is idivaig inhat niji itai atapanes inritira; um idivaig nohrair itai atga iji ehki, et imyiathut pan u nedoa hors et ahinag, nohrair ehpara.

10 Is idivaig *narapacal* u nispeuv narapacal ura, is amen nij va atimi ira arapacal ura, eris emda ara nauahas atimi vaig irai mohoc is faiv. Is eteuc natimarid ura, et agelo aien an nehpanitai er eti ecetin nehni o un, nidan Hibru Abatton, jai nidan an tas Crisi Apollyon [Natimi auahas itai].

12 Is ti pan itac nohocred is ethi; *ja* etpu lep yetpan nohocred inyi ero an tak aopan.

13 Is lep ahlai intoho o un a nagelo is ethi is eche, kis atahajjeg nohran tah is ethi ainyak, is ahes irai epat is for an nefata colt an nuhup u Atua,

14 is ika ehele nagelo iyehki is

apos intoho o un aien, Ahiji nagelo et for aiek, er^e areore ra an nofowai alupas Yufretes.

15 Eris ahiji nagelo is for, eris ago ra va aur inyi ethi, im nadiat inyi ethi, im inmhoc inyi ethi, im inmesese inyi ethi, mika eri atgei nahaiji atimi inyi ethi an nahaijin et eseij.

16 Eris tu huntret milyon a ilpu eucsupo iji ehki eris ateuc irai hors ara: kis atahajjeg ainyak nesvi ra vaig.

17 Kis ecetai niji hors ainyak, an nahuumtided *unyak*, im lep ra eris ateuc ira ra ara, is amen ira ra nitai atapanes ritira is idivaig incop, im inhat cop, im narekwas: *is* idivaig nidjini laion nidjini hors *ura*; is ahes irai ipjieucsera incop, im nadaran cop, im narekwas.

18 Eris atgei nahaiji atimi is ethi an nahaijin is eseij an nitai erahki, *nikavaig*, incop, im nadaran cop, im narekwas, is ahes irai ipjieucsera.

19 Et amen nemda ura irai ipjieucsera im lep irai ilauera: is idivaig *narapacal* u ninyiv nilauera, is amen nidjinin iran, eris auahas itai irai *ilauera* ara.

20 Eris eti adumoiij anliinmopura va nauritai irai ikmara natimi iji ehki, eris eti atgei ra nitai has erahki, mika eri jim alaigaheni ara vai ilpu atmas, im niji atmassinai colt, im silver, im bras, im hat, im naucal; et ehka vai ra nalum itai vaig, um ahgei itai vaig, um atgavaig:

21 eris eti lep adumoiij anliinmopura ara va natgei atmas ura, im naraces, im ingaijid, im nehneig itai.

NUARIN-TAS ALUPAS 10.

KIS ecet nagelo emda is ethi is eche ainyak, is ahes an nohatag aien um asuol, is ataluopni yin nepeig: *is isjis* an nidjinin in-huterau, um idivaig nagesega nesga-

nintan, um lep idivaig noboatau cop neduon ero :

2 is apos inhaklin nitasvitai an nikman aien eris algei : is ati neduon inmatan an jop aien, im *neduon* iumoon an nobohtan.

3 Is ahlaig ijinies aien is idivaig naunyauiwaig u laion : is wat ahlaig aien, is ehceseven atceteuc in-munuka, um tas.

4 Is wat ehceseven atceteuc in-munuka um tas, kis ika ainyak ki aged : kis atahajjeg nohran tah is ethi ainyak is ahes an nohatag, um ika ehelek, Adenaig nitai iji eigki aiek is asaig inmunuka is seven iji eigki, um jim aged.

5 Is adaigjai nikman an nohatag a nagelo iyehki kis ecet yin ainyak najiwaig an jop, im lep an nobohtan,

6 is asig yi aktit intas aien vai yin et umoh aien irai iji mesese, is ago nohatag aien, im niji itai amen iran, im nobohtan im niji itai amen iran, im injop im niji itai amen iran, um ika, Etpu ti amen naopan ineig :

7 ja an naopan iyehki an nohran nagelo seven, et wit ahlai intoho o un aien, uhpu ehnejjid nitai ineig is adenaig a Atua, is idivaig is asuptecnaig ehele ilpu profeta aien, eris aheca o un ara.

8 Is lep tas ehelek nohran iyehki kis atahajjeg ainyak an nohatag, um ika, Apan aiek, *um* leh inhaklin nitasvitai eris algei an nikma nagelo ineig et aiji an jop aien im lep an nobohtan.

9 Kis apan ehele nagelo ainyak, um ika ehelen, Alupai nyak inhaklin nitasvitai inaico aiek. Is ika ehelek aien, Leh aiek, um caig elni ; etpu has nippinetgam aiek vaig, ja etpu aiyu, um idivaig hune, an nippineucsum.

10 Kis leh inhaklin nitasvitai iyehki ainyak an nikmai nagelo, um caig elni ; is aiyu an nippineucsek, um idivaig hune : ja kis wat caig ainyak, is has nippinetgak.

11 Is ika aien, Eris idim ika napu lep asuptecnaig intas o *Atua* aiek va nup urai iji pece iny i ahinag, im nup urai iji elcau, im ilpu atimi auoh taka tas, im ilpu atimarid.

NUARIN-TAS ALUPAS 11.

Eris alupai nyak nauanieg is ethi, is idivaig niseuc : is aiji a nagelo, um ika, Atidai aiek, um asja-aicnaig an neom ahlap u Atua, im nefata, im lep ra era alaigaheni iran ara.

2 Jam ude nimnim u neom ahlap, um jim asjaaicnaig iran : eris atcei-jaiig imi nup urai iji taka pece : erupu auhi inuarin-pece itaup ara irai mohoc iny forte tu.

3 Ekpu ati ohwat atimi asuptec-naig nyak et ero ainyak, mika eru ahidan tas arau ira adiat iny twelv huntret *im* sikste, um aso rau ira apelumai ucai :

4 erau cai oliv et ero arau, im lep lamp et ero, erau aiji arau an nuhup u Atua ineig et o un nobohtan :

5 el et ika tah yi auahas rau, el et ahes an nippineucserau incop, um auahas ilpu atimi tak atimi ira rau : maiya, el et ika tah yi auahas rau, eris idim ika uhpu atgei yin inyi ucce :

6 erau emda ahwat raigki natap-anesvaig nohatag, vai yi jim ehe ira adiat iji ehki eraupu asuptec-naig intas iran arau : erau esjilid irai ofowai arau par ika yi ja ; um lep auahas nobohtan irai iji itai has asega, erau wit merit arau.

7 Erau wit asuptecnaig ehni intas urau arau, etpu ati nedoa vai rau a nitai aleg ineig et ahes an nehpanitai ineig et eti ecetin nehni o un, um ahau rau, um atgei rau.

8 *Etpu amen* nohurau emesmas an nefalaig an nuarin-pece alupas ineig, er anvi nidan an tas ecsipece par ika Sotom im Iijpt, eris lep atgei

Natimarid uja an nauincai atgeig eahki.

9 Erupu almoi nohurau ira adiat inyi eseij im nahaijin *nadiat* inyi ethi nahaiji ra ira atimi, im nup urai iji pece, im ilpu atimi auoh taka tas, im nup urai iji elcau, um acaiji *atimi*, mika eri jim atelmoi nohurau irai elpaiitai.

10 Erupu imyiacitak vai rau ara era amen an nobohtan ara, um cediaig, um alupaig jipe ra niji itai tup ahtai; va nitai ineig, nikavaig, erus auoh ohocred ra eris amen an nobohtan ara ahwat aprofeta erahki.

11 Is wat ti pan itac nadiat is eseij im nahaijin *nadiat* is ethi, is ati nesgarau an nohurau a Atua, mika eru nusjai; erus atidai arau, um aiji; eris imtitaig alupas atimi iji ehki eris alum rau ara.

12 Erus atahaijeg nohran alupas an nohatag arau, is ika ehele rau, Aridji pam aijaurau igcaki. Erus aridjai arau an nepeig, um yetpan an nohatag; eris alum rau a ilpu atimi tak atimi ira rau.

13 An nuarin-nadiat iyehki is eteuc nomoi alupas, is eropse inuarin is ethi irai uarin is ten an nuarin-pece iyehki, eris atgei atimi is seven dausant an nomoi: eris imtitaig alupas natimi iji ehki eris aled ara, um imyialpas Atua an nohatag.

14 Is ti pan itac nohocred is ero; *ja* etpu idim auroauro um yetpan nohocred inyi eche.

15 Is ahlai intolio o un a nagelo seven, is alies an nohatag nohrai itai esjilid, um ika, Et *elcau* u Natimarid uja, im lep Kristo o un, niji elcau an nobohtan ineigki; etpu atimarid aien irai iji mesese.

16 Eris eropropse an nesganintara a ilpu atimi tas alep is twente for iji ehki, eris ateuc irai itai ateuc ura ara an nuhup u Atua; eris alaigaheni vai Atua ara,

17 um ika, Ak Natimarid Atua emda acen, as upyi eteuc aiek, um lep eteuc an naopan ineig, jai napu lep eteuc aiek; eera naurineig vai euc aijama, va nitai ineig, nikavaig, na mun leh nemda alupas unyum aiek, um atimarid:

18 eris edemda nup urai iji pece, et mun yetpam intavaitap unyum, im nadiat u ilpu atimi emesmas, mika an almaiijdjid nedo ura aiek, um aru redo upene u ilpu profeta iji eig eris aheca unyum ara, im lep ilpu atimi upene, im lep ra era imtitaig nidam ara, tup atimi im ilpu atimi alupas; um auahas ra era auahas nobohtan ara.

19 ERIS asalgei neom ahlap u Atua an nohatag, eris ecetai anliin neom ahlap o un nelcau an tas-etipup o un: is eteuc nawainapit, im nohrai itai, im immunuka, im nomoi, im incaupda hat alupas.

NUARIN-TAS ALUPAS 12.

1 ERIS ecetai nitai asjaaicnaig alupas is ethi an nohatag, *nikavaig*, intakata is ethi, is ataluopni yin nagesega, *is eteuc* ithan neduon in-mohoc, eris adgaig imi yin inmoi-jeuv is twelv is idivaig korona:

2 is opouc aien, um aunyauwaig, um ahka, um ohocred an naposvaig inhal o un.

3 Eris lep ecetai nitai asjaaicnaig is eche an nohatag, *nikavaig*, nimmiv is ethi is alupas um cop, is seven nidjinin, um ten nepat o un, is amen irai idjinin korona is seven.

4 Is acause pam nahaijin is ethi an nahaijin is eseij irai moiyeuv an nohatag an nilauun aien, um erek-haigse an nobohtan: is aiji nimyiv an nuhup u intakata iyehki, is ubutpotet u naposvaig inhal o un aien, mika, yu wit apos inhal o un, yi caig yin.

5 Is apos inhalav atamaig aien. eris ati yin mika yi esjilid aien irai

iji pece asega an mopul hat: eris imyiaridjai inhal o un chele Atua im dorona o un.

6 Is alia pan an namasacen a intakata iyehki, is imyecrei inuarin imi yin ealiki a Atua, mika eri alaan nitai caig ealiki ara ira adiat inyi twelv huntret *im* sikste.

7 Eris ati nedoa an nohatag: is ago nedoa vai nimyiv a Maikel im ilpu agelo o un; is lep ago nedoa vai Maikel a nimyiv im ilpu agelo o un;

8 ja eris eti emda ara; is lep ti inuarin ura an nohatag.

9 Eris ethaig pan itac nimyiv alupas, is amen aien um itu, nidan Tiapolo, im Satana, aien aigki et efaifa aien va atimi asega an nobohtan: eris ethaig pan itac yin an nobohtan, eris lep erekhaig pan itac ilpu agelo o un ehelen.

10 Kis atahaijeg nohran alupas ainyak an nohatag, is ika, Et mun yetpam nitai imyiatamaig *caija*, im nemda, im nelcau o Atua uja, im natimi alupas u Kristo o un: eris idim ethaigse natimi atijai itai irai ilpu etoaija, is atijai itai ira ra aien an nuhup u Atua uja irai iji adiat im niji epeig:

11 eris esjilid iran ara an ja irai Lam, im intas an nasuptecnaig ura; eris eti imyicoho ra ara, jam ememas:

12 va nitai ineigki namu cediaig aiek, ak nohatag, im lep aijaua eka amen iran aijaua: kaiheuc vai caua eka amen an nobohtan aijaua im lep an jop! et mun asuol sepan chelemia a Tiapolo, et alupas intavaitap o un, va nitai ineig, nika-vaig, et ato aien mika et ipjidipjid naopan o un.

13 Is wat ecetai a nimyiv, nika-vaig, eris ethaigse yin an nobohtan, is atinas vai intakata iyehki aien, is apos *inhalav* atamaig o un aien.

14 Eris lep alupai intakata iyehki nelpan meicop alupas is ero, mika yi ae pan aien va nimyiv an namas-

acen an nuarin o un, eri alaan nitai caig iran an mesese inyi ethi, im lep niji mesese, im lep nahaijin mesese.

15 Is aoh an wai vai intakata a nimyiv, is idivaig nofowai, mika yi leh yin inwai.

16 Is atau imi intakata nobohtan; is asalgei nipjineucsen nobohtan, um umnyi inwai ineig is aoh iran a nimyiv.

17 Is edemda vai intakata a nimyiv, um apan mika yi ati nedoa va nahaiji ilpu hal o un is aled, era imyiaiji intas alep o Atua ara, um apol an nasuptecnaig u Iesu Kristo.

NUARIN-TAS ALUPAS 13.

KIS aiji ainyak an nohmunjop, um ecetai nitai aleg is ethi is ahes an jop, is seven nidjinin, um ten nepat o un, *is amen* korona is ten irai opat o un, im lep nidan irai idjinin intas has esjilid:

2 is idivaig lepart nitai aleg iyehki kis ecetai ainyak, is idivaig *neduei* ber neduon, um idivaig nipjineucse laion nipjineucsen: is alupai yin nemda o un a nimyiv, im nitai atauc o un, im natimi alupas esjilid.

3 Kis ecetai nidjinin is ethi ainyak, eris ati inmocop iran is idivaig inmas; ja is lep mah inmocop mas vaig iyehki iran: eris apitac nitai aleg iyehki atimi asega an nobohtan, um imyiali:

4 eris alaigaheni vai nimyiv iyehki ara, is ati nemda imi nitai aleg iyehki: eris lep alaigaheni va nitai aleg ara, um ika, *Et* idivaig nitai aleg ineigki a di? et emda a di nativaig nedoa vai yin?

5 Eris alupai yin nohran, mika yi tas ijinies aien, um asan tas has esjilid; eris ati yin, mika yi ago nedoa aien an mohoc inyi forte tu.

6 Is asalgei nipjineucsen aien, um asan tas has esjilid vai Atua, *im* intas has esjilid va nidan, im neom

o un, im lep ra era amen an nohatag ara.

7 Eris ati yin, mika yi ago ndoa vai ilpu atimi upene aien, um aat ira ra: eris lep ati yin, mika yi esjilid aien irai nup urai iji pece asega, im ilpu atimi auoh taka tas, im nup urai iji eleau.

8 Erupu alaigaheni vai yin natimi asega erupu amen ara an nobohtan, eris eti aged nidara an nitasvitai va nitai umoh iran u Lam ineig, eris atgei yin an naopan iyehki is pam eti eteuc nobohtan.

9 El et eteuc intikgan tah, etmu atahaijeg aien.

10 Aien et imyiapan atimi an taka pece aien, uhpu lep imyiapan yin an taka pece: aien et atgei atimi an nautoga aien, eris idim ika uhpu lep atgei yin an nautoga. Nedo eti auaticmda u ilpu atimi upene neigki, im nimyisjis ninivaijec ura.

11 Kis ecetai nitai aleg is eche ainyak, is ahes an nobohtan; is ero nepat o un et idivaig inhakli siip, is lep tas aien et idiva nimyiv.

12 Is idivaig nitai aleg iyehki uhup aien, um ago nauritai emda an nuhup o un, is lep ika aien ehele atimi era amen an nobohtan ara, eri alaigaheni va nitai aleg iyehki uhup, is mah innocop mas vaig iran.

13 Is ago niji itai asjaaicnaig esjilid aien, is ika aien yi ahes incop an nohatag, um asuol an nobohtan an nuhup u atimi;

14 is lep imyiahnag atimi an nobohtan aien, va niji itai asjaaicnaig iji ehki eris ati yin mika yi ago an nuhup u nitai aleg iyehki; is ika aien ehele atimi era amen an nobohtan ara, eri ago nalmui nitai aleg iyehki eris aheai yin an nautoga, ja is umoh aien.

15 Eris ati yin, mika yi imyiatamumoh nalmui nitai aleg iyehki, mika yi tas nalmui nitai aleg, um

ika eri atgei ra sji eigki asega era eti alaigaheni vai nalmui nitai aleg iyehki ara.

16 Is ika aien eri leh nitai asjaaicnaig irai ikmara inmatara, ka irai ipjiimtara ara asega, tup atimi im ilpu atimi alupas, im ilpu atimi ikni itai im ilpu ihki atimi, im ilpu aheca im ilpu atimi eti aheca:

17 is lep ika aien yi jim ahtai itai, um jim auanimitai itai tah natimi, ara ache et amen nitai asjaaicnaig ira ra, ka nidam nitai aleg, ka numera an nidam.

18 Narapakau neigki. Aien et amarero aien, etmu esvi numera u nitai aleg iyehki: numera an natimi neigki; et siks huntret im sikste siks numera o un.

NUARIN-TAS ALUPAS 14.

KIS almoi ainyak um ecet Lam, is aiji aien an nedoon Saion, eris amen ehelen natimi is wun huntret im forte for dausant, eris aged nidai Etman irai ipjiimtara.

2 Kis atahaijeg nohran tah an nohatag ainyak is idivaig inmotjan jop alupas, um lep idivaig inmotjan nateuteuc alupas u unmunuka: kis lep atahaijeg nohrai ilpu atimi atcei harp ainyak, eris atcei harp ura ara:

3 eris acesaces nohranilai ara, is idivaig nohranilai mat, an nuhup u dorona, im lep an nuhup u niji itai umumoh is for iji ehki, im ilpu atimi tas alep: is ehka vaig tah nesegevaig nohranilai iyehki, ilpu atimi wun huntret im forte for dausant ache, eris imyiatamaig ra an nobohtan.

4 Ara aigki eris eti aualias ra irai ilpu takata; era ilpu atimi upene ara. Era apitac Lam ara irai iji uarin asega et apan iran aien. Eris imyiatamaig ra sji eigki ehele atimi, eris lupnan ara imi Atua im lep Lam.

5 Is eti eteuc nefaisa irai ipji-

eucsera: um lep ti nedo has ura an nuhup u dorona u Atua.

6 Kis lep ecet nagelo is eche ainyak, is ae aien an nauanohatag, is amen ehelen intas-upene ineig inyi ti lep ti, par asuptecnaig ehele atimi an nobohtan, im lep ehele ilpu atimi auoli taka tas, um amen irai iji pece, im niiji eleau, im niiji innim;

7 is efehtas aien, um ika, Akumu imtitai Atua aijaua, um imyiahpas yin; et mun yetpam inuarin-nadiat ineig etpu asuptecnaig nintan *imi alimi* aien; um alaigaheni vai yin is ago nohatag aien, im nobohtan, im injop, im lep nintaiwai.

8 Is epitpitac *iran* a nagelo is ethi is eche, um ika, Et mun asuol Babelon, et mun idim asuol inuarin-pece alupas iyehki; va nitai ineig, nikavaig, is alumai nup urai iji pece asega waina an gajjid o un aien, uhpu ohocred vaig.

9 Is epitpitac ira rau a nagelo is ethi is eche, um efehtas, um ika, El et alaigaheni va nitai aleg iyehki im lep nalmun tah natimi, um leh nitai asjaaicnaig *o un* an nipjinimtan, ka nikman,

10 etpu idim umnyi waina an tavaitap u Atua aien, er atladwi an nipjinitai an nedemda alupas o un, jam eti asjan *wai* iran; etpu ohocred aien an cop im narekwas an nuhup u ilpu agelo upene, im lep an nuhup u Lam.

11 Et lep aridjai nadaran cop an nohocred ura irai iji mesese: era eti atumop irai iji adiat im niiji epeig ara sji eigki, era alaigaheni ara va nitai aleg im nalmun, im lep ra era leh nitai asjaaicnaig va nidan ara.

12 Nedo eti auatiemda u ilpu atimi upene neigki: era imyiaiji intas alep u Atua ara sji eigki, um asgeig irai Iesu.

13 Kis lep atahaijeg nohran tah an nohatag ainyak, is ika chelek, Namu aged aiek, *um ika*, Era mun alhesmoij a ilpu atimi emesmas, era

emesmas ehele Natimarid ara, um ulhum pan itu: Maiya, et ika a Nesgan *Upene*, eri atumop ara va niiji auritai ura; etpu lep apitac ra niiji itai ura eris ago.

14 Kis almoi ainyak um ecetai nepeig ahi, is ateuc an nepeig iyehki tah is idivaig Inhal o natimi, eris adgaig imi yin korona colt, *is apos* nautoga arig an nikman *aien*.

15 Is lep ahes an neom ahlap a nagelo is ethi is eche, um ahlaig ijinies vai yin is ateuc an nepeig iyehki aien, *um ika*, Ati nautoga unyum aiek, um eucsei itai: et mun yetpam naopan ineig an neucsei itai iran aiek; et mun metto nohoai itai an nobohtan.

16 Is ati nautoga o un aien an nobohtan, is ateuc aien an nepeig iyehki, um eucsei *nohoai itai* an nobohtan.

17 Is lep ahes an neom ahlap an nohatag a nagelo is ethi is eche, is lep apos nautoga arig aien.

18 Is lep ahes an nefata a nagelo is ethi is eche, is aminjinaig incop aien, um ahlaig ijinies vai yin is apos nautoga arig aien, um ika, Ati nautoga arig unyum aiek, nm asjapicnaig nohoai vaine an nobohtan, et mun metto upene nohoan.

19 Is ati nautoga o un an nobohtan a nagelo iyehki, um asjapicnaig nohoai vaine an nobohtan, um ikni an nitai ahtaijiraig vaine alupas an nedemda u Atua:

20 eris auhi *nohoai vaine* an nitai ahtaijiraig alupas an yipin nuarin-pece itac, is ahesinja an nitai ahtaijiraig vaine iyehki, um alga um yetpan u braitul irai hors, um yah a mail is tu huntret.

NUARIN-TAS ALUPAS 15.

KIS ecetai nitai asjaaicnaig is ethi is eche ainyak an nohatag, is alupas um esjilid, *nikavaig*, ilpu agelo is seven is amen ehele ra niiji itai ohocred vaig apitac is seven;

ulpu idim ago elni nedemda u Atua irai itai iji eigki.

2 Kis lep ecetai inhat ehled ainyak is idivaig injop ahula is asjeuc naged cop iran: eris aiji u injop iyehki ara sji ehki eris esjilid ara irai nitai aleg iyehki, im nalmun, im nitai asjaaicnaig o un, *im* numeran an nidan, eris lep apos niji harp u Atua ara.

3 Era acesaces nohranitai u Moses naheca u Atua ara, im nohranitai u Lam, um ika, Ak Natimarid Atua emda acen, *et* esjilid nauritai unyum, er imyiali vaig; ak natimarid irai up urai iji pece, *et* atoh nedo unyum aiek, un inivaijec:

4 ak Natimarid, inyi ti imtitaig euc a di? um eti imyiahpas nidam? *na* idim upene ache *aiek*: erupu idim apam nup urai iji pece asega, um alaigaheni vai euc; na mun aru nedo o atimi aiek an nuhup u atimi asega.

5 Is wat ti pan itac nitai iji eigki, kis almoi ainyak, um ecetai neom ahlap an nimnim an tas asuptecnaig an nohatag eris asalgei:

6 eris ahes an neom ahlap a ilpu agelo is seven, is amen ehele ra niji itai ohocred vaig is seven, eris aso ra ira apelumai yilyil um adicinadin, um ahi, eris arore nijihgara ara irai itai ahid colt.

7 *Is apan* tah is ethi irai iji itai unumoh is for iji ehki, um alupai ilpu agelo is seven nipjicolt is seven, is olua iran nedemda u Atua ineig etpu umoh aien irai iji mesese.

8 Is olua neom ahlap va nadaran natimi alupas u Atua, im nemda o un; is ehka vaig tah napanvaig auliin neom ahlap um uhun pau naopan nago ehni niji itai ohocred vaig is seven u ilpu agelo is seven.

NUARIN-TAS ALUPAS 16.

KIS atahaijeg nohran tah ainyak is ijinies, is ahes an neom ahlap,

is ika ehele ilpu agelo is seven iji ehki, Akumu apan aijaua, um atladwi intavaitap ineig u Atua an nobohtan et amen irai ipjiitai et seven.

2 Is apan *a nagelo* uhup um atladwi nipjinitai o un an nobohtan; is um eteuc inmocop has um alupas acen ira atimi iji eigki eris leh nitai asjaaicnaig u nitai aleg ara, im lep ira ra eris alaigaheni va nalmun ara.

3 Is lep atladwi nipjinitai o un a nagelo tu an jop; is um idivaiginja irai natimi mas: is ememas niji itai unumoh asega an jop.

4 Is lep atladwi nipjinitai o un a nagelo dri irai ofowai im nimitaiwai; is um ja.

5 Kis atahaijeg nagelo an wai ainyak, is ika aien, Ak Natimarid, as upyi eteuc aiek, um lep eteuc an naopan ineig, na upene aiek, et atoh nedo unyum, va nitai ineig, nikavaig, as aru nedo ura aiek:

6 eris atladwiinja irai ilpu atimi upene ara im ilpu profeta, as lep aluma rainja aiek; neruvaig atohimi ra.

7 Kis lep atahaijeg tah is ethi is eche ainyak an nefata, is ika aien, Et idim ucco, ak Natimarid Atua emda acen, *et* inivaijec um atoh neruvaig unyum *imi atimi*.

8 Is lep atladwi nipjinitai o un a nagelo for an nagesega, eris alupai yin *nemda*, mika yi ces atimi.

9 Is alupas *nagesega*, um ahenlien atimi; eris asan tas has esjilid ara va nidai Atua ineig et esjilid aien irai itai ohocred vaig iji eigki: eris eti adumoi anliinmopura ara par imyiahpas yin.

10 Is lep atladwi nipjinitai o un a nagelo faiv an nitai ateuc u nitai aleg; is aupat nelcau o un; eris asjagis ira amara ara va nohocred *ura*,

11 um asan tas has esjilid vai Atua an nohatag va nohocred ura im inuocop ira ra, jam eti adumoi j an nefalaig has ura.

12 Is lep atladwi nipjinitai o un a nagelo siks an nofowai alupas Yufretes; is ameh inwai, mika yi ahped nefalaig vai ilpu atimarid erupu ahes an ridjai o un ara.

13 Kis ecet nesgai itai has is esejj ainyak, ehtijis idivaig napav ahtaij, ehtijis ahes an nipjineuse ninyiv ahtaij, im nipjineuse nitai aleg, im lep nipjineuse naprofeta ahcil:

14 ehtaij esga agelo has abtaij, um ago niji itai asjaicnaig, um apan ehele ilpu atimarid an nobohtan, im lep *ilpu atimarid* irai iji pece asega, um asjapicnai ra u nedoa an nadiat iyehki u Atua emda acen.

15 Ekpu idim ham ainyak et idivaig natimi ehneg itai. Et mun ahesmooj aien et aiji aien, um eti atipagki napelumai iran, vai yi jim tup atga aien, um ehcamia ian nuhup u atimi.

16 Is asjapicnai ra aien an nuarin is ethi, nidan Hibu Armacetton.

17 Is lep atladwi nipjinitai o un a nagelo seven an naunohatag; is ahes nohran tah is ethi is ijinies an neom ahlap an nohatag, is ahes a dorona, um ika, Eh mun ago elmi.

18 Is eteuc nolrai itai, im inmunuka, im nawainapit; is lep eteuc nomoi esjilid, is eti idivaig iyehki tah *nomoi* an namen u atimi an nobohtan, is esjilid acen nomoi iyehki *um* alupas:

19 eris atiakoai inuarin-pece alupas, is esejj inuarin-pece iran, eris asuol niji uari-pece u nup urai iji pece: is lep imyiehva Babelon alupas a Atua, par aluman waina an nipjinitai an tavaitap esjilid o un:

20 is apohod niji hakli-pece asega; eris lep eti alum lola edoon:

21 is ahes an nohatag incaupda hat alupas um asuol ira atimi, is apapa pan a paunt wun huntret *niji hat asega*: eris asan tas has esjilid vai Atua natimi, va nohocred ura vai incaupda hat; is alupas acen nohocred vaig.

NUARIN-TAS ALUPAS 17.

IS apam tah is ethi irai ilpu agelo is seven iji ehki eris apos ipjin-itai is seven ara, um tas ehelek, um ika, Apam aiek igcaki; ekpu ehvaig ehelum ainyak neruva nedo o intakata ago ingaijid esjilid iyehki, et ateuc irai wai et ahinag aien:

2 eris ago ingaijid ehelen a ilpu atimarid an nobohtan, eris lep ahnag natimi an nobohtan vai waina an gaijid o un.

3 Is imyiapan nyak an namas-acen aien an nahuumtidec *unyak*: kis ecet intakata is ethi ainyak, is ateuc aien irai nitai aleg cop, is ahinag nidan iran, intas has esjilid, is seven nidjinin, um ten nepat o un.

4 Is amen irai intakata iyehki napelumai auoc im napelumai cop, is lep naunau aien vai colt iran, im inhat esjilid, im perl; is apos nipjicolt aien, ja is olua niji itai has iran, im nauatatimi an gaijid o un:

5 eris lep aged nidan an nipjinimtan, *um ika*, NITAI ADENAIG, BABELON ALUPAS, RISI ILPU TAKATA AGO INGAIJID IM LEP NEDO HAS AN NOBOHTAN.

6 Kis ecet intakata iyehki ainyak, is ahnag aien vaiinja irai ilpu atimi upene, im lepinja irai ilpu atimi asupteanaig vai Iesu: kis wat ecet yin ainyak, kis imyiali alupas ainyak.

7 Is um ika chelek a nagelo iyehki, Na auri aiek par imyiali?

ekpu asuptecnaig ehelum ainyak nitai adenaig vai intakata ineigki, im lep vai nitai aleg et apos yin, et seven nidjinin im ten nepat o un.

8 Is upyi eteuc nitai aleg iyehki as ecetai aiek, ja et ti *emda* aien an naopan ineig; etpu ahes an nehpan-itai ineig aien er eti ecetin nehni o un, um aridjai, ja par apan an pece has: erupu imyiali natimi amen an nobohtan, eris eti aged nidara an nitasvitai va nitai umoh iran an naopan iyehki is pam eti eteuc nobohtan, eru wit ecetai nitai aleg ineig ara is upyi eteuc aien, ja et ti *emda* aien an naopan ineig, ja et mun lep eteuc.

9 Er ecetai narapakau an nitai ineigki. Et lola edoon et seven nidjinin et seven, et ateuc iran a intakata ineig.

10 Era lep eteuc a ilpu atimarid et seven: eris asuol is faiv *ira ra*, et eteuc tah et ethi, jam eti fi yetpam tah et ethi, et wit yetpam aien, eris idim ika iny ti elvamen aien.

11 Et *atimarid* eet a nitai aleg ineig is upyi eteuc aien, jam lep ti *emda* an naopan ineig, et ahes aien ehele seven iji ehki, ja etpu apan an pece has aien.

12 Era ilpu atimarid et ten nepat et ten iji ehki as ecetai aiek, eris eti leh nelcau ura ara an naopan ineig; ja era leh nemda *ura* ara, um idivai ilpu atimarid, um tup ethi ache pan an nitai aleg an nuarin-nadiat et ethi.

13 Et tup ethi ache inliinmopoi ra sji eigki, erupu lep atceijaig nemda ura ara, im natimi alupas ura, imi nitai aleg.

14 Erupu lep ati nedoa vai Lam ara sji eigki, etpu ahau ra a Lam: et idim Atimarid irai ilpu atimarid aien, um Atimi alupas irai ilpu atimi alupas: ara era amen ehelen ara eris ahlaig vai ra, um ehtai ra, era lep inivaijec ara.

15 Is ika ehelek aien, Inwai iji ehki as ecetai aiek an nuarin ineig

et amen iran a intakata ago ingaijid iyehki, et *idivaig* nup urai iji pece, im natimi et ahinag, im nup urai iji elcau, im nup auoh taka tas.

16 Nepat et ten iji ehki as ecetai aiek irai nitai aleg, erupu edemda vai intakata ago ingaijid ara, um atipagki naga o un im napelumai o un, um caig nohun, um atnamud yin an cop.

17 Is ati naktaktai anliinmopura a Atua, nika eri ago nasaig o un ara, yi tup ethi ache intas ura, eri lep atceijaig nelcau ura imi nitai aleg, um imyihum pan an naopan iyehki uhpu ehneijid niji tas o Atua.

18 Intakata iyehki as ecet yin aiek, et uarin-pece alupas iyeliki aien, et esjilid irai ilpu atimarid an nobohtan.

NUARIN-TAS ALUPAS 18.

IS wat ti pan itac nitai iji eigki, I kis ecet nagelo is ethi is eche ainyak, is ahes an nohatag aien um asuol, is esjilid nemda o un; is lah-aijaig nobohtan va naijoran.

2 Is ahlaig ijinies aien, is acre nohran, um ika, Et mun asuol Babelon alupas, et mun idim asuol, et uarin amen iran u ilpu agelo has, im neom ipjin va nesgai itai has asega, im neom ui man has asega, im lep *man* er amcel vaig.

3 Eris idim umnyi waina ineig a nup urai iji pece asega neruvaig ingaijid o un, eris lep ago ingaijid ehelen a ilpu atimarid an nobohtan, era lep atimi ikni itai a ilpu atimi ahtai itai an nobohtan va niji itai upene o un is ahinag.

4 Kis atahaijeg nohran tah is ethi is eche ainyak, is ahes an nohatag, um ika, Ak ilpu atimi unyak, akumu ude yin aijaua, va aki jim asipiai edo has o un, um lep leucose nohoered o un:

5 et mun yetpan an nohatag niji edo has o un, et lep imyiehva naua-
tatimi o un a Atua.

6 Akumu ago nedo ineigki vai yin aijaua is ago vai caua aien, akumu ehcero aru nedo o un aijaua : aku-
mu ehcero ago ohua nipjinitai ineig aijaua is ago ohua aien.

7 Is idim ispun imyialpas yin aien, um ago nacistak; et idim ucco, akumu ati nohocred iran aijaua, im intaig-
taig : et idim ika inliinmopon aien, Et takata atimarid ainyak, um eti
tup echim amen, inki ti lep ato nohocred ainyak.

8 Va nitai ineigki etpu yetpam iran nohocred o un an nadiat inyi
ethi ache, *nikavaig*, inmas, im neh-
teigtaig, im numlaig has; uhpu
lep atnamud asega yin an cop : et
idim emda a Atua Natimarid ineig
et aru nedo o un aien.

9 Eru wit ecetai nadaran cop
atnamud yin a ilpu atimarid an
nobohtan eris ago ingaijid ehelen
ara, um ago nedo acitak, erupu
ehteigtaig vai yin ara, um imyitaig
yin :

10 erupu aiji itac acen ara va
nimtita nohocred o un ura, um ika,
Auwe, kaiheuc vai inuarin-pece
alupas inaico Babelon, inuarin-pece
emda ! et mun yetpam neruvaig
iram an nuarin-nadiat et ethi ache.

11 Erupu lep imyitaig yin a ilpu
atimi ahtai itai an nobohtan, um
aunyauwaig; inyi ti lep auarimtai
itai ura tah natimi :

12 niji itai ura colt, im silver, im
hat esjilid, im perl, im napelumai
yilyil, im *napelumai* auoc, im
napelumai silk, im *napelumai*
cop, im ingitjinyat, im nipjiaivore
asega, im nipjicai esjilid asega,
im nipjibras, im nipjiaurn, im
nipjimarbil,

13 im sinamon, im niji itai aua-
nipin upene, im nidi mura, im nidi
libano, im nidi vaine, im nidi oliv,
im flaur upene, im hwiit, im kuri-
matau, im siip, im hors, im niji

itai atga, im nohui atimi, im nesga
atimi.

14 Et lep ti nohoai itai iji eigki
as alvig aiek, um lep ti niji itai
esjilid um upene asega, napu eti
lep ecetai aiek.

15 Erupu aiji itac acen a ilpu
atimi ahtai nitai iji eigki, eris ikni
itai ara vaig, va nimtita nohocred o
un ura, um ehteigtaig um aunyau-
waig,

16 um ika, Auwe, kaiheuc vai
inuarin-pece alupas inaico, is aso
yin aien ira apelumai yilyil, im
napelumai auoc, im *napelumai* cop,
is naunau aien vai colt, im hat esji-
lid, im perl !

17 Ja et mun ti naga alupas o un
an nuarin-nadiat et ethi ache. Eris
aiji itac acen a ilpu atimi asega
apos elcau, im ilpu atimi asega atau
irai elcau, im ilpu atimi aheled iran,
im ilpu atimi asega ago itai an jop,

18 um ahlaig ijinies, eris wat almoi
nadaran cop atnamud yin ara, um
ika, *Inuarin-pece* ineig yek eda, et
idivaig inuarin-pece alupas ineigki ?

19 Eris ehrinma irai idjinira ara,
um ahlaig ijinies, um ehteigtaig,
um aunyauwaig, um ika, Auwe,
kaiheuc vai inuarin-pece alupas
inaico, eris ikni itai iran ara asega
is amen niji elcau ura an jop, va
nimtan alupas o un ! ja eris aualas
yin an nuarin-nadiat is ethi ache.

20 Akumu imyiacitak vai yin
aijaua, ak *ilpu atimi amen an no-*
hatag, im ilpu apostolo upene, im
ilpu profeta *upene*; et mun aru
nedo o un vai caua a Atua.

21 Is leh inliat is idivaig nijaro
irara a flaur iran um alupas a
nagelo emda is ethi, um ethaigse
an jop, um ika, Et idim ucco, uhpu
efethaigse inuarin-pece alupas inai-
co, Babelon, an nemda, uhpu idim
eti lep ecetai :

22 uhpu eti lep atahajeg nohrai
ilpu atimi atcei harp iram, im ilpu
atimi acesaces nohrauitai, im ilpu
atimi ahlai luthavlav, im ilpu atimi

ahlai toho; uhpu eti lep ecet tali natimi amarero iram, et ago niji auritai aien; uhpu idim eti lep atahaijeg tah nohran nijaro nirara a flaur vaig iram;

23 etpu eti lep lah va naijoran cop alahala iram; uhpu eti lep atahaijeg nohra atmehgan iram: eris ilpu atimi alupas an nobohtan a ilpu atimi ahtai itai unyum; eris idim ahnag a nup urai iji pece va nedo araces unyum.

24 Eris lep ecetai iran inja irai ilpu profeta, im ilpu atimi upene, im lep ra asega eris atgei ra an nobohtan.

NUARIN-TAS ALUPAS 19.

IS wat ti pan itac nitai iji eigki, kis atahaijeg nohra atimi is ahinag ainyak an nohatag, is alupas, eris ika ara, Aleluya; *Et eteuc* nimyiatamaig *atimi*, im nimyiahpas, im inlah, im nemda, ehele Natimarid Atua uja:

2 et idim inivajec um atoh nedo o un *va atimi*; et mun aru nedo o intakata ago ingaijid esjilid iyehki aien, is auahas atimi an nobohtan aien an gaijid o un; is lep aru inja irai ilpu aheca o un *a Atua* iran.

3 Eris lep ika ara, Aleluya. Is aridjai nadaran cop iran irai iji mesese.

4 Eris eropropse a ilpu atimi tas alep is twente for, im niji itai umumoh is for iji eliki, um alaigaheni vai Atua ineig is ateuc a dorona aien, um ika, Emen; Aleluya.

5 Is ahes a dorona nohran tah, um ika, Akumu imyiahpas Atua uja aijaua asega, ak ilpu aheca o un, im lep aijaua eka imtitai yin aijaua, ak tup atimi, im ilpu atimi alupas.

6 Kis atahaijeg ainyak is idivaig

nohra atimi is ahinag, um idivaig inmotjan jop alupas, um idivaig nateuteuc u ummunuka alupas acen, eris ika ara, Aleluya: et esjilid a Natimarid Atua emda acen:

7 intumu imyiacitak akaija, um cediaig, um imyiahpas yin: et mun yetpam natmehgan u Lam, et mun yecrei yin a ehgan.

8 Eris ika ehelen yi aso yin aien ira apelumai yilyil, yi adicinadicin um ali; nedo atoh o ilpu atimi upene napelumai yilyil.

9 Is ika ehelek aien, Aged aiek, *um ika*, Era mun ahesmoij ara eris imyiacaij pan ra u inhag an natmehgan u Lam. Is ika ehelek aien, Niji tas inivajec o Atua ji eigki.

10 Kis eropse ainyak u neduon, mika ki alaigaheni vai yin. Ja is ika ehelek aien, Jim ago *nedo ineigki* aiek: intau ehraheca *u Atua* akaijau, ek tali irai ilpu etoam ainyak, et amen ehele ra intas asuptecnai Iesu: alaigaheni vai Atua aiek: nesgan tas ahidan tas neigki, nasuptecnaigvaig Iesu.

11 Kis ecetai nohatag ainyak is asalgei, um alum hors ahi is ethi; aien is ateuc iran aien, *eris* anvi nidan par ika Natimi inivajec, um upene nasgeig iran vaig; et aru nedo o atimi aien, um ati nedoa, an nedo atoh *o un*:

12 is idivaig incopre nesganimtan, um *amen* an nidjinin korona is ahinag; eris aged nidan, ja is eti ato *nidan* iyehki tah, aien ache:

13 is amen iran napelumai eris ahtaijuhli an ja; er anvi nidan par ika, Intas o Atua.

14 Eris apitac yin a ilpu eucsupo an nohatag, eris ateuc irai hors ahi ara, um aso ra ira apelumai yilyil, is ahi um adicinadicin.

15 Et ahes an nipjineucsen nauitoga arig, mika yi auud nup urai iji pece iran aien; “etpu atimarid ira ra aien an mopul hat o un:” et echim atga aien an nuarin ahtai-

jiraig vaine iran an nedemda im intavaitap u Atua emda acen.

16 Eris aged nidan an napelumai o un, im lep an neduon, *um ika*, NATIMARID IRAI ILPU ATIMARID, IM NATIMI ALUPAS IRAI ILPU ATIMI ALUPAS.

17 Kis ecet nagelo is ethi ainyak, is aiji an nagesega aien; is ahlaig ijinies aien, um ika ehele man asega era ae an nauanohatag, Akumu asjapicnaig pam aijaua u inhag u Atua alupas;

18 mika aki hegaig nohui ilpu atimarid, im nohui ilpu atimi alupas, im nohui ilpu atimi emda, im nohui hors, im nohui ilpu atimi ateuc iran, im nohui atimi asega, ilpu aheca im ilpu atimi eti aheca, tup atimi im ilpu atimi alupas.

19 Kis ecetai nitai aleg iyehki ainyak, im ilpu atimarid an nobohtan, im ilpu eucsupo ura, eris asjapicnaig ara, mika eri ago nedoa vai yin is ateuc irai hors aien, im lep vai ilpu eucsupo o un.

20 Eris arop irai nitai aleg ara, im lep naprofeta efaifa ehelen, is ago niji itai asjaaicnaig an nulup o un aien, is imyiahnag atimi iji eigki aien vaig eris leh nitai asjaaicnaig u nitai aleg, im lep ra eris atpuse an nuhup u nalmun ara. Eris ethaigse mulh rau an netpin amen incop iran et alauma va narekwes.

21 Eris lep atgei nahaiji ra is aled an nauitoga o un is ateuc irai hors aien, is ahes an nipjineucsen: eris gaije niji man asega va olhura.

NUARIN-TAS ALUPAS 20.

IS lep ecet nagelo is ethi ainyak, is ahes an nohatag aien um asuol, is apos kii aien uri nehpanitai ineig er eti ecetin nehni o un, im lep natauhat alupas, an nikman.

2 Is arop irai nimyiv aien, nimyiv

itu iyehki, et Tiapolo aien, im Satana, um arore yin irai mesese is wun dausant,

3 um ethaigse yin an nehpanitai ineig er eti ecetin nehni o un, um atapanes iran, um ati nitai asjaaicnaig iran, vai yi jim lep imyiahnag nup urai iji pece aien, um imyihum pan naopan iyehki uhu wit ti pan itac inmesese inyi wun dausant; ja par apitac um alhiyi ipjidipjid yin.

4 Kis lep ecetai niji dorona ainyak, eris ateuc iran ara, eris ikni ra mika eri asuptecnaig nintan ini atimi ara: *kis lep almoi* nesga atimi iji eigki *ainyak* eris auud yamud idjinira va nasuptecnai Iesu ura, im lep vai intas o Atua; im lep ra sji eigki eris eti alaigaheni va nitai aleg ara, ka nalmun; eris eti leh nitai asjaaicnaig *o un* irai ipjiimtara ara, ka nikmara; eris umumoh ara, um atimarid, ehele Kristo irai mesese is wun dausant.

5 Ja eris eti lep anusjai nahaiji atimi ememas is aled, um imyihum pan naopan iyehki is ti pan itac inmesese is wun dausant. Nusjai uhup *u atimi* neigki.

6 Et mun ahesmoij aien um lep upene, et imtaam nusjai aien an nusjai uhup *u atimi*: inyi ti lep aualias ra sji eigki inmas apitac, erupu ilpu atimi ahlap u Atua ara im lep u Kristo, um atimarid ehelen irai mesese inyi wun dausant.

7 Et wit ti pan itac inmesese inyi wun dausant, uhpu alhiyi Satana an neom ipjin o un:

8 etpu atga sjipe aien par imyiahnag nup urai iji pece era *amen* an nobohtan asega ara, nupu Coc in nupu Mecoe, um asjapicnai ra par ago nedoa: era alinag ara, um idivaig nauanahvig.

9 Eris atga ara an nobohtan asega, um arahed inuarin ineig eris amen iran a ilpu atimi upene, im lep inuarin-pece upene; ja is ahes incop

an nohatag ehele Atua um asuol, um auahas ra.

10 Eris lep ethaigse Tiapolo is imyialnag ra aien, an netpin ineig et amen iran incop im narekwas, *et* lep *amen* eahki nitai aleg im naprofeta efaifa; ehtijpu ohocred ahtaij irai iji adiat im niji epeig, irai iji mesese, um ti lep ti.

11 Kis lep ecetai dorona is ethi ainyak, is alupas *um* ahi, im lep yin is ateuc iran aien; is apohod u nobohtan im nohatag vai yin; eris eti ecetai tah anuarin ineig inyi amen iran.

12 Kis alum ilpu atimi emesmas ainyak, ilpu atimi alupas im tup atimi, najjivaig an nuhup u Atua; eris algei niji itasvitai: eris lep algei nitasvitai is ethi is eche, nika-vaig, *nitasvitai* va nitai umoh iran: eris asuptecnaig nintan imi ilpu atimi emesmas, et idivaig intas eris aged irai itasvitai iji ehki, is idivai edo ura.

13 Is atceija *nohui* ilpu atimi emesmas injop, is amen iran; is lep atceija *nohui* ilpu atimi emesmas Inmas, is amen iran, im lep Umatmas: eris asuptecnaig nintan imi atimi asega is idivai edo ura.

14 Eris ethaigse Inmas im Umatmas anliin netpin amen incop iran. Inmas epitpitac neigki.

15 Ara asega eris eti aged ra an nitasvitai va nitai umoh iran, eris ethaigse ra anliin netpin amen incop iran.

NUARIN-TAS ALUPAS 21.

KIS ecetai nohatag mat ainyak im nobohtan mat: is apan nohatag uhup im nobohtan uhup; is lep ti injop.

2 Kis lep ecetai Jerusalem mat ainyak Joanes, inuarin-pece itaup, is ahes ehele Atua an nohatag um asuol, eris ago upene et idivaig natahaig ineig eh yecrei yin va natidai o un.

3 Kis lep atahaijeg nohran ijinies ainyak, is ahes an nohatag, um ika, *Et* idim *amen* neom u Atua ehele atimi, etpu lep amen ehele ra aien, erupu ilpu atimi o un ara, etpu amen ehele ra a Atua, *etpu* Atua ura *aien*:

4 etpu yiri nidi nimtara asega a Atua; inyi ti lep eteuc inmas, im nehteigtaig, im intaig, inyi ti lep eteuc nohocred: et mun ti niji itai itu.

5 Is tas aien is ateuc a dorona, *um ika*, Ek idim ago mat niji itai asega ainyak. Is ika ehelek aien, Aged aiek: et inivaijec intas iji eigki, um upene neteuc iran vaig.

6 Is um ika ehelek aien, Eh mun ago ehni: ek Alfa ainyak um Omeca, natupun u itai im nehni u itai. Aien et ahvig wai aien, ekpu aiheuc vai yin ainyak, um aluman *inwai* an nehpan wai umoh.

7 Aien et esjilid aien, etpu ohuun niji itai asega aien; ekpu Atua o un ainyak, etpu lep hal unyak aien;

8 jai ilpu atimi auatialidi, im ilpu atimi imyiisjis nahcil, im ilpu atimi ago nedo er amcel vaig, im ilpu atimi atgei atmas, im ilpu atimi ago ingaijid, im ilpu atimi araces, im ilpu atimi alaijaheni vai ilpu atmas, im ilpu atimi asan tas ahcil asega, erupu amen ara an netpin et alauma vai incop im narekwas: inmas epitpitac neigki.

9 Is ham ehelek tah is ethi irai ilpu agelo is seven iji ehki, is amen ehele ra nipji itai is seven, is ohua an niji itai ohocred vaig apitac is seven, um tas ehelek, um ika, Apam aiek igcaki, ekpu ehvaig ehelum ainyak natahaig iyehki, ehgai Lam.

10 Kis wat alhuumtided ainyak, is imyiapan nyak aien an nedoon alupas um ijinies, um ehvaig ehelek inuarin-pece alupas iyehki, Jerusalem itaup, is ahes ehele Atua an nohatag um asuol,

11 is amen iran inlah u Atua: *is*

idivaig *inaunau* u unhath esjilid inauanau iran, is idivaig jasper, um lah et idivaig nitai naunau;

12 is eteuc iran nathatahau alupas um ijinies, is twelv neucse nathatahau iran, *eris amen* u eucse athatahau a ilpu agelo is twelv, eris lep aged iran nidai ilpu hal o Isreel is twelv:

13 *is eteuc* neucse athatahau is esej an ridjai o un; *um eteuc* neucse athatahau is esej an narutu; *um lep eteuc* neucse athatahau is esej an nuritoga atamaig, *um lep eteuc* neucse athatahau is esej an nette o un.

14 Is eteuc inhat alupas is twelv ithan nathatahau, *eris aged* iran nidai ilpu apostolo o Lam is twelv.

15 Aien is tas chelek aien, is apos nauanieg colt aien, mika yi asjaaic-naig an nuarin-pece, im nathatahau iran, im lep neucse athatahau iran.

16 Et for nahaijin nuarin-pece iyehki, jam tup apapa pikgaig: is asjaaicnaig an nuarin-pece aien an nauanieg, is fiftiin huntret mail: et tup apapa pikgaig nahaijin et for, im nijinies iran.

17 Is asjaaicnaig an nathatahau iran aien, is wun huntret *im forte* for nilpu nikman, *et idivaig* nasjaaicnaig u natimi, *is asjaaicnaig* iran a nagelo.

18 Eris acta nathatahau iran irai jasper; is colt esjilid inuarin-pece iyehki, um idivaig nitai nau-nau esjilid.

19 *Eris* ago upene nededuon nathatahau irai iji hat esjilid asega: is jasper inhat alupas uhup; *um safir inhat* tu; *um kalsetone inhat* dri; *um emeralt inhat* for;

20 *um sartoniks inhat* faiv; *um sarteus inhat* siks; *um krisolait inhat* seven; *um beril inhat* eet; *um topas inhat* nain; *um kraisor-prasus inhat* ten; *um jesind inhat* eleven; *um amedist inhat* twelv.

21 *Is tapanes* perl is twelv intap-

anes is twelv; nikavaig, is perl is ethi intapanes is ethi iran asega: *is colt esjilid* nefalaig an nuarin-pece, um lah et idivaig nitai naunau.

22 Kis eti ecetai neom ahlap eahki ainyak; et eom ahlap iran a Natimarid Atua emda acen, im lep Lam:

23 is eti upene va nuarin-pece iyehki nagesega, im lep inmhoc, mika yi lah vaig; is lah va najorai Atua, um lep itai lah iran a Lam.

24 Erupu atga an lah iran a nup urai iji pece er imyiatamaig ra: era lep imyiapan natimi alupas *ura* iran, im niji itai upene ura, a ilpu atimarid an nobohtan.

25 Eri ti atapanes intapanes iran an nadiat: va nitai ineig, nikavaig, inyi ti lep epeig eahki.

26 Uhpu imyiapan eahki niji itai upene, im niji itai esjilid, u nup urai iji pece.

27 Inyi ti apan iran tahi nitai has, ka *tah* et ago nitai er amcel vaig, ka *tah natimi asan tas* ahcil; ara sji eigki ache eris aged ra an nitas-vitai u Lam va nitai umoh iran.

NUARIN-TAS ALUPAS 22.

IS chvaig chelek nofowai ahula aien is wai umoh iran, is wela upene um idivaig nitai naunau, is ahes a dorona u Atua im lep u Lam.

2 *Is eteuc* incal umumoh vaig juu an niblan nefalaig im nofowai, an nahaijin im lep nahaijin, is eteuc niji ohoan is twelv, jam acheiachai sjipe, is oho urai iji mohoc: *is eteuc* nerincal iyehki par ago chechehe nup urai iji pece.

3 Inyi ti amen tahi nitai auabas atimi: ja etpu amen iran dorona u Atua im lep u Lam; erupu alaigheni vai yin a ilpu aheca o un:

4 erupu almoi nesganintan ara; *etpu lep amen* nidan irai ipjiuntara:

5 inyi ti epeig eahki; inyi ti lep

upene incop alahala vai ra, ka nai-joran nagesega; era lah ara vai naijorai Atua Natimarid: erupu atimarid ara irai iji mesese.

6 Is um ika aien, Et inivaijiec intas iji eigki, um upene nateuc iran vaig: is abrai nagelo o un a Natimarid Atua u ilpu profeta upene, mika yi asuptecnaig ehele ilpu aheca o un aien nitai iji eigki eris ika uhpu ago tupko.

7 Ekpu idim auroauro ainyak um ham: et mun ahesmoij aien et aminjinaig tas ahidan tas iji eigki aien an nitasvitai ineigki.

8 Kis ecetai nitai iji eigki ainyak Joanes, um atahaijeg. Kis wat atahaijeg ainyak um ecetai, kis cropse ainyak, mika ki alaigaheni an nuhup u neduei nagelo iyehki is ehvaig nitai iji eigki ehelek aien.

9 Is um ika ehelek aien, Jim ago *nedo ineigki* aiek, intau ehraheca u Atua akaijau, ek tah ainyak irai ilpu etoam ilpu profeta, im lep ra era aminjinaig tas iji eigki an nitasvitai ineigki: alaigaheni vai Atua aiek.

10 Is um ika ehelek aien, Jim atapanes tas ahidan tas iji eigki aiek an nitasvitai ineigki: et ubut-potet u naopan o un.

11 Aien et eti atoh nedo o un aien, inyi idim eti atoh nedo o un aien: aien et has aien, inyi idim has aien: aien et atoh nedo o un aien, inyi idim atoh nedo o un aien: aien et upene aien, inyi idim upene aien.

12 Ekpu idim auroauro ainyak um ham; et lep *amen* ehelek nimitan unyak *imi atimi*, mika ki alupai ra asega ainyak yi idivaig nauritai ura:

13 ek Alfa ainyak um Omeca, natupun u itai im nehni u itai, natimi uhup im natimi apitac.

14 Era mun ahesmoij ara era im-yiaiji tas alep o un ara, va erupu

leh incai umumoh vaig ara, um atga irai eucse athatahau, um apan an nuarin-pece iyehki.

15 *Erupu amen* itac a ilpu atimi auarobotpotedo, im ilpu atimi ar-aces, im ilpu atimi ago ingaijid, im ilpu atimi atgei atmas, im ilpu atimi alaigaheni vai ilpu atmas, im lep atimi asega era imyiarakei intas aheil ara um asaig.

16 Ek mun abrai nagelo unyak ainyak Iesu par asuptecnaig ehelemia nitai iji eigki vai ekalasia: kis ahes irai Tevit ainyak, um mapon, um moijeuv efehecas et eh-cchos an nathut u nadiat.

17 Et ika a Nesgan *Upene*, im lep natahaig ineig et leh natumyu un aien, Namu ham aiek. Etmu lep ika aien et atahaijeg aien, Namu ham aiek. Etmu ham aien et ahvig wai aien. Etmu lep tup unnyi inwai umoh vaig aien et merit vaig aien.

18 Ek idim asuptecnaig ainyak ehele atimi asega, era atahaijeg tas ahidan tas iji eigki ara an nitasvitai ineigki, *mika*, El et tup ispun ati tah *intas* tah natimi irai tas iji eigki, etpu atijai niji ohocred iji eigki iran a Atua, eris aged an nitasvitai ineigki:


19 el et atipagki *tah intas* tah inatimi irai tas ahidan tas iji eigki an nitasvitai ineigki, etpu atipagki inuarin o un an cai umoh vaig a Atua, im lep an nuarin-pece itaup, im lep irai itai iji eigki eris aged an nitasvitai ineigki.

20 Aien et asuptecnaig nitai iji eigki aien, et ika aien, Maiya, ekpu auroauro ainyak um ham: Emen. Etmu idim ucco, namu apam aiek, ak Iesu Natimarid.

21 *ETMU amen* ehelemia asega naiheuc o Iesu Kristo Natimarid uja. Emen,







10410W

Bible. Aneityum
、 Intas-Etipup mat.

Bible
Aneityum
1863

UNIVERSITY OF TORONTO
LIBRARY

DO NOT
REMOVE
THE
CARD
FROM
THIS
POCKET



